

# Haalin Mallano



The New Testament in the Banna language of Ethiopia

**Haalin Mallano**  
**The New Testament in the Banna language of Ethiopia**

copyright © 2014 SIM International

Language: Banna (Hamer-Banna)

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

    You must give Attribution to the work.

    You do not sell this work for a profit.

    You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

    You include the above copyright and source information.

    You do not sell this work for a profit.

    You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-10-15

---

PDF generated using Haiola and XeLaTeX on 20 Apr 2023 from source files dated 30 Nov 2021

c016ad2a-86fa-56e3-93a0-340e8e22d603

## Contents

Maatoos . . . . .	1
Marquoos . . . . .	53
Luqaas . . . . .	86
Wannis . . . . .	139
Yittsadhaanasa Waadimano . . . . .	176
Roome . . . . .	225
Bira Qorontoos . . . . .	246
Lansoa Qorontoos . . . . .	268
Galatia . . . . .	282
Epsoon . . . . .	290
Pilbhisoos . . . . .	298
Qolasias . . . . .	304
Bira Teselonqe . . . . .	310
Lansoa Teselonqe . . . . .	315
Bira Thimaatoos . . . . .	318
Lansoa Thimaatoos . . . . .	324
Tiito . . . . .	329
Pilmona . . . . .	332
Ibra . . . . .	334
Yayqoob . . . . .	351
Bira Bhethiroos . . . . .	357
Lansoa Bhethiroos . . . . .	364
Bira Wannis . . . . .	368
Lansoa Wannis . . . . .	374
Makkansoa Wannis . . . . .	376
Yiwda . . . . .	378
Wannissa Shedintono . . . . .	380

# Maatoosin Thaapoono

## Imbaa Wontea Yesus Kiristoossa Dhacchintan Goynam

### Giyayno

### Barjosa Upsino

*Ardinta*

Maatoos Haalin Mallansa bira mathaapaam ki thaapade. Maatoos Jesus kinin kamaana tabhi lamaana eenasa kalaane. Jesus kiam kinin eelenka, Maatoos gibirin kaccheane. Marqoos mathaapinte nammo kisa Lewi koda hambhe.

Maatoos mathaapinam kinin thaapoono kattsika Ayiwd eenam qaabaysene. Jesus Barjoyn qadhaa Ayiwd eenasa bit kinin dohonam dhettsana kattsii ki qaabade. Barjo bitamonsa thoothi kida giye.

Kaa mathaapa Ena Mallan mathaapinbee Haalin Mallan mathaapinbeam kidar yettseane. Barjokala qansayse eenna giyayna eena Barjoyn qadhaa Kiristoossa ke thaapade; kenin giyono Imbaa wontea Yesuska konin thothonam koda dhee.

Kaa mathaapaam raq lankaydar kashana dandima ko dandime:

1. Bitaasa nivintano (1:1–4:11)
2. Bitaasa upsino (4:12–7:29)
3. Bitaasa hayntono (8:1–10:42)
4. Bitaasa bitamon kamsino (11:1–13:52)
5. Bitaasa bhochchino (13:53–18:35)
6. Bitaasa gaaleno (19:1–25:46)
7. Bitaasa dembbhinbee dhaabhintanbe (26:1–28:15)
8. Bitaasa macchin upsino (28:16–20)

*Yesus Kiristoossa Muldhano*

*Luq 3:23–38*

<sup>1</sup> Abraambee Dawtbesa muldhara nivaa Barjoyn qadhaa Kiristoos Yesussa adhadhin goyno yinne:

<sup>2</sup> Abraam Yisaaqam ki adhade;  
Yisaaqaar Yayqoobam ki adhade;  
Yayqoobaar Yiwdabee kisa indanaanabeam ki adhade.

<sup>3</sup> Yiwdaar Tivimaarka Paareesbee Zaarahibeam ki adhade;  
Paareesaar Hethroonam ki adhade;  
Hethroonaar Raamam ki adhade.

<sup>4</sup> Raamaar Aminaadaabam ki adhade;  
Aminaadaabaar Navasoonam ki adhade;  
Navasoonaar Selimoonaar Selimoonam ki adhade.

<sup>5</sup> Selimoonaar Revaabka Boveezam ki adhade;  
Boveezaar Uruteka Iyobeedam ki adhade;  
Iyobeedaar Iseyam ki adhade.

<sup>6</sup> Iseyaar Bitaa Dawtam ki adhade.  
Dawt Oriyon geshonka Soloomoonam ki adhade.

<sup>7</sup> Solomoonaar Roobihamam ki adhade;  
Roobiamaar Abiyaam ki adhade;  
Abiyaar Asaam ki adhade.

<sup>8</sup> Asaar Iyosaapitham ki adhade;  
Iyosaapithaar Iyoramam ki adhade;  
Iyoramaar Oozianam ki adhade.

<sup>9</sup> Oozianaar Iyovatamam ki adhade;  
Iyovatamaar Akaazam ki adhade;  
Akaazaar Yizqiasam ki adhade.

<sup>10</sup> Yizqiasaar Minaseam ki adhade;  
Minasear Amoonam ki adhade;  
Amoonaar Iyosiyasam ki adhade.

<sup>11</sup> Iyosiyasaar Israveel eenam Baabiloon peendar uxate yiidhon wodanka, Yovakinbee kisa indanaanabeam ki adhade.

<sup>12</sup> Yovakinaar Israveel eenam Baabiloon peendar uxate yiidhonsa budonte, Selatialam ki adhade;  
Selatialaar Zerubaabeeelam ki adhade.

<sup>13</sup> Zerubaabeeelaar Abiyoodam ki adhade;  
Abiyoodaar Eliyaqemam ki adhade;  
Eliyaqemaar Azoram ki adhade.

<sup>14</sup> Azooraar Sadoqam ki adhade;  
Sadoqaar Akimam ki adhade;  
Akimaar Eliyodam ki adhade.

<sup>15</sup> Eliyodaar Alaazaram ki adhade;  
Alaazaraar Mataanam ki adhade;  
Mataanaar Yayqobam ki adhade.

<sup>16</sup> Yayqoobaar Yoseepam ki adhade. Yoseepaar Barjoyn qadhaa Kiristoos hambhea Yesusam adhon Mayriyamsa geshoane.

<sup>17</sup> Ogonante Yesussa muldhano Abraamdara yedayse Dawtka yekka, tabhi oydi adhadhi ko maatade. Pir Dawtdara yedayse Israveel eenin Baabiloon peendar uxate yiidhonka yekka, tabhi oydi adhadhi ko maatade. Ogoraar Israveel eenam Baabiloon peendar uxate kenin tiidhondara yedayse Kiristoossa adhadhinka yekka, tabhi oydi adhadhi ko maatade.

*Yesus Kiristoossa Adhadhidino  
Luq 2:1-7*

<sup>18</sup> Yesus Kiristoossa adhadhino yinne: Indan Mayriyamam Yoseep kinin seesonsa budonte, kinka kiam ke keemima, kodi Manpas Gazanka sirmayse ko haapadhade.

<sup>19</sup> Koam seesaa Yoseepaar eedi tipa kinin dohonna, “Een birante koam inin ooshinserra aachika koam ida gare” hamayse ki qaabade.

<sup>20</sup> Kidiar ogoam qaabite ki daaka, Barjosa gaana haamaka haapadhayse, “Ya Dawt muldhara adhadhaa Yoseep, Mayriyamsa sirmidino Manpas Gazankane; eedi koam sirsade hamayse hanin keemenam kurtumbhaabhode. <sup>21</sup> Kidiar naasi anngi koda adhe. Adhadhea naasaar yisa eenam seesora kinin dhacchenna, naabenam kisa Yesus hamayse hada wode” kina ki hamade.

<sup>22-23</sup> “Marrato! Naano dinngillo sirma ko sirme;

naasi anngiar adha ko adhe;

kisa naabenamaar Amaanuveel hamayse koda wodadhe”

hamayse Barjokala qansayse eenna giyeaka Barjo Imbaayn giyoono konin thoothoadettsi ogono wul yin ko maatade. Ogonoar Amaanuveel hamintano “Barjo wombetene” hamintane.

<sup>24</sup> Yoseepaar raatira dhaabhayse Barjosa gaana kinin giyondettsi Mayriyamam ki keemade. <sup>25</sup> Keemayse naasaam konin adhenka yekka Yoseep konka wodhadehe. Yoseepaar naasasa naabenam Yesus hamayse ki wodade.

<sup>1</sup> Bitaa Herodis bitimayse kinin dohon wodanka, Yesus Yiwda peen Betelem katanante kinin adhadhonsa budonte yin ko maatade: Marrato! Eezinin shadayse os birante hamota dohon yerinaam dhesayna eena haynsa utambarka Yerusaalem katamandar ke nivade. <sup>2</sup> “Ayiwd eenasa bitaa adhadhaa hamote ki dahaa? Kinin adhadhonam eshkea eeziniam haynsa utambar haapayse kina goodimota wo nivade” ke hamade.

<sup>3</sup> Kenin giyenam Bitaa Herodis qansayse ki targadhade; Yerusaalemir dohoono eenoar kimbesana kinka kurtumbhayse ko targadhade. <sup>4</sup> Ogonante Bitaa Herodis gudullasa hayonabee Musesa yigginam dhettsayna eenabe wulam buskayse, “Barjoyn qadhaa Kiristoos hambhea kinin adhadhayno ranqo hamotene?” hamayse keam ki oysade. <sup>5</sup> Kediar yin giyayse kina ke maasade: “Kiristoosin adhadhayno Yiwda peen Betelem katamantene. Harrna hambhidianna, ena Barjokala qansayse eenna giyea kinin giyaadettsi:

<sup>6</sup> ‘Yiwda peente dohoono ya Betelemo,  
hamin ko dahaannaar katamanakalanka ya tokattane.  
Israveel zarsin innonam toolea entsea ea hakalanka kida ute’  
hamayse konin thaapadhonnane” ke hamade.

<sup>7</sup> Ogora Bitaa Herodisaar igina eena eezinin shadayse dhesaynaam aachika yikal eelayse, “Eeziniam haa ye haapaa?” hamayse agaa wodaam kekal payya hayayse oysate ki dhesade. <sup>8</sup> Rooroam yinin dhesonsa budonte, “Keeda yedi Betelem katamandar yivee” hamayse keam ki yittsade. Yinin yittsenkaar, “Yedi yivayse adhadhaa naasaam payya oysayse zagee. Yenin haapon wodanka ina nivayse giyee. Intaar yivayse kina goodimayda goodime” hamayse kena ki giyade.

<sup>9</sup> Kediar bitaakala ogoam qansayse Betelemdar yivo ke dhaabhade. Kenin yivenka haynsa utambar kenin haapaa eezinia naasayn dohon raqindar nivayse kinin woyenka yekka keam entsite ki dahade. <sup>10</sup> Eeziniam kenin haapon wodanka, kattsi ke wozadhadde. <sup>11</sup> Oonintear ardayse naasabee indan Mayriyambeam ke haapade. Kumpurdhaysear kina ke goodimade. Ogora kenin bovon koymonam bulayse worqibee, qunyabee, kerbe hambhen gaamen shittonbeam iminto kina ke imade.

<sup>12</sup> Ogora kenin maatenka, Bitaa Herodisdar kenin vivoamadettsi Barjo haamaka kena kinin giyonna, goyti abka yisa peendar maataate ke yivade.

### *Yoseep Naasabee Indanbeam Gibthdar Bavate Kinin Yivoono*

<sup>13</sup> Eezinin shadayna kenin yivonsa budonte, Barjosa gaana Yoseepkal haamaka haapadhayse, “Yoseep, dhaabhaa! Bitaa Herodis naasaam deesana kida zage. Ogonante ya naasabee indanbeam bavate Gibth peendar saana yivaa. Maatayse hanin nivoadettsi inin hana giyenka yekka ogote dahaa” hamayse kina ki giyade. <sup>14</sup> Ogonante Yoseep sootinka dhaabhayse naasabee indanbeam bavate Gibth peendar ki yivade. <sup>15</sup> Kediar Bitaa Herodisin diyenka yekka Gibth peente ke dahade. Ogonoar ena Barjokala qansayse eenna giyea ea aponka Barjo Imbaa yi giyna: “Isa naasaam Gibthra i eelade” kinin hamoono upsino konin thoothoadettsi yin ko maatade.

<sup>16</sup> Ogo wodanka Bitaa Herodisaar igina eezinin shadayse os birante hamota dohon yerinaam dhesayna kikal nivima kinin yivonam dhesayse, “Harrna ke iam taysaa?” hamayse kattsi ki wacimade. Ogonante poolisana yinnaam Betelem katamanbee kosa gasante dohon peenbedar yittsayse, leve lamaabee leve lamaasa choobarbe dahaana naana anngina wulam ki dettsade. Ogonoar eezinin shadayse dhesaynakala eeziniayn kena haapadhon wodanam oysate kinin qansonnanne. <sup>17-18</sup> Ogonoar “Raama peente eepibee gebhi ilatbe ko qansimade.

Raaheel kosa naana diyate kinin maqonna,  
yisa naanana ko eepade.

Eenin koam wocchinsenka darshana damadehe” hamayse ena Barjokala qansayse eenna giyea Ermeasin giyondettsi ko thoothade.

### *Yesusam Gibth Peera Bavate Naazret Katamandar Kenin Maatoono*

<sup>19</sup> Ogoraar Bitaa Herodis kinin diyonsa budonte, Barjosa gaana Gibth peente Yoseepkal haamaka haapadhyayse, <sup>20</sup> “Shedaa! Naasaam deesota zagayna eena diydine. Keeda ya naasabee indanbeam hanka bavate Israveel peendar yivaa” kina ki hamade. <sup>21</sup> Ogonante Yoseep naasabee indanbeam bavate Israveel peendar maataate ki nivade. <sup>22</sup> Ogo wodanka Bitaa Herodissa naasa Arkeloos imbaa raqaate Yiwda peendar kinin bitimonam qansayse Yoseep “Yiwda peendar keeda yivattine” hamayse ki kurtumbhade. Ogoraar kina haamaka konin giidhonna, Galila peendar ki yivade. <sup>23</sup> Galila peen yeskayse Naazret katamante dooqayse peen ogo eedi ki maatade. Ogonoar “ ’Naazret peen ea’ hamayse kiam koda eldhe” hamayse ena Barjokala qansayse eenna giyaynasa aponka Barjoyn qadhaa Kiristoos goynsa giidhoono ko thoothade.

## 3

### *Shivea Wannisin Giyoono Barjosa Upsino*

*Marq 1:1-8; Luq 3:1-18; Wannis 1:19-28*

<sup>1-2</sup> Ogo wodanka Shivea Wannisar, “Marrato! Barjoyn bitimayno wodano yeskidine. Ogonante seeson waadimanam garayse Barjodar maatee” hamaate Barjosa upsinam giyada Yiwda darandar ki yivade. <sup>3</sup> Ogonoar

“ ‘Marrato! Barjoyn yekal nivenna,  
yesa woylaminam ashkee; goynamaar kina gaz hayee’ hamayse  
ilatea easa upsino darante koda qansime”  
hamayse Barjokala qansayse eenna giyea Isiasin giyoono Wannis goysane.

<sup>4</sup> Wannissa apallo gamalesa sitika ashkadhoonone; yisa karnantear qalbatha kida dhaxe. Kinin itsaynoar seerebee qoa kribene.

<sup>5</sup> Ogo wodanka Yerusaalem katamanbee, Yiwda peen wulbee, Yordaanoos baynsa gasante dohon peen wulbera eeno Wanniskal nivite ko dahade. <sup>6</sup> Nivayse yisa seesonam kinin buuthenka, Wannis Yordaanoos baynte keam kida shive.

<sup>7</sup> Ko dahaannaar Parisa eenabee Saduqa eenabera thoothino eeno Wanniskal shi-idhana konin nivenka Wannis koam shadayse, “Yedi qarshi naanato, niven Barjosa wacimera gobayse yenin dhaqoadettsi yeam kiilaa hayne? <sup>8</sup> Ta keeda seeson waadimanam garayse Barjodar yenin maatonam dhehen payyan waadimanam waadadhee. <sup>9</sup> Yesa woylaminkaar, ‘Wodi Abraam naasine’ hamayse erimeebhode. Yena ida giye: Barjo yi zaganna kina sennara Abraamna naasi hayayse dhaasana dama ki dame. <sup>10</sup> Ta haaqanaam taxate dhabayno tesimbho demente kesa wodadhidine. Ogonante payyan aapin ushimina haaqana wulam taxate nuunte koda dhabadhe. <sup>11</sup> Keeda seeson waadimanam garayse Barjodar yenin maatoono may konin maatoadettsi inta noqoka yeam ida shive; ko dahaannaar isa budonte nivea kidi Manpas Gazanbee nuubeka yeam kida shive. Kidiar idara kantanka sageane. Inta kisa roonsa dunngurin hattear baskana damattine. <sup>12</sup> Gazgonam qanayse puqlara aapinam kinin bulea anngamo kisa aaninte ko dahade; aapinam payya ashkayse kononte kida kee; puqulanamaar dikimon nuunte kida koqe” ki hamade.

### *Yesussa Shiiddhidino*

*Marq 1:9-11; Luq 3:21-22*

<sup>13</sup> Ogo wodanka Yesus Wannis kiam kinin shivoadettsi Galila peera dhaabbhayse Yordaanoos bayndar ki nivade. <sup>14</sup> Wannisaar, “Iam ha shive koda zaske; haam i shive ya idar haminaa nivaa?” hante kiam marana ki dhaabbade. <sup>15</sup> Yesusaar kina yinin

maasenka, “Yer wulka tipa waadima woam konin zaskenna, ta iam ya shivaa” ki hamade. Ogonante Wannis ee hamayse kiam ki shivade.

<sup>16</sup> Yesusaar yinin shiidhadhonsa budonte, saanawa noqora ki utade. Ogo wodanka cecino ko bulimade; Barjosa Manpasinoar waleedettsi hanchayse Yesusdar konin dooqen Wannis ki haapade. <sup>17</sup> Tapir, “Inin nashea isa Naasa kaane; inta kanka ida wozadhe” hamea upsi cecira ko qansimade.

## 4

### *Yesussa Taysate Shedahhidino*

*Marq 1:12-13; Luq 4:1-13*

<sup>1</sup> Ogosa budonte Seethaanin kiam taysate shedoadettsi Yesusam Manpas Gazano darandar ko entsade. <sup>2</sup> Ogo darante Yesus eedi lamaa kaysa roorobee sootibe itsima yinin qoomonsa budonte, ki daaqardhade. <sup>3</sup> Ogo wodanka taysate shedeaa Seethaanar Yesuskal theedayse, “Ya Barjo Naas ha daana, senna kinana ‘Balasha maatee’ hamaa” kina ki hamade. <sup>4</sup> Yesusaar kina yinin maasenka,

“ ’Eedinin dahayno Barjoyn giyen upsin wulkane;

balasha itsayse bish dehehe’

hamayse thaapadhidine” ki hamade.

<sup>5</sup> Ogora pir Seethaan Yesusam yinka entsate yivayse gazan kataman Yerusaalemir dohon Barjosa gazan ooninsa illindar bulate woysayse, <sup>6</sup> yin ki giyade: “ ’Haam kenin tooloadettsi Barjo yisa gaananana giya ki giye.

Kediar roon hannonam seenin qanoamadettsi

yisa aaninka keedhayse haam yeda ke yede’

hamayse thaapadhidine. Keeda ya Barjo Naasi hanna, kora mia bhulate hanchaa!” kina ki hamade. <sup>7</sup> Yesusaar kina “Pir, ‘Hasa Imbaa Barjoam taysate shedaabhode!’ hamayse thaapadhidine” ki hamade.

<sup>8</sup> Ogora pir Seethaan Yesusam dhukan gudubhondar yinka entsate utayse, peendar dohon bitamon wulbee kesa gobshinbeam kina dhahayse, <sup>9</sup> “Kumpurdhayse ina ha goodimidianna, ko wulam hana imayda ime” ki hamade. <sup>10</sup> Ogo wodanka Yesus “Ya Seethaan, ikalanka pegimbhaa! ‘Hasa Imbaa Barjona kumpurdhayse kibisheana goodimaal’

hamayse thaapadhidine” kina ki hamade. <sup>11</sup> Ogo wodanka Seethaan Yesusam garayse kinin yivenka Barjosa gaananaar nivayse kina keda waadadhe.

### *Yesus Galila Peente Barjosa Upsinam Giyan Kinin Yedoono*

*Marq 1:14-15; Luq 4:14-15*

<sup>12</sup> Yesus Wannisin yedate dhaxadhonam yinin qanson wodanka Galila peendar ki yivade. <sup>13</sup> Pir Naazret katamanam garayse Zaabloonbee Niptaaleembe peensa gasan bazinsa aponte dohon Qipirnaahoom katamante yivayse ki dooqade. <sup>14-16</sup> Yin konin dohoono

“Bazindar yiven goyndar

Yordaanoos baynsa saabar haapadhayno

Ayiwdtaymina eenanin thoothon Galila peente,

thipante dahaana Zaabloonbee Niptaaleembe eenana

shaakano gembho ko shaakade.

Dembhin shiponin shipshon peente dahaana

kena shaakano ko shaakade”

hamayse Barjokala qansayse eenna giyea Isias aponka giidhoono konin thoothoadettsi ko maatade.

<sup>17</sup> Rooroa agaara yedayse Yesus “Barjosa bitamono yekal theedidine; ogonante seeson waadimanam garayse Barjodar maatee” hamada giyan ki yedade.

*Yesus Kaaran Yedayaam Yikal Kinin Eloono*

*Marq 1:16-20; Luq 5:1-11*

<sup>18</sup> Yesus Galila bazinsa aponka kinin yivenka, Bhethiroos hambhea Simoonbee kisa indanaasa Indiriasbeam ki haapade; kediар kaaran yedayaam yinin dohonna, yisa kaaran yeden zaaninam bazindar apite ke dahade. <sup>19</sup> Yesusaar, “Marrato! Yedi dhaabhayse isa paanan nivee. Kaaran yenin yedendettsi Barjosa bitamondar eenaam yenin maasoadettsi yeam ida haye” ki hamade. <sup>20</sup> Kediар kaaran yininkay yeden zaaninam saanawa garayse Yesussa paanan yivan ke yedade.

<sup>21</sup> Ogora os mak kinin hamenka, pir indanaas lamaa waaniam ki haapade. Kediар Zabdoos naana Yayqoobbee Wannisbene. Naana iginaar imbaa Zabdoosbesana kinka bazindara sagadhen gonngalante dooqayse kaaran yininkay yeden zaaninam keda ashke. Yesusaar keam ki eelade. <sup>22</sup> Kediар saanawa bazindara sagadhen gonngalanbee imbaa kenteabeam garayse Yesussa paanan yivan ke yedade.

*Yesus Thoothin Eenam Kinin Dhettonbee Kinin Pacchonbe*

*Luq 6:17-19*

<sup>23</sup> Ogora Yesus Ayiwd eensa bukin raqinte dhettsada, Barjo bitamonsa dhacchintan upsinam giyada, eenaam yedon waana waana hamon burqon wulamaar pacchada Galila peen wulir yaayte ki dahade. <sup>24</sup> Yesusin waadadhonbee giyonbe Sooria peente dohon een wulna ko qansimade. Eenoar waana waana hamon burqonka hajadhon een wulam Yesuskal bavate ko nivade. Hajadhon eensa iintear beeronaka yedadhaanabee, ruminin dhabaynabee, maqasinka malgimayse wobaanabe ke daaka, Yesus igina eenaam kesa hajimora ki pacchade. <sup>25</sup> Galila peenbee, Tabhi Katamana hambhen peenbee, Yerusaalem katamanbee, Yiwda peenbee, Yordaanoos baynsa saabar dohon peenbera nivoono thoothino eeno Yesussa paanan ko yivade.

## 5

*Dhukandar Dahayse Yesusin Dhetsoono*

<sup>1</sup> Yesusaar eensa thoothamonam shedayse dhukandar utayse ki dooqade. Kisa paanan yivayno enoar kikal theedi konin nivenka, <sup>2</sup> yin giyayse keam dhettsan ki yedade:

<sup>3</sup> “Barjosa Manpasinka ‘Inta kantaysa qolmaane’ hamayse  
meten yinnonam toskayna  
Barjosa bitamono kenti konin dohonna, kedi ke wozadhe.

<sup>4</sup> Woylaminka yisa qaabayse burqadhyyna  
Barjoyn keam wocchinsenna, kedi ke wozadhe.

<sup>5</sup> Lemmakkoka meten yinnonam toskayna  
peenam kenin tiyenna, kedi ke wozadhe.

<sup>6</sup> Tipa haydhenam daaqardhaynabee dheebarbhaynabe  
kenin mishenna, kedi ke wozadhe.

<sup>7</sup> Eedina burqadhyyna  
Barjoyn kena kinin burqadhenna, kedi ke wozadhe.

<sup>8</sup> Barjo birante woylaminsa payyana  
Barjoam kenin haapenna, kedi ke wozadhe.

<sup>9</sup> Kinka gemmaanaam qaashinsayna  
‘Barjo naanane’ keam hambhenna, kedi ke wozadhe.

<sup>10</sup> Tipan waadimanna hamayse oytaydhayna  
Barjosa bitamono kenti konin dohonna, kedi ke wozadhe.

**11** “Ina hamayse eenin yeam iirenkabee, oytayenkabee, yerin siyon wulam buudamoka yedar kenin giyenkabe wozadhee. **12** Yena kashadhayno bazano cecinte gebhi konin dohonna wozadhee. Yesa birayse Barjokala qansayse eenna giyaynaam ogodettsi keam oytaydhidine.

*Sooqobee Shaakabesa Kamsino  
Marq 9:50; Luq 14:34-35*

**13** “Yedi peendar dohon eenna sooqone. Sooqo daathan garidi ko hanna, harka ko daathisadhe? Mayante koam bulate laldhaysaka eedin koam rooka tigera ab konka haydhea yer solehe.

**14** “Yedi peendar dohon eenna shaakane. Dhukandar dahaa katama aachimana dandimehe. **15** Shaakanam shashkayse yer daran guupea eedi solehe. Ooninte dahaana wulna konin shaakoadettsi, dhev hamon raqindar ko wodadhe. **16** Ogodettsi yesa payyan waadimanam shedayse cecinte dahaa Imbaa yinteam eeno konin gobshoadeettsi, yesa shaakano eensa birante ko shaake.

*Barjo Yigginsa Yesusin Dhettsongo*

**17** “Inta Musesa yigginbee Barjokala qansayse eenna giyaynasa upsinbeam thoosana i nivade; koam shiishana inin nivaa yena ko maatabhoode. **18** Inta yena gon ida giye: Cecinbee peenbe sagenka yekka wul thootha ko thootha; Muse yigginsa pidal way zaaka kala hattear shidhehe. **19** Ogona kina giidhaanasa iira tokaa maataa kalaam kottseabee waani eenin kottsoadettsi dhettseabe eedi hay ki hannaar, Barjosa bitamonte een wulsa choobar kida dee. Barjoyn guyon wulam waadadheabee waani eenin waadadhadettsi dhettseabe eedi hay ki hannaar, kidi Barjosa bitamonte gebhi kida hambhe. **20** Inta yena ida giye: Yenno tipamono Musesa yigginam dhettsaynabee Parisa eenabesa tipamora ko sagaamma, Barjosa bitamon raqindar hamin ko dahaakaar ardattene.

**21** “Ena wodanka dahaana eenana, ‘Deesaabhode’ pir, ‘Deesea wuldar pirdi koda zaske’ hambhonam yedi qansidine. **22** Inta yena ida giye: Aananta yintedar wacimea wuldar dhabsha ko dhabshadhe. Aananta yinteam ‘Ya kaa pootimaa!’ hamayse iirea wuldar peensa donzanaka pirda ko pirdadhe. ‘Ya kaa dembheal!’ hamayse giyea wuldar lay dikimon nuun pirdino kiam koda toole.

**23** “Ogonante Barjona hanin imen imintonam marshan machadhen raqindar hanin thettsen wodanka, aananta hantea woylamka hadar yer kinin atea hana bhoqidianna, **24** hasa imintonam marshan machadhen raqinte garayse birayse ha aanantakal yivayse kimbesana qaashimaa. Ogora maatayse Barjona hasa imintonam imaa.

**25** “Hambesana wacimaa ea haam ki bersaysaka, kimbesana kinka pirdin oonindar yenin yivenka, goynte dahayse kimbesana kinka qaashimaa. Yin ha hayaamma, hambesana wacimaa ea haam pirdin pirdea eana saskate kida ime. Pirdin pirdea ear haam poolisana saskate kida ime; yaar dhaxin ooninte hada arde. **26** Inta hana gon ida giye: Hanka kashaa hambhon wulam hanin kashate macchenka yekka dhaxin oonira hamin ko dahaakaar utattane.

*Sharmucimakkonsa Yesusin Dhettsongo  
Maat 19:9; Marq 10:11-12; Luq 16:18*

**27** “ ‘Sharmucimaabhode’ hambhonam yedi qansidine. **28** Inta yena ida giye: Maam shedayse anngardhea wul ogo wodanka yisa woylaminka kombesana sharmucimidine.

**29** Mizaqa aapea hantea haam seesondar arsea ki hanna, bulate hadara kiam dhabaa. Harrna hambhidianna, bishino wul lay dikimon nuunte konin dhabadhera, hannon bishinsa waa kalaam hakalanka ha kaysidianna hana payyane. **30** Mizaqa anta hantea haam seesondar arsea ki hanna, taxate hadara kiam dhabaa. Harrna hambhidianna,

bishino hasa wul lay dikimon nuunte konin dhabadhera, hannon bishinsa waa kalaam hakalanka ha kaysidianna hana payyane.

<sup>31</sup> “ ’Geshon yinnonam bulate oytea eedi hay ki hannaar koam yininna bulate oytonsa goynam giyea warqat kona ki ime’ ena ko hambhade. <sup>32</sup> Intaar yena ida giye: Sharmucimakko goytika dayma geshon yinnonam yikalanka bulea wul konin sharmucimoadettsi koam kida haye; geshoayn bulon maynam keemea ea kidi sharmucimidine.

### *Mallan Goynsa Yesusin Dhettoono*

<sup>33</sup> “Pir ena wodanka dohon eenna ‘Buudaka malleebhode. Barjona hanin imon mallan upsinam haya’ hambhonam yedi qansidine. <sup>34</sup> Intaar yena ida giye: Hamin ko dahaannaar malleebhode. Cecino Barjosa bitamon borkotono konin dohonna, cecinka malleebhode; <sup>35</sup> peeno Barjosa roonin tigayno konin dohonna, peenkaar malleebhode. Yerusaalem gebhaa bitaasa katamano konin dohonna, Yerusaalemkaar malleebhode. <sup>36</sup> Hasa metensa sitinam cawlibee thiyanbedar hayayse maasana hanin damiminna, hasa metenkaar mallaabkhode. <sup>37</sup> Ogona yesa dhalqinam ‘Yin ko dee’ hamidi ye hanna, ‘Yin ko dee’ hamee; ‘Yinteh’ hamidi ye hanna, ‘Yinteh’ hamee. Igina upsinakalanka sagoono upsino wul siyonkalankane.\*

### *Halo Maasa Zaskiminsa Yesusin Dhettoono*

*Luq 6:27-36*

<sup>38</sup> “ ’Aapin uxaasa aapino ko uxadhe; atsin aysaasaar atsino ko aysadhe’ hambhonam yedi qansidine. <sup>39</sup> Inta yena ida giye: Siyan yedar hayayna eenasa halon maaseebhode. Hasa mizaqa karcam ceveana warkata karcam kina shirshaa. <sup>40</sup> Eedi kalaa hasa shuraabeam hakalanka tiyo zagayse haam bersidi ki hanna, pir hasa kotteam kina imaa. <sup>41</sup> Eedi hayo kalaa ‘Basken innonam ina baskayse goyi orgo inka dhaabhaa’ hamayse kantaka haam dhaasidi ki hanna, ya kinin zagaara kina saskayse yivima. <sup>42</sup> Hakal miskeana imaa; hakal bazimota oysaam maraabhode.

<sup>43</sup> “ ’Ha aanantaam nashaa; haam jibbeam jibbaa’ hambhonam yedi qansidine. <sup>44</sup> Inta yena ida giye: Yeam jibbayna eenaam nashee; yeam oytayaynana Barjoam miskee. <sup>45</sup> Ogo yenin hayenka, cecinte dahaa Imbaa yenteasa naasi yeda maate. Kidi siyanabee payyanabedar yisa haynam kida bule; tipan waadadhaynabee tipan waadadhiminabedar yisa doobinam kida qanse. <sup>46</sup> Yeam nashaynaam bish ye nashina, yer har baza yeda haape? Eena cubbona gibirin kacchaynaar yin haya ke haye. <sup>47</sup> Yeam nashaynaam bish ye nagaysina, waani eendara sagi yer har ye waadadhaa? Barjoam dhesimina eenaar ogodettsi keda haye. <sup>48</sup> Keeda cecinte dahaa Imbaa yentea gon hamaa kinin dohondettsi, yediar gonin hamma maatee.

## 6

### *Qambhinana Imbhensa Yesusin Dhettoono*

<sup>1</sup> “Barjona waadadhaden payyan waadimanam ‘Eedi ko iam shede’ hamayse yenin hayoamadettsi mete yesaam gishee. Ogotay ko hamma, cecinte dahaa Imbaa yenteakalanka yenin tiyea baza yesa solehe. <sup>2</sup> Ogonante ya qambhinana imintonam hanin imenka, maltina eenadettsi maataabkhode. Kedi eenin keam shedayse shawkoadettsi hamayse bukin raqinbee goynbedar kenin waadadhennam yisa may keda dhee. Inta yena gon ida giye: Kedi yina yesken bazanam tiydine. <sup>3</sup> Keeda ya qambhinana

---

<sup>5:31</sup> Yiggi 24:1. <sup>5:33</sup> Lewi 19:12; Payda 30:2; Yiggi 23:21. \* <sup>5:37</sup> “Siyonkalanka” hamea agaa “siya eakalanka” kanka hamana dandima ko dandime. “Siya ea” haminta “Seethaan” hamintane. <sup>5:38</sup> Ut 21:24; Lewi 24:20; Yiggi 19:21. <sup>5:43</sup> Lewi 19:18.

imintonam hanin imenka, eedinin haapoamadettsi hayayse aachika imaa.\* <sup>4</sup> Aachinka hanin imenam haapea Hamba hana bazanam kida ime.

### *Barjoam Miskadhensa Yesusin Dhettsongo*

*Luq 11:2-4*

<sup>5</sup> “Yedi yenin miskenka, maltina eenadettsi maateebhode. Kedi kesa miskenam eednin haapoadettsi hamayse bukin ranqabee goyna parmanabedar woyayse miskana keda nashe. Inta yena gon ida giye: Kedi yina yesken bazanam tiydine. <sup>6</sup> Ya hanin miskenka, ooninsa gulinte ardayse kerin diithayse haapadhima Hambaam miskaa. Haapadhimonam haapea Hamba hasa bazanam hana kida ime. <sup>7</sup> Yedi yenin miskenka, Barjoam dhesimina eenadettsi sun maasite maasite dhalqeebhode. ‘Wosa upsin wo thoosanna, Barjo woam kida qanse’ hamayse keda bhocche. <sup>8</sup> Yedi kedettsi maateebhode. Ye miskima birayse yeam zasken wulam Imbaa yentea dhesa ki dhese.

<sup>9</sup> “Keeda yedi yin giyayse miskee:

Cecinte dahaa Imbaa wontea,  
nammo hasa ko gazisadhe.

<sup>10</sup> Bitamono hanno ko nive.

Bhocchino hasa cecinte konin maatendettsi,  
peentear yin ko maateka.

<sup>11</sup> Kina rooroana wona zasken galan wona imaa.

<sup>12</sup> Woam seesaynana wonin garendettsi,  
wonnon seesonamaar wona ya garaa.

<sup>13</sup> Siyondar arsota taysayno wodar konin nivoamadettsi woam gishaa.  
Siyonkalanka<sup>†</sup> woam dhacchaa.

[Bitamonbee, kantanbee, gobshinbe lay hantine; amiin.]

<sup>14</sup> Eenna kesa seesonam ye garea hanna, cecinte dahaa Imbaa yentea yenaar yesa seesonam gara ki gare. <sup>15</sup> Eenna kesa seesonam ye garaamma, Imbaa yentea yesa seesonam yena garehe.

### *Itsima Qoomadhensa Yesusin Dhettsongo*

<sup>16</sup> “Itsima yenin qoomenka yedi yinin qoomonam eenna dhoota hayayna maltina eenadettsi wotinam seeseebhode. Kedi een birante itsima qoomayna maatayse sun guuri keda cawle. Inta yena gon ida giye: Kedi yina yesken bazanam tiydine. <sup>17-18</sup> Ya itsima hanin qoomenka, aapin kerin hannon shiidhaa; hasa metenamaar waqatika qadhaa. Ogoam hanin hayoono eedina dayma, haapadhima Hamba bish kinin dhesoadettsine. Haapadhimonam haapea Hamba hasa bazanam hana kida ime.

### *Peendar Koymo Puccha Zaskiminsa Yesusin Dhettsongo*

*Luq 12:33-34*

<sup>19</sup> “Ulavulobee boyibeyn itsana damen, pir diibiar koyate tiyen peen kodar koymonam yena puccheebhode. <sup>20</sup> Ogona ulavulobee boyinbe itsimon, pir diibiar koyate tiymon cecinte koymonam yena pucchee. <sup>21</sup> Harrna hambidianna, hannon koymonin dohonte hasa woylammoar ogote koda dee.

### *Bishinsa Shaakan Goynsa Yesusin Dhettsongo*

*Luq 11:34-36*

<sup>22</sup> “Bishinsa shaakano aapine. Keeda aapino hanno payya ko hanna, hasa bishino wul shaakante koda dee. <sup>23</sup> Aapino hanno hajidi ko hanna, hasa bishino wul thipante koda dee. Ta hakal dohoono shaakano thipidi ko hanna, thipano kattsi gebhi koda thiipe!

\* <sup>6:3</sup> “Eedinin haapoamadettsi hayayse aachika imaa” hamenam gaalin aponka thaapadhonte “Anta mizaqaaka hanin imenam anta warkataa ki haapabhoode” koda hame. † <sup>6:13</sup> “Siyonkalanka” hamea agaa “siya eakalanka” kanka hamana dandima ko dandime. “Siya ea” haminta “Seethaan” hamintane.

*Dayntanna Gaala Zaskiminsa Yesusin Dhettoono*  
*Luq 16:13; 12:22-31*

<sup>24</sup> “Bit lamaasa demente daana damea eedi hay ki hannaar qolehe. Harrna hambidianna, kalaam jibbayse lansoam kida nashe; ogotay ko hamma, kalaadar maatayse lansoam kida bage. Ogodettsi Barjobee koymobesa demente daana damattene.

<sup>25</sup> “Ogonante inta yena ida giye: Dayntan yennonona, ‘Haroo itso? Haroo wuco?’ pir bishin yennonona, ‘Haroo qaadho?’ hamayse qaabeebhode. Galara dayntano, apalara bishino sagayu? <sup>26</sup> Cecinka pillayna aptinaam shedee: Kedi bheeta yiithehe; shikaar shikehe; konontear keehe. Ko dahaannaar cecinte dahaa Imbaa yentea keam kida kunse. Ta yedi kedara kattsu sagattenu? <sup>27</sup> Yesa iira qaabayse leven yinnondar rooro kalaa arsea eedi hayne?‡

<sup>28</sup> “Pir apalanna harrnee gaale? Ta peendar aamana hamin kenin gebhenam shedee. Kedi waadimaka qajadhehe; puttoar qanehe. <sup>29</sup> Ko dahaannaar yena ida giye: Ena Bitaa Solomoonaar yisa gobshin wulka igin aamanasa kalaadettsi hattear qaadhayse goobadehe. <sup>30</sup> Ta Barjo kina haapadhayse saka nuunte koqadhayna peendar dahaana shundhaam yin gobshayse qattsea ki hanna, ta yedi Barjodar woylamin qajadhen joogaanato, yeam ini hamin ki qattsimine?

<sup>31</sup> “Keeda ‘Wodi haroo itso? Haroo wuco? Yer haroo qaadho?’ hamayse qaabeebhode. <sup>32</sup> Ogo wulam haapota Barjoam dhesimino eno koda zage. Ogono wul yena konin zaskenam cecinte dahaa Imbaa yentea dhesa ki dhese. <sup>33</sup> Yedi yer wulsa birayse Barjosa bitamonbee kisa tipamonbeam zagee; ogono wul yena imbha ko imbhe. <sup>34</sup> Saka hamon gaalenam sakana garee; ogoam qaabite gaaleebhode. Sedha kalaa gaaleno sedhaa agaana yeeke.

## 7

*Eendar Pirda Zaskiminsa Yesusin Dhettoono*  
*Luq 6:37-42*

<sup>1-2</sup> “Een waanidar yenin pirdendettsi yedalar pirda ko pirdadhe. Yenin kahaaka yenaar kaadha ko kaadhe. Ogonante yedar pirdadhoamadettsi yediar eedidar pird-eabhode. <sup>3</sup> Hannon aapinte dohon haaqanam haapima, ha aanantasa aapinte dohon kosonam harrnaa shede? <sup>4</sup> Hannon aapinte haaqa daaka, ha aanantana ‘Aapin hannora hana kosonam i bule’ hamayse haminaa giyaa? <sup>5</sup> Ya maltia ea, birayse hannon aapinte dohon haaqanam bulaa; ogosa budonte ha aanantasa aapinte dohon kosonam bulana payya hayayse hada haape.

<sup>6</sup> “Barjosa yerin gazanam qaskinana imeebhode; ye imidianna budoka wal hamayse yeam gavasane. Ogodettsi koymon gebhonka yenin shanonam wurkupanasa birante wodeebhode; ye wodidianna roonka tigasane.

*Barjoam Miskadhensa Yesusin Dhettoono*  
*Luq 11:9-13*

<sup>7</sup> “Miskee, yena imbha ko imbhe; zagee, haapeeda haape; kerinam kokkee, yena buldha ko buldhe. <sup>8</sup> Harrna hambidianna, miskea wul tiya ki tiye; zagear haapa ki haape; kerinam kokkeanaar kerro buldha ko buldhe. <sup>9</sup> Yesa iira naasa kintea kiam balasha ki miskaysaka, kina seeni imea eedi hayne? <sup>10</sup> Waykaara ki miskaysaka, kaaran oolonte kina guni ima ki imo? <sup>11</sup> Ta keeda yedi siyana dahayse naanana yesa yerin payyan iman ye dhesidianna, cecinte dahaa Imbaa yentea kiam miskaynana yerin payyanam sagi hamin ki imimine?

‡ <sup>6:27</sup> “Leven yinnondar rooro kalaa arsea eedi hayne?” hamayno Girik aponka kosa buli lamaa daane; lansono bulino yinne: “Yisa gudumbakkondar dhundhuma kalaa arsea eedi hayne?” hamaynone.

<sup>12</sup> “Ta keeda eenin yena hayoadettsi yenin nashen yerin wulam, yediar kena yin hayee. Musesa yigginbee Barjokala qansayse eenna giyaynabeyn dhettsaynoar ogamne.

### *Qiiqa Kereasa Yesusin Dhettsongo*

*Luq 13:24*

<sup>13-14</sup> “Kayendar arsayno kerro workine; goynoar kosa worrime; ogote ardayna eenaar thoothine. Eenaam rooro wul dayntandar yeskisayno kerro qiiqane; goynoar kosa likkane; koam haapayna eenaar tokaanane. Keeda qiiqa kereaka ardee.

### *Haaqan Yisa Aapinka Dhesimensa Yesusin Dhettsongo*

*Luq 6:43-44; 13:25-27*

<sup>15</sup> “Buudamoka ‘Inta Barjokala qansayse eenna giyeane’ hamaynakalanka mete yesaam gishee. Kedi yaati eebhe qaadhayse yekal keda nive; ko dhaaannaar kesa iino sarimayna yaayonadettsine. <sup>16</sup> Keamaar yeninkay dhesayno kesa waadimansa aapinkane. Ukumbhan hattasa iira woyni aapi kama ko kambho? Mugurira shaapsa aapi kama ko kambho? <sup>17</sup> Ogodettsi pir payyana haaqana wul aapin payyan keda ushe; haaqana siyana aapin siyonam keda ushe. <sup>18</sup> Haaqana payyana siyon aapinam ushehe; haaqana siyana aapin payyanam ushehe. <sup>19</sup> Payyan aapin ushimina haaqana wulam paxayse nuunte keam koqa ko koqadhe. <sup>20</sup> Keeda igina eenaam kesa waadiman aapinka yeda dhese.

<sup>21</sup> “Inka ‘Imbo, Imbo!’ hamayna wul Barjosa bitamon raqinte ardehe; cecinte dahaa isa Imbayn giyonam hayea bisheada arde. <sup>22</sup> Barjosa pirdin rooroaka thoothino eeno, ‘Imbo, Imbo! Hasa naabenka Barjosa wodi giyooto? Hasa naabenkasin beeronaam eendara wodi bulooto? Hasa naabenkasin thoothin yerin tarshenam wodi hayooto?’ ina keda hame. <sup>23</sup> Ogo wodanka, ‘Inta yeam dhesattine; yedi siyon hayayna eenato, ikalanka os pegadhee!’ kena ida hame.

### *Onna Lamaana Woysadhaanasa Kamsino*

*Luq 6:47-49*

<sup>24</sup> “Ogonante isa upsin koam qansayse hayayna wul ooninam yisa haachan peendar woysaa ea pakaladettsine. <sup>25</sup> Dommo oonin ogodar ko qanade; mirroar daran ko nivade; wuranoar nivayse oonin ogoam ko kupade. Onno ogono haachan peendar konin woysadhonna dhambadehe. <sup>26</sup> Taar isa upsin koam qansayse haymina wul ooninam yisa shaamindar woysaa ea malgimeadettsine. <sup>27</sup> Dommo oonin ogodar ko qanade; mirroar daran ko nivade; wuranoar nivayse oonin ogoam ko kupade; onnoar dhambidine. Kosa dhambidinoar kattsi detha ko maatade” hamayse kena ki guyade.

<sup>28</sup> Yesusaar ogoam yin giyate kinin macchonsa budonte, eeno kinin dhettsone tim-mirinka kattsi ko targadhade. <sup>29</sup> Ogonoar konin targadhoono Musesa yigginam dhettsaynadettsi dayma, kidi yisa hayamoka eenaam dhettsite kinin dohonnane.

## 8

### *Lamthinin Yedaa Eam Yesusin Pacchoono*

*Marq 1:40-45; Luq 5:12-16*

<sup>1</sup> Yesusaar dhukara kinin hanchen wodanka, thoothino eeno kisa paanan ko yivade. <sup>2</sup> Ogo wodanka eedi kalaa lamth burqoka\* dahaa kisa birante nivayse hatte kumpurdhayse, “Imbo, ha nashidianna, iam pacchana damaada dame” hamayse kiam ki miskade. <sup>3</sup> Yesusaar yisa aaninam kidar wodayse, “Haam pacchana nashayda nashe; paashaa” kina ki hamade. Saanawaar kisa lamthin burqono ko paashade. <sup>4</sup> Yesusaar, “Hanin paashonam eedi haynaar hanin giyoamadettsi mete hasaam gishaa;

---

<sup>7:23</sup> Maz 6:8.      \* <sup>8:2</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa.

ko dahaannaar yivayse hassa bishinam gudulana dhahaa. Eennaar hanin paashoono tarja konin maatoadettsi Museyn giyon Barjona machadhen marshanam imaa” kina ki hamade.

### *Mato Alaqaasa Waadiman Eam Yesusin Pacchoono*

*Luq 7:1-10*

<sup>5-6</sup> Yesus Qipirnaahoom katamante kinin ardaa wodaaka mato alaqa kisa birante nivayse, “Imbo, isa ergen ea burqoka malgimayse gaalite ooninte wodhayse ki dahade” hamayse kiam ki miskade. <sup>7</sup> Yesusaar kina yi giyna: “Inta nivayse kiam pacchasane” ki hamade. <sup>8</sup> Mato alaqaar kina yinin maasenka, “Imbo, oonin innonte ha arde inta eedi zaskaatehe. ‘Hasa ergen ea ki paashe’ bish ina hamaa; kidiar paasha ki paashe. <sup>9</sup> Intaar iam wottsaynana ee hamayda hame; isaar choobar ina ee hamayna poolisana ke dahade. Kesa kalaana ‘Yivaa!’ inin hamenka, yiva ki yive. Waa eanaar ‘Nivaa!’ inin hamenka, niva ki nive. Isa erge eanaar ‘Koam hayaa’ inin hamenka, haya ki haye” kina ki hamade.

<sup>10</sup> Yesusaar agaa easa dhalqinam yinin qansenka, kidi targadhidine. Kimbesana yiven eenna yi giyna: “Inta yena gon ida giye: Israveel eenasa shaarinte kaa eadettsi gebhi idar woylamin qajaa haapaatine. <sup>11</sup> Inta yena ida giye: Thoothino eneo haynsa utambarabee wavambarabe koda nive; Abraambee, Yisaaqbee, Yayqoobbesana kinka Barjosa bitamonte kummandar koda dooqe. <sup>12</sup> Barjosa bitamonte ardana bhocchayna eena os mayan thipante keam koda dhabadhe; ogotear eepibee atsi qiicabe koda maate” ki hamade. <sup>13</sup> Ogosa budonte Yesus mato alaqaana “Ya yivaa, idar woylamin hanin qajondettsi hana ko dee” kina ki hamade. Kisa waadiman ear ogo wodanka ki paashade.

### *Thoothin Eenaam Yesusin Pacchoono*

*Marq 1:29-34; Luq 4:38-41*

<sup>14</sup> Yesus Bhethiroossa ooninte kinin ardenka, Bhethiroossa baysino bishi occhea hajimoka burqadhate wodhayse ko daaka koam ki haapade. <sup>15</sup> Kosa aaninamaar kinin yeden wodanka, bishin occayno hajimono koam ko garade. Kodiar dhaabhayse Yesusna galan baxan ko yedade.

<sup>16</sup> Peen sootaysakaar beeronin yedaana eena thoothinaam Yesuskal entsate ke ni-vade. Yesusaar beeronaka “Utee!” hamintaka bish ki keam bulade; hajadhaana wulamaar ki pacchade. <sup>17</sup> Ogonoar “Kidi wonnon hajimonam ki tiyade; burqamon wonnonamaar wona ki baskade” hamayse Barjokala qansayse eenna giyea Isiasin giyondettsi ko thoothade.

### *Yesussa Paanan Yivana Zagaana Eena*

*Luq 9:57-62*

<sup>18</sup> Yesusaar thoothino eneo kisa gasante konin bukonam yinin haapenka, yisa paanan yivayna eenana, “Bazinsa saabar wo sage” kena ki hamade. <sup>19</sup> Ogora Musesa yigginam dhettsea eedi kalaa Yesuskal nivayse, “Woam Dhettsea, inta hanin yiven hamote ko hannaar, hasa paanan yivayda yive” kina ki hamade. <sup>20</sup> Yesusaar kina yi giyna: “Shedaa! Gaamirenasa kenin wodhea kesa oolo daane; aptinasaar ooni daane. I Eedi Naas meten innon inin daasea raq isa qolehe” kina ki hamade. <sup>21</sup> Yesussa paanan yivayna eenasa waa yi giyna: “Imbo, birayse imbaam duukayse inin nivoadettsi iam yittsaa” kina ki hamade. <sup>22</sup> Yesusaar kina yi giyna: “Shedaa! Diyaana diyaanaam kenin duukoedettsi kena garaa. Ya isa paanan nivaa” kina ki hamade.

### *Bazinam Shooshen Wuranam Yesusin Woysoono*

*Marq 4:35-41; Luq 8:22-25*

<sup>23</sup> Yesus bazindara sagadhen gonngalante kinin ardenka, kisa paanan yivayna kimbesana ardayse ke yivade. <sup>24</sup> Kenin yivenka ke dhesima bazindar gebhi wura dhaabhayse gonngalanam noqonin manngenka yekka ko jugade. Ogoka Yesus raatidine. <sup>25</sup> Kisa paanan yivayna eenaar kikal theedayse, “Imbo, wodi hakal kayoobhe; woam dhacchane!” hamayse kiam ke dhaasade. <sup>26</sup> Kidi kena yi giyna: “Yedi idar woylamin qajadhenin joogaanato, yin yenin kurtumbhayno hare?” kena ki hamade. Ogora dhaabhayse wuranbee bazinbeam ki bitade. Ogora wuranbee bazinbe kalon lay ko hamade. <sup>27</sup> Eenaar ogoam shedayse, “Wuranbee bazinbe yinna ee hamea kaa eedi hamin dahaane?” hamayse ke targadhade.

### *Beeronin Yedaana Eenaam Yesusin Pacchoono*

*Marq 5:1-20; Luq 8:26-39*

<sup>28</sup> Bazinsa saabar Gergesenon<sup>†</sup> peendar ki nivade. Ogotear beeronayn yedaana eedi lamaa waani duukin raqira utayse daran ke keerade. Igina eena kattsi siya eedi kenin dohonna goyn ogoka eeno yaayan bashadhidine. <sup>29</sup> Kediar, “Ya Barjo Naasa, hambesana wosa dohoono hare? Wodar pirdadhen rooron wosa yeskima woam galshanaa nivaaw?” hamayse ke ilatade.

<sup>30</sup> Eena iginayn dohon raqira likka pege wulkupa thoothi gishima gishadhyyna dahade. <sup>31</sup> Beeronaar Yesuskal yi giyna: “Eena kinara woam ha bulea hanna, iginia wulkupana gishiman gishadhy nadar woam yittsaa” hamayse kiam ke miskade. <sup>32</sup> Kediar, “Yivee” kena ki hamade. Kediar eenadara utayse wulkupanasa iinte ke ardade. Marrato! Igina wulkupana wul bazinsa gasante dahayse, targadhayse yinin mugumonka laasara gobayse bazinte wavayse ke diyade.

<sup>33</sup> Wulkupan gishaynaa ogora gobate katamandar yivayse igina beeronayn yedaana eenasa goynbee ogote yerin hamon wulbeam ke guyade. <sup>34</sup> Ogosa budonte katamante dohoono eeno wul Yesusam shedo ko utade. Konin shedon wodanka, “Ea kaa, ya wosa peera yivaa” hamayse kiam ke miskade.

## 9

### *Hajimonka Malgimaa Eam Yesusin Pacchoono*

*Marq 2:1-12; Luq 5:17-26*

<sup>1</sup> Yesus bazindara sagadhen gonngalante ardayse bazinam sagayse pir yisa katamadar ki yivade. <sup>2</sup> Ogotear hajimonka malgimaa eedi kalaam eena haaqaka bavate kikal ke nivade. Yesusaar kidar woylamin kenin qajonam shedayse hajimon eana yi giyna: “Inaane, wocchimbhima; hasa seesono hana gardhidine” kina ki hamade. <sup>3</sup> Musesa yigginam dhettsaynasa waani waani eena yisa woylaminka yi giyna: “Kaa ea Barjo maato ki qaabaaw?” hamayse ke qaabade. <sup>4</sup> Yesus kenin qaabonam dhesayse kena yin ki guyade: “Woylaminka yesa yer siya harrnee qaabe? <sup>5</sup> ‘Hasa seesono hana gardhidine’ hamarabee ‘Dhaabhayse yivaa’ hamarabesa hamaane deegaa? <sup>6</sup> Ko dahaannaar i Eedi Naasina peendar eenna seesonam garana hayamo isa konin dohonam yenin dhesoadettsi yeam ko zaske” hamayse hajimonka malgimaa eaka, “Dhaabhayse haam baadhon haaqanam hanka bavate hasa oonindar yivaa” ki hamade. <sup>7</sup> Hajimonka malgimaa ea dhaabhayse yisa oonindar ki yivade. <sup>8</sup> Eenoar ogoam haapayse targadhidine. “Kodettsin hayamonam eedina imaa Barjo ki gobshadhe” hamayse kiam ko gobshade.

### *Maatoosam Yesusin Eeloono*

*Marq 2:13-17; Luq 5:27-32*

<sup>9</sup> Yesus raqin ogora dhaabhate kinin yivenka, eedi kalaa Maatoos hambhea gibirin kinin kacchen raqinte dooqayse ki daaka kiam haapayse, “Isa paanan nivaa” kina ki hamade. Kediar dhaabhayse kisa paanan yivan ki yedade.

<sup>†</sup> 8:28 “Gergesenon” hambhoono Girik aponka “Gadarenon” way “Gerasenon” waani waani mathaapinte koda hambhe.

<sup>10</sup> Ogosa budonte Yesus Maatoos ooninte kummandar dooqayse ki daaka, waani thoothina gibirin kacchayna eenabee Musesa yigginam toolimina eenabe nivayse Yesusbbee kisa paanan yivayna eenabekal kummandar ke dooqade. <sup>11</sup> Parisa eenaar ogoam haapayse Yesussa paanan yivayna eenana yi giyna: “Yeam dhettsea ea cubbona gibirin kacchaynabee igin a seeson eenabesana kinka kinin kummayno harrnane?” kena ke hamade. <sup>12</sup> Yesus yin kenin giyenaam qansayse, “Hajadhaanaam akkimi koda zaske, payyanaam akkimi zaskehe. <sup>13</sup> Yedi ta yivayse ‘Inta machadhen marshara sagi eedina burqadhadhenam ida nashe’ hamayse thaapadhoono yer har konin dohonam payya hayayse dhesee. Harrna hambhidianna, inta seeson eena Barjodar kinin maatoadettsi keam eelota i nivade; tipana eenaam eelota nivaatine” kena ki hamade.

### *Itsima Qoomadhen Goynsa Oysadhoono*

*Marq 2:18-22; Luq 5:33-39*

<sup>14</sup> Ogo wodanka Shivea Wannissa paanan yivayna eena Yesuskal nivayse, “Wombee Parisa eenabe rooro thoothi itsima woda qoome; hasa paanan yivayna eena itsima kinin qoomimino harrnane?” kina ke hamade. <sup>15</sup> Yesusaar kena yin ki giyade: “Uutaa kembesana kinka ki daaka, gaydonna nivaana eena moykana dama ke damo? Ko dahaannaar uutaanin kekalanka edadhayno woda niva ko nive; ogo wodanka itsima keda qoome. <sup>16</sup> Apala gecchoadar apala haaleam lashea eedi qolehe. Harrna hambhidianna, apala gecchoam yinka hattsate kinin tiyenna, haviminoar kisa kalon koda worke. <sup>17</sup> Jambin gecchonsa iinte zia haali shabhea eedi qolehe. Shabbadhidianna ziano hallo jambinam bhattsu ko bhattse; zianoar layma ko layme; jambinoar bhaqayse gemma ko gemme. Ogona zian haalinam jambin haalinte koda shabhadhe. Yin ko hanna, lamaana wul gemmima payya daa ke dee” ki hamade.

### *Dembhira Dhaabhon Naanbee Yesussa Apalan Kaamon Edonbe*

*Marq 5:21-43; Luq 8:40-56*

<sup>18</sup> Yesus ogoam kinin giyenka, eedi hayo kalaa nivayse hatte kisa birante kumpurdhayse, “Isa naano ikalanka taaki ko diyade; ko dahaannaar ya nivayse aanin hannonam kosa bishindar ha wodidianna kodi dhaqa ko dhaqe” hamayse kiam ki miskade. <sup>19</sup> Yesus dhaabhayse yisa paanan yivayna eenabesana kinka eabete ki yivade.

<sup>20-21</sup> Eedi maa kallo layme hajimoka leve tabhi lamaa hajadhayse kappoono, “Apalan kisa hattear kaamidi i hanna, inta paashayda paashe” hamayse woylamin kisa konin qaabonna kisa budobar nivayse apalansa nukinam ko kaamade. <sup>22</sup> Yesus budoka wal hamayse koam shedayse, “Isa naano, wocchimbhima. Idar woylamin hanin qajoono haam ko pacchade” kona ki hamade. Edonoar agaara yedayse ko paashade.

<sup>23</sup> Ogosa budonte Yesus hayoa ea ooninte kinin yeskenka, saalan pugayna eenabee ilatite eepayna eenabeam shedayse, <sup>24</sup> “Naano raata ko raatade, diyadehe; yedi os hamee” kena ki hamade. Eenaar kiam bagayse ke hancade. <sup>25</sup> Ko dahaannaar eenaam mayanka buldhonsa budonte, Yesus ardayse naansa aaninam ki yedade; kodiar dhaabhidine. <sup>26</sup> Ogono Yesusin hayoone ogo peente dohon een wulna ko dhesimade.

### *Aapin Kayaana Eenaam Yesusin Pacchoono*

<sup>27</sup> Yesusin raqin ogora utaate yivenka, eedi lamaa aapin kayaana waani, “Dawt Naasa, bannzo! Wona burqadhadhayse woam pacchaa!” hamayse ilataate kisa paanan ke yivade.

<sup>28</sup> Ooninte kinin ardonsa budonte, aapin kayaana eena kikal ke nivade. Yesus kena yi giyna: “Aapin yennonam pacchana inin damenam idar woylam qajee qajo?” kena ki hamade. Kediar, “Yehee, imbo, qajooda qaje” ke hamade. <sup>29</sup> Yesusaar kesa aapinam yisa aaninka kaamayse, “Idar woylamin yenin qajendettsi yena ko maate” ki hamade.

<sup>30</sup> Kesa aapinoar ko shedade. Kidiar kena yi giyna: “ ‘Yesus woam pacchade’ hamayse eedina yenin giyoamadettsi mete yesaam gishee!” hamayse upsi wocchika kena ki giyade. <sup>31</sup> Kidiar ogora utayse peen ogo wul gidir Yesussa waadimanam ke giyade.

### Apon Kayaa Eam Yesusin Pacchoono

<sup>32</sup> Aapin kinin pacchaana eena ogora kenin utenka, eedi waani beeroyn yedayse apo cavate kaysaa eedi kalaam Yesusdar bavate ke nivade. <sup>33</sup> Eadara beeronam kinin bulonsa budonte, apone kisa dhalqan ko yedade. Thoothino enoar, “Kodettsino yer Israveel peente kala hattear haapayse dhesadhadehe” hamayse ko targadhade. <sup>34</sup> Parisa eena yi giyna: “Kidi beeronaam kinin bulayno beeronasa hayoa kantankane” ke hamade.

### Yesus Eenna Kinin Burqadhoono

<sup>35</sup> Yesusaar Ayiwd eensa bukin raqinte dhettadsa, Barjo bitamonsa dhacchintan upsinam giyada, eenaam yedon waana waana hamon burqon wulamaar pacchada kesa katamanbee gurdanbe wulir yaayte ki dahade. <sup>36</sup> Kidi eenaam gishea eediya qolmina yaanadettsi gaalitebee kelshea bashadhysebe ke daaka keam haapayse kena ki burqadhadde. <sup>37</sup> Ogo wodanka yisa paanan yivayna eenana, “Buurdhayno isinno thoothine; buurayna eena tokaane. <sup>38</sup> Ta keeda isininsa Imbaa buurayna eenaam haamindar kinin nittsoadettsi kiam miskee” kena ki hamade.

## 10

### Yesusin Tarjamonnante Yittsaynaam Kamoono

Marq 3:13-19; 6:7-13; Luq 6:12-16; 9:1-6

<sup>1</sup> Yesus yisa paanan yivayna eena tabhi lamaanaam yikal eelayse, “Beeronaam een-dara bulee; eenam yedon waana waana hamon burqon wulamaar pacchee” hamayse hayamo kena ki imade. <sup>2</sup> Yesus Kiristoos yisa tarjamonnante kinin yittsaana eenasa namma kinane: Birayse Bhethiroos hambhea Simoonbee, indanaasa Indiriasbee, Zabdoos naana lamaana Yayqoobbee Wannisbee, <sup>3</sup> pir Pilhoosbee, Barteleemoosbee, Toomaasebee, gibirin kacchea Maatoosbee, Ilpoos naasa Yayqoobbee, Taadoosbee, <sup>4</sup> peen yinonna bish qaabea Simoonbee, Yesusam dembhingga saskate imea Asqoronto peen ea Yiwdabene.

<sup>5-6</sup> Yesus igina tabhi lamaanaam yin giyayse ki yittsade: “Yenin yivenka yaatidettsi kayaana Israveel eenadar yivimate. Ayiwdtaymina eenadar yiveebhode; Sammaria eenasa katamante ardeebhode. <sup>7</sup> Yivayse ‘Barjoyn bitimayno wodano yeskidine’ hamayse giyee. <sup>8</sup> Hajadhaana eenaamaar pacchee; diyaana eenaamaar dhaasee; lamth burqonin\* yedaanaamaar pacchee; beeronaamaar eendara bulee. Sun yenin tiyonna, eennaar sun imee. <sup>9</sup> Worqibee, birrebee, santupbeam yesa korbhonka bavate yiveebhode. <sup>10</sup> Goynna surba yenka beveebhode; shuraab lansabee, dunnguribee, haljobe yenka beveebhode. Harrna hambidianna, waadadheana galano imbha ko imbhe.

<sup>11</sup> “Katamante way gurdante yenin ardenka, yeam chocchamon tiyea hay kinin dohonam payya hayayse oysate kiam dhesee. Peen ogora yenin utenka yekka kikal ooninte dooqee. <sup>12</sup> Eenkal ooninte yenin ardenka, ‘Nagaya nagaya’ kena hamimate. <sup>13</sup> Oonin eena yeam ke tiyea hanna, kena yenin imayno nagaymakkono kena koda maate. Yeam tiymina ke hanna, kena yenin imayno nagaymakkono yena koda maate. <sup>14</sup> Eenin yeam chocchamon tiymon way yenin giyenaam kena qansimon raqinte ye hanna, ogo ooninbee katamanbera yenin utenka roon yennondar dohon silalinam gidir dinsee. <sup>15</sup> Inta yena gon ida giye: Pirdin rooroaka kataman ogora Sodoombee Gamoorabedar yeskayno pirdino tokaane.

\* <sup>10:8</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa.

*Eendar Yesken Gaalenbee Oytaydhanbe*  
*Marq 13:9-13; Luq 21:12-17*

**16** “Marrato! Inta yeam yaanadettsi yaayonasa shaarinte ida yittse. Ogonante yedi gunidettsi pakalla, waleedettsi leemina daymate. **17** Ko dahaannaar pirdin pirdayna eenasa birante yedar pirdadhe eeno yeam saskate ima ko ime; Ayiwd eenasaar bukin raqinte yeam qana ke qane. Ogonante eenkalanka mete yesaam gishee. **18** Innon goynka peen wottsaynabee binnabe yedar ke pirde yedate yeam kedar ke yive. Ogonoar iginia eenabee Ayiwdtaymina eena wulbesa birante isa tarjana yenin maatoadettsine. **19** Yedar pirdadhe hamayse yettsate saskayse yeam kenin imenka ‘Yer haroo giyo?’ way ‘Hamin giyayse wo maaso?’ hamayse qaabeebhode. Yenin giyayno ogo wodanka yena imbasane. **20** Yenka maatayse giyayno Imbaa yenteasa Manpasinone; yeditehe.

**21** “Ogo wodanka indanaasaar indanaasaam, imbaar naasa yinteam dembhingga saskate ima ki ime. Naanaar imbanadar dhaabhayse keam dettsa ke dettse. **22** Yedi isa naabenna hamayse een wulkal jibbadhaana yeda maate. Macchin wodanka yekka wocchimbhayse dehea kidi dhaqa ki dhaqe.

**23** “Kataman kallonte yeam ke oytayna ogoam garayse kataman waadar gobee. Ogonante inta yena gon ida giye: I Eedi Naas maataate nivenka yekka Israveel peente dohon kataman wulgidir yeskisattene.

**24** “Dhettsadhea ear kiam dhettseadara sagehe; waadadhea ear kiam waadiseadara sagehe. **25** Dhettsadhea ear kiam dhettseadettsi maatidi ki hanna, yeka ko yeeke. Waadadhea ear kiam waadisea eadettsi maatidi ki hanna, yeka ko yeeke. Ooninsa imbaam ‘Bevelzebul’<sup>†</sup> hamayse eeno eelidi ko hanna, kisa oonin eenaam kattsi hamin ko eelimine” kena ki hamade.

*Hayna Kurtumbhintaa Konin Zaskayno*  
*Luq 12:2-7*

**26** Yesus kena yi giyna: “Ta keeda eenna kurtumbheebhode! Ogonoar kicimayse may maatima, aadhimeyse dhesadhima shidhea yer qolehe. **27** Inin yena aachika giyena yedi may hayayse giymate; hashkimeka yenin qansonamaar eensa shaarinte may koam ooshee. **28** Waanam deesayse, sadanam deesana damiminana yedi kurtumbheebhode. Kattsi yeam kurtumbhintaa zaskayno sadanbee waanbeam lay dikimon nuunte dhabayse kaysana damea Barjonane.

**29** “Aptina suutana lamaanaam bakkanda kalaadar shansha shanshadhayu? Aptina iginasa iira kallo hattear Imbaa yentea giyama sun peendar dhambehe. **30** Meten yennonosa sitin wulam shiishima Barjo paydidine. **31** Ogonante yedi kurtumbheebhode; aptina suutana thoothinadara yedi sageeda sage.

*Yesussa Paanan Yivaynana Imbhoono Kilimeno*  
*Marq 9:41; Luq 12:8-9bee 51-53be; 14:26-27*

**32** “Een birante isa tarjea wulna intaar cecinte dahaa Imbasaa birante kina tarjayda tarje. **33** Een birante ‘Inta Yesus eeditehe’ hamayse giyeana intaar cecinte dahaa Imbasaa birante ‘Kidi inti eeditehe’ ida hame.

**34** “Inta peendar payyamo bavate inin nivaadettsi hayayse qaabeebhode. Eensa shaarinte payyamo dayma, banqi bavate i nivade. **35** Inin nivoono naasaam imbaadara, naanam indandara, naasa geshonam aakandara edanane. **36** Eedisa banqin eena kisa zelen eenane.

**37** “Idara sagi hayayse imbaa yinteam way indanam yisa nashea eedi inti kinin doadettsi kiam zaskehe. Taar idara sagi hayayse naasa yinteam way naan yinnamonam nashea eedi inti kinin doadettsi kiam zaskehe. **38** Yinindariy ziitate deesadhen masqalinam kedayeisa paanan nivima eedi inti kinin doadettsi kiam zaskehe. **39** Sadan yinnamonam

<sup>†</sup> **10:25** “Bevelzebul” hamen upsinam Haalin Mallan mathaapinsa macchinte thaapadhaanar shedaa. **10:36**  
 Miki 7:6.

dhacchota zagea wul koam kaysa ki kayse; ina hamayse sadan yinnonam saskate imea wul koam haapa ki haape.

<sup>40</sup> “Yeam chocchamon tiyea iam ki tiyade; iam chocchamon tiyea iam nittsaam ki tiyade. <sup>41</sup> Barjokala qansayse eenna giyeam kisa waadimanna hamayse kiam chocchamon tiyea Barjokala qansayse eenna giyeana imbhayno bazano kinaar imbhya ko imbbe. Tipa eam kisa tipamonna hamayse chocchamon tiyea tipa eana imbhayno bazano kinaar imbhya ko imbbe. <sup>42</sup> Inta yena gon ida giye: Kina likkanasa iira kalaana isa paanan kinin nivenna hamayse noqo qaji sharqa kala hattear kiam wushea wulsa baza shidhehe” hamayse kena ki guyade.

## 11

### *Shivea Wannisin Yesusdar Yittsaana Eena* *Luq 7:18-35*

<sup>1</sup> Yesus dhalqin ogoam yisa paanan yivayna eena tabhi lamaanana giyate kinin macchonsa budonte, raqin ogoam garayse Ayiwd eena katamandar dhettsanabee kena Barjosa upsinam giyanabe ki yivade.

<sup>2</sup> Shivea Wannis dhaxin ooninte dahayse Kiristoosin waadadhen waadiman qansayse, kisa paanan yivayna eenasa iira eedi Kiristoosdar ki yittsade. <sup>3</sup> Kediar Kiristooskal nivayse, “ ‘Barjokala niva ki nive hambhaa yaw? Way eedi ab wo toolo?’ hamayse Wannis haam ki oysade” ke hamade. <sup>4</sup> Yesusaar Wannisin nittsaanana “Yivayse yenin haaponbee yenin qansonbeam Wannisna giyee: <sup>5</sup> Aapin kayaana haapa ke haape, roonsa wobona pika ke pike, lamthin burqonka\* dahaana paasha ke paashe, qaamin kayaana qansa ke qanse, diyaana dembhira dhaabha ke dhaabhe, qambhina eenanaar Barjosa dhacchintan upsinam giidha ko giidhe. <sup>6</sup> Ogonante inka qothimima kidi gobshadhaane” hamayse kena ki maasade.

### *Yesus Shivea Wannissa Kinin Giyoono*

<sup>7</sup> Wannis eena maataate ke yivaysaka Yesus thoothin eenna Wannissa giyan ki yedade: “Darante yer har shedee yivaa? Jibarenka shohen piiqan shedee yivaaw? <sup>8</sup> Ta har shedee yivaa? Apalan gooben qaadhaam shedee yivaaw? Apalan gooben qaadhaana eena binna ooninte ke dahade. <sup>9</sup> Ta har shedee yivaa? Barjokala qansayse eenna giyeam shedee yivaaw? Haha! Yena ida giye: Kidi Barjokala qansayse eenna giyeadara sagiane. <sup>10</sup> Agaar

‘Shedaa! Hasa goynam birayse ashkea isa ergen eam hasa birante yittsayda yittse’ hamayse thaapadhoono Wannissane. <sup>11</sup> Inta yena gon ida giye: Peente adhadhon een wulsa iira Shivea Wannisdara sagea eedi haapadhadehe. Ko dahaannaar Barjosa bitamonte een wulsa choobar dahaa Wannisdara saga ki sage. <sup>12</sup> Shivea Wannis wodara yedayse ta kina wodan koka yekka Barjosa bitamono kantanka nivite ko dahade; ogote ardota kattsi mashimayna ogote arda ke arde. <sup>13</sup> Barjokala qansayse eenna giyayna eenayn thaapon wulbee Musesa yigginbe Shivea Wannis wodanka yekka os birante hamota dohon yerinam giyte ke dahade. <sup>14</sup> Yedi tiyana ye zagidianna, niva ki nive hambhaa Eelias kidi Wannisne. <sup>15</sup> Ogona qansen qaamiysa dahaa ki qanse.

<sup>16</sup> “Ta wodan ko eenaam yer harka i keam kamso? Gaban raqinte dooqayse yiigayna aanamma yinnaam eelite yin giyayna naanaam keda maate: <sup>17</sup> Kediar, ‘Ye kirbe hamayse yena pashko wo pugade, yediar kirbeetene; siyinna ye eepe hamayse yena wo zilimade, yediar eepeetene’ kena keda hame. <sup>18</sup> Ta Shivea Wannis itsimabee wucimabe kinin qoomenka, ‘Kaa eadar beero daane’ hamayse kanka giyte ke dahade. <sup>19</sup> Ta keeda i Eedi Naas itsaatebee wucaatebe inin dehenka, ‘Marrato! Kaa ea galabee

\* <sup>11:5</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa. <sup>11:5</sup> Isi 35:5-6; 61:1. <sup>11:10</sup> Milki 3:1. <sup>11:14</sup> Milki 4:5.

wucamobe nasheane; cubbona gibirin kacchayna eenabee seeson eenabesa yettsine' inka ke hamade. Pakalmakkono gon konin dhesimayno waadiman konnonkane" ki hamade.

### *Barjodar Maataamma Katamanay Dhiidhimbhadoono*

*Luq 10:13-15*

<sup>20</sup> Ogora Yesus thoothin tarshen yerinam kinin hayaana katamanaar dahaana eenaar seeson waadimanam yisa garayse Barjodar kenin maataamonna, keam yin giyayse ki kanchade: <sup>21</sup> "Korazin katamante dahaana eenato, yedi hay! Beetesayda katamante dahaana eenato, yedi hay! Yekal haydhoono tarshayno waadimano Thiroosbee Sidoon-aber haydhada hatte ko hanna, siyinna goobintonam yidara yiikayse dibiniar dumate yisa metendar kahayse ena wodda birayse seeson waadimanam yisa garayse Barjodar maatidi keda dee. <sup>22</sup> Ogonante inta yena ida giye: Pirdin pirdadhea rooroaka yedar yesken pirdindara Thiroosbee Sidoonabedar yeskayno tokaane. <sup>23</sup> Ta yedi Qipirnaahoom katamante dahaana eenato, tura cecindar dhev dhev hamo ye qaabaaw? Yin dayma mia diyaana eenayn dohon raqindar yedi hancheeda hanche. Yekal haydhoono tarshayno waadimano Sodoom gidir haydhidi hatte ko daana, katamano ogono kina koka yekka kayma ini daa ko dee. <sup>24</sup> Ogonante inta yena ida giye: Pirdin pirdadhea rooroaytana yedar yesken pirdira Sodoomdar yeskayno pirdino tokaane" kena ki hamade.

### *Kiristooska Ukunse Haapinta*

*Luq 10:21-22*

<sup>25</sup> Wodan ogoka Yesus yin giyayse Barjoam ki miskade: "Cecinbee peenbesa Imbaa maataa Imbo, ko yerinam eena pakallabee yerin dhesaanabekalanka aachayse naana likkanana hanin dhohonna haam ida gobshe. <sup>26</sup> Gon, Imbo, koam yin hayana hasa payya qaabe ko maatade. <sup>27</sup> Yer wulam Imbakalanka ina imbhidine. Barjo Imbaakalanka ab Barjo Naasaam dhesea hayyear qolehe. Ogodettsi Barjo Naasabee Naasa yinti dhaana kinin zagaana eenabekalanka ab Barjo Imbaam dhesea hayyear qolehe.

<sup>28</sup> "Yedi qajadhaana, baskenindar dethaanato, wul ikal nivimate; inta yeam ukun-sayda ukunsise. <sup>29</sup> Qoocandar yesa qambarin innon kedimate; ikalankaar dhesee. Inta isa woylaminkaar leemibee payyabene. Sadan yennonhaar ukunse haapeeda haape. <sup>30</sup> Qambarro inno pasine; baskenoar isa sholbhane" kena ki hamade.

## 12

### *Ukunsen Rooro Goynsa Oysadhoono*

*Marq 2:23-28; Luq 6:1-5*

<sup>1</sup> Ogosa budonte Ayiwde eensa ukunsen rooroaka Yesus gazgon ushon haaminsa shaarinka kinin yivenka, kisa paanan yivayna eena yinin daaqardhonna gazgonsa tis-hanam qunthayse qadhate gavan ke yedade. <sup>2</sup> Parisa eena ogoam haapayse Yesusna yi giyna: "Shedaa! Hasa paanan yivayna eena ukunsen rooroaka zaskimon waadimanam keda haye" kina ke hamade. <sup>3-4</sup> Kidiar kena yin ki giyade: "Ena Dawtbee kimbесана kinka dahaana eenabe yinin daaqardhonna, Barjosa gazan ooninsa mayante ardayse Barjosa birante wodadhon balashanam tiyayse yinna eenabete kinka kinin itsonam yedi nabbabeete? Balashan ogoam gudulla bishda itse; Dawtbee kimbесана dahaana eenabeam ini ke itse zaskehe.

<sup>5</sup> "Tapir gudulla ukunsen rooroaka Barjosa gazan ooninte kenin waadadhenka, waadimano ogono kena seeso konin maatimonam Musesa yiggin mathaapinte yedi

nabbabeete? <sup>6</sup> Inta yena ida giye: Barjosa gazan oonindara sagi maataa ta kote daane.  
<sup>7</sup> Pir,

'Inta machadhen marshara sagi  
eedina burqadhenam ida nashe'  
hamenam ye dhesidianna, ko seeson qolmon eendar pirdattene. <sup>8</sup> Inta Eedi Naas  
ukunsen rooroasa Imbane" kena ki hamade.

### *Aaniysa Woboa Eam Yesusin Pacchoono*

*Marq 3:1-6; Luq 6:6-11*

<sup>9</sup> Yesus ogora dhaabhayse Ayiwd eensa bukin raqinte ki ardade. <sup>10</sup> Kinin ardenka eedi kalaa aaniysa woboam ki haapade. Kedi Parisa eena Yesusam bersana zagayse, "Ukunsen rooroaka eediam pacchinta Musesa yigginte giidhidu?" hamayse kiam ke oysade. <sup>11</sup> Kidiar kena yinin maasenka, "Yesa shaarinte yaati kalaa yisa dahaa easa yaata ukunsen rooroaka geetir dhambidi ki hanna, geetira bulima hayne? <sup>12</sup> Ta eedi yaatidara kattsu sagitayu? Ogonante ukunsen rooroaka payya yer wonin waadadhoadettsi Musesa yigginte giidhidine" kena ki hamade. <sup>13</sup> Ogosa budonte Yesus aaniysa woboa eana, "Antaam hasa pishkaa" kina ki hamade. Ear yisa antaam ki pishkaysaka paashayse anta waadettsi payya ki maatade. <sup>14</sup> Ogora Parisa eena utayse, "Hamin hayayse wo kiam deeso?" hamayse kinka ke ooshade.

### *Barjo Yesusam Yisa Waadimanna Kinin Kamoono*

<sup>15</sup> Yesus kiam deesota Parisa eenayn ooshonam dhesayse agaa raqaara raq abdar ki dhaabhade. Thoothino eeno kisa paanan yivo ko dhaabhade. Iginara hajadhaana wulam pacchayse, <sup>16</sup> eeno eedi haynaar kisa konin giyoamadettsi upsi wocchika ki giyade. <sup>17</sup> Ogonoar Yesusin hayoono ena Barjokala qansayse eenna giyea Isias yi giyna:  
<sup>18</sup> "Inin kamaa ina waadadhea ea kaane;  
inin nashea ininkay wozadhea kidine.

Manpasin innonam daran ida wode;  
kidi gonin hamon pirdin peendar konin nivonam zarsin wulna kida giye.

<sup>19</sup> Kidi palimehe; kidi ilatehe;  
goynardar upsin yisaam qansisehe.

<sup>20</sup> Pirdin wulam payya gaz hayayse kinin maasenka yekka  
ayanna tuqaa malkaam qunthehe,  
dikamba hayea nutamaar diskehe.

<sup>21</sup> Peendar dohoono eeno wul kidar qaabe koda haye"  
hamayse kinin giyoono thoothidine.

### *Yesusam Beeronasa Hayoaka Kamsadhoono*

*Marq 3:20-30; Luq 11:14-23; 12:10*

<sup>22</sup> Ogosa budonte eeno beeroyn aapinbee aponbe kaysaa eedi waam Yesuskal bavate ko nivade. Yesus ea agaam ki pacchade; kidiar dhalqanabee shadanabe ki damade.

<sup>23</sup> Eeno wul Yesusin hayon yinin haapenka, kattsu targadhayse, "Kaa Dawt muldhansa iira Barjoyn qadhaa kidi doo ki dew?" ke hamade. <sup>24</sup> Parisa eena ogoam qansayse, "Kidi beeronaam kinin bulayno beeronasa hayoa Bevelzebulsa kantankane" kanka ke hamade.

<sup>25</sup> Yesus kesa qaabonam dhesayse kena yin ki giyade: "Bita kalaasa eena kinka kikalanka edimayse kiam edea ke hanna, kikala laymate kaya ke kaye. Pir katamano kallo way oonin kallon eena kinka gemmayse kikala edimidii ke hanna, keeda kinka payyamoka daana damehe. <sup>26</sup> Seethaan Seethaanam bulea ki hanna, kinka kikala edimidine hamintane. Ta yin ko hanna bitamono kisa hamin ko woye? <sup>27</sup> Beeronaam inin bulayno Bevelzebul kantanka ko hanna, ta eena yenna beeronaam hay kantanka

ke bule? Ogona kedi yedar pirda ke pirde. <sup>28</sup> Inta beeronaam inin bulayno Barjosa Manpasinka ko hanna, ta keeda Barjosa bitamono yekal nividine hamintane. <sup>29</sup> Pir eedi kalaa kantanka dahaa eam birayse yedate dhaxima ooninte kisa ardayse koymonam buurana hamin ki dame? Ogona kantanka dahaa eam yedate yinin dhaxonsa budonte, kisa ooninte ardayse koymonam kida buure.

<sup>30</sup> “Imbetetay hama hayyear iam jibba ki jibbe. Imbete kinka kamima hayyear os koam thar thar kida haye. <sup>31</sup> Inta yena ida giye: Seeson waadimanbee iirimenbe wul eenna gardha ko gardhe. Ko dahaannaar Manpas Gazanam iireana gardhehe. <sup>32</sup> I Eedi Naasdar yerin siyonam giyea haynaar seesono kisa gardha ko gardhe. Manpas Gazandar yerin siyonam giyea haynaar wodan koka ko hannaar, oo niven wodanka ko hannaar, seesono kisa kina gardhehe” kena ki hamade.

*Hatta Payya Yisa Aapinka Kinin Dhesimayno*  
*Luq 6:43-45*

<sup>33</sup> Yesusaar, “Payya aapi haapana haaqa payya koda zaske; siya aapi haapana haaqa siya koda zaske. Harrna hambhidianna, haaqa wul konin dhesimayno yisa aapinkane.

<sup>34</sup> Yedi qarshi naanato, yedi siyana dahayse payya dhalqana haminee dame? Eedi yisa woylaminte thoothora aponka kida giye. <sup>35</sup> Ea payyaa woylaminte yisa dohon yerin payyara yer payyaam kida giye; ea siyaa woylaminte yisa dohon yerin siyora yer siyaam kida giye. <sup>36</sup> Inta yena ida giye: Eeno konin giyen aapin qolmon dhalqin wulsa, pirdin pirdadhea rooroaka malsin ima ko ime. <sup>37</sup> Ogona hannon dhalqindettsi pirdira dhaqaada dhaqe; way hannon dhalqindettsi hadar koda pirdadhe” hamayse kena ki giyade.

*Yesussa Tarshen Waadimanam Shedana Oysadhoono*  
*Marq 8:11-12; Luq 11:29-32*

<sup>38</sup> Ogo wodanka Musesa yigginam dhettsayna eenabee Parisa eenabesa waani waani Yesuskal yi giyna: “Ya Dhettsea, tarshea milkit wona ha dhee wo zagade” kina ke hamade. <sup>39</sup> Kidi kena yin ki giyade: “Ko wodanka Barjoam garayno siyono adhadhino tarshea milkit haydhe koda zage. Ta Barjokala qansayse eenna giyea Yoonaasdar yeskon milkitindara milkit ab kona haydhehe. <sup>40</sup> Yoonaas kaaran gebhonsa iinte rooro makkambee sooti makkambe kinin kappondettsi, yin inta Eedi Naasiar peensa iinte rooro makkambee sooti makkambe ida kappe. <sup>41</sup> Nenewe katamante dhaana eenaar pirdin rooroaka wodan koka dohon adhadhinbete dhaabhayse kodar keda pirde; harrna hambhidianna, Nenewe katamante dohon eenna Yoonaas Barjosa upsinam kinin giyenka qansayse seeson waadimanam garayse Barjodar ko maatade. Marrato! Yoonaasdara sagea ea kote daane. <sup>42</sup> Hayn utensa mizaqimbar dohon peensa binno\* ko wodanka dohon eenbesana kinka dembhira dhaabhayse pirdin rooroaka kedar koda pirde; harrna hambhidianna, kodi Bitaa Soloomoon yisa pakalmakkonka kinin giyem qansana peensa gasara ko nivade. Marrato! Solomoondara sagea ea kote daane” kena ki hamade.

*Beeroyn Eeddara Utponsa Budonte Pir Maataate Kinin Ardayno*  
*Luq 11:24-26*

<sup>43</sup> Yesus yin ki giyade: “Beero eeddara yinin uton wodanka, ukunse raq zagayse noqoyn qolmon raqinte kida yaaye; ko dahaannaar ukunse raq haapehe. <sup>44</sup> Ogona ‘Inin uton oonindar isa maataate ida yive’ kida hame. Maataate kinin nivenka onno gidir dehea eedi qolmaka, sahate ashkadhon kida haape. <sup>45</sup> Ogora yivayse yidara kalon sagaana waani tobbhaana beeronaam yinka entsate nivayse easa iinte ardayse keda

12:40 Yoon 1:17. \* 12:42 Kono binno “Saaba binno” hamayse 1 Binna 10:1 ko thaapadhade.

dee. Ogonante ea agaasa dayntano ena hamora kalon siyane. Wodan koka dohoono siyono adhadhino ea agaadettsi koda maate” kena ki hamade.

*Yesussa Indanbee Indanaanabe  
Marq 3:31-35; Luq 8:19-21*

<sup>46</sup> Yesus ogoam eenna kinin giyenka kisa indanbee indanaanabe kimbete dhalqana zagayse nivite hatte mayante ke woyade. <sup>47</sup> Eedi kalaa Yesusna, “Shedaa! Handabee handanaanabe mayante woyayse hambete dhalqana keda zage” kina ki hamade. <sup>48</sup> Yesus kina yi giyna: “Inda kodi hayne? Indanaana kedi haybene?” hamayse kina ki maasade. <sup>49</sup> Ogora aaninka yisa paanan yivayna eenaam dhahayse “Indabee indanaanabe iginane. <sup>50</sup> Cecinte dahaa Imbasa bhocchinam ee hamayse waadadhayna wul isa indabee indanaanabe kedi iginane” hamayse kena ki guyade.

## 13

*Yiithadhon Bheetansa Kamsino  
Marq 4:1-9; Luq 8:4-8*

<sup>1</sup> Agaa rooroaka Yesus oonira utayse bazinsa aponte ki dooqade. <sup>2</sup> Kikal bukoono eeno konin thoothonna, kidi bazindara sagadhen gonngalante ardayse ki dooqade; eeno wulaar bazinsa aponte ko woyade. <sup>3</sup> Thoothi yeram kamsika kena giyan ki yedade: “Marrato! Eedi kalaa haaminte yisa bheeta yiithota ki utade. <sup>4</sup> Bheetan kinin yiithenka, bheetano waani goyn aponte ko wavaysaka aptinaar nivayse kamate ke itsade. <sup>5</sup> Waani bheetano thoothin peenin qolmon haachandar ko wavade; pee thoothinin qolmonna saanawa ko baqalade. <sup>6</sup> Haynin utayse oydhenkaar, ko halatade; caaciyn yittsaamonna ko wocchade. <sup>7</sup> Waani bheetano ukumbhansa shaarinte ko wavade; ukumbhanoar gebhayse baqalon bheetanam ko ishkade. <sup>8</sup> Waani bheetano peen payyandar ko wavade, aapiar ushidine; waa kisa aapi eedi dong kaysa, waa kisa pir aapi eedi makkam kaysa, waa kisa pir aapi eedi kalaa kaysa apo tabhi ke ushade. <sup>9</sup> Keeda qansen qaamiysa dahaa ki qanse” kena ki hamade.

*Yesus Kamsika Kinin Giyonsa Goyno  
Marq 4:10-12; Luq 8:9-10*

<sup>10</sup> Ogosa budonte Yesussa paanan yivayna eena kikal theedayse, “Eenna kamsinka harrnaa giye?” hamayse kiam ke oysade. <sup>11</sup> Kidi kena maasayse “Yenante Barjo bitamonsa aachin dhalqinam yenin dhesoadettsi imbhidine. Een waanina ko hanna imbhadehe. <sup>12</sup> Harrna hambhidianna, yisa dahaana kisa dohondar kina imbha ko imbhe; kinaar mirga ko mirge. Yisa qolmakalanka kisa dohonam kikala tiidha ko tiidhe. <sup>13</sup> Ogona shedite dahayse shedimina kenin maatonna, qansite dahayse qansimina kenin maatonna, pir kenin bhocchimonna, kena inta kamsika ida giye.

<sup>14-15</sup> ‘Eena kina qansa ke qanse, yinin qansenam bhocchehe; sheda ke shede, yinin shedenam qaabehe.

Aapinka kenin shedoamadettsi,  
qaaminka kenin qansoamadettsi,  
woylaminka kedi qaabayse idar ke maataysaka  
intaar keam pacchoamadettsi,  
eena kinasa woylammo duuididine;  
qammoar kesa qansehe;  
aapinamaar kedi cumbhidine’  
hamayse kesa Isiasin ena birayse giyoono ko thoothade.

<sup>16</sup> “Aapin yennonin shedenna, qaamin yennonin qansenna yedi gobshadhaanane.  
<sup>17</sup> Inta yena gon ida giye: Thoothina Barjokala qansayse eenna giyayna eenabee

tipana eenabe yenin shedenam shedota anngardhidine, ko dahaannaar shedadehe; yenin qansenam qansana anngardhidine, ko dahaannaar qansadehe” hamayse kena ki giyade.

*Yiithadhon Bheetansa Kamsin Bulino  
Marq 4:13-20; Luq 8:11-15*

<sup>18</sup> Pir Yesus kena yin ki giyade: “Ta yedi bheetan yiitheasa kamsinsa bulinam qansimate. <sup>19</sup> Barjo bitamonsa upsinam qansayse qaabima easa Seethaan nivayse woylaminte kisa yiithadhon upsinam kida tiye; agaa ea goyn aponte wavaa bheetadettsine. <sup>20</sup> Peen haachandar yiithadhoono bheetano Barjosa upsinam qansayse saanawa wozanka tiyea eadettsine. <sup>21</sup> Ea agaa caaci yinin yittsaamonna, kisa woyano likka wodanane; Barjosa upsinna gaale way oytaydha kidar konin yeskenka saanawa kida gare. <sup>22</sup> Ukumbhansa shaarinte yiithadhoono bheetano Barjosa upsinam qansea eadettsine; yi qansaakaar peen kosa bhocchinbee wodimmakkon anngarmanbeka Barjosa upsino kinin qansoono kisa woylaminte sun ishkimayse aapi ushima koda shidhe. <sup>23</sup> Peen payyandar wavaa bheetaa Barjosa upsinam qansayse bhocchika tiyea eadettsine. Agaa ea aapi usha ki ushe; kalaa kisa aapi eedi dong kaysa, waa pir aapi eedi makkam kaysa, waa pir aapi eedi kalaa kaysa apo tabhi keda ushe” kena ki hamade.

*Suwansa Kamsino*

<sup>24</sup> Yesus kamsi ab yin ki giyade: “Barjosa bitamono haamin yinnonte bheetan payyan yiithaa eadettsine. <sup>25</sup> Een wulin raaton wodanka, kisa banqin ea sootinka nivayse bargan yiithadhonsa iinte suwanam yiithayse ki yivade. <sup>26</sup> Barganin baqalayse ushenka suwanoar wodan ogoka ko haapadhade. <sup>27</sup> Waadadhayna eena haamin imbaakal nivayse, ‘Imbo, haaminte hasa hanin yiithoono bheetano payyatayu? Ta suwano hamora ko nivaa?’ kina ke hamade. <sup>28</sup> Kidiar kena, ‘Ogoam yin hayaa banqin eane’ ki hamade. Kisa waadiman eena kina, ‘Ta hana suwanam yivayse wonin buucoadettsi ya zaga zago?’ ke hamade. <sup>29</sup> Kidiar kena yin giyayse ki maasade: ‘Yin hayeebhode! Suwanam yenin buucenka barganam kanka yeda buuce. <sup>30</sup> Ogona garmate; ushayse konin shikadhen wodanka yekka kinka ko gebhe. Ushayse shikadhen wodanka, koam shikayna eenana, “Suwanam birayse shikee; nuuntear koam koqota kidar buskayse dhaxee. Barganam kidar buskayse kononte isa kee” kena hamayse ida giye’ ki hamade.”\*

*Saliithan Aapinsa Kamsino  
Marq 4:30-32; Luq 13:18-19*

<sup>31</sup> Yesus kamsi ab kena yin ki giyade: “Barjosa bitamono saliithasa<sup>†</sup> aapi eedi kalaa yisa haaminte kinin yiithon bheetandettsine. <sup>32</sup> Bheeta agaa bheetan wulsa iira likkane. Kinin gebhon wodanka haaqana wulsa iira kidi bashine; aptinaar nivayse antindar kisa ooni kenin woysoadettsi haaqa gaari kida maate” kena ki hamade.

*Dhiilin Taapansa Kamsino  
Luq 13:20-21*

<sup>33</sup> Yesus kamsi ab kena yin ki giyade: “Barjosa bitamono maa kallo dhiili sharqa makkam tiyate kanka konin taapaa irshodettsine; irshono konin dhiilin taapon taapanam konin oydhoadettsi ko hayade” kena ki hamade.

*Yesus Kamsinka Kinin Dhettsensa Goyno  
Marq 4:33-34*

---

\* <sup>13:30</sup> “Bargabee suwabe” hambhayno gaalin aponka gazgobee gazgodettsi maataa shudhi abbene. Igina yerram kamsina ko tiidhade. † <sup>13:31</sup> “Saliitha” hambhayno gaalin aponka “senafic” hamayse thaapadhoonone. Aapino kosa kattsi likkinca dahayse, duuqadhanna kattsi haaqa gaaridettsi konin gebhenna, ogono hattono Banen peente konin qolmonna, kamsina saliitha aapiam ko tiidhade.

<sup>34</sup> Yesus ogo wulam zarsinna kamsika ki giyade; yinin giyen yerin wulam kamsi qolma kena giyehe. <sup>35</sup> Ogosa goyno  
“Isa dhalqinam kamsika ida dhettse;  
peen pijadhorra yedayse aachimon yerin ida giye”  
hamayse ena birayse Barjokala qansayse eenna giyea eayn giyondettsi ko thoothade.

### *Suwani Kamsinsa Bulino*

<sup>36</sup> Ogosa budonte Yesus zarsinam garayse kidi ooninte ki ardade. Kisa paanan yivayna eena kikal nivayse, “Imbo, haaminte dohon suwan kamsinsa bulinam wona giyama” ke hamade.

<sup>37</sup> Yesus kena yin giyayse ki maasade: “Bheetan payyan haaminte yiithaa inta Eedi Naasine. <sup>38</sup> Hammo peeno konone; payyana bheetana Barjo naanane. Suwana Seethaan naanane; <sup>39</sup> suwanam yiithaa banqin ea Seethaanne. Haaminsa shikan wodano peen kosa macchin wodanone; shikayna Barjosa gaananane. <sup>40</sup> Ogonante suwanam shikate kidar dhaxayse nuunte koqadheadettsi, peensa macchin wodanka yin koda maate. <sup>41</sup> Ogo wodanka inta Eedi Naas gaanana innaam nittsayda nittse; kediар seesonsa iinte eenaam arsayna eenabee siyon waadadhayna eena wulbeam isa bitamora edate bulayse <sup>42</sup> dikimon nuunsa iinte keam keda dhabe. Ogotear eepibee atsi qiicabe koda maate. <sup>43</sup> Ogo wodanka tipana eena Imbaa kenteasa bitamonte haydettsi keda shaake. Qansen qaamiysa dahaa ki qanse” ki hamade.

### *Aachadhon Koymonsa Kamsino*

<sup>44</sup> Guttsayse Yesus yin ki giyade: “Barjosa bitamono haaminsa iir aachadhaa koy-moadettsine. Eedi kalaa ogo koymon haapayse maasate pir ki aachade. Kattsi kinin wozadhonna yivayse yisa dohon wulam shanshayse ogo haaminam ki shanade.

### *Bazaysa Dethaa Inquasa Kamsino*

<sup>45</sup> “Pir Barjosa bitamono bazira kambhea inqua bazaysa dethaa shanota zagea naggadeadettsine. <sup>46</sup> Agaa naggadea bazaysa kattsi dethaa inquam yinin haaponsa budonte, yivayse yisa dohon wulam shanshayse yera agaam ki shanade” kena ki hamade.

### *Kaarant Yedadhen Zaaninsa Kamsino*

<sup>47</sup> Guttsayse Yesus yin ki giyade: “Barjosa bitamono bazinsa iinte dhabadhaysaka kaaran ayni waana waana hamonam yeden zaanindettsine. <sup>48</sup> Zaaninte kaaranin thoothonsa budonte eena bazinsa gasandar gochate keda bule. Dooqayse konin yedonsa iira payyan payyanam edate kenin bevente keda wode; siyon siyonam os keda dhabe. <sup>49</sup> Peensa macchin wodanka yin koda maate; Barjosa gaanana nivayse siyana eenaam tipana eenakalanka eda ke ede. <sup>50</sup> Dikimon nuunsa iinte keam keda dhabe. Ogotear eepibee atsi qiicabe koda maate.

<sup>51</sup> “Ogo wulam yedi bhocchidu?” kena ki hamade. Kediар, “Wodi bhocchidine” ke hamade. <sup>52</sup> Kidiar, “Ogo yin ko hanna, Barjosa bitamon goynsa payya hayayse dhesea Musesa yigginam dhettsea yinnon koymora haalinbee gecchonbeam bulea imbaadettsine” kena ki hamade.

### *Naazret Katamante Yesusin Bagadhoono*

#### *Marq 6:1-6; Luq 4:16-30*

<sup>53</sup> Yesus igina kamsinaam giyate kinin macchonsa budonte, raqin ogora ki yivade.

<sup>54</sup> Ogora yinin gebhon peente Naazret katamandar nivayse kesa bukin raqinte Barjosa upsinam dhettsite ki dahade. Eeno kisa dhalqinka targadhayse, yin giyte ko dahade: “Kaa ea pakalmakkon kobee ko eenaam tarshen yerinbeam hamora ki bavaa?

<sup>55</sup> Kaa haaqan qarsea ea naasitayu? Indaano kisa Mayriyam hambhaynotayu? Kisa

indanaana Yayqoobbee, Yoseepbee,<sup>‡</sup> Simoonbee, Yiwdabetayu? <sup>56</sup> Kisa indanaana anzana wul wombete daaanatayu? Ta ea kaa ko wulam hamora ki haapaa?” hamayse <sup>57</sup> kisa dhalqinam bagayse tiyma ke garade. Yesus “Barjokala qansayse eenna giyea kinin gobshadhimino peen een yinnonbee oonin eena yinnabekal bishne” kena ki hamade. <sup>58</sup> Kinin giyenaam gonne hamayse kenin tiyaamonna, Yesus raqin ogote thoothi tarshea yer hayadehe.

## 14

### *Shivea Wannissa Dembhino* Marq 6:14-29; Luq 9:7-9

<sup>1</sup> Ogo wodanka Galila peenam wottsea Herodis Yesussa tarshen waadimanam ki qansade. <sup>2</sup> Yisa waadiman eenanaar, “Kaa Shivea Wannisne; kidi diira dhaabhidine. Ko tarshen waadiman wulam waadadhana kantan kinin haapono ogokane” kena ki hamade.

<sup>3-4</sup> Herodis ena iishima Pilbhoos geshon Herodiyadaam ki keemade. Ogo wodanka Wannis Herodisna “Hambanaasa geshonam keema haam zaskehe” kinin hamonna, Herodis kiam yettsate dhixin ooninte ki dhaskade. <sup>5</sup> Pir Wannisam deesana zagite ki dahade; eeno wul Wannisca “Barjokala qansayse eenna giyeane” konin hamonna, eenna kurtumbhayse ki garade.

<sup>6</sup> Bitaa Herodisin adhadhaa rooroayn gobshadhea sedhaaka, Herodiyadasa naano nivayse een kummannu eldhonsa birante yiigaate konin kirbenka Herodisam ko wozisade. <sup>7</sup> Herodis wozadhyayse kona, “Iam hanin oyson yerinam hana imayda ime” hamayse kona ki malla ardade. <sup>8</sup> Naanoar indankal dhalqayse, “Shivea Wannissa metenam taxate sharqaka ina taaki imaa” kina ko hamade. <sup>9</sup> Bitaar qaabeka yi ataakaar, kimbesana kinka kummandar dooqaana eenasa birante kona malla kinin ardonna, konin zagonam kona haydhoodettsi ki giyade. <sup>10</sup> Eedi yittsayse dhixin ooninte Wannissa metenam ki taskisade. <sup>11</sup> Taxadhaa meteamaar sharqaka bavate naanna ke imade; naanoar bavate indanna ko imade.

<sup>12</sup> Wannissa paanan yivayna eenaar nivayse kisa leesinam tiyate ke duukade; ogoraar yivayse Wannisini diyonam Yesusna ke giyade.

### *Yesus Shii Dong Eenaam Kinin Kunsoono* Marq 6:30-44; Luq 9:10-17; Wannis 6:1-14

<sup>13</sup> Yesus Wannissa dembhinam kinin qanson wodanka, bazindara sagadhen gonngalante ardayse raq eedinin qolma kalaate yimal ki yivade. Eenoar ogoam konin qanson wodanka, katamana yinna yinnara utayse kikal rooka ko yivade. <sup>14</sup> Yesusaar bazindara sagadhen gonngalara utayse thoothin eenam haapayse kona ki burqadhade; hajadhaana eenaamaar ki pacchade.

<sup>15</sup> Peenin sootenka Yesussa paanan yivayna eena kikal nivayse, “Kono ranqo eedinin gidir qolminone; peenoar sootidine. Ogona zarsino kono wosa gasante daahaana gurdanadar yivayse gala konin shanoadettsi koam yittsaa” kina ke hamade. <sup>16</sup> Yesus kena yi giyna: “Yedi kinin itsen galan kena imee; kinin yivoadettsi keam zaskehe” kena ki hamade. <sup>17</sup> Yesussa paanan yivayna eenaar kina maasayse “Wokal balasha dongbee kaara lamaabe bish dahade” hamayse kina ke giyade. <sup>18</sup> Yesus kena “Iginaam ina ora bevee” ki hamade. <sup>19</sup> Ogosa budonte een wulka “Shudhindar dooqee” ki hamade. Yesus balashana dongnabee kaarana lamaanabeam tiyayse tura cecin shedayse Barjoam miskeka ki gobshade. Balashanamaar qunthayse yisa paanan yivayna eenana ki imade; kisa paanan yivayna eenaar eenna ke imade. <sup>20</sup> Eeno wulaar itsayse ko mishade. Ke itsaysaka shidhoono Yesussa paanan yivaynayn thoosayse dhaasoono dirmano sharqa

<sup>‡</sup> 13:55 Raqa kaate “Yoseep” hamea naabea Marq 6:3dar “Yoosa” koda hame.

tabhi lamaane. <sup>21</sup> Itsoono eeno maanabee naanabe paydadhma anngina bish shii dongaddhane.

*Yesus Bazindar Rooka Tigate Kinin Nivoono  
Marq 6:45-52; Wannis 6:16-21*

<sup>22</sup> Ogosa budobar saanawa Yesus yisa paanan yivayna eenana, “Eenaam onnadars inin yittsenka, yedi bazindara sagadhen gonngalanka iam birayse bazira sus sagee” ki hamade. Ogora kidi eenaam onnadars inin yittsonsa budonte, Barjo misko yimal dhukandar ki utade; peenin sootenka Yesus ogote yimal ki dahade.

<sup>24</sup> Ogo wodanka Yesussa paanan yivayna eena yingir dohoono gonngalano bazinsa gidinte ko daaka, wurano bazindar dhaabhaye gonngalanam kenka osbee orabe jugite ko dahade. <sup>25</sup> Sootin peen sedhamba tiibh hamenka, Yesus bazindar rooka tigate kisa paanan yivayna eenakal nivite ki dahade. <sup>26</sup> Kisa paanan yivayna eenaar Yesus bazindar rooka tigate kinin nivenka kiam haapayse kattsi targadhayse gibazada “Kaa meeshine!” hamayse kurtumbhayse ke ilatade. <sup>27</sup> Yesus saanawa kena “Hay! Intane; kurtumbheebhode” ki hamade. <sup>28</sup> Ogo wodanka Bhethiroos “Imbo, ya hanna, bazindar rooka tigate hakal i nive ina giyaa” ki hamade. <sup>29</sup> Yesus kina “Nivima” ki hamade. Bhethiroos gonngalara utayse Yesuskal bazindar rooka tigate ki yivan yedade. <sup>30</sup> Ko dahaannaar Bhethiroos bazindar jibarshen wuranam shedayse ki kurtumbhade; bazinoar kiam itsamba konin hayenka, “Imbo, iam dhacchima!” hamayse ki ilatade.

<sup>31</sup> Yesus saanawa aanin yisa pishkayse kiam yedayse hatte, “Ya idar woyleamin hanin qajensa goyn joogaa, harrnaa qothimaa?” kina ki hamade. <sup>32</sup> Ogora Yesusbbee Bhethiroosbe bazindara sagadhen gonngalante kenin ardenka, wurano jibarshan ko garade. <sup>33</sup> Ogo bazindara sagadhen gonngalansa iinte dahaana eena “Gon ya Barjo Naasine” hamayse kina ke goodimade.

*Gensareth Peente Hajadhon Eenam Yesusin Pacchoono  
Marq 6:53-56*

<sup>34</sup> Yesusbbee kisa paanan yivayna eenabe bazinam sagayse Gensareth peendar ke yivade. <sup>35</sup> Ogo peente dohoono eeno Yesus kinin dohonam konin dheson wodanka, kosa gasambar theedin dohon gurdan eendar apo yittsayse hajadhon een wulam kidar ko bavssade. <sup>36</sup> Hajadhoono eeno Yesuskal “Apalansa hasa nukinam hattear wo kaame” hamayse kiam koda miske; kisa apalansa nukinam kaamaana eena wul hajimora paashidine.

## 15

*Ena Eykena Dambinsa Yesusam Oysadhoono  
Marq 7:1-13*

<sup>1</sup> Ogo wodanka Parisa eenabee Musesa yigginam dhettsayna eenabe Yerusaalemra dhaabhaye Yesuskal hatte yin giyayse kiam ke oysade: <sup>2</sup> “Hasa paanan yivayna eena ena eykenasa dambinam kenin toolimino harrnane? Aaninam shiidhima galan keda itse” kina ke hamade.

<sup>3</sup> Yesus kena yin giyayse ki maasade: “Yedisin yennon dambin toolota hamayse Barjoyn giyonam yenin toolimino harrnane? <sup>4</sup> Barjo yi giyna: ‘Hambabeee handabeam gobshaa’ pir, ‘Imbaabee indanbeam iirea ki deesadhe’ ki hamade. <sup>5</sup> Yedi ‘Eedi hayyear imbaabee indanbena “Yeem inin kelshen yerin inta Barjona iminto hayayse imidine” ki hamanna, <sup>6</sup> ea kaa keeda lansi imbaabee indanbeam ki kelshabhoode’ yeda hame. Ogo goynka yedi dambin yennon toolota Barjoyn giyonam yeda gare. <sup>7-9</sup> Yedi maltinato, ena Barjokala qansayse eenna giyea Isias Barjoyn giyonam,

'Kina eena yisa aponka bish ke iam gobshe;  
woylammo kesa ikalanka kattsi pegimbhidine.  
Eenin bulon dambinam Barjoyn bulaa yiggidettsi hayayse  
eenaam dhettsaate sun guuri ina keda goodime'  
hamayse ena yennon goynam kinin giyoono gonne" hamayse Yesus kena ki guyade.

*Eediam Minngisayno Yerro*  
*Marq 7:14-23*

<sup>10</sup> Ogora Yesus eenaam yikal eelayse, "Qansimate; woylaminkaar yesa payya hayayse qaabee. <sup>11</sup> Eediam minngisayno yerro eedisa apora utaynone; iinte ardaynotehe" kena ki hamade.

<sup>12</sup> Ogosa budonte Yesussa paanan yivayna eena Yesuskal theedayse, "Parisa eena ogo hanin giyonam qansaye hanka kenin gemmonam ya dhesidu?" hamayse kiam ke oysade. <sup>13</sup> Yesus kena yin giyayse ki maasade: "Cecinte dahaa Imbayn koraamma yerra wul buucima ke buucime. <sup>14</sup> Garmate! Kedi aapin kayaanaam entsayna aapin kayaanane. Aapin kayaa ea aapin kayaam entsea ki hanna, kedi lamaana oolonte keda dhambe" kena ki hamade.

<sup>15</sup> Bhethiroos Yesusna "Kamsinsa bulinam wona giyma" ki hamade. <sup>16</sup> Yesus kena yin ki guyade: "Yedi ta koka yekka qaabe yininsa qolminaw? <sup>17</sup> Aponte ardayno yerro wul iinte ardayse ora mayandar konin utenam yedi dhesattenu? <sup>18</sup> Apora utayno ko hanna, woylamra koda ute; eediammaar minngisayno ogonone. <sup>19</sup> Woylamra utayno siya qaabobee, eediam deesintabee, sharmucimakkobee, dimmakkobee, buudamo dhalqbee, wuupobene. <sup>20</sup> Eediam minngisayna iginane; aanin shiiddhima itsinta eediam minngisehe" kena ki hamade.

*Yesusdar Woylamin Qajoono Maa Kallo*  
*Marq 7:24-30*

<sup>21</sup> Yesus ogo raqira utayse Thiroosbee Sidoonabe peendar ki yivade. <sup>22</sup> Ogo peente Kanaan eedi maatoonno maa kallo Yesuskal nivayse, "Imbo, Dawt Naasa, naan innonam beero yedaysaka gaalite ko dahade; ogona ina burqadhyayse koam pacchaa" hamayse ilataate kiam ko miskade. <sup>23</sup> Yesus kona yer yinne hamima lay ki hamade.

Ogo wodanka Yesussa paanan yivayna eena kikal theedayse, "Kono edono wosa paananka nivite konin ilatenna, bannzo koam yittsima" hamayse kiam ke miskade. <sup>24</sup> Kidiar, "Inta inin nittsadhoono yaatidettsi kayaana Israveel eenana bishne. Eedi abnatehe" hamayse ki maasade. <sup>25</sup> Edono Yesussa roonkal kumpurdhayse, "Imbo, bannzo! Iam kelshima" hamayse kiam ko miskade. <sup>26</sup> Yesus kona maasayse "Naanasa galanam tiyayse qaskinana dhaba zaskehe" ki hamade. <sup>27</sup> Kodiar "Imbo, gonne; imbaanin itsenka diinenam qaskina itsa ke itse" ko hamade.

<sup>28</sup> Ogona Yesus kona yi maasina, "Ya kono mayno, idar woylamin hanin qajayno goyno hasa gebhine; ogona hanin zagondettsi ko hana maate" kona ki hamade. Agaa wodaaka naano saanawa ko paashade.

*Thoothin Hajadhon Eenam Yesusin Pacchoono*

<sup>29</sup> Yesus raqin ogora dhaabhayse Galila bazinsa aponte ki nivade; ogotear dhukandar utayse ki dooqade. <sup>30</sup> Thoothino eeno eena roonsa wobonabee, aylanabee, aapin kayaanabee, apon kayaanabee, hajadhon een waanibeam bavate Yesusdar nivayse kisa roon dementear ko wodade; Yesusaar keam pacchidine. <sup>31</sup> Eeno eena apon kayaana kenin dhalqenam, eena aylanaar kenin paashenam, wobona eenaar payya kenin yaayenam, aapin kayaana eenaar kenin haapenam konin haapenka, targadhayse Israveel Barjoam ko gobshade.

*Shii Oydin Eenam Yesusin Kunsoono  
Marq 8:1-10*

<sup>32</sup> Yesus yisa paanan yivayna eenaam eelayse, “Eeno kono imbesana rooro makkam dooqayse konin itsea yer kosa qolmonna, inta kona burqadhidine; goynte shiitayse konin dhamboamadettsi ko itsima koam yittsana nashaatine” kena ki hamade. <sup>33</sup> Yesussa paanan yivayna eena kina maasayse “Ta een koaddha hamonna yeekeea gala ko eenin qolmon raqira hamora ko haapadhe?” ke hamade. <sup>34</sup> Yesus “Balasha meemayne yekal dahaana?” hamayse keam ki oysade. Kediar “Balasha tobbhaabee kaara shaaqa tokaa waanibe wokal dahade” kina ke hamade. <sup>35</sup> Ogora Yesus eenka “Peendar dooqee” hamayse <sup>36</sup> balashana tobbhaanabee kaaranabeam tiyayse Barjoam miskeka gobshayse qunthate yisa paanan yivayna eenana ki imade; kisa paanan yivayna eenaar eenna ke imade. <sup>37</sup> Eno wul itsayse ko mishade. Ko itsaysaka shidhoono dirmano Yesussa paanan yivayna eena sharqa tobbhaa thoosayse ke dhaasade. <sup>38</sup> Itsoono eeno maanabee naanabe paydadhma anngina bish shii oydine. <sup>39</sup> Ogosa budonte Yesus zarsinam yittsayse kidi bazindara sagadhen gonngalante ardayse Mege-doon peendar ki yivade.

## 16

*Yesussa Tarshen Waadimanam Shedana Oysadhoono  
Marq 8:11-13; Luq 12:54-56*

<sup>1</sup> Parisa eenabee Saduqa eenabe Yesuskal nivayse, “Barjo haam kinin nittsonam woninkay dhesea tarshea milkit wona hayaa” hamayse kiam taysate shedota zagayse ke oysade. <sup>2</sup> Kidi kena maasayse yin ki giyade: “Peenin ibanenka, ‘Cecino ciilidine; doobi qanehe’ yeda hame. <sup>3</sup> Burin pir cecinin poldhenka ‘Peeno poldhayse thipidine; kina doobi qanasane’ yeda hame. Peensa dantan goynam cecin shedayse yeda dhese; wodansa milkitino har konin dhehen shedayse dhesano yeam bashidu? <sup>4</sup> Ko wodanka Barjoam garayno siyono adhadhino tarshea milkit haydhe koda zage. Yoonaasdhar yeskon milkitindara milkit ab kona haydhehe” hamayse keam garayse ki yivade.

*Parisa Eenabee Saduqa Eenabeyn Dhettsera Mete Gisha Zaskayno  
Marq 8:14-21*

<sup>5</sup> Yesussa paanan yivayna eena balasha yinka bavima walayse bazinsa saabar ke sagade. <sup>6</sup> Yesus “Shedee! Parisa eenabee Saduqa eenabesa irshora mete yesaam gishimate” kena ki hamade. <sup>7</sup> Kediar “Ogono yin kinin giyoono balashayn wonka bambha walayse wonin nivon goynsane” hamayse kinka ke dhalqade. <sup>8</sup> Yesus kesa qaabenam dhesayse kena yin ki giyade: “Yedi idar woylaminin qajadhen goyn joogaanato, balashanin yesa qolmonna harrnee kikal dhalqe? <sup>9</sup> Akar bhocchattenu? Balasha dongnam shii dongin eenaam kunsate micchayse shidhoono dirmano yenin dhaasoono sharqa meemay konin dohoono yena bhoqayu? <sup>10</sup> Yin tapir balasha tobbhaanaam shii oydin eenaam kunsate micchayse shidhoono dirmano yenin dhaasoono sharqa meemay konin dohoono yena bhoqayu? <sup>11</sup> ‘Parisa eenabee Saduqa eenabesa irshora mete yesaam gishimate’ yena inin hamoono balashan goynkatay konin dohonam yedi hamin ye bhocchimine?” kena ki hamade. <sup>12</sup> Kediar “Parisa eenabee Saduqa eenabeyn dhettsera mete yesaam gishimate” kinin hamoono gon balashasa irsho goytikatay konin dohonam ke dhesade.

*Bhethiroos Kiristoossa Kinin Tarjoono  
Marq 8:27-30; Luq 9:18-21*

<sup>13</sup> Yesus Pilbhisoos Qesaaria peente kinin yeskon wodanka, yisa paanan yivayna eenana “Eeno i Eedi Naaseam hay koda hame?” hamayse keam ki oysade. <sup>14</sup> Kediar “Waani eeno ‘Shivea Wannisne’ koda hame; waani eenoar ‘Eeliasne’, waani eenoar

'Ermeas way Barjokala qansayse eenana giyayna eenasa kalaane' koda hame" kina ke hamade. <sup>15</sup> Yesus kena "Yedi iam hay yeda hame?" ki hamade. <sup>16</sup> Bhethiroos hambhea Simoon kina yinin maasenka, "Ya Barjoyn qadhaa Kiristoos, lay dehea Barjosa Naasine" ki hamade. <sup>17</sup> Yesus maasayse kina yin ki guyade: "Ya Yoona naasa\* Simoono, ogoam hana dhettsongo eeditehe, cecinte dahaa Imbane; ogonante ya gobshadhaane. <sup>18</sup> Inta hana ida giye: Ya Bhethiroos seenine; seenin laytan kodar inta isa misken oonin ida woyse; koam dembhisa kanta ko hannaar bashehe. <sup>19</sup> Barjosa bitamon kerinam bulen qulpin hana ida ime; peente hanin dhaxaana wul cecinte dhaxadhaana keda maate; peente hanin bulaana wul cecinte buldhaana keda maate" ki hamade. <sup>20</sup> Ogora Yesus yisa paanan yivayna eenana "Barjoyn qadhaa Kiristoos inin dohonam eedina giyeebhode" hamaye upsi kantaka ki guyade.

*Yesus Yisa Dembhin Goynsa Birayse Kinin Giyoono  
Marq 8:31-33; Luq 9:22*

<sup>21</sup> Ogo wodara yedayse Yesus yisa paanan yivayna eenana yi giyna: "Yerusaalemdar yivayda yive. Ogote peensa donzanabee, gudullasa hayonabee, Musesa yigginnam dhettsayna eenabe thoothi gaale idar yeskisa ke yeskise; iam deesa ko deesadhe. Dembhiraar makkansoa rooroaka dhaabhayda dhaabhe" hamaye yidar yesken yernam kena may giyan ki yedade. <sup>22</sup> Bhethiroosaar kiam yimal entsate yivayse, "Imbo, ogono yin maatehe; ogono hadar ko yeskabhoode" hamaate kiam waciman ki yedade. <sup>23</sup> Yesus kidar wal hamaye "Ya Seethaan, isa aapira os yivaa! Barjoyn qaabenam hanin qaabiminna, eedinin qaabenam hanin qaabenna, ina ya goane" kina ki hamade.

*Yesussa Paanan Yiidhen Goyno  
Marq 8:34-9:1; Luq 9:23-27*

<sup>24</sup> Ogosa budonte Yesus yisa paanan yivayna eenana yin ki guyade: "Isa paanan nivana nashea hay ki dahaannaar, yinnon qaaben ki gare; yinindar ziitate deesadhen masqalinam kedayse isa paanan ki nive. <sup>25</sup> Sadan yinnonam dhacchana nashea hay ki dahaannaar koam kaysa ki kayse; ina hamaye sadan yinnonam kaysea hay ki dahaannaar koam haapa ki haape. <sup>26</sup> Eedi peen kodar dohon yer wulam haapayse sadan yinnonam kaysidi ki hanna, kina har ko poote? Way eedi yisa sadanna baza yer har ki kashe? <sup>27</sup> Inta Eedi Naas Imbas aapir kisa gaananabesana nivayda nive; ogo wodanka een wulna kesa waadimandettsi kena bazan ida kashe. <sup>28</sup> Inta yena gon ida giye: I Eedi Naas bit maatayse inin nivenam kenin haapenka yekka kote woyaana eenasa shaarinte dembhi diymina eedi daane" hamaye kena ki guyade.

## 17

*Yesussa Dantanin Ookimoono  
Marq 9:2-13; Luq 9:28-36*

<sup>1</sup> Yesus ogoam yinin giyonsa budobar laskoa rooroaka Bhethiroosbee, Yayqoobbee, Yayqoobsa indanaasa Wannisbeam yinka entsate dhukan gudubhondar ki utade. <sup>2</sup> Raqin ogotear Yesussa dantano kesa birante ko ookimade; kisa aapin kerroar haydettsi ko shaakade; kisa apalloar kattsi cawlayse shaakadettsi ko maatade. <sup>3</sup> Marrato! Musebee Eliasbe Yesusbesana kinka kenin dhalqenka, kisa paanan yivayna eenana ko haapadhade.

<sup>4</sup> Bhethiroos Yesusna yi giyna: "Imbo, raqin kote wonin dahayno wona payyane. Ha nashea hanna, baara kalaam hana, kalaam Musena, kalaam Eliasna hayayse makkam i kee" ki hamade. <sup>5</sup> Bhethiroosaar ogoam yin kinin giyenka, liilo kattsi cawli keam

---

\* <sup>16:17</sup> "Yoona naasa Simoon" hamenam Wannis 21:15dar "Wannissa naasa Simoon" koda hame. <sup>16:27</sup> Maz 62:12.

ko ishkade. Liilonsa iir “Ininka wozadhea inin nashea isa Naasa kaane; kina qansee” hamea upsi ko qansimade.

<sup>6</sup> Yesussa paanan yivayna eenaar upsin ogoam qansayse kattsi kurtumbhayse wotinka yisa peendar ke dhambade. <sup>7</sup> Yesus kekal hatte yisa aaninka keam kaamayse, “Dhaabhee, kurtumbheebhode” kena ki hamade. <sup>8</sup> Kediar metenka dhev hamayse kenin shedenka, Yesus bishkalanka eedi ab haapadehe.

<sup>9</sup> Dhukara kenin hanchenka, Yesus kena yi giyna: “I Eedi Naas dembhira inin dhaabhenka yekka ta yedin haapon koam eedi haynaar giyeebhode” ki hamade. <sup>10</sup> Kisa paanan yivayna eenaar kina yi giyna: “Ta keeda Musesa yigginam dhettsayna eena ‘Birayse niva zaskea Eeliasne’ harrna ke hamaa?” hamayse kiam ke oysade. <sup>11</sup> Yesus kena yinin maasenka, “Ogono gonne; Eelias birayse niveane; kidi yer wulam ashka ki ashke. <sup>12</sup> Ko dahaannaar inta yena ida giye: Eelias kosa birayse nividine. Eeno kiam konin dhesaamonna, yinin nashon yerin wulam kidar ko hayade. Ogodettsi ta i Eedi Naas gaalenam kekalanka tiyayda tiye” ki hamade. <sup>13</sup> Ogo wodanka Yesussa paanan yivayna eena Yesus Shivea Wannissa kinin giyonam ke dhesade.

### *Beeroyn Yedaa Naasaam Yesusin Pacchoono*

*Marq 9:14-29; Luq 9:37-43*

<sup>14</sup> Yesusbee makkamma kimbesana dahaana eenabe thoothin eenkal nivite kenin yeskenka, eedi kalaa Yesussa birante hatte kumpurdhayse, <sup>15</sup> “Imbo, bannzo! Isa naasana burqadhayse pacchaane. Rum kiam yedoono kattsi dhabite galshaynone; dhaabha ko hanna, thoothi wodaka nuunbee noqonbesa iir koda kiam dhabe. <sup>16</sup> Hasa paanan yivayna eenakalar inta kiam bavate nividine; ko dahaannaar kedi pacchana kiam damadehe” kina ki hamade. <sup>17</sup> Yesus kina yinin maasenka, “Yedi idar woylamin qajimina, bhocchinka yesa wobaana adhadhinato, hamaaka yekka yembesana ida dee? Yena hamaaka yekkay darsho? Yinda naasaam ora ikal bevee!” ki hamade. <sup>18</sup> Yesusaar beeronam ki bitade. Beeronoar naasadara ko utade; naasaar saanawa ki paashade.

<sup>19</sup> Ogosa budonte Yesussa paanan yivayna eena Yesus yimal kinin dohonte kikal nivayse, “Beeronom bulana wonin damaammo harrnane?” hamayse kiam ke oysade. <sup>20</sup> Yesus kena yin ki guyade: “Barjodar woylamin yinin qajen goynin yesa joogonnane. Inta yena gon ida giye: Saliithasa\* aapiaddha hama idar woylam yinin qaje goyti yesa daa ko hanna, dhukan koka ‘Kaara saa agaadat yivaa!’ kanka ye hamidianna, yena yiva ko yive. Yeam bashear yer qolehe. <sup>21</sup> [Kodettsino beerono itsima Barjoam miskinta goytikatay hamidi ko hanna, utehe]” kena ki hamade.

### *Yisa Dembhinsa Yesusin Lansi Giyoono*

*Marq 9:30-32; Luq 9:43-45*

<sup>22</sup> Yesussa paanan yivayna eena Galila peente Yesuskal ke bukaysaka kena yin ki guyade: “I Eedi Naasaam eensa aaninte saskate iam koda imbhe; <sup>23</sup> iamaar deesa ko deesadhe; intaar makkansoa rooroaka diira dhaabhayda dhaabhe” ki hamade. Kisa paanan yivayna eenaar ogo kinin giyonam qansayse kattsi ke qaabeka atade.

### *Barjosa Gazan Ooninna Gibirin Kashadhen Goyno*

<sup>24</sup> Ogora Yesusbee kisa paanan yivayna eenabe Qipirnaahoom katamante ke yeskaysaka, Barjosa gazan ooninna gibirin kacchayna eena Bhethirooskal nivayse, “Yeem dhettsea ea agaa gibirin kashayu?” hamayse kiam ke oysade. <sup>25</sup> Kidiar “Kasha ki kashe” kena ki hamade. Ooninte ki ardaysaka Yesus birayse kina “Simoono, hana har ko maate? Peen kodar bitimayna eena gibirin kenin kacchen een hamokalanka ke kacche? Peen eenkalankamoo? Een peen eenkalaw?” ki hamade. <sup>26</sup> Bhethiroosaar “Een peen

<sup>17:10</sup> Milki 4:5. \* <sup>17:20</sup> “Saliitha” hambhayno gaalin aponka “senafic” hamayse thaapadhoonone. Aapino kosa kattsi likkinca dahayse, duuqadhanna kattsi haaqa gaaridettsi konin gebhenna, ogono hattono Banen peente konin qolmonna, kmsina saliitha aapiam ko tiidhade.

eenkala tiya ke tiye” ki hamaysaka, Yesus “Ta ogo yin ko hanna, peen eena kenna gibirin kashehe hamintane.<sup>27</sup> Ko dhaaannaar kena goa wonin maatoamadettsi bazinte yivayse kaara kalaa yedea zaaniam gidir dhabaa. Birayse hanin yedaa kaarasa apon wavshayse ogote koymo<sup>†</sup> haapaada haape; agaam tiyayse imbee hambena hamayse kena imaa” ki hamade.

## 18

### *“Wuldara Sagi Maatea Hayne?” Hamayse Kenin Oysoono Marq 9:33-37; Luq 9:46-48*

<sup>1</sup> Ogo wodanka Yesussa paanan yivayna eena kikal nivayse, “Barjosa bitamonte wuldara sagi maatea hayne?” hamayse kiam ke oysade. <sup>2</sup> Kidi naasi kalaam yidar eelayse kesa shaarinte woysayse <sup>3</sup> yin ki guyade: “Inta yena gon ida giye: Naasidettsi maatayse ye ookimaamma Barjosa bitamonte yer hamin hambhaakaar ardattene. <sup>4</sup> Ogona naasa kaadettsi yiam toskea Barjosa bitamon raqinte wuldara sagi maatea kidine. <sup>5</sup> Kaa naasadettsi naasa kalaam isa naabenna hamayse tiyea iam ki tiyade.

### *Eedina Goa Maatintara Mete Gishinta Marq 9:42-48; Luq 17:1-2*

<sup>6</sup> “Idar woylamin qajayna igina likkanasa iira kalaana goa maatea eedi hayyear deesime seeni gaari kisa qorcindar dhaxayse bazinte kiam dhabadhaysaka ki itsadhidianna, kina payyane. <sup>7</sup> Eenna goa maaten peen kona hay! Hamin ko dhaaakaar eenna goa maatea yer nivima shidhehe; ko dhaaannaar eenin gemmoadettsi hayea eana hay!

<sup>8</sup> “Ogonante anno hanno way roono hanno hana goa maatea ko hanna, taxate hakalanka koam dhabaa. Aan lamaaka way roo lamaaka dahayse rooro wul lay dikimon nuunte haam dhabadhenna, gundi dahayse sadanka daadhen raqinte hanin ardayno hana payyane. <sup>9</sup> Aapino hanno hana goa maatea ko hanna, bulayse hakalanka koam dhabaa. Aapi lamaaka dahayse lay dikimon nuunte haam dhabadhenna, aapi kalaka dahayse sadanka daadhen raqinte hanin ardayno hana payyane.

<sup>10</sup> “Kina likkanasa iira kalaam hattear yenin bagoamadettsi mete yesaam gishee! Naana kinaam gishayna Barjosa gaanana cecinte dahaa Imbasira rooro wul keda woye. <sup>11</sup> [I Eedi Naasisa nividino kayaanaam dhacchanane.]

### *Kayayse Haapadhaa Yaatasa Kamsino Luq 15:3-7*

<sup>12</sup> “Ta yena har ko maate? Eedi dong kaysa yaanaysa dahaa ea igina yaanasa iira yaati kala kaydianna, eedi oydi kaysa apo tabhi salla yaanaam dhukandar garayse kayaam zagate yivaaw? <sup>13</sup> Inta yena gon ida giye: Haapa ki hanna, eedi oydi kaysa apo tabhi salna kayaamma yaanadara sagi hayayse yaan kayayse haapadhonka kida wozadhe. <sup>14</sup> Ogodettsi igina likkanasa iira kala kayoadettsi cecinte dahaa yesa Imbaa zagehe.

### *Seeson Hayea Eana Hamin Haynta Konin Zaskayno*

<sup>15</sup> “Aananta hantea haam genidi ki hanna, hambee kimbe bish maatayse kisa seesonam kina giyaa. Hana qansea ki hanna, pir hasa kiam aanamoa hayade. <sup>16</sup> ‘Hanin giyenam qansattine’ ki hamanna, eedi lamaa way eedi makkamsa tarja zaskenna tapir kalaa way lamaa hanka tiyayse daran yivaa. <sup>17</sup> Iginanaar ki qansaamma, misken ooninte dahaana eenana kisa waadimanam giyaa. Misken ooninte dahaana eenana ki qansaamma Barjoam dhesimina eenabee cubbona gibirin kacchayna eenabedettsi maasayse kiam paydaa.

<sup>18</sup> “Inta yena gon ida giye: Peente yenin dhaxaana cecintear dhaxadhaana keda maate; peente yenin bulaana cecintear bulthaana keda maate. <sup>19</sup> Tapir inta yena

<sup>†</sup> 17:27 “Koymo” hambhoono Girik apoka “istater” koda hambhe. Kalaa istater lamaana eenasa gibirin kashad-henna yeekeane. <sup>18:16</sup> Yiggi 19:15.

gon ida giye: Yesa iira eedi lamaa peendar yer harrnaar qaabe kalaaka agayse kinka ke miskanna, cecinte dahaa Imba kesa miskenam kena ima ki ime. <sup>20</sup> Harrna hambidianna, lamaa way makkam maatayse isa naabenka yenin bukon raqinte intaar yembesana kinka ida maate” kena ki hamade.

### *Garintasa Goyno*

<sup>21</sup> Ogo wodanka Bhethiroos Yesuskal theedayse, “Imbo, aananta intea iam genidi ki hanna, meemay goyt kina garinta ko iam zaske? Tobbhaa goyt kina yeeka ko yeeko?” hamayse kiam ki oysade. <sup>22</sup> Yesusaar yin guyayse kina ki maasade: “Eedi makkam kaysa apo tabhi tobbhaa goyt yekka kina garma ida hame; tobbhaa goyt bish garaa hana hamattine.

<sup>23</sup> “Ogona Barjosa bitamono yisa waadimaynadar baza meemay dohonam dhesana zagaan bitaam koda maate. <sup>24</sup> Birayse kinin eelaana eenasa shaarinte eedi kalaa paydadhaka maqimon bazanindar dahaam entsate hatte kisa birante ke woysade. <sup>25</sup> Ea agaa bazanam kashota koymon kinin kayson goynka kiam wottsea ea yi giyna: ‘Eabee, geshonbee, naanabee, kisa yerra dahaana wulbeam shanshayse daran isa dohon bazan innonna ina bevee’ hamayse yisa waadiman eenana ki guyade. <sup>26</sup> Waadiman ear kiam wottsea easa buqon yedaye, ‘Imbo, bannzo ina wodhaa; inta wulam hana kashayda kashe’ hamayse kiam ki miskade. <sup>27</sup> Agaa kiam wottsea ear kina burqadhayse kidar dohon bazan wulam kina ki garade.

<sup>28</sup> “Ea agaa kiam wottsea eakala yinin utenka, kimbesana kinka waadadhayna eenasa eedi kisa aanamo kalaa kikalanka birre mato kalaa bazimaam haapayse, ‘Bazan innonam ina kashaa!’ hamayse kisa qorcinam cuuqayse ki yedade. <sup>29</sup> Aananta agaa kintea kisa buqon yedaye, ‘Bannzo ina wodhaa; inta hana kashayda kashe’ hamayse kiam ki miskade. <sup>30</sup> Kidiar ‘Inta zagattine; ina ta kashaa’ hamayse bazanam kina kashate kinin macchenka yekka dhaxin ooninte kiam ki dhaskade. <sup>31</sup> Kimbesana waadadhayna waani ogo yin kinin hayenka haapayse kattsi burqadhayse keam wottsea eana yivayse ogo wulam ke guyade. <sup>32</sup> Ogoraar wottsea ea kiam elsayse, ‘Ya kaa siya ea, bazan innon hadar dohonam iam ha miskaysaka inta hana bazan innon wulam garidine. <sup>33</sup> Inta hana burqadhayse inin garondettsi, yaar yin aananta hanteana burqadhayse kidar dohon bazanam kina garinta ko haam zaske’ kina ki hamade. <sup>34</sup> Ogo goynka kiam wottsea ea daran wacimayse, kina kinin garon bazan wulam kashate kina kinin macchenka yekka dhaxin ooninte galshayna eenana kiam yedate ki imade.

<sup>35</sup> “Yennon shaarinte aananta yinteara kisa seesonam woylem wulka garma eedi dahaa ki hanna, cecinte dahaa Imba kidar agaadettsi kida haye” hamayse Yesus kena ki guyade.

## 19

### *Keemon Goynsa Yesusin Dhettoono*

*Marq 10:1-12*

<sup>1</sup> Yesus dhalqin ogoam kinin macchonsa budonte, Galila peera dhaabhayse Yordaanoos baynsa saabar dohon Yiwda peendar ki yivade. <sup>2</sup> Thoothino eeno kisa paanan konin yivenka, kesa iira hajadhaana eenaam raqin ogote ki pacchade.

<sup>3</sup> Ogo wodanka Parisa eena kikal nivayse kiam taysate shedaate “Eedi geshon yinnonam yer har goytika ko hannaar, koam bulayse kinin yittsoadettsi Musesa yigginte giidhidu?” hamayse kiam ke oysade. <sup>4</sup> Yesus kena yinin maasenka, “Barjo birayse ‘Anngibee maabe hayayse keam ki pijade’ hamen Barjosa upsinam yedi nababeete?

<sup>5</sup> Pir Barjo ‘Ogonante eedi imbabee indabeam gara ki gare; geshon yinnonbete kinka kida dee; kedi lamaanaar waa kalaa keda maate’ hamayse ki guyade. <sup>6</sup> Kedi keeda kaara

os waa kalaa keda maate, lamaa maatehe. Ogona Barjo kidar kalaa kinin hayonam eedi ko kidara edabhoode” kena ki hamade.

<sup>7</sup> Parisa eena kina yi giyna: “Yin ko hanna, Muse ena ‘Eedi geshonam yinin bulenka, bulayse yinin oytensa tarja maatea warqat kona imayse ki bule’ harrna ki hamaa?” hamayse kiam ke oysade. <sup>8</sup> Kidiar kena yinin maasenka, “Muse maana yennaam ye bule kinin giyoono yedi woylaminka yesa Barjona ee hamimina yenin dohonnane; ena birayse yintehe. <sup>9</sup> Inta yena ida giye: Eedi hay ki hannaar, sharmucimakko goytika dayma geshon yinnonam bulayse maa ab keemea kidi sharmucimidine; [geshoayn bulon edonam keemea ear sharmucimidine]” kena ki hamade.

<sup>10</sup> Yesussa paanan yivayna eena yi giyna: “Anngibee maabesa kinka dayntan goyno yin ko hanna, maa keemima daadhayno payyane” kina ke hamade. <sup>11</sup> Yesus kena yin ki giyade: “Maa keemima daadhayno yinnante eena imbhaananae; een wulnatehe. <sup>12</sup> Ogonoar yin konin dohoono kenin adhadhenka eedi buu maataana daane; eediyn buunsaanaar daane; Barjosa bitamonna hamayse keemima daana zagaana eedi waaniar daane. Ogona tiyana damea ki tiye” kena ki hamade.

### *Yesus Naanana Barjoam Kinin Miskoono*

*Marq 10:13-16; Luq 18:15-17*

<sup>13</sup> Ogo wodanka Yesus yisa aaninam kedar wodayse kena Barjoam kinin miskoadettsi eeno yisa naasonam kalan entsate ko nivade. Kisa paanan yivayna eenaar eenam ke wacimade. <sup>14</sup> Yesus kena yi giyna: “Naana idar ke nive; keam mareebhode. Harrna hambhidianna, Barjosa bitamono igina naanadettsi maataana eenasane” hamayse <sup>15</sup> yisa aaninam kedar wodayse kena Barjoam ki miskade. Ogoraar raq abdar ki yivade.

### *Barsha Wodintasa Oysimeno*

*Marq 10:17-31; Luq 18:18-30*

<sup>16</sup> Eedi kalaa Yesuskal nivayse, “Woam Dhettsea, rooro wul lay dehen sadan haapota yer payya har haynta ko iam zaske?” hamayse kiam ki oysade. <sup>17</sup> Yesusaar “Yerin payyansa ikal harrnaa oyse? Payya maataa kalaa bishne. Roro wul lay dehen sadan haapota ha zagea hanna, Barjoyn giyonam toolaa” kina ki hamade. <sup>18</sup> Ear “Upsina hammaam?” ki hamade. Yesus yin giyayse ki kina maasade: “Deesaabhode, sharmucimaabhode, dimmaabhode, buudamoka tarjaabhode, <sup>19</sup> hambahbee handabeam gobshaa, een wulam hadettsi hayayse nashaa” kina ki hamade. <sup>20</sup> Barsha ear “Igina wulam inta toolidine; keeda ikal joogaa yer hare?” ki hamade. <sup>21</sup> Yesus “Yer wulam toolaa maatayse doota ha zagea hanna, yivayse hasa dohon koymonam shanshayse qambhinana imaa; ya hasa bazanam cecinte hada haape. Ogora maatayse isa paanan nivaa” kina ki hamade. <sup>22</sup> Barsha ear koymo thoothinin kisa dohonna, dhalqin ogoam yinin qansenka, yisa iinka ataate ki yivade.

<sup>23</sup> Ogosa budonte Yesus yisa paanan yivaynana yin ki giyade: “Inta yena gon ida giye: Eedi wodimosha Barjo bitamonte ardano kattsi gaalene. <sup>24</sup> Tapir inta yena ida giye: Eedi wodimoyn Barjosa bitamonte ardenna gamaleyn marpisa pulaka konin utayno deegane” kena ki hamade. <sup>25</sup> Yesussa paanan yivayna eenaar ogoam kenin qansenka, kattsi targadhayse, “Yin ko hanna, ta keeda hayne dhaqana damea?” ke hamade. <sup>26</sup> Yesus keam shedayse, “Kono yerro eedina dandimiminone; Barjona yer wul dandima ko dandime” kena ki hamade.

<sup>27</sup> Ogo wodanka Bhethiroos yi giyna: “Shedaa! Wodi yer wulam garayse hasa paanan wo nivade. Ta wonin haapayno yer hare dohoono?” hamayse kiam ki oysade. <sup>28</sup> Yesus kena yin ki giyade: “Inta yena gon ida giye: Niven haalin wodanka, i Eedi Naas gobshinka isa bitamon borkotondar inin dooqenka, yedi isa paanan nivayna tabhi lamaana bitamon borkotondar dooqayse tabhi lamaana Israveel eenasa muldhanadar pirdeeda

pirde. <sup>29</sup> Ina hamayse indanaana annginabee anzabanbee, imbaabee, indanbee, naana yinnabee, oonin yinnonbee, haamin yinnonbeam garaa wul yisa dohondar sagi mato goyt kida tiye; pir rooro wul lay dehen sadanamaar haapa ki haape. <sup>30</sup> Ko dathaannaar thoothino birono eeno budo koda maate; budonte dohoono eeno pir bira koda maate” kena ki hamade.

## 20

### *Woynin Haaminte Waadadhayna Eenasa Kamsino*

<sup>1</sup> Yesus yin ki giyade: “Barjosa bitamono woynin haaqana kordhon haaminte waadadhayna waadiman eenaam zagayse, waadinsota peen sedhima burburi utaa haaminsa imbaam koda maate. <sup>2</sup> Kidi rooro kalaasa birre kalaa kalaa kena kashana kenka dhalqayse, waadiman waadadhayna eenaam haamindar yisa ki yittsade. <sup>3</sup> Savaat makkamka utayse waadimaysa qolmina eena gabante woyaanaam ki haapade. <sup>4</sup> Keam ‘Yediar haamin innonte yivayse waadadhee; inta yena maaten bazanam yesa kashayda kashe’ kena ki hamade. Kediar haamindar ke yivade. <sup>5</sup> Tapir haaminsa imbaa savaat laxbee salbeka utayse kinin haapaana eenaam yin ki hayade. <sup>6</sup> Ogora pir savaat tabhi kalaaka uataate waani een woyonam haapayse, ‘Yedi ini burin utayse waadima kaysisaadettsi kote yenin woyoono hare?’ hamayse keam ki oysade. <sup>7</sup> Kediar ‘Woam waadisea eedi wonin kaysisonnane’ kina ke hamade. Kidiar ‘Ta yin ko hanna, yediar yivayse haamin innonte waadadhee’ kena ki hamade.

<sup>8</sup> “Peen ibanaysaka woynin haaqanasa haamin imbaa haaminte eenaam waadinsea eana ‘Eenaam eelayse macchindar nivaana eenadara yedayse ini burin birayse nivaana eenaka yekka kenin waadadhonsa bazanam kashaa’ kina ki hamade. <sup>9</sup> Ogora savaat tabhi kalaaka nivaanaar birre kalaa kalaa ke tiyade. <sup>10</sup> Waadimanna birayse nivaana eena ogoam haapayse, ‘Wodi birre sagi woda tiye’ hamayse ke qaabade. Kediar pir birre kalaa kalaa ke tiyade. <sup>11-12</sup> Birrenamaar kedi tiyayse, ‘Kina eena ibaandar nivayse savaat kalaa bish ke waadadhade; wodi rooron haynsana koqadhada waadadhite haaqayse wo qajadhaysaka, ya wombee kembena bazanam kiaddha ha hayade’ hamayse haamin imbaadar ke gundumade. <sup>13</sup> Haamin imbaa waadiman waadadhayna eenasa kalaana yin giyayse ki maasade: ‘Isa nashoa, inta haam genaatine; hambesana kinka wonin dhalqoono rooroasa hana birre kalaa kashanatayu? <sup>14</sup> Keeda ya hana yeskenam tiyayse yivaa. Hana inin imaadettsi kaa budonte nivaa eanaar yin imana ida zage. <sup>15</sup> Koymon innondar inta inin zagaadettsi hayana isa hayamo qolaaw? Way inta eedina aan inin pishkenna idar ha woogimbho?’ hamayse kina ki giyade. <sup>16</sup> Ogodettsi tapir budonte dohoono eeno bira koda maate; birono eeno budo koda maate” kena ki hamade.

### *Yesus Yisa Dembhinsa Makkanso Goyt Kinin Giyoono*

*Marq 10:32-34; Luq 18:31-34*

<sup>17</sup> Ogosa budonte Yesus Yerusaalemdar yivite goynte dahayse tabhi lamaana kisa paanan yivayna eenaam bish yikal entsate pucchayse kena yin ki giyade: <sup>18</sup> “Marrato! Wodi ta keeda Yerusaalemdar woda yive. I Eedi Naasiam gudullasa hayonabee Musesa yigginam dhettsayna eenabena saskate ima ko imbbe; kediar inin deesadhoodettsi idar pirda ke pirde; <sup>19</sup> kedi Ayiwdtay hamma eenana iam saskate ima ke ime. Ayiwdtay hamma eenaar iam baga ke bage; iam qana ke qane; masqalindar konngate ziitayse iam deesa ke deese. Inta dembhira makkansoa rooroaka dhaabhayda dhaabhe” kena ki hamade.

### *Yayqoobbee Wannisbesa Indano Yesusam Konin Miskoono*

*Marq 10:35-45*

<sup>20</sup> Ogo wodanka Yayqoobbee Wannisbesa indano naana yinnabesana Yesuskal hatte, kumpurdhayse yer kalaa kona kinin hayoadettsi kiam ko miskade. <sup>21</sup> Kidiar kona “Ya

yer haraa zage?” ki hamade. Kodiar “Naana inna kina lamaanaam hasa bitamonte kalaam hasa mizaqimbar, kalaam hasa warkatambar hayayse keam dottsaa” kina ko hamade. <sup>22</sup> Kidiar kena yinin maasenka, “Yedi yedin miskenam dhesattene. Inin wucota dohon gaalen wucimanam yedi wucana damaw?” hamayse naanaam ki oysade. Kediar, “Damooda dame” kina ke hamade. <sup>23</sup> Kidiar, “Inin wucen gaalen wucimanam wuceeda wuce. Ko dahaannaar isa mizaqimbee warkatambebar dooqadhadettsi hayea intatehe; raqin ogoam isa Imbaa keninna ashkaanana ima ki ime” kena ki hamade.

<sup>24</sup> Waani tambha Yesussa paanan yivayna eenaar yin giyayse kenin miskenam qansayse Yayqoobbee Wannisbeam ke wacimade. <sup>25</sup> Yesus wulam yikal eelayse kena yin ki giyade: “Barjoam dhesimina eenam wottsayna eena yisa eenam kantaka kenin wottsenbee, entsaynasaar kedar kesa hayamo konin dohonbeam dheseeda dhese. <sup>26</sup> Yennon shaarinte yin konin doadettsi zaskehe; yennon shaarinte eedi hayyear gebhi doota zagea yesa erge eedi ki dee. <sup>27</sup> Yesa iira eedi hayyear bira doota zagea ye wulsa choobar dahaa erge eedi ki dee. <sup>28</sup> Ogodettsi inta Eedi Naasear eenna waadadhanabee isa sadanamaar thoothin eensa seeson bazan kashotabe i nivade; eeno ina konin waadadhadettsi nivaatine” kena ki hamade.

*Yesus Lamaana Eena Aapin Kayaanaam Kinin Pacchoono  
Marq 10:46-52; Luq 18:35-43*

<sup>29</sup> Ogosa budonte Yesussbee kisa paanan yivayna eenabe Iyarko katamara utaate kenin yivenka, thoothino eeno Yesussa paanan ko yivade. <sup>30</sup> Eedi lama aapin kayaana waani goynsa aponte dooqaana “Yesus koka kida yive” hambhaka qansayse, “Imbo, Dawt Naasa, bannzo! Wona burqadhadayse woam pacchaa!” hante ilataate ki am ke miskade. <sup>31</sup> Thoothino eenoar igin aapin kayaana eenam “Lay hamee” hamayse keam ko wacimade. Aapin kayaana eena “Imbo, Dawt Naasa, bannzo! Wona burqadhadayse woam pacchaane! Woam kelshaa” hante ini kenin ilaterra sagi ke ilatade. <sup>32</sup> Yesusaar woyayse keam eelayse, “Yena yer har i hayee zage?” ki hamade. <sup>33</sup> Kediar “Imbo, aapinam wosa hanin pacchoadettsi wo zagade” ke hamade. <sup>34</sup> Yesus kena burqadhadayse kesa aapinam yisa aaninka ki kaamade. Kesa aapinoar saanawa ko shedade. Kediar Yesussa paanan yivan ke yedade.

## 21

*Yesus Gebhon Gobshinka Yerusaalem Kinin Ardoono  
Marq 11:1-11; Luq 19:29-40; Wannis 12:12-19*

<sup>1</sup> Yesussbee kisa paanan yivayna eenabe Yerusaalemkal theedayse Dabirezayt dhukankal dohon gurdan Betepaagedar ke nivade. Ogora Yesus yisa paanan yivayna eenasa lamaanaam yin giyayse ki keam yittsade: <sup>2</sup> “Ogo yesa birante dohon gurdandar yivee. Gurdan ogotear ootabesana dhaxadhon ukuli kallon yedi saanawa haapeeda haape. Ogoam bulayse ina kote bevee. <sup>3</sup> Eedi hayyear yeam oysidianna, ‘Imbaa wonteana kinin zaskonnane’ kina hamee; kidiar keam yena saanawa imasane” kena ki hamade. <sup>4-5</sup> Ogono yin konin maatoonno ena Barjokala qansayse eenaka giyea ea yi giyna:

“Thiyoon hambhen Yerusaalem katamante dahanan eenana  
‘Marrato! Bitaa yentea yedar niva ki nive;  
kidi eedi leemi maatayse ukulidat kida dooqe;  
ukulisa ootodar dooqayse kida nive’ kena hamee”  
hamayse kinin giyoono ko thoothene.

\* <sup>20:22</sup> “Inin tiyota dohon gaalenam yedi tiyana damaw?” hamintane. <sup>21:4-5</sup> Zakka 9:9.

<sup>6</sup> Ogonante Yesussa paanan yivayna eenasa lamaana Yesusin kena giyondettsi yivayse  
<sup>7</sup> ukultonam bulayse kosa ootabesana Yesusna ke bavade. Apalan kennonam ukullasa  
zulondar ke wodade; Yesusaar daran ki dooqade. <sup>8</sup> Eensa thoothino yisa apalanam  
goyndar ko apade; waani eenoar pir haaqansa hacchan taxayse goyndar ko apade.  
<sup>9</sup> Kisa birante yiven eenbee budonte niven eenbe  
“Dawt Naasana gobshi ko dee!  
Barjo Imbaasa naabenka nivea gobshadhaane!  
Cecinte Barjona gobshi ko dee!”  
hante ilataate kiam ke gobshade.

<sup>10</sup> Yesus Yerusaalem nivite kinin ardenka, ogo katamante dohoono eeno wul “Kaa kidi  
hayne?” hamayse ko targadhade. <sup>11</sup> Kimbete dahaana eenaar “Kaa Galila peente dohon  
Naazret katamara nivaa Barjokala qansayse eenna giyea Yesusne” hamayse kena ke  
giyade.

*Barjosa Gazan Ooninsa Mayante Gabimaynaam Yesusin Oytoono*  
*Marq 11:15-19; Luq 19:45-48; Wannis 2:13-22*

<sup>12</sup> Ogosa budonte Yesus Barjosa gazan ooninsa mayante ki ardade. Ogoteear shan-  
shaynabee shanayna eena wulbeam ooninsa mayara ki oytade; birren ookayna eenasa  
tharbhezanbee waleen shanshayna eenasa borkotonbeam kupate dhabayse <sup>13</sup> kena yin  
ki giyade: “ ’Onno isa miske ooni koda hambhe’ hamayse thaapadhidine; yediar eensa  
koymon buurate itsaynasa aadhime raq koam ye hayade” ki hamade.

<sup>14</sup> Ogora Yesus Barjosa gazan ooninsa mayante ki daaka, eena aapin kayaanabee  
eena roon wobonabe daran ke nivaysaka kidiar keam ki pacchade. <sup>15</sup> Ko dahaannaar  
gudullasa hayonabee Musesa yigginam dhettsayna eenabe Yesus tarshen yerin kinin  
hayenam kenin haapenkabee naana Barjosa gazan ooninsa mayante dahayse “Dawt  
Naasana gobshi ko dee!” hamada kenin ilatenam kenin qansenkabe ke wacimade.  
<sup>16</sup> Ogona kedi Yesusna “Naana kinayn giyenam ha qanso?” kina ke hamade. Kidiar  
“Qansayda qanse.

‘Naana shaqanabee, naana amin qocaynabesa aponte  
gobshinam hana ha ashkade’

hamen Barjosa upsinam yedi nabbabeete?” kena ki hamade.

<sup>17</sup> Ogora Yesus keam garayse katamara utaate Bitaania gurdante yivayse ogote ki  
wodhade.

*Yesusin Ashoono Hattono Shaapino*  
*Marq 11:12-14bee 20-24be*

<sup>18</sup> Yesus sedhiman katamandar kinin maatenka daaqi kiam bashade. <sup>19</sup> Haaqa shaap  
kallonam goynsa aponte haapayse kokal hatte koam ki shedade. Ko dahaannaar haccha  
bish dahade, aapi kodar haapadehe. Ogonante “Kaara os keeda macchi ko hasa aapi  
dahabhoode” ki hamade. Agaara hattonoar saanawa ko wocchade. <sup>20</sup> Kisa paanan  
yivayna eenaar ogoam kenin haapon wodanka, “Hattono shaapino kono saanawa  
hamin ko wocchaa?” hamayse ke targadhade. <sup>21</sup> Yesus yin giyayse kena ki maasade:  
“Inta yena gon ida giye: Qothimima Barjodar woylem ye qajea hanna, hatton shaapon  
kodar inin hayondettsi bish daymaka, ko dhukanam hattear, ‘Agaara dhaabhayse  
bazinsa iinte wavaa!’ ye hamidianna, yena maata ko maate. <sup>22</sup> Barjodar woylamin  
qajayse kiam yenin misken wulam yedi haapeeda haapeeda” kena ki hamade.

*Yesussa Hayamon Goynin Oysadhoono*  
*Marq 11:27-33; Luq 20:1-8*

<sup>23</sup> Yesus Barjosa gazan ooninsa mayante ardayse eenaam dhettsite ki dahade. Ogo  
wodanka gudullasa hayonabee peensa donzanabe kikal nivayse, “Yerra iginaam hanin

hayayno hasa yer har hayamokane? Hayamon koam hana imaa hayne?” hamayse kiam ke oysade. <sup>24</sup> Yesus kena kinin maasenka, “Intaar yer kalaa yeam ida oyse. Yeam inin oysonsa malsin ina ye maasanna, intaar yerra kinaam yer har hayamoka inin hayenam yena guyayda giye. <sup>25</sup> Wannis eenaam kinin shivoadettsi hamora ki nittsadhaa? Barjokalankamoo, eedikalankaw?” hamayse keam ki oysade. Kediar yin guyayse kinka kikal ke dhalqade: “ ‘Barjokalankane’ wo hamanna, ‘Ta harrnee kisa dhalqinam gonne hamayse tiyan garaa?’ wona ki hamoaye. <sup>26</sup> ‘Eedikalankane’ wo hamanna, pir eeno wul Wannisam Barjokala qansayse eenna giyeadettsi hayayse kiam konin shedenna, eenna kurtumbhooda kurtumbhe” hamayse, <sup>27</sup> Yesusnante “Hamora konin dohonam wodi dhesattone” hamayse ke maasade. Kidiar kena “Ta intaar har hayamoka yerra iginaam inin hayenam yena guyattine” ki hamade.

### *Naana Lamaanasa Kamsino*

<sup>28</sup> Ogora Yesus kena yin ki guyade: “Ta yena yer har ko maate? Eedi kalaasa naasi lamaa dahade. Kesa biraakal imbaa nivayse, ‘Inaane, kina woynin haaqanayn dohon haaminte yivayse ina waadadhaa!’ kina ki hamade. <sup>29</sup> Naasaar, ‘Inta waadadhettine’ kina ki hamade. Yinin guyonsa budobar yer qaabayse haaminte waadadho ki yivade. <sup>30</sup> Imbaa pir naasa langoakal yivayse, kina ini kisa indanaasa waana kinin giyaadettsi yivayse ki waadadhe kina ki guyade. Naasaar, ‘Ee, imbo, inta yivayse waadadhayda waadadhe’ kina ki hamade. Hattear kidi yivayse waadimadehe. <sup>31</sup> Ta naana igma lamaanasa imbayn guyonam waadadhaa naasa hamaane?” kena ki hamade. Kediar “Naasa biraane” ke hamade. Yesus kena yin ki guyade: “Inta yena gon ida giye: Gibirin kacchaynabee maana sharmucanabe Barjosa bitamon raqinte ardintanka yeam bira ke bire. <sup>32</sup> Harrna hambhidianna, Shivea Wannis tipamonsa goynam yeam dhettsota kinin nivenka yedi gonne hamayse tiyeetene; gibirin kacchaynabee maana sharmucanabe kinin giyenam gon hamayse tiyaanane. Yedi ogoam haapaysear seesora yesa maatayse kinin giyenam gonne hamayse tiyeetene” kena ki hamade.

### *Woynin Haaminte Waadadhayna Eenasa Kamsino*

*Marq 12:1-12; Luq 20:9-19*

<sup>33</sup> Yesus pir yin ki guyade: “Kamsi ab qansee: Woynin haaqanaam haaminte yisa thoothi koraa eedi kalaa dahade. Kidiar haaminsa gasanam aygi cavayse, haaqanasa aapinin cuubadhea oolo koyate ashkayse, haaminam toolana tulee pir dhev hamaa ki kahade. Ogosa budonte haaminte waadadhayna eenana elqimayse pee abdar ki yivade. <sup>34</sup> Kidiar haaqana aapin kenin kambhen wodan yeskaysaka, ‘Haaqanasa ina yesken aapinam tiyo ke yive’ hamayse kisa ergen eenaam haaminte waadadhayna eenadar ki yittsade. <sup>35</sup> Haaminte waadadhayna eena kinin nittsaana ergen eenaam yedayse, kesa kalaam ke qanade; waam ke deesade; waam pir seenika ke paxade.

<sup>36</sup> “Ogora haaminsa imbaa pir ini birayse kinin yittsaana ergen eenasa paydira sagi hayayse, haaminte waadadhayna eenadar ki yittsade. Haaminte waadadhayna eenaar eena biranaam kenin qanonbee deesonbedettsi keamaar yin ke hayade.

<sup>37</sup> “Macchindar kidi ‘Kedi naasa inteana bookindhasane’ hamayse naasa yinteam kedar ki yittsade. <sup>38</sup> Haaminte waadadhayna eena naasaam kisa haapayse kinka yin ke guyade: ‘Kaa kisa haamindar sagea naasa toydiane. Nivee, kiam deesayse kisa dohonam wo tiye’ ke hamade. <sup>39</sup> Naasaamaar woynin haaqanasa haamira gochate bulayse ke deesade.

<sup>40</sup> “Ta haaminsa imbaa kinin niven wodanka, igma haaminte kisa waadadhayna eenaam hamin ki haye?” kena ki hamade. <sup>41</sup> Kediar “Igina siyana eenana burqadhima keam kida deese; woynin aapinam kosa wodanka shiishima kina imayna eena waanina haaminam yisa elqimayse kida ime” kina ke hamade.

<sup>42</sup> Ogora Yesus kena yin ki guyade:

“ ’Seeninka oonin woysayna eena kenin bagaa seenia  
senna wulra ooninna kattsi zaskea ki maatade.  
Ogonoar Barjosa waadimane;  
wonin shedenkaar yer woam tarshaynone’  
hamayse Mathaapin Gazante thaapadhonam yedi nabbabeete? <sup>43</sup> Ogona inta yena ida  
giye: Barjo yisa bitamonam yekalanka tiyayse konka aapin ushayyna eenana kida ime.  
<sup>44</sup> [Seenia agaadar dhambea aya ki aye; seenia agaa yindar dhambaa ea giicima ki  
giicime]” ki hamade.

<sup>45</sup> Gudullasa hayonabee Parisa eenabe Yesusin kena giyaana kamsina iginaam kenin  
qansen wodanka, kesa goynam kinin giyonam ke dhesade. <sup>46</sup> Ogonante kiam yedana ke  
zagade; ko dahaannaar thoothino eeno Barjokala qansayse eenna giyeadettsi hayayse  
kiam konin shedenna, eenam ke kurtumbhade.

## 22

### *Gaydon Rooroasa Kamsino*

*Luq 14:15-24*

<sup>1</sup> Tapir Yesus kena kamsika yin giyte ki dahade: <sup>2</sup> “Barjosa bitamono yisa naasasa  
gaydonna thoothi yer ashkaa bitaam koda maate. <sup>3</sup> Bitaa kinin eelaana eenadar  
‘Gaydonna ikal nivee’ hamayse yisa ergen eenaam ki yittsade. Eenaar gaydondar nivota  
nashadehe. <sup>4</sup> Bitaa ergen eena waani kinnaam ‘Inin eelaana eenana yivayse, “Marrato!  
Gaydonna zasken yerinam inta ashkidine; wannga zianabee durpisadhaanabeam inta  
machidine; yerro wul agidine. Ogonante gaydondar ikal nivee” hamayse kena giyee’  
hamayse keam ki yittsade. <sup>5</sup> Eldhaanaar kisa eelimenam bagayse kalaa yisa haamindar,  
kalaa yisa naggadimakkondar ki yivade; <sup>6</sup> waani shidhaana eena ergen eena kinnaam  
yedate qanayse ke deesade.

<sup>7</sup> “Ogo wodanka bitaa wacimayse, poolisana yinnaam yittsayse igina kisa ergen  
eenaam deesaana eenaam ki dettsade; kesa katamanamaar nuuka ki kosqade. <sup>8</sup> Ogosa  
budonte ergen eena kinnana yin ki giyade: ‘Gaydonna zaskayno yerro agidine. Gay-  
donna eldhaana eena gaydonna zaskaana maatadehe. <sup>9</sup> Ogonante kataman goynadar  
yivayse yenin haapen een wulam gaydonna eelee’ kena ki hamade. <sup>10</sup> Ergen eena  
kinnaar goynadar yivayse kena haapadhaana eena siyanabee payyanabe wulam ke  
eelade; eena gaydonna eldhaana hatte ardayse ooninka ke thoothade.

<sup>11</sup> “Ko dahaannaar bitaa igina kinin eelaana eenaam shedota gaydon ooninte kinin  
ardenka, gaydonna zaskea apala qaadhaama eedi kalaam ogote ki haapade. <sup>12</sup> Yin ki  
giyade: ‘Isa nashoa, gaydonna zaskea apala qaadhima kote haminaa nivayse ardaa?’  
kina ki hamade. Ear lay lay ki hamade. <sup>13</sup> Ogo wodanka bitaa waadadhyna eena  
yinnana, ‘Kisa aaninbee roonbeam dhaxayse mayante dohon thipansa iinte bulayse  
kiam dhabee. Ogotear eepibee atsi qiicabe koda maate’ kena ki hamade. <sup>14</sup> Ogona  
eldhaana eena thoothine; ko dahaannaar kambhaana tokaane” hamayse Yesus kena  
ki giyade.

### *Gibirin Kashadhensa Yesusin Oysadhoono*

*Marq 12:13-17; Luq 20:20-26*

<sup>15</sup> Ogosa budonte Parisa eena “Yesusam kisa dhalqin goynka yedana hamin wo  
hayo?” hamayse kinka ke dhalqade. <sup>16</sup> Kesa paanan yivayna eenaam Herodissa  
bitamonam nashayna eenabesana yin giyayse kiam kenin oysoadettsi Yesusdar keam  
ke yittsade: “Woam Dhettsea, ya gon eedi hanin dohonbee Barjosa goynam gon hanin  
dhettsenbeam wodi dhesooda dhese. Eedisa wotina bookindhayse hanin hayminna,  
eedisa woti shedayse hanin hayea yer qolehe. <sup>17</sup> Wona ta ya giyaa: Hana yer har  
ko maate? Roome peen bitaana gibiri kashadhadettsi giidhidimoo, giidhadayne?”

hamayse kiam ke oysade. <sup>18</sup> Yesus kesa siyan qaabenam dhesayse, “Yedi maltina eenato, harrnee iam tayse? <sup>19</sup> Gibirin kashadhea koymoam yinda ina dhehee” kena ki hamade. Kediar santup kina ke bavade. <sup>20</sup> Kidiar yi giyna: “Santupa kaadar dahaa pootoabee daran thaapadhaa naabeabe haysane?” hamayse keam ki oysade. <sup>21</sup> Kediar “Roome peen bitaasane” kina ke hamade. “Ta yin ko hanna, Roome peen bitaa gaynam kina imee; Barjo gaynam Barjona imee” kena ki hamade. <sup>22</sup> Kediar ogoam qansayse targadhayse kiam garayse ke yivade.

*Dembhira Dhaabhadhen Goynsa Yesusin Oysadhoono*  
*Marq 12:18-27; Luq 20:27-40*

<sup>23</sup> Agaa roroaka “Dembhira dhaabhadhea yer qolehe” hamayna Saduqa eenara eedi waani Yesuskal nivayse yin giyayse kiam ke oysade: <sup>24</sup> “Woam Dhettsea, Muse ‘Eedi kalaa maa keemayse naasi adhima diydi ki hanna, kisa kana koam keemayse diyaai iishimasa oolonte kina ki adhe’ ki hamade. <sup>25</sup> Eedi kalaasa naasi tobbhaa waani dahade; ke wulsa iishima gebha maa keemayse naasi adhima ki diyade. Kisa kana lansoa iishima geshonam ki keemade; <sup>26</sup> ogodettsi lansoar, makkansoar, yin tobbhaana wul koam keemayse naasi kanka adhima ke diyade. <sup>27</sup> Ke wulsa macchinte edono ko diyade. <sup>28</sup> Ogonante igina indanaana wul koam kenin keemonna, diyaana eena dembhira kenin dhaabhen wodanka, kodi tobbhaana eenasa hamaa easa maa koda maate?” hamayse kiam ke oysade.

<sup>29</sup> Yesusaar yin giyayse kena ki maasade: “Yedi Mathaap Gazanbee Barjosa kantanbeam yenin dhesiminna, yeda dhaddhise. <sup>30</sup> Harrna hambhidianna, dembhira dhaabhadhen wodanka, eeno cecinte dahaana Barjosa gaananadettsi koda maate; kodi yina kembhehe, tapir keemehe. <sup>31</sup> Tapir dembhira dhaabhadhen goynsa Barjoyn yena giyonam yedi nabbabeete? <sup>32</sup> Kinin giyoono yinne: ‘Inta Abraamsa Barjoa, Yisaaqsa Barjoa, Yayqoobsaar Barjoane’ ki hamade. Barjo sadanka dahaana eenasa Barjone, diyaana eenasa Barjotehe” kena ki hamade. <sup>33</sup> Kisa dhalqinam qansoono eeno kisa timmirinka ko targadhade.

*Wuldara Sagea Barjoyn “Hayaa” Hamayse Giyaa Upsea*  
*Marq 12:28-34; Luq 10:25-28*

<sup>34</sup> Saduqa eenayn dhalqoamadettsi Yesus lay kinin hayonam Parisa eena kenin qanson wodanka, kinka kidar ke bukade. <sup>35</sup> Kesa iira waa Musesa yigginam dhettsea Yesusam taysate shedana zagayse yin giyayse ki kiam oysade: <sup>36</sup> “Woam Dhettsea, Musesa yigginte wuldara sagea Barjoyn giyaa upsea hamaane?” hamayse kiam ki oysade. <sup>37</sup> Yesus yin giyayse kina ki maasade: “ ‘Ya Imbaa hantea Barjoam gonin hamon woylaminka, gonin hamon sadanka, gonin hamon qaabenka kiam nashaa’ hamaynone. <sup>38</sup> Wuldara sagi maataa biraat upsea Barjoyn giyaa agaane. <sup>39</sup> Agaadettsea lansoar ‘Een wulam hadettsi hayayse nashaa’ hamaynone. <sup>40</sup> Musesa yigginbee Barjokala qansayse eenna giyayna eenayn thaapoono wulbe igina upsina lamaanadar ke woysadhade” kina ki hamade.

*Yesusin Oysoono Oysimeno*  
*Marq 12:35-37; Luq 20:41-44*

<sup>41</sup> Parisa eena bukayse ke daaka, Yesus yin giyayse keam ki oysade: <sup>42</sup> “Barjoyn qadhaa Kiristoossa yedi yer har ye qaabe? Kidi hay naasine?” hamayse keam ki oysade. Kediar “Dawt naasine” ke hamade. <sup>43-44</sup> Yesus kena yinin maasenka, “Yin ko hanna, Dawt Barjo Manpasinin kiam entsaysaka, ‘Barjo isa Imbana

“Haam jibbayna eenaam hasa hayamonsa demente inin keam hayenka yekka,

isa mizaqimbar dooqaa” kina ki hamade’ kinin hamenka ‘isa Imba’ hamayse hamin ki giye? <sup>45</sup> Ta keeda Dawt yinti kiam ‘isa Imba’ hamayse eelea ki hanna, Kiristoos hamin ki Dawtsa naasi dee?” kinin hamenka, <sup>46</sup> eedi kala hattear kina upsi maasana damadehe. Rooroa agaara yedayse eedi hay ki hannaar kiam oysime oysana kedi kurtumbhidine.

## 23

### *Musesa Yigginam Dhettsaynabee Parisa Eenabeyn Kanchadhoono Marq 12:38-40; Luq 11:39-52; 20:45-47*

<sup>1</sup> Ogosa budonte Yesus thoothin eenbee kisa paanan yivayna eenabena yin kena ki giyade: <sup>2</sup> “Musesa yigginam dhettsayna eenabee Parisa eenabe enaanam dhettsota Muse borkotondar dooqidine. <sup>3</sup> Ogona yenka ‘Hayee’ hamayse yena kenin giyen yerin wulam yedi toolee, ogoamaar hayee. Kenin hayenam hayeebhode; harrna hambhidianna, kedi kenin giyenam waadimadar hacchehe. <sup>4</sup> Eenaam galshen dethan baskenam dhaxyayse eendar keda baskise; kedi ogoam kelshana aaninsa surkenka hattear kaamana nashehe. <sup>5</sup> Kenin hayen waadiman wulam eedinin shedoadettsi hamayse keda haye. Musesa yigginam thaapayse korbho workisa iir arsayse yisa wotindar keda dhaxe; apalan kennonsa nukindar shira keda gudubhse. <sup>6</sup> Kumman kummadhen raqinte gobshadhon raqinbee Ayiwd eensa bukin raqinte gobshadhon borkotonbeam yedota keda nashe. <sup>7</sup> Gabantear gobshadhon gisimenam gisimbhotabee ‘Dhettsea’ hamayse eldhotabe keda nashe.

<sup>8</sup> “Yeam Dhettsea kalaa bish kinin dohonnabee yedi kinka kisa indanaas yenin dohonnabe, yeam ‘Dhettsea’ hamayse ko eldhabhoode. <sup>9</sup> Tapir cecinte dahaa Imbaa yentea kidi kalaa bish kinin dohonna, peente eediam ‘Imbo’ hamayse eeleebhode. <sup>10</sup> Yeam Entsea kalaa bish, kidiar Barjoyn qadhaa Kiristoos kinin dohonna, ‘Entsea’ hamayse yeam ko eldhabhoode. <sup>11</sup> Yesa shaarinte sagi doota zagea ea yesa erge eedi ki dee. <sup>12</sup> Meten yinnonam yintika gettsea wul toka ki toke; meten yinnonam toskea wul gebha ki gebhe.

<sup>13</sup> “Yedi Musesa yigginam dhettsayna eenabee Parisa eenabeto, maltinato, hay! Eenin Barjosa bitamon raqindar ardoamadettsi kerin yeda diithe. Meten yennonka yedi ardattene; ardota zagayna enaamaar kinin ardoamadettsi yeda mare.

<sup>14</sup> [“Yedi Musesa yigginam dhettsayna eenabee Parisa eenabeto, maltinato, hay! Misken yennonam eedinin shawkoadettsi hamayse yeda gudubhse; maana qambhina nasa ooninam yeda buure. Ogonante pirdi sagi yeda tiye.]

<sup>15</sup> “Yedi Musesa yigginam dhettsayna eenabee Parisa eenabeto, maltinato, hay! Eedi kalaam yennon gilonsa iinte arsota pegen goynbee bazinbedar zagimite yeda yaaye. Kiam yedar yenin arson wodankaar yedara ii lamaaka sagi lay dikimon nuun pirdin tiyea yeda haye.

<sup>16</sup> “Yedi aapin kayaana entsanato, hay! ‘Eenin Barjosa gazan ooninka mallimenka, yer hamehe’ pir, ‘Barjosa gazan ooninte dohon worqinka konin mallimenka, mallanka yedima ko yedime’ yeda hame. <sup>17</sup> Yedi kina malgimina aapin kayaana eenato, worqinbee worqinam gazinsen Barjosa gazan ooninbesa sagea hamaane? <sup>18</sup> Yin tapir ‘Eeno Barjona marshan konin machen raqinka konin mallimenka, yer hamehe’ pir, ‘Marshan machadhen raqindar dohon marshanka konin mallimenka, mallanka kosa yedima ko yedime’ yeda hame. <sup>19</sup> Yedi kina aapin kayaanato, marshanbee marshanam gazinsen raqinbedara sagea hamaane? <sup>20</sup> Ta keeda marshan machadhen raqinka mallimea ea marshan raqabee kidar machadhen yerin wulbeka kida mallime. <sup>21</sup> Barjosa gazan ooninka mallimea ea taar gazan ooninbee iinte kosa dahaa Barjobeka kida mallime.

**22** Cecinka mallimea ea taar Barjosa bitamon borkotonbee bitamonna daran dooqaa Barjobeka kida mallime.

**23** “Yedi Musesa yigginam dhettsayna eenabee Parisa eenabeto, maltinato, hay! Harrna hambhidianna, mayante yenin yiithaana basibilabee, saliithabee, suupibe\* wulsa iira shiishima tambhasa kalaam Barjona yeda ime; Musesa yigginte haapad-hayna yerra zaskaynaam yeda gare. Ogonoar tipan pirdinbee, eedina burqadhayse waadadhadhenbee, gon eedi daadhenbene. Ko dahaannaar waaniam yenin hayenka kinaam garinta yeam zaskehe. **24** Yedi aapin kayaana entsanato, yenin wucensa iira sunguladettsi tokaam kamate buleeda bule, hattear gamaledettsi kattsi gebhaam yeda mannge.

**25** “Yedi Musesa yigginam dhettsayna eenabee Parisa eenabeto, maltinato, hay! Galan yenin itsen sharqanbee karambhanbesa zulon payya hayayse yeda shive; ko dahaannaar iino kosa saribee gibazbeka thoothoonone. **26** Ya kaa aapin kayaa Parisa ea, birayse hasa sharqanbee karambhanbesa iin shivaa; ogo wodanka kesa mayambar haapadhayno zulonoar payya koda dee.

**27** “Yedi Musesa yigginam dhettsayna eenabee Parisa eenabeto, maltinato, hay! Linka yisa een diyon lepinbee minngimon yerinbeka thoothayse dahaana, zulonam kesa bhalbhaltoka qadhadhaysaka paydhaana duukinam yeda maate. **28** Ogonoar yedi eedi birante tipana maatayse yeda haapadhe; yesa iino maltamobee siyamobeka thoothidine.

**29** “Yedi Musesa yigginam dhettsayna eenabee Parisa eenabeto, maltinato, hay! Harrna hambhidianna, Barjokala qansayse eenna giyayna eenasa duukindar seenin bunkaate yeda ashke; tipana eenasaar duukinam ashkite yeda gobshe. **30** Yedi ‘Ena wosa eykena wodanka wodi dahaa wo hanna, kembesana kinka Barjokala qansayse eenna giyayna eenaam deesadhente ardattone’ yeda hame. **31** Ta ogoka yesa ena Barjokala qansayse eenna giyayna eenaam deesaana eykena yennasa naana yenin dohonam yentika yedar yeda tarje. **32** Ta keeda yediar eykena yennayn hayon siyon waadimanam thoosee.

**33** “Yedi guni, qarshi naanato, lay dikimon nuunsa pirdira haminee dhaqe?

**34** Ogonante inta Barjokala qansayse eenna giyayna eenabee, eena pakallabee, yigginam dhettsayna eenabeam yedar ida yittse. Kesa waaniam deeseeda deese; waania-maar masqalindar konngate ziitayse deesadhoadettsi yeda haye; waaniaamaar yesa bukin raqinte qaneeda qane; keam kataman waara kataman waadar oyteeda oyte.

**35** Ogo goynka tipa ea Aabeelsa zombhira yedayse Barjosa gazan ooninbee Barjona mar-shan daran machadhen raqinbesa shaarinte yenin deesaa Berakiyo naasa Zakkariassa zombhinka yekka, tipana eenasa peendar laymon zombhin wulna pirdino yedar yeska ko yeske. **36** Inta yena gon ida giye: Pirdino kono wul wodan koka dohon adhadhindar yeska ko yeske.

### *Yerusaalemna Yesusin Eepoono*

*Luq 13:34-35*

**37** “Yerusaalemo, Yerusaalemo! Ya Barjokala qansayse eenna giyayna eenaam deesayno, hadar nittsadhaana eenaam seeninka paxayno! Baacha yisa naasiam kaapin demente konin yedendettsi, intaar hasa naanaam yedana thoothi woda i zagade; ya nashaatane. **38** Ta keeda yesa gazan oonira Barjo utaysaka onno guuri koda shidhe.

**39** Harrna hambhidianna, inta yena ida giye: ‘Barjo Imbasaa naabenka nivea gobshad-haane’ yenin hamenka yekka keeda kaara os iam haapattene” kena ki hamade.

---

\* **23:23** Igina gaalin aponka “azmudbee, insilabee, kemunbe” hamayse thaapadhaanaam Banen eenin dhesimonna, “basibilabee, saliithabee, suupibe” hamenam kesa kmsinka ko tiidhade. **23:35** Pija 4:8; 2 Haydhan 24:20-21. **23:39** Maz 118:26.

## 24

*Barjosa Gazan Oonin Kottsimensa Yesusin Giyoono  
Marq 13:1-2; Luq 21:5-6*

<sup>1</sup> Yesus Barjosa gazan ooninsa mayara utayse kinin yivenka, kisa paanan yivayna eena Barjosa gazan oonin woysadhonsa payyamonam kina dhoota kikal ke nivade. <sup>2</sup> Kidiar kena yinin maasenka, “Ko wulam yedi shedee shedo? Inta yena gon ida giye: Senna kina kidar dordhaanasa hamin hambhaakaar, kesa kala hattear povayse kottsimima shidhea qolehe” kena ki hamade.

*Yesusin Nivenam Eshkayno Milkitino  
Marq 13:3-13; Luq 21:7-19*

<sup>3</sup> Yesus Dabirezayt dhukandar dooqayse ki daaka, kisa paanan yivayna eena yimal kikal nivayse, “Ogono yerro haa ko yin maate? Hasa nivintanbee peensa macchin wodanbeam dhettsayno milkitino kosa hare? Wona giyaa” hamayse kiam ke oysade. <sup>4</sup> Yesus yin giyayse kena ki maasade: “Eedi hayyear yeam kinin dhaddhisoamadettsi mete yesaam gishee. <sup>5</sup> Harrna hambhidianna, thoothino eeno ‘Inta Barjoyn qadhaa Kiristoosne’ hamaate isa naabenka niva ko nive; thoothin eenamaar dhaddhisa ko dhaddhise. <sup>6</sup> Bangibee banqinsa upsinbeam qanseeda qanse. Ogono yin konin maatayno shidha shidhimino konin dohonna kurtumbheebhode. Macchin wodano akarne. <sup>7</sup> Zarsino zarsindar, binnaar binnadar dhaabhayse banqi keda kiam uxe; raq waani waanirar daaqibee peensa zigabe koda maate. <sup>8</sup> Ogono yerro wul sirman edonin adhimanna birayse burqadheadettsi gaalen rooronsa biranone.

<sup>9</sup> “Ogo wodanka eeno gaalenna yeam saskate ima ko ime; yeam deesa ko deese; isa naabenna hamayse zarsin wulkal jibbadhaana yeda maate. <sup>10</sup> Ogo wodanka thoothino eeno Barjodar woylamin qajadhen goynam gara ko gare; kinka kinka kiamaar gaalenna saskate ima ko ime; eenoor kinka kiam kiam jibba ko jibbe. <sup>11</sup> Buudamoka ‘Inta Barjokala qansayse eenna giyeane’ hamayna thoothina eenaar dhaabha ke dhaabhe; thoothin eenamaar dhaddhinsa ke dhaddhinse. <sup>12</sup> Eensa siyamonin thoothon goynka thoothin eensa nashimmakkono qaja ko qaje. <sup>13</sup> Macchin wodanka yekka wocchimb-haate darshea kidi dhaqa ki dhaqe. <sup>14</sup> Zarsin wulna tarja konin maatoadettsi Barjo bitamonsa dhacchintan upsino ko peen wul gidir giidha ko giidhe. Ogo wodanka macchino niva ko nive.

*Kattsi Galshayno Gaalen Roorono  
Marq 13:14-23; Luq 21:20-24*

<sup>15</sup> “Barjokala qansayse eenna giyea Daaneelin giyondettsi, eenaam minngisayno siyono yerro gazisadhon raqinte woysadhaysaka yenin koam haapen wodanka (koam nabbabea ea ki bhocche), <sup>16</sup> wodan ogoka Yiwda peente dohoono eeno dhukanadar ko gobe. <sup>17</sup> Ooninsa zulondar dahaa ea ooninsa zulora hanchayse yer tiyo ki ooninte ard-abhoode. <sup>18</sup> Haaminte yisa dahaar apalan yinnon tiyota budoka ki maatabhoode. <sup>19</sup> Ogo wodanka maana sirmanabee amin qooshaynabena hay! <sup>20</sup> Ko dahaannaar gobeno yesa bargin wodanka way ukunsen rooroaka konin doamadettsi Barjoam miskimate. <sup>21</sup> Ogo wodanka peen pijadhorra yedayse ta koka yekka eedinin haapaammo gaaleno niva ko nive; os birantear kodettsino gaaleno yer hamin hambhaakaar nivehe. <sup>22</sup> Ogono eenaam galshayno rorono ko orgadhaamma, eedi kala hattear dhaqana damehe; ko dahaannaar kambhaana eenana hamayse rorono koda orgadhe.

<sup>23</sup> “Ogo wodanka eedi hay ki hannaar, ‘Marrato! Barjoyn qadhaa Kiristoos kote ki dahade’ way ‘Saa ogote ki dahade’ yena hamea ki hanna, gonne hamayse tiyeebhode. <sup>24</sup> Ogonoar buudamoka ‘Inta Barjoyn qadhaa Kiristoosne’ hamayna eenabee buudamoka ‘Inta Barjokala qansayse eenna giyeane’ hamayna eenabe eensa iira

dhaabha ke dhaabhe; kediар kena dandimea ko hanna Barjoyn kamayse edaana eenam dhaddhisota yer gebhi maatea milkitbee yer tarsheabe waadadhayse dhaa ke dhee. <sup>25</sup> Shedee; inta yena birayse giydine.

<sup>26</sup> “Ogona ‘Marrato! Kiristoos eenin qolmon darante ki dahade’ yena ke hamea hanna, yiveebhode. Way ‘Marrato! Gulinte ki dahade’ yena hamea ke hanna, kenin giyenam gonne hamayse tiyeebhode. <sup>27</sup> Harrna hambidianna, cecinte dohon bhalqantin bhalqantenka haynsa utara yedayse wavintanka yekka konin haapadheadettsi, i Eedi Naasisaar nivano yin koda dee. <sup>28</sup> Yerin diyonin dohon raqinte kuthoda buke.

*Eedi Naasisa Lansi Maataate Nivano  
Marq 13:24-27; Luq 21:25-28*

<sup>29</sup> “Saanawa ogo gaalen roronsa budonte, cecinte dahaana kantana wul shoa ke shoe; hayno thipa ko thipe; arpinoar shaakehe; wanconoar cecira wava ko weve. <sup>30</sup> Ogo wodanka Eedi Naasisa milkitino cecindar koda haapadhe. Peen wulsa iinte dohoono zarsino eepa ko eepe. Inta Eedi Naasear kantanbee gebhon gobshinbeka maatayse polondar dahayse inin nivenam keda haape. <sup>31</sup> Gebhon thurumbansa upsinka isa gaananaam cecira nittsayda nittse. Kediар peensa gasara yedayse kosa macchinka yekka peen wulsa iira inin kamaana eenam puccha ke pucche.

*Hatton Shaapinsa Kamsino  
Marq 13:28-31; Luq 21:29-33*

<sup>32</sup> “Shaapin hattonsa kamsinam dhesee. Ogonoar hattonsa antinin caagenka, hacchanin kosa utenka, bargin\* wodanin yeskonam dheseeda dhese. <sup>33</sup> Ogodettsi yedi igin yerra wulam yedin shedenka, i Eedi Naasisa nivan wodano theedayse ooninte ardot kerinte konin dohonam dhesimate. <sup>34</sup> Inta yena gon ida giye: Ogo wul yin maatenka yekka wodan koka dohoono adhadhino diyate maehe. <sup>35</sup> Cecinbee peenbe saga ko sage; inin giyayno upsino sagehe.

*Eedi Naasiyn Niven Rooronbee Savaatinbe Dhesimino  
Marq 13:32-37; Luq 17:26-30bee 34-36be*

<sup>36</sup> “Rooron ogobee savaatin ogobeam Barjo Imbaa bishkalanka ab dhesea eedi hay ki hannaar solehe; cecinte dahaana Barjosa gaanana ke hannaar, Naasa kintea ki hannaar, dheseehe. <sup>37</sup> Nohe wodanka konin maatondettsi, i Eedi Naasisa nivintano yin koda maate. <sup>38</sup> Ogo wodanka kayen noqonin nivonsa birayse, Nohe gonngalante kinin ardea rooroaka yekka eeno itsaatebee wucaatebe, ora keemaatebee osar kembhaatebe ko dahade. <sup>39</sup> Kayen noqono nivayse ke wulam konin itsenka yekka eeno dhesadehe. I Eedi Naasisa nivintanoar ogodettsi yin koda maate. <sup>40</sup> Ogo wodanka eena haamin kinka koyte dahaana lamaanasa kalaam tiyayse, langoam gardha ko gardhe. <sup>41</sup> Maana lamaana kinka deesimaynasa kallonam tiyayse, lansonam gardha ko gardhe.

<sup>42</sup> “Ogonante Imbaa yentea roroa hamaaka kinin nivenam yedin dhesimonna, qaymayse toolee. <sup>43</sup> Ko dahaannaar, yerin koam dhesee: Ea ooninsa imbaa sootin woda hamaaka diibiy nivindar nivenam dhesidi yi hanna, qaymi dahayse ooninsa kerin qunthadhadettsi hayehe. <sup>44</sup> Ogona inta Eedi Naas yedin bhocchaamon wodanka inin nivenna, yedi ashkimbhayse toolee.

*Payya Waadiman Eabee Siya Waadiman Eabesa Kamsino  
Luq 12:41-48*

<sup>45</sup> “Oonin eenam payya hayayse ki wottsebee waadiman eenanaar galanam kena iman zasken wodanka kinin imoadettsibe kamayse imbaayn wodaa gon hama pakalaa

<sup>24:29</sup> Isi 13:10; 34:4; Yiz 32:7; Yuveel 2:10bee 31be; 3:15.    <sup>24:30</sup> Daan 7:13.    \* <sup>24:32</sup> “Bargi” hambhea upsiam gaalin aponta “bega” ko hambhade. Israveel peente bonan wodanin yeskenka, haaqano pudhan koda yede; Banen peente pir bargin wodan yeskenka konin pudhan yedenna, kamsinam yena may hayota “bargi” ko hambhade.

<sup>24:39</sup> Pija 6:1-7:24.

waadiman ea kidi hayne? <sup>46</sup> Yisa imbaarin niven wodanka, kina giidhon waadimandar haapadhea ea kidi gobshadhaane. <sup>47</sup> Inta yena gon ida giye: Agaa waadiman easa imbaa yisa dohon yerin wulam wottsea hayayse kiam kida wode. <sup>48</sup> Ko dahaannaar agaa waadiman ea siya ki hanna, ‘Imba saana nivehe’ hamayse yisa woylaminka qaabayse, <sup>49</sup> kimbesana waadadhayna eenaan qanan ki yedanna, bardhon eenbesana kinka kummite ki wucina, <sup>50</sup> agaa waadiman easa imbaa kinin bhocchaamon rooronbee kinin dhesaamon wodanbeka niva ki nive. <sup>51</sup> Kiam kattsi kida qane; ogora ithanam kisa maltina eenabesana kida haye. Ogotear eepibee atsi qiicabe koda maate” hamayse kena ki guyade.

## 25

### *Anzana Tambhosa Kamsino*

<sup>1</sup> Ogosa budonte Yesus yin ki guyade: “I Eedi Naas niven wodanka, Barjosa bitamono shaakanam tiyayse uutaam toolaana tambha anzanaadettsine. <sup>2</sup> Iginasa iira dongna boosona, dongna pakalla ke dahade. <sup>3</sup> Anzana boosona shaakanam bish bavayse, shaakanna maatea zayt\* bavadehe. <sup>4</sup> Anzana pakalla kedi yisa shaakanbesana koymo abka zayt yinka ke tiyade. <sup>5</sup> Uutayn kaponna, ke wulam gindhe yedonna ke raatade.

<sup>6</sup> “Sootin kiaddha laman hamenka, ‘Marrato! Uutaa nividine! Kiam tiyota uteel!’ hamayno upsi ko qansimade. <sup>7</sup> Ogo wodanka anzana wul dhaabhayse yisa shaakanam kalon konin shaakoadettsi ke ashkade. <sup>8</sup> Anzana boosona pakallana yi giyna: ‘Wonno shaakano dikana konin hayenna, bannzo zaytin yennora wona imee’ kena ke hamade. <sup>9</sup> Anzana pakalla kedi ‘Wombee yembena yeekeea zayt wokal qolehe; ogonante shan-shaynakal yivayse yena zaskea zayt shanee’ hamayse kena ke maasade. <sup>10</sup> Anzana boosonaar zaytin shano ke yivaysaka, uutaa ki nivade. Ashkimbhayse dahaana anzanaar uutaabesana kinka gaydon eenasa galan ooninte ke ardade; ke ardaysaka kerinamaar ko diithadhade.

<sup>11</sup> “Ogosa budonte anzana shidhaana nivayse, ‘Imbo, bannzo! Wona kerin bulaa’ kina ke hamade. <sup>12</sup> Kidiar ‘Inta yena gon ida giye: Inta yeam dhesattine!’ hamayse kena ki maasade.

<sup>13</sup> “Ogonante rooronbee savaatinbeam yenin dhesimonna, qaymayse toolee!

### *Makkamma Waadiman Eenasa Kamsino*

<sup>14</sup> “Rooron ogoka Barjosa bitamono kina waadiman waadadhayna eenaan yikal eelayse yinnon koymonam ke gettse kena imayse goyn utaate yivaa eadettsine. <sup>15</sup> Ke kalaal kalaanana kenin dandeaddha kena kashayse kalaana birre<sup>†</sup> shii dong, kalaana birre shii lamaa, kalaana birre shii kalaa imayse pee abdar ki yivade.

<sup>16</sup> “Birren shii dongin tiyaa ea saanawa yivayse kanka naggadayse ab birre shii dong ki adhisade. <sup>17</sup> Shii lamaan birren tiyaa ea saanawa yivayse kanka naggadayse birre ab shii lamaa ki adhisade. <sup>18</sup> Shii kalaan birren tiyaa ea imbaasa koymonam bavate yivayse pee koyayse peensa iiinte ki duukade.

<sup>19</sup> “Woda thoothisa budonte igina waadiman eenasa imbaa nivayse, kedar dohon koymon kinnonam dhesana keam oysan ki yedade. <sup>20</sup> Shii dongin birren tiyaa ea imbaakal nivayse, birrena kinin adhisaana waaniamaar bavayse, ‘Imbo, ya ina birre shii dong ha imade; iginaar kishaa, birre ab shii dong inta daran adhisidine’ kina ki hamade. <sup>21</sup> Imbaar kisa ‘Woylamin yindar qajadhea waadiman ea, ya payya hayade; yer likkaka woylamin yindar qajadhea eedi maatayse hanin haapadhonna, yer gebhidar haam kamayse ida haynse. Nivaa; imbesana wozadhota ardaa’ kina ki hamade.

\* 25:3 “Zayt”: Yesus wodanka eeno galanabee ooninte shaakan shashkanabe konin kehea zayt ayni kalaane.

† 25:15 “Birre” hambhoono ta birrendettsi dayma bazaysa kattsi gebhi anngamoka ashkadhoonone.

<sup>22</sup> “Birre shii lamaa tiyaar nivayse, ‘Imbo, ya ina birre shii lamaa ha imade; iginaar kishaa, birre ab shii lamaa inta daran adhisidine’ kina ki hamade. <sup>23</sup> Imbaar kisa ‘Woylamin yindar qajadhea waadiman ea, ya payya hayade; yer likkaka woylamin yindar qajadhea eedi maatayse hanin haapadhonna, yer gebhidar haam kamayse ida haynse. Nivaa; imbesana wozadhota ardaa’ kina ki hamade.

<sup>24</sup> “Shii kalaan birren tiyaa ea kikal nivayse, ‘Imbo, ya yiithima buurea, laalima pucchea, eedina burqadhima hanin dohonam i dhesade. <sup>25</sup> Ogonante kurtumbhayse qalte, koymon hannonam pee koyayse peesa iir i aachade. Koymonoar hasa kosha’ kina ki hamade. <sup>26</sup> Imbaar kina yin ki giyade: ‘Ya kaa siyaa boosoa waadiman ea, inta yiithima inin buurenbee laalima inin pucchenbeam ya dhesidine. <sup>27</sup> Keeda koymon innonam adhisayna eenana ima haam zaskidi hatte ko dahade; intaar inin nivenka koymonam isa adhimaka ida tiye. <sup>28</sup> Ogonante koymonam kikalanka tiyayse birren shii tabhin yinkal dahaa eana imee. <sup>29</sup> Yisa daahaana daran arsayse kina imbla ko imbhe; kinaar mirga ko mirge. Yisa qolmakalanka kisa dohonam kikala tiidha ko tiidhe. <sup>30</sup> Agaa pootimaa waadiman eam os mayante dohon thipansa iinte bulayse kiam dhabee; ogotear eepibee atsi qiicabe koda maate’ ki hamade.

### *Peensa Macchin Wodanka Maatayno Pirdino*

<sup>31</sup> “Eedi Naas cecira yisa gaananabesana kisa gobshin gebhonka kinin nivenka, gobshadhon kisa bitamon borkotondar dooqa ki dooqe. <sup>32</sup> Zarsino wul kisa birante koda buke; gishiman gishea ea yaanasa iira qollaam kinin edendettsi kidiar yin eenam kinka kikalanka kida ede. <sup>33</sup> Yaanaam yisa mizaqimbar, qollaam yisa warkatambar hayayse keam kida woyse.

<sup>34</sup> “Ogo wodanka bitaa yisa mizaqimbar daahaana eenana yin kida giye: ‘Yedi Imbayn gobshaanato, idar ora nivee; peen pijadhorra yedayse yena ashkadhon bitamon raqinam tiyee. <sup>35</sup> Harrna hambhidianna, daaqardhayse i daaka, iam yedi kunsidine; dheebardhayse i daaka, iam yedi wushidine; chocchi maatayse inin nivenka, iam ye tiyade; <sup>36</sup> pundiri maatayse i daaka, iam ye qattsade; hajadhayse i daaka, iam ye oysade; dhaxadhadhayse i daaka, nivayse iam ye shedade’ kena kida hame. <sup>37</sup> Ogo wodanka tipana eena maasayse kina yin keda giye: ‘Imbo, daaqardhayse ha daaka, haapayse haam haa wo kunsaa? Dheebardhayse ha daaka, haam haapayse haa wo wushaa? <sup>38</sup> Wodar chocchi maatayse ha nivaysaka, haapayse haam haa wo tiyaa? Pundiri maatayse ha daaka, haam haapayse haa wo qattsaa? <sup>39</sup> Hajadhadhayse way dhaxadhadhayse ha daaka, haam haa wo shedaa?’ hamayse kiam keda oyse. <sup>40</sup> Bitaar kena yinin maasenka, ‘Inta yena gon ida giye: Kina deegana imbananasa kalaana yenin waadadhoono ogono ina ye waadadhadde’ hamayse kena kida maase.

<sup>41</sup> “Ogora yisa warkatambar daahaana eenanaar yin kida giye: ‘Yedi kina ashadhaana eenato, ikalanka os pegimbhee! Seethaanbee kisa gaananabena ashkadhon, rooro wul lay dikimon nuundar yivee. <sup>42</sup> Harrna hambhidianna, daaqardhayse i daaka, iam kunseetene; dheebardhayse i daaka, iam wusheetene; <sup>43</sup> chocchi maatayse yedar inin nivenka, iam yedar tiyeetene; pundirdhayse i daaka, iam qattseetene; hajadhadhaysebe dhaxadhadhaysebe i daaka, iam shedeetene’ kena kida hame. <sup>44</sup> Kediar, ‘Imbo, daaqardhayse way dheebardhayse, chocchi maatayse way pundiri maatayse, hajadhadhayse way dhaxadhadhayse ha daaka, haam haapayse kelshima haa wo garaa?’ hamayse keda maase. <sup>45</sup> Ogo wodanka bitaa ‘Inta yena gon ida giye: Kina deegana eenasa kalaana hattear yenin hayaamonka, inaar hayeetene’ kena kida hame.

<sup>46</sup> “Ogonante igina eena rooro wul lay dhabshadhen pirdindar keda yive; tipana eena rooro wul lay daadhendar keda yive” hamayse kena ki giyade.

## 26

*Yesusdar Woogintaka Eenin Dhaabhoono  
Marq 14:1-2; Luq 22:1-2; Wannis 11:45-53*

<sup>1</sup> Yesus dhalqin ogo wulam yinin macchonsa budonte, yisa paanan yivayna eenana yin ki giyade: <sup>2</sup> “Roro lamaasa budonte Paasikan\* rooroa kinin dohonam yedi dhe-seeda dhese. Agaa roroaka i Eedi Naaseam masqalindar konngayse ziitadhe yettsate imbha ko imbhe” kena ki hamade.

<sup>3</sup> Ogo wodanka gudullasa hayonabee peensa donzanabe Qayappa hambhea gudul-lasa gebhaa ooninte ke bukade. <sup>4</sup> Ogote Yesusam cubbo goytika yedate kiam deesana kinka ke dhalqade. <sup>5</sup> Ko daahaannaar, “Eenin wodar wacimeka dhaabhoamadettsi Paasikan gobshadhea wodanka ko dahabhoode” hamayse kinka ke dhalqade.

*Yesusam Gaamen Shittonka Qadhoono Edono  
Marq 14:3-9; Wannis 12:1-8*

<sup>6</sup> Yesus Bitaania gurdante lamthin burqonka† ena dahaa Simoon ooninte ki dahade. <sup>7</sup> Yesus kummandar dooqayse ki daaka, maa kallo koymo gebhika shandhen gaamen shittonam seeni cawlira ashkadhon bilqaathinka bavate Yesuskal nivayse, gaamen shittonam Yesussa metendar ko kahade. <sup>8</sup> Yesussa paanan yivayna eenaar ogoam shedayse wacimaate, “Ko gamen shittonam harrna ko sun yiigadhe? <sup>9</sup> Kono koymo gebhidar shanshayse koymon ogoam qambhinana imana koda damadhika!” ke hamade. <sup>10</sup> Yesus yin kenin giyenam dhesayse, “Edon koam yedi harrnee galshe? Kodi ina yer payya ko hayade. <sup>11</sup> Qambhina rooro wul yembesana keda dee; inta rooro wul yembesana dahattine. <sup>12</sup> Kodi ko gaamen shittonam isa bishindar konin kehenka, duukinna ko iam ashkade. <sup>13</sup> Inta yena gon ida giye: Peen wul gidir Barjosa dhacchintan upsinam giidhen raqin hamote ko hannaar, edon koyn hayonam konin bhocchadhoodettsi kosa waadimanam giidha ko giidhe” kena ki hamade.

*Yiwda Yesusam Yettsate Imo Kinin Dhalqoono  
Marq 14:10-11; Luq 22:3-6*

<sup>14</sup> Ogo wodanka tabhi lamaana Yesussa paanan yivayna eenasa kalaas Asqoronto peen ea Yiwda hambhea gudullasa hayonakal yivayse, <sup>15</sup> “Yesusam yettsate i yena imanna ina haree ime?” kena ki hamade. Kediar birre bondi makkam‡ kina ke imade. <sup>16</sup> Kediar rooroa agaara yedayse Yesusam yettsate kinin imensa kina agea woda zagite ki dahade.

*Paasikan Galanam Yisa Paanan Yivaynabesana Yesusin Itsoono  
Marq 14:12-21; Luq 22:7-13bee 21-23be; Wannis 13:21-30*

<sup>17</sup> Irshon qolmin balashan itsadhensa bira rooroaka Yesussa paanan yivayna eena Yesuskal nivayse, “Paasikan§ galanam hamote wonin ashkoadettsia zage?” hamayse kiam ke oysade. <sup>18</sup> Kediar “Katamante yivayse aynena ‘Woam Dhettsea ‘Isa wodano saanidine; ogonante isa paanan yivayna eenabete Paasikan galanam wonin itsayno hannon oonintene” hana kida hame’ kina hamee” kena ki hamade. <sup>19</sup> Yesussa paanan yivayna eena kinin giyaadettsi yivayse Paasikan galanam ke ashkade.

<sup>20</sup> Peenin sootonsa budonte, Yesus tabhi lamaana yisa paanan yivayna eenabesana kinka kummannan ke dooqade. <sup>21</sup> Kenin kummenka Yesus “Inta yena gon ida giye: Yesa shaarira kalaam saskate ima ki ime” kena ki hamade. <sup>22</sup> Kediar ogo yin kinin giyonka kattsi burqadhyayse kalaam kalaana wul “Imbo, inta i doo?” hamayse kiam oysan ke yedade. <sup>23</sup> Yesus yin giyayse kena ki maasade: “Iam saskate imea imbesana kinka

---

\* 26:2 “Paasika” hamen upsinam Haalin Mallan mathaapinsa macchinte thaapadhaanar shedaa. † 26:6 “Lamth burqo” hamen upsinam Haalin Mallan mathaapinsa macchinte thaapadhaanar shedaa. ‡ 26:15 Yesus wodanka birreno shillingidettsi anngamone, ta birrendettsitehe. § 26:15 Zakka 11:12-13. § 26:17 “Paasika” hamen upsinam Haalin Mallan mathaapinsa macchinte thaapadhaanar shedaa.

sharqante aanin arsaane. <sup>24</sup> Inta Eedi Naas ena birayse innon goynsa thaapadhondettsi diyayda diye; ko daahaannaar i Eedi Naasiam saskate imeea ea agaana hay! Ea agaa ki adhadhaamma kina payyane” kena ki hamade. <sup>25</sup> Saskate imeea Yiwsa “Woam Dhettsea, inta i doo?” ki hamade. Yesus kina yinin maasenka, “Hanin giyaadettsine” ki hamade.

*Kiristoossa Dembhinam Bhocchisayno Galano*

*Marq 14:22-26; Luq 22:14-20; 1 Qoro 11:23-25*

<sup>26</sup> Galanam kenin itsenka, Yesus balashanam tiyayse Barjoam ki gobshade; qunthayse yisa paanan yivayna eenana “Kay, itsee; kono isa waanone” hamayse kena ki imade.

<sup>27</sup> Wucadhenamaar tiyate Barjoam gobshayse, yin giyayse ki kena imade: “Yedi wul wucadhen kosa iira wucee. <sup>28</sup> Kono thoothin eensa seesonam shiishanna laymayno haalin mallanam eshkayno isa zombhinone. <sup>29</sup> Ko daahaannaar inta yena ida giye: Imbasaa bitamonte woynea hattasa aapin cuubadhon haalin wucadhenam yembesana kinka wonin wucenka yekka, keeda kaara os inta koam wucattine” kena ki hamade.

<sup>30</sup> Ogosa budonte, mazmur zammarayse Dabirezayt dhukanam ke utade.

*Yesus Bhethiroosin Marimenam Birayse Kinin Giyoono*

*Marq 14:27-31; Luq 22:31-34; Wannis 13:36-38*

<sup>31</sup> Ogo wodanka Yesus yisa paanan yivayna eenana yin ki giyade:  
“ ‘Yaana gisheam qanate deesayda deese;  
gishadhadyna yaanaar thar thar hama ke hame’  
hamayse thaapadhondettsi sootin koam yedi wul iam gareeda gare. <sup>32</sup> Ko daahaannaar diira inin dhaabhonsa budonte, Galila peendar yeam birayse ida yive” kena ki hamade.

<sup>33</sup> Bhethiroos yi giyna: “Eeno waani wul haam garea ko hanna, inta hamin ko daahaakaar haam garattine” kina ki hamade. <sup>34</sup> Yesus kina “Inta hana gon ida giye: Kina sootin koam baacha biraa qiiqima makkam goyt ‘Inta kiam dhesattine’ hamayse marimaada marime” ki hamade. <sup>35</sup> Bhethiroosaaar “Dembhi ko hannaar, hambete diyayda diye; hamin ko daahaakaar, ‘Kiam dhesattine’ hamayse marimattine” kina ki hamade. Yesussa paanan yivayna eena waani wul yin ke giyade.

*Yesus Getesemaane Raqinte Barjoam Kinin Miskoono*

*Marq 14:32-42; Luq 22:39-46*

<sup>36</sup> Ogosa budonte Yesus kembesana kinka Getesemaane hambhen raqindar ki yivade. Ogote yinin yeskenka, Yesus yisa paanan yivayna eenana “Inta ogote yivayse Barjoam inin miskenka, yedi kote dooqee” kena ki hamade. <sup>37</sup> Yinin yivenka Bhethiroosbee Zabdoos naana lamaanabeam yinka entsate yivayse qaaboka atite gaalan ki yedade. <sup>38</sup> Kena yin ki giyade: “Qaabono idar thoothayse iam deesamba koda haye; ogona yedi kote dooqayse imbesana wocchimbhayse toolee” kena ki hamade. <sup>39</sup> Kekala likka pegadhayse, wotinka yisa peendar yirk hamayse yin giyayse ki miskade: “Imbo, dandimea ko hanna, ina ko gaalen wucimanam inin wucoamadettsi ikalanka koam saskaa. Ko daahaannaar hanin nashaadettsi ko dee; inin nashaadettsi ko dahabhoode” ki hamade.

<sup>40</sup> Ogosa budonte makkamma yisa paanan yivayna eenakal maatate kinin nivenka, raatayse ke daaka keam haapayse, Bhethiroosna yi giyna: “Yedi imbesana ta savaat kala hattear wocchimbhayse toolano yeam bashidu? <sup>41</sup> Taysate yeam siyonsa iiinte arsente yedin ardoamadettsi wocchimbhayse Barjoam miskee. Eedisa qaabe ashkimbhine; hattear waano qajadhine” kena ki hamade.

<sup>42</sup> Yesus lansi maatate yivayse, “Imbo, gaalen wucimano kono i wucima ikalanka sagana dandimino ko hanna, hanin nashaadettsi ko dee” hamayse ki miskade. <sup>43</sup> Pir yisa paanan yivayna eenakal kinin nivenka, keam gindhisaka raatayse kenin dohonte

keam ki haapade. <sup>44</sup> Keam garayse qalte, ini Barjoam kinin miskendettsi makkanso pir ki miskade.

<sup>45</sup> Ogora yisa paanan yivayna eenakal nivayse kena yin ki giyade: “Taar yedi raatidu? Tapir lay ukunse ukunso? Marrato! Wodanoar yeskidine; i Eedi Naaseam seeson eenasa aaninte saskate iam koda imbhe. <sup>46</sup> Keeda dhaabhee! Wo yive; iam saskate imea kash, theedidine” kena ki hamade.

### *Yesussa Banqin Eenayn Kiam Yedoono*

*Marq 14:43-50; Luq 22:47-53; Wannis 18:1-11*

<sup>47</sup> Yesus ogoam akar giyte ki daaka, marrato! Tabhi lamaana kisa paanan yivayna eenasa kalaa Yiwda ki nivade. Kimbesana kinka halpabee haljobe bovoono thoothino eneo gudullasa hayonabee peensa donzanabekalanka nittsadhaysaka ko nivade. <sup>48</sup> Yesusam saskate imea Yiwda eenana birayse “Inin sunqea kidine; kiam yedee” hamayse milkit kena imidine. <sup>49</sup> Yiwda saanawa Yesuskal nivayse, “Dhettsea, payyaw?” hamayse kiam ki sunqade. <sup>50</sup> Yesus kina “Isa nashoa, ya hanin qaabonam thoosaa” ki hamade. Ogora eneo Yesuskal nivayse kiam ko yedade.

<sup>51</sup> Ogo wodanka Yesusbete dahaana eenasa kalaa halpanam yisa gochayse, gudullasa gebhaasa waadiman ea qaaminam taxate ki dhabade. <sup>52</sup> Yesus kina yin ki giyade: “Eedidar halpa gochea wul halpaka kida diye. Ogonante halpanam hasa halpan ooninte arsa! <sup>53</sup> Inta Imbaam miskidi hatte i daana, paydadhimina banqin kansayna yisa gaananaam ina taaki kinin nittsimadettsi ko hakal maato? <sup>54</sup> Yin ko hanna, Mathaapin Gazante ‘Gaale tiya kiam zaska ko zaske’ hamayse thaapadhoono hamin ko thoothe?” kina ki hamade.

<sup>55</sup> Ogo wodanka Yesus thoothin eenna “Eedisa koymo buurate itsea eedidettsi hayayse iam yedana halpabee haljobe bavatee nivaaw? Roro wul Barjosa gazan ooninsa mayante dooqayse eenaam dhettsada inin dehenka, iam yedeetene. <sup>56</sup> Ko dahaannaar ogono wul yin konin dohoono ena birayse Barjokala qansayse eenna giyayna eenayn thaapoono konin thoothoadettsine” kena ki hamade. Ogo wodanka Yesussa paanan yivayna eena wul kiam garayse gobate ke yivade.

### *Yesusam Pirdin Pirdaynakal Baadhoono*

*Marq 14:53-65; Luq 22:54bee 63-71be; Wannis 18:13-14bee 19-24be*

<sup>57</sup> Ogosa budonte Yesusam yedaana eena gudullasa gebhaa Qayappakal kiam entsate ke yivade. Ogotear Musesa yiggynam dhettsayna eenabee donzanabe kinka bukayse ke dahade. <sup>58</sup> Bhethiroos gudullasa gebhaa kerminsa iin kinin yeskenka yekka pegeka Yesussa paanan yivite ki dahade. Kermintear ardayse Yesusdar dhalqadhen dhalqinsa macchin taxadhenam shedana poolisanabete kinka ki dooqade.

<sup>59</sup> Gudullasa hayonabee Yiwda peensa donzana wulbe Yesusdar dembhi pirdina yeskisea buuda tarjamo zagite ke dahade. <sup>60</sup> Buudamonka daran tarjayna thoothina eena kekal ke nivaakaar, dembhina kiam yeskisea tarja haapadhadhehe. Macchindar eedi lamaa tarja tarjota nivayse, <sup>61</sup> “Kaa ea ‘Barjosa gazan ooninam kottsayse rooro makkamka pir koam woysana damayda dame’ ki hamade” hamayse ke tarjade. <sup>62</sup> Gudullasa gebhaa dhaabhayse, “Eena kina hadar kenin tarjensa kala hattear ya yer giyattanu?” hamayse kiam ki oysade. <sup>63</sup> Yesus lay ki hamade. Gudullasa gebhaa pir Yesusna, “Lay dehea Barjosa naabenka ida haam oyse: Barjo Naasa, Barjoyn qadhaa Kiristoos ya hanna wona giyaa” kina ki hamade. <sup>64</sup> Yesus “Hanin giyaadettsine. Ko dahaannaar inta yena ida giye: Kaara yedayse Eedi Naas kantanka dahaa Barjosa mizaqimbar dooqayse kinin dohonbee cecira polonka kinin nivenbeam haapeeda haape” kina ki hamade.

<sup>65</sup> Ogo wodanka gudullasa gebhaa dhagaka yisa apalanam hattsayse yin ki giyade: “Ea kaa Barjoam ki iirrade; keeda os tarja ab wona harrna ko zaske? Yedi kisa iirimenam

qansidine. <sup>66</sup> Yena yer har ko maate?” ki hamade. Kediar, “Dembhi ko kiam zaske” ke hamade.

<sup>67</sup> Ogo wodanka kisa aapindar pathimaate kiam ke gutade. Waani enoar kiam cavaate, <sup>68</sup> “Ya Barjoyn qadhaa Kiristoos, haam qanaa hayne? Wona giyaa” hamayse kiam ke bagade.

*Bhethiroos Yesusam Kinin Marimoono  
Marq 14:66-72; Luq 22:56-62; Wannis 18:15-18bee 25-27be*

<sup>69</sup> Bhethiroos gudullasa gebhaa mayan kerminsa iinte dooqayse ki daaka, ogote waadiman maanasa maa kallo kikal nivayse, “Yaar Galilara nivaa Yesusbete ha dahade” kina ko hamade. <sup>70</sup> Kidiar “Hanin giyayno yer har konin dohonam inta dhesattine” hamayse een wulsa birante ki marimade. <sup>71</sup> Kerminsa kerinka kinin utenka, maa ab kallo kiam shedayse ogote dohon eenna “Ea kaa Naazret peen Yesusbete ki dahade” ko hamade. <sup>72</sup> Bhethiroos tapir mallaate, “Agaa hanin giyea eam inta dhesattine” hamayse ki marimade. <sup>73</sup> Likka kap hamayse ogote woyayse dahaana eena Bhethirooskal theedayse, “Ya hasa dhalqinka dhesimaada dhesime; gon ya kembesana kinka ha dahade” kina ke hamade. <sup>74</sup> Kidiar “Inta ea kaam dhesattine!” hamayse yiam ashite malliman ki yedade. Saanawa baacha ki qiiqade. <sup>75</sup> Bhethiroosaar “Baacha biraq qiiqima iam makkam goyt ‘Inta kiam dhesattine’ hamayse hada marime” hamayse Yesusin kina giyoono kalan bhoq konin hamenka, mayan utayse qaaboka kattsi ataate ki eepade.

## 27

*Yesusam Bhilathoosdar Yedate Yiidhoono  
Marq 15:1; Luq 23:1-2; Wannis 18:28-32*

<sup>1</sup> Peen sedhaysaka gudullasa hayonabee peensa donzanabe wul Yesusam deesana kinka ke dhalqade. <sup>2</sup> Kiam dhaxaysear bavate peen wottsea Bhilathoosna saskate ke imade.

*Yiwda Yiam Rookayse Kinin Diyoono  
Yi Waa 1:18-19*

<sup>3-4</sup> Ogora Yesusam saskate imaa Yiwda Yesusdar pirdadthon pirdinam yinin haapenka, seesonam yisa kinin dhesonna ki burqadhade. Gudullasa hayonabee donzanabena nivayse, “Kaa ea gazaam deesadhoodettsi saskate kiam inin imonna, inta dhabidine” hamayse birrena bondi makkammaam\* maasate kena ki imade. Kediar “Woam ogote arsayno hare? Ogoro gaale hantine” kina ke hamade. <sup>5</sup> Kidiar birrenam Barjosa gazan ooninte dhabayse utaate yivayse, yiam rookayse ki diyade.

<sup>6</sup> Gudullasa hayonaar birrenam tiyayse, “Kono birre eedisa zombhi baza konin dohonna, Barjosa gazan ooninte iminton imbhensesa iir wonin worsoadettsi wona giidhadehe” ke hamade. <sup>7</sup> Kinka kedi dhalqayse een peera nivayse diyaanayn duukad-hea raq konin maatoadettsi ogo birrenka eedi daa meeshea kalaasa haami ke shanade.

<sup>8</sup> Ogona haamin ogoam kinaka yekka “Zombhin haami” hamayse ko koam eldhe.

<sup>9-10</sup> Ogo goynka

“Israveel eena kisa baza konin maatoadettsi kenin giyoono

birrena bondina makkammaam tiyayse

Barjo Imbaa ina kinin giyondettsi

eedi daa meesheasa haaminna ke kashade”

hamayse ena birayse Barjokala qansayse eenna giyea Ermeasin giyoono ko thoothade.

\* <sup>27:3-4</sup> Yesus wodanka birreno anngamone. Yiwda maasate kinin bavaana anngamo birre eedi kalaa kaysa apo tabhine. <sup>27:9-10</sup> Erme 32:6-9; Zakka 11:12-13.

*Bhilathoos Yesusam Kinin Oysoono**Marq 15:2-5; Luq 23:3-5; Wannis 18:33-38*

<sup>11</sup> Ogora Yesusam peen wottsea Bhilathoossa birante entsate ko woysadhade. Peen wottsea ear, “Ayiwd eenasa bitaa yaw?” hamayse kiam ki oysade. Yesusaar “Inta hanin giyaadettsine” kina ki hamade. <sup>12</sup> Gudullasa hayonabee donzanabe kiam kenin bersenka, kidi yer kala hattear maasadehe. <sup>13</sup> Ogosa budonte Bhilathoos Yesusna “Hadar yer meemay goytika kenin tarjenam ya qansattanu?” kina ki hamade. <sup>14</sup> Yesus peen wottsea eanin targadhenka yekka upsi kala hattear kina maasadehe.

*Yesusdar Dembhin Pirdinin Pirdadhoono**Marq 15:6-15; Luq 23:13-25; Wannis 18:39-19:16*

<sup>15</sup> Peen wottsea ea levenka levenka Paasikan<sup>†</sup> wodanka, dhaxadhon eensa iira kinin buloadettsi eenin zagea eedi kalaam kinin bulea kisa dambi dahade. <sup>16</sup> Ogo wodanka Barbaan hambhea ea wobamon waadimanka kattsi dhesimaa dhaxadhidi hatte ki dahade. <sup>17</sup> Ogona eeno bukayse konin dohonte Bhilathoos kena yi giyna: “Yena inin buloadettsi yenin zagea hayne? Barbaanmoo? Way Barjoyn qadhaa Kiristoos hambhea Yesusu?” hamayse keam ki oysade. <sup>18</sup> Yin giyayse keam kinin oysoonoar Yesusam sun woogintaka yettsate saskayse kiam kinin imonam kinin dhesennane.

<sup>19</sup> Pir Bhilathoos pirdin raqindar dooqayse ki daaka, geshono kisa “Agaa tipa ea goynsa inta nii sootin haamaka kattsi i gaalade; kidar yer kala hattear hayaabhode” hamayse daran apo ko yittsade.

<sup>20</sup> Ko dahaannaar gudullasa hayonabee donzanabe “Barbaanam ko buldhe; Yesusam ko deesadhe” kenin hamoadettsi eenaam yidar ke maasade. <sup>21</sup> Peen wottsea ear maasayse “Ta lamaana eena kinasa yena hamaam inin buloadettsi ye zage?” hamayse tapir keam ki oysade. Kediar, “Barbaanam wona bulaa” ke hamade. <sup>22</sup> Bhilathoosaar, “Ta keeda Barjoyn qadhaa Kiristoos hambhea Yesusam hamin i kiam hayo?” kena ki hamade. Kedi wulaar “Kiam ko ziitadhe!” hamayse ke maasade. <sup>23</sup> Kidiar “Harrnaqa ki ziitadhe? Kinin hayoono seesono kisa hare?” hamayse keam ki oysade. Kediar “Kiam ko ziitadhe!” hamayse kalon ilatite ke waajade. <sup>24</sup> Bhilathoosaar eenbesana kinin dhalqayno goore konin dhaaserra ab yer pootima konin dohonam dhesayse noqo tiyayse, “Inta kaa tipa eam deesadhente yekal qolattine; yedi yenin nashaadettsi hayee” hamayse eensa birante aaninam yisa ki shiiddhade. <sup>25</sup> Eeno wulaar kina konin maasenka, “Kinnon dembhin goynka nivayno pirdino wombee naana wonnabedar ko yeske” ke hamade. <sup>26</sup> Ogo wodanka Bhilathoos Barbaanam kena ki bulade; Yesusamaar ki qansade; masqalindar konngayse kiam kinin ziitoadettsi kena ki imade.

*Poolisana Yesusdar Kenin Bagimoono**Marq 15:16-20; Wannis 19:1-3*

<sup>27</sup> Ogo wodanka peen wottsea easa poolisana Yesusam kisa kerminte yedate yivayse, shidhaana poolisana wulam kisa gasante ke buskade. <sup>28</sup> Kisa apalanamaar kidara bulayse apala zoo ke kidar qattsade. <sup>29</sup> Ukumbha qorayse kisa metendar ke wodade; kisa mizaqa antakaar kiam haljo ke yettsade. Kisa birantear kumpurdhite, “Ayiwd eenasa bitaa, payyamo hana ko dee” hamada kiam ke bagade. <sup>30</sup> Kidar pathimaate aanira kisa haljonam tiyayse kanka kisa metenam maasite maasite ke qanade. <sup>31</sup> Kiam kinin bagonsa budonte, apalan zoonam kidara bulayse kinnon apalanam tapir kidar ke qattsade; kiamaar masqalindar konngayse ziitate deesota entsate ke yivade.

*Yesusam Masqalindar Ziitadhoono**Marq 15:21-32; Luq 23:26-43; Wannis 19:17-27*

<sup>†</sup> 27:15 “Paasika” hamen upsinam Haalin Mallan mathaapinsa macchinte thaapadhaanar shedaa.

<sup>32</sup> Peen wottsea easa kermira kenin utenka Simoon hambhea Qerena peen eam haapayse Yesusam ziitadhen masqalinam kantaka kiam ke ketsade. <sup>33</sup> Kediar Golgota hambhea raqaam ke yeskade; “Golgotta” hamintano “Eedisa Metedettsi Maataa Raq” hamintane. <sup>34</sup> Ogote cishinbesana worsadhon woynea hattasa aapira cuubate ashkad-hon wucadhenam kinin wucoadettsi ke kina imade. Kidiar suutayse wucana zagadehe.

<sup>35</sup> Masqalindar kiam konngayse kenin ziitonsa budonte, kisa apalandar itha dhabayse ke kashimade. <sup>36</sup> Kediar raqaate dooqayse kiam ke toolade. <sup>37</sup> Kidar pirdadthonam dhettsea “Kaa Ayiwd eenasa bitaa Yesusne” hamea thaapi thaapate Yesussa metembar kiam ziitadhon masqalindar ke konngade. <sup>38</sup> Ogo wodanka pir eedi lamaa eedisa koymo sarite itsaynasa, kalaam Yesussa mizaqimbar, langoam kisa warkatambar hayayse keam konngayse ke ziitade.

<sup>39</sup> Kisa demenka yivayna eenaar kiam iiraate metenka jugimaate, <sup>40</sup> “Ya ‘Barjosa gazan ooninam kottsaye rooro makkamka pir ida woyse’ hamea, ta haam dhacchaa! Barjo Naas ha daana, ta masqalindara hanchaa!” hamaate kiam ke bagade.

<sup>41</sup> Ogodettsi pir gudullasa hayona Musesa yigginam dhettsayna eenabee donzan-abesana kinka hamayse yin giyte ke kiam bagade: <sup>42</sup> “Een waaniam dhacchayse yiam dhacchana damadehe. Kidi Israveel eensa bit ki hanna, yinda ta ko kiam ziitadhon masqalindara ki hanche; wodiar kidar woylamin qajooda qaje. <sup>43</sup> Kidi Barjodar woylamin ki qajade; ‘Inta Barjo Naasine’ ki hamade. Ogonante Barjo kiam nashea ki hanna, yinda ta kiam ki dhacche” ke hamade.

<sup>44</sup> Een koymon sarite itsayna eena kimbesanaa ogodettsi kiam ki iirade.

### *Yesusin Diyoono*

*Marq 15:33-41; Luq 23:44-49; Wannis 19:28-30*

<sup>45</sup> Rooron savaat laxra yedayse savaat salin thoothenka yekka peen wuldar thipa ko maatade. <sup>46</sup> Savaat sal konin maatenka Yesus “Elohe, Elohe! Lama sabaqtani?” hamayse upsin yisaam kattsi dhevayse ki ilatade. Kosa bulinoar, “Isa Barjoa, isa Barjoa! Harrna iam garaa?” hamintane. <sup>47</sup> Ogote woyon eensa waani eeno Yesusin giyenam qansayse, “Kaa ea Eeliasam kida eele” ko hamade. <sup>48</sup> Ogo wodanka saanawa kesa iira kalaa gobayse saaro tiyate woyni thorkaasa iir tittsate bayavse malkaka Yesussa apondar thettsayse ki wushade. <sup>49</sup> Waani eeno “Yinda woyaa; Eeliasin nivayse kiam dhacchenam wo shede” ko hamade.

<sup>50</sup> Yesus pir upsin yisa dhevayse ilatayse ki diyade. <sup>51</sup> Ogo wodanka Barjosa gazan ooninsa gidin kashadhoono apallo bhaara choo nukindar kiaddha raq lamaadar ko havade. Peenoar ko shohade; senna laytanaar ke bhaqade. <sup>52</sup> Duukinsa kerroar ko bulimade; diyon gazan eensa thoothino dembhira dhaabhayse <sup>53</sup> duukira utidine. Yesus dembhira kinin dhaabhonsa budonte gazan kataman Yerusaalemdar ko ardade; ogo raqintear thoothin eenna ko haapadhade. <sup>54</sup> Mato alaqabee kimbesana Yesusam toolayna eenabe peenin shohenbee waani yerinbe yinin haapen wodanka kattsi kurtumbhayse, “Gon ea kaa Barjo Naasine” ke hamade.

<sup>55</sup> Galila peera yedayse Yesusna waadadhite kisa paanan yivayna maa thoothi waani pegeka woyayse shedayna raqin ogote ke dahade. <sup>56</sup> Iginasa iira Megdela peen edon Mayriyambee, Yayqoobbee Yoseepbesa indan Mayriyambee, Zabdoos geshonbe gidir ke dahade.

### *Yesusam Duukadhoono*

*Marq 15:42-47; Luq 23:50-56; Wannis 19:38-42*

<sup>57</sup> Peen sootaysaka Armatias kataman ea Yoseep hambhea eedi wodimo kalaa ki nivade; kidiar Yesussa paanan yivea eedi ki dahade. <sup>58</sup> Kidi Bhilathooskal yivayse Yesussa leesinin kina kinin imoadettsi ki miskade; Bhilathoosaar leesinin kina imbhoodettsi

ki giyade. <sup>59</sup> Ogora Yoseep leesinam tiyayse apala haalika ki ochade. <sup>60</sup> Seeni layta palsayse yinante kinin ashkon haalin duukin oolonte ki kiam duukade. Ogora seeni gaari gunngate duukinsa aponam kanka shupayse ki yivade. <sup>61</sup> Megdela peen edon Mayriyambee Mayriyam waabe ogo duukinsa birante dooqayse ke dahade.

<sup>62</sup> Ayiwd eensa ukunsen rooroaytana burburi gudullasa hayonabee Parisa eenabe kinka bukayse Bhilathooskal yivayse yin ke giyade: <sup>63</sup> “Imbo, ea kaa enaanam dhad-dhisea yinin diyonsa birayse, ‘Inta dembhira rooro makkamsa budonte dhaabhayda dhaabhe’ kinin hamoono wona bhoq ko hamade. <sup>64</sup> Ogona kisa paanan yivayna eena nivayse kisa leesinam kinin diiboamadettsibee ennaar ‘Yesus dembhira dhaabhidine’ hamayse kinin giyoamadettsibe duukino rooro makkamna payya hayayse konin told-hoadettsi giyaa. Ogotay hamidi ko hanna, enaanam kinin dhaddhisayno birora bere macchinte kalon sagino koda doaye” kina ke hamade. <sup>65</sup> Bhilathoosaar, “Toolayna eena daane; yedi keam entsate yivayse yenin dhesaadettsi hayayse tolsee” kena ki hamade. <sup>66</sup> Kediar yivayse duukinsa apon shupadhon seeninin buldhoamadettsi daran maytam qanayse toolayna poolisanaka ke tolsade.

## 28

### *Yesusin Dembhira Dhaabhoono* *Marq 16:1-8; Luq 24:1-12; Wannis 20:1-10*

<sup>1</sup> Ayiwd eensa ukunsen rooroayn maqonsa budonte, gabansa rooroa biraaw Wu-udika burburi Megdela peen edon Mayriyambee Mayriyam waabe duukinam shedo ke yivade. <sup>2</sup> Dhesadhima peeno kekal kattsi ko zigimade; Barjosa gaanaar cecira nivayse duukin oolonsa apon shupadhon seeninam gunngayse daran ki dooqade. <sup>3</sup> Kisa wotinoar bhalqantdettsi shaakayno, apalloar kisa chechidettsi cawloono ko dahade. <sup>4</sup> Duukin toolayna ennaar Barjosa gaanaam yinin kurtumbhon goynka kattsi gibazayse eedi diyaadettsi ke maatade. <sup>5</sup> Barjosa gaanaar maanana yin ke giyade: “Kurtumbheebhode! Masqalindar konngate ziitayse deesadhaa Yesusam yenin zagenam dhesayda dhese. <sup>6</sup> Kidi kote qolehe; ‘Dembhira dhaabhayda dhaabhe’ yinin hamondettsi kidi dhaabhidine. Kisa leesinin duukadhon raqinam nivayse shedeey. <sup>7</sup> Taaki keeda yedi saanawa yivayse kisa paanan yivayna eenana ‘Kidi dembhira dhaabhidine; yeam birayse Galila peendar kida yive; yediar kiam ogote yeda haape’ hamayse kena giyee. Inta yena ogoam giydine” kena ki hamade.

<sup>8</sup> Ogora maana igina kurtumbheebi gebhi wozabeka duukin raqira saanawa utayse Yesussa paanan yivayna eenana giyota ke gobade. <sup>9</sup> Yesus goynte kedar keerayse “Nagaya” kena ki hamade. Kediar kikal theedayse kisa roon yedayse kina ke goodimade. <sup>10</sup> Ogo wodanka, Yesus kena “Kurtumbheebhode! Yivayse imbanaana Galila peendar kinin vivoadettsi kena giyee; iam ogote keda haapoaye” kena ki hamade.

<sup>11</sup> Maana duukin raqira maatayse yivite goynte ke daaka, duukinam toolayna eenasa waani Yerusaalem katamandar yivayse hamon yerin wulam gudullasa hayonana ke giyade. <sup>12</sup> Gudullasa hayonabee donzanabe kinka bukayse kinin dhalqonsa budonte, duukinam toolayna poolisanana birre gebhi imayse, kena yin ke giyade: <sup>13</sup> “Wo raataysaka Yesussa paanan yivayna eena sootinka nivayse kisa leesinam diibate ke yivade’ hamayse eenna giyee. <sup>14</sup> Ko dhalqinam peen wottsea bere ki qansaakaar, yedar yer siya kinin hayoamadettsi wodi kiam dhettsoda dhetts” kena ke hamade. <sup>15</sup> Ogora igina poolisana birrenam tiyayse kena giidhondettsi ke giyade. Ogo dhalqinam kina wodan koka yekka Ayiwd eenasa peen wul gidir koam giyte ke dahade.

### *Yesus Yisa Paanan Yivayna Eenana Kinin Haapadhoono* *Marq 16:14-18; Luq 24:36-49; Wannis 20:19-23; Yi Waa 1:6-8*

<sup>16</sup> Tabhi kalaana Yesussa paanan yivayna eena Galila peente Yesusin kena giyon dhukandar ke yivade. <sup>17</sup> Kiam kenin haapenkaar kumpurdhayse kina ke goodimade; kesa iira “Kaa gon Yesusu?” hamayse kiam ke qothimade. <sup>18</sup> Yesus kekal theedayse kena yin ki giyade: “Hayamono wul cecinbee peentebe ina imbhidine. <sup>19-20</sup> Yedi keeda yivayse peendar dohon zarsin wulam Barjo Imbaabee, Naasabee, Manpas Gazanbesa naabenka keam shivaate, inin yena giyon wulam kenin tooloadettsi keam dhettsaate, isa paanan yivayna eena keam hayee. Intaar peensa macchinka yekka rooro wul yembesana ida dee” ki hamade.

# Marquoosin Thaapoono

## Imbaa Wontea Yesus Kiristoossa Dhacchintan Goynam

### Giyayno

### Barjosa Upsino

#### *Ardinta*

Marquoos Yesus birayse kinin kamaana tabhi lamaana kisa paanan yivayna eenakalankatehe. Yin ko dahaakaar,

1. Yerusaalemir indan Mayriyam ooninte gebhaa kida maate (Yi Waa 12:12).
2. Marquoos Barnabaas indansa indanaas naasine (Qola 4:10); Barnabaas pir Bhawloos-bee Yerusaalem gidir dahaana yittsadhaanabesa kidi aanamone.
3. Marquoos Bhethiroosbesana kisa yettsamo daane (1 Bhethi 5:13).

Ogonante Marquoos Yesus Kiristoossa dayntan goynbee birayse Barjodar woylamin qajaana eena goynbesa kattsi kida dhese.

Marquoos mathaapinam kinin thaapoono Roome eenana kattsi qaabaysene. Mathaapino Yesus Barjosa waadima eedi maatayse waadadhea kinin dohonam koda dhee. Marquoosin thaapon mathaapinte Yesus dhalqino thoothi haapadhehe; kattsika gidir haapadhadhayno Yesusin hayonsane. Kinin hayaana yerrasa iira aapi maatayna yerra kisa dembbinbee dembhira kisa dhaabhidinbesane. Kashi 11ra yedayse kashi 16sa maccheadar Yesus peen kodar kinin dohonsa macchea gabaaka kinin waadadhonam koda giye. Ogonante agaa gabaaka kinin waadadhonam kattsi bhoccha woam konin zaskenam woda dhese.

Kaa mathaapasa iinte Yesus payyan waadimanam waadadhada kinin yaayonam koda dhee. Mathaapaam dong aapi maatayna ranqadar kashana dandima ko dandime:

1. Ardinta (1:1)
2. Ashkimbheno (1:2-13)
3. Tarshen waadimanbee kamsinbe (1:14–10:52)
  - a) Yesus Galila peendar birayse kinin yivoono (1:14–4:34)
  - b) Yesus Tabhi Katamana hambhen peendar kinin yivoono (4:35–5:43)
  - c) Yesus Galila peendar lansi kinin yivoono (6:1-29)
  - d) Yesus eedin qolmon darandar kinin yivoono (6:30-52)
  - e) Yesus Galila peendar makkanso kinin yivoono (6:53–7:23)
  - f) Yesus hayn utensia warkatambar kinin yivoono (7:24–9:29)
  - g) Yesus Galila peendar oytso kinin yivoono (9:30-50)
  - h) Yesus Yiwda peenbee Yordaanoos baynsa saabarbe kinin yivoono (10:1-52)
4. Yesus Yerusaalem gidir kinin waadadhonam (11:1–13:37)
5. Yesussa dembbinbee dembhira dhaabhidinbe (14:1–16:20)

#### *Shivea Wannisin Giyoono Barjosa Upsino*

*Maat 3:1-12; Luq 3:1-18; Wannis 1:19-28*

<sup>1</sup> Barjosa Naasa Yesus Kiristoossa dhacchintan upsino konone.

<sup>2-3</sup> “Shedaa! Hasa goynam ashkeea isa ergen eam hasa birante yittsayda yittse.

Ogonoar

‘Marrato! Barjoyn yekal nivenna,  
yesa woylaminam ashkee; goynamaar kina gaz hayee’ hamayse  
ilatea easa upsino darante koda qansime”  
hamayse Barjokala qansayse eenna giyea Isiassa mathaapinte thaapadhdonttsine.

<sup>4</sup> Ogonante Shivea Wannisaar, “Yesa seesonam gardhoadettsi, seeson waadimanam garayse Barjodar maatayse shiidhee” hamaate Barjosa upsinam giyada darandar ki yivade. <sup>5</sup> Yiwda peen eenabee Yerusaalem katamante dahaana eena wulbe Wanniskal nivayse yisa seesonam kenin buuthenka, Wannis Yordaanoos baynte keam kida shive.

<sup>6</sup> Wannisaar gamalesa sitika ashkadhon apalan qaadhite ki dahade. Yisa karnantear qalbatha kida dhaxe. Kinin itsaynoar seerebee qoa kribene. <sup>7</sup> Kidiar “Inin yirk hamayse kisa dunngurinsa dhaxinam hattear bulana inin damima idara kantanka sagea isa budonte niva ki nive. <sup>8</sup> Inta noqoka yeam ida shive. Kidi yeam Manpas Gazanka kida shive” hamayse eenna giyte ki dahade.

### *Yesussa Shiidhidinbee Taysate Shedadhidinbe*

*Maat 3:13-4:11; Luq 3:21-22; 4:1-13*

<sup>9</sup> Ogo wodanka Yesus Galila peen Naazret katamara ki nivaysaka, Wannis Yordaanoos baynte kiam ki shivade. <sup>10</sup> Saanawaar Yesus noqora kinin utenka, cecino bulimayse Manpas Gazano waleedettsi daran konin hanchenam Wannis ki haapade. <sup>11</sup> Ogora “Inin nashea isa Naasa yane. Hanka ida wozadhe” hamea upsi cecira ko qansimade.

<sup>12</sup> Saanawaar Manpas Gazano Yesus darandar kinin yivoadettsi kiam ko dhaasade. <sup>13</sup> Darantear eedi lamaa kaysa rooro Seethaanka taysadhaate ki dahade. Dabinbetear ki dahade. Barjosa gaananaar kina waadadhite ke dahade.

### *Yesus Kaaran Yedaynaam Yikal Kinin Eeloono*

*Maat 4:12-22; Luq 4:14-15; 5:1-11*

<sup>14-15</sup> Wannisam yedate dhaxadhonsa budonte, Yesus Barjosa dhacchintan upsinam eenna giyada, “Roorono maqidine. Barjosa bitamono yekal theedidine. Ogonante seeson waadimanam garayse Barjodar maatee. Barjosa dhacchintan upsinam gonni hamayse tiyee” hamada Galila peendar ki yivade.

<sup>16</sup> Ogo wodanka Yesus Galila bazinsa aponka kinin yivenka, Simoonbee kisa indanaasa Indiriasbeam ki haapade; kediар kaaran yedayna yinin dohonna, yisa kaaran yeden zaaninam bazindar apite ke dahade. <sup>17</sup> Yesusaar yi giyna: “Marrato! Yedi dhaababayse isa paanan nivee. Kaaran yenin yedendettsi Barjosa bitamondar eenaam yenin maasoadettsi yeam ida haye” ki hamade. <sup>18</sup> Kediар kaaran yininka yeden zaaninam saanawa garayse Yesussa paanan yivan ke yedade.

<sup>19</sup> Ogora likka sus mak kinin hamenka, Zabdoos naana Yayqoobbee Wannisbeam ki haapade. Kediар bazindara sagadhen gonngalante dooqayse kaaran qazadhen zaaninam kinin ashkenka, <sup>20</sup> saanawa Yesus keam ki eelade. Kediар imbaa Zabdoosbee kisa waadiman eenabeam kinka bazindara sagadhen gonngalante garayse Yesussa paanan yivan ke yedade.

### *Beeronin Yedaa Eayn Paashoono*

*Luq 4:31-37*

<sup>21</sup> Ogora Qipirnaahoom katamante nivayse ke ardade. Ayiwd eensa ukunsen roroakaar Yesus kesa bukin raqinte ardayse eenaam dhettsan ki yedade. <sup>22</sup> Qansoono eneo kinin dhettsan timmirinka kattsi ko targadhade. Ogonoar konin targadhoono Musesa yigginam dhettsaynadettsi dayma kidi yisa hayamonka eenaam dhettsite kinin dohonnane.

<sup>23</sup> Ogo wodanka kesa bukin raqinte beeroyn yedaa eedi kalaa dahade. <sup>24</sup> Kidiar Yesusna “Naazret peen Yesuso, hambesana wosa dohoono hare? Woam kaysanaa nivaaw? Hay hanin dohonam inta dhesidine. Ya Barjokala nivaa gazaane” hamayse ki ilatade.

<sup>25</sup> Yesusaar beeroaka “Lay hamaa! Eadara utaa!” hamayse kiam ki bitade.

<sup>26</sup> Eamaar dhabayse kinin qaptisonsa budonte, gebhi upsika kiam ilattsayse beeroa kidara ki utade. <sup>27</sup> Eeno wulaar “Kono yer hare? Kono timmiri haalitayu? Yisa

hayamonka beeronana kida giye. Kediar kina ee keda hame” hamayse kinka kikal kenin oysenka yekka kedi targadhidine.

<sup>28</sup> Saanawaar Yesusin waadadhoono Galila peente dohon raqin wul gidir ko qansimade.

*Thoothin Eenaam Yesusin Pacchoono*

*Maat 8:14-17; Luq 4:38-41*

<sup>29</sup> Ogo wodanka Yesusbee, Yayqoobbee, Wannisbe bukin raqira utayse Simoonbee Indiriasbesa oonin ke ardade. <sup>30</sup> Simoonsaar baysino bishi occhea hajimoka wodhayse ko dahade. Konin burqadhonamaar saanawa Yesusna ke giyade. <sup>31</sup> Yesusaar kokal theedayse kosa aanin yedayse koam ki dhaasade. Bishin occhayno koam konin garenka galan baxan kena ko yedade.

<sup>32</sup> Hayn wavayse peenin sootenka, eeno hajadhaana eenabee beeronin yedaana eena wulbeam Yesuskal bavate nivan ko yedade. <sup>33</sup> Katamante dohoono eeno wulaar mayante bukayse ko dahade. <sup>34</sup> Yesusaar waana waana hajimoka yedadhon thoothin eenam ki pacchade. Thoothin eendaraar beeronam ki bulade. Beeronaar hay kinin dohonam kenin dhesenna kiam kenin giyoamadettsi ki marade.

*Yesus Galila Peente Kinin Dhettoono*

*Luq 4:42-44*

<sup>35</sup> Yesus peen sedhima seddhiman dhaabhayse eedinin qolmon raqinte yivayse Barjoam ki miskade. <sup>36</sup> Simoonbee kimbesana kinka dahaana eenabe kiam zagate ke yivade. <sup>37</sup> Kiam kenin haapenkaar, “Eeno wul haam zaga ko zage” kina ke hamade.

<sup>38</sup> Yesusaar “Inin nivoono Barjosa upsinam giyota konin dohonna, iginia theedin dahaana gurdanar inin giyoadettsi wo yive” kena ki hamade.

<sup>39</sup> Ayiwd eensa bukin raqintear Barjosa upsinam giyada beeronam eendara bulada Galila peen wulir yaayte ki dahade.

*Lamthinin Yedaa Eam Yesusin Pacchoono*

*Maat 8:1-4; Luq 5:12-16*

<sup>40</sup> Eedi kalaa lamth burqoka\* dahaa Yesuskal hatte kina kumpurdhayse, “Ha nashid-ianna, iam pacchana damaada dame” hamayse kiam ki miskade.

<sup>41</sup> Yesusaar kina burqadhayse yisa aaninam kidar wodayse, “Haam pacchana nashayda nashe, paashaa” kina ki hamade. <sup>42</sup> Saanawa easa lamthin burqono kiam konin garenka ki paashade. <sup>43-44</sup> Yesus eam yinin yittsenka, “Hanin paashonam eedi haynaar hanin giyoamadettsi mete hasaam gishaa. Ko dahaannaar, yivayse hasa bishinam gudulana dhahaa. Eennaar hanin paashoono tarja konin maatoadettsi Museyn giyon Barjona machadhen marshanam imaa” hamayse upsi wocchika kina giyayse saanawa ki kiam yittsade.

<sup>45</sup> Ko dahaannaar kidi kikala utanka een wulna giyan ki yedade. Ogonante Yesus may katamandar ardayse kinin dohoono ko qansimade. Ogona eenin qolmon darante daan ki yedade. Raqin wulraar eeno kalan koda nive.

## 2

*Hajimonka Malgimaa Eam Yesusin Pacchoono*

*Maat 9:1-8; Luq 5:17-26*

<sup>1</sup> Roro likkasa budonte, pir Yesus Qipirnaahoom katamandar maataate ki nivade; ogote oonisa iir ardayse kinin dohoono ko qansimade. <sup>2</sup> Thoothino eeno Yesuskal nivayse ooninam thoothayse mayanin kena tokenka yekka ko bukade; kidiar Barjosa upsinam kena giyte ki dahade. <sup>3</sup> Eedi oydi waani hajimonka malgimaa eedi kalaam

\* <sup>1:40</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa. <sup>1:43-44</sup> Lewi 14:2-7.

haaqaka Yesuskal bavate ke nivade. <sup>4</sup> Eensa thoothamonka dhaabhoono kidar eam arsana kenin bashadhenka, ooninsa illinam kottsayse Yesusin raqa dahaadar eam haaqan kenin bavate nivonka ke arsade. <sup>5</sup> Yesusaar kidar woylamin kenin qajonam shedayse hajimon eana yi giyna: “Inaane, hasa seesono hana gardhidine” ki hamade.

<sup>6</sup> Musesa yigginam dhettsaynasa waani waani eena ogote dooqayse ke dahade. Kediar woylamka qaabayse, <sup>7</sup> “Ea kaa hamin ki yin giye? Barjo maato ki qaabaaw? Eedisa seesoam garana damea Barjo bishkalanka ab hayne?” hamayse ke qaabade.

<sup>8</sup> Saanawaar Yesus woylaminka kenin qaabonam manpasinka yisa dhesayse kena yin ki giyade: “Yesa woylaminka yin harnee qaabe? <sup>9</sup> Hajimonka malgimaa eana, ‘Hasa seesonam hana gardhidine’ hamara, ‘Dhaabhayse haam baadhon haaqanam hanti bavate yivaa’ hamayse giyara hamaane likkaa? <sup>10</sup> Ko dahaannaar i Eedi Naasina peendar eedina seesonam garana hayamo isa konin dohonam yenin dhesoadettsi yeam ko zaske” hamayse hajimonka malgimaa eaka <sup>11</sup> “Inta hana ida giye: Dhaabhayse haam baadhon haaqanam hanka bavate hasa oonindar yivaa” kina ki hamade.

<sup>12</sup> Hajimonka malgimaa ea dhaabhayse saanawa kiam baadhon haaqanam bavate een wulsa birandar ki utade. Ogonante eeno wul targadhayse, “Ko yer yin hamonam ena kala hattear haapootone” hamaate Barjoam ko gobshade.

*Lewi Hambhea Eam Yesusin Eeloono  
Maat 9:9-13; Luq 5:27-32*

<sup>13</sup> Yesus pir bazin apondar ki yivade. Ogotear eeno wul kalan ko nivaysaka koam dhettsan ki yedade. <sup>14</sup> Raqin ogora dhaabhate kinin yivenka, Ilpoos naasa Lewi\* gibirin kinin kacchen raqinte dooqayse ki daaka kiam haapayse, “Isa paanan nivaa” kina ki hamade. Kidiar dhaabhayse kisa paananka ki yivade.

<sup>15</sup> Ogosa budonte Yesus Lewi ooninte kummandar dooqayse ki daaka thoothino eeno kisa paanan nivite konin dohonna, eensaar waani gibirin kacchayna eenabee Musesa yigginam toolima eenabe Yesusbee kisa paanan yivayna eenabekal kummandar ke dooqade. <sup>16</sup> Musesa yigginam dhettsayna Parisa eena gibirin kacchayna eenabee Musesa yigginam toolima eenabesana kinka kinin kummenka Yesusam haapayse, kisa paanan yivayna eenana “Eena cubbona gibirin kacchaynabee igina seeson eenabesana kinka kinin kummenbee wucenbe harrnane?” hamayse keam ke oysade.

<sup>17</sup> Yesus yin kenin giyenam qansayse, “Hajadhaanaam akkimi koda zaske; payyanaam akkimi zaskehe. Inta seeson eena Barjodar kenin maatoadettsi keam eelota i nivade; tipana eenaam eelota nivaatine” kena ki hamade.

*Itsima Qoomadhen Goynsa Oysadhoono  
Maat 9:14-17; Luq 5:33-39*

<sup>18</sup> Shivea Wannissa paanan yivayna eenabee Parisa eenabe itsima keda qoome. Eeno Yesuskal nivayse, “Wannisbee Parisa eenabesa paanan yivayna eena itsima kenin qoomenka, hasa paanan yivayna eena itsima kenin qoomimino harrnane?” kina ke hamade.

<sup>19</sup> Yesusaar kena yin ki giyade: “Uutaa kembesana kinka ki daaka, gaydonna nivaana eenaam itsima qooma keam zaska ko zasko? Uutaa kembete ki daaka itsima keam qooma zaskehe. <sup>20</sup> Ko dahaannaar uutaanin kekalanka edadhayno woda niva ko nive; ogo wodanka ko hanna itsima keda qoome.

<sup>21</sup> “Apala gecchoadar apala haaleam lashea eedi solehe. Yin ki haydianna, apala haalea apala gecchoam yinka hattsate kinin tiyenna, apala gecchoasa haviminoar kalon koda worke. <sup>22</sup> Jambin gecchonsa iinte zia haali shabhea eedi solehe. Shabbad-hidianna ziano hallo jambinam bhattska ko bhattse; zianoar layma ko layme; jambinoar

\* <sup>2:14</sup> Lewi raq abir “Maatoos” kida hambhe.

bhaqayse gemma ko gemme. Ogona zian haalin shabhota jambi haali koda zaske” kena ki hamade.

*Ukunsen Rooroaa Goynsa Oysadhoono  
Maat 12:1-8; Luq 6:1-5*

<sup>23</sup> Ayiwd eensa ukunsen rooroaka Yesus gazgon ushon haaminsa shaarinka kinin yivenka, kisa paanan yivayna eena yivada gazgon tishanam shaaban ke yedade.

<sup>24</sup> Parisa eenaar “Shedaa! Ukunsen rooroaka zaskimon waadimanam hasa paanan yivayna harrna ke waadadhe?” kina ke hamade.

<sup>25</sup> Kidiar “Ena Bitaa Dawt kimbete dahaana eenabesana daaqardhayse kenin gaalen wodanka kinin hayonam kala hattear yedi nabbabeete? <sup>26</sup> Abiyatar gudullasa gebhaa kinin dohon wodanka, Dawt Barjosa gazan ooninsa mayante ardayse gudullakalanka een abinin itsimon Barjosa birante wodadhon balashanam yina itsayse kimbete dohon eenna kinin imonam yedi nabbabeete?” kena ki hamade.

<sup>27</sup> Tapir, “Ukunsen rooroaa eedina ki wodadhade, eedi ukunsen rooroana wodadhadehe. <sup>28</sup> Ogona inta Eedi Naas ukunsen rooroasaar Imbane” kena ki hamade.

### 3

*Aaniysa Woboa Eam Yesusin Pacchoono  
Maat 12:9-14; Luq 6:6-11*

<sup>1</sup> Yesus taar Ayiwd eensa bukin raqinte ki ardade; raqin ogotear aaninsa woboa eedi kala ki dahade. <sup>2</sup> Yesusam bersana zagayse “Ukunsen rooroaka eam paccho ki dew?” hamayse kiam shedite ke dahade. <sup>3</sup> Yesus aaninsa woboa eana “Dhaabhayse eensa shaarinte woyaa” ki hamade. <sup>4</sup> Ogora kena “Musesa yiggino ukunsen rooroaka wo waadadhe konin giyoono payya yermoo? Siya yero? Eediam wonin dhacchoadettsimoo? Deesoadettsine?” hamayse keam ki oysade. Kidiar lay ke hamade. <sup>5</sup> Kesa woylaminin duudonam haapayse kedar yinin dhagadhonka yisa gasambar dohon een wulam aapi siyaka shedayse eana “Antaam hasa pishkaa” ki hamade. Ear yisa antaam ki pishkaysaka, anta ki paashade. <sup>6</sup> Parisa eenaar utayse, “Hamin hayayse wo kiam deeso?” hamayse saanawa Bitaa Herodissa bitamonam nashayna eenabete ke dhalqade.

*Eeno Bazin Aponte Yesuskal Konin Bukoono*

<sup>7</sup> Yesusaar yisa paanan yivaynabete kinka agaa raqaara dhaabhayse Galila bazindar ki yivade; Galila peera thoothino eenoar kisa paanan ko yivade. <sup>8</sup> Gebhi yer kinin waadadhon wulam qansayse thoothino eeno Yiwdabee, Yerusaalembee, Edomiyasbee, Yordaanoos baynsa saabarbera ko nivade; pir Thiroos katamarabee, Sidoona kata-marabee, kesa gasan peerabe thoothino eeno kikal ko nivade. <sup>9</sup> Eeno kattsi konin thoothonna kiam konin kupoamadettsi kisa paanan yivaynana “Bazindara sagadhen gonngalanam ikal thettsayse woysee” ki hamade. <sup>10</sup> Thoothin eenaam burqora kinin pacchonna, hajadhoono eeno wul kiam kaamota kidar koda tuure. <sup>11</sup> Beerona kiam kinin haapenka, kisa birante dhambayse, “Ya Barjo Naasine” hante ke ilatade.

<sup>12</sup> Kidiar hay kinin dohonam kinin giyoamadettsi upsi wocchika keam ki marade.

*Yesusin Tarjamonnante Yittsaynaam Kamoono  
Maat 10:1-4; Luq 6:12-16*

<sup>13</sup> Yesus dhukandar utayse yinin zagaana eenaam yidar ki eelade; kediari kalan ke nivade. <sup>14-15</sup> Kimbesana kinka kinin doadettsibee Barjosa upsinam eenna kinin giyoadettsi keam yittsotabe tabhi lamaana eenaam kamayse beeronam eendara kinin bulea hayamo kena ki imade. Pir “Tarjamonnante Yittsadhaana” hamayse kena naabe

ki wodade. <sup>16</sup> Kinin kamaana tabhi lamaana eena kinane: Simoon naabenam Bhethiroos hamayse ki wodade; <sup>17</sup> Zabdoos naana lamaana Yayqoobbee Wannisbena “Bovanerges” hamayse ki wodade (Bovanerges hambhoono guganatin naana hamintane.); <sup>18</sup> Indiriasbee, Pilboosbee, Bartelemoosbee, Maatoosbee, Toomaasebee, Ilpoos naasa Yayqoobbee, Taadoosbee, peen yinonna bish qaabea Simoonbee, <sup>19</sup> Yesusam dembinna saskate imea Asqoronto peen ea Yiwdabene.

### *Yesusam Beeronasa Hayoaka Kamsadhoono*

*Maat 12:22-32; Luq 11:14-23; 12:10*

<sup>20</sup> Oonintear kinin ardenka, kisa paanan yivaynabete galan itsan kinin bashadhenka yekka pir thoothino eeno kikal ko bukade. <sup>21</sup> Kisa zelen eenaar ogoam qansayse kanka “Bardhidine” hamayse kiam entsanna ke nivade.

<sup>22</sup> Yerusaalemra nivaana Musesa yigginam dhettsayna eena “Bevelzebul\* kidar dahade” pir, “Beeronaam kinin bulayno beeronasa hayoa kantankane” hamayse giyte ke dahade.

<sup>23</sup> Yesus eenaam yikal eelayse kamsika kena yin ki giyade: “Seethaan Seethaanam hamin ki bulana dame? <sup>24</sup> Bit kalaa eena kikala edimayse kinka bit kalaa eed maatayse daana damehe. <sup>25</sup> Oonin kallon eena kinka gemmayse kikala edimidi ke hanna, keeda kinka payyamoka daana damehe. <sup>26</sup> Seethaanaar kinka kiam jibbayse edimidi ki hanna, dhamba ki dhambe; woyana damehe.

<sup>27</sup> “Ogodettsi birayse kantanka dahaa eam yedate dhaxima ooninte kisa ardayse koymonam buurana eedi hayyear damehe. Ogona kantanka dahaa eam yedate yinin dhaxonsa budonte, kida kisa ooninam buure.

<sup>28</sup> “Inta yena gon ida giye: Eensa seesonbee iirimen wulbeam kena gardha ko gardhe. <sup>29</sup> Ko dahaannaar Manpas Gazanam iirea ea rooro wul lay seesonsa baza kidar daane; hamin ko dahaannaar kisa seesonam kina gardhehe” ki hamade. <sup>30</sup> Yesus yin kinin giyoono “Beero kidar daane” kenin hamonnane.

### *Yesussa Indanbee Indanaanabe*

*Maat 12:46-50; Luq 8:19-21*

<sup>31</sup> Yesussa indanbee kisa indanaanabe kikal ke nivade; kediay mayante woyayse eedi kidar yittsayse kiam ke elsade. <sup>32</sup> Yesuskal dooqoono thoothino eeno kina “Shedaa! Handabee handanaanabe mayante woyayse haam keda zage” ke hamade.

<sup>33</sup> Yesusaar maasayse “Inda kodi hayne? Indanaana kedi haybene?” kena ki hamade.

<sup>34</sup> Kalan dooqon eenaam shedayse, “Marrato! Indabee indanaanabe kinane. <sup>35</sup> Barjosa bhocchinam ee hamayse waadadhayna wul isa indabee indanaanabe kedi iginane” hamayse kena ki maasade.

## 4

### *Yiithadhon Bheetansa Kamsino*

*Maat 13:1-9; Luq 8:4-8*

<sup>1</sup> Yesus pir bazinsa aponte eenaam dhettisan ki yedade. Kattsi thoothino eeno kikal nivayse konin bukonna, bazindara sagadhen gonngalansa iiinte ardayse ki dooqade. Eeno wul bazinsa gasante ko dahade. <sup>2</sup> Kamsikaar thoothi yer keam dhettsite ki dahade. Keam yinin dhettsenkaar kena yin ki giyade: <sup>3-4</sup> “Marrato! Eedi kalaa haaminte yisa bheeta yiithota ki utade. Bheetan kinin yiithenka, bheetano waani goyn aponte ko wavaysaka aptina nivayse ke itsade. <sup>5</sup> Waani bheetanoar thoothi peenin qolmon haachandar ko wavade. Pee thoothinin qolmonna saanawa ko baqalade. <sup>6</sup> Haynin utayse oydhenkaar, ko halatade; caaciyn yittsaamonna ko wocchade. <sup>7</sup> Waani

\* <sup>3:22</sup> “Bevelzebul” hamen upsinam Haalin Mallan mathaapinsa macchinte thaapadhaanar shedaa.

bheetanoar ukumbhansa shaarinte ko wavade. Ukumbhanoar gebhayse baqalon bheetanam konin ishkonna, aapi ushima ko shidhade. <sup>8</sup> Waani bheetano peen payyandar ko wavade. Gebhaysear aapi ko ushade; waa kisa aapi eedi kalaa kaysa apo tabhi, waa kisa pir aapi eedi makkam kaysa, waa kisa pir aapi eedi dong kaysa ke ushade.

<sup>9</sup> “Keeda qansen qaamiya daahaa ki qanse” kena ki hamade.

*Yesus Kamsinka Kinin Giyonsa Goyno  
Maat 13:10-17; Luq 8:9-10*

<sup>10</sup> Yesus yimal ki daaka, kalan theedaana eenabee kisa paanan yivayna tabhi lamaana eenabe kinka dahayse kena kinin giyon kamsin goynsa kiam ke oysade. <sup>11</sup> Yesusaar, “Yena Barjo bitamonsa aachin dhalqinam yenin dhesoadettsi imbhidine; waani eenna ko hanna,

<sup>12</sup> ‘Sheda ke shede, kenin shedonam kenin haapoamadettsi, qansa ke qanse, kenin qansonam kenin bhocchoamadettsi, Barjodar kenin maatoamadettsi, kesa seesonoar kena ko shidhe konin hambhoamadettsi’ yer wulam kena kamsika koda giidhe” kena ki hamade.

*Yiithadhon Bheetansa Kamsin Bulino  
Maat 13:18-23; Luq 8:11-15*

<sup>13</sup> Yesusaar kena yin ki giyade: “Kamsin ogoam dhesattenu? Ta yin ko hanna, yedi keeda kamsin wulam hamin hayaysee dheso? <sup>14</sup> Bheetan yiitheagaa Barjosa upsinam kida yiithe. <sup>15</sup> Upsinoar yiithadhoono goyn aponte wovoono konone: Barjosa upsinam kenin qansen wodanka Seethaan saana nivayse kesa woyleminte yiithadhon Barjosa upsinam kekalanka kida tiye. <sup>16</sup> Tapir peen haachandar yiithadhaana bheetana Barjosa upsinam qansayse saanawa wozanka tiyayna eenane. <sup>17</sup> Eena igma caaci kenin yittsaamona, kesa woyano likka wodanane; Barjosa upsinna gaale way oytaydha kedar konin yeskenka saanawa keda gare. <sup>18</sup> Ukumbhansa shaarinte yiithadhaana bheetana igma Barjosa upsinam qansayna eenane. <sup>19</sup> Peen kosa bhocchinbee, wodimmakkon anngarmanbee, thoothi versya anngarmanbeka Barjosa upsinna kenin qansoona kesa woyleminte sun ishkimeyse aapi ushima koda shidhe. <sup>20</sup> Peen payyandar wavaana bheetana Barjosa upsinam qansayse bhocchika tiyayna eena, antina eedi kalaa kaysa apo tabhi, waaniar eedi makkam kaysa, waaniar eedi dong kaysa aapi ushayna eenane” ki hamade.

*Aachimoono Shaakano  
Luq 8:16-18*

<sup>21</sup> Yesus kena yin ki giyade: “Shaakanam shashkayse yer daran guupa ko guupadho? Way algan demente ko wodadho? Dheg hamon raqindartayu konin wodadhadayo?

<sup>22</sup> Ogona aachimayse may maatima, aachadhaysakaar dhesimima shidhehe. <sup>23</sup> Ta keeda qansen qaamiya daahaa ki qanse” ki hamade.

<sup>24</sup> Pir Yesus kena yin ki giyade: “Yenin qansen yerinam payya hayayse edee. Yenin kahaa shaaqaka yenaar kaadha ko kaadhe; ogoraar sagi yena kaadha ko kaadhe. <sup>25</sup> Yisa dhaana kisa dohondar kina imbha ko imbhe; yisa qolmakalanka kisa dohonam kikala tiidha ko tiidhe” kena ki hamade.

*Gebhen Bheetansa Kamsino*

<sup>26</sup> Yesus yin ki giyade: “Barjosa bitamono eedi bheeta yiitheadettsine. <sup>27</sup> Ea sootinka raata ki raate; rooronka dhaabha ki dhaabhe; hamin konin dohonam ki dhesima bheetano koda baqale; gebhanaar koda gebhe. <sup>28</sup> Peeno yinti birayse baqalin koda baqalse; baqalloar gebhayse pudha ko pudhe; yinin pudhonsa budonte aapi koda wode.

<sup>29</sup> Aapinin ushonsa budobar patadhen wodanin yeskonna, ea saanawa halpan tiyate patan kida yede” ki hamade.

*Saliithan Aapinsa Kamsino  
Maat 13:31-32bee 34be; Luq 13:18-19*

<sup>30</sup> Yesus yin ki giyade: “Barjosa bitamonam yer harka wo yeekinso? Way yer harka wo koam kamso? <sup>31</sup> Saliithasa\* aapidettsine; kodiar peendar koam yiithadhen wodanka peendar dahaana bheetana wuldara likkane. <sup>32</sup> Peendar konin yiithadhon wodanka baqalayse konin gebhenka, peendar dahaana haaqana wuldara gebhate koda bashe; aptinaar nivayse kosa shiponsa iinte antindar ooni kenin woysoadettsi kattsi antino koda gebhe” ki hamade.

<sup>33</sup> Yesusaar zarsinin bhocchana dameaka yekka kinadettsina thoothina kamsinaka Barjosa upsinam kena kida giye. <sup>34</sup> Kamsi qolma kena giyehe; ko dahaannaar kimbesana yimal kenin dehenka, kamsinasa bulin goyn wulam yisa paanan yivayna eenana kida giye.

*Bazinam Shooshen Wuranam Yesusin Woysoono  
Maat 8:23-27; Luq 8:22-25*

<sup>35</sup> Rooroa agaaka peen sootima shaakinan Yesus yisa paanan yivaynana “Bazinsa saabar wo sage” kena ki hamade. <sup>36</sup> Kisa paanan yivayna eenaar thoothin zarsin garayse Yesusin gidir dohon bazindara sagadhen gonngalandar dooqayse yinka kiam tiyate ke yivade; waaniar gonngalana bazindar kimbесана kinka ke dahade. <sup>37</sup> Gembho wurano dhaabhayse noqono gonngalanka konin thoothenka yekka wurano bazindar dohon gonngalanam koda juge. <sup>38</sup> Ogo wodanka Yesus bazindara sagadhen gonngalansa budonte qoocante yisa yer wodayse raatayse ki dahade. Kisa paanan yivayna kiam dhaasayse, “Woam Dhettsea, wonin kayenka ya lay ha hamo?” kina ke hamade.

<sup>39</sup> Kidiar dhaabhayse wuranam ki bitade; bazinkaar “Lay! Shoan garaa!” ki hamade. Wuranoar jibarshan ko garade; bazinoar kalon lay ko hamade. <sup>40</sup> Yesusaar “Yin yenin kurtumbhayno hare? Kinaka yekka idar woylem yenin qajea yesa qolaaw?” kena ki hamade.

<sup>41</sup> Kediar kattsi kurtumbhayse, “Wuranbee bazine yininna ee hamea kaa kidi hayne?” kinka kikal ke hamade.

## 5

*Beeronin Yedaa Eam Yesusin Pacchoono  
Maat 8:28-34; Luq 8:26-39*

<sup>1</sup> Kediar bazinsa saabar Gerasenon peendar ke nivade. <sup>2</sup> Yesus bazindara sagadhen gonngalara kinin utenka, eedi beeroyn yedaa duukin raqira utayse daran ki keerade.

<sup>3</sup> Ea agaasa dayntano duukin raqintene; eedi hayyear yedate kiam sansalaka dhaxana damehe. <sup>4</sup> Thoothi rooro roonte dhaxadhen sansalanbee zawnbeka kiam koda dhaxadhe. Ko dahaannaar sansalanbee roon zawnbeam qunthate kida dhabe; ogonante kiam yedana damea eedi qolehe. <sup>5</sup> Roro wul sootinbee rooronbe duukin raqintebbe dhukanbedar dahayse kida ilate, yisa bishinamaar seeninka kida taxe.

<sup>6</sup> Kidiar Yesusam pegeka haapayse, gobaka kalan hatte kumpurdhayse kina ki goodimade. <sup>7</sup> Upsin yisa dhevayayse ilataate “Wuldara sagea Barjosa Naasa Yesuso, hambesana isa dohoono hare? Iam haning galshoamadettsi Barjosa naabenka inta haam maridine” ki hamade. <sup>8</sup> Yin kinin giyoono Yesus “Ya beeroa, ea kaara utaa!” kanka hamite kinin dohonnane.

---

\* <sup>4:31</sup> “Saliitha” hambayno gaalin aponka “senafic” hamayse thaapadhoonone. Aapino kosa kattsi likkinca dahayse, duuqadhanne kattsi haaqa gaaridettsi konin gebhenna, ogono hattono Banen peente konin qolmonna, kamsina saliitha aapiam ko tiidhade.

<sup>9</sup> Yesusaar “Hasa nammo hayne?” hamayse kiam ki oysade. Kidiar “Thoothi wonin dohonna isa nammo Legoonne\*” hamayse kina ki guyade. <sup>10</sup> Keam ko peera oytate kinin yitsoamadettsi kiam kattsi ki miskade.

<sup>11</sup> Raqin ogote laasadars thoothi warkupa gishadhyana kenin dohonna, <sup>12</sup> beerona “Warkupana iginadar wonin ardoadettsi woam yittsaa” hamayse kiam ke miskade. <sup>13</sup> Yesusaar “Yedi yivee” kena ki hamade; beeronaar eadara utayse warkupanadar yivayse ke ardade. Shii lamaaddhana warkupanaar bazinsa aponte dahayse laasandara diirimayse bazinte ke itsadhade.

<sup>14</sup> Warkupanaam gishayna eenaar gobate yivayse ogo yinin haaponam katamanbee gurdan eenbena kenin giyenka, eenoar har konin dohon shedota ko utade. <sup>15</sup> Yesuskal kenin nivenka, Legoon hambhea beeronin yedaa easa gemmon mesken paashaysaka apala qaadhayse dooqayse ki daaka kiam haapayse ke kurtumbhade. <sup>16</sup> Ogoam haapaana eenaar beeronin yedaa ea goynbee warkupanadar yeskonbeam eenna ke guyade. <sup>17</sup> Eenoar Yesuska “Wosa peera utaa” hamayse kiam miskan ko yedade.

<sup>18</sup> Yesus bazindara sagadhen gonngalante kinin ardenka, beeronin yedaa ea “Hambe-sana doota i yive” hamayse kiam ki miskade. <sup>19</sup> Ko dahaannaar Yesus kina ee hamadehe. “Oonin hannondar yivayse Barjo hamin dohon gebhi yer hana kinin waadadhonbee hamin hayayse haam kinin pacchonbeam hasa oonin eenana giyaa” kina ki hamade.

<sup>20</sup> Ear yivayse Yesus hamin dohon gebhi yer kina kinin waadadhonam Tabhi Kata-mana hambhen peente giyan ki yedade; kinin giyenka qansoono eeno wul targadhi-dine.

### *Yayroos Naanbee Yesussa Apalan Kaamon Edonbe*

*Maat 9:18-26; Luq 8:40-56*

<sup>21</sup> Yesusaar lansi bazindara sagadhen gonngalante dooqayse bazinsa saabar kinin sagonsa budonte, thoothi eedi kikal nivayse ko bukade; kidiar bazinsa aponte ki dahade. <sup>22</sup> Ayiwd eensa bukin raqinam wottsayna eenasa eedi kalaa Yayroos hamb-hea Yesuskal ki nivade. Yesusam kinin haapenkaar kisa roon demente dhambayse, <sup>23</sup> “Naano isa likkono hajadhyse diyaba koda haye. Bannzo! Paashayse sadaka konin doadettsi nivayse hasa aaninam kosa bishindar wodaa” hamayse kattsi kiam ki miskade.

<sup>24</sup> Yesusaar eabete kinka ki yivade; thoothino eenoar Yesussa paanan kupimaate koda yive.

<sup>25</sup> Layme hajimoka leve tabhi lamaa hajadhyse kappoono maa kallo ko dahade. <sup>26</sup> Kodiar thoothin dheeshan imayna eenasa aaninte gaalite ko dahade; dheeshanna yisa dohon koymen wulam imate konin macchonsa budonte, burqono waandar kosa gebhaate ko yivade, kodi paashadehe. <sup>27-28</sup> Kodiar Yesussa eenin giyen qansayse, “Apalan kisa hattear kaamidi i hanna, inta paashayda paashe” hamayse thoothin eensa shaarinka kisa budobar nivayse apalanam ko kaamade.

<sup>29</sup> Laymayno zombhino kosa saanawa ko woyade; yisa burqora konin paashoono waante kona dhesimidine. <sup>30</sup> Yesusaar pacchen kantan yikala utonam saanawa dhesayse eensa shaarinte wal hamayse, “Isa apalanam kaamaa hayne?” hamayse ki oysade.

<sup>31</sup> Kisa paanan yivayna eenaar “Thoothino eeno kupimite konin yivenam ya haapayse, ‘Iam kaamaa hayne?’ hamaysea oyso?” kina ke hamade.

<sup>32</sup> Ogoam hayaa hay kinin dohon dhesota budoka wal ki hamade. <sup>33</sup> Edonoar yinin paashonam konin dhesenna kurtumbheka gibazaate hatte, Yesussa demente dhambayse, yidar yeskon wulsa goninam kina ko guyade. <sup>34</sup> Kidiar “Isa naano, idar

\* 5:9 “Legoon” hamen upsinam Haalin Mallan mathaapinsa macchinte thaapadhaanar shedaa.

woylamin hanin qajoono haam ko pacchade. Nagaya yivaa; hasa gaaleraar ukunsa” kona ki hamade.

<sup>35</sup> Kidiar ogoam giyte ki daaka, Ayiwd eensa bukin raqinam wottsea Yayroos oonira eedi nivayse, “Hasa naano diydine; ta keeda Dhettseam harrnaa galshe?” kina ke hamade.

<sup>36</sup> Yesusaar eenin kina giyonam qansayse bukin raqinam wottseana, “Kurtumb-haabhode! Idar bish woylem qajaa” kina ki hamade. <sup>37</sup> Bhethiroosbee, Yayqoobbee, Yayqoobsa kana Wannisbedara ab eedi hayyear kisa paananka easa oonindar ke yive zagadehe. <sup>38</sup> Bukin raqinam wottsea easa ooninte kenin nivenka, Yesus eeno ilatayse konin waajenbee eepenbeam ki haapade. <sup>39</sup> Oonintear ardayse, “Harrnee ilatayse eepe? Naano raata ko raatade, diyadehe” kena ki hamade.

<sup>40</sup> Eenoar kiam ko hancade. Yesusaar een wulam mayanka bulayse naansa imbaabee, indanbee, kimbesana kinka dahaana eenabeam yikal entsayse naanin raqin dohonte ki ardade. <sup>41</sup> Naansa aanin yedayse, “Thaalitaa quumi!” kona ki hamade; ogosa bulino “Naano, ya dhaabhaa! hanka ida hame” hamintane.

<sup>42</sup> Naanoar saanawa dhaabhate woyayse osbee orabe yaayan ko yedade. Kodiar tabhi lamaa leve naasine. Eenoar gebhi ko targadhade. <sup>43</sup> Yesus yinin waadadhonam eedi hayyear dhesoamadettsi upsi wocchika kena giyayse, “Gala kona imee” kena ki hamade.

## 6

### *Naazret Katamante Yesusin Bagadhoono*

*Maat 13:53-58; Luq 4:16-30*

<sup>1</sup> Yesus raqin ogora dhaabhaye yinin gebhon peendar ki yivade; kisa paanan yivayna eenaar kimbesana kinka ke yivade. <sup>2</sup> Ukunsen rooroaka Ayiwd eensa bukin raqinte eenam dhettsan ki yedade. Thoothino eenoar kisa dhalqinam qansayse gebhi ko targadhade. “Ea kaa yerin ko wulam hamora ki haapaa? Kina imbhoono pakalmakkono yer hare? Ogo yin tarshen yerinam kinin hayayno hamin dahaa goytikane? <sup>3</sup> Kaa haaqan qarsea Mayriyamsa naasatayu? Yayqoobbee, Yoosabee,\* Yiwdaabe, Simoonbesa indanaasatayu? Kisa indanaana anzana wombesana kinka kote dahaanatayu?” hamayse kisa dhalqinam bagayse eeno tiyma ko garade.

<sup>4</sup> Yesusaar “Barjokala qansayse eenna giyea kinin gobshadhimino peen een yinnabee, muldhana yinnabee, oonin eena yinnabekal bishne” kena ki hamade.

<sup>5</sup> Raqin ogote hajadhaana eena tokaana eenadar kidi aanin wodayse keam yinin pacchondara tarshea yer ab waadadhana damadehe. <sup>6</sup> Kinin giyenam gonni hamayse kinin tiyaamonna kidi targadhidine. Ogosa budonte, Yesus kesa gurdan gurdante yaayte Barjosa upsin eenna kida dhettse.

### *Yesus Yisa Paanan Yivayna Eenaam Kinin Yittsoono*

*Maat 10:5-15; Luq 9:1-6*

<sup>7</sup> Yesus tabhi lamaana yisa paanan yivayna eenaam yikal eelayse, lama lamaa hayayse eendar keam yinin yittsenka, beeronaam eendara kenin bulea hayamo kena imayse, <sup>8</sup> “Yenin yivenka yenka haljo bish tiymate. Yer ab, gala ko hannaar, surba ko hannaar, korbhoka koymo yenka beveebhode. <sup>9</sup> Roonte yesa dunngurin arsee; shuraab lanso qaadheebhode. <sup>10</sup> Raqin hamotear eenkal yenin ardenka, birayse yeam chocchamon tiyaa ea ooninte arda ye hanna, raqin ogora yenin utenka yekka ogote dooqee. <sup>11</sup> Eennin yeam chocchamon tiyomonbee yekal konin qansimonbe raqin ye hanna, ogora yenin utenka kedar tarja konin maatoadettsi yesa roondar dohon silalinam dinsee” hamayse kena ki giyade.

\* <sup>6:3</sup> Raqa kaate “Yoosa” hameea naabea Maat 13:55dar “Yoseep” koda hame.

<sup>12</sup> Kediar ogo raqira utayse eeno seeson waadimanam garayse Barjodar konin maa-toadettsi eenna ke guyade. <sup>13</sup> Thoothi beeronin yedaana eenadara beeronam ke bulade; thoothi hajadhaana eenaamaar waqatika qadhada keam ke pacchade.

*Shivea Wannissa Dembhino*  
*Maat 14:1-12; Luq 9:7-9*

<sup>14</sup> Yesussa naabeno raq wulir konin qansimonna, Bitaa Herodisaar qansidine. Waani waani eeno “Shivea Wannis diira dhaabhidine; ko wul tarshen waadiman wulam waadadhana kantan kinin haapono ogokane” ke hamade.

<sup>15</sup> Waani eenoar “Eeliasne” ko hamade; waani eenoar “Ena Barjokala qansayse eenna giyayna eenasa iira eedi kalaadettsine” ko hamade.

<sup>16</sup> Bitaa Herodisaar ogoam qansayse, “Agaa qorcin ininsa taskaa Wannisne; kidi diira dhaabhidine” ki hamade. <sup>17-18</sup> Herodis iishima Pilhoos geshon Herodiyadaam kinin keemonna, Wannis “Hambanaasa geshonam keema haam zaskehe” hamayse birayse kina giyte ki dahade. Ogona Herodis Herodiyada goynka kiam yettsate dhaxin ooninte ki dhaskade.

<sup>19</sup> Ogona Herodiyada Wannisdar guula wodayse kiam dettsana konin zagenka kona agadehe. <sup>20</sup> Herodis Wannis tipabee gazabe eedi kinin dohonam kinin dhesonna, kina kurtumbhintaka kiam deesadhoamadettsi kida gishe. Kisa dhalqinamaar qansite thoothi qaabite kida gaale. Ko dahaannaar kisa dhalqinam wozaka kida qanse.

<sup>21</sup> Bitaa Herodisin adhadhaa rooroayn gobshadhea sedhaaka, peen wottsayna eenabee, shii alaqanabee, Galila peente dhaanaa dhesimaana eenabena kumma ki ashkade; ogono wodano Herodiyadana agoonone. <sup>22</sup> Herodiyadasa naano kummandar dooqaana eenakal ardayse kesa birante yiigaate konin kirbenka, Bitaa Herodisbee kimbesana kinka dooqaana eenabeam ko wozisade. Bitaa Herodisaar naanna, “Iam hanin oyson yerinam hana imayda ime” ki hamade. <sup>23</sup> “Bitamon innonsa antin ko hannaar, ikal hanin misken wulam hana imayda ime” hamayse kona malla ki ardade.

<sup>24</sup> Naanoar mayan utayse indankal “Hariy kalan misko?” ko hamade. Indanoar “Shivea Wannissa metenam taxate ina imaa’ hamayse miskaa” ko hamade.

<sup>25</sup> Naanoar saanawa bitaakal ardayse, “Shivea Wannissa metenam taxate sharqaka taaki saana ina hanin imoadettsi ida zage” hamayse ko kiam oysade.

<sup>26</sup> Bitaar qaabenka kattsi yi ataakaar, kimbesana kinka kummandar dooqaana eenasa birante malla kona kinin ardonna, konin miskonam koam marota nashadehe.

<sup>27</sup> Saanawa Bitaa Herodis poolisanasa kalaam Wannissa metenam taxate kinin bovoadettsi ki yittsade. Poolisaar dhaxin oonin yivayse Wannissa metenam ki taxade. <sup>28</sup> Kisa metea kinin taxaam sharqaka bavate hatte, naanna ki imade; naanoar indanna ko imade. <sup>29</sup> Wannissa paanan yivayna eenaar kisa dembhinam kenin qanson wodanka, nivayse kisa leesinam tiyate ke duukade.

*Yesus Shii Dong Eenaam Kinin Kunsoono*  
*Maat 14:13-21; Luq 9:10-17; Wannis 6:1-14*

<sup>30</sup> Yesus yisa tarjamonnante kinin yittsaana eenaar Yesuskal nivate bukayse, kinin waadadhonbee eenaam kenin dhettonbe wulam kina ke guyade. <sup>31</sup> Kidiar “Yedi yemal eediyn qolmon raqinte nivayse likka ukunsee” kena ki hamade. Yin kinin giyoono kekal nivayse maatayno eeno thoothi konin dohonna gala kummana wodayn kesa qolmonnane. <sup>32</sup> Bazindara sagadhen gonngalante ardayse raq eedinin qolma kalaate yimal bish ke yivade.

<sup>33</sup> Kenin yivenka thoothino eeno keam haapayse konin dhesonna, kataman wulra dhaabhaye gobada saanawa keam birayse kekal ko bukade. <sup>34</sup> Yesusaar bazindara sagadhen gonngalara utayse thoothin eenam haapayse, gishea eediya qolmina yaanadettsi konin dohonna, kona ki burqadhade; thoothi yerar koam dhettsan ki yedade. <sup>35</sup> Ogo wodanka peenin ibanonса budonte, kisa paanan yivayna eena kikal

nivayse, "Kono ranqo eedinin gidir qolminone; ta peenoar ibanidine. <sup>36</sup> Ogonante igina wosa gasante dahaana gurdanadar yivayse gala kenin shanoadettsi keam yittsaa" kina ke hamade.

<sup>37</sup> Kidi kena maasayse "Yedi kenin itsen galan kena imee" ki hamade. Kediar "Yivayse birre mato lamaaka<sup>†</sup> gala shanayse kenin itsoadettsi kena wo imo?" kina ke hamade.

<sup>38</sup> Kidiar "Balasha meemayne yekal dahaana? Yivayse shedee" kena ki hamade. Kediar shedayse maataate hatte, "Balasha dongbee kaara lamaabene dahaana" kina ke hamade.

<sup>39</sup> Yesusaar yisa paanan yivaynana "Een wulam shudhin caagindar kashate kashate dottsee" kena ki hamade. <sup>40</sup> Eeno eedi dong kaysabee eedi lamaa kaysa apo tabhibe maatayse ko dooqade. <sup>41</sup> Yesusaar balashana dongnabee kaarana lamaanabeam tiyayse, tura cecin shedayse Barjoam miskeka ki gobshade. Balashanamaar qun-thayse yisa paanan yivayna eenana eenna kenin yeskisoadettsi ki imade; taar kaarana lamaanaam een wulna ki kashade. <sup>42</sup> Eeno wulaar itsayse ko mishade. <sup>43</sup> Kisa paanan yivayna balashanbee kaaranbesa itsadhaka shidhon dirmanam kenin dhaasoono sharqa tabhi lamaane. <sup>44</sup> Ogo balashanam itsaana eena anngina bish paydadhana shii dongne.

### *Yesus Bazindar Rooka Tigate Kinin Nivoono*

*Maat 14:22-27; Wannis 6:16-21*

<sup>45</sup> Ogora saanawa Yesus yisa paanan yivayna eenana "Inta eenam onnadur inin yittsenka, yedi bazindara sagadhen gonngalanka bazira sus Beetesayda katamandar iam birayse sagee" ki hamade. <sup>46</sup> Eenam yinin yittsonsa budobar Barjo misko dhukandar ki utade. <sup>47</sup> Peenin sootenka, bazindara sagadhadyno gonngalano bazinsa gidinte ko dahade. Yesus kembesana gonngalante ardadehe; yimal peente ki dahade. <sup>48</sup> Kisa paanan yivayna eenaar bazindara sagadhen gonngalanka kenin yivenka, jibarro kesa birante dahayse keam yittsan konin maronna, kenin gaalenam ki haapade. Sootin peenin sedhamba hamenka, Yesus bazindar rooka tigate kekal nivite ki dahade; kesaar demeka yivota ki zagade. <sup>49</sup> Ko dahaannaar bazindar rooka tigate kekal kinin nivenka kiam haapayse meeshi wo haapade hamayse ke ilatade. <sup>50</sup> Kedi wul kiam kinin haapenka kattsi targadhayse ke gibazade. Kidiar saanawa "Hay! Intane; kurtumb-heebhode" kena ki hamade. <sup>51</sup> Kidiar bazindara sagadhen gonngalante kekal ki ardade. Ogo wodanka wurano jibarshan ko garade; kediar gebhi ke targadhade. <sup>52</sup> Ogonoar woylamin kesa duudonna, Yesus balashan keam kinin kunsenka tarshen waadimanam kinin waadadhonam kedi bhocchadehe.

### *Gensareth Peente Hajadhon Eenaam Yesusin Pacchoono*

*Maat 14:34-36*

<sup>53</sup> Yesusbbee kisa paanan yivayna eenabe bazinam sagayse Gensareth peendar ke yi-vade; bazindara sagadhen gonngalanamaar bazinsa gasante ke dhaxade. <sup>54</sup> Bazindara sagadhen gonngalara kenin utenka, eeno saanawa Yesus kinin dohonam ko dhesade.

<sup>55</sup> Eenoar peen ogo wuldar gobaka yivayse Yesusin dohon raqindar hajadhaana eenam haaqaka bavate kikal nivan ko yedade. <sup>56</sup> Kinin yiven raqin wul gidir gurdante ko hannaar, katamante ko hannaar, hajadhaana eenam bukin raqindar bavate nivayse koda wode. Kediar Yesusna "Hasa apalansa nukin hattear wo kaame" hamayse kiam keda miske. Kisa apalansa nukinam kaamaana eena wul hajimora paashite ke dahade.

### *Ena Eykena Dambinsa Yesusam Oysadhoono*

*Maat 15:1-9*

<sup>†</sup> 6:37 Wodan ogoka eedi kalaana rooro kalaa waadimana kashadhadyno birre kalaane.

<sup>1</sup> Yerusaalem katamara Parisa eenabee Musesa yigginam dhettsayna eenasa waanibe Yesuskal nivayse ke bukade. <sup>2</sup> Kisa paanan yivayna eenasa waani waani eena aaninsa dakanka galan kenin itsenka ke haapade. “Aaninsa dakanka” hambhoono goyno kosa aanin shiidhima kenin itsennane ko hambhade.

<sup>3</sup> Parisa eenabee Ayiwed eenabe wul ena eykena dambinam toolana yisa aaninam payya shiidhima gala itsehe. <sup>4</sup> Kedi gabara yi maatanna shiidhima gala itsehe; pir yinin wucen sharqanbee, daanbee, galan yinin itsen sharqanbeam, [yinin wodhen algan raqinamaar] kenin shivendettsi, abaar dambi hayayse toolana kenin buloono yer thoothine dohoono.

<sup>5</sup> Parisa eenabee Musesa yigginam dhettsayna eenabe “Hasa paanan yivayna eena eykena dambinam kenin toolimino harrnane? Yisa aaninam shiidhima galan keda itse” hamayse kiam ke oysade.

<sup>6</sup> Kidi kena yin ki giyade: “Ena Barjokala qansayse eenna giyea Isias Barjoyn giyonam, ‘Kina eena yisa aponka bish iam keda gobshe, woyleammo kesa ikalanka kattsi pegadhidine.

<sup>7</sup> Enen bulon dambinam Barjoyn imaa yiggidettsi hayayse eenaam dhettsaate sun guuri ina keda goodime’ hamayse ye kina maltina eena goynam gon ki giyade. <sup>8</sup> Yedi Barjoyn giyonam garayse eenin bulon dambinam yeda toole” ki hamade.

<sup>9</sup> Tapir kena yin ki giyade: “Yennon dambinam toolota Barjoyn giyonam bagayse ye garade. <sup>10</sup> Muse yi giyna: ‘Hambabee handabean gobshaa’ pir, ‘Imbaabee indanbeam iirea ki deesadhe’ ki hamade. <sup>11</sup> Yedi eedi imbabee indabena yinin kelshen yer wulam kena ‘Yeam inin kelshen yerin wulam inta Barjona iminto hayayse ida ime’ ki hamanna, <sup>12</sup> os birante imbaabee indanbeam yer harka ko hannaar kinin kelshoamadettsi yeda mare. <sup>13</sup> Ogonante yedi yesa dambinam toolota Barjoyn giyonam yeda gare; ogodettsiar thoothi yer yeda waadadhe” hamayse kena ki giyade.

### *Eediam Minngisayno Yerro*

#### *Maat 15:10-20*

<sup>14</sup> Pir Yesus eenaam yikal eelayse, “Yedi wul inin giyenam qansee, ogoam payya hayayse bhocchee. <sup>15</sup> Eediam minngisayno eessa iira utaynone; mayara iinte arden yerinsa kala hattear eediam minngisea qolehe. <sup>16</sup> [Qansen qaamiysa dahaa ki qanse]” kena ki hamade.

<sup>17</sup> Eenkalaar edimayse ooninte kinin ardonsa budonte, kisa paanan yivayna eena kamsinsa goynam kalan ke oysade. <sup>18</sup> Kidiar, “Yedi taar ogo een waanidettsi qaabeysa qolminaw? Mayara eedisa iir ardayno eediam hamin ko dahaannaar minngisana konin damimonam yedi dheseete? <sup>19</sup> Harrna hambhidiana, iinte ardayse woyleminte yeskima os mayanka konin utennane” kena ki hamade. Yesus ogo yin kinin giyoono galano wul payya konin dohonam ki giyade.

<sup>20</sup> Kidiar “Eediam minngisayno eedisa woylemra utayno yerrone. <sup>21</sup> Eedisa woylemra utayno siya qaabobee, sharmucimakkobee, dimmakkobee, eediam deesintabee, <sup>22</sup> anngarmabbee, seeso waadimabbee, maltamobee, tagachbee, woogintabee, wuupobee, pormakkobee, boosamobene. <sup>23</sup> Igina siyana yerra wul eedisa woylemra keda ute, eediamhaar keda minngise” kena ki hamade.

### *Yesusdar Woylemin Qajoono Maa Kallo*

#### *Maat 15:21-28*

<sup>24</sup> Yesus raqin ogora dhaabhayse Thiroos katamansa gasante dohon gurdandar ki yivade. Ogote ooninte ardayse kinin dohonam eedinin dhesoadettsi zagadehe, ko dahaannaar aadhimanada madehe. <sup>25</sup> Ogoraar naan likkon yisa beeronka yedadhoono edono Yesussa qansayse saanawa hatte kisa roon demente ko dhambade. <sup>26</sup> Edonsa

apono Girik apone, adhadhinoar kosa Siropiniqa muldharaane. Naan konnondara beeronam kinin buloadettsi kiam ko miskade.<sup>27</sup> Kidi yi giyna: “Birayse naana ke mishe; naanasa galanam tiyayse qaskinana dhaba zaskehe” kona ki hamade.

<sup>28</sup> Kodiar kina maasayse “Gonne, Imbo! Ko daahaannaar naananin itsenka diinenam demente dahayse qaskina kamate itsa ke itse” ko hamade.

<sup>29</sup> Yesusaar “Ogo yin hanin giyonna,beerono hasa naandara utidine. Hasa oonindar yivaa” kona ki hamade.

<sup>30</sup> Edonoar yisa oonindar ko yivade; oonin konin yeskenka, naandara beeron utaysaka naano algadar raatayse ko daaka koam ko haapade.

### *Yesus Qaaminbee Aponbeyn Kayaa Eam Kinin Pacchoono*

<sup>31</sup> Yesus pir Thiroos katamara Sidoona katamanbar sagayse Tabhi Katamana hambhen peensa shaarinka Galila bazindar ki yivade. <sup>32</sup> Ogotear daahaana eena qaaminbee aponbeyn kayaa eedi kalaam Yesuskal entsate ke nivade. Kedi aanin yisaam kidar wodayse kinin pacchoadettsi kiam ke miskade. <sup>33</sup> Yesus eensa iira kiam edayse raq ab qalte yisa aanin surkenam kisa qaaminte ki arsade. Ogoraar pathimayse kisa atabhinam ki kaamade. <sup>34</sup> Tura cecin shedaate woopayse, “Eppitaa!” ki hamade. Ogonoar “Bulimaa!” hamintane.

<sup>35</sup> Qammoar kisa saanawa ko qansade, kisa atambho dhalqiminoar payya dhalqan ko yedade. <sup>36</sup> Yesus “Eedina giyeebhode” hamayse eenana ki giyade. Ko daahaannaar kedi “Giyeebhode” hamayse kinin maronam kalon giyan ke yedade. <sup>37</sup> Enoar kattsi targadhayse, “Yer wulam payya kida haye; qaamin kayaanaar kenin qansoadettsi, apon kayaanaar kenin dhalqoadettsi kida haye” ko hamade.

## 8

### *Shii Oydin Eenaam Yesusin Kunsoono*

#### *Maat 15:32-39*

<sup>1</sup> Ogo wodanka pir thoothino eeno kikal ko bukade. Yer kenin itsea kesa konin qolmonna kisa paanan yivaynaam yikal eelayse, <sup>2</sup> “Eeno kono imbesana rooro makkam dooqayse konin itsea yer kosa qolmonna, inta kona burqadhidine. <sup>3</sup> Yer ke itsima onnadar keam i yittsidianna goynte shiitayse dhambasane; kesa waani waani eena pee pegera ke nivade” kena ki hamade.

<sup>4</sup> Kisa paanan yivayna eenaar “Ko eenin qolmon darante zarsin kona yeekea gala hamora ko haapadhe?” hamayse kina ke maasade. <sup>5</sup> Kidiar “Balasha meemayne yekal daahaana?” hamayse keam ki oysade. Kidiar “Balasha tobbhaa wokal dahade” kina ke hamade.

<sup>6</sup> Ogora Yesus eenka “Peendar dooqee” hamayse balashana tobbhaanaam tiyate Barjoam miskeka gobshayse balashanaam qunthayse yisa paanan yivayna eenana eenna kenin yeskisoadettsi ki imade; kidiar eenna ke imade. <sup>7</sup> Kaara shaaqa tokaa waaniar kekal dahade. Iginaamaar tiyate Barjoam miskeka gobshayse eenna kenin imoadettsi yisa paanan yivaynana ki giyade. <sup>8</sup> Enoar itsayse ko mishade. Ko itsaysaka shidhoono dirmano Yesussa paanan yivayna eena sharqa tobbhaa thoosayse ke dhaasade. <sup>9</sup> Itsoono enoar shii oydiaddhane. Ogosa budonte Yesus keam onnadar ki yittsade. <sup>10</sup> Ogora saanawa yisa paanan yivaynabete bazindara sagadhen gonngalante ardayse Dalmanuta peendar ke yivade.

### *Yesussa Tarshen Waadimanam Shedana Oysadhoono*

#### *Maat 16:1-4*

<sup>11</sup> Parisa enoar Yesuskal nivayse kiam taysate shedota, “Barjokala nivaa hanin dohonam woninkay dhesea tarshea milkit wona hayaa” hamayse kimbesana ke palimade.

<sup>12</sup> Yesus yisa qaabonkaar atayse “Uuh!” hamada, “Wodan koka dohoono eeno tarshea

milkit haydhoodettsi harrna ko zage? Inta yena gon ida giye: Wodan koka dohon eenna tarshea milkit haydhehe” ki hamade. <sup>13</sup> Ogora keam garayse pir bazindara sagadhen gonngalante ardayse bazinsa saabar ki sagade.

### *Parisa Eenabee Herodisbesa Irshon Goynsa Yesusin Giyoono*

#### *Maat 16:5-12*

<sup>14</sup> Yesussa paanan yivayna eena balasha yinka bavima walayse kenin nivonna, bazindara sagadhen gonngalante balasha kalaara ab balasha qolehe. <sup>15</sup> Yesusaar “Shedee! Parisa eenabee Herodisbesa irshora mete yesaam gishee” hamayse kena ki giyade.

<sup>16</sup> Kediar kinka kinka “Ogono yin kinin giyoono balashayn wosa qolmonnnane” ke hamade.

<sup>17</sup> Yesusaar kesa qaabonam dhesayse kena yin ki giyade: “ ‘Balashanin wosa qolmonnnane’ hamayse harrnee kikal dhalqe? Akar bhocchattenu? Dhesattenu? Woylammoar yesa duudiw? <sup>18</sup> Yesa aapi daaka yedi haapattenu? Qaami yesa daaka yedi qansattenu? Hamin ko yena bhoqan garaa? <sup>19</sup> Balasha dongnam shii dongin eenam inin kunson wodanka, dirmano sharqa meemayne thoosayse yenin dhaasoono?” kena ki hamade. Kediar “Sharqa tabhi lamaane wonin dhaasoono” ke hamade.

<sup>20</sup> “Balasha tobbhaanaamsin shii oydin eenna inin kunson wodanka, dirmano sharqa meemayne thoosayse yenin dhaasoono?” kena ki hamade. Kediar “Sharqa tobbhaane wonin dhaasoono” ke hamade. <sup>21</sup> “Ta ogono akar yena bhoqayu?” kena ki hamade.

### *Yesus Aapin Kayaa Eam Kinin Pacchoono*

<sup>22</sup> Beetesaydar kenin nivenka, eedi aapi kayaa kalaam Yesuskal entsate nivayse kiam kinin kaamoadettsi Yesusam ke miskade. <sup>23</sup> Yesusaar aapin kayaa easa aaninam yedayse entsate kiam gurdara ki bulade. Ogotear aapindar kisa pathimayse aaninka yisa kinin kaamonsa budonte, “Yer hakal haapa ko haapadho?” hamayse kiam ki oysade.

<sup>24</sup> Ear dhev kinin hamonsa budonte, “Eeno isa aapinte haaqadettsi dahayse konin yaayenam ida haape” kina ki hamade.

<sup>25</sup> Yesus pir lansi yisa aaninka kisa aapinam kinin kaamonsa budonte, payya hayayse ki haapade; kalon paashaysear yer wulam may may haapan ki yedade. <sup>26</sup> Ogosa budonte Yesus eam “Gurdante ardaabhode” hamayse oonindar kiam ki yittsade.

### *Bhethiroos Kiristoossa Kinin Tarjoono*

#### *Maat 16:13-20; Luq 9:18-21*

<sup>27</sup> Yesusbee kisa paanan yivayna eenabe Pilbhisoos Qesaaria peensa gasante dohon gurdandar ke yivade. Ogo goynkaar kenin yivenka Yesus “Eeno iam hay ko hame?” hamayse keam ki oysade.

<sup>28</sup> Kediar “ ‘Shivea Wannisne’ koda hame; waani eenoar ‘Eeliasne’, waani eenoar ‘Barjokala qansayse eenna giyayna eenasa kalaane’ koda hame” kina ke hamade.

<sup>29</sup> “Yedi iam hay yeda hame?” hamayse keam ki oysade. Bhethiroosaar kina yinin maasenka, “Ya Barjoyn qadhaa Kiristooosne” ki hamade.

<sup>30</sup> Yesusaar “Innon goynam eedi haynaar giyeebhode” hamayse upsi wocchika kena ki giyade.

### *Yesus Yisa Dembhinsa Birayse Kinin Giyoono*

#### *Maat 16:21-23; Luq 9:22*

<sup>31</sup> Yesusaar yisa paanan yivayna eenana “Inta Eedi Naas thoothi gaale tiyayda tiye; peensa donzanabee, gudullasa hayonabee, Musesa yigginam dhettsaynabe iam baga ke bage; iam deesa ko deesadhe. Ogora rooro makkamsa budobar dembhira dhaabhayda dhaabhe” hamayse keam dhettsan ki yedade. <sup>32</sup> Dhalqinamaar may hayayse kena ki giyade. Bhethiroosaar yimal kiam entsate yivayse waciman ki yedade. <sup>33</sup> Yesus budoka

yisa wal hamayse kisa paanan yivayna eenaam shedayse Bhethiroosam “Ya Seethaan, isa aapira os yivaa! Barjoyn qaabenam qaaban garayse eedinin qaabenam hada qaabe” hamayse kiam ki wacimade.

*Yesussa Paanan Yiidhen Goyno*

*Maat 10:38-39; 16:24-28; Luq 9:23-27; 14:26-27*

<sup>34</sup> Yesus een waanibee yisa paanan yivaynabeam yikal eelayse kena yin ki guyade: “Isa paanan nivana nashea hay ki dahaannaar yinnon qaabon ki gare; yinindar ziitate deesadhen masqalinam kedayse isa paanan ki nive. <sup>35</sup> Sadan yinnonam dhacchana nashea hay ki hannaar koam kaysa ki kayse; imbee Barjosa dhacchintan upsinbena sadan yinnonam kaysea hay ki dahaannaar koam dhaccha ki dhacche. <sup>36</sup> Eedi peen kodar dohon yer wulam haapayse sadan yinnonam kaysidi ki hanna, kina har ko poote?

<sup>37</sup> Eedi yisa sadanna baza yer har ki kashe?

<sup>38</sup> “Ko wodanka Barjoam garayna seeson eenasa shaarinte imbee isa upsinbeka ooshimbhea wul, inta Eedi Naas Imbaasa gobshinka gazana gaananabesana inin nivenka, inta kanka ooshimbhayda ooshimbhe” hamayse kena ki guyade.

## 9

*Yesussa Dantanin Ookimoono*

*Maat 17:1-13; Luq 9:28-36*

<sup>1</sup> Yesusaar, “Inta yena gon ida giye: Barjosa bitamonin kantanka nivenam yinin haapenka yekka, kote woyaana eenasa shaarinte dembhi diymina eedi daane” kena ki hamade.

<sup>2</sup> Yesus ogoam yinin guyonsa budobar laskoa rooroaka Bhethiroosbee, Yayqoobbee, Wannisbeam bish yinka entsate dhukan gudubhondar ki utade. Raqin ogotear Yesussa dantano kesa birante ko ookimade. <sup>3</sup> Kisa apallo cawlayse kosa bhalqantanoar peen kodar apalan shivaynayn shivate calshana damaamadettsi kattsi ko cawlade. <sup>4</sup> Wodan ogoka Eeliasbee Musebe Yesuskal dahayse kimbete kenin dhalqenam ke haapade.

<sup>5</sup> Bhethiroosaar Yesusna yi giyna: “Woam Dhettsea, raqin kote wonin dahayno wona payyane; ogona baara kalaam hana, kalaam Musena, kalaam Eeliasna hayayse baara makkam wo kee” ki hamade. <sup>6</sup> Ogo wodanka kedi makkamma kattsi kenin kurtumbhonna, Bhethiroos har giya kiam zaskenam kidi dhesadehe.

<sup>7</sup> Pir liilo nivayse keam ko ishkade; liilonsaar iir “Inin nashea isa Naasa kaane; kina qansee” hamea upsi ko qansimade. <sup>8</sup> Saanawa wal hamayse kenin shedenka, kembee Yesusbekalanka eedi ab kedi haapadehe.

<sup>9</sup> Dhukara kenin hanchenka Yesus kena yi giyna: “I Eedi Naas dembhira inin dhaabhenka yekka ta yenin haapon koam eedi haynaar giyebhode” ki hamade.

<sup>10</sup> Ogo yin kinin guyonam qansayse, yisa woylaminka yedayse “‘Dembhira dhaabha’ hamintano kisa hamin giytane?” hamayse kinka kiam kiam oysan ke yedade.

<sup>11</sup> Kidiar “Musesa yigginam dhettsayna eena ‘Birayse niva zaskea Eeliasne’ harrna ke hamaa?” hamayse Yesusam ke oysade.

<sup>12</sup> Kidiar kena “Ogono gonne; Eelias birayse niveane; kidi yer wulam ashka ki ashke. Ko dahaannaar i Eedi Naasina ‘Gebhi gaale tiya ki tiye; pir kiam baga ko bagadhe’ hamayse thaapadhoono harrnane? <sup>13</sup> Ko dahaannaar inta yena ida giye: Gon Eelias ena kosa birayse nividine; kisaar thaapadhondettsi eneo yinin nashon yerin wulam kidar ko hayade” kena ki hamade.

*Beeron Yedaa Naasaam Yesusin Pacchoono*

*Maat 17:14-21; Luq 9:37-43*

<sup>14</sup> Yesusbbee makkamma kisa paanan yivaynabe waani kisa paanan yivayna shidhaanakal maataate kenin nivon wodanka, thoothino eneo kesa gasante buka ko hattaka

ke haapade. Musesa yigginam dhettsayna eenaar kembesana kinka kenin palimenka keam ke haapade. <sup>15</sup> Eeno wul Yesusam konin haapenka targadhidine; kikalar gobate nivayse kiam ko nagaysade. <sup>16</sup> Yesusaar “Kembesana kinka yenin palimayno yer harsane?” hamayse keam ki oysade.

<sup>17</sup> Eensa shaarira eedi kalaa yinin maasenka, “Woam Dhettsea, beeron yedaysaka apon kayaa isa naasaam hadar bavate i nivade. <sup>18</sup> Ruminin kisa dhaabhen wodanka hamote ko hannaar kiam dhaba ko dhabe; aponkaar kisa dubo koda nive; atsinin qiicimenka bishinoar kisa zaba ko zabe. Ogo beeronam kidara ke bule hamayse hasa paanan yivaynana i giyaysaka bulana damadehe” hamayse kina ki giyade.

<sup>19</sup> Yesusaar yinin maasenka, “Yedi idar woylamin qajimina adhadhinato, hamaaka yekka yembesana ida dee? Yena hamaaka yekkay darsho? Yinda naasaam ikal bevee” kena ki hamade. <sup>20</sup> Kediar naasaam kalan bavate ke nivade. Beeroar Yesusam yinin haapenka, naasaam saanawa ki gibattsade; kidiar peente dhambayse aponka dubon nittsite qaptiman ki yedade. <sup>21</sup> Yesus naasasa imbaam “Kaa burqeaa naasaam ki yedaysaka leve meemayne?” hamayse ki oysade. Kidiar kina yinin maasenka, “Naasamora yedaysene. <sup>22</sup> Thoothi woda kiam deesana nuunbee noqonbesa iir kiam koda dhaba. Ko dahaannaar ha damidianna bannzo! Wona burqadhyayse woam kelshaa” ki hamade.

<sup>23</sup> Yesusaar “Ha damidianna hamo? Barjodar woylamin qajeana yer wul kina dandima ko dandime” kina ki hamade. <sup>24</sup> Saanawa naasasa imbaa upsin yisaam dheg hayayse “Barjodar woylamin qajayda qaje; ko dahaannaar isa qothimenam ikalanka pegisaa!” kina ki hamade.

<sup>25</sup> Yesusaar eenin thoothada kalan nivenka keam haapayse beeroam “Ya aponin dhalqoamadettsi, qaaminin qansoamadettsi hayaa beeroa, naasa kaara utaa! Lansi maataate hanin ardoamadettsi” hamayse ki bitade.

<sup>26</sup> Beeroar ilatayse naasaam kattsi qaptisada kidara ki utade. Thoothino eenoar “Naasa diydine” kenin hamenka yekka diyaadettsi ki maatade. <sup>27</sup> Ogora Yesus naasasa aaninam yedayse ki dhaasade; kidiar dhaabhayse ki woyade.

<sup>28</sup> Yesus oonin kinin ardonsa budonte, kisa paanan yivayna yimal kinin dohonte, “Beeronom naasadara bulana wonin damaammo harrnane?” hamayse kiam ke oysade.

<sup>29</sup> Yesusaar kena yinin maasenka, “Kodettsin beeronam [itsima] Barjoam miskintakatay hamidi ko hanna, goyti abka bulana dandimehe” ki hamade.

### *Yisa Dembhinsa Yesusin Lansi Giyoono*

*Maat 17:22-23; Luq 9:43-45*

<sup>30</sup> Yesusbee kisa paanan yivaynabe raqin ogoam garayse Galilaka hayayse ke yivade. Ogoam eedi kalaar ki dhese zagadehe. <sup>31</sup> Harrna hambhidianna, “I Eedi Naasaam eensa aaninte saskate iam koda imbhe; iamaar deesa ko deesadhe; ogosa budobar makkansoa rooroaka diira dhaabhayda dhaabhe” hamada yisa paanan yivaynaam dhettsite ki dahade.

<sup>32</sup> Kena kinin giyoonoar ardadehe; kediar kiam oysana ke kurtumbhade.

### *“Wuldara Sagi Maatea Hayne?” Hamayse Kenin Oysoono*

*Maat 18:1-5; Luq 9:46-48*

<sup>33</sup> Yesusbee kisa paanan yivaynabe Qipirnaahoom katamandar ke nivade. Ogote oonir kinin ardonsa budobar Yesus “Ini goynte wonin nivenka yenin palimayno hare?” hamayse keam ki oysade.

<sup>34</sup> Kediar ini goynte “Wo wuldara sagea hayne?” hamayse kinka kinka kenin palimonna, Yesusin oysenka lay ke hamade. <sup>35</sup> Yesus dooqayse tabhi lamaanaam yikal eelayse, “Eedi hay ki hannaar, bira maatana nashea een wulsa budonte ki dee. Een wulsaar erge eedi ki maate” kena ki hamade. <sup>36</sup> Naasi kalaam bavate nivayse kesa shaarinte woysayse naasaam shupayse, <sup>37</sup> “Kaa naasadettsiam isa naabenna hamayse

tiyea iam kida tiye; iam tiyea ibisheam dayma iam nittsaamaar kida tiye” kena ki hamade.

*Woam Jibbimina Wul Wombesana Kenin Dohoono  
Luq 9:49-50*

<sup>38</sup> Wannisaar Yesusna, “Woam Dhettsea, eedi kalaa hasa naabenka beeronaam kinin bulenka kiam wo haapade; wombesana kinka kinin dhaamonna kiam wo marade” kina ki hamade.

<sup>39</sup> Yesusaar yin ki guyade: “Isa naabenka yer tarshen waadadhayse saana idar yer siya giyana dameayn qolmonna kiam garee; mareebhode! <sup>40</sup> Harrna hambhidianna, woam jibbimina wul wombesana kinka ke dahade. <sup>41</sup> Inta yena gon ida giye: Kiristoossa yenin dohonna sharqa kalaa noqo yeam wushea wulsa baza shidhehe.

*Eedina Goa Maatintara Mete Gishinta  
Maat 18:6-9; Luq 17:1-2*

<sup>42</sup> “Idar woylamin qajayna igina likkanasa iira kalaana goa maatea eedi hayyear daa ki hanna, deesime seeni gaari kisa qorcindar dhaxayse bazinte kiam dhabadhidi ki hanna, kina payyane. <sup>43-44</sup> Ogona anno hanno hana goa maatea ko hanna, koam taxate dhabaa. Aan lamaaka dahayse [qayonin diymon] lay dikimon nuunte hanin ardenna, gundi dahayse sadanka daadhen raqinte hanin ardayno hana payyane. <sup>45-46</sup> Roono hanno hana goa maatea ko hanna, koam taxate dhabaa. Roo lamaaka dahayse [qayonin diymon] lay dikimon nuunte hanin ardenna, gundi dahayse sadanka daadhen raqinte hanin ardayno hana payyane. <sup>47-48</sup> Aapino hanno hana goa maatea ko hanna, koam bulate dhabaa. Aapi lamaaka dahayse qayonin diymon, lay dikimon nuunte hanin ardenna, aapi kalaka dahayse Barjosa bitamonte hanin ardayno hana payyane.

<sup>49</sup> “Gala sooqoka konin daathisadhendettsi, een wulam nuuka koqate koda ashkadhe.

<sup>50</sup> “Sooqo payyane. Ko dahaannaar daathan garidi ko hanna, harka ko daathisadhe? Ogona yesa shaarinte soogodettsi daathea daathamo yesa ko dee; kinka kinkaar payyamoka dehee” kena ki hamade.

## 10

*Keemon Goynsa Yesusin Dhettsongo  
Maat 19:1-12; Luq 16:18*

<sup>1</sup> Yesus ogora dhaabhayse Yordaanoos baynsa saabarka hayayse Yiwda peente dohon raqindar ki yivade; ogo baynsa saabar thoothino eeno pir kikal ko bukade. Kidiar yisa dambindettsi eenaam dhettsan ki yedade.

<sup>2</sup> Parisa eenaar kikal nivayse, “Eedi geshon yinnonam bulate kinin yittsoadettsi Musesa yigginte giidhidu?” hamayse taysate shedana kiam ke oysade. <sup>3</sup> Kidi yi giyna: “Muse ena yena hamin ki giyaa?” kena ki hamade. <sup>4</sup> Kidiar “Muse ‘Eedi geshon yinnonam yinin bulenka, bulayse yinin oytensa tarja maatea warqat kona thaapate imayse ki bule’ hamayse ki guyade” ke hamade.

<sup>5</sup> Yesus kena maasayse yi giyna: “Muse yena yin giyayse kinin thaapoono yedi woylaminka yesa Barjona ee hamimina yelin dohonnane. <sup>6</sup> Ko dahaakaar pijadhinsa birayse Barjo ‘Anngibee maabe hayayse keam ki pijade. <sup>7</sup> Ogonante eedi imbabee indabeam gara ki gare; [geshon yinnonbete kinka kida dee;] <sup>8</sup> kedi lamaanaar waa kalaa keda maate’ hamayse ko thaapadhade. Kedi keeda kaara os waa kalaa keda maate, lamaa maatehe. <sup>9</sup> Ogona Barjo kidar kalaa kinin hayonam eedi ko kidara edabhoode” kena ki hamade.

<sup>10</sup> Ooninte kinin ardonsa budonte, kisa paanan yivayna eena yerin ogo goynam lansi dhaasayse kiam ke oysade. <sup>11</sup> Kidiar “Eedi hay ki hannaar, geshon yinnonam bulate yittsayse maa ab keemea kidi ta yinin keemonka sharmucimayse biron geshondar seeso

waadadhidine. <sup>12</sup> Geshono geshoa yinteam garayse anngi abka kembhidi ko hanna, kodi sharmucimidine” kena ki hamade.

*Yesus Naason Shaaqanna Barjoam Kinin Eeloono  
Maat 19:13-15; Luq 18:15-17*

<sup>13</sup> Yesus yisa aaninam kedar kinin wodoadettsi eno yisa naason shaaqanam daran bavate ko nivade; ogona kisa paanan yivayna eena eenam ke wacimade. <sup>14</sup> Yesus ogoam kesa yinin haapenka, yisa paanan yivayna eenam wacimayse, “Naasono shaaqano idar ko nive; koam mareebhode. Harrna hambhidianna, Barjosa bitamono iginna naanadettsi maataana eenasane. <sup>15</sup> Inta yena gon ida giye: Barjosa bitamonam naasidettsi maatayse tiymina wul yer hamin hambhaakaar iir ardehe” kena ki hamade. <sup>16</sup> Yin kinin giyonsa budobar naanaam yidar tiyate shupayse, kedar yisa aaninam wodaate kena Barjoam ki eelade.

*Ea Wodintasa Oysimeno  
Maat 19:16-30; Luq 18:18-30*

<sup>17</sup> Yesus ogora goyt iivo kinin dhaabhenka, eedi kalaa gobaka kalan nivayse hatte birante kisa kumpurdhayse, “Ya Payya Dhettsea, rooro wul lay dehen sadan haapota yer har haynta ko iam zaske?” hamayse kiam ki oysade. <sup>18</sup> Yesusaar “Payya ea inka harrnaa hamaa? Barjo bishkalanka ab eedisa payya hama eedi qolehe. <sup>19</sup> Barjoyn giyonam dhesaada dhese: Deesaabkhode, sharmucimaabhode, dimmaabhode, buudamoka tarjaabhode, maltimaabhode, hambabee handabeam gobshaa” kina ki hamade.

<sup>20</sup> Ear “Woam Dhettsea, iginna wulam inta isa naasamora yedayse toolidine” kina ki hamade.

<sup>21</sup> Yesusaar kiam shedayse nashabh hayayse “Hanin hayaama yer kalaa bishne hasa joogaa. Ogonoar yivayse hasa dohon koymonam shanshayse qambhinana imaa. Ya hasa bazanam cecinte hada haape. Ogora maatayse isa paanan nivaa” kina ki hamade. <sup>22</sup> Ear koymo thoothinin kisa dohonna, ogoam yinin qansenka qaaboka wotin yisa ki thipsade. Ogoraar yisa iinka ataate ki yivade.

<sup>23</sup> Yesus yisa gasanam shedayse paanan yivayna eenana “Wodimma eenasa Barjo bitamonte ardano hamin dohoono gaalene” kena ki hamade.

<sup>24</sup> Kisa paanan yivayna eenaar ogo yin kinin giyenka kedi targadhidine. Yesus pir kena yin ki giyade: “Ye naanato, Barjosa bitamonte ardano hamin dohoono gaalene.

<sup>25</sup> Eedi wodimoyn Barjosa bitamonte kinin ardenna gamaleyn marpisa pulaka konin utayno deegane” kena ki hamade.

<sup>26</sup> Kediar kattsi targadhayse kinka kikal yi giyna: “Yin ko hanna, ta keeda hayne dhaqana damea?” ke hamade. <sup>27</sup> Yesusaar keam shedayse, “Ogono eedina dandimehe; Barjona koda dandime. Harrna hambhidianna, Barjona yer wul dandima ko dandime” kena ki hamade.

<sup>28</sup> Bhethiroos yi giyna: “Shedaa! Wodi yer wulam garayse hasa paanan wo nivade” kina ki hamade.

<sup>29</sup> Yesus maasayse kena yin ki giyade: “Inta yena gon ida giye: Imbee Barjosa dhacchintan upsinbena hamayse indanaana annginabee anzanabeam, pir imbaabee, indanbee, naana yinnabee, oonin yinnonbee, haamin yinnonbeam garaa, <sup>30</sup> ta peen kodar oytaydhanka indanaana annginabee anzanabeam, pir indanbee, naana yinnabee, oonin yinnonbee, haamin yinnonbeam iginara sagi mato goyt tiyma garea eedi qolehe; os niven wodankaar rooro wul lay dehen sadan haapa ki haape. <sup>31</sup> Ko dahaannaar thoothino birono eeno budo koda maate; budonte dohoono eeno pir bira koda maate” kena ki hamade.

*Yesus Yisa Dembhinsa Makkanso Goyt Kinin Giyoono  
Maat 20:17-19; Luq 18:31-34*

<sup>32</sup> Yerusaalemdar yivota goyn utayse ke daaka, Yesus kesa birante kinin yivenka, kisa paanan yivayna eenaar Yerusaalemdar kinin yivenna targadhite ke dahade; pir waani eneo kesa tudhin yivaynoar kurtumbhidine. Ogo wodanka kisa paanan yivayna tabhi lamaana eenaaam pir eensa iira keam eelate bulayse yidar yesko dohon gaalensa kena giyan ki yedade: <sup>33</sup> “Marrato! Wodi ta keeda Yerusaalemdar woda yive. I Eedi Naasiam gudullasa hayonabee Musesa yigginam dhettsayna eenabena saskate imbha ko imbhe; kediar inin deesadhoodettsi idar pirda ke pirde; Ayiwdtay hamma eena yettsate iam ima ke ime. <sup>34</sup> Ayiwdtay hamma eena iam bagayse idar pathima ke pathime; iam qana ke qane; ogoraar pir iam deesa ke deese; intaar rooro makkamsa budobar dembhira dhaabhayda” kena ki hamade.

### *Yayqoobbee Wannisbe Yesuskal Kinin Miskimoono*

*Maat 20:20-28*

<sup>35</sup> Zabdoos naana Yayqoobbee Wannisbe Yesuskal nivayse, “Woam Dhettsea, haam wonin misken wulam wona hanin waadadhoodettsi woda nashe” hamayse ke giyade.

<sup>36</sup> Kidiar kena “Yena yer har i waadadhee zage?” ki hamade. <sup>37</sup> Kidiar “Gobshinka hanin bitimenka, wosa iira kalaam hasa mizaqimbar, kalaam hasa warkatambar hayayse woam dottsaa” kina ke hamade.

<sup>38</sup> Yesusaar kena “Yedi yenin miskenam dhesattene. Inin wucen gaalen wucimanam yedi wucana damaw?\* Inin shiidhen gaalen shiidhimenam yedi shiidhimbhana damaw?” ki hamade. <sup>39</sup> Kidiar “Damooda dame” ke hamade. Yesusaar “Inin wucen gaalen wucimanam wuceeda wuce; inin shiidhimbhen shiidhimenam yedi shiidhimbheeda shiidhimbhe.” <sup>40</sup> Ko dahaannaar isa mizaqimbee warkatambebar dottsea intatehe; raqin ogoam yinnante ashkadhaanana imbha ko imbhe” kena ki hamade.

<sup>41</sup> Waani tambha Yesussa paanan yivayna eenaar yin giyayse kinin miskenam qansayse Yayqoobbee Wannisbeam waciman ke yedade. <sup>42</sup> Yesus ke wulam yikal ee-layse kena yin ki giyade: “Barjoam dhesimina eenaaam wottsaynane hamayse qaabadhayna eenaaam kantaka kinin wottsenbee entsaynaar kedar kesa hayamo kinin dhenbeam dheseeda dhese. <sup>43</sup> Yennon shaarinte yin konin doadettsi zaskehe. Yennon shaarinte eedi hayyear gebhi doota zagea yesa waadima eedi ki dee. <sup>44</sup> Yesa iira eedi hayyear bira doota zagea wulsa choobar dehea eedi ki dee. <sup>45</sup> Harrna hambhidiana, inta Eedi Naasear eenaa waadadhanabee isa sadanamaar thoothin eensa seeson bazan kashotabe i nivade; eneo ina konin waadadhoodettsi nivaatine” kena ki hamade.

### *Yesus Barthemooissa Aapin Kayon Kinin Pacchoono*

*Maat 20:29-34; Luq 18:35-43*

<sup>46</sup> Ogosa budonte, Yesusbbee kisa paanan yivayna eenabe Iyarko katamandar ke nivade. Ogora waani thoothin eenbesana Iyarkora utaate kinin yivenka, Themoos naasa aapin kayaa Barthemoois goyn aponte dooqayse miskimite ki dahade. <sup>47</sup> Kidiar goyn ogoka sagate yivea Naazret peen Yesus kinin dohonam qansayse, “Dawt Naasa Yesuso, bannzo! Ina burqadhadhayse iam pacchaa” hante gebhi ilatite miskiman ki yedade.

<sup>48</sup> Eensa iira thoothino eneo kanka “Ya lay hamaa!” hamayse kiam ko wacimade. Kidi pir “Dawt Naasa, bannzo! Ina burqadhadhayse iam pacchaa” hante ini yinin ilaterra kalon sagi ilatan ki yedade.

<sup>49</sup> Yesusaar woyayse, “Kiam eelee” ki hamade. Eena ea aapin kayaaka “Hay, dhaabhaa! Haam eela ki eele” hamayse kina ke giyade.

<sup>50</sup> Kidiar yisa apalanam dhabayse saana dhaabhadhayse Yesuskal ki nivade. <sup>51</sup> Yesusaar “Hana yer har i hayea zage?” kina ki hamade. Aapin kayaa ear “Dhettsea, shedana ida zage” ki hamade. <sup>52</sup> Yesusaar “Ya yivaa, idar woylamin hanin qajoono haam ko pacchade” kina ki hamade. Easaar aapino saanawa ko shedade. Ogosa budonte, kidi goynka Yesussa paanan yivan ki yedade.

\* <sup>10:38</sup> “Inin tiyota dohon gaalenam yedi tiyana damaw?” hamintane.

## 11

*Yesus Gebhon Gobshinka Yerusaalem Kinin Ardoono  
Maat 21:1-11; Luq 19:28-40; Wannis 12:12-19*

<sup>1</sup> Yesusbee kisa paanan yivayna eenabe nivite Yerusaalemkal theedayse Dabirezayt dhukansa gasante dohon Bitaaniabee Betepaagebe gurdankal kenin theeden wodanka, Yesus yisa paanan yivayna eenasa lamaanaam yin giyayse keam ki yittsade: <sup>2</sup> “Ogo yesa birante dohon gurdandar yivimate. Ogote yenin yeskenka, eedin yindar dooqate shedaama ukulisa ooto dhaxadhaa haapeeda haape; agaam bulayse ina kiam kote qanate nivee. <sup>3</sup> Eedi hay ki hannaar, ‘Harrnee ukuliam bule?’ hamayse yeam oysidi ki hanna, ‘Imbaa wonteana kinin zaskonnane; kidiar saanawa yena kiam maasate nittsasane’ kina hamee” kena ki hamade.

<sup>4</sup> Kediar yivayse eedi kalaasa mayan kerinsa goyn aponte dhaxadhaa ukuliam haa-payse ke bulade. <sup>5</sup> Ogo raqinte woyayse dohoono eeno waani “Ukuliam har hayee bule?” hamayse keam ke oysade.

<sup>6</sup> Kediar Yesusin giyon kena ke giyade. Eenaar qansayse ukuliam kena ke garade. <sup>7</sup> Yesussa paanan yivaynaar ukuliam qanate Yesuskal nivayse ukuliasa zulondar yisa apalanam ke wodaysaka, Yesus daran ki dooqade. <sup>8</sup> Thoothino eeno yisa apalanam goyndar ko apade; waani eenoar haaqansa hacchan taxate goyndar ko apade. <sup>9</sup> Kisa birante yiven eenbee budonte niven eenbe “Gobshi hana ko dee; Barjo Imbas naabenka nivea ya gobshadhaane! <sup>10</sup> Nivayno imba wontea Dawtsa bitamonoar gobshadhoonone! Cecinte Barjona gobshi ko dee!” hamaate upsi gebhika kiam ke gobshade.

<sup>11</sup> Yesusaar Yerusaalem yeskayse Barjosa gazan ooninsa mayante kinin ardonsa budobar, gidir kosa dohon yerinam shedada hayayse haynin wovonna kisa paanan yivayna eena tabhi lamaanabete kinka Bitaania gurdandar ke yivade.

*Yesusin Ashoono Hattono Shaapino*

*Maat 21:18-19*

<sup>12</sup> Burin Bitaaniara kinin maatenka Yesusam daaqi bashade. <sup>13</sup> Haaqa shaap kallo goobayse konin dohonam pegeka haapayse, “Aapi kosa dook?” hamayse kodar ki nivade. Ko dahaannaar wodano hatton ogosa aapi konin ushea wodatay konin dohonna, kinin shedenka haccha bish kodar dahade; aapi haapadehe. <sup>14</sup> Ogo wodanka Yesus hattona yi giyna: “Keeda kaara os macchi eedi ko hasa aapi itsabhoode” ki hamade. Kisa paanan yivayna eenaar ogo yin kinin giyenam qansidine.

*Barjosa Gazan Ooninsa Mayante Gabimaynaam Yesusin Oytoono*

*Maat 21:12-17; Luq 19:45-48; Wannis 2:13-22*

<sup>15</sup> Kediar Yerusaalemdar ke nivade. Ogotear Yesus Barjosa gazan ooninsa mayante ardayse koymonam shanshaynabee shanayna eenabeam ooninsa mayara oytan ki yedade. Birren ookayna eenasa tharbhezanbee waleen shanshayna eenasa borkoton-beam kupate ki dhabade. <sup>16</sup> Ogoraar gaba koymo bavayse eedi hay ki hannaar, Barjosa gazan ooninsa mayanka sagate kinin yivoamadettsi ki marade. <sup>17</sup> Guttsayse “Onno isa zarsin wulin Barjoam miskayno misken onno koda hambhe’ hamayse thaapadhadaa? Yedi eensa koymon buurate itsaynasa aadhime raq koam ye hayade” hamayse keam dhettsite ki dahade.

<sup>18</sup> Gudullasa hayonabee Musesa yigginam dhettsayna eenabe ogoam kisa qansayse, “Hamin hayayse wo kiam deeso?” hante goyti zagan ke yedade. Harrna hambhidianna, kisa dhettsidinka eeno wul konin targadhenna, kedi Yesusna kurtumbhite ke dahade.

<sup>19</sup> Yesusbee kisa paanan yivayna eenabe peenin sootonsa budonte, katamara ke utade.

*Yesusin Ashon Hatton Shaapinsa Wocchidino*

*Maat 21:20-22*

<sup>20</sup> Burin kenin yivenka hattono shaapino ke hanna, yisa caacinka wocchayse konin dohonam ke haapade. <sup>21</sup> Bhethiroos yer kina bhoq hamaysaka, “Woam Dhettsea, shedaa! Hattono shaapino hanin ashooono wocchidine” kina ki hamade.

<sup>22</sup> Yesusaar kena yin giyayse ki maasade: “Barjodar woyleamin qajee. <sup>23</sup> Inta yena gon ida giye: Eedi hay ki hannaar, woyleamina yisa qothimima yerro kinin giyoono kina konin maateadettsi woyleam qajidi ki hanna, ko dhukanam ‘Agaara dhaabhayse bazinsa iinte wavaa!’ hamidi ki hanna kina maata ko maate. <sup>24</sup> Ogonante yena ida giye: Barjoam yenin misken yerin wulam yenin haapaadettsi hayayse woyleam daran qajimate, yenaar maata ko maate. <sup>25</sup> Barjoam misko yenin woyen wodanka, cecinte dahaa Imbaa yentea yennon seesonam yena kinin garoadettsi, yediar eedidar yesa dohon wacen wulam kena garmate. <sup>26</sup> [Ye kena garaamma cecinte dahaa Imbaa yentea yennon seesonam yena garehe]” kena ki hamade.

*Yesussa Hayamon Goynin Oysadhoono*

*Maat 21:23-27; Luq 20:1-8*

<sup>27</sup> Pir kedi Yerusaalemdar ke nivade. Ogotear Yesus Barjosa gazan ooninsa mayante kinin yaayenka, gudullasa hayonabee, Musesa yigginam dhettsyna eenabee, peensa donzanabe kinka kikal nivayse, <sup>28</sup> “Yerra iginaam hanin hayayno hasa yer har hayamokane? Kina yerra wulam hanin hayoadettsi hana hayamon imaa hayne?” hamayse kiam ke oysade.

<sup>29</sup> Yesus “Intaar yer kalaa yeam ida oyse. Yedi ina inin oysonam maasee; intaar yerra iginaam yer har hayamoka inin hayenam yena giyayda giye. <sup>30</sup> Wannis eenaam kinin shivoadettsi kinin nittsadhoono Barjokalankamoo? Eedikalankaw? Inin oyson oysimensa malsin ina maasee” kena ki hamade.

<sup>31</sup> Kediar yin giyayse kinka kikal ke dhalqade: “‘Barjokalankane’ wo hamanna, ‘Ta harrnee kisa dhalqinam gonne hamayse tiyan garaa?’ wona kida hame. <sup>32</sup> Ta ‘Eedikalankane’ wo hamo?” ke hamade. Eeno wul “Wannis gon Barjokala qansayse eenna giyeane” hamayse kenin giyenna, eenna ke kurtumbhade. <sup>33</sup> Ogonante Yesusna “Hamora konin dohonam wodi dhesattone” hamayse ke maasade.

Yesusaar “Ta keeda intaar har hayamoka yerra iginaam inin hayenam yena giyattine” kena ki hamade.

## 12

*Woynin Haaminte Waadadhayna Eenasa Kamsino*

*Maat 21:33-46; Luq 20:9-18*

<sup>1</sup> Yesusaar kamsika kena yin ki giyade: “Eedi kalaa woynin haaqanaam yisa haaminte thoothi ki korade. Kidiar haaminsa gasanam aygi cavayse, haaqanasa aapinam cuubadhea oolo koyayse ki ashkade; haaminam toolana pir kattsi dheg hama tulee ki kahade. Ogosa budonte, haaminte waadadhayna eenana elqimayse pee abdar ki yivade. <sup>2</sup> Woynin haaqanasa aapin kambhen wodan yeskaysaka, aapin ki beve hamayse yisa erge eedi kalaam haaminte waadadhayna eenadar ki yittsade. <sup>3</sup> Haaminte waadadhaynaar kisa ergen eam yedate qanayse aan guuri ke yittsade. <sup>4</sup> Pir haaminsa imbaa ab yisa erge eedi kalaam ki yittsade; haaminte waadadhaynaar kiam qanate meten kisa torsayse kiam ooshinsayse ke yittsade. <sup>5</sup> Pirar eedi ab ki yittsaysaka, kiamaar ke deesade. Ogoraar haamin imba eedi thoothi ki yittsaysaka, waani waaniam ke qanade; waaniam ke deesade.

<sup>6</sup> “Keeda haaminsa imbaayn adhaa naasi kalaa kisa kinin nashea dahade. ‘Kedi naasa inteana bookindhasane’ hamayse macchindar kiam kedar ki yittsade. <sup>7</sup> Haaminte

waadadhaynaar kinka kinka yinin giyenka, 'Kaa kisa haamindar sagea naasa toydiane. Nivee, kiamaar wo deese; hammoar wona ko shidhe' ke hamade. <sup>8</sup> Ogora naasaam yedayse ke deesade; deesaysear woynin haaminsa iira kiam bulayse ke dhabade.

<sup>9</sup> "Ta keeda haaminsa imbaa hamin ki haye? Kidi yinti nivayse haaminte waadadhay-naam kida deese; ogoraar woynin haaminam eedi abna kida ime.

<sup>10-11</sup> 'Seeninka oonin woysayna eena kenin bagaa seenia

senna wulra ooninna kattsi zaskea ki maatade.

Ogonoar Barjosa waadimane;

wonin shedenkaar yer woam tarshaynone'

hamayse Mathaap Gazante thaapadhonam yedi nabbabeete?" hamayse keam ki oysade.

<sup>12</sup> Ayiwd eenasa entsana Yesusin kamsinka giyaa dhalqa keam kaamea kinin dohonam kenin dhesonna, kiam yedana ke zagade; ko dahaannaar thoothin eenam kenin kurtumbhonna kiam garayse ke yivade.

### *Gibirin Kashadhensa Yesusin Oysadhoono*

*Maat 22:15-22; Luq 20:20-26*

<sup>13</sup> Ayiwd eenasa entsana Yesussa dhalqinka kiam yedana Parisa eenabee Herodissa bitamonam nashayna eenabera eedi daran ke yittsade. <sup>14</sup> Kedi kikal nivayse, "Woam Dhettsea, ya gon hama eedi hanin dohonam wodi dhesooda dhese; eedisa wotina bookindhayse hanin hayminna, eessa woti shedayse hanin hayea yer qolehe. Barjosa goynam gon hada dhettse. Ta Roome peen bitaana gibirin kashadhoodettsi giidhidimoo? Giidhadayne? Ta wodi gibirinam kina kashoo kashoomoo? Garoo garo?" hamayse kiam ke oysade.

<sup>15</sup> Yesus woylaminka siyon bavayse aponka bish kenin ashkenam kesa dhesayse, "Harrnee iam tayse? Yinda i shede santup kote ina bevee" kena ki hamade. <sup>16</sup> Kediar kina ke bavade. Kediar "Santupa kaadar dahaa pootoabee daran thaapadhaa naabeabe haysane?" hamayse keam ki oysade. Kediar "Roome peen bitaasane" kina ke hamade.

<sup>17</sup> Yesusaar kena maasayse "Roome peen bitaa gaynam kina imee, Barjo gaynam Barjona imee" ki hamade. Kediar kisa dhalqinka targadhidine.

### *Dembhira Dhaabhadhen Goynsa Yesusin Oysadhoono*

*Maat 22:23-33; Luq 20:27-40*

<sup>18</sup> "Dembhira dhaabhadhea yer qolehe" hamayna Saduqa eenara eedi waani Yesuskal nivayse yin giyayse kiam ke oysade: <sup>19</sup> "Woam Dhettsea, Muse yin giyayse wona ki thaapade: 'Eedi kalaa maa keemayse naasi adhima diydi ki hanna, kisa kana koam keemayse\*' diyaai iishimasa oolonte kina ki adhe' ki hamade. <sup>20</sup> Eedi kalaasa naasi tobbhaa waani ke dahade. Ke wulsa iishima gebhaa maa keemayse naasi adhima ki diyade. <sup>21</sup> Kisa kana lansoa iishimaa geshonam keemayse naasi adhima ki diyade; makkansoar iishimmadettsi koam keemayse naasi adhima ki diyade; <sup>22</sup> ogodettsi naana tobbhaana edon ogoam keemayse naasi adhima ke diyade. Ke wulsa macchinte edono ko diyade. <sup>23</sup> Igina indanaana tobbhaana wul koam kenin keemonna, diyaana eena dembhira kenin dhaabhen wodanka, kodi hamaa easa maa koda maate?" hamayse kiam ke oysade.

<sup>24</sup> Yesusaar kena yi giyna: "Yenin dhaddhisayno Mathaap Gazanbee Barjosa kantanbeam yenin dhesiminnatayu? <sup>25</sup> Harrna hambhidianna, eedi dembhira yinin dhaabhonsa budonte, cecinte dahaana Barjosa gaananadettsi keda maate; kedi yina kembhehe, tapir keemehe. <sup>26</sup> Diyoono eeno ko hannaar, konin dhaabhoodettsi Barjo Museyn thaapon mathaapinte hatta kodoadar nuunin yedenka Musena 'Inta Abraamsa

**12:10-11** Maz 118:22-23. \* **12:19** Ayiwd eena dambinka eedi kalaasa iishim diydi ki hanna, iishimasa geshonam kana keema ki keeme; wonnon dambinka ko hanna, kana baska ki baske. **12:19** Yiggi 25:5.

Barjoa, Yisaaqsa Barjoa, Yayqoobsaar Barjoane' hamayse kinin giyonam yedi nab-babeete? <sup>27</sup> Barjo sadanka dahayna eenasa Barjone; diyaana eenasa Barjotehe. Yedi kattsi yeda dhaddhise" kena ki hamade.

*Wuldara Sagea Barjoyn "Hayaa" Hamayse Giyaa Upsea*

*Maat 22:34-40; Luq 10:25-28*

<sup>28</sup> Musesa yigginam dhettsaynara eedi kalaa nivayse kinin palimenka qansayse, Yesus payya malsi kena kinin maasaadettsi shadayse, "Barjo yinin giyaana upsina wulra sagea hamaane?" hamayse kiam ki oysade.

<sup>29</sup> Yesusaar "Wulra sagea upsea 'Israveel eenato, qansee! Barjoa Imbaa wontea kalaane; <sup>30</sup> ya Barjo Hambaam gonin hamon woylaminka, gonin hamon sadanka, gonin hamon qaabenka, gonin hamon kantanka kiam nashaa' hamaynone. <sup>31</sup> Langoor 'Een wulam hadettsi hayayse nashaa' hamaynone. Iginaranka ab sagi upsi solehe" kina ki hamade.

<sup>32</sup> Musesa yigginam dhettsear "Woam Dhettsea, gonaa giyade! Barjo kidi kalaane; kidara ab barjo solehe hamayse hanin giyoono gonne. <sup>33</sup> Ogona gonin woylaminka, gonin bhocchinka, [gonin sadanka,] gonin kantankaar Barjoam nashintabee pir eedi wulam yidettsi hayayse nashintabe, Barjona koqadhen marshanbee abin imbhene marshanbera kattsi sagine" kina ki hamade.

<sup>34</sup> Yesusaar yiggin dhettssea qaabayse kinin maasonam shadayse, "Ya Barjosa bitamora pegadhaatehe" kina ki hamade. Ogosa budonte, hayyear Yesusam oysime oysana kurtumbhidine.

*Yesusin Oysoono Oysimeno*

*Maat 22:41-46; Luq 20:41-44*

<sup>35</sup> Yesusaar Barjosa gazan ooninsa mayante yinin dhettsenka yin ki giyade: "Musesa yigginam dhettsayna 'Barjoyn qadhaa Kiristoos Dawt naasine' hamayse hamin ke giyaa? <sup>36</sup> Dawt yinti Manpas Gazan yiam entsaysaka, 'Barjo isa Imbana

"Haam jibbayna eenaam hasa hayamonsa demente inin hayenka yekka isa mizaqimbar dooqaa" kina ki hamade'

kida hame. <sup>37</sup> Ta Dawt yinti kiam, 'Isa Imba' hamidi ki hanna, Kiristoos hamin ki Dawtsa naasi dee?" kena ki hamade. Thoothino enoar wozaka kinin giyenam qansite ko dahade.

*Yesus "Musesa Yigginam Dhettsaynakalanka Mete Yesaam Gishee" Kinin Hamoono*

*Maat 23:1-36; Luq 20:45-47*

<sup>38-39</sup> Yesus yinin dhettsenka yin ki giyade: "Gudubhon apalan qaadhayse osbee orabe hamota, pir gabante gobshadhon gisimenam gisimbhota nashayna Musesa yigginam dhettsaynakala yeam gishee. Kedi Ayiwde eensa bukin raqinte gobshadhon borkotonbee kumman kummadhen raqinte gobshadhon raqinbeam tiyota keda nashe.

<sup>40</sup> Miskenam kesa eedinin qansoadettsi hamayse gudubhsintaka maltimaate maana qambhinasa ooninam keda buure; ogona kedar sagi pirdi koda yeske" kena ki hamade.

*Mayn Qambhinin Barjona Imoono Imintono*

*Luq 21:1-4*

<sup>41</sup> Yesus koymen Barjona dhabadhen saathininsa birante dooqayse zarsinin saathininte koymen hamin konin dhabenam shedite ki dahade. Thoothina wodimmaar thoothi koymo saathininte dhabite ke dahade. <sup>42</sup> Maa qambhi kalloar nivayse santup kala maatea bakkanda lamaa saathininte ko dhabade. <sup>43</sup> Yesusaar yisa paanan yivaynaam yikal eelayse, "Inta yena gon ida giye: Kono edono qambhino koymen saathininte dhabayna eena wuldara sagi ko dhabade. <sup>44</sup> Harrna hambhidiana, eeno wul yisa

dohon koymon thoothinsa iira yina shiishayse ko dhabade; kodi qambhi dahayse yina kala hattear shishima, yisa dohon koymon wulam ko dhabade” kena ki hamade.

## 13

### *Barjosa Gazan Oonin Kottsimensa Yesusin Giyoono*

*Maat 24:1-2; Luq 21:5-6*

<sup>1</sup> Yesusaar Barjosa gazan ooninsa mayara kinin utenka, kisa paanan yivayna eenasa eedi kalaa “Woam Dhettsea, senna kina hamin kenin dohonbee seeninka woysadhaana onna kina hamin kenin haydhonbeam shedaa” ki hamade. <sup>2</sup> Yesusaar “Senna kina gembhaka woysadhaana onnaam ya shedaa shedo? Senna kina kidar dordhaanasa hamin hambhaakaar, kesa kala hattear kidara povayse kottsimima shidhea qolehe” kina ki hamade.

### *Yesusin Nivenam Eshkayno Milkitino*

*Maat 24:3-14; Luq 21:7-19*

<sup>3</sup> Yesus Barjosa gazan ooninka yekka dhari Dabirezayt dhukandar dooqayse ki daaka, Bhethiroosbee, Yayqoobbee, Wannisbee, Indiriasbe kalan theedayse, <sup>4</sup> “Ogono yerro haa ko yin maate? Ogono yerro wul yin maatanba konin dohonam dhettsayno milkitino kosa hare? Wona giyaa” hamayse yimal ki daaka kiam ke oysade.

<sup>5</sup> Yesusaar kena yi giyna: “Eedi hayyear yeam kinin dhaddhisoamadettsi mete yesaam gishee. <sup>6</sup> Thoothino eneo ‘Inta Kiristoosne’ hamaate isa naabenka niva ko nive; thoothin eenamaar dhaddhisa ko dhaddhise. <sup>7</sup> Yekal banqinin dhaabhenkabee pegente banqisa upsinam yenin qansenkabe kurtumbheebhode. Ogono yin konin maatayno shidha shidhiminone; ko dahaannaar macchin wodano akarne. <sup>8</sup> Zarsino zarsindar, binnaar binnadar dhaabhayse banqi keda kiam uxe; raq waani waanir peesa ziga koda maate; daaqiar koda maate. Ogono yerro edon sirmanin adhimanna birayse burqadheadettsi gaalen rooronsa biranone.

<sup>9</sup> “Yedi yeam gishimate. Pirdin pirdayna eenasa birante yeam saskate ima ke ime; Ayiwd eenasaar bukin raqinte yeam qana ke qane. Isa tarja kena yenin doadettsi, goyn innonka peen wottsayna eenabee binnabesa birante yedi woyeeda woye. <sup>10</sup> Macchin wodan nimbha birayse Barjosa dhacchintan upsinno een wulna giidha ko giidhe. <sup>11</sup> Yeam yedate pirdinna woysadhen wodanka, yenin giyoadettsi ogo wodanka yena imbhon upsinam giymate. Birayse ‘Yer haroo giyo?’ hamayse qaaboka gaaleebhode; harrna hambhidianna, yenka maatayse giyayno Manpas Gazanone, yeditehe. <sup>12</sup> Ogo wodanka indanaasaar indanaasaam, imbaar naasa yinteam dembhinna saskate ima ki ime; naanaar imbanadar dhaabhayse keam dettsa ke dettse. <sup>13</sup> Yedi isa naabenna hamayse een wulkal jibbadhaana yeda maate. Macchin wodanka yekka wocchimbhayse darshea kidi dhaqa ki dhaqe.

### *Kattsi Galshayno Gaalen Roorono*

*Maat 24:15-28; Luq 21:20-24*

<sup>14</sup> “Eenaam minngisayno siyono yerro zaskaamon raqinte woysadhaysaka yenin koam haapen wodanka (koam nabbabea ea ki bhocc), wodan ogoka Yiwsa peente dohoono eneo dhukanadar ko gobe. <sup>15</sup> Ooninsa zulondar dahaa ea ooninsa zulora hanchayse yer tiyo ki ooninte ardabhoode. <sup>16</sup> Haaminte yisa dahaar apalan yinnon tiyota budoka ki maatabhoode. <sup>17</sup> Ogo wodanka maana sirmanabee amin qooshayn-abena hay! <sup>18</sup> Ko dahaannaar gobeno yesa bargain wodanka konin doamadettsi Barjoam miskimate. <sup>19</sup> Ogo wodanka Barjo peen koam kinin pijorra yedayse ta koka yekka eedinin haapaammo gaale niva ko nive; os birantear kodettsino gaaleno yer hamin hambhaakaar nivehe. <sup>20</sup> Barjo galshen roronaam ki orgisaamma, eedi kala hattear

dhaqana damehe. Ko daahaannaar kinin kamayse edaana eenana hamayse ki rooron-aam orgisade.

<sup>21</sup> “Ogo wodanka eedi hay ki hannaar ‘Marrato! Barjoyn qadhaa Kiristoos kote ki dahade’ way ‘Saa ogote ki dahade’ yena hamea ki hanna, gonne hamayse tiyeebhode.

<sup>22</sup> Ogonoar buudamoka ‘Inta Barjoyn qadhaa Kiristoosne’ hamayna eenabee buudamoka ‘Inta Barjokala qansayse eenna giyeane’ hamayna eenabee eensa iira dhaabha ke dhaabhe; kena dandimea ko hanna, Barjoyn kamayse edaana eenaam kinin dohon goyra keam dhaddhisota yer milkitbee yer tarsheabe waadadhayse dhaa ke dhee.

<sup>23</sup> Ogona yedi mete yesaam gishee. Inta ko yerin wulam yena birayse giydine.

*Eedi Naasisa Lansi Maataate Nivano  
Maat 24:29-31; Luq 21:25-28*

<sup>24-25</sup> “Igina rooronaka, gaalen ogosa budonte, cecinte daahaana kantana wul shoa ke shoe; hayno thipa ko thipe; arpinoar shaakehe; wanconoar cecira wava ko weve.

<sup>26</sup> Ogo wodanka inta Eedi Naas gebhon kantanbee gobshinbeka maatayse polonka inin nivenka iam haapa ke haape. <sup>27</sup> Wodan ogoka isa gaananaam yittsayse, peensa gasara yedayse macchinka yekka peen wulsa iira inin kamaana eenaam pucchayda pucche.

*Hatton Shaapinsa Kamsino  
Maat 24:32-35; Luq 21:29-33*

<sup>28</sup> “Hatton shaapinsa kamsinam dhesee: Ogonoar hattonsa antindar hacchanin utayse caagenka, ogo wodanka bargin\* wodanin yeskonam dheseeda dhese.

<sup>29</sup> Ogodettsi yedi igina yerraam yedin shedenka, i Eedi Naasisa nivan wodano theedayse ooninte ardota kerinte konin dohonam dhesimate. <sup>30</sup> Inta yena gon ida giye: Ogo wul yin maatenka yekka wodan koka dohoono adhadhino diyate maqehe. <sup>31</sup> Cecinbee peenbe saga ko sage; inin giyoono upsino sagehe.

*Eedi Naasiyn Niven Rooronbee Savaatinbe Dhesimimino  
Maat 24:36-44*

<sup>32</sup> “Rooron ogobee savaatin ogobeam Barjo Imbakalanka ab dhesea eedi hay ki hannaar qolehe; cecinte daahaana Barjosa gaanana ke hannaar, Naasa kintea ki hannaar, dhesehe. <sup>33</sup> Wodano haa ko hannaar yedin dhesimonna, qaymayse toolee! <sup>34</sup> Ogonoar oonin yinnonam garayse goyn utaate yivaa eadettsine. Kidiar kalaa kalaa waadi-man eenaam waana waana waadimabee hayamobedar ki wodade; kerin tooleanaar qaymayse kinin tooloadettsi kina ki elqimade. <sup>35</sup> Ogonante oonin imba ta keeda shaakinan ko hannaar, way sootin kiaddha laman, way baachan qiiqenka way burburi ko hannaar, haa kinin nivenam yedin dhesimonna, qaymayse toolee. <sup>36</sup> Ye dhesima nivayse yedin raatonte ki yeam haapabhoode.

<sup>37</sup> “Yena inin giyenam een wulna ida giye: Qaymayse toolimate!” kena ki hamade.

## 14

*Yesusdar Woogintaka Eenin Dhaabhoono  
Maat 26:1-5; Luq 22:1-2; Wannis 11:45-53*

<sup>1</sup> Ayiwd eenasa Paasikanbee\* irshonin qolmon balashan gaadhea bavallabeyn gob-shadhanna yeskota rooro lamaayn shidhenka, gudullasa hayonabee Musesa yiggynam dhettsayna eenabe Yesusam cubboka hamin hayayse yedate kiam kinin deesensa

<sup>13:24-25</sup> Isi 13:10; 34:4; Yiz 32:7; Yuveel 2:10bee 31be; 3:15.    <sup>13:26</sup> Daan 7:13.    \* <sup>13:28</sup> “Bargi” hambhea upsiam gaalin aponka “bega” ko hambhade. Israveel peente bonan wodanin yeskenka, haaqano pudhan koda yede; Banen peente pir bargin wodan yeskenka konin pudhan yedenna, kamsinam yena may hayota “bargi” ko hambhade.

\* <sup>14:1</sup> “Paasika” hamen upsinam Haalin Mallan mathaapinsa macchinte thaapadhaanar shedaa.

goyti zagite ke dahade. <sup>2</sup> “Eeno goore konin dhaasoamadettsi, Paasikan gobshadhea wodanka ko dahabhoode” hamayse kinka ke dhalqade.

*Yesusam Gaamen Shittonka Qadhoono Edono  
Maat 26:6-13; Wannis 12:1-8*

<sup>3</sup> Yesus Bitaania gurdante lamthin burqonka<sup>†</sup> ena daahaa Simoon ooninte kummadar dooqayse ki dahade. Maa kalloar koymo gebhika shandhen naardoosira bish ashkad-hon gaamen shittonam seeni cawlira ashkadhon bilqaathinka bavate Yesuskal nivayse, bilqaathasa aponam deesate bulayse gaamen shittonam Yesussa metendar ko kahade. <sup>4</sup> Raqin ogote dohoono waani waani eenoar wacimaate, “Ko gaamen shittonam harrna ko sun yiigadhe? <sup>5</sup> Ko gaamen shittonam mato makkamdara sagi birredar shanshayse koymo ogoam qambhinana imano koda damadhika!” hamayse kinka gundumite edonam ke bagade.

<sup>6</sup> Yesus kena “Koam harrnee galshe? Garee! Kodi ina yer payya ko hayade. <sup>7</sup> Qambhina rooro wul yembesana kenin dehenna yenin nashon wodanka kena yer payya hayana dameeda dame. Inta rooro wul yembesana dahattine. <sup>8</sup> Kodi yina dandimonam ko hayade; waan isa duukadhma birayse iam ashkota shittonka ko qadhade. <sup>9</sup> Inta yena gon ida giye: Edon koyn hayonam konin bhocchadhoodettsi, peen wul gidir Barjosa dhacchintan upsinam giidhen raqin hamote ko hannaar, kosa waadimanam giidha ko giidhe” ki hamade.

*Yiwda Yesusam Yettsate Imo Kinin Dhalqoono  
Maat 26:14-16; Luq 22:3-6*

<sup>10</sup> Tabhi lamaana Yesussa paanan yivayna eenasa kalaa Asqoronto peen ea Yiwda Yesusam yettsate imota gudullasa hayonadar ki yivade. <sup>11</sup> Kediar ogoam kenin qansen wodanka wozadhayse, “Koymo hana woda ime” hamayse kimbesana kinka ke dhalqade. Yiwdaar kiam yettsate kena kinin imen goynsa kina agea woda zagite ki dahade.

*Paasikan Galanam Yisa Paanan Yivaynabesana Yesusin Itsoono  
Maat 26:17-25; Luq 22:7-13bee 21-23be; Wannis 13:21-30*

<sup>12</sup> Paasikan<sup>‡</sup> yaaton machadhen, irshon qolmon balashan itsadhensa bira rooroaka, Yesussa paanan yivayna eena “Paasikan galanam hamote yivayse wonin ashkoadettsia zage?” hamayse kiam ke oysade.

<sup>13</sup> Yesus yisa paanan yivayna eenasa lamaanana yin giyayse keam ki yittsade: “Katamandar yivee. Ogotear daaka noqo kedaa eedi kalaam yeda haape; ea agaasaar paanan yivimate. <sup>14</sup> Kinin arden oonindar yivayse ooninsa imbaam ‘Woam Dhettsea “Isa paanan yivayna eenabete Paasikan galanam wonin itsayno ranqo hamotene?” hanka ki hamade’ kina hamee. <sup>15</sup> Kediar ooninsa zulonte woysadhon, pir kosa iinaam payya apayse ashkadhon workin ooninam yena kida dhee; ogote wona ashkee” kena ki hamade. <sup>16</sup> Kediar utaate katamandar yivayse Yesusin kena giyondettsi ke haapade; Paasikan galanamaar ogote ke ashkade.

<sup>17</sup> Peenin sootonsa budonte, Yesus tabhi lamaana yisa paanan yivayna eenabesana kinka ki nivade. <sup>18</sup> Dooqaysear kenin kummenka Yesus kena “Inta yena gon ida giye: Yesa shaarira kalaa imbesana kinka kummea, kidi iam yettsate ima ki ime” ki hamade.

<sup>19</sup> Kediar ogo yin kinin giyon goynka iinka burqadhaate kedi kalaa kalaana “Inta i doo?”, “Inta i doo?” hante kiam oysan ke yedade.

<sup>20</sup> Kediar kena yi giyna: “Ye tabhi lamaanasa iira, kalaa imbesana kinka sharqante aanin arseane. <sup>21</sup> Inta Eedi Naas ena birayse innon goynsa thaapadhondettsi diyayda

<sup>†</sup> 14:3 “Lamth burqo” hamen upsinam Haalin Mallan mathaapinsa macchinte thaapadhaanar shedaa. <sup>‡</sup> 14:12 “Paasika” hamen upsinam Haalin Mallan mathaapinsa macchinte thaapadhaanar shedaa.

diye. Ko daahaannaar i Eedi Naasiam yettsate imea ea agaana hay! Ea agaa ki adhadhaamma kina payyane” kena ki hamade.

*Kiristoossa Dembinam Bhocchisayno Galano*

*Maat 26:26-30; Luq 22:14-20; 1 Qoro 11:23-25*

<sup>22</sup> Galanam kenin itsenka, Yesus balashanam tiyayse Barjoam ki gobshade; qunthayse yisa paanan yivayna eenana “Kay, kono isa waanone” hamayse kena ki imade.

<sup>23</sup> Wucadhenamaar tiyate Barjoam gobshayse, kena ki imade; kedi wulaar ogoam ke wucade. <sup>24</sup> Kidiar kena yin ki giyade: “Kono isa thoothin eenna laymayno mallan eshkayno zombhinone. <sup>25</sup> Inta yena gon ida giye: Barjosa bitamonte woynea hattasa aapin cuubadhon haalin wucadhenam inin wucenka yekka, keeda kaara os inta koam wucattine” kena ki hamade.

<sup>26</sup> Ogosa budonte, mazmur yinin zammaronsa budonte Dabirezayt dhukanam ke utade.

*Yesus Bhethiroosin Marimenam Birayse Kinin Giyoono*

*Maat 26:31-35; Luq 22:31-34; Wannis 13:36-38*

<sup>27</sup> Yesus yisa paanan yivayna eenana yin ki giyade: “Barjo ‘Yaana gisheam qanate deesayda deese; gishadhayna yaanaar thar thar hama ke hame’ hamayse thaapadhone dettsi, yedi wul iam gareeda gare. <sup>28</sup> Ko daahaannaar diira inin dhaabhonsa budonte, Galila peendar yeam birayse ida yive” kena ki hamade.

<sup>29</sup> Bhethiroosaar “Eeno waani wul haam garea ko hannaar, inta haam garattine” kina ki hamade.

<sup>30</sup> Yesus maasayse “Inta hana gon ida giye: Kina sootin koam baacha biraa lamaa goyt qiiqima ‘Inta kiam dhesattine’ hamayse makkam goyt marimaada marime” kina ki hamade.

<sup>31</sup> Bhethiroosaar dhalqam wocchi hayayse “Dembhi ko hannaar, hambete diyayda diye; hamin ko daahaakaar ‘Inta kiam dhesattine’ hamayse marimattine” kina ki hamade. Eeno waani wulaar yin ko giyade.

*Yesus Getesemaane Raqinte Barjoam Kinin Miskoono*

*Maat 26:36-46; Luq 22:39-46*

<sup>32</sup> Ogora Getesemaane hambhen raqindar ke yivade. Ogoteear Yesus yisa paanan yivayna eenana “Barjoam inin miskenka yedi kote dooqee” ki hamade. <sup>33</sup> Bhethiroosbee, Yayqoobbee, Wannisbeam yinka entsate yivayse Yesus targadhite gaalan ki yedade.

<sup>34</sup> Kenaar yin ki giyade: “Qaabono idar thoothayse iam deesamba koda haye; ogona yedi kote dooqayse wocchimbhayse toolee” ki hamade. <sup>35</sup> Kekala likka pegadhayse peendar kumpurdhayse, dandimea ko hanna, kaa wodaka maatota dohoono yerro kidara konin sagoadettsi Barjoam ki miskade: <sup>36</sup> “Imbo, yer wul hana dandima ko dandime. Ko gaalen wucimanam inin wucoamadettsi ikalanka pegisima! Ko daahaannaar hanin nashaadettsi ko dee; inin nashaadettsi ko dahabhoode” ki hamade.

<sup>37</sup> Ogosa budonte maataate kinin nivenka, raatayse ke daaka keam haapayse, Bhethiroosna yi giyna: “Simoon, ya raatidu? Savaat kala hattear wocchimbhayse toolano haam bashidu? <sup>38</sup> Taysate yeam siyonsa iinte arsente yenin ardoamadettsi wocchimbhayse Barjoam miskee. Eedisa qaabe ashkimbhine; ko daahaannaar waano eedisa qajadhine” kina ki hamade.

<sup>39</sup> Tapir yivayse ini yinin miskon upsinka Barjoam ki miskade. <sup>40</sup> Pir yisa paanan yivayna eenakal kinin nivenka, gindhe keam bashonna raatayse kenin dohonte keam ki haapade. Kediar kina kinin giyenam dhesadehe.

<sup>41</sup> Makkanso goyt kekal nivayse kena yin ki giyade: “Taar yedi raatidu? Tapir lay ukunsee ukunso? Keeda yena yeekidine, wodanoar yeskidine. Marrato! I Eedi

Naaseam seeson eenasa aaninte yettsate iam koda imbbe. <sup>42</sup> Keeda dhaabhee! Wo yive; iam yettsate imea kash, theedidine” ki hamade.

*Yesussa Banqin Eenayn Kiam Yedoono  
Maat 26:47-56; Luq 22:47-53; Wannis 18:1-12*

<sup>43</sup> Yesus ogoam akar giyte ki daaka, marrato! Tabhi lamaana kisa paanan yivayna eenasa kalaa Yiwda saana ki nivade; kimbesana kinka halpabee haljobe bovoono thoothino eeno gudullasa hayonabee, Musesa yigginam dhettsayna eenabee, donzan-abekalanka nittsadhaysaka ko nivade. <sup>44</sup> Yesusam yettsate imea Yiwda eenana birayse “Inin sunqea kidine; kiam yedate payya toolayse bavate yivee” hamayse milkit kena imidine.

<sup>45</sup> Kidiar saanawa kalan nivayse hatte, “Dhettsea” hamayse kiam ki sunqade. <sup>46</sup> Eenaar ogosa budobar kiam ke yedade. <sup>47</sup> Theedin kikal woyayse dahaana eenasa eedi kalaa halpanam yisa gochayse gudullasa gebhaasa waadiman ea qaaminam taxate ki dhabade. <sup>48</sup> Yesusaar “Eedisa koymo buurate itsea eedidettsi hayayse iam yedana halpabee haljobe bavatee nivaaw? <sup>49</sup> Roro wul Barjosa gazan ooninsa mayante eenam dhettsada yembesana kinka inin dehenka iam yedeetene; ko dahaannaar Mathaap Gazante thaapadhoono konin thoothoadettsi ko yin maatade” kena ki hamade. <sup>50</sup> Kisa paanan yivayna eena wulaar kiam garayse gobate ke yivade.

<sup>51</sup> Lathana bish qaadhaa naasi barsh kalaa kisa paanan nivite ki dahade; eenaar kiam ke yedade. <sup>52</sup> Kidiar lathanaam kedar garayse pundiri gobate ki yivade.

*Yesusam Pirdin Pirdaynakal Baadhoono  
Maat 26:57-68; Luq 22:54bee 63-71be; Wannis 18:13-14bee 19-24be*

<sup>53</sup> Yesusamaar gudullasa gebhaakal entsate ke yivade. Ogotear gudullasa hayonabee, donzanabee, Musesa yigginam dhettsayna eenabe wul kinka bukayse ke dahade. <sup>54</sup> Bhethiroosaar gudullasa gebhaa kerminsa iinte kinin yeskenka yekka, Yesussa paanan pegeka ki nivade; ogotear poolisanabete nuun kicardhite ki dooqade.

<sup>55</sup> Gudullasa hayonabee Yiwda peensa donzana wulbe Yesusam dembhi pirdina yeskisea tarja haapano ke zagade; ko dahaannaar haapadehe. <sup>56</sup> Ogonoar thoothino eeno buudamoka kidar tarjite ko dahade; ko dahaannaar eensa tarjamono kinka kidar upsi kalaa maatadehe.

<sup>57-58</sup> Eensa waani waaniar dhaabhayse, “Inta ko aaninka woysadhon Barjosa gazan ooninam kottsayse rooro makkamka ab aanka woysadhaamon ooni woysayda woyse’ kinin hamen wodi qansidine” hamayse buudamoka kidar ke tarjade. <sup>59</sup> Yin giyayse kinin tarjenkaar kesa tarjamono kinka kidar upsi kalaa maatadehe.

<sup>60</sup> Gudullasa gebhaa kesa shaarira dhaabhayse, “Yer kala hattear malsi maasattanu? Eena kina hadar kenin tarjayno kono yer hare?” hamayse Yesusam ki oysade.

<sup>61</sup> Kidi lay hamayse yer kala hattear maasadehe. Pir gudullasa gebhaa “Gobshadhaa Barjoyn qadhaa kisa Naasa Kiristoos yaw?” hamayse kiam ki oysade.

<sup>62</sup> Yesusaar “Intane; Eedi Naas kantanka dahaa Barjosa mizaqimbar dooqayse kinin dohonbee cecira polonka kinin nivenbeam haapeeda haape” kina ki hamade.

<sup>63</sup> Gudullasa gebhaa dhagaka yisa apalanam hattsayse, “Keeda os tarja ab wona harrna ko zaske? <sup>64</sup> Yedi kisa iiromenam qansidine. Yena har ko maate?” ki hamade.

Kidi wulaar “Dembhi ko kiam zaske” hamayse ke kidar pirdade.

<sup>65</sup> Waani waani enoar kidar pathimaate, aapinamaar kisa ochayse kiam gutaate, “Hamota dohon yerinam wona giyaa” kina ke hamade. Poolisanaar kiam cavada entsate ke yivade.

*Bhethiroos Yesusam Kinin Marimoono  
Maat 26:69-75; Luq 22:56-62; Wannis 18:15-18bee 25-27be*

<sup>66</sup> Bhethiroosaar gudullasa gebhaa mayan kerminsa iinte choobar ki daaka, gudullasa gebhaa ooninte waadadhayna maanasa maa kallo nivayse, <sup>67</sup> nuun kinin kicardhenka kiam haapayse shirshate shedayse, “Ya pir Naazretra nivaa Yesusbete dahaane” kina ko hamade. <sup>68</sup> Kidiar “Hanin giyayno yer har konin dohon dhesattine; inaar bhoqehe” hamayse ki marimade. Ogora mayanka ki utade. [Baacha ki qiiqade.]

<sup>69</sup> Waadiman edonoar kiam shedayse ogote woyaana eenana “Ea kaar kembesana kinka ki dahade” hamayse lansi pir giyan ko yedade. <sup>70</sup> Kidi pir marimidine.

Likka kap hamayse ogote woyayse dahaana eena tapir Bhethiroosna “Ya Galila eedi hanin dohonna, gon ya kembesana kinkaa dahade” kina ke hamade.

<sup>71</sup> Kidi “Yenin giyea eam inta dhesattine!” hamayse yiam ashite malliman ki yedade.

<sup>72</sup> Saanawaar baacha lanso goyt ki qiiqade. Bhethiroosaar “Baacha lamaa goyt qi-iqima makkam goyt ‘Inta kiam dhesattine’ hamayse iam marimaada marime” hamayse Yesusin kina giyoono kalan bhoq ko hamaysaka ki eepade.

## 15

*Yesusam Bhilathoosdar Yedate Yiidhoono  
Maat 27:1-2bee 11-14be; Luq 23:1-5; Wannis 18:28-38*

<sup>1</sup> Burin peen sedhaysaka saanawaar gudullasa hayona Musesa yigginam dhettsayna eenabee, Ayiwd peensa donzana wulbe kinka kenin dhalqonsa budonte, Yesusam yedate dhaxayse bavate kiam Bhilathoosna ke imade. <sup>2</sup> Bhilathoosaar “Ayiwd eenasa bitaa yaw?” hamayse kiam ki oysade. Kidiar “Inta hanin giyaadettsine” hamayse kina ki maasade.

<sup>3</sup> Gudullasa hayona yer thoothi goytika kiam ke bersade. <sup>4</sup> Bhilathoos pir “Ya yer kala hattear giyattanu? Kedi yer meemay goytika haam kenin bersenam shedaa” hamayse kiam ki oysade. <sup>5</sup> Yesus Bhilathoosin targadhenka yekka yer kala hattear kina maasadehe.

*Yesusdar Dembhin Pirdinin Pirdadhoono  
Maat 27:15-26; Luq 23:13-25; Wannis 18:39-19:16*

<sup>6</sup> Bhilathoos levenka levenka Ayiwd eensa Paasikan wodanka, eedi kalaa dhaxira kena kinin buloadettsi eenin oysaa eam kida bule. <sup>7</sup> Ogo wodanka wobamo waadimaka peendar banqi dhaasintaka eedi deesayse dhixin ooninte dhaxadhaana eenasa eedi kalaa Barbaan hambhea dahade. <sup>8</sup> Eenoar bukayse Bhilathoos yisa dambindettsi kena ki haye kiam miskan ko yedade. <sup>9</sup> Bhilathoosaar “Ayiwd eensa bitaam yena dhaxira inin buloadettsi yedi nashee nasho?” hamayse keam ki oysade. <sup>10</sup> Yin giyayse keam kinin oysoono gudullasa hayona Yesusam sun woogintaka kenin yettsate imonam kinin dhesennane.

<sup>11</sup> Gudullasa hayona “Kintea ooloate Barbaan ki dhaxira wona buldhe” hamayse zarsinin miskoadettsi zarsinam ke sobarsade. <sup>12</sup> Bhilathoos pir maasayse “Ta keeda ‘Ayiwd eenasa bitaane’ yenin hamea eam hamin i hayo?” hamayse keam ki oysade. <sup>13</sup> Kidiar tapir maasayse “Kiam ziitayse deesima!” hante ke ilatade. <sup>14</sup> Kidiar “Hare? Har ki seesaa?” kena ki hamade. Kidiar “Kiam ziitayse deesima!” hamayse ini hamora sagi ilatite ke waajade. <sup>15</sup> Bhilathoosaar zarsinam wozisota hamayse Barbaanam kena ki bulade; Yesusam qansayse kinin ziitadhoodettsi saskate ki imade.

*Poolisana Yesusdar Kenin Bagimoono  
Maat 27:27-31; Wannis 19:1-3*

<sup>16</sup> Poolisanaar peen wottsea easa kermin Piraytoriyon hambhente kiam entsate ke ardade; ogotear shidhaana poolisana wulam eelate ke buskade. <sup>17</sup> Apala zoo kiam ke qattsade; ukumbha qorayse kisa metendar ke wodade. <sup>18</sup> “Ayiwd eenasa bitaa, payyamo hana ko dee” hamaate bagada kiam gobshan ke yedade; <sup>19</sup> kisa metentear haljoka qanada kidarar ke pathimade. Pir kumpurdhayse goodimayna maatayse kiam

keda bage. <sup>20</sup> Kiam kenin bagonsa budonte, apalan zoonam kidara bulayse kinnon apalanam tapir kidar ke qattsade; kiamaar masqalindar konngayse ziitate deesana entsate ke yivade.

*Yesusam Masqalindar Ziitadhoono  
Maat 27:32-44; Luq 23:26-43; Wannis 19:17-27*

<sup>21</sup> Kenin yivenka, Iskindirosbee Rupoosbesa imbaa Qerena peen ea Simoon hambhea gurdara katamandar kinin nivenka, Yesusam ziitadhen masqalinam kantaka kiam ke kettsade. <sup>22</sup> Ogora Golgota hambhen raqindar kiam entsate ke yivade; “Golgotta” hamintano “Eedisa Metedettsi Maataa Raq” hamintane. <sup>23</sup> Ogote kenin yeskon wodanka kerbe hambhea dheeshaam woynea hattasa aapira cuubate ashkadhon wucadhensa iinte worsayse kinin wucoadettsi kina ke imade; kidiar wucadehe. <sup>24</sup> Masqalindar kiam konngayse ke ziitade; kisa apalanamaar hayna hayna ko yeskeatto hamayse itha daran dhabayse ke kashimade. <sup>25</sup> Kiam masqalindar kenin ziitenka burin savaat makkamne. <sup>26</sup> Kidar pirdadthon dhettsayno thaapino yin giyaynone: “Ayiwd eenasa bitaane” hamayno thaapine. <sup>27</sup> Pir eedi lamaa eedisa koymo sarite itsaynasa, kalaam kisa mizaqimbar, lansoam kisa warkatambar konngayse ke ziitade. <sup>28</sup> [Mathaap Gazantear, “Seeson eenbete kiam ko paydadhadde” hamayse giidhoono dhalqino ko thoothade.]

<sup>29</sup> Ogoka sagate yivayna eenaar Yesusam iiraate metenka yisa jugimaate “Evv! Ya ‘Barjosa gazan ooninam kottsayse rooro makkamka pir ida woyse’ hamea, <sup>30</sup> masqalindara hanchayse ta haam dhacchaa!” hamaate kiam ke bagade.

<sup>31</sup> Ogodettsi pir gudullasa hayonabee Musesa yigginam dhettsaynabe kinka kikal yin giyada kiam ke bagade: “Een waaniam dhacchayse yiam dhacchana damadehe. <sup>32</sup> Kidi Barjoyn qadhaa Kiristoos, Israveel eensa bitaa ki hanna, yinda ta ko kiam ziitadhon masqalindara ki hanche; wodiar shedayse kidar woylamin qajooda qaje” ke hamade. Kimbesana kinka ziitadhaana eenaar kiam ke iirade.

*Yesusin Diyoono  
Maat 27:45-54; Luq 23:44-49; Wannis 19:28-30*

<sup>33</sup> Rooron savaat laxra yedayse savaat salin thoothenka yekka peen wuldar thipa ko maatade. <sup>34</sup> Savaat salka Yesus “Elohe, Elohe! Lama sabagtani?” hamayse upsin yisaam kattsi dhevayse ki ilatade. Kosa bulinoar “Isa Barjoa, isa Barjoa! Harrnaa iam garaa?” hamintane.

<sup>35</sup> Ogotear woyon eensa waani eeno Yesusin giyenam qansayse, “Marrato, Eeliasam kida eeble” ke hamade. <sup>36</sup> Kesa iira kalaa gobayse woyni thorkaasa iir saaro tittsate bavayse ki wuce malkaka Yesussa apondar wodayse, “Yinda Eelias nivayse kiam kinin dhacchenam wo shede” ki hamade.

<sup>37</sup> Yesusaar upsin yisa dhevayse ilatayse ki diyade.

<sup>38</sup> Barjosa gazan ooninsa gidin kashadhoono apallo bhaara choo nukindar kiaddha raq lamaadar ko havade. <sup>39</sup> Ogotear kisa birante woyaa mato alaqa Yesus hamin kinin diyonam\* yinin haapon wodanka, “Gon ea kaa Barjo Naasine” ki hamade.

*Golgotta Dhukandar Dahaana Maana  
Maat 27:55-56; Luq 23:49; Wannis 19:25-27*

<sup>40-41</sup> Pegeka woyayse shedayna maa waani raqin ogote ke dahade. Kediar Galila peente kinin dohonka kisa paanan yivaynabee kina waadadhayna Megdela peen edon

---

<sup>15:28</sup> Isi 53:12.    <sup>15:34</sup> Maz 22:1.    \* <sup>15:39</sup> “Hamin kinin diyonam” hamea ena mathaapin waani waanir “hamin ilatayse kinin diyonam” hamayse koda giye.

Mayriyambee, Ilpoos naasa Yayqoobbee<sup>†</sup> Yoosabesa indan Mayriyambee, Seelomebe kembesana kinka ke dahade; kimbesana kinka Yerusaalemdar utaana thoothi maa waani ke dahade.

*Yesusam Duukadhoono  
Maat 27:57-61; Luq 23:50-56; Wannis 19:38-42*

<sup>42</sup> Peen sootaysaka, ashkimbhen rooron maqayse ukunsen roorondar ardota konin hayenga, <sup>43</sup> Ayiwd peen donzanasa gobshadhaa, Armatias kataman ea Yoseep ki nivade. Kidiar Barjosa bitamonam wozaka toolite ki dahade. Kurtumbhima Bhilathooskal yivayse Yesussa leesinam kina kinin imoadettsi ki miskade. <sup>44</sup> Bhilathoosaar “Saanawa hamin ki diyaa?” hamayse ki targadhade. Mato alaqamaar eelayse, “Gon diyayse kappidu?” hamayse kiam ki oysade. <sup>45</sup> Mato alaqakal qansayse Yesussa leesinam Yoseepna ki imade. <sup>46</sup> Yoseepaar apala shanayse leesinam masqalindara hanchayse apalanka ki ochade. Ogoraar seeni layta palsayse ashkadhon duukin oolonte kiam ki duukade; seeni gaari gunngate duukinsa aponam ki shupade. <sup>47</sup> Megdela peen edon Mayriyambee Yoosa indan Mayriyambe hamote kiam kenin wodenam shedite ke dahade.

## 16

*Yesusin Dembhira Dhaabhoono  
Maat 28:1-10; Luq 24:1-12; Wannis 20:1-10*

<sup>1</sup> Ayiwd eensa ukunsen rooroayn maqonsa budonte, Megdela peen edon Mayriyambee, Yayqoobsa indan Mayriyambee, Seelomebe kinka yivayse Yesussa leesinam qadhotu shitto gaamea ke shanade. <sup>2</sup> Wuudi burin haynin utenka duukindar ke yivade. <sup>3</sup> Kidiar kinka kikal “Duukin oolonsa apon shupadhon seeninam wona hayne gunngate maroa?” ke hamade. <sup>4</sup> Senno kattsi gaari konin dohonna, dheg hamayse kenin shedenka duukinsa apora gunngumayse konin dohonam ke haapade. <sup>5</sup> Duukin oolonsa iinte ardayse apala cawli qaadhaa naasi barsh kalaa mizaqimbar dooqayse ki daaka, kiam haapayse ke targadhade.

<sup>6</sup> Kidi kena “Targadheebhode! Yedi masqalindar konngate ziitayse deesadhaa Naazret peen Yesusam yeda zage. Kidi dhaabhidine; kote qolehe. Leesinam wodadhoono rango koshee, shedee. <sup>7</sup> Ko dahaannaar yedi yivayse kisa paanan yivaynabee Bhethiroosbena ‘Kidi yeam birayse Galila peendar kida yive; yena kinin giyondettsi yedi kiam ogote yeda haape’ hamayse kena giyee” ki hamade.

<sup>8</sup> Ogora igina maana gibattsite keam yer tarshan konin yedonna utaate duukin raqira ke gobade; kattsiar kenin kurtumbhonna yer kala hattear eedina giyadehe.\*

*Yesus Megdela Peen Edon Mayriyamkal Kinin Haapadhoono  
Maat 28:9-10; Wannis 20:11-18*

<sup>9</sup> [Gabansa biraa rooroaka Yesus burburi seddhiman dembhira yinin dhaabhonsa budonte, birayse tobbaana beeronaam kinindara bulon Megdela peen edon Mayriyamna ki haapadhade. <sup>10</sup> Kodi yivayse kisa paanan yivayna eena bukayse qaabitebee eepitebe kenin dohonte, ogo yin maaton yerinam kena ko giyade. <sup>11</sup> Kidiar sadaka dahayse kona kinin haapadhonam kenin qansenka, gonne hamadehe.

\* <sup>15:40-41</sup> “Ilpoos naasa Yayqoob” hamayno Girik aponka “Likkaa Yayqoob” koda hame. Kidi Zabdoos naasa Yayqoobkalanka yisa levenka tokaa kinin dohonnane. Haalin Mallan mathaapinte Yayqoob hamayna namma lamaa kinin dohonna kikala keam edana “Ilpoos naasa Yayqoob” wo hamade. Marq 3:17-18dar dohonam yivayse shadaa. \* <sup>16:8</sup> Ogodar guttsayse dohoono dhalqino ena mathaapin waani waanisa iir koda haapadhe: “Kidiar kena giidhon wulam Bhethiroosbee kimbesana kinka dahaana eenabena orgoka ke giyade. Ogosa budonte, Yesus yinti rooro wulsa dayntanna maaten ookimimon yisa gazan dhacchintan upsinam kenka haynin uterra yedayse haynin wevendar dohon peen wuldar ki yittsade” koda hame.

*Yesus Yisa Paanan Yivaynasa Lamaanana Kinin Haapadhoono  
Luq 24:13-35*

<sup>12</sup> Ogosa budontear, kisa paanan yivayna eenasa lamaana katamara utaate os gurdandar kenin yivenka, Yesus goynte kedar eedi abdettsi maatayse kena ki haapadhade.

<sup>13</sup> Kediar yivayse waani eenana ke giyade; igina eenaar pir gonne hamadehe.

*Yesus Yisa Paanan Yivayna Eenana Kinin Haapadhoono  
Maat 28:16-20; Luq 24:36-49; Wannis 20:19-23; Yi Waa 1:6-8*

<sup>14</sup> Ogosa budontear, kummandar dooqayse ke daaka tabhi kalaana yisa paanan yivayna eenana ki haapadhade. Dembhiraar kinin dhaabhonsa budonte, kiam haapaana eena “Wodi kiam haapidine” hamayse kena kenin giyenka, gonne hamayse kenin tiyaamon goynbee kesa qaaben kaymakkon goynbeka keam ki wacimade. <sup>15</sup> Kenaar yin ki giyade: “Peen wulsa iinte yivayse Barjosa dhacchintan upsinam een wulna giymate.

<sup>16</sup> Barjosa dhacchintan upsinam gonne hamayse tiyaabee shiidhaabe dhaqa ki dhaqe; tiyaamadar pirda ko pirdadhe. <sup>17</sup> Barjosa dhacchintan upsinam tiyaanana imbhayna milkitina kinane: Naaben innonka beeronaam bula ke bule, apo haalikaar dhalqa ke dhalqe. <sup>18</sup> Guninam aaninka yeda ke yede; een deesen davininam ke wucaakaar yer keam hayehe. Hajadhaana eenadar aaninam yisa keda wode; kediar paasha ke paashe” ki hamade.

*Yesus Cecindar Kinin Yivoono  
Luq 24:50-53; Yi Waa 1:9-11*

<sup>19</sup> Imbaa wontea Yesusaar ogoam kena yinin giyonsa budonte, Barjo cecindar kiam ki tiyade; ogora Barjosa mizaqimbar ki dooqade. <sup>20</sup> Kisa paanan yivayna raqin wulir yivayse Barjosa upsinam ke giyade; Imbaa Yesusaar kembesana kinka waadadhite ki dahade; kenin giyenka, kidi yisa upsinsa gonamonam tarshen waadimanka kida wocchise.]

## Luqaasin Thaapoono

### Imbaa Wontea Yesus Kiristoossa Dhacchintan Goynam

### Giyayno

### Barjosa Upsino

#### *Ardinta*

Luqaas akkim ki dahade; Luqaas Yesus yina kinin kamaana tabhi lamaana kisa paanan yivaynaraatehe. Yesus yisa tarjamonnante kinin yittsaa Bhawloossa aanamone. Luqaas Yesus Kiristoossa dayntan goynam kaa mathaapaate ki thaapade; tapir Yittsadhaanasa Waadiman mathaapinte birayse woysadhon misken ooninsa ki thaapade. Yesus kala hattear seesoysa qolma maatayse kinin dohonsa eedina ardea upsinka Luqaas mathaapaam ki thaapade.

Kaa mathaapaam Ayiwday hamma eenara kattsika Girik eenana qaabayse Luqaas ki thaapade. Girik eena leve thoothisa birara yedayse gon hama eedi zagite ke dahade. Luqaas kenin zagea gonin hama ea Yesus kinin dohonam dhoota ki thaapade.

Kaa mathaapasa iinte Luqaas birara yedayse macchinka yekka Barjosa dhacchintan upsino een wulna konin dohonam kida giye. Mathaapino Yesus Eedi Naas dahayse Israveel peen wul gidir payya waadima hayada, kisa waadimano peen ogora sagayse een wulna konin yeskoadettsi Yesusin qaabonam koda dhee.

Kaa mathaapaam raq tobbaadar kashana dandima ko dandime:

1. Mathaapino harrna konin thaapadhoono (1:1-4)
2. Eedi Naasisa ashkimbheno (1:5-4:13)
3. Eedi Naasin Galila gidir waadadhoono (4:14-9:50)
4. Eedi Naasin Yiwda peenbee Yordaanoos baynsa saabarbe waadadhoono (9:51-18:30)
5. Eedi Naasin Yerusaalem gidir waadadhoono (18:31-21:38)
6. Eedi Naasin diyenka kinin waadadhoono (22:1-23:56)
7. Eedi Naasin dhaabhenka kinin waadadhoono (24:1-53)

<sup>1-2</sup> Gobshadhaa Toploos, birara yedayse yisa aapinka shedayse tarja maataana, Barjosa dhacchintan upsinkaar waadadhyna eena wona kenin saskaadettsi wonnon shaarinte maaton yerinam thoothina eena ashkayse thaapidine. <sup>3-4</sup> Inta taar ogodettsi birara yedayse payya hayayse bhocchayse inin dhesonna, hanin dheson timmirinam ha tipise guttsi guttsi hana thaapanan payya maatayse ina ko haapadhade.

#### *Shivea Wannissa Adhadhin Goynam Barjosa Gaanaa Gabreelin Giyoono*

<sup>5</sup> Herodis Yiwda peente kinin bitimon levenka, Abiya muldhara gudula Zakkarias hambhea dahade. Kisa geshonoar gudula Aaron muldhara dohoono Elsaabeth hambhaynone. <sup>6</sup> Kedi lamaanaar Barjo yinin giyonbee kisa yigginbeka yer siya yindar haapadhimina maatayse Barjo birante tipa ke dahade. <sup>7</sup> Elsaabetaar seeki konin dohonna, kesa naasi qolehe; pir kedi lamaanaar kattsi gecchidine.

<sup>8</sup> Zakkariasaa yisa muldhanabesana Barjosa gazan ooninte kinin waadadhayno wodan yeskonna Barjosa birante kinin waadadhenka, <sup>9</sup> Barjosa gazan ooninte ardayse qunyan ki cubshe gudulmakkon goynka kidar itha ko yeskade. <sup>10</sup> Barjosa gazan ooninte qunyan cubshadhenka eeno wul mayante woyayse Barjoam koda miske.

<sup>11</sup> Barjosa gaanaa qunyan daran cubshate imben raqinsa mizaqimbar woyayse ki daaka, Zakkariasna ki haapadhade. <sup>12</sup> Zakkariasaa kiam yinin haapenka, targadhayse kattsi ki kurtumbhade. <sup>13</sup> Barjosa gaanaa kina yin ki giyade: “Zakkario, kurtumbhaabhode! Barjo hasa miskenam qansidine; geshono hasa Elsaabeth naasi anngi adha

ko adhe; kisa naabenamaar Wannis hamayse hada wode. <sup>14</sup> Kinin adhadhonna hana kattsi woza koda dee; thoothino eenoor kisa adhadhinka koda wozadhe. <sup>15</sup> Harrna hambhidiana, Barjosa birante eedi gebhi kida maate. Woynea hattasa aapin cuubadhonbee waani een barsen wucadhenbeam wucehe; ki adhadhima indansa iinte ki daaka, Manpas Gazanka kida thoothe. <sup>16</sup> Kidi Israveel eensa thoothin eenam Imbaa kesa Barjodar keam kida maase. <sup>17</sup> Kidi Barjoyn nivensa birayse manpasinbee kantanbeka Eeliasdettsi maatayse Wannis eendar kida nive. Imbanasa woylaminam naanadar kida maase; ee hamimina eenasa woylaminam tipana eenasa pakalmakkondar kida maase. Ogoka eno Barjona ashkimbhoono konin doadettsi koam kida haye” kina ki hamade.

<sup>18</sup> Zakkariasaa Barjosa gaanaana “Inta gecchidine, isa geshonoar gecchidine. Keeda ogono gon konin maatenam hamin ida dhese?” kina ki hamade. <sup>19</sup> Barjosa gaanaar kina yinin maasenka, “Inta Barjosa birante woya Gabreelne. Ogo wozisen dhalqinam hana inin giyoadettsi Barjo iam kinin nittsonna hakal i nivade. <sup>20</sup> Yaar wodan yeskenka maaten isa dhalqinam hanin tiyaamonna, ogo inin giyon wul konin maatea rooroaka yekka apo kaya hada maate; dhalqana damattane. Inin giyoono wul thootha ko thoothe” kina ki hamade.

<sup>21</sup> Eenoar Zakkariasam kaalite ko dahade. Barjosa gazan ooninte kinin kaponna, “Hamin ki hamaa?” hamayse ke bhocchade. <sup>22</sup> Zakkarias Barjosa gazan oonira yinin utenka eenna giyana damadehe. Ogonante Barjosa gazan ooninte Barjokala yer kinin haaponam kedi dhesidine; kidiar milkitka kena eshkaate apo kaya maatayse ki shidhade. <sup>23</sup> Barjosa gazan ooninte kinin waadadhen wodan maqaysaka, yisa oonindar ki yivade.

<sup>24</sup> Ogosa budonte kisa geshono Elsaabeth sirmayse arpi dongna ooninte aadhimbhayse ko dooqade. <sup>25</sup> Kodiar “Barjo yisa nashimmakkonka iam kinin shedaa wodaka ogodettsin yerin payyan ina ki hayade; eensa shaarinte idar dohon ooshimbenam ki shiishade” ko hamade.

### *Yesusin Adhadhenam Gabreelin Giyoono*

<sup>26</sup> Elsaabeth konin sirmonsa laskoa arpeaka Barjo yisa gaanaa Gabreelam Galila peen Naazret hambhen katamandar, <sup>27</sup> Dawtsa muldhara Yoseep hambhea yinin seeson anngika wodhaamon naandar kiam ki yittsade. Naan ogosa naabeno Mayriyam koda hambhe. <sup>28</sup> Barjosa gaanaar kokal nivayse, “Ya Barjosa nashadhoono, payyamo hana ko dee; Barjo hambetene. [Ya maanasa shaarinte gobshadhoonone]” kona ki hamade. <sup>29</sup> Kodiar kisa dhalqinka kattsi targadhayse, “Kono hamin dohoono nagaymakkone?” hamayse ko qaabade.

<sup>30</sup> Ogora Barjosa gaanaar kona yin ki giyade: “Mayriyam, Barjosa birante gobshi hanin haaponna kurtumbhaabhode. <sup>31</sup> Shedaa! Ya sirmaada sirme; naasi anngiar adhaada adhe; kisa naabenamaar Yesus hamayse hada wode. <sup>32</sup> Kidi eedi gebhi kida maate; kanka Wuldara Sagea Barjo Naasine koda hambhe. Imbaa Barjo kisa imbaa Dawtsa bitamon borkotonam kina kida ime. <sup>33</sup> Yayqoobsa muldhandar rooro wulna lay kida bitime; kisa bitamonsaar macchi qolehe” kona ki hamade.

<sup>34</sup> Mayriyamaar Barjosa gaanaana “Inta anngika wodhayse inin dhesaamonna, ogono hamin ko yin dee?” kina ko hamade. <sup>35</sup> Kidiar kona yin ki giyade: “Manpas Gazano hadar niva ko nive; Wuldara Sagea Barjosa kantano hadar koda shipe. Ogonante hanin adhea gazaa naasa Barjo Naasine kida hambhe. <sup>36</sup> Shedaa! Hasa muldhano Elsaabetahaar ta yisa gecchamondar naasi anngi kodi sirmidine; seekine hambhayno ko sirmaysaka kono kosa arpi laskone. <sup>37</sup> Harrna hambidianna, Barjoam bashea yer qolehe” kona ki hamade. <sup>38</sup> Mayriyamaar, “Barjosa waadiman edono intane. Hanin giyondettsi ina ko dee” kina ko hamade. Barjosa gaanaar kokalanka edimayse ki yivade.

### *Mayriyam Elsaabethaam Shedo Konin Yivoono*

<sup>39</sup> Ogo wodanka Mayriyam dhaabhayse Yiwda peente dhukanka dohon katama kallondar saana yivayse, <sup>40</sup> Zakkariassa ooninte ardayse Elsaabethaam ko nagaysade. <sup>41</sup> Elsaabethaar Mayriyamin nagaysenam konin qansenka, iinte kosa dahaa naasa kattsi ki ruqumade; Elsaabethaar Manpas Gazanka ko thoothade. <sup>42</sup> Kodiar upsi gebhika yin ko giyade: “Ya mansen naana wulra gobshadhoonone; hanin adhea naasaar gobshadhaane. <sup>43</sup> Barjoyn qaadhaa Imbaam adhayno ikal hanin nivayno hamin dohoono ina gobshine. <sup>44</sup> Shedaa! Hanin nagaysenam qansite i daaka, isa iinte dahaa naasa wozaka ki ruqumade. <sup>45</sup> Barjo Imbayn hana giyon wulam maata ko maate hamaye hanin tiyonna, ya gobshadhoonone!” kona ko hamade.

### *Mayriyam Barjoam Konin Gobshoono*

<sup>46</sup> Mayriyam yin ko giyade:  
“Isa sadano Barjo Imbaam koda gobshe;  
<sup>47</sup> isa woylemmoar iam Dhacchea Barjoka koda wozadhe.  
<sup>48</sup> Inin wozadhayno Barjo i ko tokaa maaton yisa waadiman edonam kinin haaponnane. Kinara yedayse adhadhino wul gobshadhoono iam koda hame.  
<sup>49</sup> Ogonoar kantanka dahaa Barjo ina yer gebhi kinin hayonnane;  
naabenoar kisa gazane.  
<sup>50</sup> Barjoam kurtumbhen eenna  
adhadhira adhadhinka yekka,  
Barjo kena burqadhayse yer payya kida haye.  
<sup>51</sup> Kidi yisa kantanka gebhi waadima haydine.  
Yisa bhocchinka poorimbhaynaam kidi kekalanka thar thar haydine.  
<sup>52</sup> Peen wottsaynaam kesa bitamora keam hanchidine;  
yirk hamaynaam gobshika keam dheg haydine.  
<sup>53</sup> Daaqardhaanaam yer payyaka kidi micchidine;  
wodimma eenaam aan guuri keam ki yittsade.  
<sup>54-55</sup> Barjo wosa eykena Abraambee kisa muldhanaabena  
‘Roro wul lay yena burqadhayse yer payya ida haye’  
hamayse kinin giyon wozanam bhocchintaka,  
kina waadadhayna Israveel eenaam kidi kelshidine”  
ko hamade.  
<sup>56</sup> Mayriyamaar Elsaabeth ooninte arpi makkamaddha dooqayse yisa oonindar maatate ko yivade.

### *Shivea Wannissa Adhadhidino*

<sup>57</sup> Elsaabethaar adhiman arpin kosa yeskaysaka naasi anngi ko adhade. <sup>58</sup> Kosa gurdan eenabee muldhabe Barjo yisa nashimmakkonam kona thoosayse kinin hayonam qansayse kombesana kinka ke wozadhade. <sup>59</sup> Kediar lankaysoa rooroaka naasasa qaamanam taxana ke nivade; imbaasa naabenka Zakkarias hamayse kisa naabenam wodana ke qaabade. <sup>60</sup> Indano “Yin dehehe; nammo kisa Wannisne” kena ko hamade. <sup>61</sup> Kediar “Hasa muldhante naabea agaaka eldhea hay ki hannaar qolehe” kona ke hamade.

<sup>62</sup> Ogora imbaam “Hasa naasaam hay hamayse eldhoodettsi ha nashe?” hamayse milkitka kiam ke oysade. <sup>63</sup> Zakkariasaar milkitka yer thaapi thaapadhea oysayse, “Kisa nammo Wannisne” hamayse ki thaapade. Eeno wulaar targadhidine. <sup>64</sup> Ogo wodanka saanawa Zakkariassa apono ko bulimade; Barjoamaar gobshaate dhalqan ki yedade. <sup>65</sup> Gurdante dohon een wulna kurtumbhe ko maatade. Ogono yerro wul Yiwda peen dhukanka dohon wul gidir ko giidhade. <sup>66</sup> Qansaana wulaar, “Ta naasa kaa

hamin hamea ki doo?" hamayse yisa woylaminte ke yedade; ogonoar Barjosa kantano kimbesana kinka konin dohonnane.

### *Zakkarias Hamota Dohonam Kinin Giyoono*

<sup>67</sup> Naasasa imbaa Zakkarias Manpas Gazanka thoothayse hamota dohonam yin giyan ki yedade:

<sup>68</sup> "Israveel eenasa Barjo Imbaa wo kisa eedanakal nivayse  
wodar dohon bazanam kashayse  
woam kinin dhacchonna ki gobshadhe.

<sup>69</sup> Yisa waadiman ea Dawtsa muldhara dhacchea kanta eam kidi dhaasidine;

<sup>70</sup> enara yedayse Barjokala qansayse eenna giyayna gazana eenasa aponka kinin giyondettsi,

<sup>71</sup> woam jibbaynabee wosa banqin eenabe wulsa aanira woam dhacchidine.

<sup>72</sup> Ogoamaar yin kinin hayoono wosa eykenana burqadhadayse yer payya hayotabee  
yinin giyon gazan yisa mallanam bhocchintakabene.

<sup>73</sup> Ogo yisa mallanam eykea wosa Abraambesana kinin ardoono

<sup>74-75</sup> woam jibbaynasa aanira dhaqayse

wonin dehen rooron wulka kurtumbhe qolma

Barjosa birante gazamobee tipamobeka kina wonin waadadhoodettsine.

<sup>76</sup> Ta ya naasa kaa, Wuldara Sagea Barjokala qansayse eenna giyeane hada hambhe.  
Ogonoar kisa goynam ashkana Barjo Imbasaa birante hada yive.

<sup>77</sup> Ogona kesa seesono kena ko shidhe hambhenam Barjokalanka kinin haapen dhaqin-  
tasa timmirinam keam hada dhettse.

<sup>78</sup> Ogono yin kinin dohoono Barjo eedisa seesonam kinin garenbee kisa lemmakkon-  
bekane.

Ogonante dhaqintasa hay cecira wona utana koda haye.

<sup>79</sup> Thipante dahayse diyanna dohon een wulna kidi shaaka ki shaake;  
roonam wosa payyan goyndar kida entse"  
ki hamade.

<sup>80</sup> Naasaar gebhidine. Woylaminkaar ki wocchimbhade. Israveel eenana yinin haapadhenka yekka, darante ki dooqade.

## 2

### *Yesus Kiristoossa Adhadhidino*

#### *Maat 1:18-25*

<sup>1</sup> Ogo wodanka Roome peensa bita kinin bitimon peen wulir dohoono eeno wul naaben kinin thaapadhoodettsi Bitaa Awgistroos oosh ki ooshade. <sup>2</sup> Qerenoos Sooria peenam kinin wottsen wodanka, naaben thaapadhayno ogono bironone.

<sup>3</sup> Ogonante zarsino wul yisa eykena peendar naaben thaapsota ko yivade. <sup>4-5</sup> Yoseep Dawt muldhara kinin dohonna, Galila peen Naazret katamara dhaabhayse Yiwsa peen Betelem hambhen Dawtin adhadhon katamante kinin seeson naan sirmon Mayriyambete thaapadhotaa ki yivade.

<sup>6</sup> Ogote ke daaka, kosa adhimaa arpino ko yeskade. <sup>7</sup> Yisa biraan naasaam ogote ko adhade. Shonnayn wodhen ooninte raq kena kinin qolmonna, kiam apalanka ochayse wanngayn galan itsen gonngalante ko wottsaade.

### *Yaana Gishaynabee Barjosa Gaananabe*

<sup>8</sup> Peen ogote katamansa gasante yisa yaatonam gishite wodhayna gishiman gishayna eena ke dahade. <sup>9</sup> Iginakal Barjosa gaanaa ki haapadhadde; Barjosa gobshin shaakanoar kesa gasante ko shaakade; ogona kedi kattsi ke kurtumbhade. <sup>10</sup> Barjosa gaanaar yin ki giyade: "Hay! Kurtumbheebhode! Een wulna maatea kattsi wozisea upsi yena ida giye.

<sup>11</sup> Ogonoar kina Dawtin adhadhon katamante Dhacchea, kidiar Imbaa Kiristoos yena ki adhadhade. <sup>12</sup> Milkitino kisa yinne: Naasi apalaka ochayse wanngayn galan itsen gonngalante wottsadhaam haapeeda haape” kena ki hamade.

<sup>13</sup> Ke dhesima thoothina Barjo cecira kinin nittsaana gaanana agaa gaanaakal theedi haapadhayse, Barjoam gobshaate

<sup>14</sup> “Cecinte Barjona gobshi ko dee; payyamonoar peendar Barjo nashimmakkonka kinin sheden eenna ko dee” ke hamade.

<sup>15</sup> Barjosa gaananakekala edimayse cecindar kinin yivonsa budonte, kedi yaana gishayna eena kinka kikal “Betelem yivayse Barjoyn wona giyon ogo yerinam wo shede” ke hamade. <sup>16</sup> Saanawa yivayse Mayriyambee, Yoseepbee, wanngayn galan itsen gonngalante wottsadhaa naasabeam ke haapade. <sup>17</sup> Shedayse, naasa agaasa kena giidhon yerinam eenna ke guyade. <sup>18</sup> Ogoam qansaana eena wul yaana gishaynayn kena giyon yerinka ke targadhade.

<sup>19</sup> Mayriyam ogo yerin wulam yisa woylaminka qaaban ko yedade. <sup>20</sup> Yaana gishayna kena giidhondettsi, kinin qansonbee kinin haaponbe wulna Barjoam gobshada yisa raqindar maatayse ke yivade.

### *Naasa Yesusam Barjosa Gazan Oonindar Bavate Yiidhoono*

<sup>21</sup> Naasa adhadhaysaka kisa qaamanam taxana rooro lankay konin thoothonna, kisa indano sirmima Barjosa gaanaa kinin giyaadettsi, kisa naabenam Yesus hamayse ko wodadhade.

<sup>22</sup> Musesa yigginka gazimbhanna kinin waadadhen wodan yeskaysaka, naasaam Barjosa birante thetsana yinka bavate Yerusaalem ke yivade. <sup>23</sup> Ogoamaar kinin hayayno Barjosa yiggin mathaapinte “Birayse adhadhaa naasi anngi wul Barjona edimaa gaza eedi kida maate” hamayse thaapadhondettsine. <sup>24</sup> Ogodettsi Barjosa yigginginka “Walee likka lamaa way walee gebhisa naasi lamaa Barjona marsha machadhea hayayse bava koda zaske” hamen upsinna ogoam imana ke yivade.

<sup>25</sup> Ogo wodanka Yerusaalemir Simoon hambhea eedi kalaa ki dahade. Ea agaar Israveel eenaam dhacchayse wocchinseam toolaate dahaa eedi tipabee Barjoam gobshintaka wocchimbheabe ki dahade; Manpas Gazanoar kimbesana ko dahade. <sup>26</sup> Barjoyn qadhaa Kiristoosam haapima dembhi kinin diiminam Manpas Gazano ena birayse kina giydine. <sup>27</sup> Ogo wodanka Manpas Gazano kiam konin dhaasonna, Barjosa gazan oonindar ki yivade. Muse yigginsa dambinam toolana, naasa Yesusam imbaabee indanbe yinka tiyayse Barjosa gazan ooninte ke ardade. <sup>28</sup> Ogo wodanka Simoon naasaam yidar tiyate incayse, Barjoam gobshada yin ki guyade:

<sup>29</sup> “Imbo, ‘Hayayda haye’ ina hanin hamoono payyan upsino ko thoothade; ta keeda i hasa waadiman eam peen kora payyaka tiyaa.

<sup>30-31</sup> Ogonoar een wulsa birante hanin ashkon hasa dhacchintanam isa aapinka inta haapidine.

<sup>32</sup> Kidiar Ayiwdtay hamma eenana goninam eshkeea shaaka kida maate; hasa eedana Israveel eenanaar gobshine” ki hamade.

<sup>33</sup> Imbaabee indanbe naasa Yesussa giidhon yerin wulka ke targadhade. <sup>34</sup> Simoonaar kena Barjo eelayse indan Mayriyamna yin ki guyade: “Shedaa! Kaa naasaka Israveel eensa thoothino kanka koda kaye; pir thoothino eeno kanka koda dhaqe; thoothino eenoar kiam kinin jibbensa milkit kena kinin maatoadettsi Barjo kiam kamidine.

<sup>35</sup> Ogoam Barjo kinin hayoono thoothin eensa woylaminte aachimon qaabenam may hayanane; hasaar woylaminsa iinte qaabono halpadettsi koda uxe” kona ki hamade.

<sup>36-37</sup> Ogo wodanka Aseer zarsira Panuveel naano Hanna hambhayno Barjokala qansayse eenna giyayno ko dahade. Kodiar yisa geshoabesana kinka leve tobbhaa dooqayse, geshoa kokala diyaysaka kosa lendho eedi oydi kaysa apo oydi levenin maatenka yekka, yimal bish dahada kattsi gecchoonone. Itsima Barjoam miskada sootinbee rooronbe Barjona waadadhaate Barjosa gazan ooninsa mayara kodi edimehe. <sup>38</sup> Ogo wodanka nivayse Barjoam gobshaate Barjo Yerusaalemir eendar dohon bazanam kashayse keam kinin dhacchenam toolayna wulna naasa goynsa ko guyade.

<sup>39</sup> Barjosa yigginka giidhon wulam kinin macchonsa budonte, Yoseepbee Mayriyambe naasaam tiyayse Galila peensa kinin dohon Naazret katamandar ke maatade.

<sup>40</sup> Naasaar waanka gebhaate bhocchinkaar wocchimbhaate ki yivade; pakalmakkonkaar ki thoothade. Barjosa sunin imintono kimbesana kinka ko dahade.

### *Yesus Barjosa Gazan Oonindar Kinin Yivoono*

<sup>41</sup> Yesussa imbaabee indanbe leven levenka Paasika\* rooroa gobshadheaka Yerusaalemdar keda yive. <sup>42</sup> Yesus leve tabhi lamaa naas ki daaka, ogo Paasikan rooroaka Ayiwd eenasa dambindettsi Yerusaalemdar ke yivade. <sup>43</sup> Rooronaamaar yinin macchonsa budonte kinin maatenka, naasa Yesus Yerusaalemir shidhidine; imbaabee indanbe ogo kinin shidhonam dhesadehe. <sup>44</sup> Eenbesana kinka yivite ki dahade hamada rooro kalaa goyti ke yivade; ogora yisa muldhanabee yinin dhesayna eenabekal kiam ke zagade. <sup>45</sup> Yinin bashadhonsa budonte kiam zagaate Yerusaalemdar ke maatade.

<sup>46</sup> Rooro makkamsa budonte Barjosa yigginam dhettsaynasa shaarinte dooqayse kekalanka kinin qansenbee keamaar kinin oysenbeka Barjosa gazan ooninsa mayante ke haapade. <sup>47</sup> Kinin giyenam qansayna wul kisa qaabenbee kisa malsinbeka kattsi kedi targadhidine.

<sup>48</sup> Imbaabee indanbe kiam kinin haapenka, kedi targadhidine. Indano “Isa naasa, harrnaa yin wodar hayaa? Shedaa! Imbee hambabe kattsi gaalite haam wo zagade” kina ko hamade. <sup>49</sup> Kidiar kena yinin maasenka, “Harrnee iam zaga? Inta Imbasaa ooninte daa iam konin zaskenam yedi dheseete?” ki hamade. <sup>50</sup> Kediar kena kinin giyon dhalqinam bhocchadehe.

<sup>51</sup> Kembesana kinka dhaabhaye Naazretdar ki yivade; kenaar ee hamaate ki dahade. Kodi indanoar igma yerra wulam yisa woylaminte yedite ko dahade. <sup>52</sup> Yesus pakalmakkonbee gebhintanbeka, shawkadhaa maatayse Barjobee eedibesa birante gebhaate ki dahade.

## 3

### *Shivea Wannis Giyoono Barjosa Upsino Maat 3:1-12; Marq 1:1-8; Wannis 1:19-28*

<sup>1</sup> Roome peen bitaa Thibaroos bitimaysaka tabhi dongsoa leveaka, Bhentheawaai Bhilathoos Yiwda peenam wottsea ki dahade; Herodisaar Galila peenam wottsea ki dahade; iishima Pilbhoosaar Thurasbee Ithirakondoosbe peenam wottsea ki dahade; Lisaaniyosaar Abileene peenam wottsea ki dahade. <sup>2</sup> Hannabee Qayappabe gudullasa gembha ke dahade. Ogo wodanka Zakkarias naasa Wannis darante ki daaka, Barjosa upsino kikal ko nivade. <sup>3</sup> Ogonante Wannis Yordaanoos baynsa gasante dohon peen wulir “Yesa seesonin shidhoadettsi, seeson waadimanam garayse Barjodar maatayse shiidhee” hamaate Barjosa upsinam giyada ki yaayade. <sup>4-6</sup> Ogonoor yin konin dohoono Barjokala qansayse eenna giyea Isiasin giyenka:

“Marrato! ‘Barjoyn yeikal nivenna,

---

\* <sup>2:41</sup> “Paasika” hamen upsinam Haalin Mallan mathaapinsa macchinte thaapadhaanar shedaa.

yesa woylaminam ashkee; goynamaar kina gaz hayee.  
 Qanana wul ke thoothe;  
 dhukanabee kuttonabe yirk ke hame.  
 Wobona goynaar gaz ke hame;  
 agaammo goynoar agaa ko maate.  
 Eeno wul Barjosa dhacchintanam koda shede'  
 hamayse ilatea easa upsino darante koda qansime"  
 hamayse ena birayse Isiassa mathaapinte thaapadhondettsi ko maatade.

<sup>7</sup>Ogonante kikal shiidhanna nivon eenna Wannis yin ki giyade: "Yedi qarshi naanato, niven Barjosa wacimera gobayse yenin dhaqoadettsi yeam kiilaa hayne? <sup>8</sup>Ta keeda seeson waadimanam garayse Barjodar yenin maatonam dhehen payyan waadiman waadadhee. Yesa woylaminkaar 'Wodi Abraam naasine' hamayse erimeebhode. Yena ida giye: Barjo yi zaganna kina sennara Abraamna naasi hayayse dhaasana dama ki dame. <sup>9</sup>Ta haaqanaam taxate dhabayno tesimbho demente kesa wodadhidine; ogonante payyan aapin ushimina haaqana wulam taxate nuunte koda dhabadhe" kena ki hamade.

<sup>10</sup>Eenoar "Ta har haya ko woam zaske?" hamayse Wannisam oysite ko dahade. <sup>11</sup>Kidiar "Apala lamaa yisa dahaa kalaam qolmaana ki ime; gala yisa dahaar ogodettsi ki haye" hamayse kena ki maasade. <sup>12</sup>Gibirin kacchaynaar kikal shiidhanna nivayse, "Woam Dhettsea, woam ta har haya ko zaske?" hamayse kiam ke oysade. <sup>13</sup>Kidiar "Yena yigginte giidhorra saskayse koymon tiyeebhode" hamayse kena ki maasade. <sup>14</sup>Polisanaar nivayse, "Woamsin ta har haya ko zaske?" hamayse kiam ke oysade. Kidiar "Eensa koymonam kantaka buurate tiyeebhode; hayyeamaar buudamoka berseebhode; yesa waadimanna yena imbhayno bazano yena ko yeeke" hamayse kena ki maasade.

<sup>15</sup>Ogo wodanka eenoar Wannissa dhalqinam bhocchaate wozaka kaalite, "Kaa ea Barjoyn qadhaa Kiristoos doo ki dew?" hamayse yisa woylaminka qaabite ko dahade. <sup>16</sup>Wannisaar ke wulna yin ki giyade: "Inta noqoka yeam ida shive; ko dahaannaar idara kantaka sagea niva ki nive. Inta kisa dunngurinsa dhaxinam hattear bulana damimane. Kidi Manpas Gazanbee nuubeka yeam kida shive. <sup>17</sup>Gazgonam qanayse puqulara aapinam kinin bulea anngamo kisa aaninte ko dahade. Aapinam payya ashkayse yisa kononte kida kee; puqulanamaar dikimon nuunte kida koqe" ki hamade. <sup>18</sup>Ogonante eenaam thoothi waana waana hama goytika kiilaate Barjosa dhacchintan upsinam kena giyte ki dahade.

<sup>19</sup>Ko dahaannaar, Galila peenam wottsea Herodis iishima Pilrhoossa geshon Herodiyadaam kinin keemonnabee kinin waadadhon siyon waadiman wulbena Wannis kiam ki wacimade. <sup>20</sup>Ogona Herodis yinin waadadhon siyon waadiman wulra saskayse, pir Wannisam dhaxin ooninte ki dhaskade.

### *Yesussa Shiidhidino Maat 3:13-17; Marq 1:9-11*

<sup>21</sup>Een wulin shiidhenka Yesusaar ki shiidhade. Barjoam kinin miskenka cecino ko bulimade, <sup>22</sup>Manpas Gazanoar waleedettsi maatayse kidar ko hanchade. "Inin nashea isa Naasa yane; hanka ida wozadhe" hamea upsi cecira ko qansimade.

### *Yesussa Muldhano Maat 1:1-17*

<sup>23</sup>Yesus eenaam dhettsan kinin yedenka lendho kisa eedi kalaa kaysa apo tabhiadhane. Eenna Yesus Yoseep naasi kida maate. Yesussa eykena kinane:

<sup>24</sup>(38) Barjo naasa Addaam,  
Addaam naasa Seet,

Seet naasa Henoos,  
<sup>25</sup> (37) Henoos naasa Qaynan,  
 Qaynan naasa Malaliveel,  
 Malaliveel naasa Yaared,  
 Yaared naasa Henook,  
 Henook naasa Matusaala,  
<sup>26</sup> (36) Matusaala naasa Laamex,  
 Laamex naasa Nohe,  
 Nohe naasa Seem,  
 Seem naasa Arpakisaad,  
 Arpakisaad naasa Qaynim,  
<sup>27</sup> (35) Qaynim naasa Sheela,  
 Sheela naasa Ebeer,  
 Ebeer naasa Peleeg,  
 Peleeg naasa Revu,  
 Revu naasa Serug,  
<sup>28</sup> (34) Serug naasa Naakor,  
 Naakor naasa Taara,  
 Taara naasa Abraam,  
 Abraam naasa Yisaaq,  
 Yisaaq naasa Yayqoob,  
<sup>29</sup> (33) Yayqoob naasa Yiwda,  
 Yiwda naasa Paarees,  
 Paarees naasa Hethroon,  
 Hethroon naasa Arni,  
 Arni naasa Raam,  
 Raam naasa Aminaadaab,  
<sup>30</sup> (32) Aminaadaab naasa Navasoon,  
 Navasoon naasa Selimoon,  
 Selimoon naasa Boveez,  
 Boveez naasa Iyobeed,  
 Iyobeed naasa Isey,  
<sup>31</sup> Isey naasa Dawt,  
 Dawt naasa Naataan,  
 Naataan naasa Maathaat,  
 Maathaat naasa Maynaan,  
 Maynaan naasa Meelia,  
<sup>32</sup> (30) Meelia naasa Eliyaqem,  
 Eliyaqem naasa Yonaan,  
 Yonaan naasa Yoseep,  
 Yoseep naasa Yiwda,  
 Yiwda naasa Simoon,  
<sup>33</sup> (29) Simoon naasa Lewi,  
 Lewi naasa Mathaat,  
 Mathaat naasa Yooraam,  
 Yooraam naasa Elivezar,  
 Elivezar naasa Yoseev,  
<sup>34</sup> (28) Yoseev naasa Eer,  
 Eer naasa Elmadaam,  
 Elmadaam naasa Qosaam,  
 Qosaam naasa Haadi,  
 Haadi naasa Milki,  
<sup>35</sup> (27) Milki naasa Neeri,

Neeri naasa Selatial,  
 Selatial naasa Zerubaabeel,  
 Zerubaabeel naasa Rees,  
 Rees naasa Yonaan,  
<sup>36</sup> (26) Yonaan naasa Yooda,  
 Yooda naasa Yoseep,  
 Yoseep naasa Semey,  
 Semey naasa Matatiyo,  
 Matatiyo naasa Mavat,  
<sup>37</sup> (25) Mavat naasa Naage,  
 Naage naasa Eslim,  
 Eslim naasa Nahoom,  
 Nahoom naasa Amoth,  
 Amoth naasa Matatiyo,  
<sup>38</sup> (23-24) Matatiyo naasa Yoseep,  
 Yoseep naasa Yoona,  
 Yoona naasa Milki,  
 Milki naasa Lewi,  
 Lewi naasa Maati,  
 Maati naasa Eeli,  
 Eeli naasa Yoseepne.

## 4

*Yesussa Taysate Shedadhidino  
 Maat 4:1-11; Marq 1:12-13*

<sup>1</sup> Yesusaar Manpas Gazanka thoothayse Yordaanoos bayra kinin maatenka, Manpas Gazano darandar kiam entsaate konin yivenka, <sup>2</sup> eedi lamaa kaysa rooro Seethaanka taysadhathe ki dahade. Roorona iginaka yer kala hattear itsadehe. Roorona igma maqaysaka ki daaqardhade.

<sup>3</sup> Seethaanaar Yesusna “Ya Barjo Naas ha daana, seenin koka ‘Balasha maataa’ hamaa” kina ki hamade. <sup>4</sup> Yesusaar kina yinin maasenka, “‘Eedi balasha itsayse bish dehehe’ hamayse thaapadhidine” ki hamade.

<sup>5</sup> Ogora Seethaan Yesusam yinka dheg hamon raqindar entsate utayse, peendar haapadhen bitamon wulam woda likkasa iir kina dhahayse, <sup>6</sup> “Ogo kesa hayamonbee gobshin wulbeam hana imayda ime. Harrna hambhidiana, ina imbhidina; inin nasheana imayda ime. <sup>7</sup> Ogonante ya ina kumpurdhayse ha goodimidianna, kono wul hanti koda maate” kina ki hamade. <sup>8</sup> Yesusaar kina yinin maasenka, “‘Hasa Imbaa Barjona kumpurdhayse kibisheana goodimaa!’ hamayse thaapadhidine” ki hamade.

<sup>9-11</sup> Ta pir Seethaan Yesusam Yerusaalem entsayse Barjosa gazan ooninsa illindar bulate woysayse kina yin ki giyade:

“‘Haam kenin tooloadettsi Barjo yisa gaananana giya ki giye;

kediar roon hannonam seenin qanoamadettsi

yisa aaninka keedhayse haam yeda ke yede’

hamayse thaapadhidine. Keeda ya Barjo Naasi hanna, kora mia bhulate hanchaa!” kina ki hamade. <sup>12</sup> Yesusaar kina yinin maasenka, “‘Hasa Imbaa Barjoam taysate shedaabhode!’ hamayse thaapadhidine” ki hamade. <sup>13</sup> Seethaanaar yinin taysen wulam kinin macchonsa budonte, pir kiam taysate shedana agea woda haapadhenka yekka kikalanka ki pegimbhade.

*Yesus Galila Peente Barjosa Upsinam Giyan Kinin Yedoono  
Maat 4:12-17; Marq 1:14-15*

<sup>14</sup> Yesus Manpas Gazansa kantanka thoothayse Galila peendar ki maatade; kisa waadimano Galila peenbee kosa gasante dohon peen wul gidirbe ko qansimade.  
<sup>15</sup> Kesa bukin raqinte keam dhettsite ki dahade; kinin dhettsenkaar eeno wul kiam ko gobshade.

*Naazret Katamante Yesusin Bagadhoono  
Maat 13:53-58; Marq 6:1-6*

<sup>16</sup> Ogosa budonte Yesus yinin gebhon kataman Naazretdar ki yivade. Ogotear yisa dambindettsi ukunse rooroaka Ayiwde eensa bukin raqinte ki ardade; Mathaap Gazanam nabbabana ki dhaabhade. <sup>17</sup> Barjokala qansayse eenna giyea Isias mathaapin kina imbhaysaka yin giyayse thaapadhaa raqadar bulayse:

<sup>18-19</sup> “Barjosa Manpasino idar ko dahade;  
qambhinana Barjosa dhacchintan upsinam inin giyoadettsi iam ki qadhade.  
Dhaxadhaanayn buldhen, aapin kayaanayn sheden i giye,  
gaalensa iinte dahaanaam gaalera inin buloadettsi,  
ogo Barjo yisa nashimmakkonam kinin dhehen levenin yeskonam inin giyoadettsi iam  
ki nittsade”  
hamayse ki nabbabade.

<sup>20</sup> Yesus mathaapinam diithayse Ayiwde eensa bukin raqinte waadiman eana imayse ki dooqade. Bukin raqinte dohoono eeno wul bhocchaate kibisheam koda shede.

<sup>21</sup> Kidiar “Marrato! Ta kono nabbabadhenka yenin qansoono mathaapinsa upsino kina thoothidine” kena ki hamade. <sup>22</sup> Kinnon goynsa eeno wul yer payya koda giye; kinin giyen payyan dhalqinka targadhayse, “Kaa Yoseep naasatayu?” ke hamade.

<sup>23</sup> Yesusaar kena yin ki giyade: “‘Ya akkimia, ta haam pacchaa!’ hamen kamsin koam idar bavima shidhattene. Ogodettsi ‘Qipirnaahoomir hanin waadadhon wonin qanson koteare hasa peente waadadhaa’ ina yeda hame. <sup>24</sup> Inta yena gon ida giye: Barjokala qansayse eenna giyeam kisa peente dahayna eena hamin ko dahaakaar kiam tiyehe. <sup>25</sup> Inta yena gon ida giye: Elias wodanka leve makkambee arpi laxbe doobin qanima shidhonna peen wuldar gebhi daaqi dahaysaka, Israveel peente dohon thoothina qambhina maana ke dahade. <sup>26</sup> Ko dahaannaar Elias Sidoona peente dohon Sirabhta gurdante edon qambhinkal kiam ko yittsadhadhe; Israveel peente dahaana maana waanikal kiam yittsadhadhehe. <sup>27</sup> Barjokala qansayse eenna giyea Elsav wodanka Israveel peente thoothino lamth burqoka\* hajadhaana ke dahade; Sooria peente Niviman bishne paashaa, kesa iira eedi hay dahaannaar paashadehe” kena ki hamade.

<sup>28</sup> Ayiwde eensa bukin raqinte dahaana wul dhalqin ogoam qansayse kattsi ke wacimade. <sup>29</sup> Dhaabhayse katamara mayanka Yesusam yedate ke bulade; kiam boodante kupate dhabota zagayse katamanin ashkadhon ashondar ke yivade. <sup>30</sup> Kidiar kesa shaarinka utate ki yivade.

*Beeronin Yiam Yedaa Ea Kinin Paashoono  
Marq 1:21-28*

<sup>31</sup> Ogosa budonte Yesus Galilar dohon Qipirnaahoom katamandar ki yivade. Ogote Ayiwde eensa ukunse rooroaka eenaam dhettsite ki dahade. <sup>32</sup> Kidi yisa hayamonka kinin giyenna eeno wul kinin dhettson timmirinka targadhidine.

<sup>33</sup> Ayiwde eensa bukin raqinte beeronin yiam yedaa eedi kalaa ki dahade. Upsin yisa dheg hayayse ilataate: <sup>34</sup> “Naazret peen Yesuso, hambesana wosa dohoono hare? Woam kaysana nivaaw? Hay hanin dohonam inta dhesidine; ya Barjokala nivaa Gazaane!”

---

<sup>4:18-19</sup> Isi 61:1-2.    \* <sup>4:27</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa.

hamayse ki ilatade. <sup>35</sup> Yesusaar beeroaka, “Lay hamayse eadara utaa!” hamayse kiam ki bitade. Beeroar kesa birante eam dhabayse gaale kidar yeskisima kidara ki utade.

<sup>36</sup> Eeno wulaar targadhayse kinka kikal “Kono kinin giyayno yer hamin dohoonone? Yisa hayamonbee yisa kantanbeka beeronana kisa giyanka eendara uta ke ute” hamayse ke dhalqade. <sup>37</sup> Yesusin shawkadhoono Qipirnaahoomsa gasante dohon peen wulir ko qansimade.

*Thoothin Eenaam Yesusin Pacchoono  
Maat 8:14-17; Marq 1:29-34*

<sup>38</sup> Yesus kesa bukin raqira utayse Simoon ooninte kinin ardenka, Simoonda baysino kattsi bishi occhea hajimoka wodhayse ko dahade. Ogonante koam kinin pacchoadettsi kiam ke miskade. <sup>39</sup> Kokal theedi woyayse bishin occhenam ki bitade. Bishin occha-ynoar koam ko garade; kodiar saanawa dhaabhayse kena gala baxan ko yedade.

<sup>40</sup> Hayn wevenka waana waana burqenin yedaana wulam kikal ko baadhade; kidiar kalaa kalaanadar yisa aanin wodayse keam ki pacchade. <sup>41</sup> Beeronaar pir “Ya Barjo Naasine” hamayse ilatada thoothin eendara ke utade. Kedi Barjoyn qadhaa Kiristoos kinin dohonam kenin dhesonna Yesus yer kalaar kenin giyoamadettsi keam ki bitade.

*Yesus Pir Dhettsan Kinin Yedoono  
Marq 1:35-39*

<sup>42</sup> Peen sedhaysaka, Yesus utayse eedinin qolmon raqindar ki yivade. Eenoar kiam zagada kikal ko nivade;kekala edimayse kinin yivoamadettsi kiam marana ko zagade.

<sup>43</sup> Kidiar “Waani katamante dohon eenna wozisen Barjo bitamonsa upsinam inin giyoadettsi iam koda zaske; harrna hambhidianna, iam nittsadhoono ogonane” kena ki hamade. <sup>44</sup> Ogonante Yiwna peente dahaana kesa bukin ranqar Barjosa upsinam giyte ki dahade.

## 5

*Yesus Yisa Paanan Yivayna Biranaam Kinin Eeloono  
Maat 4:18-22; Marq 1:16-20*

<sup>1</sup> Eeno Barjosa upsinam qansaate kiam kupite ko daaka, Yesus Gensareth bazinsa gasante woyayse ki dahade. <sup>2</sup> Bazinsaar gasante bazindara sagadhayna gonngala lamaa woyayse ke daaka keam ki haapade. Kaaran zaanin qazayna eenaar gonngalanara utayse kaaranna kenin qazen zaaninam keda shive. <sup>3</sup> Igina gonngallasa Simoon gonngalante Yesus ardayse bazinsa gasara likka bazindar kinin yittsoadettsi kiam ki miskade; ogo bazindara sagadhen gonngalante dooqayse eenaam dhettsite ki dahade.

<sup>4</sup> Yisa dhalqinam yinin macchonsa budonte Simoonna “Bazindara sagadhen gonngalanam bazinsa theerin raqindar yittsayse kaaranam yelin qazen zaaninam bazinte dhabee” kina ki hamade. <sup>5</sup> Simoonaar kina yinin maasenka, “Imbo, sootin woda qazika sunoo qajadhade, kala hattear yedootone; ta hanin giyonna, kaaranam wonin qazen zaaninam bazinte ida dhabe” kina ki hamade. <sup>6</sup> Yin giyayse kenin dhabenka kattsi thoothi kaaraam ke yedade; kaaran kenin qazayno zannoar havan ko yedade.

<sup>7</sup> Waani bazindara sagadhen gonngalante dahaana aanamma nivayse keam kenin kelshoadettsi milkitka keam ke eelade. Nivayse bazindara sagadhayna gonngalla lamaanayn itsadhanna hayenka yekka, kaaranam iir ke thoosade.

<sup>8</sup> Bhethiroos hambhe Simoon ogoam yinin haapenka, Yesussa birante kumpurdhayse, “Imbo, inta seeso eedi inin dohonna, ikalanka pegadhaa!” kina ki hamade. <sup>9</sup> Ogoam yin kinin giyoono kimbesana kinka dahaana wul kenin yedon kaaransa thoothamora dhaabhonka kattsi yinin targadhonnane. <sup>10</sup> Ogodettsi Simoonda aanamma Zabdoos naana Yayqoobbee Wannisbe kedi targadhidine. Yesusaar Simoonna, “Kurtumbhaabhode! Keeda kaara os kaaranam hanin yedendettsi eenaam Barjosa bitamondar maasea eedi hada maate” kina ki hamade. <sup>11</sup> Kediar bazindara

sagadhayna gonngallaam yisa bazinsa gasandar yeskisayse yer wulam garayse Yesussa paanan yivan ke yedade.

*Lamthinin Yedaa Eam Yesusin Pacchoono  
Maat 8:1-4; Marq 1:40-45*

<sup>12</sup> Yesus katama kalaate ki daaka, lamth burqo\* yiam kattsi yedaa eedi kalaa ki dahade. Ea agaa Yesusam yinin haapenka, kisa roonte dhambayse, “Imbo, ha nashidianna, iam pacchana damaada dame” hamayse kiam ki miskade. <sup>13</sup> Yesusaar yisa aaninam kidar wodayse, “Haam pacchana nashayda nashe, paashaa” kina ki hamade. Saanawaar kisa lamthin burqono kiam ko garade.

<sup>14</sup> Yesus “Hanin paashonam eedi haynaar giyaabhode! Ko dahaannaar yivayse hasa bishinam gudulana dhahaa; eennaar hanin paashoono tarja konin maatoadettsi Museyn giyon Barjona machadhen marshanam imaa” kina ki hamade.

<sup>15</sup> Yesusin shawkadhoono ena gayra sagi ko dhesimade. Thoothino eeno kinin giyenam qansanabee yisa burqoraar paashanabe kikal ko bukade. <sup>16</sup> Kidiar thoothi wodana darandar yimal edimate yivayse Barjoam miskaate ki dahade.

*Hajimonka Malgimaa Eam Yesusin Pacchoono  
Maat 9:1-8; Marq 2:1-12*

<sup>17</sup> Rooro kalaa Yesus eenam kinin dhettsenka, Parisa eenabee Musesa yigginam dhettsayna eenabe kisa gasante ke dahade. Kidiar Galila peenbee Yiwda peenbesa gurdan wulra, pir Yerusaalem katamaraar nivaana ke dahade. Yesus hajadhaanaam kinin pacchayno Barjosa kanta kidar ko dahade. <sup>18</sup> Marrato! Eedi hajimoka malgimaa kalaam eena haaqaka kedate Yesuskal ke bavade; ooninte kiam arsayse Yesussa birante wodana ke zagade. <sup>19</sup> Eensa thoothamora dhaabhoono ooninte arsan keam konin bashonna, ooninsa illindar bulayse ooninsa illinam dhaasayse eensa shaarinte Yesus birante haaqanka eam ke hanchade.

<sup>20</sup> Yesus kidar woylamin kenin qajonam shedayse hajimon eana yi giyna: “Ya eedi kaa, hasa seesono hana gardhidine” kina ki hamade. <sup>21</sup> Musesa yigginam dhettsaynabee Parisa eenabe “Ea kaa Barjo maato qaabea kidi hayne? Eedisa seesoam garana damea Barjo bishkalanka ab hayne?” hamayse ke qaabade. <sup>22</sup> Yesusaar kesa qaabenam dhesayse kena yinin maasenka, “Yesa woylaminka yin harrnee qaabe? <sup>23</sup> ‘Hasa seesono hana gardhidine’ hamarabee ‘Dhaabhayse yivaa’ hamarabesa hamaane deegaa? <sup>24</sup> Ko dahaannaar i Eedi Naasina peendar eenna seesonam garana hayamo isa konin dohonam yenin dhesoadettsi yeam koda zaske” hamayse hajimonka malgimaa eaka “Inta hana ida giye: Dhaabhayse haam baadhon haaqanam hanka bavate hasa oonindar yivaa” kina ki hamade. <sup>25</sup> Hajimonka malgimaa ea saana kesa birante dhaabhayse, yininka baadhon haaqanam bavate Barjoam gobshada yisa oonindar ki yivade.

<sup>26</sup> Ogote dahaana eena wul Barjoam gobshaate “Kina yer tarshen wo haapade” hamayse kattsi targadhayse ke kurtumbhade.

*Lewi Hambhea Eam Yesusin Eeloono  
Maat 9:9-13; Marq 2:13-17*

<sup>27</sup> Ogosa budonte Yesus ogora utayse Lewi<sup>†</sup> hambhea gibirin kacchea gibirin kinin kacchen raqinte dooqayse ki daaka kiam haapayse, “Isa paanan nivaa” kina ki hamade.

<sup>28</sup> Lewiar dhaabhayse yerin wulam garayse Yesussa paanan yivan ki yedade.

<sup>29</sup> Ogosa budonte Lewi yisa ooninte Yesusna gala gebhi ki ashkaysaka, kimbesana kinka galandar dooqaana gibirin kacchaynarabee waani eenbera thoothino eeno ko dahade. <sup>30</sup> Parisa eenabee kesa muldhara dahaana Musesa yigginam dhettsaynabe Yesussa paanan yivayna eenana “Eena cubbona gibirin kacchaynabee igina seeson

\* 5:12 “Lamth burqo” hamen upsinam Haalin Mallan mathaapinsa macchinte thaapadhaanar shedaa. 5:14 Lewi 14:2-7. † 5:27 Lewi hambhea ea pir Maatoos hambheane.

eenabesana kinka galanam yenin itsenbee wucenbe harrnane?” hamayse kekal ke gundumade. <sup>31</sup> Yesusaar kena yinin maasenka, “Hajadhaanaam akkimi koda zaske; payyanaam akkimi zaskehe. <sup>32</sup> Inin nivoono seeson eena yisa seeson waadimanam garayse Barjodar kenin maatoadettsi keam eelota i nivade; tipana eenaam eelota nivaatine” kena ki hamade.

*Itsima Qoomadhen Goynsa Oysadhoono  
Maat 9:14-17; Marq 2:18-22*

<sup>33</sup> Ogora Parisa eenabee Musesa yigginam dhettsaynabe Yesusna yi giyna: “Shivea Wannissa paanan yivaynabee Parisa eenasa paanan yivaynabe thoothi rooro itsima qoomayse Barjoam keda miske. Hasa paanan yivayna rooro wul kenin itsenbee wucenbe harrnane?” kina ke hamade. <sup>34</sup> Yesusaar kena yin ki giyade: “Uutaa kembesana kinka ki daaka, gaydonna nivaana eenaam itsima kenin qoomoadettsi yedi haye hayo? <sup>35</sup> Ko dahaannaar uutaanin kekalanka edadhayno woda niva ko nive; ogo wodanka ko hanna itsima keda qoome” kena ki hamade.

<sup>36</sup> Pir kamsika kena yin ki giyade: “Apala haaleam hattsayse apala gecchoadar lashea eedi qolehe. Yin ki haydianna, apala haaleam sun ki hattsade; haalea lashadhaa gecchoabesana kidar agehe. <sup>37</sup> Jambin gecchonsa iinte zia haali shabhea eedi qolehe. Shabhadhidianna ziano jambinam bhattsa ko bhattse; zianoar layma ko layme, jambinoar bhaqayse sun guuri koda shidhe. <sup>38</sup> Ogona zian haalin shabhadhenna, jambi haali koda zaske. <sup>39</sup> Zian oydhonam wucaa ea oydhaamon zianam wucana nashea hayyear qolehe. Harrna hambhidianna, ‘Ziano oydhino kattsi payyane’ kinin hamennane” kena ki hamade.

## 6

*Ukunsen Rooroaa Goynsa Oysadhoono  
Maat 12:1-8; Marq 2:23-28*

<sup>1</sup> Ayiwd eensa ukunsen roroaka Yesus gazgon ushon haaminsa shaarinka kinin yivenka, kisa paanan yivayna eena gazgon tishanam qunthate qadhayse gavite ke dahade. <sup>2</sup> Parisa eenasa waani waani eena “Ukunsen roroaka zaskimon waadimanam harrnee waadadhe?” kena ke hamade. <sup>3</sup> Yesusaar yin giyayse kena ki maasade: “Ena Bitaa Dawtbee kembesana kinka dahaana eenabe kenin daaqardhonka kinin hayonam yedi nabbabeete? <sup>4</sup> Kidi Barjosa gazan ooninsa mayante ardayse gudullakalanka een abinin itsimon Barjosa birante wodadhon balashanam tiyayse ki itsade; kimbete dahaana eenanaar ki imade. <sup>5</sup> Inta Eedi Naas ukunsen roroasa Imbaane” kena ki hamade.

*Aaniysa Woboa Eam Yesusin Pacchoono  
Maat 12:9-14; Marq 3:1-6*

<sup>6</sup> Ukunsen roro abka Yesus Ayiwd eensa bukin raqinte ardayse eenaam dhettsan ki yedade. Raqin ogotear anta mizaqaysa wobaa eedi kalaa ki dahade. <sup>7</sup> Musesa yigginam dhettsaynabee Parisa eenabe Yesusam bersana zagayse, “Ukunsen roroaka Yesus eediam paccho ki dew?” hamayse kiam shedite ke dahade. <sup>8</sup> Yesusaar kesa qaabenam dhesayse, aaniysa woboa eana “Dhaabhayse eensa shaarinte woyaa!” kina ki hamade. Ear dhaabhayse ki woyade. <sup>9</sup> Yesus kena yi giyna: “Yeam ida oyse: Ukunsen roroaka Musesa yiggino har wonin waadadhoodettsi wona ko giye? Payya yermoo? Siya yero? Eediam wonin dhacchoadettsimoo? Eediam wonin deesoadeettsine?” kena ki hamade. <sup>10</sup> Yesusaar kisa gasante dohon een wulam shadayse, yisa aanin woboaka “Aanin hannonam pishkaa!” kina ki hamade. Ear yisa aaninam ki pishkade. Kisa annoor ko paashade.

<sup>11</sup> Musesa yigginam dhettsaynabee Parisa eenabe ogoka kattsi wacimayse, “Hamin kiam wo hayanna wona ko paydhe?” hamayse kinka kikal ke dhalqade.

*Yesusin Tarjamonnaante Yittsaynaam Kamoono  
Maat 10:1-4; Marq 3:13-19*

<sup>12</sup> Ogo wodanka Yesus Barjoam miskana dhukandar ki utade; ogotear Barjoam miskaate ki wodhade. <sup>13</sup> Ogora peen sedhaysaka yisa paanan yivaynaam yikal keam ki eelade; kesaar iira tabhi lamaanaam ki kamade. Pir “Tarjamonnaante Yittsadhaana” hamayse kena naabe ki wodade. <sup>14</sup> Kediar: Bhethiroos hamayse kisa naabe kinin wodaa Simoonbee, indanaasa Indiriasbee, Yayqoobbee, Wannisbee, Pilbhoosbee, Bartelemoosbee, <sup>15</sup> Maatoosbee, Toomaasebee, Ilpoos naasa Yayqoobbee, “Peen yinnonna bish qaabeane” hamayse giidhea Simoonbee, <sup>16</sup> Yayqoob naasa Yiwdabee, Yesusam dembhinna saskate imea Asqoronto peen ea Yiwdabene.

*Yesus Thoothin Eenam Kinin Dhettonbee Kinin Pacchonbe  
Maat 4:23-25*

<sup>17-18</sup> Yesus igin tabhi lamaanabete kinka dhukara hanchayse torente ki woyade; kisa paanan yivayna eenasaar thoothino eeno ogote ko dahade. Taar kisa dhalqinam qansanabee yisa burqoraar paashanabe Yiwda peen wulbee, Yerusaalem katamanbee, bazinsa aponte dahaana Thiroosbee Sidoonabera kikal nivoono thoothino eeno ko dahade. Beero yiam yedaysaka gaalaynaar ke paashade. <sup>19</sup> Pacchansa kantano kikalanka utayse ke wulam pacchite konin dohonna, eeno wul Yesusam kaamana koda zage.

*Wozabee Eepibe  
Maat 5:1-12*

<sup>20</sup> Yesusaar yisa paanan yivaynaam shedayse yin ki giyade:  
“Yedi qambhinato, Barjosa bitamono yenti konin dohonna wozadhee;  
<sup>21</sup> yedi ta daaqardhaynato, yenin mishenna wozadhee;  
yedi ta eepaynato, yenin hancenna wozadhee.  
<sup>22</sup> I Eedi Naasina hamayse eeno yeam konin jibbenkabee, yembesana kinka kalaa maatintanam garayse yeam konin edenkabee, yeam konin iirenkabee, yesa naabenam konin genenkabe, wozadhee. <sup>23</sup> Marrato! Yena kashadhayno bazano cecinte gebhi konin dohonna, ogo wodanka wozadhee, wozaka bhulee. Ena kesa eykenaar Barjokala qansayse eenna giyaynaam agaadettsi keam ke hayade.  
<sup>24</sup> Yedi wodimbhaanato, yena maaten yerin wulam ta yenin haaponna, os birante yenin haapiminna hay!  
<sup>25</sup> Yedi ta misaanato, yenin daaqardhenna hay!  
Yedi ta hancaynato, qaabonka yenin atennabee yenin eepennabe hay!  
<sup>26</sup> Eeno wul yeam shawkaate payyamon yesa konin giyenka hay! Ena buudamoka ‘Wodi Barjokala qansayse eenna giyaynane’ hamaynaam yesa eykenaar yin ke shawkade” kena ki kamade.

*Wosa Banqin Eenaam Nasha Zaskayno  
Maat 5:38-48; 7:12*

<sup>27</sup> Yesus pir “Inin giyenam qansaynana yin ida giye: Yeam jibbayna eenaam nashee; kena yer payya hayee. <sup>28</sup> Yeam ashaynana payya malsi kena maasee; yeam genaynanaar Barjoam miskee. <sup>29</sup> Hasa karcanam ceveana karca waam kina shirshayse dhahaa; hasa kotteam tiyeana shuraabeamaar kina imaa. <sup>30</sup> Hakal miskayna wulna imaa; hasa yer tiyaar hana kinin maasoadeettsi kiam oysaabmode. <sup>31</sup> Eenin yena hayoadettsi yenin nashenam yediar kena ogodettsi hayee.

<sup>32</sup> “Ta yeam nashaynaam bish ye nashina yeam shawkadhok? Seeson eena yiam nashaynaam keda nashe. <sup>33</sup> Yer payya yena hayaynana payya ye hayna yeam shawkadhok? Seeson eenaar ogodettsi keda haye. <sup>34</sup> ‘Maasate ina kasha ki kashe’ hamayse yenin qaabe hayaynana yenin bazenna yeam shawkadhok? Seeson eenaar ogo yinin bazonam tiyana seeson eenana keda baze.

<sup>35</sup> “Yediar yesa banqin eenam nashee; yer payyaar kena hayee. ‘Maasate ina kasha ki kashe’ hamayse woylam qajima kena bazee. Yin yenin hayenka, yesa bazano gebhi koda maate; Wuldara Sagea Barjo naana maateeda maate. Kidi kiam gobshiminabee seesaynabena payyane. <sup>36</sup> Yesa Imbaa eedina burqadhea kinin dohondettsi, yediar eedina burqadhayna maatee.

*Eedidar Pirda Zaskimoono  
Maat 7:1-5*

<sup>37</sup> “Eedisa seesoam paydeebhode; yesaar seesonam paydadhehe. Eedidar pirdeebhode; yedalar pirdadhehe. Eedina garee; yenaar koda gardhe.

<sup>38</sup> “Imee; yena imbha ko imbhe. Yenin kahaaka maasate yenaar kaadha ko kaadhe; payya uxate thoothayse konin laymenka yekka yena kaadha ko kaadhe” kena ki hamade.

<sup>39</sup> Ogora Yesus kamsika kena yin ki giyade: “Aapin kaya ea aapin kaya eam entsana dama ki damo? Lamaana kinka oolontetayu kenin dhambayno? <sup>40</sup> Dhettasadhea ear kiam dhettseadara sagehe. Ko dahaannaar payya hayayse dhesidi ki hanna, kiam dhettsaadettsi kida maate.

<sup>41</sup> “Hannon aapinte dohon haaqanam shedima, ha aanantasa aapinte dohon kosonam harrnaa shede? <sup>42</sup> Hannon aapinte dohon haaqanam shedima, ha aanantana ‘Imbanaasa, aapin hannora hana kosonam i bule’ hamayse giyana haminaa damaa? Ya maltia ea, birayse hannon aapinte dohon haaqanam bulaa; ogosa budonte ha aanantasa aapinte dohon kosonam bulana payya hayayse hada shede.

*Haaqa Yisa Aapinka Konin Dhesimayno  
Maat 7:16-20; 12:33-35*

<sup>43</sup> “Payya hatta siya aapi ushehe; tapir hatta siya payya aapi ushehe. <sup>44</sup> Haaqa wul yisa aapinka koda dhesime. Ukumbhara shaapsa aapi kambhehe; buukira woynisa aapi kambhehe. <sup>45</sup> Ea payyaa woylaminte yisa dohon yerin payyara yer payyaam kida giye; ea siyaa woylaminte yisa dohon yerin siyora yer siyaam kida giye. Harrna hambhidianna, yisa woylaminte thoothora yisa aponka kida giye.

*Onna Lamaana Woysadhaanasa Kamsino  
Maat 7:24-27*

<sup>46</sup> “Ta keeda harrnee ‘Imbo, Imbo!’ iam hame? Inin yena giyenam hayattene.

<sup>47</sup> Ikal nivayse isa upsinam qansayse hayayna wul hayyeam kenin maatenam yena ida giye. <sup>48</sup> Kidiar oonin yinin woysenka oolonam payya koyayse haachan peendar woysea eam kida maate. Mirro nivayse oonin ogoam ko kupade. Onnoar haachan peendar konin woysadhonna shoana damadehe. <sup>49</sup> Isa upsinam qansayse haymina peendar payya hayayse oolonam koyma yisa ooninam woysea eam kida maate. Doobin qanaysaka mirro nivayse oonin ogoam konin kuppenka, kodiar saanawa ko dhambade. Dhambidinoar kosa kattsi siyane” kena ki hamade.

7

*Mato Alaqaasa Waadiman Eam Yesusin Pacchoono  
Maat 8:5-13*

<sup>1</sup> Yesus ogo wulam eenam giyate macchayse Qipirnaahoom katamandar ki yivade.

<sup>2</sup> Raqin ogote mato alaqa kalaa ki dahade. Kinin nashea kisa ergen ear hajadhyayse diyanna ki yeskade. <sup>3</sup> Kidiar Yesussa qansayse, “Yesus nivayse isa ergen eam ina kinin pacchoadettsi kiam miskee” hamayse Ayiwd eenasa donzanaam kidar ki yittsade.

<sup>4</sup> Kediar Yesuskal yivayse, “Koam hanin hayoadettsi zaskea eedine. <sup>5</sup> Harrna hambhidiana, kidi eenam wosa nasha ki nashe; wonin buki bukea ooni wona ki woysade” hamayse upsi wocchika Yesusam ke miskade. <sup>6</sup> Yesusaar kembesana kinka ki yivade.

Kisa ooninkal kenin theedenka, mato alaqa yisa nashonaam yin giyayse Yesuskal keam ki yittsade: “Imbo, oonin innonte ha arde inta eedi zaskaatehe; ikal nivite qajadhaabhode.<sup>7</sup> Intaar hakal nivana zaskea eedine hamayse iam qaabaatine. Ogonante ya ‘Hasa ergen ea ki paashe’ ina hamaa; kidiar paasha ki paashe.<sup>8</sup> Intaar iam wottsaynana ee hamayda hame; isaar choobar ina ee hamayna poolisana ke dahade. Kesa kalaana ‘Yivaa!’ inin hamenka, yiva ki yive; ea waanaar ‘Nivaa!’ inin hamenka, niva ki nive; isa ergen eanaar ‘Koam hayaa!’ inin hamenka, haya ki haye” hamayse kikal ki yittsade.

<sup>9</sup> Yesusaar agaa easa dhalqinam yinin qansenka, kanka targadhidine. Kimbesana yiven zarsindar budoka wal hamayse, “Inta yena ida giye: Israveel eenasa shaarintear kaadettsi gebhi idar woylamin qajeja hamin ko dahaakaar haapaatine!” kena ki hamade. <sup>10</sup> Yesuskal yiam yittsadhaana eenaar mato alaqa oonindar maatayse kenin yeskenka, kisa ergen ea paashayse ki daaka kiam ke haapade.

### *Yesus Maa Qambhi Kallonsa Naasaam Diira Kinin Dhaasoono*

<sup>11</sup> Woda likkasa budonte Yesus Nayn hambhen katama kallondar ki yivade; kisa paanan yivayna eenabee thoothin eenbe kimbesana kinka ke yivade. <sup>12</sup> Yesus katanmansa kerinte theedi kinin yeskenka, marrato! Eeno leesi bavate koda ute. Diyaar yindasa naasi kalaane. Kodiar maa qambhi ko dahade. Katamaraar thoothino eneo kombesana kinka ko dahade. <sup>13</sup> Imbaa wontea Yesus koam yinin haapenka, kona burqadhayse, “Eepaabhode” kona ki hamade. <sup>14</sup> Yesus nivayse leesin baadhon haaqanam ki kaamade; leesinam bavaana eenaar ke woyade. Yesusaar leeseaka “Ya naasa, dhaabhaa hana ida hame” kina ki hamade. <sup>15</sup> Diyaar dhaabhatte dooqayse dhalqan ki yedade. Yesus naasasa indanna “Hasa naasa kash!” hamayse kona ki giyade.

<sup>16</sup> Een wulam kurtumbhe yedaysaka, “Barjokala qansayse eenna giyea gebha ea wosa shaarira dhaabhidine; Barjo yisa eenam dhacchana nividine” hamayse Barjoam ke gobshade. <sup>17</sup> Ogo Yesussa waadimano Yiwda peenbee kosa gasante dohon peen wul gidiirbe ko qansimade.

### *Shivea Wannisin Yesusdar Yittsaana Eena Maat 11:2-19*

<sup>18</sup> Shivea Wannissa paanan yivaynaar ogo wulam Wannisna ke giyade. Wannisaar yisa paanan yivaynasa lamaanaam yikal eelayse, <sup>19</sup> “Barjokala niva ki nive hambhaa yaw? Way eedi ab wo toolo?” hamayse kiam kinin oysoadettsi Imbaa wontea Yesuskal keam ki yittsade.

<sup>20</sup> Eenaar Yesuskal nivayse, “‘Barjokala niva ki nive hambhaa yaw? Way eedi ab wo toolo?’ hamayse haam wonin oysoadettsi Shivea Wannis hadar woam ki nittsade” kina ke hamade.

<sup>21</sup> Ogo wodanka Yesus waana waana burqoka gaalaynaam ki pacchade; beeronin yiam yedaanadaraar beeronaam ki bulade; thoothina aapin kayaanaamaar ki pacchade. <sup>22</sup> Yesusaar Wannisin nittsaanana “Yivayse yelin haaponbee yelin qansonbeam Wannisna giyee: Aapin kayaana haapa ke haape; roonsa wobonaar pika ke pike; lamthin burqonka\* dahaanaar paasha ke paashe; qaamin kayaana qansa ke qanse; diyaanaar dembhira dhaabha ke dhaabhe; qambhina eenanaar Barjosa dhacchintan upsinam giidha ko giidhe. <sup>23</sup> Ogonante inka qothimima kidi gobshadhaane” hamayse kena ki maasade.

<sup>24</sup> Wannisin nittsaana ergen eena maatayse kinin yivenka, Yesus thoothin eenna Wannissa giyan ki yedade: “Ta har shedee darante yivaa? Jibarenka shohen piiqan shedota ye yivaaw? <sup>25</sup> Ta har shedee yivaa? Apalan gooben qaadhaam shedee yivaaw? Yin ko hanna, agen apalan qaadhaynabee yina agaysaka dahaana eena peensa binna

\* 7:22 “Lamth burqo” hamen upsinam Haalin Mallan mathaapinsa macchinte thaapadhaanar shedaa. 7:22 Isi 29:18; 35:5; 61:1.

ooninte ke dahade. <sup>26</sup> Ta har shedee yivaa? Barjokala qansayse eenna giyeam shedee yivaaw? Hahaa! Yena ida giye: Kidi Barjokala qansayse eenna giyeadara sagiane.

<sup>27</sup> ‘Shedaa! Hasa goynam birayse ashkeea isa ergen eam hasa birante yittsayda yittse’ hamayse yinna thaapadhaa kidine. <sup>28</sup> Yena ida giye: Peente adhadhon een wulsa iira Shivea Wannisdara sagea eedi qolehe. Ko dahaannaar Barjosa bitamonte een wulsa choobar dahaa Wannisdara saga ki sage” kena ki hamade.

<sup>29</sup> Dhalqin ogoam yinin qansenka eena wul, gibirin kacchayna eenaar shidhima, Wannis aaninte yinin shiidhonna, Barjo tipa kinin dohonam ke dhesade. <sup>30</sup> Parisa eenabee Musesa yigginam dhettsaynabe ke hanna, Barjoyn kena qaabonam jibbayse, “Wannis aaninte shiidhattone” hamayse ke garade.

<sup>31</sup> Yesus yi giyna: “Ta keeda adhadhin koam harka keam i kamso? Har ke maate? <sup>32</sup> Bhookante dooqayse yiigayna naanaam keda maate. Kediar kinka kiam kiam eelada ‘Ye kirbe hamayse yena pashko wo pugade, yediar kirbeetene; ye eepe hamayse yena wo zilimade, yediar eepeetene’ keda hame. <sup>33</sup> Shivea Wannis gala itsimabee yer wucimabe qoomayse kinin dehenka, ‘Kaa eadar beero daane’ kiam ye hamade. <sup>34</sup> Ta keeda i Eedi Naas itsaatebee wucaatebe inin dehenka, ‘Marrato! Kaa ea galabee wucamobe nasheane, cubbona gibirin kacchayna eenabee seeson eenabesa yettsine’ iam ye hamade. <sup>35</sup> Ogona pakalmakkono gon konin dohonam dhesadhayno kanka waadadhayna kosa naanakane” kena ki hamade.

### *Maa Kallo Yesussa Roonam Gaamen Shittonka Konin Qadhoono*

<sup>36</sup> Parisa eenasa eedi kalaa Yesus kimbesana gala kinin itsoadettsi kiam ki eelade. Yesusaar Parisa easa ooninte ardayse kummandar ki dooqade. <sup>37</sup> Marrato! Kataman ogote seeso hayayno maa kallo ko dahade. Kodiar Yesus Parisa easa ooninte kummandar kinin dohonam yinin dhesenka, gaamen shittonka thoosadhon seeni cawlira ashkadhon bilqaathinam ko bavade. <sup>38</sup> Kodiar Yesussa budobar roonkal kisa woyayse, eepada kosa ermitinin kisa roondar thokkenka, kisa roonam yisa metensa sitinka ko qodade; kisa roonamaar sunqaate gaamen shittonka kisa roonam qadhite ko dahade.

<sup>39</sup> Yesusam yisa oonindar kummanna eelaa Parisa ea koam shedayse, “Ea kaa Barjokala qansayse eenna giyea yi daana, ogo kiam kaamen edonam hamin dohoono seeso eedi konin dohonam ini kidi dhesa ki dhese” hamayse yisa woylaminka ki qaabade.

<sup>40</sup> Yesusaar “Simoon, hana inin giyea yer kalaa dahade” kina ki hamade. Kidiar “Dhettsea, ee ina giyaa” kina ki hamade. <sup>41</sup> Yesusaar “Eedi kalaakal eedi lamaa birre baddaraana ke dahade. Ea kalaa mato dong, waa ea bondi dong birre ke baddarade.

<sup>42</sup> Kediar eana koymon kashan ke bashadhysaka, ear kena ki garade. Ta ke lamaanasa kalon kiam saskayse nashea hamaa eane?” kina ki hamade. <sup>43</sup> Simoonaar “Thoothi bazan yindar dahaa ea kalon kiam nashima garehe” kina ki hamade. Yesusaar “Gonaa giyade” kina ki hamade. <sup>44</sup> Yesus edonam maatate shedayse, Simoonna yin ki giyade: “Edon koam sheda shedo? Inta hasa ooninte i ardysaka, ya isa roonna noqo hattear imaatane; kodi yisa ermitinka isa roonam shivayse yisa meten sitinka ko qodade.

<sup>45</sup> Ya iam sunqaatane; kodi inin ardorra yedayse isa roonam sunqan garadehe. <sup>46</sup> Ya isa metenam waqatika qadhaatane; kodi isa roonam gaamen shittonka ko qadhade.

<sup>47</sup> Ogonante hana yin ida giye: Kattsi konin nashonna, kosa seeson thoothinaam kona gardhidine; yisa seeson likkonam yina gardhea likkaka kida nashe” kina ki hamade.

<sup>48</sup> Ogora edonna “Hasa seesonam hana ko shidhe hambhidine” kona ki hamade.

<sup>49</sup> Kimbesana kinka kummandar dooqaanaar “Eedisa seesoam shiishea kaa kidi hayne?” hamayse yisa woylaminka qaaban ke yedade. <sup>50</sup> Yesus edonna “Idar woylamin hanin qajoono haam ko dhacchade; nagaya yivaa” kona ki hamade.

## 8

### *Yesussa Paanan Yivaate Kina Waadadhayna Maana*

<sup>1</sup> Ogosa budonte Yesus katamantebbe gurdantebe Barjo bitamonsa wozisen upsinam giyaate yaayte ki dahade. Tabhi lamaana kisa paanan yivayna eenaar kimbesana kinka ke dahade. <sup>2</sup> Tapir beeronaam yindara kinin bulaanabee kesa burqora keam kinin pacchaana maanabe kimbesana kinka ke dahade; kesaar iira beero tobbhaa yindara utoono Megdela peen edon Mayriyambee, <sup>3</sup> Herodissa waadiman eenaam wottsea Kuzasa geshon Yohannabee, Soosinnabee, waaniar thoothina maanabe ke dahade. Kediar Yesusbbee kisa paanan yivayna eenabena koymon yisa imada keam keda kelshe.

### *Yiithadhon Bheetansa Kamsino*

*Maat 13:1-9; Marq 4:1-9*

<sup>4</sup> Thoothino eneo kataman wulra kikal nivayse kenin bukenka, Yesus kamsika kena yin ki giyade: <sup>5</sup> “Eedi kalaa haaminte bheeta yiithota ki utade. Kinin yiithenka, bheetano waani goyn aponte ko wavaysaka, eneoar koam ko tigade; aptinaar koam ke itsade. <sup>6</sup> Waani bheetanoar peen haachandar ko wavade; ko baqalaysakaar pee capinin qolmonna ko wocchade. <sup>7</sup> Waani bheetanoar ukumbhansa shaarinte ko wavade; ukumbhanoar kombesana kinka gebhayse koam ko ishkade. <sup>8</sup> Waani bheetanoar peen payyandar ko wavade; kodiar baqalayse eedi dong kaysa aapi ko ushade. Keeda qansen qaamiya dahaa ki qanse” hamayse upsi gebhika yisa dhalqinam ki macchade.

### *Yesus Kamsika Kinin Giyonsa Goyno*

*Maat 13:10-17; Marq 4:10-12*

<sup>9</sup> Yesussa paanan yivayna “Kamsin ogosa bulino hare?” hamayse kiam ke oysade. <sup>10</sup> Yesusaar “Barjo bitamonsa aachin dhalqinam yenin dhesoadettsi yena imbhidine; waani eenna ko hanna, sheda sheda dahayse, kenin haapoamadettsi qansa qansa dahayse, kenin bhoccchoamadettsi kamsika kena koda giidhe.

### *Yiithadhon Bheetansa Kamsin Bulino*

*Maat 13:18-23; Marq 4:13-20*

<sup>11</sup> “Kamsinsa bulino yinne: Bheetano Barjosa upsinone. <sup>12</sup> Goyn aponte wavaa bheetasa kamsino Barjosa upsinam qansayna eenane. Kenin qansonsa budonte Barjodar woylem qajayse kenin dhaqoamadettsi Seethaan nivayse kenin qanson upsinam kesa woylemra tiya ki tiye. <sup>13</sup> Peen haachandar wavaa bheetasa kamsino Barjosa upsinam qansayse wozanka tiyayna eenane. Eena igma caaci kenin yittsaamonna, Barjodar woylem kenin qajayno likka wodanane; kesa caacinin qolmonna, keam taysate sheden gaalenin nivenka dhamba ke dhambe. <sup>14</sup> Ukumbhansa shaarinte wavaa bheetasa kamsino Barjosa upsinam qansayna eenane. Ko daahaakaar wodhaate wodhaate kenin yivenka peen kosa qaabonbee, wodimbhanna kenin bhoccchenbee, kena agaysaka daadhen bhoccchinbeka ishkadhayse aapi ushima keda shidhe. <sup>15</sup> Peen payyandar wavaa bheetasa kamsino payyamonbee gazamon woyleminbeka Barjosa upsinam qansayse kaalayna eenane. Kediar Barjosa upsinka wocchimbhayse aapi keda ushe” kena ki hamade.

### *Aachimoono Shaakano*

*Marq 4:21-25*

<sup>16</sup> Ogora Yesus yin ki giyade: “Shaakanam shashkayse yer daran guupea way algansa demente wodea eedi qolehe; ooninte ardaynana shaakano may konin haapadhoodettsi dheg hamon raqindar koda wodadhe. <sup>17</sup> Ogodettsi aachimayse may haapadhma, aadhimayse shaakandar utayse may dhesimima shidhea yer qolehe. <sup>18</sup> Ta keeda yenin

qansen upsinkaar mete yesaam gishee; harrna hambhidianna, yisa dahaana kisa dohondar imbha ko imbhe; yisa qolmakalanka ‘isa daane’ kinin hameamaar kikala tiidha ko tiidhe” kena ki hamade.

*Yesussa Indanbee Indanaanabe  
Maat 12:46-50; Marq 3:31-35*

<sup>19</sup> Yesussa indanbee kisa indanaanabe kikal ke nivade; eenin kattsi thoothonna, kikal theedana damadehe. <sup>20</sup> Eenoar Yesusna “Shedaa! Handabee handanaanabe mayante woyayse haam shedana keda zage” hamayse kina ke guyade. <sup>21</sup> Kidiar kena yinin maasenka, “Barjosa upsinam qansayse hayyna eena indabee indanaanabe kedi iginane” hamayse kena ki maasade.

*Bazinam Shooshen Wuranam Yesusin Woysoono*

*Maat 8:23-27; Marq 4:35-41*

<sup>22</sup> Rooro kalaa Yesus yisa paanan yivaynabesana kinka bazindara sagadhen gonngalante ardayse, “Bazinsa saabar wo sage” kena ki hamade; kidiar yivanna ke dhaabhade. <sup>23</sup> Bazindar kenin yivenka Yesus gonngalansa iinte ki raatade. Wura gebhi bazindar ko dhaabhade; bazindara sagadhen gonngalante noqono thoothan ko yedade; ogona gaale kedar ko yeskade. <sup>24</sup> Kidiar Yesuskal theedayse, “Imbo, Imbo, wodi kayoobhe!” hamayse kiam ke dhaasade. Kidiar dhaabhaye, wuranbee bazinbeam ki bitade; ogora wuranbee bazin shohenbe lay ko hamade. <sup>25</sup> Ogora Yesus yisa paanan yivaynana “Idar woylam yenin qajayno yesa hamin ko hamaa?” kena ki hamade. Kidiar kattsi kurtumbhaate targadhayse kinka kikal “Wuranbee bazinbear yinna ee hamea kaa kidi hayne?” ke hamade.

*Beeronin Yedaa Eam Yesusin Pacchoono*

*Maat 8:28-34; Marq 5:1-20*

<sup>26</sup> Galila peera bazindara sagayse saabar Gerasenon peendar ke yivade. <sup>27</sup> Yesus bazindara sagadhen gonngalara peendar ki utaysaka, kataman ogote beeronayn yedaa ea Yesusdar ki keerade. Ea agaa apala qaadha ki garaysaka thoothi woda maatidine. Kinin dahaynoar duukin raqintene; oonir dooqehe. <sup>28</sup> Kidiar Yesusam yinin haapenka, ilatayse kisa birante dhambayse upsi gebhika “Wuldara Sagea Barjosa Naasa Yesuso, hambesana isa dohoono hare? Iam hanin galshoamadettsi ida haam miske” kina ki hamade. <sup>29</sup> Ogoamaar yin kinin giyoono Yesus beeronaam “Eadara utee!” hamayse kinin giyonnanee. Kosa birayse rumino thoothi wodana eadar dhaabhite ko dahade; sansalabee zawnbeekaa kiam dhaxayse koda toldhe. Ko dahaannaar sansalanbee zawnbeam takkayse kinin dhabenka, kantaka beerona darandar kinin yivoadettsi keda haye.

<sup>30</sup> Yesusaar “Hasa nammo hayne?” hamayse kiam ki oysade. Kidiar thoothi beero yidar dohonna, “Nammo isa Legoonne\*” kina ki hamade. <sup>31</sup> Beeronaar “Woam kattsi theeri maaton oolondar oytate yittsaabhode” hamayse Yesusam ke miskade. <sup>32</sup> Raqin ogote dhukansa demendar thoothi warkupa gishiman gishadhayna kinin dohonna, beerona “Wurkupanasa iinte wo arde” hamayse kiam ke miskade. Kidiar kena ee ki hamade. <sup>33</sup> Beeronaar eadara utayse warkupanasa iinte ke ardade; warkupanaar bazinsa gasante dahayse, targadhayse laasandara diirimayse bazinsa iir ke itsadhade.

<sup>34</sup> Wurkupan gishaynaar ogo yerin wulam yinin haaponsa budonte, gobate yivayse katamantebbe gurdantebe dohon eenna ke guyade. <sup>35</sup> Eenoar yerin ogoam shedota yisa onnara utayse Yesuskal ko nivade. Beeronayn yindara utaa ear barin kisa maataysaka apala qaadhayse Yesussa roon demente dooqayse ki daaka kiam haapayse ke kurtumbhade. <sup>36</sup> Beeronayn yiam yedaa eayn paashonam aapinka haapaana hamin hamayse kinin paashonam eenna ke guyade. <sup>37</sup> Gerasenon peente dohoono eeno wul kattsi konin

\* <sup>8:30</sup> “Legoon” hamen upsinam Haalin Mallan mathaapinsa macchinte thaapadhaanar shedaa.

kurtumbhonna, Yesus kesa peera utayse kinin yivoadettsi kiam ko miskade. Yesusaar bazindara sagadhen gonngalante ardayse yinin nivon peendar maatayse ki yivade. <sup>38-39</sup> Beeronayn utaa ear Yesusbete daana kiam ki miskade. Yesusaar “Hasa oonindar yivayse Barjo hamin dohon yer hana kinin hayonam eenna giyaa” hamayse kiam ki yittsade. Ear Yesus hamin dohon yer gebhi kina kinin hayonam katamante dohon een wulna giyaaate ki yivade.

*Yayroos Naanbee Yesussa Apalan Kaamon Edonbe  
Maat 9:18-26; Marq 5:21-43*

<sup>40</sup> Eeno wul kiam konin kaalonna Yesus maatayse kekal ki nivaysaka, wozaka kiam ke tiyade. <sup>41</sup> Ogo wodanka Ayiwd eensa bukin raqinam wottsea Yayroos hambhea eedi kalaan ki nivade; Yesussa roon demente dhambayse, yisa oonindar kinin nivoadettsi kiam ki miskade. <sup>42</sup> Harrna hambhidianna, leve tabhi lamaaddha maatoono naasi kisa kallo bish dahade; kodiar hajadhayse diyanna yeskidine.

Yesusaar kimbesana kinka kinin yivenka, thoothino eeno kiam kupada koda yive. <sup>43</sup> Layme hajimoka tabhi lamaa leve hajadhayse kappoono maa kallo ko dahade. Kodiar yisa dohon wulam dheeshanna imada ko macchade; eedi hayyear koam pacchana damadehe. <sup>44</sup> Kodiar Yesussa budobar nivayse kisa apalansa nukinam ko kaamade; saanawaar kosa zombhino laymayno ko woyade.

<sup>45</sup> Yesusaar “Iam kaamaa hayne?” hamayse ki oysade. Kedi wulaar “Wodi haam kaamootone” ke hamade. Bhethiroost<sup>†</sup> “Woam Dhettsea, eeno cibhimayse haam konin kuppenka [‘Hayne iam kaamaa’ ha hamo?]” kina ki hamade. <sup>46</sup> Yesusaar “Pacchasa kanta idara konin utonam inta dhesidine; eedi iam kaamidine” ki hamade.

<sup>47</sup> Edonoar aadhimbhana yinin damaamonam yinin dhesenka, gibazada nivayse Yesussa demente ko dhambade. Harrna kiam konin kaamonbee saanawa konin paashonbeam een wulsa birante ko giyade. <sup>48</sup> Yesusaar “Isa naano, idar woylamin hanin qajoono haam ko pacchade; nagaya yivaa” kona ki hamade.

<sup>49</sup> Yesusaar ogoam giyte ki daaka, eedi kalaa Ayiwd eensa bukin raqin wottsea Yayroos oonira nivayse, “Hasa naano diydine; ta keeda dhettseam galshaabhode” kina ki hamade. <sup>50</sup> Yesusaar dhalqin ogoam qansayse Yayroosna “Kurtumbhaabhode! Idar bish woylam qajaa; hasa naano dhaabha ko dhaabhe” kina ki hamade.

<sup>51</sup> Yesus Yayroos ooninte kinin yeskenka Bhethiroosbee, Yayqoobbee, Wannisbee, naansa imbaabee indanbe, iginia eenara eedi ab kimbesana kinka ooninte konin ardoamadettsi ki marade.

<sup>52</sup> Eeno wul naanna burqadhayse koda eepe. Yesusaar “Eepeebhode; naano raata ko raataade, diyadehe” kena ki hamade. <sup>53</sup> Kediar konin diyonam yinin dhesenna, kiam ke hancade. <sup>54</sup> Kidiar naansa aanin yedayse upsi gebhika “Ya naano, dhaabhaa” kona ki hamade. <sup>55</sup> Kosa sadanin maatonna saanawa kodi dhaabhidine. Yesusaar “Gala kona imee” ki hamade. <sup>56</sup> Naansa imbaabee indanbe targadhidine. Yesusaar “Ko yerinam haynaar giyeebhode!” kena ki hamade.

## 9

*Yesus Yisa Paanan Yivaynaam Kinin Yittsoono  
Maat 10:5-15; Marq 6:7-13*

<sup>1</sup> Yesus tabhi lamaana yisa paanan yivayna eenam yikal eelayse, beeron wulam eendara kenin buloadettsibee burqadhaanaam kenin pacchoadettsibe kantabee hayamobe kena ki imade. <sup>2</sup> Barjo bitamonsa upsinam eenna kenin giyoadettsibee hajadhaanaam kenin pacchoadettsibe keam ki yittsade. <sup>3</sup> Yin kena ki giyade: “Yesa goynna haljo ko hannaar, surba ko hannaar, gala ko hannaar, birre ko hannaar, yer kala hattear

<sup>†</sup> 8:45 “Bhethiroos” hambhenam waani waani mathaapinte “Bhethiroosbee kimbesana kinka daaanabe” koda hame.

yenka beveebhode; shuraab langoor beveebhode. <sup>4</sup> Raqin hamotear birayse yeam chocchamon tiyaa ea ooninte arda ye hanna, raqin ogora yenin utenka yekka ogote dooqee. <sup>5</sup> Eeno yeam yikal tiymino ko hanna, gurdan ogora yenin utenka, kedar tarja konin maatoadettsi yesa roondar dohon silalinam dinsee” kena ki hamade. <sup>6</sup> Kediar raqin ogora utayse Barjosa dhacchintan upsinam eenna giyada, hajadhaanaamaar pacchada gurdan wulir ke yaayade.

*Herodis Yesussa Waadiman Kinin Qansoono*

*Maat 14:1-12; Marq 6:14-29*

<sup>7-8</sup> Galila peenam wottsea Herodis ogoyn maaton wulam kidi qansidine. Kidiar waani waani eneo “Shivea Wannis diira dhaabhidine”, waani eneo “Eelias maataate ki nivade”, waani eneo “Ena birayse Barjokala qansayse eenna giyaynasa kalaa diira dhaabhidine” konin hamenna, kina dhesiman konin garonna, qothimite ki dahade. <sup>9</sup> Herodisaar “Inta Wannissa qorcinc taskidine. Ta ‘Yin kida waadadhe’ hamaye kinnon goynsa giidhea kaa kidi hayne?” hamaye kiam shedana zagite ki dahade.

*Yesus Shii Dong Eenaam Kinin Kunsoono*

*Maat 14:13-21; Marq 6:30-44; Wannis 6:1-14*

<sup>10</sup> Yesus yisa tarjamonnante kinin yittsaana eenaar yinin yittsadhorra maatayse hatte, yinin waadadhon wulam Yesussna ke giyade. Kidiar yinka kebishinam entsayse Beetesayda hambhen katamansa gasandar ki yivade. <sup>11</sup> Eenoar ogoam dhesayse Yesuskal dhaabhayse ko yivade. Kidiar yidar keam tiyayse Barjosa bitamon upsin kena giyaate ki dahade; burqora paasha keam zaskaynaamaar ki pacchade.

<sup>12</sup> Hayn ibanayse sootanna hayenka, tabhi lamaana Yesussa paanan yivayna kikal nivayse, “Ta wonin dohoono eedinin qolmontene; ogona wosa gasante dohon kataman-bee gurdantebi yivayse galabee wodhinta raqbe kenin haapoadettsi eenaam yittsaa” kina ke hamade. <sup>13</sup> Kidiar “Yedi kenin itsen galan kena imee” kena ki hamade. Kediar “Wodi yivayse een ko wulna gala wo shanaamma, wosa daahaana balasha dongbee kaara lamaabe bishne” kina ke hamade. <sup>14</sup> Eenaar shii dongaddhane. Yesus yisa paanan yivayna eenana “Eenaam eedi lamaa kaysa apo tabhi, eedi lamaa kaysa apo tabhi hayayse dottsee” kena ki hamade.

<sup>15</sup> Yesussa paanan yivaynaar kena giidhondettsi eenaam ke dottsade. <sup>16</sup> Yesus balashana dongnabee kaarana lamaanabeam tiyayse tura cecin shadayse Barjoam miskeka ki gobshade. Kidiar kashayse eenna kenin yeskisoadettsi yisa paanan yivayna eenana ki imade.

<sup>17</sup> Eeno wulaar itsayse ko mishade; een itsaysaka shidhoono dirmano sharqa tabhi lamaa thoothi ke dhaasade.

*Bhethiroos Kiristoossa Kinin Tarjoono*

*Maat 16:13-20; Marq 8:27-30*

<sup>18</sup> Yesus yimal Barjoam kinin miskinka, kisa paanan yivayna eenaar kimbesana kinka ke dahade. Kidiar “Zarsino iam hay ko hame?” hamaye keam ki oysade. <sup>19</sup> Kediar “Shivea Wannisne” koda hame; waani eneoar ‘Eeliasne’, waani eneoar ‘Ena birayse Barjokala qansayse eenna giyaynasa kalaa diira dhaabhidine’ koda hame” kina ke hamade. <sup>20</sup> “Yedi iam hay yeda hame?” kena ki hamade. Bhethiroosaar kina yinin maasenka, “Ya Barjoyn qadhaa Kiristoosne” ki hamade. <sup>21</sup> Yesus ogoam haynaar kenin giyoamadettsi upsi wocchika giyntaka, <sup>22</sup> “Inta Eedi Naas thoothi gaale tiyayda tiye; peensa donzanabee, gudullasa hayonabee, Musesa yigginam dhettsaynabe iam baga ke bage; iam deesa ko deesadhe; makkansoa rooroakaar dembhira dhaabhayda dhaabhe” kena ki hamade.

*Yesussa Paanan Yiidhen Goyno*

*Maat 16:24-28; Marq 8:34-9:1*

<sup>23</sup> Yesus ke wulna yin ki guyade: “Isa paanan nivana nashea hay ki dahaannaar yinnon qaaben ki gare; yinindar ziitate deesadhen masqalinamaar rooroa rooroaka kedayse isa paanan ki nive. <sup>24</sup> Sadan yinnonam dhacchana nashea hay ki dahaannaar koam kaysa ki kayse; ina hamayse yisa sadanam kaysea hay ki dahaannaar koam dhaccha ki dhacche. <sup>25</sup> Eedi peen kodar dohon yer wulam haapayse sadan yinnonam kaysidi ki hanna, kina har ko poote? <sup>26</sup> Imbee isa upsinbeka ooshimbhea wul, i Eedi Naas isa gobshinbee, Imbaasa gobshinbee, Barjosa gazana gaananasa gobshinbeka inin nivenka, kanka inta ooshimbhayda ooshimbhe. <sup>27</sup> Inta yena gon ida giye: Barjosa bitamonam yinin haapenka yekka kote woyaana eenasa shaarinte dembhi diymina eedi daane” ki hamade.

*Yesussa Dantanin Ookimoono  
Maat 17:1-8; Marq 9:2-8*

<sup>28</sup> Yesus ogoam yinin guyonsa budobar rooro lankayaddha Bhethiroosbee, Wan-nisbee, Yayqoobbeam yinka entsate Barjoam miskota dhukandar ki utade. <sup>29</sup> Kinin miskenkaar kisa aapin kerro ko ookimade; kisa apalloar bhalqantidettsi cawli ko maatade. <sup>30-31</sup> Marrato! Eedi lamaa, kediar Musebee Eeliasbe, gobshinkaar haapad-hayse Yerusaalemir maatota dohon Yesus dembhinsa kimbесана kinka keda dhalqe.

<sup>32</sup> Bhethiroosbee kimbесана kinka daaanabe gindhe keam yedonna, kedi raati-dine. Kenin dhaabhenka, Yesussa gobshinbee kimbесана kinka woyayse daaanana eena lamaanabeam ke haapade. <sup>33</sup> Eenaar Yesuskalanka edimayse kinin yivenka, Bhethiroos Yesuskal, “Imbo, raqin kote wonin dahayno wona payyane; ogona baara kalaam hana, kalaam Musena, kalaam Eeliasna hayayse baara makkam wo kee” kina ki hamade. Bhethiroos har kinin giyenam kidi dhesehe.

<sup>34</sup> Bhethiroosaa ogoam yin kinin giyenka, liilo nivayse keam ko ishkade. Liilonin keam ishkenkaar ke kurtumbhade. <sup>35</sup> Liilonsa iir “Inin kamaa isa Naasa kaane; kina qansee” hamea upsi ko qansimade.

<sup>36</sup> Upsiniq qansimonsa budonte, Yesus yimal ki daaka kiam ke haapade; kediar ogo wodanka yinin haaponam haynaar giyma lay ke hamade.

*Beeroyn Yedaa Naasaam Yesusin Pacchoono  
Maat 17:14-18; Marq 9:14-27*

<sup>37</sup> Peen sedhaysaka dhukara kinin hanchenka, thoothino eeno Yesusbekal goynte ko keerade. <sup>38</sup> Eenara eedi kala yin guyayse ki ilatade: “Woam Dhettsea, isa naasa kalaam bishne. Bannzo! Ina kiam shedaa. <sup>39</sup> Ruminin kisa dhaabhenka, ki bhocchima koda kiam ilattse; aponka kisa dubo nittsaate koda qaptinse; bishinam kisa hajinsada galshayse koda kiam gare. <sup>40</sup> Hasa paanan yivayna beeroam kidara kinin buloadettsi keam inin miskenka bulana damadehe” kina ki hamade.

<sup>41</sup> Yesusaar kena yinin maasenka, “Yedi idar woylamin qajimina, bhocchinka yesa wobaana adhadhinato, hamaaka yekka yembesana ida dee? Yena hamaaka yekkay darsho? Hasa naasaam kote bavaa” kina ki hamade. <sup>42</sup> Naasaam Yesuskal entsate kinin nivenka rumaa peendar kiam dhabayse ki qaptisade. Yesusaar beeroam ki bitade. Naasaamaar pacchayse imbaana kiam ki imade. <sup>43</sup> Eeno wul Barjosa gebhon kantanam yinin shedenka kodi targadhidine.

*Yisa Dembhinsa Yesusin Lansi Giyoono  
Maat 17:22-23; Marq 9:30-32*

Eeno wulaar Yesusin waadadhon wulka targadhayse ko daaka, Yesus yisa paanan yivaynana <sup>44</sup>“Inin yena giyen koam yesa woylaminha bhocchhee: I Eedi Naasaam eensa aaninte saskate iam koda imbhe” kena ki hamade. <sup>45</sup> Kisa dhalqino kena ardima aachi dhalq kekal konin maatonna, kedi ogo kinin giyenam bhocchadehe; yerin ogosa kiam oysanaar ke kurtumbhade.

*“Wuldara Sagi Maatea Hayne?” Hamayse Kenin Oysoono  
Maat 18:1-5; Marq 9:33-40*

<sup>46</sup> Yesussa paanan yivaynaar “Wosa iira sagi maatea hayne?” hamayse palime ke yedade. <sup>47</sup> Yesus kesa woyleaminsa qaabenam dhesayse naasi kalaam bavayse yikal ki woysade. <sup>48</sup> Yin ki giyade: “Naasa kaam isa naabenna hamayse tiyea iam ki tiyade; iam tiyear iam nittsaam kida tiye. Yesa shaarira wuldara tokea kidi sagia eane” kena ki hamade.

<sup>49</sup> Wannis Yesusna “Imbo, eedi kalaa hasa naabenka beeronaam kinin bulenka kiam wo haapade; wombesana kinka kinin dahaamonna, kiam wo marade” kina ki hamade.

<sup>50</sup> Yesusaar “Yeam jibbimina wul yembesana kinka kenin dohonna, kiam mareebhode” kina ki hamade.

*Sammaria Eeno Yesusam Tiyana Konin Nashaammo*

<sup>51</sup> Jesus cecindar kinin yiven wodan yeskaysaka Yerusaalem yivima shidhattine hamayse ki dhaabbade. <sup>52</sup> Yisa birantear ergen eenam ki yittsade; kediari raq kina ashkota Sammaria peente dohon gurda kallondar yivayse ke ardade. <sup>53</sup> Yesus Yerusaalem kataman kinin yivenam kenin dhesenna, gurdan ogote dahayna eena kiam tiyana nashadehe.

<sup>54</sup> Kisa paanan yivayna eenara Yayqoobbee Wannisbe ogoam yinin haapenka, “Imbo, [Eeliasin hayondettsi] cecira nuu hanchayse keam ko koqe wonin hamoadettsi ya nashaa nasho?” kina ke hamade. <sup>55</sup> Yesusaar ora kedar wal hamayse keam ki wacimade. [“Yedi hamin dohon manpaskalanka yenin dohonam dhesattene. <sup>56</sup> I Eedi Naasin nivoono eenam dhacchanane; kaysana nivaatine” ki hamade.] Ogora dhaabhayse gurda abdar ke yivade.

*Yesussa Paanan Yivana Zagaana Eena  
Maat 8:18-22*

<sup>57</sup> Yesusbbee kisa paanan yivayna eenabe goynka kenin yivenka, eedi kalaa “Inta hanin yiven hamote ko hannaar, hasa paanan yivayda yive” kina ki hamade. <sup>58</sup> Yesusaar kina yi giyna: “Shedaa! Gaamirenasa kenin wodhea kesa oolo daane; aptinasaar ooni daane; i Eedi Naas meten innon inin daasea raq isa qolehe” kina ki hamade.

<sup>59</sup> Yesus ea waanaar “Isa paanan nivaa” kina ki hamade. Kidiari “Imbo, birayse imbaam duukayse inin nivoadettsi iam yittsaa” kina ki hamade. <sup>60</sup> Yesusaar “Shedaa! Diyaana diyaanaam kenin duukoadettsi kena garaa; ya yivayse Barjo bitamonsa upsinam eenna giyaa” kina ki hamade.

<sup>61</sup> Ta pir eedi kalaa “Imbo, inta hasa paanan yivayda yive; ko dahaannaar birayse oonin innon eenana elqimayse inin maatoadettsi iam yittsaa” ki hamade. <sup>62</sup> Yesus “Haamin koysanna irpin aaninka yedayse budoka maatate shedeua ea Barjosa bitamonna maateatehe” kina ki hamade.

## 10

*Yesus Eedi Makkam Kaysa Apo Tabhi Lamaa Eenaam Kinin Kamoono*

<sup>1</sup> Ogosa budonte Imbaa wontea Yesus tabhi lamaana kisa paanan yivayna eenadar eedi makkam kaysa apo tabhi lamaa\* waani eenam ki kamade. Kidiari yina yivota yinin qaabaana katamanabee ranqa wulbedar lamaa lamaa hayayse yisa birante keam ki yittsade. <sup>2</sup> Yin kena ki giyade: “Buuradhadyno isinno thoothine; buurayna eena tokaane. Ta keeda isininsa Imbaa buurayna eenam haamindar kinin nittsoadettsi kiam miskee. <sup>3</sup> Marrato! Inta yeam yaanadettsi yaayonasa shaarinte ida yittse; ta keeda yivee. <sup>4</sup> Birre yedea korbhobee, surbabee, dunnguribe yenka beveebhode; goynka yinin yivenka haykalar nagaysite kappeebhode.

\* 9:54 2 Binna 1:10-12. \* 10:1 “Eedi makkam kaysa apo tabhi lamaa” hambhonam ena mathaapin waani waanisa iir “eedi makkam kaysa apo tabhi” koda hame.

<sup>5</sup> “Onna yenin ardayna wulir; birayse ‘Payyamo oonin kona ko dee’ hamayse kena giyee. <sup>6</sup> Oonin ogote payyamon nashea eedi daa ki hanna, yesa payyamono kina payya koda maate; yintay ko hamma yesa payyamono yedar koda maate. <sup>7</sup> Waadadheana damooz kasha ko kashadhe. Ogona oonin ogote yena kenin imenam itsadabee wucadabe kembesana kinka dooqee; oonin waara oonin waadar yaayeebhode.

<sup>8</sup> “Yenin arden kataman wulir eenin yeam tiyayse yena kenin imenam itsee. <sup>9</sup> Raqin ogote hajadhaana wulam pacchee; eenna ‘Barjosa bitamono yekal theedidine’ hamayse kena giyee. <sup>10</sup> Ko dahaannaar yenin arden katamante eeno yeam ko tiyaamma, kataman ogosa goynadar utayse, <sup>11</sup> ‘Kataman yennora wosa roondar yedoono silallo tarja yena konin maatoadettsi yena woda dinse; Barjosa bitamono yekal konin theedonam dhesee’ kena hamee. <sup>12</sup> Yena yin ida giye: Pirdin rooroaka kataman ogora Sodoomdar yeskayno pirdino tokaane” kena ki hamade.

### *Barjodar Maataamma Katamanayn Dhiidhimbhadhoono*

*Maat 11:20-24*

<sup>13</sup> Ogora Yesus yin ki guyade: “Korazin katamante dahaana eenato, yedi hay! Beetesayda katamante dahaana eenato, yedi hay! Yekal haydhoono tarshayno waadimano Thiroosbee Sidoonaber haydhada hatte ko hanna, siyinna goobintonam yidara yiikayse dibiniar dumate yisa metendar kahayse ena wodda seeson waadimanam yisa garayse Barjodar maatidi keda dee. <sup>14</sup> Pirdin pirdadhenka yedar yesken pirdindara Thiroosbee Sidoonabedar yeskayno pirdino tokaane.

<sup>15</sup> “Ta yedi Qipirnaahoom katamante dahaana eenato, tura cecindar dhev dhev hamo ye qaabaa? Yin dayma mia diyaana eenayn dohon raqindar yedi hancheeda hanche” ki hamade.

<sup>16</sup> Pir yinin yittsaynakal “Yena qansea ina kida qanse; yeam bagea iam kida bage; iam bagear iam nittsaam kida bage” kena ki hamade.

### *Yesusin Yittsaana Eena Maataate Kenin Nivoono*

<sup>17</sup> Eedi makkam kaysa apo tabhi lamaana eena Yesusin keam yittsorra wozaka maataate ke nivade. Yesusaar “Imbo, beeronaar hasa naabenka wona ee hamidine” kina ke hamade. <sup>18</sup> Yesusaar kena yin ki guyade: “Seethaan cecira bhalqantidettsi kinin dhambenka kiam i haapade. <sup>19</sup> Marrato! Gunibee qolpobeam yenin tigoadettsi, yesa banqin eenaam yenin bashen hayamo yena inta imidine. Yeam kaamea yer qolehe. <sup>20</sup> Ko dahaannaar beerona yena ee kenin hamenna wozadheebhode; yesa naabenin cecinte dohon warqatinte thaapadhonna wozadhee” kena ki hamade.

### *Yesusin Wozadhoono*

*Maat 11:25-27; 13:16-17*

<sup>21</sup> Ogo wodanka Yesus Manpas Gazanka wozadhayse, “Cecinbee peenbesa Imba maataa Imbo, ko yerinam eena pakallabee yerin dhesaanabekalanka aachayse naana likkanana hanin dhohonna haam ida gobshe. Gonni, Imbo, yin hayana hasa payya qaabe ko maatade.

<sup>22</sup> “Yer wulam Imbakalanka ina imbhidine. Barjo Imbaakalanka ab Barjo Naasa hay kinin dohonam dhesea hayyear qolehe. Ogodettsi Barjo Naasabee Naasa yinti dhaana kinin zagaana eenabekalanka ab Barjo Imba hay kinin dohonam dhesea hayyear qolehe” kena ki hamade.

<sup>23</sup> Yesus yisa paanan yivayna yimal ke daaka kekal maatayse, “Yenin shedenam shedayna eena gobshadhaanane. <sup>24</sup> Inta yena gon ida giye: Thoothina Barjokala qansayse eenna giyayna eenabee binnabe yenin shedenam shedana keda zage, ko dahaannaar shedadehe; yenin qansenam qansana keda zage, ko dahaannaar qansadehe” kena ki hamade.

### *Eedina Burqadhea Sammaria Peen Easa Kamsino*

<sup>25</sup> Marrato! Eedi kalaa Musesa yigginam dhettsea Yesusam taysate shedana dhaabhayse, "Woam Dhettsea, rooro wul lay dehen sadanam haapana yer har i hayo?" kina ki hamade. <sup>26</sup> Yesusaar "Musesa yigginte thaapadhoono hare? Ogoam hanin nabbabenka haraa bhocchaa?" kina ki hamade. <sup>27</sup> Ear kina yi maasina, "Ya Imbaa hantea Barjoam gonin hamon woylaminka, gonin hamon sadanka, gonin hamon kantanka, gonin hamon qaabenka kiam nashaa; ha aanantaam hadettsi hayaye nashaa' koda hame" kina ki hamade. <sup>28</sup> Yesusaar, "Gonaa giyade; yinaa hayna rooro wul lay dehen sadanam hada haape" kina ki hamade.

<sup>29</sup> Ea yiam tipa hayana zagayse Yesusna "Isa aananta kidi hayne?" hamayse kiam ki oysade.

<sup>30</sup> Yesus maasayse kina yin ki giyade: "Eedi kalaa Yerusaalemra Iyarko kinin yivenka, eena eensa koymon buurate itsayna kiam haapayse, kisa apalanam kidara bulayse kiam yinin qanonsa budonte, ea diyanna kinin hayenka garayse kiam ke yivade.

<sup>31</sup> Dhesima gudul kalaa goyn ogoka ki nivade; eamaar shedayse ki sagade. <sup>32</sup> Ogoraar tapir Lewi eedi kalaa goyn ogoka kinin nivenka kiam shedayse ki sagade. <sup>33</sup> Sammaria eedi kalaa goyn ogoka nivite eam shedayse kina ki burqadhade. <sup>34</sup> Eakal theedayse waqatibee woynea hattasa aapin cuubadhonbeam kisa hajimindar qadhyayse apalaka ki dhaxade. Yisa ukuliadar kiam bulayse shonnayn wodhen raqindar tiyate yivayse kiam payya hayayse shedaate ki wodhade. <sup>35</sup> Peen sedhaysakaar birre lamaa<sup>†</sup> bulayse shonnayn wodhen ooninsa imbaana imayse, 'Ea kaam payya hayayse shedaa; ogora inta nivayse hanin kina bulon koymon wulam hana kashayda kashe' kina ki hamade.

<sup>36</sup> "Ta keeda igma makkamma eenasa koymon buurite itsaynayn qanate dhabaasa kina aanamo maataa hakal hamaa ki maate?" kina ki hamade. <sup>37</sup> Kidiar "Kina burqadhayse kiam kelshaane" ki hamade. Yesusaar "Yaar yivayse yin hayaa" kina ki hamade.

### *Yesus Marta Ooninte Kinin Ardoono*

<sup>38</sup> Yesus yisa paanan yivaynabesana kinka goyi yivite gurda kallonte ke yeskade. Raqin ogote Marta hambhayno maa kallo yisa oonindar keam ko tiyade. <sup>39</sup> Mayriyam hambhayno kosa indanaas kallo ko dahade; kodiar Imbaa wontea Yesussa roon demente dooqayse kinin giyen dhalqinam qansite ko dahade. <sup>40</sup> Martaar waadimanin kodar thoothenka os ora hamada ko qajadhade. Yesuskal theedayse, "Imbo, indanaano waadiman wulam idar ko garaysaka inin waadadhenka koam haapayse ya lay ha hamo? Ogonante iam konin kelshoadettsi kona giyaa" kina ko hamade. <sup>41</sup> Yesusaar kona yinin maasenka, "Marta, Marta, yer thoothi qaabite hada gaale. <sup>42</sup> Ko dahaannaar yer zaskea kalaa bishne. Mayriyam yer payyanam ko kamade; ogoamaar kokala tiidhehe" kona ki hamade.

## 11

### *Barjoam Miskadhensa Yesusin Dhettsoono*

*Maat 6:9-15; 7:7-11*

<sup>1</sup> Yesusaar raq kalaate Barjoam miskite ki dahade. Misken ki macchaysaka kisa paanan yivaynasa kalaa, "Imbo, Wannis yisa paanan yivaynaam Barjoam miskadhen keam kinin dhettsondettsi, yaar hamin wonin miskenam woam dhetsaa" kina ki hamade. <sup>2</sup> Yesusaar "Barjoam yenin miskenka yin giyayse miskee:

'[Cecinte dahaa] Imbaa wontea,  
nammo hasa ko gazisadhe;  
bitamono hanno ko nive.'

<sup>3</sup> Wona zasken galanam roroaka roroaka wona imaa.

<sup>4</sup> Woam seesaynana wonin garendettsi,

wonnon seesonamaar wona ya garaa.

Siyondar arsota taysayno wodar konin nivoamadettsi woam gishaa' hamayse miskee" kena ki hamade.

<sup>5-6</sup> Ogora Yesus kena yin ki giyade: "Yesa iira eedi nashoysa daahaa sootin kiaddha laman kisa oonindar yivayse, 'Isa nashoa, bannzo! Isa eedi nasho kalaa goytibar ikal ki nivade; kina inin imea gala ikal golehe. Gala hasa daana ina imaa' kina kinin hamenka, <sup>7</sup> ta keeda ea agaa ooninte dooqayse, 'Iam galshaabhode! Inta kerin diithidine; isa naanaar imbesana raatidine; dhaabhayse hana imana damattine' kina hamok? <sup>8</sup> Kisa nashoa yinin dohonna dhaabhayse kina imana yi zagaammaar, miskite kinin galshenna dhaabhayse kinin zagon wulam kina ima ki ime ida hame.

<sup>9</sup> "Ogonante yena ida giye: Miskee, yena imbha ko imbhe; zagee, haapeeda haape; kerinam kokkee, yena buldha ko buldhe. <sup>10</sup> Harrna hambidianna, miskea wul tiya ki tiye; zagear haapa ki haape; kerinam kokkeanaar kerro buldha ko buldhe.

<sup>11</sup> "Yedi ta imba dahayse yesa iira eedi kalaa naasa kintea kiam [balasha kinin miskenka, seeni kina ima ki imo?] Kaara kinin miskenka, kaaran oolonte guni kina ima ki imo? <sup>12</sup> Bhula kinin miskenka, qolpo kina ima ki imo? <sup>13</sup> Ta keeda yedi siyana dahayse yesa naanana yerin payyan iman ye dhesidianna, cecinte daahaa Imbaa yentea kiam miskaynana Manpas Gazanam yedara sagi hamin ki imimine?" kena ki hamade.

### *Yesusam Beeronasa Hayoaka Kamsadhoono*

*Maat 12:22-30; Marq 3:20-27*

<sup>14</sup> Yesus beeronin apo kaysa eedi kalaadara beeroam bulite ki dahade. Beeroar eadara utonsa budonte, ea apon dhalqima dhalqan ki yedade; ogona enoar targadhidine. <sup>15</sup> Ko dahaannaar kesa iira waani waani eena "Beeronaam kinin bulayno beeronasa hayoa Bevelzebulsa kantankane" ke hamade. <sup>16</sup> Waani enoar kiam taysate shedota zagayse Barjokalanka tarshea milkit kena kinin dhoodettsi zagite ke dahade.

<sup>17</sup> Kidiar kesa qaabonam dhesayse kena yin ki giyade: "Bita kalaasa eena kinka kikalanka edimidi ke hanna, bitamono kisa kaya ko kaye; oonin kallon eena kinka kikalanka edimidi ke hanna, onno ogono kottsima ko kottsime. <sup>18</sup> Inta beeronasa hayoa Bevelzebul kantanka inin beeronaam buleadettsi yeda giye. Seethaan taar kinka kikalanka edimidi ki hanna, bitamono kisa hamin ko woye? <sup>19</sup> Beeronaam inin bulayno Bevelzebul kantanka ko hanna, ta eena yenna beeronaam hay kantanka ke bule? Ogonante kedi yedar pirda ke pirde. <sup>20</sup> Inta beeronaam inin bulayno Barjosa kantanka ko hanna, ta keeda Barjosa bitamono yekal nividine hamintane.

<sup>21</sup> "Kantanka daahaa eedi kalaa banqibee longgabe yedayse oonin yinnon toolea ki hanna, onno kisa burdhehe. <sup>22</sup> Ko dahaannaar kidara sagea nivayse kiam bashidianna, kinin woylemin qajaana banqin koymonaam kikalanka tiyayse kisa koymonam buurayse een waanina kasha ki kashe.

<sup>23</sup> "Imbetetay hama hayyear iam jibba ki jibbe; imbete kinka kamima hayyear thar thar kida haye" kena ki hamade.

### *Beeroyn Eeddara Utensa Budonte Pir Maataate Kinin Ardayno*

*Maat 12:43-45*

<sup>24</sup> Yesus pir "Beero eeddara yinin uton wodanka, ukunse raq zagayse noqoyn qolmon raqinte kida yaaye; ko dahaannaar ukunse raq haapehe. Ogona 'Inin uton oonindar isa maataate ida yive' kida hame. <sup>25</sup> Maataate kinin nivenka, ooninam sahate ashkadhon kida haape. <sup>26</sup> Ogora yivayse yidara kalon sagaana waani tobbhaana beeronaam yinka entsate nivayse easa iinte ardayse keda dee. Ogonante ea agaasa dayntano ena hamora kattsi siyane" ki hamade.

<sup>27</sup> Yesus ogoam kinin giyenka, maa kallo eenasa iira upsi gebhika “Haam adhayse amin qooshoono handa hamin gobshadhoonone!” kina ko hamade. <sup>28</sup> Yesusaar kona “Gobshadhaana Barjosa upsinam qansayse toolaynane” kona ki hamade.

*Yoonaassa Milkitino  
Maat 12:38-42; Marq 8:11-12*

<sup>29</sup> Eeno Yesuskal nivada thoothaate konin yivenka, kona yin ki guyade: “Wodan koka dohoono eeno siyonone; kodi tarshea milkit shedana koda zage. Ena Barjokala qansayse eenna giyea Yoonaassa milkitira milkit ab kona haydhehe. <sup>30</sup> Ena Yoonaas Nenewe katamante dohon eenna milkit kinin dohondettsi, yin inta Eedi Naasiar wodan koka dohon eenna milkit ida maate.

<sup>31</sup> “Hayn utensa mizaqimbar dohon peensa binno\* ko wodanka dohon eenbesana kinka dembhira dhaabhayse pirdin rooroaka kedar koda pirde; harrna hambhidianna, kodi Bitaa Solomoon yisa pakalmakkonka kinin giyenaam qansana peensa gasara ko nivade. Marrato! Solomoondara sagea ea kote daane.

<sup>32</sup> “Ena Nenewe katamante dahaana eenaar pirdin rooroaka, wodan koka dohon adhadhinbete dhaabhayse kodar keda pirde. Harrna hambhidianna, Nenewe katamante dohon eenna Yoonaas Barjosa upsinam kinin giyenka qansayse seeson waadimanam garayse Barjodar ko maatade. Marrato! Yoonaasdara sagea ea kote daane” kena ki hamade.

*Yesus Shaakansa Kinin Dhettsongo  
Maat 5:15; 6:22-23*

<sup>33</sup> Ogora Yesus “Shaakanam shashkayse aachea way daran yer guupea eedi golehe. Ooninte ardaynana konin shaakoadettsi dhieg hamon raqindar kida wode. <sup>34</sup> Hasa bishinsa shaakano aapine. Aapino hanno payya konin dohonna, hasa bishino wul shaakante koda dee. Aapino hanno hajidi ko hanna, hasa bishino wul thiipante koda dee. <sup>35</sup> Ta hadar dohoono shaakano thiipa konin maatoamadettsi mete hasaam gishaa. <sup>36</sup> Ta keeda hasa bishino wul thiipa yindar qolmino shaakaka dohoono ko hanna, bishino hasa wul shaaka yindar kattsi shaakayno koda maate” ki hamade.

*Parisa Eenabee Musesa Yigginam Dhettsaynabeam Dhiidhimbhadoono  
Maat 23:1-36; Marq 12:38-40; Luq 20:45-47*

<sup>37</sup> Yesus ogoam kinin giyonsa budonte Parisa eenasa shaarira eedi kalaal gala yikal kinin itsoadettsi kiam ki eelade. Kidiar kisa ooninte kummannaa ardayse ki dooqade.

<sup>38</sup> Yesus galan yinin itsensa birayse yisa aarinam kesa dambindettsi kinin shiidhaamonam Parisa ea haapayse ki targadhade. <sup>39</sup> Ogonante Imbaa wontea Yesus kina yin ki guyade: “Ta yedi Parisa eena galan yenin itsen sharqanbee karambhanbesa zulonam payya hayayse yeda shive; ko dahaannaar iinka yesa saribee siyamobe thoothidine.

<sup>40</sup> Yedi kina malgimmato, zulonam pijaa Barjo iinaam pijadaa? <sup>41</sup> Ko dahaannaar sharqanbee karambhanbesa iinte dohonam qambhinana imee. Ogosa budonte yer wul yena payya koda maate.

<sup>42</sup> “Yedi Parisa eenato, hay! Harrna hambhidianna, mayante yenin yiithaana basibilabee<sup>†</sup> thalitinabe, yerra likkana woothin dheeshana wulsa iira shiishima tambhasa iira kalaam Barjona yeda ime; tipan pirdinbee Barjoam nashintanbeam yeda gare. Ko dahaannaar waaniam yenin hayenka kinaam garinta yeam zaskehe.

<sup>43</sup> “Yedi Parisa eenato, hay! Harrna hambhidianna, Ayiwde eensa bukin raqinte gobshadhon borkotondar dooqotabee gabante gobshadhon gisimenam gisimbhotabe yeda nashe. <sup>44</sup> Milkintsa qolmina duukinaam yenin maatonna hay! Eeno dhesima iginia duukinadar koda yaaye” ki hamade.

\* 11:30 Yoon 1:17. \* 11:31 Kono binno “Saaba binno” hamayse 1 Binna 10:1dar ko thaapadhade. † 11:42 Agaa gaalin aponka thaapadhaa “azmud” hambheam Banen eenin dhesiminna, kiam “basibila” hambheasa kamsika ki tiidhade.

<sup>45</sup> Musesa yigginam dhettsayna eenasa eedi kalaa kina yi giyna: “Woam Dhettsea, yin hanin giyenka woamaar kembesana ha iirade” kina ki hamade. <sup>46</sup> Yesus kina yin ki giyade: “Yedi taar Musesa yigginam dhettsayna eenato, hay! Dethan basken eenaan baskisayse yedi yena baskenam aansa surkenka hattear kaamattene. <sup>47</sup> Ena eykena yennayn deesaana Barjokala qansayse eenna giyaynasa duukindar seenin bunkaate yenin ashkenna yena hay! <sup>48</sup> Ta keeda yedi eykena yenna waadiman yeda tarje; kesa waadimanamaar keedhayse yeda waadadhe. Kedi keam ke deesade; yedi kesa duukinam yeda ashke. <sup>49</sup> Ogonante Barjo yisa pakalmakkonka yin ki giyade: ‘Ikala qansayse eenna giyaynabee isa tarjamonnante inin yittsaynabeam kedar yittsayda yitse; kesa waaniam deesa ke deese, waaniamaar oyta ke oyte’ ki hamade. <sup>50</sup> Ogonoar peen pijadhorra yedayse Barjokala qansayse eenna giyayna eenasa zombhino wodan ko eno pirdin wodanka oysa ko oysadhe. <sup>51</sup> Inta yena ida giye: Aabeelsa zombhira yedayse Barjona marshan daran machadhen raqinbee Barjosa gazan ooninbesa shaarinte deesadhaa Zakkariassa zombhinka yekka, wodan ko eno gon pirdin wodanka oysa ko oysadhe.

<sup>52</sup> “Yedi Musesa yigginam dhettsayna eenato, hay! Timmirinsa kerin bulen gulpinam ye tiyade; yedi yenaar gidir ardeetene, ardanna zagaynaamaar ye marade” kena ki hamade.

<sup>53-54</sup> Yesus raqin ogora yivota kinin dhaabhenka, Musesa yigginam dhettsaynabee Parisa eenabe kattsi kiam yinin jibbenna, kisa dhalqinka kiam yedota thoothi kiam dhattsan ke yedade.

## 12

### *Yesus Maltamonsa Kinin Giyoono*

*Maat 10:26-27; 16:6*

<sup>1</sup> Ogo wodanka thoothino eno Yesuskal ko bukade; eensa thoothamora dhaabhoono kinka kiam kiam tigada koda kupime. Yesus birayse yisa paanan yivaynana yin ki giyade: “Parisa eenasa irshora mete yesaam gishee; ogonoar kesa maltamora pegadhee isa hamintane. <sup>2</sup> Aachimayse may maatima, aachadhaysakaar dhesima shidhea yer solehe. <sup>3</sup> Ogonante aachika yenin giyoono wul may koda qansime; ooninsa gulinte hashkimeka qaaminte yenin giyaynoar eensa shaarinte may koda ooshadhe” ki hamade.

### *Hayna Kurtumbhinta Konin Zaskayno*

*Maat 10:28-31*

<sup>4</sup> Yesusaar “Ye isa nashonana yin ida giye: Yesa waanam deesayse yer ab hayana damiminana kurtumbheebhode. <sup>5</sup> Ko dahaannaar inta hayna kurtumbha yeam konin zaskenam yena ida giye; ogonoar yinin deesonza budonte, lay dikimon nuunte dhabana hayamoysa dahaa Barjoam kurtumbhee. Bannzo! Kiam kurtumbhee ida yena hame.

<sup>6</sup> “Aptina suutana dongnam santup kalaadar shanshadhitetayu? Aptina iginasa iira kalaam hattear Barjo walehe. <sup>7</sup> Meten yennonsa sitin wulam shiishima Barjo paydidine. Ogonante yedi kurtumbheebhode; aptina suutana thoothinadara yedi sageeda sage” kena ki hamade.

### *Kiristoossa Tarja Konin Zaskayno*

*Maat 10:19-20bee 32-33be; 12:32*

<sup>8</sup> Yesus pir “Yena yin ida giye: Een birante isa tarjea wulna inta Eedi Naasiar Barjo gaananasa birante kina tarjayda tarje. <sup>9</sup> Een birante ‘Inta Yesus eeditehe’ hamayse giyeana intaar Barjo gaananasa birante ‘Kidi inti eeditehe’ ida hame.

<sup>10</sup> “I Eedi Naasdar siya giyea wul kisa seesonam kina gardha ko gardhe; Manpas Gazanam iirea ki hanna kisa seesonam kina gardhehe.

<sup>11</sup> “Eena Ayiwd eensa bukin raqintebbee, peen wottsaynakalbee, hayonasa birantebe pirdinna yeam yedayse kenin yivenka, ‘Hamino palimo? Yer haroo giyo?’ hamayse qaabeebhode. <sup>12</sup> Harrna hambidianna, guyana yeam zaskenam ogo wodanka Manpas Gazano yena giya ko giye” kena ki hamade.

### *Ea Wodimoasa Malgimmakkono*

<sup>13</sup> Eensa shaarira eedi kalaas Yesusna “Woam Dhettsea, imbaso koymora ina kinin kashoadettsi iishimna giyaa” kina ki hamade. <sup>14</sup> Yesusaar “Ya ea kaa, yesa shaarinte pirdin pirdeabee koymon kasheabe hayayse iam wodaa hayne?” kina ki hamade. <sup>15</sup> Maasayse eenana yin ki guyade: “Eensa sadano koymo thoothamokatehe. Ogonante yeam toolee; anngarma wulra mete yesaam gishee” kena ki hamade.

<sup>16</sup> Ogora kamsika kena yin ki guyade: “Eedi wodimo kalaasa haaminte isin thoothi ko ushade. <sup>17</sup> Kidiar ‘Isinin koam inin kehea kono isa qolmonna hamin i hayo?’ hamayse yisa woylaminka ki qaabade. <sup>18</sup> ‘Yin ida haye: Isa konnaam kottsayse ab kono worki ida woyse; ogote isa isinbee waani koymonbeam kesa iir ida kee. <sup>19</sup> Innon sadanna “Isa sadano, thoothi levena maatea koymo thoothi i pucchade. Ta keeda ukunsa, itsaa, wucaa, wozadhaa” kona ida hame’ ki hamade. <sup>20</sup> Barjoar ‘Ya kaa malgimea, kina sootin hasa sadanam hakalanka tiidha ko tiidhe; ta ogo hanin pucchoono wul hayna koda shidhe?’ kina ki hamade. <sup>21</sup> Yinaqa peendar koymonam pucchada Barjosa birante qambhi dahaa eedi ea wodimoa agaadettsi kida maate” ki hamade.

### *Barjodar Woylam Qajinta*

*Maat 6:25-34*

<sup>22</sup> Yesus yisa paanan yivaynana yin ki guyade: “Ogonante yena ida giye: Yesa dayntanna ‘Haroo itso? Haroo qaadho?’ hamayse qaabeebhode. <sup>23</sup> Harrna hambidianna, galara dayntano, apalara bishino saga ko sage. <sup>24</sup> Ayronaam shedee; kedi bheeta yiithehe, shikaar shikehe, konoar kesa qolehe. Ko dahaannaar Barjo keam kida kunse. Ta yedi aptinadara hamaddha yenin sagenam bhocchee! <sup>25</sup> Yesa iira qaabayse leven yinnondar rooro kalaa arsea eedi hayne?\* <sup>26</sup> Yerin likkonam yemal hayana ye damaamma, ta keeda yerin waaniam harrnee qaabe?

<sup>27</sup> “Aamana hamin kinin gebhenam shedee; kedi waadimaka qajadhehe, puttoar qanehe. Ko dahaannaar yena ida giye: Ena Bitaa Solomoonaar yisa gobshin wulka igina aamanasa kalaadettsi hattear goobadehe. <sup>28</sup> Barjoar kina haapadhayse saka nuunte yiam koqadhadyna peendar dahanan shundhaam yin gobshayse qattsea ki hanna, ta yedi Barjodar woylamin qajadhen joogaanato, yeam hamin saskayse ki qattsimine?

<sup>29</sup> “Ta ‘Wodi haroo itso? Haroo wuco?’ hamayse qaabeebhode. <sup>30</sup> Ogo wulam haapota Barjoam dhesimino eneo koda zage. Ogoro wul yeam konin zaskenam Imbaa yentea dhesa ki dhese. <sup>31</sup> Yediar kisa bitamonam zagee; ogoro wul yena imbha ko imbhe” kena ki hamade.

### *Peendar Koymo Puccha Woam Zaskimino*

*Maat 6:19-21*

<sup>32</sup> Yesus yi giyna: “Yedi tokaa maataana eenato, Imbaa yentea yisa bitamonam yena imana kinin nashonna kurtumbheebhode. <sup>33</sup> Yesa dohon koymonam shanshayse birrenam qambhinana imee; diibiyen yeskimon, ulavulonin itsimon cecinte maqa maqimin gecchar gecchiminte koymo yenante wodee. <sup>34</sup> Harrna hambidianna, koymonin yesa dohonte woylammoar ogote koda dee” kena ki hamade.

### *Waadiman Eenaam Wochimbha Zaskoono*

*Maat 24:42-44*

---

\* <sup>12:25</sup> “Leven yinnondar rooro kalaa arsea eedi hayne?” hamayno Girik aponka kosa buli lamaa daane; lanson bulino yinne: “Yisa gudumbakkondar dhundhuma kalaa arsea eedi hayne?” hamaynone.

<sup>35</sup> Yesusaar kena “Apala karnante orgo dhaximbhaana maatee; yesa shaakanoar shaakoono ko dee. <sup>36</sup> Yedi yisa imbaa gaydon oonira maatate nivayse kerinam kinin kokkenka, saana kina bulota toolayna waadiman eena maatee. <sup>37</sup> Igina yisa imbaanin niven wodanka, wocchimbhayse toolite ke daaka kinin haapayna waadiman eena gobshadhaanane. Inta yena gon ida giye: Kidi apalan orgo dhaximbhayse kummandar keam dottsayse keam kida kunse. <sup>38</sup> Sootin kiaddha laman nivayse keam kinin shedenka, wocchimbhayse dahaana waadiman eena gobshadhaanane. <sup>39</sup> Ko dahaannaar, yedi ta koam dhesee: Ea ooninsa imbaa diibiyen yisa oonindar wodaa hamaaka kinin nivenam dhesidi yi hanna, ooninsa kerin qunthadhoodettsi hayehe. <sup>40</sup> Inta Eedi Naas yenin bhocchaamon wodanka inin nivenna, yedi taar ashkimbhayse toolee” kena ki hamade.

### *Payya Waadiman Eabee Siya Waadiman Eabesa Kamsino*

*Maat 24:45-51*

<sup>41</sup> Bhethiroosaar “Imbo, kamsin koam wo binnanaa giymoo? Een wulnaa giye?” hamayse kiam ki oysade. <sup>42</sup> Imbaa wontea Yesusaar yin giyayse kina ki maasade: “Ta keeda oonin eenaam payya hayayse ki wottsebee waadiman eenanaar galanam kena ima zaskea wodaaka kinin imoadettsibe kisa imbaa kiam kamayse kinin wodea gon hama pakala kunsea kidi hayne? <sup>43</sup> Yisa imbaanin niven wodanka, kina giidhon waadimandar haapadhea ea kidi gobshadhaane. <sup>44</sup> Inta yena gon ida giye: Agaa waadiman easa imbaa yisa dohon yerin wuldar wottsea hayayse kiam kida wode.

<sup>45</sup> “Ko dahaannaar agaa waadiman ea ‘Imba saana nivehe’ hamayse yisa woylaminka qaabayse, waadiman eena annginabee maanabeam qanaate, pir itsadabee wucadabe bardhan ki yedanna, <sup>46</sup> agaa waadiman easa imbaa kinin bhocchaamon rooronbee kinin dhesaamon wodanbeka niva ki nive. Kiam kattsi kida qane; ogora ithanam kisa Barjodar woylamin qajiminabesana kida haye.

<sup>47</sup> “Yisa imbaanin giyonam dhesayse ashkimbhaama, kinin giyonamaar hayaama agaa waadiman ea kattsi kida qandhe. <sup>48</sup> Yisa imbaa yinin giyonam dhesima, qandhan yiam zasken waadiman waadadhaa ea likka kida qandhe. Harrna hambhidanna, thoothi yina imbhaakalanka thoothi koda zagadhe; thoothi yina elqimbhad-hakalankaar thoothi koda toldhe” kena ki hamade.

### *Yesus Peendar Edimenam Kinin Bovoono*

*Maat 10:34-36*

<sup>49</sup> Yesus yin ki giyade: “Peendar nuu dhabota bavate i nivade; ta keeda saana ko yedidianna hare dohoono? <sup>50</sup> Ko dahaannaar inin shiidhayno gaale shiidhime daane; ogoyn thoothenka yekka isa ukunse qolehe. <sup>51</sup> Inta peendar payyamo hayana inin nivoono yena maata ko maato? Eenaam kikalanka edota i nivade, payyamo hayana nivaatine. <sup>52</sup> Ta keeda kaara yedayse oonin kallonte dahaana dongna eenasa shaarira makkamma lamaanadar, lamaanaar makkammadar dhaabhayse kinka kikala edima ke edime. <sup>53</sup> Imbaa naassadar, naasaar imbaadar; indano naandar, naanoar indandar; indano naasa geshondar, naasa geshonoar aakandar dhaabhayse kinka kikala edima ke edime” ki hamade.

### *Wodanam Edayse Dhesintabee Wacimaa Eabesana Qaashimabe*

*Maat 5:25-26; 16:2-3*

<sup>54</sup> Tapir Yesus eenna yin ki giyade: “Lilono haynsa wavambar konin dohonam yenin haapenka, ‘Kina doobi qana ko qane’ yeda hame; gon qana ko qane. <sup>55</sup> Tapir jibarro hayn utensia mizaqimbar konin jibarshenka, ‘Kina peeno oydha ko oydhe’ yeda hame; gon oydha ko oydhe. <sup>56</sup> Yedi maltinato, cecinbee peenbesa milkitinam shedayse edana dameeda dame; ko dahaannaar ko wodanka maaten yerinam edana yenin damimino harrnane?

<sup>57</sup> “Yedi tipan yerinam dhesayse yemal yenin pirdimino harrnane? <sup>58</sup> Hambesana wacimaa haam bersayse peen wottseakal tiyate haam kinin yivenka, akar goynte dahayse kimbesana kinka qaashimana zaga. Yin ha hayaamma, kidi pirdin pirdea eakal kantaka gochate haam kida yive; pirdin pirdea ear haam poolisana saskate kida ime. Poolisaar dhaxin ooninte haam kida arse. <sup>59</sup> Inta hana ida giye: Hanka kashaa hamhon bazan wulam kashate hanin macchenka yekka, dhaxin oonira hamin ko dahaakaar utattane” ki hamade.

## 13

### *Barjodar Maataamma Wulin Kayayno*

<sup>1</sup> Ogo wodanka Yesuskal dahaana eena waani “Galila eenasa shaarira waani waani eena Barjona marsha machayse kenin imen wodanka, Bhilathoos keam deesayse kesa zombhinam kesa marshanbesana ki worsade” hamayse kina ke giyade. <sup>2</sup> Yesus kena yinin maasenka yin ki giyade: “Igina Galila eena yin kenin gaaloono Galila peen een wuldara sagi seeson waadadhaana eena kenin maatonnane hamaysee qaabo? <sup>3</sup> Yinteh! Ko dahaannaar seeson waadimanam yesa garayse Barjodar ye maataamma, yedi wulatte yin kayeeda kaye.

<sup>4</sup> “Pir Seeloom gurdante seeninka woysadhon oonin yidar yiipaysaka diyaana eena tabhi lankayna Yerusaalemir dohon een wuldara sagi seeson waadadhaana eenane hamaysee qaabo? <sup>5</sup> Yinteh! Ko dahaannaar seeson waadimanam yesa garayse Barjodar ye maataamma, yedi wulatte yin kayeeda kaye” kena ki hamade.

### *Aapin Ushimin Hatton Shaapinsa Kamsino*

<sup>6</sup> Ogora Yesus kena kamsika yin ki giyade: “Eedi kalaasa haaminte kordhoono haaqa shaap kallo ko dahade. ‘Kodi aapi kaydu?’ hamayse koraa imbaa shedota kinin nivenka, kodi kala hattear aapi kaadehe. <sup>7</sup> Haamin imbaar haamin tooleana ‘Shedaa! Hatton kosa aapi shedota ida nivika kinaka leve makkam konin maatonna, aapi kala hattear kodar inin haapaamonna, ta koam taxaa. Harrna ko haaminam gene?’ ki hamade. <sup>8</sup> Toolea ear kina yinin maasenka, ‘Imbo, demenam kosa koyayse duba inin kehenna, taar kina leven koam garaa. <sup>9</sup> Niven levenka aapi ushea ko hanna, payyane; ushima ko hanna, hada koam taxe’ kina ki hamade” hamayse Yesus ki giyade.

### *Yesus Maa Kallonam Ukunsen Rooroaka Kinin Pacchoono*

<sup>10</sup> Yesus ukunsen rooroaka Ayiwde eensa bukin raqinte dhettsite ki dahade. <sup>11</sup> Marrato! Tabhi lankay levenka yekka beero zulo wobsaysaka dheg hamayse woyana damaammo maa kallo ko dahade. <sup>12-13</sup> Yesusaar koam haapayse yikal koam ki eelade. Yisa aaninam kodar wodayse, “Ya edono kono, hanin woborra ya pikidine” kona ki hamade. Saanawa kodiar dheg hamayse Barjoam ko gobshade.

<sup>14</sup> Ayiwde eensa bukin raqin ogoam wottsea ea Yesus ukunsen rooroaka eenaam kinin pacchonna wacimayse, “Waadadha yeam zaskayno rooro laxne. Ta roorona iginaka nivayse paashee; ukunsen rooroaka ko dahabhoode” ki hamade. <sup>15</sup> Imbaa wontea Yesusaar kina yinin maasenka, “Yedi maltinato, yedi wul ukunsen rooroaka yesa wanngabee ukullabeam kenin dohon raqira bulayse noqo wusho yivattenu? <sup>16</sup> Kono edono Abraamsa muldhara dahayse, tabhi lankay levena Seethaanin koam wobsorra ukunsen rooroaka pika koam zaskayu?” ki hamade. <sup>17</sup> Ogoam kinin giyenka kiam jibbayna wul ke ooshimbhade; kinin hayon yerin tarshen wulka eeno ko wozadhade.

### *Saliithan Aapinsa Kamsino* Maat 13:31-32; Marq 4:30-32

<sup>18</sup> Yesusaar “Barjosa bitamono har ko maate? Harka koam i kamso? <sup>19</sup> Saliithasa\* aapi eedi kalaa yisa haaminte kinin yiithon bheetandettsi koda maate. Kodiar haaqa gaari koda maate; aptinaar kosa antindar ooni keda woyse” kena ki hamade.

### *Dhiilin Taapansa Kamsino*

#### *Maat 13:33*

<sup>20</sup> Tapir “Barjosa bitamonam harka i kamso? <sup>21</sup> Maa kallo dhiili sharqa makkam tiyate kanka konin taapaa irshodettsine; irshono konin dhiilin taapon taapanam konin oydhoodettsi ko hayade” kena ki hamade.

### *Qiiqan Kerinka Ardadhen Goyno*

#### *Maat 7:13-14bee 21-23be*

<sup>22</sup> Yesus Yerusaalem yinin yivenka katamante daaanabee gurdante daanaa eenabeam dhettsaate yivite ki dahade. <sup>23</sup> Ogo wodanka eensa iira eedi kalaa “Imbo, dhaqayna eena tokaaw?” kina ki hamade. Kidiar kena yin ki giyade: <sup>24</sup> “Qiiqan kerinka ardana mashimee. Inta yena ida giye: Thoothina eena ardana keda zage; ko daaannaar kedi damehe. <sup>25</sup> Ooninsa imbaa dhaabhayse kerinam kinin diithonsa budonte, yedi mayante woyayse, ‘Imbo, Imbo, wona bulaa!’ hante kerinam kokkeeda kokke. Kidiar yena ‘Hamora yelin nivonam inta yeam dhesattine’ hamayse yena kida maase. <sup>26</sup> Ogo wodanka yedi ‘Hambesana kinka wo itsade, wo wucade; wonin bukon raqintear woam ha dhettsade’ yeda hame. <sup>27</sup> Kidiar ‘Hamora yelin nivonam inta yeam dhesattine. Yedi kina siyon hayayna eenato, yedi wul ikalanka os pegadhee!’ yena kida hame.

<sup>28</sup> “Abraambee, Yisaqbbee, Yayqoobbee, Barjokala qansayse eenna giyayna wulbeam Barjosa bitamonte yelin haapen wodanka, yedi mayante dhabadhayse yelin shidhenka, ogote eepibee atsi qiicabe koda maate. <sup>29</sup> Peen wulra eeno nivayse Barjosa bitamonte kummandar koda dooqe. <sup>30</sup> Marrato! Budona eenasa waani birana keda maate; birana eenasa waaniar budona keda maate” kena ki hamade.

### *Yerusaalemla Yesusin Eepoono*

#### *Maat 23:37-39*

<sup>31</sup> Ogo wodanka Parisa eenasa shaarira waani eena Yesuskal nivayse, “Herodis haam deesana kinin zagenna, kora dhaabhayse yivaa” kina ke hamade. <sup>32</sup> Kidiar kena yin ki giyade: “Yivayse dhalqinka uxea ea agaana ‘Shedaa! Kinabee sakabe beeronam endara ida bule; hajadhaanaamaar ida pacche; makkansoa rooroaka inin waadadhenam ida macche’ Yesus ki hamade’ kina hamee. <sup>33</sup> Ko daaannaar Barjokala qansayse eenna giyea Yerusaalemla raq abir kinin diyoadettsi konin zaskimonna kinabee, sakabee, oshaalabe Yerusaalemdar yiva iam koda zaske.

<sup>34</sup> “Yerusaalemo, Yerusaalemo! Ya Barjokala qansayse eenna giyayna eenaam deesayno, hadar yittsadhaana eenaam seeninka paxayno! Baacha yisa naasiom kaapin demente konin yedeadettsi, intaar hasa naanaam yedana thoothi woda i zagade; ya nashaatane. <sup>35</sup> Ta keeda yesa gazan oonira Barjo utaysaka onno guuri koda shidhe. Inta yena ida giye: ‘Barjo Imbasa naabenka nivea gobshadhaane’ yelin hamenka yekka, keeda kaara os iam haapattene” kena ki hamade.

## 14

### *Yesus Tapir Ukunsen Rooroaka Burqen Eam Kinin Pacchoono*

<sup>1</sup> Yesus ukunsen rooroaka Parisa eenasa entsanasa kalaa ooninte gala itsota ki ardade; Parisa eena kinin hayenam toolayse shedite ke dahade. <sup>2</sup> Ogo wodanka

\* <sup>13:19</sup> “Saliitha” hambhayno gaalin aponka “senafic” hamayse thaapadhoonone. Aapino kosa kattsi likkinca dahayse, duuqadhanna kattsi haaqa gaaridettsi konin gebhenna, ogono hattono Banen peente konin qolmonna, kamsina saliitha aapiam ko tiidhade. <sup>13:27</sup> Maz 6:8. <sup>13:35</sup> Maz 118:26.

burqoka bishiysa ettsaa eedi kalaa Yesussa birante ki dahade. <sup>3</sup> Yesusaar “Ukunsen rooroaka eenam pacchano Musesa yigginte giidhidimoo? Giidhadayu?” hamayse Musesa yigginam dhettsaynabee Parisa eenabeam ki oysade. <sup>4</sup> Kediar lay ke hamade. Yesus eam yedate pacchayse oonindar maasate kiam ki yittsade.

<sup>5</sup> Ogora Yesus “Yesa iira yisa naasa\* way yisa waxa tuular wavidhi hanna, ukunsen rooroaka saanawa gochate bulima hayne?” kena ki hamade. <sup>6</sup> Dhalqin ogosa malsin maasana kedi damadehe.

### *Chocchi Tiidhensa Kamsino*

<sup>7</sup> Yesus kummannaa yiam eldhaana eena gobshadhon raqinte dooqana kenin zagenka keam shedayse, kamsika kena yin ki giyade: <sup>8</sup> “Eedi hay ki hannaar naan anzanin imbhengaydon raqinte kummannaa haam eelidi ki hanna, gobshadhon raqinte dooqaabhode; way hadara sagi gobshadhaa eldhidi daasane. <sup>9</sup> Ko dahaannaar ye lamaanaam eelaa ea nivayse, ‘Kaa raqaam ea kaana garaa’ haam kida hame. Ogo wodanka yaar gebhi ooshimbheka wuldara token raqinte hada dooqe. <sup>10</sup> Ogona haam eldhon wodanka, yivayse wuldara token raqinte dooqaa. Ogona haam eelaa nivayse, ‘Isa nashoa, kote nivaa’ haam kida hame. Ogo wodanka hambesana kinka dooqaana eena wulsa birante gobshi hana koda maate. <sup>11</sup> Yisa metenam dheg hayea wul toka ki toke; yisa metenam toskear dheg dheg kida hame” ki hamade.

<sup>12</sup> Yesus kummannaa eelaa eana yin ki giyade: “Rooron kummannaa way sootin kummannaa eenam hanin eelen wodanka ha aanantabee, hambanaanabee, hasa muldhabee, wodimma gurdan eenabeam eelaabhode. Ha eelidianna, kedi maasate haam eelayse hana bazanam maasa ke maase. <sup>13</sup> Ogona eenam kummannaa hanin eelen wodanka qambhinabee, aaninsa wobonabee, roonsa wobonabee, aapin kayaanabee eelaa. <sup>14</sup> Hana yer kenin maasea kesa qolmonna, ya gobshadhaa hada maate; eena tipana dembhira kenin dhaabhen wodanka, Barjo hana bazanam maasa ki maase” kina ki hamade.

### *Gebhon Kummansa Kamsino*

*Maat 22:1-10*

<sup>15</sup> Yesusbesana kummandar dooqaanasa eedi kalaa dhalqin ogoam qansayse, “Barjosa bitamonte kummandar dooqea hamin gobshadhaane!” kina ki hamade.

<sup>16</sup> Yesusaar kina yin ki giyade: “Eedi kalaa gala gebhi baxayse thoothin eenam ki eelade. <sup>17</sup> Kumman wodan yeskaysaka, yinin eelaanadar ‘Yerro wul ashkadhidine; keeda nivee’ hamayse kena apon giyea yisa waadiman eam kedar ki yittsade.

<sup>18</sup> “Eldhaana eena wul shidhana kenin zagonna, ‘Wokal yeskimehe’ haman ke yedade. Biraar kesa ‘Haami inin shanonna, shedaba yiva iam koda zaske. Bannzo! Hakal nivana damattine’ kina ki hamade. <sup>19</sup> Waa ear ‘Haami waak haaqa dong inin shanonna, keam koysate shedota ida yive. Bannzo! Hakal nivana damattine’ kina ki hamade. <sup>20</sup> Waar ‘Maa inin keemonna, ikal yeskimehe’ kina ki hamade.

<sup>21</sup> “Kisa waadiman ear maataate nivayse ogo wulam yisa imbaana ki giyade. Ogo wodanka ooninsa imbaa wacimaye yisa waadiman eana, ‘Kataman goynabee roon goynabedan saanawa yivayse qambhinabee, aaninsa wobonabee, aapin kayaanabee, roonsa wobonabeam kote keam arsaa’ kina ki hamade.

<sup>22</sup> “Waadiman ear yinin yivorra nivayse, ‘Imbo, hanin giyondettsi i hayaysaka akar ranqo daane’ kina ki hamade. <sup>23</sup> Imbaar waadiman eana ‘Isa oonin thoothoadettsi katamandar yivayna goynabee gurdan goynabedan yivayse eenin ardoadettsi hayaa.

<sup>24</sup> Inta hana gon ida giye: IGINA birayse eldhaana eenasa kala hattear ogo inin ashkon galanam itsehe’ kina ki hamade” hamayse Yesus ki giyade.

\* <sup>14:5</sup> “Yisa naasa” hambhenam waani mathaapinte “yisa ukuli” koda hame.

*Yesussa Paanan Yivana Yer Wulam Garinta Zaskayno  
Maat 5:13; 10:37-38; Marq 9:50*

<sup>25</sup> Thoothino eeno Yesusbesana kinka konin yivenka, budoka wal hamayse kena yin ki guyade: <sup>26</sup> “Imbesana nivana zagea imbaabee, indanbee, geshon yinnonbee, naana yinnabee, indanaanabee, sadan yinnonbeam idara saskayse nashea ki hanna,<sup>†</sup> isa paanan nivea maatana damehe. <sup>27</sup> Yinindar ziitate deesadhen masqalinam kedayse isa budobar nivima ea isa paanan nivea maatana damehe.

<sup>28</sup> “Yesa iira seeninka oonin woysota zagea ‘Koymo hamaddha ko zasko?’ pir, ‘Isa yeekeo koymo daaw?’ hamayse dooqayse qaabimaa hayne? <sup>29-30</sup> Ogotay ko hamma, oonin yindar woyen raqin meeshayse ooninam daran woysate macchana damaday ki hamma, haapaana eena wul ‘Kaa ea woysan yedayse macchano kiam ko bashade’ hamaate keda hance.

<sup>31</sup> “Pir bit kalaa bita waabesana banqi kansana zagidi ki hanna, ‘Isa shii tabhi banqin eenaam entsayse eedi kalaa kaysa shii banqin eenaam entsea bita waabesana banqi kansana inta damaw?’ hamayse dooqayse qaabima bit hayne? <sup>32</sup> Kansana yi damimina, kansota nivea bitaadar pege ki daaka donza daran yittsayse qaashimana kida zage.

<sup>33</sup> “Ta ogodettsi yesa iira eedi hay ki hannaar, yisa dohon wulam garaama isa paanan nivea maatana damehe.

<sup>34</sup> “Sooqo payyane; daathan garidi ko hanna, harka ko daathisadhe? <sup>35</sup> Ogodettsino sooqono haamibee dubabena konin maatiminna, os mayante koda dhabadhe. Qansen qaamiysa dahaa ki qanse” kena ki hamade.

## 15

*Kayayse Haapadhaa Yaatasa Kamsino  
Maat 18:12-14*

<sup>1</sup> Gibirin kacchaynabee Musesa yigginam tooliminabe iginia wul Yesusin giyenam qansana kikal keda buke. <sup>2</sup> Parisa eenabee Musesa yigginam dhettsaynabe “Kaa ea seeson eenaam yidat tiyayse kembesanaar kinka kida itse” hamayse keda gundume.

<sup>3</sup> Ogonante Yesus kamsika kena yin ki guyade: <sup>4</sup> “Eedi dong kaysa yaanaysa dahaa ea iginia yaanasa iira yaati kala kaydianna, eedi oydi kaysa apo tabhi salla yaanaam qawnte garayse kayaam yinin haapenka yekka zagate yivima yesa iira hayne? <sup>5</sup> Yinin haapen wodanka, kattsi wozadhayse yisa gelendar kida kede. <sup>6</sup> Ogora yisa ooninte yeskayse yisa muldhanabee gurdan eenabeam eelayse, ‘Kayon isa yaanam inta haapidine; ogonante imbesana kinka wozadhee’ kena kida hame. <sup>7</sup> Inta yena yin ida giye: Ogodettsi ‘Seeson waadimanam garayse Barjodar maatee’ hambha zaskimina eedi oydi kaysa apo tabhi sal tipana eenadara seeson ea kalaa yisa seeson waadimanam garayse Barjodar kinin maatenka cecinte gebhi woza koda dee” kena ki hamade.

*Kayayse Haapadhaa Santupaasa Kamsino*

<sup>8</sup> Yesus yin ki guyade: “Santup\* tabhi yisa dohoono maa kallo iginia santupinasa kala kaydianna, nuu shashkayse ooninam yisa sahayse yinin haapenka yekka payya zagimino maa hayne? <sup>9</sup> Yinin haapen wodanka, yisa muldhanabee yisa gurdan eenabeam eelayse, ‘Isa kayaa santupaam inta haapidine; ogonante imbesana kinka wozadhee’ kena koda hame. <sup>10</sup> Inta yena yin ida giye: Ogodettsi seeso eedi kalaa seeson waadimanam garayse Barjodar kinin maatenka Barjo gaananasa birante woza koda dee” kena ki hamade.

*Kayayse Haapadhaa Naasasa Kamsino*

---

<sup>†</sup> **14:26** “Idara saskayse nashea ki hanna” hambhoono Girik aponka “ki jibbaamma” koda hame. \* **15:8** “Santup” hambhoono Girik aponka “draxma” koda hambhe. Ogo wodanka draxma rooro kalaa waadimana kashadhea bazadettsine.

<sup>11</sup> Pir Yesus yin ki guyade: “Eedi kalaasa naasi lamaa ke dahade. <sup>12</sup> Iginaranka naasa kana imbaaka, ‘Imbo, koymon hannonsa iira ina yeskaynam imaa’ kina ki hamade. Ogonante imbaar yisa koymonam naanana ki kashade.

<sup>13</sup> “Rooro likkasa budonte kana yisa koymon wulam yinka tiyayse pee pege ki yivade. Ogote koymonam yer pootimondar sun ki macchade. <sup>14</sup> Koymon wulam kinin macchonsa budonte, peen ogote kattsi daaqin utonna, kidiar gaalan ki yedade. <sup>15</sup> Ogora peen ogo eensa eedi kalaakal yivayse daan ki yedade. Ear yisa haaminte wurkupanaam kinin gishoadettsi kiam ki yittsade. <sup>16</sup> Wurkupanayn itsen qurthonam itsayse mishana anngardhan ki yedade; ko dahaannaar ogoam hattear kina imea eedi qolehe.

<sup>17</sup> “Ogora yisa woylaminka eedi bardhaadettsi yinin qaaborra maatayse yin ki guyade: ‘Imbasaa ooninte balashanam itsate macchima mishayna waadiman eena meemayne dahaana? Inta ta keeda kote daaqinka isa diyanone. <sup>18</sup> Dhaabhayse imbaakal yivayse, “Imbo, Barjobee hambeam inta genidine. <sup>19</sup> Os birantear hasa naasi inin hambhoadettsi iam zaskehe. Hanante waadadhaynasa kalaadettsi iam hayaa” ida hame’ ki hamade.

<sup>20</sup> “Ogora dhaabhayse imbaakal ki yivade. Kidiar akar pege ki daaka imbaa kiam yinin haapenka, kina burqadhadhayse gobate nivayse yidar kiam incayse ki sunqade.

<sup>21</sup> Naasaar ‘Imbo, Barjobee hambeam inta genidine; keeda os birante hasa naasi inin hambhoadettsi iam zaskehe’ kina ki hamade. <sup>22</sup> Imbaa yisa waadiman eenana yi giyna: ‘Saana apalla wulra kattsi payyan bavayse kiam qattsee; kisa aanintear worqi arsee; roontear kina dunnguri hayee; <sup>23</sup> durpisadhaa ootaam bavayse kina taxee. Wo itse, wo wozadhe. <sup>24</sup> Harrna hambhidianna, isa naasa kaa diydine inin hamaa ta sadaka ki dahade; kaydine inin hamaa ta kidi haapadhidine’ kinin hamenka, kedar wozadhan ke yedade.

<sup>25</sup> “Ogo wodanka iishima haaminte ki dahade. Maataate ooninkal kinin theedenka, goolabee warsabesa upsi ki qansade. <sup>26</sup> Waadadhaynasaar kalaam eelayse, ‘Ogono yer hare?’ hamayse ki oysade. <sup>27</sup> Kidiar ‘Hakana nividine; ta sadaka dahayse kinin nivonna, hamba durpisadhaa ootaam ki taxade’ kina ki hamade.

<sup>28</sup> “Ogora iishima wacimayse ‘Ooninte ardattine’ ki hamade. Imbaa mayanka utayse kinin ardoadettsi kiam ki miskade. <sup>29</sup> Kidiar imbaana yi giyna: ‘Shedaa! Koka yekka upsin hasaam garma hana inin waadadhenka inna aanammabesana kinka inin wozadhoodettsi qole anqas hattear ina imaatanee. <sup>30</sup> Ko dahaannaar kaa naasa hasa koymonam maana sharmucanabesana kinka itsate macchayse kinin nivenka, durpisadhaa ootaam kina ha taxade’ kina ki hamade. <sup>31</sup> Imbaa kina yinin maasenka, ‘Isa naasa, ya rooro wul imbesana kinka ha dahade; isa dohoono wul hantine. <sup>32</sup> Kaa hakana diydine hambhaa ta sadaka ki dahade; kaydine hambhaa ta kidi haapadhidine. Ogonante kattsi wozadha woam koda zaske’ ki hamade” hamayse Yesus ki guyade.

## 16

### Ea Pakalaa Oonin Wottseasa Kamsino

<sup>1</sup> Pir Yesus yisa paanan yivaynana yin ki guyade: “Eedi wodimo kalaasa ooninam wottsea eedi kalaa dahade. Eeno ‘Kaa ea oonin wottsea hasa koymonam kida kayse’ hamayse ea wodimoana ke guyade. <sup>2</sup> Ea wodimoaa oonin wottseam eelayse, ‘Kono inin hasa qansayno hare? Keeda kaara os isa ooninam wottsea daana damattane. Ta hanin wottsenka koymonin utonbee ardonbeam hanin thaapaa warqatam ina imaa’ kina ki hamade. <sup>3</sup> Wottsear yisa woylamka bhocchaate, ‘Imba inin wottsen waadimanam ikala kinin tiyenna ta hamini hayo? Haami koyayse itsana kanta isa qolay; miskayse itsano iam koda ooshinse. <sup>4</sup> Ta waadiman kora inin buldhenka, eenin onna yinnadar iam kinin tiyoadettsi inta inin hayenam dhesayda dhese’ ki hamade.

<sup>5</sup> “Yisa imbaasa bazan yindar dahaana eena wulam kalaa kalaa yikal eelayse, ea biraam ‘Imbasaa hanin kashayno bazano hadar dohoono meemayne?’ hamayse kiam

ki oysade. <sup>6</sup> Kidiar ‘Zayt eedi dong kaysa daa idar daane’ kina ki hamade. Wottsear ‘Saana dooqayse “Eedi lamaa kaysa apo tabhine” hamayse warqatindar thaapaa’ kina ki hamade. <sup>7</sup> Ea lansoam eelayse, ‘Hadar meemayne bazana daana?’ hamayse kiam ki oysade. Kidiar ‘Surba eedi dong kaysa gazgo idar daane’ kina ki hamade. Wottsear ‘“Eedi oydi kaysaane” hamayse warqatindar thaapaa’ kina ki hamade.

<sup>8</sup> “Ea wodintaar siyan wottsea easa pakalmakkonam kattsi ki shawkade. Ogonoar Barjodar woylamin qajimina eena yinna aanammabesana kesa dohon dayntanka Barjo eenakala kedi sagi pakallane. <sup>9</sup> Inta yena ida giye: Yesa peen ko koymonin maqen wodanka rooro wul lay yenin dehen ooninte yeam tiidhoadettsi, peen ko koymonka yena payya maatayna muldhanaam zagayse haapee.

<sup>10</sup> “Yer likkaka woylam yindar qajadhea eedi yer gebhikaar woylam yindar qajadhea eedi kida maate; yer likkaka siya waadadhea eedi tapir yer gebhikaar siya waadadhea eedi kida maate. <sup>11</sup> Ta peen ko koymonka woylam yindar qajadhayna ye daymina, gonin hamon koymonam yena imea hayne? <sup>12</sup> Eedi koymoka woylam yindar qajadhayna ye maataamma, yena maaten koymonam yena imea hayne?

<sup>13</sup> “Eedi kalaa bit lamaasa demente daana damehe. Harrna hambidianna, kalaam jibbayse lansoam kida nashe; ogotay ko hamma, kalaakal theedayse lansoam kida bage. Ogodettsi Barjobee koymonbesa demente daana damattene” kena ki hamade.

<sup>14</sup> Parisa eena koymo nashayna kenin dohonna, Yesusin giyen wulam qansayse kiam ke bagade. <sup>15</sup> Yesus kena yin ki guyade: “Eensa birante tipana eena yeam yeda haye; ko dahaannaar Barjo yesa woylaminam dhesa ki dhese. Ogonante eedi birante gobshadhoono yerro Barjo birante bagadhoono koda maate” kena ki hamade.

### *Musesa Yigginbee Keemon Goynbe Maat 5:31-32; 11:12-13; Marq 10:11-12*

<sup>16</sup> Yesus yi giyna: “Musesa yigginbee Barjokala qansayse eenna giyaynabe Shivea Wannis wodanka yekka giyte ke dahade. Keeda kaara os wozisen Barjo bitamonsa upsinam koda giidhe; eeno wul ogote ardota gebhi koda mashime. <sup>17</sup> Ko dahaannaar Muse yigginsa zaaka kala hattear konin shidhenna cecinbee peenbesa kayano deegane.

<sup>18</sup> “Geshon yinnonam bulate yittsayse maa ab keemea wul kidi sharmucimidine; geshoayn bulon maynam keemea ea kidi sharmucimidine” kena ki hamade.

### *Ea Wodintaabee Qambhia Alaazarbe*

<sup>19</sup> Tapir Yesus yin ki guyade: “Koymo gebhika shandhen apalanam qaadhea eedi wodimo kalaa dahade. Roro wulka yina ko agaysaka wozaka kida dee. <sup>20</sup> Alaazar hambhea qambhi kalaa bishin yisa hajimi bish hama ea wodintasa kerinte ki raatade. <sup>21</sup> Ea wodimoayn itsenka kisa aanira diinonam itsana anngardhite ki dahade. Qaskinaar kikal nivayse kisa hajiminam keda leve.

<sup>22</sup> “Ogosa budonte qambhia Alaazar ki diyade. Barjosa gaanana nivayse Abraamkal kiam ke tiyade. Pir ea wodinta diyaysaka kiam ko duukadhade. <sup>23</sup> Diyaana eenayn dohon raqinte gaalite dahayse, tura dhev hamayse Abraambee kikal dhaaa Alaazarbeam pegeka ki haapade. <sup>24</sup> Kidiar ilataate ‘Imbo Abraamo, ina burqadhaa! Inta ko nuunsa iinte kattsi gaalite i dahade; ogonante yisa aaninsa surkenam noqonsa iinte arsayse isa atabhinam kinin capshoadettsi Alaazaram ina nittsaa’ kina ki hamade. <sup>25</sup> Abraamaar ‘Isa naasa, ya sadanka dahayse payyan yerinam hanin tiyonam bhocchaa. Ogoka Alaazar siyonam ki tiyade. Ta kidi kote kinin wozadhenka, yaar ogote gaalite hada dee. <sup>26</sup> Ogo bish dayma, wokala yedar sagana zagayna kenin sagoamadettsi, yekalaar wodar eedinin sagoamadettsi yembee wombesa shaarinte geeti gebhi ko ashkadhade’ kina ki hamade. <sup>27</sup> Kidiar ‘Keeda imbo, imbasa oonindar Alaazaram hanin yittsoadettsi haam ida miske. <sup>28</sup> Harrna hambidianna, imbasa naasi dong sadaka ke dahade; kedi ko gaalen raqinte kenin nivoamadettsi kena ki giye kiam yittsaa’ kina ki hamade.

<sup>29</sup> Abraamaar ‘Musebee Barjokala qansayse eenna giyaynabeyn thaapoono math-aapino kekal ko dahade; kedi nabbabdhaka ke qanse’ kina ki hamade. <sup>30</sup> Kidiar ‘Imbo Abraamo, yintehe! Ko dahaannaar eedi kalaa diira dhaabhayse kekal yivayse, “Seeson waadimanam garayse Barjodar maatee!” hamayse giydi ki hanna, kedi maata ke maate’ kina ki hamade. <sup>31</sup> Abraamaar ‘Musebee Barjokala qansayse eenna giyaynabeyn thaapon mathaapinaam ke qansimina, diira eedi kalaa dhaabhayse ki giyaakaar kedi qansehe’ kina ki hamade” hamayse Yesus ki giyade.

## 17

### *Eedina Goa Maatintara Mete Gishinta Maat 18:6-7bee 21-22be; Marq 9:42*

<sup>1</sup> Yesus yisa paanan yivaynana yin ki giyade: “Eenna goa maatayno hamin ko dahaakaar nivima shidhehe; ko dahaannaar eenna goa maatea eana hay! <sup>2</sup> Igina likkanasa iira kalaana goa kinin maatenna, deesime seeni yisa qorcindar dhaxayse bazinte dhabadhidi ki hanna, kina payyane. <sup>3</sup> Ogonante mete yesaam gishee.

“Ha aanantayn haam genenka kiam wacimaa; yinnon seesora pegadhidi ki hanna kina garaa. <sup>4</sup> Rooron kallon tobbhaa goyt haam genayse, pir hakal tobbhaa goyt nivayse, ‘Haam inta genidine’ ki hamina, kina garaa” kena ki hamade.

<sup>5</sup> Imbaa Yesus yisa tarjamonnante kinin yittsayna eena “Barjodar woylam qajintanam wona thoosaa” kina ke hamade. <sup>6</sup> Imbaa Yesusaar kena yi giyna: “Saliithasa\* aapiaddha hama idar woylam yenin qajeja yesa daa ko hanna, ‘Ya hattono kono wombhone, kaara buucimayse bazinte yivayse korimaa’ ye hamanna, yena ee hama ko hame” kena ki hamade.

### *Shawkadhimina Waadiman Eena*

<sup>7</sup> Ogora pir Yesus yin ki giyade: “Yesa waadima eedi kalaa haami koyea way yaati gishea dahaa ki hanna, waadimara kinin maatenka, ‘Saanawa galan kummo dooqaa’ kina hamea hayne? <sup>8</sup> ‘Inin itsen galanam ina ashkaa; inin itsenkabee wucenkabe ya dhaximbhayse waadadhaha; ogosa budobar hada kumme’ hamayse giyaynatayu? <sup>9</sup> Agaa waadiman eana giidhonam kinin waadadhonna, kiam wottsea shawka ki shawko? <sup>10</sup> Ogodettsi yediar yena giidhon wulam yenin waadadhon wodanka, ‘Wodi shawkadhimina waadiman waadadhaynane; wona giidhon waadiman bish wo waadadhade’ hamee” kena ki hamade.

### *Eena Tambha Lamthin Burqonka Dahaanaam Yesusin Pacchoono*

<sup>11</sup> Yesus Yerusaalem yinin yivenka, Sammaria peenbee Galila peenbesa shaarinka ki yivade. <sup>12</sup> Gurda kalaate kinin ardenka, tambha lamthin burqonka<sup>†</sup> dahaana eena kikal hatte pegeka woyayse, <sup>13</sup> yisa upsinam dheg hayayse “Imbo Yesuso, bannzo! Wona burqadhayse woam pacchaane” kina ke hamade. <sup>14</sup> Kidiar keam shedayse, “Yivayse yesa bishinam gudullana dhehee” kena ki hamade.

Kediar goynte gudulladar yivite dahayse ke paashade. <sup>15</sup> Kesaar iira kalaa yisa burqora yinin paashonam yinin haapenka, upsi gebhika Barjoam gobshaate maatate Yesuskal ki nivade. <sup>16</sup> Kiam gobshaate yisa wotinka kisa roondar ki dhambade. Ea kidi Sammaria peen eedine. <sup>17</sup> Yesusaar kina yinin maasenka, “Burqora paashaana eena tabhitayu? Ta salsa eena hamote ke dahaa? <sup>18</sup> Barjoam gobshota maatate nivaa een peen ea kaara eedi ab qolayu?” ki hamade. <sup>19</sup> Eana “Dhaabhayse yivaa; idar woylamin hanin qajoono haam ko dhacchade” kina ki hamade.

\* <sup>17:6</sup> “Saliitha” hambahayno gaalin aponka “senafic” hamayse thaapadhoonone. Aapino kosa kattsi likkinca dahayse, duuqadhanna kattsi haaqa gaaridettsi konin gebhenna, ogono hattono Banen peente konin qolmonna, kamsina saliitha aapiam ko tiidhade.    † <sup>17:12</sup> “Lamth burqo” hamen upsinam Haalin Mallan mathaapinsa macchinte thaapadhaanar shedaa.

*Eedi Naasisa Lansi Nivintano  
Maat 24:23-28bee 37-41be*

<sup>20</sup> Parisa eena Yesusam “Barjosa bitamono haa ko nive?” hamayse kiam ke oysade. Kidiar kena yinin maasenka, “Barjosa bitamono eenna haapadhen milkitinka nivehe.

<sup>21</sup> Ogodettsi ‘Marrato! Barjosa bitamono kote ko dahade’ way ‘Ogote ko dahade’ yiam hambhaynotehe. Harrna hambhidianna, Barjosa bitamono ta yesa shaarinte ko dahade” kena ki hamade.

<sup>22</sup> Ogora Yesus yisa paanan yivaynana yin ki giyade: “I Eedi Naas rooronasa kalaam shedana yenin anngardhea woda niva ko nive; ko dahaannaar haapattene. <sup>23</sup> Eeno ‘Marrato! Kiristoos kote ki dahade’ way ‘Ogote ki dahade’ yena koda hame; hamin ko da-haakaar kenin giyendar utayse kesa paananka yiveebhode. <sup>24</sup> Harrna hambhidianna, cecindar dohon bhalqantinin bhalqantenka peen wuldar konin shashkendettsi, i Eedi Naasin niven wodanka yin koda maate. <sup>25</sup> Yin ko dahaakaar birayse i Eedi Naas thoothi gaale tiyabee wodan ko eenkal bagadhabe iam koda zaske.

<sup>26</sup> “Ena Nohe wodanka maatondettsi, i Eedi Naasin niven wodanka yin koda maate.

<sup>27</sup> Nohe gonngalante kinin ardea roroaka yekka, eeno itsadabee wucadabe, keemadabeee kembhadabe ko dahade. Kayen noqono nivayse ke wulam ko kaysade.

<sup>28</sup> “Tapir ena Loothe wodanka yin ko dahade. Eeno itsaatebee wucaatebe, shanaatebee shanshaatebe, thoothi yer koraatebee ooni woysaatebe ko dahade. <sup>29</sup> Loothe Sodoomra kinin utea roroaka, cecira nuubee nuusa qolshinadettsinbe hanchayse een wulam ko kaysade. <sup>30</sup> I Eedi Naasin may haapadhea roroaka ogodettsi koda maate.

<sup>31</sup> “Agaa roroaka ooninsa zulon utaa ea hanchayse oonira yisa yer tiyota ki ardabhoode; ogodettsi yisa haaminte dhaar budoka ki maatabhoode. <sup>32</sup> Loothesa geshonam bhocchee. <sup>33</sup> Sadan yinnonam dhacchota zagea wul kaysa ki kayse; sadan yinnonam kaysea wul dhaccha ki dhacche.

<sup>34</sup> “Inta yena ida giye: Sootin ogoka eena kinka raataana lamaanasa kalaam tiyayse, langoam gardha ko gardhe. <sup>35</sup> Maana lamaana kinka deesimaynasa kallonam tiyayse, lansonam gardha ko gardhe. <sup>36</sup> [Eena haamin kallonte lamaana kinka waadadhaynasa kalaam kikala tiyayse, langoam gardha ko gardhe]” kena ki hamade.

<sup>37</sup> Kisa paanan yivayna eenaar “Imbo, ogono hamote ko yin dee?” kina ke hamade. Kidiar kena yinin maasenka, “Yerin diyonin dohon raqinte kuthoda buke” kena ki hamade.

## 18

*Mayn Qambhinbee Pirdin Pirdea Eabesa Kamsino*

<sup>1</sup> Ogora Yesus yisa paanan yivaynana toozadhima rooro wul Barjoam kinin miskoadettsi kena kamsika ki giyade: <sup>2</sup> “Katama kalaate Barjoamaar kurtumbhima, eedinaar ooshimbhima pirdi pirdea eedi kalaa ki dahade. <sup>3</sup> Taar kataman ogote maa qambhi kallo ko dahade. Kodiar pirdin pirdeakal nivaate, ‘Imbee isa wuuqan eabesa shaarinte dohon dhalqinna ina tipa pirdi pirdaa’ hamite ko dahade. <sup>4</sup> Kidiar konin giyon yerinna thoothi wodana pirdin imana nashadehe. Ogosa budonte yisa woyleminka yin giyayse ki bhocchade: ‘Barjona i kurtumbhiminaar, eedinaar i ooshimbhiminaar, <sup>5</sup> kono mayno qambhino iam konin galshenna, kona pirdayda pirde. Ogotay ko hamma rooro wul nivayse iam koda galshe’ ki hamade” hamayse Yesus ki giyade.

<sup>6</sup> Ogora Imba Yesus yin ki giyade: “Sya ea pirdin pirdeanin giyonam bhocchee. <sup>7</sup> Ta keeda Barjo kinin kamaana sootinbee rooronbe kattsi kiam miskayna eenana pirdayu? Kenin oysonam imima kappa ki kappo? <sup>8</sup> Inta yena ida giye: Saana kena kida pirde; ko dahaannaar i Eedi Naasin niven wodanka, peen kodar dohon eensa idar woylem qajea eedi inta haapaw?” kena ki hamade.

*Parisa Eabee Gibirin Kacchea Eabesa Kamsino*

<sup>9</sup> Ogora Yesus “Wodi eedi tipane” hamayse meten yinnondar woylamin qajayna, een waaniam bagayna eenana kamsika kena yin ki giyade: <sup>10</sup> “Eedi lamaa Barjoam miskota Barjosa gazan oonindar ke yivade; kalaa Parisa eedine; lansoa gibirin kaccheane. <sup>11</sup> Parisa ea woyayse yisa woylaminka yin giyayse ki miskade: ‘Barjo, eena waani taysaate itsaynabee, hana ee hamiminabee, sharmucimaynabee, way agaa cubboa gibirin kaccheadettsibe inin dahaamonna haam ida gobshe. <sup>12</sup> Gaba kalaasa iir rooro lamaa itsima ida qoome; inin haapayna yerra tambha wulsa iira kalaam hana ida ime’ ki hamade.

<sup>13</sup> “Gibirin kacchea yinin miskenka, pegeka woyayse tura cecin shedana zagatehe. Ko dahaannaar, ‘Barjo, i kaa seesonka dahaa ea ina garaa’ hamaate yisa aaninka sadanam ki gutade. <sup>14</sup> Inta yena ida giye: Agaa Parisa ea daymaka, kaa gibirin kacchea Barjo birante tipamonam haapayse yisa oonindar ki maatade. Yisa metenam dhev dhev hayayna wul toka ke toke; yisa metenam toskayna wul dhev dhev keda hame” kena ki hamade.

*Yesus Naanaam Kinin Eeloono  
Maat 19:13-15; Marq 10:13-16*

<sup>15</sup> Yesus yisa aaninam kedar kinin wodoadettsi eena yisa naana likkanaam kikal keda beve; kisa paanan yivayna eenaar ogoam shadayse eenaam ke wacimade. <sup>16</sup> Yesusaar naanaam yikal eelayse yisa paanan yivaynana “Naana idar ke nive; keam mareebhode. Harrna hambhidianna, Barjosa bitamono igma naanadettsi maataana eenasane. <sup>17</sup> Inta yena gon ida giye: Barjosa bitamonom naasidettsi maatayse tiymina wul yer hamin hambhaakaar iir ardehe” kena ki hamade.

*Ea Wodintasa Oysimeno  
Maat 19:16-30; Marq 10:17-31*

<sup>18</sup> Ayiwd eenasa entsanasa shaarira eedi kalaa Yesusna “Ya Payyaa Dhettsea, rooro wul lay dehen sadan haapota yer har haynta iam ko zaske?” hamayse kiam ki oysade.

<sup>19</sup> Yesusaar “Payya ea inka harrnaa hamaa? Barjo bishkalanka ab eedisa payya hama eedi qolehe. <sup>20</sup> Barjo yinin giyonam dhesaada dhese: Sharmucimaabhode, deesaabhode, dimmaabhode, buudamoka tarjaabhode, hambabee handabeam gobshaa” kina ki hamade.

<sup>21</sup> Ear “Igina wulam naasamora yedayse inta toolidine” kina ki hamade. <sup>22</sup> Yesus ogoam qansayse, “Ta yer kalaa hakalanka ki shidhade. Ogonoar hasa dohon koymon wulam shanshayse qambhinana imaa; hasa bazanam cecinte hada haape. Ogora maatayse isa paanan nivaa” kina ki hamade.

<sup>23</sup> Kidiar dhalqin ogoam yinin qansenka, eedi kattsi wodimo yinin dohonna gebhi yisa woylaminka ki atade. <sup>24</sup> Yesus ea qaabonka kattsi kinin atonam shadayse, “Wodimma eenasa Barjo bitamonte ardano hamin dohoono dethane! <sup>25</sup> Ogona eedi wodimoyn Barjosa bitamonte ardenna gamaleyn marpisa pulaka utayno deegane” kena ki hamade.

<sup>26</sup> Dhalqin ogoam qansaanaar “Yin ko hanna, ta hayne dhaqana damea?” ke hamade.

<sup>27</sup> Yesusaar “Eedina dandimimino Barjona dandima ko dandime” kena ki hamade.

<sup>28</sup> Bhethiroosaar “Shedaa, wodi wosa dohon wulam garayse hasa paanan wo nivade” kina ki hamade. <sup>29</sup> Kidiar “Inta yena gon ida giye: Barjosa bitamonna hamayse geshon yinnonbee, indanaanabee, imbaabee, indanbee, naana yinnabee, oonin yinnonbeam garaa ea <sup>30</sup> ta peen kodar thoothi sagi tiyma garea eedi qolehe; os niven wodanka, rooro wul lay dehen sadan haapa ki haape” hamayse kena ki giyade.

*Yesus Yisa Dembhinsa Makkanso Goyt Kinin Giyoono  
Maat 20:17-19; Marq 10:32-34*

<sup>31</sup> Yesus tabhi lamaana yisa paanan yivaynaam eensa iira waana edayse kena yin ki guyade: “Marrato! Wodi ta keeda Yerusaalemdar woda yive; Barjokala qansayse eenna guyayna i Eedi Naasisa kenin thaapoono wul koda thoothe. <sup>32</sup> Ayiwdtay hamma eenana saskate ida imbhe; iam baga ke bage; iam galshaate idar pathima ke pathime. <sup>33</sup> Iam qanayse deesa ke deese. Makkansoa rooroakaar inta dembhira dhaabhayda dhaabhe” kena ki hamade. <sup>34</sup> Kinin guyon wulsa kala hattear kena ardadehe. Ogono dhalqinoar kena konin aachimonna, kinin giyenam kedi bhocchadehe.

*Yesus Aapin Kayaa Eam Kinin Pacchoono  
Maat 20:29-34; Marq 10:46-52*

<sup>35</sup> Yesus Iyarko katamante kinin yesken wodanka, eedi aapi kaya kalaa yer miskaate goyn aponte ki dooqade. <sup>36</sup> Zarsinin ogoka sagenka qansayse, “Ogono hare?” hamayse keam ki oysade. <sup>37</sup> Kidiar “Naazret peen Yesus koka kida sage” hamayse kina ke guyade.

<sup>38</sup> Kidiar “Dawt Naasa Yesuso, bannzo! Ina burqadhadayse iam pacchaane!” hamayse upsi gebhika kiam ki miskade. <sup>39</sup> Eensa birante yivaynaar “Ya lay hamaa!” hamayse kiam ke wacimade. Kidiar “Dawt Naasa, bannzo! Ina burqadhadayse iam pacchaai!” hante ini yinin ilaterra kalon sagi ilatan ki yedade.

<sup>40</sup> Yesusaar woyayse yikal kiam kinin entsoadettsi kena ki guyade. Kikal ki nivaysaka, <sup>41</sup> “Hana yer har i hayea zage?” hamayse kiam ki oysade. Kidiar “Imbo, shedana ida zage” kina ki hamade. <sup>42</sup> Yesusaar “Aapino hasa ko shede; idar woylamin hanin qajoono haam ko pacchade” kina ki hamade. <sup>43</sup> Saanawa kisa aapino ko shedade. Barjoam gobshaate Yesussa paanan yivan ki yedade. Eeno wulaar ogoam shedayse Barjoam ko gobshade.

## 19

*Yesusbee Zekkoosbe*

<sup>1</sup> Yesus Iyarko katamante ardayse kosa shaarinka yivite ki dahade. <sup>2</sup> Kataman ogotear Zekkoos hambhea eedi kala dahade; kidiar gibirin kacchayna eenasa hayobee eedi wodimobene. <sup>3</sup> Yesus hambhea hamaa kinin dohonam shedana ki zagade; kidi yisa woynanka eedi orgo yinin dohonnabee eenin kattsi thoothonbena kiam haapanam damadehe. <sup>4</sup> Yesus goyn ogoka kinin yivenna kiam shedota hamayse os birante gobate yivayse haaqa shaap kallondar ki utade.

<sup>5</sup> Yesusaar raqin ogote yinin yeskon wodanka, tura kiam shedayse, “Zekkooso, kina hasa ooninte haaqa iam konin zaskenna, saanawa hattorra hanchaa” kina ki hamade.

<sup>6</sup> Zekkoosaar saanawa hanchayse wozaka kiam ki tiyade.

<sup>7</sup> Ogoam haapaana eena wul “Kidi seeson easa ooninte kummana ki ardade” hamayse Yesudasar ke gundumade. <sup>8</sup> Zekkoosaar woyayse Imbaa Yesusna yin ki guyade: “Imbo, isa dohon koymon wulsa iira kiaddhanam kashayse qambhinana ida ime; eedi haysaar buudamoka inin tiyaa koymo dahaa ko hanna, maasate kina adhimaka oydi goyt ida kashe” ki hamade. <sup>9</sup> Yesus kina yin ki guyade: “Kina oonin kodar dhaqinta ko nivade; kidi tapir Abraam naasine. <sup>10</sup> Harrna hambhidianna, inta Eedi Naas kayaanaam zaganabee dhacchanabe i nivade” ki hamade.

*Tambha Waadiman Eenasa Kamsino*

<sup>11</sup> Eenoar dhalqin ogoam qansite ko daaka, Yesus Yerusaalemkal kinin theedonna, eenna Barjosa bitamono saanawa konin haapadhea kena ko maatade. Ogona Yesus kamsi kalaa kena ki guyade:

<sup>12</sup> “Bitamon hayamonam tiyayse maataate nivana pee pege yivaa eedi gebhi kalaa dahade. <sup>13</sup> Kidiar yinin yivensa birayse, eedi tabhi yisa waadima eedi waaniam yikal eelayse, eena iginana birre mato kalaa kalaa ki imade. ‘Maataate inin nivenka yekka, ko koymonka naggadee’ kena ki hamade.

<sup>14</sup> “Peen eena kiam kenin jibonna, ‘Kaa ea wodar kinin bitimoadettsi zagattone’ hamayse kisa paananka apo ke yittsade.

<sup>15</sup> “Bitamon hayamonam tiyayse yinin maaton wodanka, koymon kininna imaana igina kisa waadiman eena hamaddha kinin naggadayse thoosonam dhesana yikal keam ki elsade.

<sup>16</sup> “Biraa ea kikal nivayse, ‘Imbo, hanin ina imon koymonka naggadayse tabhi goyt i thoosade’ kina ki hamade. <sup>17</sup> Imbaar ‘Ya payyaa waadiman ea, payyaa hayade; yer likkaka woylamin yinindar qajadhea eedi maatayse hanin haapadhonna, tabhi katamanadar haam ida haynse’ kina ki hamade.

<sup>18</sup> “Lansoar kikal nivayse, ‘Imbo, hanin ina imon koymonka naggadayse dong goyt i thoosade’ kina ki hamade. <sup>19</sup> Imbaar kina yi giyna: ‘Haamaar pir dong katamanadar ida haynse’ kina ki hamade.

<sup>20</sup> “Waar waadiman ea nivayse, ‘Imbo, hanin ina imon koymonam ochate i wodade; kosha. <sup>21</sup> Ya eedina burqadhima eedine; hanin wodaamonam tiyeabee yiithima buureabene. Ogonante haam kurtumbhayse i wodade’ kina ki hamade. <sup>22</sup> Imbaar kina yin ki giyade: ‘Ya siyaa waadiman ea, hasa dhalqinka hadar ida pirde. Inta wodima inin tiyenbee, yiithima inin buurenbee, eedina inin burqadhimonbeam ha dhesidianna, <sup>23</sup> harrnaa isa koymonam adhimanka maasaynana iman garaa? Inta nivayse isa koymonam adhimaka ida tiye’ kina ki hamade.

<sup>24</sup> “Ogote woyaana eenana, ‘Koymonam kikalanka tiyayse tabhi goyt thoosaa eana imee’ kena ki hamade. <sup>25</sup> Kediar ‘Imbo, birre shii kisa daane!’ kina ke hamade. <sup>26</sup> Imbaar, ‘Inta yena ida giye: Yisa dahaana daran arsayse kina imbha ko imbhe; yisa qolmakalanka kisa dohonam kikala tiidha ko tiidhe. <sup>27</sup> Ko dahaannaar kediar inin bitimoadettsi zagimina igina iam jibbayna eenaam kote bavayse isa birante keam deesee’ ki hamade” hamayse Yesus kena ki giyade.

<sup>28</sup> Yesus kamsin ogoam yinin giyonsa budonte, Yerusaalem yivite yisa paanan yivay-nasa birante ki dahade.

### *Yesus Gebhon Gobshinka Yerusaalem Kinin Ardoono Maat 21:1-11; Marq 11:1-11; Wannis 12:12-19*

<sup>29</sup> Dabirezayt hambhen dhukansa gasante dohon Betepagebee Bitaaniabe gurdankal yinin theeden wodanka, yisa paanan yivayna eenasa lamaanaam yin giyayse keam ki yittsade: <sup>30</sup> “Ogo yesa birante dohon gurdandar yivimate. Ogote yenin ardenka, eedin yindar dooqate shedaama ukulisa ooto dhaxadhaa yeda haape; agaam bulayse ina kote bevee. <sup>31</sup> Eedi hay ki hannaar ‘Harrnee bule?’ hamayse yeam ki oysina, ‘Imbaa wonteana kinin zaskonnane’ hamayse giyee” kena ki hamade.

<sup>32</sup> Yittsadhaanaar yivayse kinin kena giyondettsi ko maataysaka ke haapade. <sup>33</sup> Kediar ukulinsa ootonam kenin bulenka, ukulinsa imbara “Ukuliam harrnee bule?” hamayse keam ke oysade. <sup>34</sup> Kediar “Imbaa wonteana kinin zaskonnane” kena ke hamade.

<sup>35</sup> Ogora Yesuskal ke bavade; ukulia ootadar yisa apalanam wodayse Yesusam daran ke dottsade. <sup>36</sup> Yesus yivite ki daaka, eeno apalanam yisa goyndar ko apade. <sup>37</sup> Dabirezayt dhukara mia hanchen goynkal kinin theeden wodanka, kisa paanan yivayna eena wul yinin haapon tarshen yerin wulka wozadhyse upsi gebhika Barjoam gobshan ke yedade. <sup>38</sup> Ogonoar

“Barjo Imbasaa naabenka nivea bitaa gobshadhaane!

Cecinte payyamo ko dee!

Cecin wulsa bhaabar dahaa Barjona gobshi ko dee!”  
ke hamade.

<sup>39</sup> Eensa shaarinte dahaana Parisa eenasa waani waani eena “Dhettsea, hasa paanan yivaynaam lay kenin hamoadettsi keam wacimaa!” kina ke hamade. <sup>40</sup> Yesusaar “Inta yena ida giye: Kedi lay ke hamaakaar, senna kina ilata ke ilate” kena ki hamade.

### *Yesus Yerusaalem Katamanna Kinin Eepoono*

<sup>41</sup> Yesus Yerusaalem katamankal theedayse, katamanam yinin haapenka kona eep-aate <sup>42</sup> yin ki giyade: “Hana payya maaten yerinam kina ha dhesidianna, hana payyane. Ta hasa aapira kodi aadhimidine. <sup>43</sup> Haam jibbayna hasa gasanka kermi woysayse haam kobarbee obarbe ishkayse kenin galshayna roorona niva ke nive. <sup>44</sup> Hambee hasa iinte dahaana naanabeam peendar dhaba ke dhabe; kottsimima seeni kala hattear raqinte hana garehe. Harrna hambhidianna, Barjo haam dhacchana kinin nivon wodanam hanin dhesaamonnane” ki hamade.

### *Barjosa Gazan Ooninsa Mayante Gabimaynaam Yesusin Oytoono*

*Maat 21:12-17; Marq 11:15-19; Wannis 2:13-22*

<sup>45</sup> Yesus Barjosa gazan ooninsa mayante ardayse, gaban gabimaynaam oytan ki yedade. <sup>46</sup> Keam oytaate yin ki giyade: “‘Onno isa miske ooni koda dee’ hamayse thaapadhidine; yediar eensa koymon buurate itsaynasa aadhime raq koam ye hayade!” kena ki hamade.

<sup>47</sup> Yesus rooro wulka Barjosa gazan ooninsa mayante dhettsite ki dahade; ko daaan-naar gudullasa hayonabee, Musesa yigginam dhettsaynabee, zarsinsa eena gembhabee Yesusam deesana zagite ke dahade. <sup>48</sup> Ko daaan-naar kenin hayonsa goyi kekalanka ko kayade; harrna hambhidianna, eeno wul Yesusin giyenam qansana zagayse yisa woylamin wulam daran konin hayonnane.

## 20

### *Yesussa Hayamon Goynin Oysadhoono*

*Maat 21:23-27; Marq 11:27-33*

<sup>1</sup> Rooro kalaa Yesus Barjosa gazan ooninsa mayante eenaam dhettsaatebee Barjosa dhacchintan upsinam giyaatebe ki dahade. Gudullasa hayonabee, Musesa yigginam dhettsaynabee, peensa donzanabe daran ke nivade. <sup>2</sup> “Ta wona giyaa: Yerra iginaam hanin hayayno hasa yer har hayamokane? Hayamon koam hana imaa hayne?” hamayse kiam ke oysade. <sup>3</sup> Kidiar kena yinin maasenka, “Intaar yer kalaa yeam ida oyse; yediar kosa malsinam ina giyee. <sup>4</sup> Wannis eenaam kinin shivoadettsi nittsadoono Barjokalankamoo? Eedikalankaw?” ki hamade.

<sup>5</sup> Kediar yin giyayse kinka ke dhalqade: “‘Barjokalankane’ wo hamanna, ‘Ta harrnee kisa dhalqinam gonni hamayse tiyan garaa?’ wona kida hame. <sup>6</sup> ‘Eedikalankane’ wo hamanna, eeno wul woam seenika paxate koda deese; harrna hambhidianna, ‘Wannis gon Barjokala qansayse eenna giyeane’ hamayse kenin giyennane” ke hamade.

<sup>7</sup> Ogonante “Hamora ko daaan-naar wodi dhesattone” hamayse kina ke maasade.

<sup>8</sup> Yesusaar “Ta intaar har hayamoka yerra iginaam inin hayenam yena guyattine” kena ki hamade.

### *Woynin Haaminte Waadadhayna Eenasa Kamsino*

*Maat 21:33-46; Marq 12:1-12*

<sup>9</sup> Ogora Yesus eenana kamsika yin ki giyade: “Eedi kalaa woynin haaqanaam yisa haaminte thoothi ki korade. Haaminte waadadhayna eenana elqimayse, ‘Yediar yena maatenam kosa iira itsaate, waani aapinam ina imee’ hamayse, thoothi wodana pee abdar ki yivade. <sup>10</sup> Woynin haaqanasa aapin kambhen wodan yeskaysaka, kinaqa yeskayna aapinam kenin imoadettsi yisa erge eedi kalaam haaminte waadadhayna eenadar ki yittsade. Haaminte waadadhayna kisa ergen eam yedate qanayse aan guuri

ke yittsade. <sup>11</sup> Tapir ab yisa erge eedi ki yittsade; kediar kiam pir qanate ooshinsayse aan guuri ke yittsade. <sup>12</sup> Tapir yisa makkansoa ergen eam ki yittsaysaka, kiamaar gebhi qanayse haamira bulate ke dhabade.

<sup>13</sup> “Woynin haaminsa imbaa ‘Hamini hayo? Ta inin nashea isa naasaam ida yittse; way kina bookindhasane’ ki hamade. <sup>14</sup> Haaminte waadadhayna eena kisa naasaam yinin haapenka, kinka dhalqayse yin ke guyade: ‘Kaa kisa haamindar sagea naasa toydiane. Hammo kisa wona konin shidhoodettsi nivee; wo kiam deese’ ke hamade. <sup>15</sup> Woynin haaqanasa haamira bulaye kiam ke deesade.

“Ta haaminsa imbaa keam hamin ki haye? <sup>16</sup> Kidi yinti nivayse igina haaminte waadadhayna eenaam deesa ki deese. Yisa haaminamaar eedi abna kida ime” ki hamade.

Eeno ogoam yinin qansenka, “Yin ko dahabhoode!” ko hamade.

<sup>17</sup> Yesusaar keam shedayse yin ki guyade:

“‘Seeninka oonin woysayna eena kenin bagaa seenia senna wulra ooninna kattsi zaskea ki maatade’ hamayse thaapadhoono bulino hare? <sup>18</sup> Seenia agaadar dhambea wul aya ki aye; seenia agaa yindar dhambaa ea giicima ki giicime” kena ki hamade.

### *Gibirin Kashadhensa Oysadhoono Oysimeno*

*Maat 22:15-22; Marq 12:13-17*

<sup>19</sup> Gudullasa hayonabee Musesa yigginam dhettsaynabe Yesus kamsinka kinin giyaa dhalqa keam kaamea kinin dohonam kenin dhesonna, agaa savaataka kiam yedana ke zagade; ko dahaannaar eenaam ke kurtumbhade. <sup>20</sup> Ogonante Yesusam yedana zagayse kiam toolite ke dahade. Peen wottsea yisa hayamonka kinin pirdoadettsi saskate imana kena maatea upsi apora kisa ke zagade. Ogonante tipana eena maatayse kisa dhalqinam tiyyna doyanaam ke yittsade. <sup>21</sup> Igina doyana Yesusam yin giyayse ke oysade: “Woam Dhettsea, hanin giyenbee hanin dhettsenbe gon konin dohonam wodi dhesooda dhese. Pir Barjosa goynam gon hada dhettse; eedi haysaar woti shedima hanin hayenam wodi dhesidine. <sup>22</sup> Ta Musesa yigginka Roome peen bitaana gibiri kashadhoodettsi giidhidimoo? Giidhadayne?” hamayse kiam ke oysade.

<sup>23</sup> Yesusaar kenin taysenam dhesayse kena yin ki guyade: <sup>24</sup> “Ta santup ina dhehee. Santupa kaadar dahaa pootoabee daran thaapadhaa naabeabe haysane?” hamayse keam ki oysade. Kediar “Roome peen bitaasane” kina ke hamade. <sup>25</sup> Yesusaar “Ta Roome peen bita gaynam kina imee; Barjo gaynam Barjona imee” kena ki hamade. <sup>26</sup> Kediar eensa birante dhalqinka kiam yedana damadehe; ogona kisa malsinka targadhayse lay ke hamade.

### *Dembhira Dhaabhadhen Goynsa Yesusin Oysadhoono*

*Maat 22:23-33; Marq 12:18-27*

<sup>27</sup> “Dembhira dhaabhadhea yer qolehe” hamayna Saduqa eenara eedi waani Yesuskal nivayse yin giyayse kiam ke oysade: <sup>28</sup> “Woam Dhettsea, Muse yin giyayse wona ki thaapade: ‘Eedi kalaa maa keemayse naasi adhima diydi ki hanna, kisa kana koam keemayse diyaa iishimasa oolonte kina ki adhe’ ki hamade. <sup>29</sup> Ta keeda eedi kalaasa naas tobbhaa waani ke dahade. Ke wulsa iishima gebha maa keemayse naasi adhima ki diyade. <sup>30</sup> Kana lansoa agaadettsi yisa iishima geshonam keemayse ki diyade. <sup>31</sup> Makkansoar koam keemayse ki diyade; ogodettsi tobbhaana indanaana wul koam keemayse, naasi adhima ke diyade. <sup>32</sup> Ke wulsa macchinte edono ko diyade. <sup>33</sup> Ogonante igina tobbhaana indanaana wul koam kenin keemonna, diyaana eena dembhira kinin dhaabhen wodanka kodi hamaa easa maa koda maate?” hamayse kiam ke oysade.

<sup>34</sup> Yesusaar kena yi giyna: “Ta peen kodar dohoono eeno maa keema ko keeme, pir kembha ko kembhe. <sup>35</sup> Diira dhaabhayse os niven wodanka daana damayna eena yina kembhehe, tapir keemehe; <sup>36</sup> os birante dembhi diyana damehe. Harrna hambidianna, Barjosa gaananadettsi kenin maatennane. Kedi diira kenin dhaabhonna Barjo naanane. <sup>37</sup> Diyaana ke hanna kenin dhaabhenam Musear ki dhettsade. Hatta kodoadar nuunin yedensa kinin thaaponte Imbaa Barjo ‘Abraamsa Barjoa, Yisaqsa Barjoa, Yayqoobsaar Barjoane’ hamayse ki thaapade. <sup>38</sup> Ta Barjo sadanka dahaana eenasa Barjone; diyaana eenasa Barjotehe. Harrna hambidianna, wul Barjona sadanka koda dee” kena ki hamade.

<sup>39</sup> Musesa yigginam dhettsayna waani waani eena kina yinin maasenka, “Woam Dhettsea, payyaa guyade” kina ke hamade. <sup>40</sup> Ogora yedayse Yesusam yer kala hattear oysime oysana kedi kurtumbhidine.

### *Yesusin Oysoono Oysimeno*

*Maat 22:41-46; Marq 12:35-37*

<sup>41</sup> Ogo wodanka Yesus kena yin ki guyade: “Barjoyn qadhaa Kiristoosam ‘Dawt naasine’ hamayse hamin ke giyaa? <sup>42-43</sup> Dawt yinti Mazmur mathaapinte ‘Barjo isa Imbana,

“Haam jibbayna eenam hasa hayamonsa demente inin hayenka yekka  
isa mizaqimbar dooqaa” kina ki hamade’

kida hame. <sup>44</sup> Ta keeda Dawt yinti kiam ‘isa Imba’ hamayse ki eelina, Kiristoos hamin ki Dawtsa naasi dee?” kena ki hamade.

### *Yesus “Musesa Yigginam Dhettsaynakalanka Yeam Gishee” Kinin Hamoono*

*Maat 23:1-36; Marq 12:38-40*

<sup>45</sup> Eeno wul kikal qansite ko daaka, Yesus yisa paanan yivaynana yin ki guyade:

<sup>46</sup> “Gudubhon apalan qaadhayse os ora hamota zagayna, gabantear gobshadhon gisimenam gisimbhotabee, Ayiwd eensa bukin raqintear gobshadhon borkotondar dooqotabee, kummadhen raqintear gobshadhon raqin tiyotabe nashayna Musesa yigginam dhettsaynakalanka mete yesaam gishee. <sup>47</sup> Eedinin qansoadettsi hamayse miskenam keda gudubhse; maana qambhinasa ooninam keda buure. Kedi sagi pirdi keda haape” kena ki hamade.

## 21

### *Mayn Qambhinin Barjona Imoono Imintono*

*Marq 12:41-44*

<sup>1</sup> Yesus dhev hamayse kinin shedenka, wodimma koymon Barjona dhabadhen saathininte yisa koymonam kenin dhabenka ki shedade. <sup>2</sup> Tapir maa qambhi kallo bakkanda lamaa ogote konin dhabenka ki shedade. <sup>3</sup> “Yena gon ida giye: Ta kono mayno qambhino een wuldara sagi ko dhabade. <sup>4</sup> Harrna hambidianna, kedi wul yisa dohon koymon thoothinsa iira yina shiishayse ke dhabade; kodi qambhi dahayse yina kala hattear shiishima, yisa dohon koymon wulam ko dhabade” ki hamade.

### *Barjosa Gazan Oonin Kottsimensa Yesusin Giyoono*

*Maat 24:1-2; Marq 13:1-2*

<sup>5</sup> Yesussa paanan yivayna eenasa waani waani “Kono Barjosa gazano onno seenin payyanbee Barjona imbon imintonbeka gobshayse ko ashkadhade” hamayse kenin giyenka, <sup>6</sup> Yesus “Igina yenin shedayna senna kina kidar dordhaanasa kala hattear kidara povayse kottsimima kenin shidhima woda niva ko nive; hamin hambhaakaar kesa kala hattear raqaate shidhehe” kena ki hamade.

*Yesusin Nivenam Eshkayno Milkitino  
Maat 24:3-14; Marq 13:3-13*

<sup>7</sup> Kediar “Woam Dhettsea, ta ogono yerro haa ko yin maate? Ogoro yerro konin yeskonam dhettsayno milkitino kosa hare?” hamayse ke oysade.

<sup>8</sup> Yesus kena yin ki giyade: “Yenin dhaddhisadhoamadettsi mete yesaam gishee. Harrna hambhidianna, thoothino eeno ‘Inta Kiristoosne’ pir, ‘Marrato! Kiristoosin nivayno wodano yeskidine’ hamaate isa naabenka niva ko nive. Kesa paananka yiveebhode.

<sup>9</sup> Banqinbee zarsinin kidar dhaabhenbe yenin qansen wodanka, kurtumbheebhode. Harrna hambhidianna, ogono yer wul birayse konin maatayno shidha shidhiminone. Yin ko dahaakaar macchin wodano saanawa nivehe” ki hamade.

<sup>10</sup> Ogoro Yesus kena yin ki giyade: “Zarsino zarsindar, binnaar binnadar dhaabhayse banqi keda kiam uxe. <sup>11</sup> Peendar gebhi zigabee, raq waani waaniar daaqibee, burqobe koda maate. Kurtunsen yerinbee gebhi milkitbe cecindar koda haapadhe.

<sup>12</sup> “Ogo wulsa birayse, isa naabenna hamayse eeno yeam yeda ko yede; yeam oyta ko oyte; Ayiwd eensa bukin raqintebbee dhaxin oonintebe saskate yeam ima ko ime; binnabee peen wottsaynabedar yeam entsate koda yive. <sup>13</sup> Ogoroar isa naabenna hamayse yena tarjana agea goyti koda maate. <sup>14</sup> Ogonante yeam oysadhen oysimensa malsinna birayse yesa woylaminka qaabeebhode. <sup>15</sup> Harrna hambhidianna, yeam jibbayna palimayse yeam kenin bashoamadettsi yena dhalqinbee pakalmakkonbeam ida ime. <sup>16</sup> Imbana yennabee, indanaana yennabee, yesa muldhanabee, yesa nashonabe yeam saskate ima ke ime; yesa iira waani waani eenamaaar deesa ke deese. <sup>17</sup> Yedi isa naabenna hamayse een wulkal jibbadhaana yeda maate. <sup>18</sup> Ko dahaannaar yesa meten sitinsa kala hattear kayehe. <sup>19</sup> Wocchimbhaate darshayse yesa sadanam yeda dhacche.

*Yesus Yerusaalemin Kayensa Kinin Giyoono  
Maat 24:15-21; Marq 13:14-19*

<sup>20</sup> “Banqin eena Yerusaalemam karaysaka yenin haopen wodanka, kosa kayenin yeskonam dhesee. <sup>21</sup> Wodan ogoka Yiwda peente dohoono eeno dhukanadar ko gobe; katamansa iinte dohoono eeno iira ko ute; katamansa mayante dohoonoar katamante ko ardabhoode. <sup>22</sup> Harrna hambhidianna, thaapadhoono wul konin thoothoadettsi Barjosa halo woda ko maatade. <sup>23</sup> Ogo wodanka maana sirmanabee amin qooshaynabena hay! Harrna hambhidianna, Ayiwd peendar gebhi gaale koda maate; ogo zarsindarar Barjosa wacime koda nive. <sup>24</sup> Kesa iira thoothino zarsinoar halpaka koda deesadhe. Waani eenamaaar banqi uxate peen wuldar koda yiidhe. Ayiwdtay hamma eenasa wodanin maqenka yekka, Yerusaalem Ayiwdtay hamma eenasa kantanka tigadhoono koda maate.

*Eedi Naasisa Lansi Maataate Nivano  
Maat 24:29-31; Marq 13:24-27*

<sup>25</sup> “Haynbee, arpinbee, wanconbedar milkit koda haapadhe. Peen wuldar dohoono eeno bazinin shohayse oolenna kurtumbhayse gaala ko gaale. <sup>26</sup> Peendar niven yerinam toolaate eeno kurtumbheka koda gibaze. Harrna hambhidianna, cecinte dahaana kantana wul shoal ke shoe. <sup>27</sup> Ogo wodanka inta Eedi Naas kantanbee gebhon gobshinbeka polondar dahayse inin nivenam keda haape. <sup>28</sup> Ogoro wul yin konin maatan yeden wodanka, yedar dohon bazanam kashayse yeam dhacchea nivanna kinin saanonna, dheg hamayse tura shedee” kena ki hamade.

*Hatton Shaapinsa Kamsino  
Maat 24:32-35; Marq 13:28-31*

<sup>29</sup> Ogoraar Yesus kamsika kena yin ki guyade: “Shaapin hattonbee waani haaqanabeam payya hayayse shedee; <sup>30</sup> haccha haali kenin bulenka keam haapayse bargin\* wodanin yeskonam yedi yenti dheseeda dhese. <sup>31</sup> Ogodettsi yedi igina yerram yenin shedenka, Barjosa bitamonin theedonam dhesee. <sup>32</sup> Inta yena gon ida giye: Ogo wul yin maatenka yekka wodan koka dohoono adhadhino eeno diyate maehe. <sup>33</sup> Cecinbee peenbe saga ko sage; inin giyoono upsino sagehe.

### *Wocchimbhayse Toldhen Goyno*

<sup>34</sup> “Wucadhen thoothamonbee, barinbee, peen kosa dayntan goynbena hamayse yesa woylaminka qaabite yenin gaaloamadettsibee ye dhesima ogono roorono nivayse zaanidettsi yeast konin yedoamadettsibe yeast gishee. <sup>35</sup> Harrna hambhidianna, ogono roorono peendar dohon een wulam yeda ko yede. <sup>36</sup> Ogonante nivanna hayen yerin wulra yeninka dhaqeaa kanta haapanabee i Eedi Naasisa birante woyanabe yenin damoadettsi, rooro wul Barjoam miskaate wocchimbhayse toolee” kena ki hamade.

<sup>37</sup> Yesus rororoonka Barjosa gazan ooninte dhettsite ki dahade; peen sootina Dabirezayt hambhen dhukandar yivayse kida wodhe. <sup>38</sup> Sedhiman eeno wul kinin giyenam qansota Barjosa gazan ooninte kikal koda nive.

## 22

### *Yesusdar Woogintaka Eenin Dhaabhoono*

*Maat 26:1-5; Marq 14:1-2; Wannis 11:45-53*

<sup>1</sup> Paasika\* hambhen irshonin qolmon balashan gaadhea bavaala yeskidine.

<sup>2</sup> Gudullasa hayonabee Musesa yigginam dhettsaynabe eenaam kenin kurtumbhonaa, aachika Yesusam yinin deesensa goyti zagite ke dahade.

### *Yiwda Yesusam Yettsate Imo Kinin Dhalqoono*

*Maat 26:14-16; Marq 14:10-11*

<sup>3</sup> Ogo wodanka tabhi lamaa Yesussa paanan yivaynasa kalaa Asqoronto peen ea Yiwda hambheasa woylaminte Seethaan ki ardade. <sup>4</sup> Yiwdaar yivayse Yesusam hamin hayayse yettsate kena yinin imensa goyti gudullasa hayonabee Barjosa gazan ooninam toolaynabekal ki dhalqade. <sup>5</sup> Kediar wozadhayse birre kina imana kimbesana kinka ke dhalqade. <sup>6</sup> Yiwdaar kena ee hamayse eedin qolmonte kiam yettsate imana agea woda zagite ki dahade.

### *Yesus Paasikan Galanam Yisa Paanan Yivayna Eenabesana Kinin Itsoono*

*Maat 26:17-25; Marq 14:12-21; Wannis 13:21-30*

<sup>7</sup> Ogosa budonte Paasikan<sup>†</sup> yaaton machadhen irshon qolmon balashan itsadhyano bavallo ko yeskade. <sup>8</sup> Yesus “Paasikansa galanam wonin itsoadettsi yivayse wona ashkee” hamayse Bhethiroosbee Wannisbeam ki yittsade. <sup>9</sup> Kediar “Hamote wonin ashkoadettsia zage?” hamayse kiam ke oysade. <sup>10</sup> Kidiar kena yin ki guyade: “Katamante yelin ardenka, daaka noqo kedaa eedi kalaam yeda haape; kisa paananka yivayse kinin arden oonindar ardee. <sup>11</sup> Ooninsa imbaam ‘Woam Dhettsea’ ‘Isa paanan yivayna eenabete Paasikan galanam wonin itsayno rango hamotene?’ hana kida hame’ kina hamee. <sup>12</sup> Kidiar ooninsa zulonte woysadthon, pir kosa iinaam payya apayse ashkadthon workin ooninam yena kida dhee; ogote wona ashkimate” kena ki hamade. <sup>13</sup> Kidiar yivayse Yesus kena kinin giyaadettsi ke haapade. Paasikan galanam ogote ke ashkade.

\* 21:30 “Bargi” hambhea upsiam gaalin aponka “bega” ko hambhade. Israveel peente bonan wodanin yeskenka, haaqano pudhan koda yede; Banen peente pir bargin wodan yeskenka konin pudhan yedenna, kamsinam yena may hayota “bargi” ko hambhade. \* 22:1 “Paasika” hamen upsinam Haalin Mallan mathaapinsa macchinte thaapadhaanar shedaa. † 22:7 “Paasika” hamen upsinam Haalin Mallan mathaapinsa macchinte thaapadhaanar shedaa.

*Kiristoossa Dembhinam Bhocchisayno Galano  
Maat 26:26-30; Marq 14:22-26; 1 Qoro 11:23-25*

<sup>14</sup> Galan itsadhen wodan yeskaysaka, Yesus yisa tarjamonnante kinin yittsayn-abesana gala kummota ki dooqade. <sup>15</sup> Kidiar “Gaalen inin tiyensa birayse yembesana kinka ko Paasikan galan itsana kattsi anngardhite i dahade. <sup>16</sup> Ogona yena ida giye: Barjosa bitamonte kosa aachin dhalqinin may maatenka yekka Paasikan galanam kaara os keeda itsattine” kena ki hamade.

<sup>17</sup> Wucadhenamaar tiyayse Barjoam gobshayse, “Kay, kinka kashimee. <sup>18</sup> Inta yena ida giye: Barjosa bitamono konin nivenka yekka, keeda kaara os woynea hattasa aapin cuubadhonam wucattine” kena ki hamade.

<sup>19</sup> Ogora balashanam tiyayse Barjoam ki gobshade; qunthayse yisa paanan yivayna eenana “Kono yena hamayse imbhayno isa waanone; iam yenin bhocchea hayee” hamayse kena ki imade. <sup>20</sup> Agaadettsi pir galansa budonte, wucadhenamaar tiyayse kena yin ki giyade: “Kono wucadhadhayno isa yena hamayse laymen zombhinsa haali mallane. <sup>21</sup> Ko dahaannaar saskate iam imea ea imbesana kinka itseane. <sup>22</sup> Inta Eedi Naas giidhondettsi diyayda diye; ko dahaannaar saskate iam imea ea agaana hay!” kena ki hamade. <sup>23</sup> Kediar “Wosa shaarira ogo yerinam hayea eedi hayne?” hamayse kinka kiam oysan ke yedade.

*“Wuldara Sagi Maatea Hayne?” Hamayse Kenin Kinka Palimoono*

<sup>24</sup> Ogora kedi “Wo wuldara sagi maatea hayne?” hamaate kinka kikal paliman ke yedade. <sup>25</sup> Yesus kena yin ki giyade: “Barjoam dhesimin eensa binna eendar kantanka keda bitime; wottsaynaar ‘Eenna payya waadadhaynane’ keam koda hambhe.

<sup>26</sup> Yediar ogodettsi maateebhode; ko dahaannaar yesa iira wuldara gebhi dahaa ye wulsa kanadettsi ki maate; wottsear tapir erge eedidettsi ki maate. <sup>27</sup> Kumman raqinte dooqayse itseabee woyayse waadadheabesa gebhaa ea hayne? Kummandar dooqaatayu? Ko dahaannaar inta yesa shaarinte waadima eedidettsi i maatade.

<sup>28</sup> “Isa gaalen wulka imbesana kinka wocchimbhayse woyaana yedine. <sup>29</sup> Ogonante Imba iam kinin bitinsondettsi, intaar yeam bitinsayda bitinse. <sup>30</sup> Isa bitamonte kummandar dooqayse itseeda itse, wuceeda wuce; bitamon borkotondarar dooqayse tabhi lamaana Israveel eenasa muldhanadar pirdeeda pirde” kena ki hamade.

*Yesus Bhethiroosin Marimenam Birayse Kinin Giyoono*

*Maat 26:31-35; Marq 14:27-31; Wannis 13:36-38*

<sup>31</sup> Ogora Yesus “Simoon, Simoon, qansaa! Seethaan isin anqarsadhendettsi yeam anqarsate shedana Barjoam ki miskade. <sup>32</sup> Ko dahaannaar idar woylamin hanin qajayno hasa konin kayoamadettsi inta hana Barjoam i miskade. Yaar ora idar hanin maaton wodanka, hambanaanaam wocchinsaa” kina ki hamade. <sup>33</sup> Bhethiroosaar “Imbo, dhaxibee dembhibe ko hannaar, hambesana kinka yivana inta ashkimbhidine” kina ki hamade. <sup>34</sup> Yesusaar “Bhethirooso, yin ida hana giye: Kina baacha biraa qiiqima, ‘Inta kiam dhesattine’ hamayse makkam goyt hada marime” kina ki hamade.

<sup>35</sup> Ogora Yesus yisa paanan yivaynana “Korbhobee, surbabee, dunnguribe qolma yeam inin yittson wodanka yena joogaa yer daaw?” hamayse kena ki giyade. Kediar “Wosa joogaa yer qolehe” hamayse kina ke maasade. <sup>36</sup> Yesusaar kena yin ki giyade: “Ta keeda korbhobee surbabee yisa dahaa ki yede; halpa yisa qolmaar apalanam shanshayse halpa ki shane. <sup>37</sup> Yena yin ida giye: ‘Seeson eenabesana kinka ki paydadhadde’ hamayse thaapadhoono upsino inka thootha koda zaske; innon goynsa thaapadhonaa macchino yeskidine” kena ki hamade. <sup>38</sup> Kediar “Imbo, shedaa! Kote halpa lamaa daane” ke hamade. Kidiar “Yeeka ko yeeke” kena ki hamade.

*Yesus Dabirezayt Dhukandar Barjoam Kinin Miskoono  
Maat 26:36-46; Marq 14:32-42*

<sup>39</sup> Yesus katamara utayse yisa dambindettsi Dabirezayt dhukandar kinin yivenka, kisa paanan yivayna eenaar kimbesana kinka ke yivade. <sup>40</sup> Ogotear kenin yeskenka Yesus kena “Taysate yeam siyonsa iinte arsente yenin ardoamadettsi Barjoam miskee” ki hamade. <sup>41</sup> Ogora seeni paxadhaysaka yivayse weveaddha kekalanka pegadhayse kumpurdhayse, yin giyayse Barjoam ki miskade: <sup>42</sup> “Imbo, ha nashidianna ko gaalen wucimanam inin wucoamadettsi ikalanka saskaa. Ko dahaannaar hanin nashaadettsi ko dee, inin nashaadettsi ko dahabhoode” ki hamade. <sup>43</sup> [Barjosa gaana kina haapad-hayse kiam wocchinsite ki dahade. <sup>44</sup> Yisa woylaminkaar kattsi qaabayse ini hamora sagi Barjoam miskite ki dahade. Kisa ermanoar zombhidettsi maatayse peendar hanchite ko dahade.]

<sup>45</sup> Miskera dhaabhayse yisa paanan yivaynakal kinin nivenka, kattsi galshea qaaboka qajadhayse raatidi ke hattaka keam ki haapade. <sup>46</sup> “Harrnee raataa? Taysate yeam siyonsa iinte arsente yenin ardoamadettsi dhaabhayse Barjoam miskee!” kena ki hamade.

*Yesussa Banqin Eenayn Kiam Yedoono  
Maat 26:47-56; Marq 14:43-50; Wannis 18:1-11*

<sup>47</sup> Yesus ogoam akar giyte ki daaka, marrato! Thoothina eena kikal ke nivade. Keam entsea kisa paanan yivayna eena tabhi lamaanasa kalaa Yiwda hambhea ki dahade. Kidi Yesusam sunqota kikal ki theedade. <sup>48</sup> Yesusaar “Yiwda, i Eedi Naasaam sunqayse saskatea imo?” kina ki hamade.

<sup>49</sup> Yesusbesana dahaana eena ogo maatenam shedayse, “Imbo, halpaka keam wo taxo?” ke hamade. <sup>50</sup> Kesa iira kalaa gudullasa gebhaasa waadiman easa qaamia mizaqaam taxate ki dhabade. <sup>51</sup> Yesusaar “Garee! Yin haya zaskehe!” hamayse easa qaamiam kaamayse ki pacchade.

<sup>52</sup> Ogora Yesus kiam yedota nivaana gudullasa hayonabee, Barjosa gazan ooninam toolaynasa hayonabee, donzanabena “Eedisa koymo buurate itsea eedidettsi hayayse iam yedana halpabee haljobe bavatee nivaaw? <sup>53</sup> Rooro wul Barjosa gazan ooninsa mayante yembesana kinka inin dehenka iam yedeetene; ta yembee thipansa hayoabesa wodane” kena ki hamade.

*Bhethiroos Yesusam Kinin Marimoono  
Maat 26:69-75; Marq 14:66-72; Wannis 18:15-18bee 25-27be*

<sup>54</sup> Ogora eena Yesusam yedayse gudullasa gebhaasa oonindar kiam entsate ke yivade. Bhethiroosaar pegeka kesa paanan yivite ki dahade. <sup>55</sup> Eena kerminsa iir nuu guttsayse kinka dooqayse ke daaka, Bhethiroosaar nivayse kembesana kinka ki dooqade.

<sup>56</sup> Bhethiroos nuunsa gasante dooqayse ki daaka, waadima eedi kallo kiam haapayse payya shirshate shedayse, “Ea kaar kimbete ki dahade” ko hamade. <sup>57</sup> Bhethiroosaar “Eediwa kono, inta kiam dhesattine!” hamayse ki marimade. <sup>58</sup> Likka kap yinin hamonsa budonte, eedi ab kiam shedayse, “Yaar kimbesana kinka ha dahade” kina ki hamade. Bhethiroosaar “Yeria, intatehe!” ki hamade.

<sup>59</sup> Savaat kalaaddha yinin kapponsa budonte, eedi ab kalaa Bhethirooska “Ea kaa Galila eedi yinin dohonna, gon kimbesana kinka ki dahade” hamayse upsi wocchika ki giyade. <sup>60</sup> Bhethiroosaar “Yeria, hanin giyenam dhesattine!” ki hamade. Ogoam giyte ki daaka, baacha biraa ki qiiqade.

<sup>61</sup> Ogo wodanka Imbaa Yesus budoka wal hamayse Bhethiroosam ki shedade. Bhethiroosaar “Kina baacha biraa qiiqima makkam goyt ‘Inta kiam dhesattine’ hamayse iam hada marime” hamayse Imbaa Yesus kina giyoono kalan bhoq konin hamenka, <sup>62</sup> mayanka utayse qaaboka kattsi ataate ki eepade.

<sup>63-64</sup> Yesusam toolayna eena kiam bagaate kisa aapinam ochayse qanada, “Haam qanaa hayne? Wona giyaa!” hamaate kiam keda oyse. <sup>65</sup> Waaniar yer thoothi kidar guyada kiam keda iire.

*Yesusam Pirdin Pirdaynakal Baadhoono  
Maat 26:57-68; Marq 14:53-65; Wannis 18:19-24*

<sup>66</sup> Peen sedhaysaka peensa donzanabee, gudullasa hayonabee, Musesa yigginam dhettsaynabe kinka bukayse Yesusam yisa pirdin raqindar entsate ke yivade. <sup>67</sup> “Ta wona giyaa: Ya Barjoyn qadhaa Kiristoos?” ke hamade. Kidiar “I yena giyaakaar gonne hamayse tiyattene; <sup>68</sup> oysimear yeam oysidi i hanna, ina maasattene. <sup>69</sup> Ko dhaaannaar keeda kaara os inta Eedi Naas kantanka dahaa Barjosa mizaqimbar ida dooqe” kena ki hamade. <sup>70</sup> Kedi wulaar “Ta keeda ya Barjo Naasiw?” hamayse kiam ke oysade. Kidiar “Yenin giyaadettsi intane” kena ki hamade. <sup>71</sup> Kediar “Ta kisa apora utoン upsinam wodi qansidine; keeda kaara os tarja ab wona harrna ko zaske?” ke hamade.

## 23

*Yesusam Bhilathoosdar Yedate Yiidhoono  
Maat 27:1-2bee 11-14be; Marq 15:1-5; Wannis 18:28-38*

<sup>1</sup> Pirdin pirdayna wul dhaabhayse Yesusam Bhilathoossa birante kiam entsate yi-vayse, <sup>2</sup> “Ea kaa wosa eenaam kinin dhaddhisenbee, Roome peen bitaana gibiri kenin kashoamadettsi keam kinin marenbee, pir ‘Bitaa Barjoyn qadhaa Kiristoos intane’ hamaate kinin giyenbeka kiam wo haapade” hamayse bersan ke yedade.

<sup>3</sup> Bhilathoosaar “Ayiwd eenasa bitaa yaw?” hamayse kiam ki oysade. Yesusaar “Inta hanin giyaadettsine” hamayse kina ki maasade.

<sup>4</sup> Bhilathoosaar gudullasa hayonabee een waanibena “Ea kaasa seeso kala hattear haapaatine” ki hamade. <sup>5</sup> Kediar “Ea kaa Galila peera yedayse koka yekka Yiwsa peen wul gidir eenaam dhettsaate eenin kidar konin gooroadettsi kida haye” hamaate wocchisayse kiam ke bersade.

*Yesusam Herodissa Birante Entsate Kinin Yiidhoono*

<sup>6</sup> Bhilathoosaar ogoam yinin qansenka, “Ea kaa Galila eediw?” hamayse ki oysade. <sup>7</sup> Yesus Herodisin wottsen peen eedi kinin dohonam yinin dhesenka, Herodisdar kiam ki yittsade. Herodisaar ogo wodanka Yerusaalem katamante ki dahade.

<sup>8</sup> Herodisaar Yesusam yinin haapenka, kattsi ki wozadhade. Harrna hambhidiana, Yesus goynsa yinin qansonka kiam shedana thoothi wodana annardhaate ki dahade; ogo yerin tarshen Yesus kinin waadadhenka kiam shedana qaabite ki dahade. <sup>9</sup> Herodis Yesusam thoothi oysime ki oysade; kidiar yer kala hattear kina maasadehe. <sup>10</sup> Gudullasa hayonabee Musesa yigginam dhettsaynabe raqin ogote woyayse kattsi kiam keda berse. <sup>11</sup> Herodisaar yisa poolisanabete kiam bagaatebee boyaaatebe ki dahade; apala goobe kiam qattsayse Bhilathoosdar maasate kiam ki yittsade.

<sup>12</sup> Agaa roroaka Herodisbee Bhilathoosbe kinka kisa nasho ke maatade; kosa birayse kinka kiam jibbayna ke dahade.

*Yesusdar Dembin Pirdinin Pirdadhoono  
Maat 27:15-26; Marq 15:6-15; Wannis 18:39-19:16*

<sup>13</sup> Ogosa budonte Bhilathoos gudullasa hayonabee, eensa entsanabee, zarsinbeam yikal eelayse, <sup>14</sup> kena yin ki guyade: “Eenaam goorena kida dhaase’ hamayse ea kaam ikal entsate ye nivade. Marrato! Intaar yesa birante kiam marmarayse yenin kiam bersonsa seeso kala hattear kidar haapaatine. <sup>15</sup> Ogodettsi Herodisaar kidar seeso haapadehe; ogona wodar maasate kiam ki nittsade. Marrato! Ea kaa dembhi pirdidar

yer kiam yeskisea kalaar hayadehe. <sup>16</sup> Ogonante kiam micareka\* qansayse garayda gare” kena ki hamade.

<sup>17</sup> [Leven levenka Paasikan<sup>†</sup> bavaalinka dhaxadhon eensa eedi kalaam Bhilathoos eenna bula ko kiam zaskade.] <sup>18</sup> Eeno wul kinka hamayse “Ea kaam kaysima; Barbaanam wona bulima!” hante ke ilatade. <sup>19</sup> Barbaanaar kataman ogote banqi dhaasayse eediam kinin deesonna, dhaxin ooninte ki dhaxadhade.

<sup>20</sup> Bhilathoosaar Yesusam bulana zagayse tapir eenna kinin giyenka, <sup>21</sup> eeno “Kiam ziitaa! Ziitaa!” hamaate ko ilatade. <sup>22</sup> Bhilathoosaar makkanso “Ea kaa kinin hayoono seesono kisa hare? Inta dembhina kiam yeskisea kisa seeso haapaatine; ogonante kiam micareka qansayse bulayda bule” kena ki hamade. <sup>23</sup> Kediar upsinam yisa dhevayse “Kiam ziitaa!” hamaate kattsi ke ilatade; Bhilathoosam ilatinkaar ke bashade.

<sup>24</sup> Ogona kenin zagoono kena konin haydhoodettsi Bhilathoos ki pirdade. <sup>25</sup> “Wona Barbaanam bulaa” hamayse kenin oysaa peenam wottsaynadar eenaam kinin dhaasonabee eedi kinin deesonnabe dhaxin ooninte dhaxadhaam kena ki bulade. Yesusam kenin zagaadettsi saskate ki imade.

### *Yesusam Masqalindar Ziitadhoono*

*Maat 27:32-44; Marq 15:21-32; Wannis 19:17-27*

<sup>26</sup> Ogora Yesusam entsate kenin yivenka, Qerena peen ea Simoon gurdara katamdar kinin nivenka, kiam yedayse Yesusin ziitadhen masqalinam kiam kettsayse Yesussa paananka kinin yivoadettsi ke hayade.

<sup>27</sup> Thoothino eenoor Yesussa paananka ko yivade; kesaar iira qaytaate eepayna maa waani ke dahade. <sup>28</sup> Yesusaar kedar wal hamayse kena yin ki guyade: “Yedi Yerusaalem maana, yennon metenbee yesa naanabena eepee, inante eepeebhode. <sup>29</sup> Harrna hambhidiana, marrato! ‘Naasi adhimina, amin qooshayse dhesimina seekina ke wozadhe’ hambhayno roorono niva ko nive. <sup>30</sup> Ogo wodanka eeno dhukanaka ‘Wodar yiipee!’, kuttonakaar ‘Woam aachee!’ haman koda yede. <sup>31</sup> Ta haaqan eeqindettsi maataa idar yin ke hayna, haaqan wocchindettsi maataana yedar hamin ke hayo?” kena ki hamade.

<sup>32</sup> Waaniar eedi lamaa seeso waadadhaanaam Yesusbesana kinka keam deesota tiyate ke yivade. <sup>33</sup> Ogora “Eedisa Metedettsi” hambhea raqaam yeskayse ogote Yesusam masqalindar konngayse ke ziitade; seeso waadadhaanasa kalaam kisa mizaqimbar, langoamaar kisa warkatambar keam konngayse ke ziitade.

<sup>34</sup> Yesusaar “Imbo, yinin hayenam kenin dhesimonna kena garaa” ki hamade. Poolisanaar Yesussa apalandar itha dhabayse kinka ke kashimade. <sup>35</sup> Eenaar woyayse keda shede. Peenam wottsaynaar “Een waaniam kidi dhacchidine; ogona Barjo yiam kamayse qadhaa Kiristoos yi daana, ta yiam ki dhacche!” hamaate kiam keda bage. <sup>36</sup> Poolisanaar kiam bagada kikal theedayse woyni thorka kina bavayse, <sup>37</sup> “Ya Ayiwdenasa bitaa hanna, ta haam dhacchaa!” kina ke hamade. <sup>38</sup> “Kaa Ayiwdenasa bitaane” hamea [Girikbee, Roomebee, Ibra aponbeka] thaapi Yesussa metensa bhaabar masqalindar ke konngade.

### *Yesusbesana Kinka Ziitadhaana Eena*

<sup>39</sup> Yesusbesana kinka ziitadhaana seeson eenasa eedi kalaam Yesuska “Ya Barjoyn qadhaa Kiristoostayu? Ta hambee wombeam dhacchaa!” hamaate kiam ki iirade.

<sup>40</sup> Lansoa ea yinin giyenka, “Ya kidettsi dembhin pirdindar dahayse Barjoam kurtumb-hattanu? <sup>41</sup> Wodi wonin seesonsa dhabin tiyaate wonin dohonna, zasken pirdindar wo dahade; ea kaa seeso waadadhadhehe” hamayse kiam ki wacimade. <sup>42</sup> Ogora kidi “Yesuso, bitimayse hanin niven wodanka iam bhocchaa!” kina ki hamade. <sup>43</sup> Yesusaar

\* <sup>23:16</sup> Ogoro micareno katira ashkadhoono nukinte anngamoka dohoonone. † <sup>23:17</sup> “Paasika” hamen upsinam Haalin Mallan mathaapinsa macchinte thaapadhaanar shedaa. <sup>23:30</sup> Hosev 10:8. <sup>23:34</sup> Maz 22:18.

"Inta hana gon ida giye, kina imbesana kinka Barjoyn ashkon ukunsen raqinte hada dee" kina ki hamade.

*Yesusin Diyoono*

*Maat 27:45-56; Marq 15:33-41; Wannis 19:28-30*

<sup>44-45</sup> Ogo wodanka savaat laxaddhane. Keeda agaara hayn thipaysaka savaat salin thoothenka yekka, peen wuldar thipano ko nivade. Barjosa gazan ooninsa gidin kashadhoono apallo kiaddha raq lamaadar ko havade. <sup>46</sup> Yesusaar upsin yisa dheg hayayse "Imbo, isa sadanam hana ida ime" ki hamade. Ogoam giyayse ki diyade.

<sup>47</sup> Mato alaqaar yerin maatonam yinin haapon wodanka, "Gon ea kaa tipane!" hamayse Barjoam ki gobshade. <sup>48</sup> Yerin ogoam shedanna bukaana eena wul maaton yerinam kenin haapon wodanka, yisa woylaminka atayse sadanam gutada ke maatade. <sup>49</sup> Yesusam dhesaana wul, Galila peera yedayse kisa paanan nivaana maanabesana pegeka woyayse ogoam keda shede.

*Yesusam Duukadhoono*

*Maat 27:57-61; Marq 15:42-47; Wannis 19:38-42*

<sup>50-51</sup> Marrato! Yiwda peensa Armatias kataman ea Yoseep hambhea eedi tipabee payyabe ki dahade. Ayiwd peen donzanasa eedi kala ki daahaakaar, Yesusam deesanna kesa bhocchinbee waadimanbeka kidi wormadehe. Barjosa bitamonam wozaka toolite ki dahade. <sup>52</sup> Kidi Bhilathooskal yivayse Yesussa leesinam kina kinin imoadettsi ki miskade. <sup>53</sup> Leesinamaar masqalindara hanchayse apalaka ochayse seeni layta palsate ashkadhon eedin duukadhaamon duukin oolonte kiam ki duukade. <sup>54</sup> Ogoam kinin hayenka ukunsen rooroana ashkimbhahayno wodane; ukunsen rooroa yeskanna kida haye.

<sup>55</sup> Galila peera Yesusbete kinka nivaana maana Yoseep paanan yivayse duukinbee kisa leesinam hamaabar kinin duukonbeam ke shedade. <sup>56</sup> Onnadara maataate yivayse shitto gaameabee waqtibe ke ashkade; ukunsen rooroakaar Musesa yiggin giyendettsi ukunsada ke haaqade.

## 24

*Yesusin Dembhira Dhaabhoono*

*Maat 28:1-10; Marq 16:1-8; Wannis 20:1-10*

<sup>1</sup> Gabansa rooroa bira Wuudi burin seddhiman maana yinin ashkon shitton gaa-menam tiyate duukindar ke yivade. <sup>2</sup> Duukin oolonsa apon shupadhoono sennoar gunnguma ko hattaka ke haapade. <sup>3</sup> Ogora duukin oolonsa iinte ardayse Imbaa Yesussa leesinam haapadehe.

<sup>4</sup> Kediar ogoka targadhayse ke daaka, marrato! Bhalqanten apalan qaadhaana eedi lamaa kekal theedi ke woyade. <sup>5</sup> Maanaar kurtumbhayse mia peente kenin shedenka eena kena yin ke giyade: "Sadanaka dahaa eam diyaanasa shaarinte harrnee zage? <sup>6-7</sup> Kidi kote qolehe, dhaabhidine. 'I Eedi Naasaam seeson eenasa aaninte saskate imbhaysaka ziitadhayse, makkanso rooroakaar dembhira dhaabha koda zaske' hamayse ena Galila peente dahayse yena kinin giyonam bhocchee" kena ke hamade.

<sup>8</sup> Maanaar Yesusin giyonam ke bhocchade.

<sup>9-10</sup> Duukin raqira maatayse ogo wulam tabhi kalaana Yesus yisa tarjamonnante kinin yittsaynabee waani eena wulbena ke giyade. Ogoam giyaana maanaar Megdela peen edon Mayriyambee, Yohannabee, Yayqoobsa indan Mayriyambe, tapir maana kembesana kinka daaanane. <sup>11</sup> Maanasa dhalqinam qansaana eenana bari apo konin maatonna, kedi gonne hamayse tiyadehe. <sup>12</sup> Bhethiroosaar dhaabhayse duukindar ki gobade. Ogotear yivayse yirk hamayse kinin shedenka, leesin yinka ochadhon apalan

bish ki haapade; yinin haapon yerinka targadhayse yisa woylaminka bhocchaate oonindar ki maatade.

*Yesus Yisa Paanan Yivayna Lamaanana Kinin Haapadhoono  
Marq 16:12-13*

<sup>13</sup> Ogo rooronka Yesussa paanan yivaynasa lamaana eena Emahus hambhen gurdandar yivite ke dahade; Emahus Yerusaalemra roonka yiidhenka savaat lamaaddha goytine. <sup>14</sup> Kediar yerin hamon wulam kinka kikal ke dhalqade. <sup>15</sup> Ogo kenin dhalqenka Yesus kekal theedayse kembesana kinka yivaate ki dahade. <sup>16</sup> Ko dahaannaar kedi aapinka Yesusam shedaate, kidi hay kinin dohonam dhesana damadehe.

<sup>17</sup> Kediar “Yivaate kinka yelin dhalqayno ogono hare?” kena ki hamade. Kediar yisa qaabonka ataate ke woyade. <sup>18</sup> Kesa iira Qeleyoobha hambhea kina yinin maasenka, “Ya Yerusaalem katamansa shaarinte dahayse ogo rooronka yerin hamonam dhesaama chocchea ya bisheaw?” kina ki hamade. <sup>19</sup> Kediar “Ogono yer hare?” kena ki hamade. Kediar yin giyayse kina ke maasade: “Naazret peen ea Yesus goynsane; kidi Barjobee een wulbesa birante waadimanbee dhalqinbeka kantanka dahaa Barjokala qansayse eenna giyea ki dahade. <sup>20</sup> Gudullasa hayonabee woam wottsaynabe dembhin pirdinna saskate ke imaysaka, masqalindar konngayse kiam ke ziitade. <sup>21</sup> Wodiar ‘Israveel eenadar dohon bazanam kashayse woam dhacchea kidine’ hamayse kidar woylam wo hayade. Ogo bish dayma, yerro ogono yin ko maataysaka kina rooro makkansone. <sup>22</sup> Tapir wosa shaarinte dahaana maana waani yisa dhalqinka kedi woam tarshidine. Ini seddhiman Yesussa duukindar ke yivade; <sup>23</sup> kisa leesinam haapadehe. Maataate nivayse, ‘“Sadanka ki dahade” hamayna Barjosa gaananaam haamadettsinka wo haapade’ hamada ke nivade. <sup>24</sup> Wokalankaar waani waani eena duukindar yivayse maanayn wona guyondettsi ke haapade; Yesusam haapadehe” kina ke hamade.

<sup>25</sup> Yesusaar “Yedi bhocchiminato, Barjokala qansayse eenna giyayna giyon wulam tiyana boosimbhaanato! <sup>26</sup> Barjoyn qadhaa Kiristoos gaalen ogoam tiyayse yisa gobshindar arda kiam zaskayu?” kena ki hamade. <sup>27</sup> Ogoraar Musebee Barjokala qansayse eenna giyayna wulbera yedayse kinnon goynka giidhonam Mathaap Gazante thaapadhon wulsa bulinam kena ki giyade.

<sup>28</sup> Kenin yiven gurdanam ke theedaysaka, Yesus kekala sagayse kinin yivea kena ko maatade. <sup>29</sup> Kediar “Hayno ibanidine; peenoar sootanna koda haye; ogonante wokal wodhaa” hamayse kattsi ke miskade. Kediar kembesana kinka wodhana ki ardade. <sup>30</sup> Kembesana kinka kummandar ki dooqade; balashanamaar tiyayse Barjoam gobshayse, kashate kena ki imade. <sup>31</sup> Ogo wodanka kesa aapinin bhoqenka kiam kedi dhesidine; kidiar kekala ki kayade. <sup>32</sup> Kediar kinka kikal yi giyna: “Goynte wonin dohonka wona kinin giyenka, pir Mathaap Gazara giyada wona kinin bulenka, wosa woylaminka wodi kattsi wozadhaate diytayu?” ke hamade.

<sup>33</sup> Kediar saanawa dhaabhaye Yerusaalemdar maatayse ke yivade; ogotear tabhi kalaanabee kembesana kinka daaanabe kedi kikal bukayse ke daaka keam ke haapade. <sup>34</sup> Igina kidar bukaana “Imbaa wontea Yesus gon dhaabhidine; Simoonhaar haapadhidine” ke hamade. <sup>35</sup> Eena lamaanaar Emahusdar kenin yivenka goynte hamon yerinbee Yesus balashanam kinin kashenka hamin kenin kiam dhesonbeam kena ke giyade.

*Yesus Yisa Paanan Yivayna Eenana Kinin Haapadhoono  
Maat 28:16-20; Marq 16:14-18; Wannis 20:19-23; Yi Waa 1:6-8*

<sup>36</sup> Kediar ogoam giyte ke daaka, Yesus yinti kesa shaarinte woyayse, “Payyamo yena ko dee” kena ki hamade. <sup>37</sup> Kediar meeshi kenin haapaa kena konin maatonna, targadhayse ke kurtumbhade. <sup>38</sup> Yesus “Harrnee gaqatsadhaa? Yesa woylaminkaar harrnee gothimaa? <sup>39</sup> Inin dohonam isa aaninbee roonbeam shedee; iam kaamate

shedee. Iam yenin shedadettsi meeshidar waabee lepibe qolehe” kena ki hamade.  
**40** Yin giyayse yisa aaninbee roonbeam kena ki dhahade.

**41** Kediar wozaka dhaabhoono gonne hamayse tiyma kenin garonna, targadhayse ke daaka, Yesus “Yekal itsadhea dook?” hamayse keam ki oysade. **42** Kediar kaarasa waa koqadhaa likka kina ke imade. **43** Kidiar tiyayse kesa birante ki itsade. **44** Yin kena ki giyade: “Birayse yembesana kinka inin dohonka, ‘Musesa yiggin mathaapinabee, Barjokala qansayse eenna giyaynasa mathaapinabee, Mazmur mathaapinabesa iinte innon goynka thaapadhoono wul thoothinta koam koda zaske’ hamayse yena inin giyoono dhalqino konone” kena ki hamade.

**45** Ogo wodanka Mathaap Gazante thaapadhonam kenin bhocchoadettsi woylem kena ki imade. **46-47** Kenaar yin ki giyade: “‘Barjoyn qadhaa Kiristoos gaale haapayse diya ki diye; makkansoa roroakaar dembhira dhaabha ki dhaabhe. Pir kisa naabenka seeson waadimanam garayse Barjodar maatadhenbee seesonam shiishadhenbeam Yerusaalemra yedayse peendar dohon zarsin wulna koda giidhe’ hamayse thaapadhdine. **48** Yediar yerra iginasa tarjanane. **49** Marrato! Imbanin ‘imayda ime’ hamonam yena nittsayda nittse; yedi kantanam cecira yena imbhenka yekka Yerusaalem kata-mante dooqee” kena ki hamade.

*Yesus Cecindar Kinin Yivoono  
 Marq 16:19-20; Yi Waa 1:9-11*

**50** Ogora Yesus yisa paanan yivaynaam Yerusaalemra bulayse Bitaaniadar entsate yivayse, yisa aaninam dhaasayse kena Barjo ki eelade. **51** Kena Barjoam eelaate kekalanka edimayse cecindar ki yivade. **52** Kediar kina goodimayse kattsi wozaka Yerusaaledar ke maatade. **53** Barjoamaar gobshaate roro wul Barjosa gazan ooninte ke dahade.

# Wannisin Thaapoono

## Imbaa Wontea Yesus Kiristoossa Dhacchintan Goynam

### Giyayno

### Barjosa Upsino

#### *Ardinta*

Ko oytson Barjosa dhacchintan upsin mathaapinam thaapaa Kiristoos yisa tarjamonnante kinin yittsaa Wannisne. Kidi Zabdoos naasa Yayqoobsa indanaasane. Yesusin kamaana tabhi lamaana kisa paanan yivaynasa kalaa dahayse Yesussa kattsi nashoane. Kaa mathaapasa iinte “Yesusin nashea” hamayse giidhea Wannis kidi yinti kinin dohonam koda bhocchadhe.

Wannis mathaapin thaapadhidinsa bhocchino “Jesus Barjoyn qadhaa Kiristoos, Barjo Naas kinin dohonam gonne hamayse yenin tiyoadettsibee kidar woylamin qajayse kisa naabenka sadaka yenin doadettsibene” hamayse ki guyade (20:31).

Keeda Wannis yisa bhocchinam may haydine. Kiristoossa yinin thaapenka, Kiristoos yisa upsinbee waadimanbeka eedi kalaa kalaa bhocchayse kiam kinin kamoadettsi eenam kinin bhocchisonam Wannis kida eshke. Birara macchinka yekka Yesus yinti Barjo kinin dohonam kida giye. Ko dahaannaar dembhin shiponsa demente dooqaana eena dehen sadanam kenin haapoadettsi meten yinnonam saskate imana Kiristoos eedi maatayse ki nivade. Diyayse pir dembhira ki dhaabhade. Roro wul lay dehea maatayse kisa paanan yivayna kina kenin goodimoadettsibee gonamoka kenin waadadhoodettsibe keam eelite ki dahade.

Kaa mathaapaam raq dongdar kashana dandima ko dandime:

1. Ardinta: Barjo Naasasa (1:1-18)
2. Barjo Naasa may kinin waadadhoono waadimano (1:19-12:50)
  - a) Barjo Naasa een waani waanibesana kisa dohoono keerintono (1:19-4:54)
  - b) Barjo Naasa thoothin eenbesana kisa dohoono keerintono (5:1-6:71)
  - c) Barjo Naasadar thoothin eensa iira dhaabhoono palimeno (7:1-11:57)
  - d) Barjo Naasa kina imbhon waadimanam macchindar kinin yeskisoono (12:1-50)
3. Barjo Naasa eedi tokaabesana kinin waadadhoono waadimano (13:1-17:26)
  - a) Barjo Naasa Yesussa dembhinam bhocchisayno galano (13:1-30)
  - b) Barjo Naasasa macchin timmirino (13:31-16:33)
  - c) Barjo Naasa gudullasa gebhaa maatayse kinin miskoono miskeno (17:1-26)
4. Barjo Naasa diyayse dembhira dhaabhayse kinin waadadhoono waadimano (18:1-20:31)
  - a) Barjo Naasa yettsate kinin imbhonbee pirdinam kinin tiyonbe (18:1-19:16)
  - b) Barjo Naasa masqalindar ziitadhayse kinin diyonbee kinin duukadhonbe (19:16-42)
  - c) Barjo Naasasa dhaabhidino (20:1-31)
5. Barjo Naasasa macchin elqimeno (21:1-25)
 

“Intane” hamayse Yesus yinnon metensa kinin giyaana tobbhaana goynaam kaasa choobar shedee:

  1. “Sadan imea balasha intane” (6:35)
  2. “Peen kodar dohon eensa shaakaa intane” (8:12; 9:5)
  3. “Yaanasa kerea intane” (10:7bee 9be)
  4. “Payyan gishiman gishea intane” (10:11)
  5. “Eenaam dembhira dhaaseabee kena dehen sadan imeabe intane” (11:25)
  6. “Goyteabee, gonin hamaabee, sadabe intane” (14:6)
  7. “Gonin hama woynea hatta intane” (15:1)

Ogodettsi Yesus Ayiwdeenna “Gon yena ida giye: Abraam adhadhima birayse inta daane” hamayse Barjo Ena Mallante Musena yiam kinin dhettison wodanka kinin tiyaa naabeam yina ki tiyade. Ogodettsi yinti Barjo yinin dohonam ki dhettisade.

Wannis mathaapinte bish haapadhea bhocchi haynta zaskayno Yesus kisa paanan yivaynana kinin giyoono kashi 13-16sa iinte haapadhaynone.

Ardintante (1:1-18) Wannis Yesusam dhettisana “Upsea” hamayse kiam kida giye. Agaa Upsea pijaa Barjobee, dehen sadan imeabee, waanka haapadhaabee, Barjo Imbaam eshkeabene. Ardintante kinka kinka bhocchinka agimina yer oydi keda haapadhe. Iginaar:

1. Shaakabee thipabe
2. Yesusam tiyaabee garaabe
3. Waaka adhadhaabee Manpaska adhadhaabe
4. Yiggibee sun imintobene.

Igina kinka kinka bhocchinka agimina oynna yerra mathaapinsa birara yedayse macchinka yekka dohon Barjobee Seethaanbesa mashimenam keda dhee. Yesussa dembhinbee dhaabhidinbeka ogo mashimensa aapino koda haapadhe. Ogo kisa dembhinbee dhaabhidinbeka “Eenaam dembhira dhaaseabee kena dehen sadan imeabe intane” kinin hamoono upsino gon konin dohonam ki dhahade.

### *Dehen Sadansa Upsino*

<sup>1</sup> Ena birayse Upsea dahade; agaa Upsear Barjokal ki dahade; Upsea agaar Barjone. <sup>2</sup> Upsea agaar ena birayse Barjokal ki dahade. <sup>3</sup> Yer wul kanka ko pijadhade; pijadhaanasa shaarinte yer kala hattear ki qolmaka pijadhadehe. <sup>4</sup> Kanka dehea sada ko dahade; agaa sadaar eensa shaakaane. <sup>5</sup> Ogono shaakanoar thipante shaaka ko shaake; thipanoar koam bashadehe.

<sup>6</sup> Barjokalanka nittsadhaa Wannis hambhea eedi kalaa dahade. <sup>7</sup> Eeno wul kisa tarjamonka ogo shaakandar woylamin konin qajoadettsi shaakan goynsa tarjota ki nivade. <sup>8</sup> Wannis kidi yinti shaakatehe; ogo shaakan goynsa tarjota ki nivade.

<sup>9</sup> Een wulna shaakea gonin hama shaakaa peendar ki nivade. <sup>10</sup> Kidiar peendar ki dahade; kidi peenam ki pijade; peendar dohoono eeno kiam dhesadehe. <sup>11</sup> Kidi yisa muldhankal ki nivade; ko dahaannaar kisa muldhana kiam tiyadehe. <sup>12</sup> Kiam tiyaana eena wulna, kidar woylamin qajaynana Barjo naana kenin doadettsi hayamo kena ki imade. <sup>13</sup> Kidiar Barjo naana kenin maatoono Barjo Manpasinkalanka kenin adhadhonnane; eedin adhadhendettsi waabee zombhibeka way eedisa bhocchika adhadhadehe.

<sup>14</sup> Upsear eedi ki maatade; Barjosa sunin imintonbee goninbeka thoothayse wosa shaarinte ki wodhade. Yimbasa Naasa kalaa Imbaakal kisa dohon gobshinam wodi haapidine.

<sup>15</sup> Wannisaar “‘Isa budonte nivea idara sagine; harrna hambhidianna, kidi isa birayse ki dahade’ hamayse inin yena giyaa, marrato! Kidi kaane” hamaate upsi gebhika kinnon goynsa ki tarjade. <sup>16</sup> Wodi wul kisa sunin iminton thoothamora sunin imintondar pir imintonam wo tiyade. <sup>17</sup> Yiggino Musebar ko imbhade; Barjosa sunin imintonbee goninbe Yesus Kiristoosbar wona ko imbhade. <sup>18</sup> Hamin ko dahaakaar Barjoam haapaa eedi kala hattear qolehe; ko dahaannaar Barjo Imbaabete dhaaa, kisa Naasa kalaa kinnon goynsa wona may ki dhahade.

### *Shivea Wannissa Tarjamono*

#### *Maat 3:1-12; Marq 1:2-8; Luq 3:15-17*

<sup>19</sup> Ayiwdeenna entsaynaar “Ya hayne?” hamayse Wannisam kenin oysoadettsi Yerusaalemra gudullabee Lewi eenabeam kidar kenin yittson wodanka, <sup>20</sup> Wannis “Inta Barjoyn qadhaa Kiristoostehe” hamayse may ki tarjade, yiam aachadehe. <sup>21</sup> Kidiar

“Ta ya hayne? Eeliasu?” hamayse kiam ke oysade. Kidiar “Intatehe” hamayse kena ki maasade. Kediār “‘Niva ki nive’ hambhea Barjokala qansayse eenna giyea yaw?” kina ke hamade. Kidiar “Aavav” kena ki hamade. <sup>22</sup> Kidiar “Ta ya hayne? Woam nittsaanana malsinam wonin maasoadeettsi haam haynea hame?” hamayse kiam ke oysade. <sup>23</sup> Kidiar “Barjokala qansayse eenna giyea Isiasin giyondettsi inta ‘Barjoyn yekal nivenna, goyn kina gaz hayaye ashkee’ hamayse ilatada darante giyea eane” kena ki hamade.

<sup>24</sup> Nittsadhaana eenaar Parisa eenakalanka ke dahade. <sup>25</sup> Ogonante “Ya Barjoyn qadhaa Kiristoos way Eelias way ‘Niva ki nive’ hambhea Barjokala qansayse eenna giyea ha dahaamma, eenam harrnaa shive?” hamayse kiam ke oysade. <sup>26</sup> Wannisaar kena “Inta noqoka ida shive; ko dahaannaar yenin dhesima eedi yesa shaarinte woydine. <sup>27</sup> Kisa dunngurinsa dhaxinam hattear bulana inta dameatehe; isa budonte nivea kidine” kena ki hamade. <sup>28</sup> Ogo wul yin konin maatoono Wannisin eenam shivayno Yordaanoos baynsa saabar dohon Bitaania gurdantene.

### *Barjosa Yaata*

<sup>29</sup> Kina hamon Wannis Yesus kikal kinin nivenka kiam shedayse, “Marrato! Peendar dohon eensa seesonam shiishea Barjosa Yaata kaane! <sup>30</sup> ‘Eedi kalaa isa budonte niva ki nive; kidiar isa birayse kinin dohonna, idara kalon sagine’ inin hamaa kidi kaane. <sup>31</sup> Intaar kiam dhesaatine; ko dahaannaar Israveel eenkal kinin dhesimoadettsi ogonante inta eenam noqoka shivaate i nivade” ki hamade.

<sup>32</sup> Wannisaar yin giyayse ki tarjade: “Manpas Gazano waleedettsi cecira konin hanchenbee kidar konin dooqenbeam i haapade. <sup>33</sup> Intaar kiam dhesaatine; ko dahaannaar eenam noqoka inin shivoadettsi iam nittsaa ‘Kidar Manpasin hanchayse dooqenka hanin haapea Manpas Gazanka shivea kidine’ ina ki hamade. <sup>34</sup> Intaar ogoam haapidine; kidi Barjo Naas kinin dohonam inta tarjidine” ki hamade.

### *Yesussa Paanan Yivayna Eena Birana*

<sup>35</sup> Kina hamon Wannis lamaana kisa paanan yivaynabesana kinka pir raqin ogote woyayse ki dahade. <sup>36</sup> Wannisaar ogoka Yesusin yivenka kiam shedayse, “Marrato! Barjosa Yaata kaane” ki hamade. <sup>37</sup> Igina lamaana Wannissa paanan yivaynaar Wannisin giyenam qansayse Yesussa paanan ke yivade.

<sup>38</sup> Yesusaar igina eena kisa paanan kenin nivenka budoka keam maatate shedayse, “Haree zage?” kena ki hamade. Kidiar “Rebi, hanin dahayno rango hamotene?” hamayse kiam ke oysade. “Rebi” hamintano “Dhettsea” hamintane. <sup>39</sup> Kidiar “Inin dehenam nivayse shedee” kena ki hamade. Kidiar nivayse kinin dehen raqinam ke shedade. Ogo wodanka savaatino savaat tabhine; kidiar kimbesana kinka ke haaqade.

<sup>40</sup> Wannisin tarjenka qansayse Yesussa paanan yivaana eena lamaanasa kalaa Simoon Bhethiroossa indanaasa Indiriasne. <sup>41</sup> Indirias birayse yisa indanaasa Simoonam zagate haapayse, “Mesiam wodi haapidine” kina ki hamade. “Mesi” hamintano “Barjoyn qadhaa Kiristoos” hamintane. <sup>42</sup> Ogosa budonte Indirias Simoonam Yesuskal entsate ki yivade. Yesusaar kiam shedayse, “Ya Wannis naasa Simoonne. Haam ‘Keepa’ koda hambhe” kina ki hamade. “Keepa” hamintano “Bhethiroos” hamintane.

### *Yesus Pilhoosbee Natinaveelbeam Kinin Eeloono*

<sup>43</sup> Peen sedhaysaka Yesus Galila peendar yivana zagayse Pilhoosam haapayse, “Isa paanan nivaa” kina ki hamade. <sup>44</sup> Pilhoosaar Indiriasbee Bhethiroosbedettsi Beetesayda kataman eedine. <sup>45</sup> Pilhoos Natinaveelam zagate haapayse, “Musesa yiggin mathaapinte, pir Barjokala qansayse eenna giyayna kisa kenin thaapaa Yoseep naasa

Naazret ea Yesusam wodi haapidine” kina ki hamade. <sup>46</sup> Natinaveelaar “Naazretra payya yer haapa ko haapadho?” hamayse kiam ki oysade. Pilbhoosaar kina yi giyna: “Hanti nivayse shedaa” kina ki hamade.

<sup>47</sup> Yesus Natinaveel kikal kinin nivenka kiam shedayse, “Marrato! Gadimmakko yisa woylaminte qolma gon hama Israveel ea kaane” ki hamade. <sup>48</sup> Natinaveelaar “Haminkaa iam dhesaa?” kina ki hamade. Yesusaar kina yinin maasenka, “Pilbhoos haam eelima birayse hatton shaapinsa demente ha daaka, haam i haapade” kina ki hamade. <sup>49</sup> Natinaveel yi giyna: “Woam Dhettsea, ya Barjo Naasane; ya Israveel eensa bitaane” kina ki hamade. <sup>50</sup> Yesusaar kina yinin maasenka, “‘Hatton shaapinsa demente ha daaka haam i haapade’ inin hamonnaa idar woylamin qajo? Ta ogora sagi yer akar hada haape. <sup>51</sup> Inta yena gon ida giye: Cecin bulimaysaka Barjosa gaanana Eedi Naasikal kenin hanchenbee kenin utenbeam yeda haape” kina ki hamade.

## 2

### *Yesus Gaydon Raqinte Kinin Hayoono*

<sup>1</sup> Makkansoa rooroaka Galila peensa Qaana katamante gaydo ko dahade; Yesussa indanoar ogote ko dahade. <sup>2</sup> Yesusbbee kisa paanan yivayna eenabeam ogo gaydon raqinte ke eldhade.

<sup>3</sup> Ogo gaydon raqinte woynin birzinin maqonna, Yesussa indano kina yi giyna: “Shedaa, birzino maqidine” kina ko hamade. <sup>4</sup> Yesusaar “Indo, harrnaa iam oyse? Isa wodano akar yeskadehe” hamayse kona ki giyade.

<sup>5</sup> Ogora kodi indano waadadhaynana “Kinin yena giyen wulam hayee” ko hamade.

<sup>6</sup> Ayiwd eena yisa gilon kanka kenin waadadhea seenira ashkadhaana daa lax ogote ke dahade; daano kallo mato liitiraddha noqo koda yede. <sup>7</sup> Yesusaar waadimaynana yi giyna: “Daana igmaar noqo thoosee” ki hamade. Kediar daanasa aponka noqonin laymana hayenka yekka ke thoosade.

<sup>8</sup> Ogora Yesus “Ta keeda qolbhaye galanbee birzinbena kamate wodadhaa eana tiyate imee” kena ki hamade. Kediar qolbhaye kina ke imade. <sup>9</sup> Galanbee birzinbena kamate wodadhaar ogo woynin birzin maaton noqonam yinin wucenka, hamora konin nivonam dhesadehe. (Noqonam qolbhaana eena kedi dhesa ke dhese.) Galanbee birzinbena kamate wodadhaa ear keemea eam eelayse, <sup>10</sup> “Eedi wul birayse payyan birzin koda ime; ogora eenin bardhonsa budonte daathimin birzinam koda ime. Ya payyan birzinam koaddha harrnaa kappisaa?” kina ki hamade.

<sup>11</sup> Yesus ogo biron tarshen yerinam kinin hayoono Galila peensa Qaana katamantene. Ogoka yisa gobshinamaar ki dhahade; kisa paanan yivayna eenaar kidar woylamin ke qajade.

### *Yesus Barjosa Gazan Ooninsa Mayante Gaban Gabimaynaam Kinin Oytoono*

*Maat 21:12-13; Marq 11:15-17; Luq 19:45-46*

<sup>12</sup> Ogosa budonte Yesus indanbee, indanaanabee, kisa paanan yivayna eenabesana kinka Qipirnaahoomir yivayse likka roorona ki dooqade.

<sup>13</sup> Ayiwd eensa Paasikan\* bavaalin yeskaysaka Yesus Yerusaalem ki yivade. <sup>14</sup> Barjosa gazan ooninsa mayantear wanngabee, yaanabee, waleenbeam shanshaynaam ki haapade; koymon ookaynaamaar dooqayse ke daaka keam haapayse, <sup>15</sup> alannga ashkayse yaanabee wanngabe wulam Barjosa gazan ooninsa mayara ki oytade. Koymon ookynasa koymonam ki laalade; kesa tharbhezanamaar kupate ki dhabade. <sup>16</sup> Waleen shanshaynanaar “Koam os tiyee; Imbasa ooninam gaba gabadhea ooni hayeebhode!” kena ki hamade.

<sup>1:51</sup> Pija 28:12.      \* <sup>2:13</sup> “Paasika” hamen upsinam Haalin Mallan mathaapinsa macchinte thaapadhaanar shedaa.

<sup>17</sup> Ogo wodanka Yesussa paanan yivayna “Hasa ooninsa dohoono anngarmano isa iinte nuudettsi koda oydhe” hamayse thaapadhonam ke bhocchade. <sup>18</sup> Ayiwd eenam entsaynaar kina “Ya koam hayana hasa hayamonin dohonam wonin dhesoadettsi tarshea yer haraa wona dhee?” kina ke hamade. <sup>19</sup> Yesusaar kena yi giyna: “Barjosa gazan oonin koam kottsee; inta koam rooro makkamka pir woysayda woyse” kena ki hamade. <sup>20</sup> Ogona Ayiwd eenam entsayna “Ko Barjosa gazan ooninam woysate macchana eedi lamaa kaysa apo lax leve ko tiyade; ya ta koam rooro makkamka haminaa woyse?” kina ke hamade. <sup>21</sup> Yesusaar “Barjosa gazan onno” hamayse kinin giyoono yisa waansa ki guyade.

<sup>22</sup> Ogonante Jesus dembhira kinin dhaabhonsa budonte, kisa paanan yivayna eena ogo kinin giyonam bhocchayse, Mathaap Gazante thaapadhonbee Yesusin giyonbeam gonне ke hamade.

<sup>23</sup> Yesus Paasikan rooroaka Yerusaalemir ki daaka, thoothino eeno kinin hayen tarshen yerinam shedayse kidar woylam ko qajade. <sup>24</sup> Yesusaar een wulam yinin dhesenna, kesa qaabonam gonне hamayse kedar woylam qajehe. <sup>25</sup> Kidi yinti eedisa iinte dohonam kinin dhesenna, eedi hay ki hannaar eedisa kina tarjoadettsi zaskehe.

### 3

#### *Yesusbbee Niqodimosbe*

<sup>1</sup> Parisa eensa shaarira Ayiwd eensa hayoa Niqodimos hambhea eedi kalaa dahade. <sup>2</sup> Kidiar sootinka Yesuskal nivayse, “Woam Dhettsea, Barjo kimbesana ki dahaamma, hanin hayayna igma tarshayna yerraam hayana damea eedi qolehe. Ogonante Barjokalanka nivaa dhettsea hanin dohonam dhesooda dhese” kina ki hamade.

<sup>3</sup> Yesusaar kina yinin maasenka, “Inta hana gon ida giye: Eedi lansi yi adhadhaamma, Barjosa bitamonam haapana damehe” kina ki hamade. <sup>4</sup> Niqodimosaar “Eedi yinin gecchonsa budonte hamin ki adhadhe? Lansi indansa iir ardayse adhadhana damaw?” hamayse kiam ki oysade.

<sup>5</sup> Yesusaar yin giyayse kina ki maasade: “Inta hana gon ida giye: Eedi noqokalankabee Manpas Gazankalankabe yi adhadhaamma, Barjosa bitamonte ardana damehe. <sup>6</sup> Waakalanka adhadhaa waane; manpaskalanka adhadhaa manpasne. <sup>7</sup> ‘Lansi adhadha yeam ko zaske’ inin hana hamonna ya targadhaabhode. <sup>8</sup> Jibare yinin nashaa raqadar koda jibarshe; kosa upsinamaar hada qanse. Ko dahaannaar hamora konin nivenam, pir hamodar konin yivenam ya dhesattane. Manpas Gazankalanka adhadhaa wul yinne” kina ki hamade. <sup>9</sup> Niqodimosaar “Ogono hamin ko yin dee?” hamayse kiam ki oysade.

<sup>10</sup> Yesusaar kina yi giyna: “Ya Israveel eenam dhettsea dahayse ogoam dhesattanu? <sup>11</sup> Inta hana gon ida giye: Wonin dhesonam woda giye; wonin haaponamaar woda tarje. Yediar wosa tarjamonam gonне hamayse tiyattene. <sup>12</sup> Peendar dohonam inin yena giyenka gonне hamayse ye tiymina, cecinte dohonam i yena giydianna yedi gonне hamayse haminee tiye? <sup>13</sup> Cecira hanchaa Eedi Naasira ab hayyear tura cecindar yivaa eedi qolehe.

<sup>14</sup> “Musear darante guninam kinin ziitaadettsi, Eedi Naasiar agaadettsi ziitadha kiam koda zaske. <sup>15</sup> Ogonoar kidar woylamin qajea hayyear rooro wul lay dehen sadanam kinin haapoadettsine. <sup>16</sup> Kidar woylamin qajayna wul kenin kayoamadettsi, rooro wul lay dehen sadanam ke haape, Barjo yisa Naasa kalaam yinin imenka yekka peen kodar dohon eenam kattsi ki nashade. <sup>17</sup> Barjo peendar yisa Naasaam kinin nittsoono peen kodar dohoono eeno kanka konin dhaqoadettsine; eendar kinin pirdoadettsitehe.

<sup>18</sup> “Kidar woylamin qajeadar pirdadhehe; kidar woylamin qajimaadar Barjo Naasa kalaadar woylamin kinin qajaamonna, ta kidar pirdadhidine. <sup>19</sup> Shaakanoar peendar ko nivade; eeno siya konin hayenna, shaakanam nashadehe. Thipanam konin nashonna, pirdino ogona ko nivade. <sup>20</sup> Siya hayea wul shaakanam kida jibbe; kisa waadimanin haapadhoamadettsi shaakandar nivehe. <sup>21</sup> Gonin hayea ea kisa waadimano Barjokala konin dohonam haapadhoodettsi shaakandar kida nive” hamaye ki giyade.

### *Yesusbee Shivea Wannisbe*

<sup>22</sup> Ogosa budonte Yesus yisa paanan yivaynabesana kinka Yiwda peendar ki yivade; ogotear kembesana kinka dooqayse eenaam kida shive. <sup>23</sup> Wannisar Saaleem katamansa gasante Yenoon hambhea raqaate thoothi noqon dohonna, eenam kida shive; eenoar kikal nivayse koda shiidhe. <sup>24</sup> Wodan ogoka Wannisam akar dhaxin ooninte dhaxadhadehe.

<sup>25</sup> Wannissa paanan yivaynabee Ayiwd eedi kalabesa shaarinte ashki gilosa palime ko dhaabhade. <sup>26</sup> Wannissa paanan yivaynaar Wanniskal nivayse, “Woam Dhettsea, Yordaanoos baynsa saabar hambesana kinka dahaa, yaar kina hanin tarjaa, kidi eenam kida shive; eeno wulaar kidar koda yive” kina ke hamade.

<sup>27</sup> Wannisaar kena yinin maasenka, “Eedi haynaar cecira Barjo kina imima yer kala hattear tiyana damehe. <sup>28</sup> ‘Inta Barjoyn qadhaa Kiristoostehe; ko dahaannaar kisa birayse i nittsadhadhe’ hamaye inin guyonsa yedi isa tarjanane. <sup>29</sup> Uutan yisa dahaa ea kidi uutan imbaane; uutan imbaasa aananta kikal woyayse ki daaka, uutan imbaa uutanbesana kinin dhalqenka kisa upsinam qansayse aananta kattsi kida wozadhe. Ogonante isa wozano ta thoothidine. <sup>30</sup> Kidi dhev dhev hama kiam koda zaske; inta yirk yirk hama iam koda zaske” kena ki hamade.

<sup>31</sup> Bhaara nivaa wuldara sagine. Peente dahaa peensane; peenngayn yerinam kida giye. Cecira nivaa wuldara sagine. <sup>32</sup> Kidi yinin haaponbee yinin qansonbeam kida tarje; kinin tarjenamaar tiyea qolehe. <sup>33</sup> Kinin tarjonam tiyaa ea Barjosa gonamonam kida tarje. <sup>34</sup> Barjoyn nittsaa Barjosa upsinam kida giye; harrna hambidianna, Barjo yisa Manpasinam kashate imehe. <sup>35</sup> Barjo Imbaa yisa Naasaam kida nashe; yer wulam kisa hayamon demente haydine. <sup>36</sup> Barjo Naasadard woylamin qajeasa rooro wul lay dehea sada kisa daane. Barjo Naasadard woylamin qajima eadar Barjosa wacime kidar ko dahade; dehen sadanam haapehe.

## 4

### *Yesusbee Sammaria Peen Edonbe*

<sup>1</sup> Ogosa budonte Yesus Wanniskalanka sagi thoothina eenam yisa paananka yivayna kinin hayenbee noqonka kinin shivenbeam Parisa eena ke qansade. <sup>2</sup> Ko dahaannaar eenam shivayna kisa paanan yivayna eenane; kidi yinti shivehe.

<sup>3</sup> Parisa eena kisa giidhaka kenin qansonam Yesusin dheson wodanka, Yiwda peenam garayse Galila peendar ki yivade. <sup>4</sup> Ogodar kinin yivenka Sammaria peen goynka yiva kiam ko zaskade.

<sup>5</sup> Ogonante Sammaria peente dohon Yayqoob yisa naasa Yoseepna ena kinin imon raqinkal theedi Sikaar kataman ki nivade. <sup>6</sup> Raqin ogote Yayqoobsa noqo tuula ko dahade. Yesusaar kinin nivon goyn kiam qacchaysaka noqon tuulansa aponte ki dooqade; ogo wodanka savaatinoar savaat laxaddhane.

<sup>7</sup> Sammaria peen maa kallo noqo qolbhota ko nivade. Yesusaar “Noqo iam wushaa” kona ki hamade. <sup>8</sup> Kisa paanan yivayna eena ogosa birayse gala shanota katamandar ke yivade.

<sup>9</sup> Ogonante edono Yesusna yi giyna: “Ya Ayiwd eedi dahayse i Sammaria edonkal ‘Noqo iam wushaa’ hamaye haminaa iam miske?” kina ko hamade. Ogonoar Ayiwd

eenbee Sammaria eenbe yer kala kaladar kinka kenin agimonnane. <sup>10</sup> Yesusaar kona yi giyna: “Barjosa imintonbee ‘Noqo iam wushaa’ hana hamea hay inin dohonbeam ha dhesidianna, ini ya iam hada miske; inta sadan imen noqonam hana ida ime” kona ki hamade.

<sup>11</sup> Edonoar “Imbo, haninka qolbhea yer hasa aaninte solehe; tuulanoar gudubhne. Ta sadan imen noqonam hamoraa tiye? <sup>12</sup> Ya ogo noqon tuulanam wona imaa wosa imbaa Yayqoobdara sagaa sago? Kimbee, kisa naanabee, kisa qollabe kora ke wucade” kina ko hamade.

<sup>13</sup> Yesusaar kona yinin maasenka, “Ogo noqora wucea wul pir kida dheebardhe. <sup>14</sup> Inin imen noqonam wucea rooro wul dheebardhehe; ogonoar inin kina imayno noqono rooro wul lay dehen sadan imea noqo maatayse kisa iira koda ele” ki hamade.

<sup>15</sup> Edonoar “Imbo, keeda kaara os noqo inin dheebardhoamadettsibee noqo qolbhota kote inin nivoamadettsibe ogo noqonam ina imaa” kina ko hamade. <sup>16</sup> Yesusaar “Yivayse hasa geshoam eelayse kote nivaa” ki hamade. <sup>17</sup> Edonoar “Isa anngi solehe” kina ko hamade. Yesusaar “‘Isa anngi solehe’ hamayse hanin giyoono payyane. <sup>18</sup> Hasa anngi dong ke dahade; ta hambesana kinka dhaar hasa geshoatehe. Ogona ya gonaa giyade” kona ki hamade.

<sup>19</sup> Edonoar “Imbo, ya Barjokala qansayse eenna giyea hanin dohonam ta inta dhesidine. <sup>20</sup> Ena wosa eykena dhukan ogodar Barjona ke goodimade; yedi Ayiwid eenaar ‘Eediyn Barjona goodima zaskayno ranqo Yerusaalemirne’ yeda hame” kina ko hamade. <sup>21</sup> Yesusaar kona yin ki giyade: “Ya edono, inin giyenam gonnie hamayse tiyaa. Barjo Imbaana dhukan ogodar way Yerusaalemir yenin goodimima woda koda nive. <sup>22</sup> Yedi yenin dhesaama Barjona yeda goodime; wodiar dhaqinta Ayiwid eensa shaarira konin dohonna, wonin dhesea Barjona woda goodime. <sup>23</sup> Ko dahaannaar, Barjona goninka goodimayna eena Barjo Imbaana manpasbee goninbekaa kina kenin goodimea woda koda nive; ogono wodanoar ta nividine. Barjo Imbaa agaadettsi kina goodimaynaam kida zage. <sup>24</sup> Barjo manpasne; kina goodimaynaar manpasbee goninbekaa kenin goodimoadettsi keam koda zaske” kona ki hamade.

<sup>25</sup> Edonoar “Barjoyn qadhaa Kiristoos hambhea Mesi kinin nivenam dhesayda dhese; kidi yinin nivon wodanka, yer wulam wona kida giye” kina ko hamade. <sup>26</sup> Yesusaar “Shedaa! Ta hambesana dhalqeaa kidi intane” kona ki hamade.

<sup>27</sup> Ogo wodanka kisa paanan yivayna eenaar katamara maatate ke nivade; Yesus maa kallonbesana kinka kinin dhalqenka kiam haapayse kedi targadhidine. Ko dahaannaar edonna “Haraa zage?” way Yesusna “Kombesana kinka harrnaa dhalqe?” hamayse keam oysaa eedi kala hattear solehe.

<sup>28</sup> Ogo wodanka edono noqon daanam garayse katamandar yivayse eenna yi giyna: <sup>29</sup> “Inin hayon wulam ina giyaa eam nivayse shedee! Way kidi Barjoyn qadhaa Kiristoos doo ki dew?” ko hamade. <sup>30</sup> Eenoar katamara utayse Yesuskal nivite ko dahade.

<sup>31</sup> Ogo wodanka Yesussa paanan yivayna “Woam Dhettsea, gala wokal itsaa” hamayse kiam ke miskade. <sup>32</sup> Kidiar kena yinin giyenka, “Yenin dhesima gala inin itsea isa daane” kena ki hamade. <sup>33</sup> Ogonante kisa paanan yivayna eena “Eedi kina gala bavidi doo ko dew?” hamayse kinka kikal ke dhalqade.

<sup>34</sup> Yesusaar kena yi giyna: “Isa galano iam nittsaasa bhocchinam inin hayoadettsibee kisa waadimanam inin thoosoadettsibene. <sup>35</sup> Yedi ‘Akar arpi oydi ko shidhade; ogosa budonte isin patadhea rooroa kida nive’ yesa hamintatayu? Marrato! Inta yena ida giye: Isinin wocchonam, patadhen wodanin yeskonam dhev hamayse shedee. <sup>36</sup> Isinin patea yinin patonsa bazanam kida tiye; rooro wul lay sadanka dehen aapinamaar kida pucche. Ogonante yiitheabaa pateabe kinka keda wozadhe. <sup>37</sup> Ogona ‘Kalaa bheeta kida yiithe; waar pata ki pate’ hamayse giidhoono kamsino gonne. <sup>38</sup> Intaar qajadhayse

yenin waadadhaamonam yenin patoadeettsi yeam i yittsade. Waani eena ke qajadhade; yedi kenin qajadhonsa aapinam ye buurade” kena ki hamade.

<sup>39</sup> Edonoar “Inin hayon wulam ina ki giyade” hamayse konin tarjon goynka kataman ogora thoothino Sammaria eeno Yesusdar woylamin ko qajade. <sup>40</sup> Ogonante Sammaria eena Yesuskal yinin nivon wodanka, kekal kinin dooqoadettsi kiam ke miskade; kidiar rooro lamaa kekal ki dooqade.

<sup>41</sup> Birana eenadara kattsi thoothino eeno kisa dhalqinka kidar woylamin ko qajade. <sup>42</sup> Kedi edonna yi giyna: “Keeda kidar woylamin wonin qajayno hanin wona giyonna bish dayma, wodi wonti kinin giyenam wonin qansonnabee kidi gon peendar dahayna eenaam Dhacchea kinin maatonam wonin dhesonnabene” kona ke hamade.

### *Peen Wottseasa Naasaam Yesusin Pacchoono*

<sup>43</sup> Yesus raqin ogote rooro lamaa yinin dooqonsa budonte, Galila peendar ki yivade. <sup>44</sup> Barjokala qansayse eenna giyea peen yinnonte kinin gobshadhiminam Yesus ena yinti giydine. <sup>45</sup> Galila peendar kinin nivon wodanka, Galila eena kiam wozaka ke tiyade. Harrna hambhidianna, Paasikansa\* bavaala rooroaka kediar yivayse Yerusaalemir kinin hayon wulam kenin haaponnane.

<sup>46</sup> Yesus ena noqonam woynin birzindar kinin maason Galila peensa Qaana katanmandar pir ki nivade. Qipirnaahoom gidir naasa yisa hajadhaa peen wottsea bitaasa choobar hayo kalaa ki dahade. <sup>47</sup> Kediar Yesus Yiwda peera Galila kinin nivonam yinin qanson wodanka, naasa hajadhayse diyota kinin hayonna, nivayse kinin pacchoadettsi Yesuskal yivayse kiam ki miskade. <sup>48</sup> Ogonante Yesus kina yi giyna: “Yedi tarsheabee yer haalibeam ye haapaamma, hamin ko dahaakaar idar woylamin qajattene” kina ki hamade. <sup>49</sup> Wottsear “Imbo, isa naasa diyma bannzo! Saana ikal nivaa” kina ki hamade. <sup>50</sup> Yesusaar “Hasa naasa paashidine; oonindar hasa yivaa” kina ki hamade.

Ear Yesusin giyonam gonne hamayse yisa oonindar ki yivade. <sup>51</sup> Kinin yivenkaar kisa waadiman eena goynte kidar keerayse, “Hasa naasa paashidine” hamayse kina ke giyade. <sup>52</sup> Kediar “Naasayn paashoono savaat meemaykane?” hamayse keam ki oysade. Kediar “Naa savaat tobbhaaka bishin occhayno kiam ko garaysaka ki paashade” kina ke hamade. <sup>53</sup> Naasasa imbaar Yesus “Hasa naasa paashidine” kina kinin hamoono savaatin ogoka konin dohonam dhesayse, kidi yisa oonin eena wulbesana Yesusdar woylamin ke qajade.

<sup>54</sup> Kono tarshayno yerro Yesus Yiwda peera Galila peendar maataate nivayse kinin hayonsa lansonone.

## 5

### *Yesus Thoothi Leve Hajadhaa Eam Kinin Pacchoono*

<sup>1</sup> Ogosa budonte Ayiwd eensa bavaal rooro konin dohonna, Yesus Yerusaalemir ki yivade. <sup>2</sup> Yerusaalemir yaana kerinsa gasante Ibra aponka Beetesayda\* hambhayno eenin shiidhimbhea dalba ko dahade; ogo dalbansa gasante baara kaadhaa eedin yaayea goyi dong ko dahade. <sup>3-4</sup> Ogotear [noqonsa shoanam kaalada] hajadhaanabee, aapin kayaanabee, wobonabee, bishiya malgimaanabe thoothina eena iir keda wodhe. [Waani waani rorronaka Barjo gaananasa kalaa nivayse noqonam kida shooche; noqonin shohonsa budonte birayse noqonte ardaa ea yidar dohon burqora paasha ki paashe.]

<sup>5</sup> Ogotear eedi kalaa kaysa apo tabhi lankay levenka yekka hajadhaa eedi kala ki dahade. <sup>6</sup> Yesus ea agaa raatayse ki daaka kiam haapayse, kinaka yekka thoothi leve hajadhayse kinin dohonam dhesayse, “Paashana zaga zago?” hamayse kiam ki oysade.

\* <sup>4:45</sup> “Paasika” hamen upsinam Haalin Mallan mathaapinsa macchinte thaapadhaanar shedaa. \* <sup>5:2</sup> “Beetesayda” hamenam mathaapin waani waanir “Beetezaata” koda hame. Bulino kosa “seesosa garinto ooni” hamintane.

<sup>7</sup> Hajadhaa ear “Imbo, noqon shohanna noqonsa iinte tiyate iam arsea eedi qolehe; ko dahaannaar inta noqonte ardota inin hayenka, eeno waani iam birayse koda arde” hamayse kina ki maasade. <sup>8</sup> Yesusaar “Dhaabhayse haam baadhon haaqanam bavate yivaa!” kina ki hamade. <sup>9</sup> Ear saanawa paashayse, kiam baadhon haaqanam yinka bavate ki yivade.

Agaa rooroar Ayiwd eensa ukunsen rooroane. <sup>10</sup> Ogonante Ayiwd eenam entsayna hajimora paashaa eana “Kina roorono ukunse rooro konin dohonna, haam haaqa bava zaskehe” kina ke hamade. <sup>11</sup> Kidi “Iam pacchaa ea ‘Haam baadhon haaqanam hanka bavayse yivaa’ ina kinin hamonnane” kena ki hamade. <sup>12</sup> Kediar “ ‘Haaqanam bavayse hanka yivaa’ hana hamaa hayne?” hamayse kiam ke oysade.

<sup>13</sup> Ko dahaannaar ogo raqinte thoothi eedi dahade; ogona Yesus eensa shaarinte kinin ardonna, kiam pacchaa ea hay kinin dohonam kidi dhesadehe.

<sup>14</sup> Ogosa budonte Yesus eam Barjosa gazan ooninsa mayante kiam haapayse, “Shedaa! Ya paashidine; kora sagi yer hadar yeskoamadettsi keeda kaara os seeso hayaabhode!” kina ki hamade. <sup>15</sup> Ear yivayse kiam pacchaa Yesus kinin dohonam Ayiwd eenam entsaynana ki giyade.

<sup>16</sup> Ogonante ukunsen rooroaka yerra iginaam kinin hayonna, Ayiwd eenam entsayna Yesusam oytan ke yedade. <sup>17</sup> Yesusaar “Ta koka yekka Imba waadadhite ki dahade; intaar waadadhite i dahade” hamayse kena ki maasade. <sup>18</sup> Ogonoor ukunsen rooroam kinin gobshaamonna bish dayma, Barjoam “Kidi Imbane” hamayse yiam Barjoka kinin yeekinsonna, Ayiwd eenam entsayna ena hamora sagi deesana kiam ke zagade.

### *Barjo Naasasa Hayamono*

<sup>19</sup> Ogonante Yesus kena yin ki giyade: “Inta yena gon ida giye: Imbaanin waadadhene ka yinin haaponam bish Naasa kida waadadhe; kidi yisa hayamoka waadadhana kinin damea yer kala hattear qolehe. Imbaa kinin waadadhen wulam Naasa pir agaadettsi kida waadadhe. <sup>20</sup> Harrna hambhidianna, Imbaa yisa Naasaam kinin nashenna, yinin waadadhen wulam kina kida dhee. Yediar yenin targadhoodettsi ogora sagi waadima kina kida dhee. <sup>21</sup> Imbaa diyaanaam kinin dhaasenbee sadanka daadhenam kena kinin imendettsibe, Naasa yinin kamaana eena wulna sadanka daadhenam kena kida ime. <sup>22-23</sup> Imbaa eedi kalaadar pirdehe; eeno wul Imbaam konin gobshendettsi Naasaamaar konin gobshoedettsi pirdin wulam Naasana ki imade. Naasaam gobshima kiam nittsaa Imbaamaar gobshehe.

<sup>24</sup> “Inta yena gon ida giye: Isa upsinam qansayse iam nittsaadar woylamin qajea rooro wul lay dehea sada kisa daane. Dembhira sadaka daadhendar ki sagade; kidar pirdadhehe. <sup>25</sup> Inta yena gon ida giye: Diyaana eena Barjo Naasasa upsinam kenin qansea woda koda nive; ogonoar taakine. Qansayna wul sadaka keda dee. <sup>26</sup> Imbaa sadanka daadhenam imea kinin dohondettsi, yin tapir Naasa sadanka daadhenam imea kinin doadettsi kiam haydine. <sup>27</sup> Pir Eedi Naas kinin dohonna, kinin pirooadettsi Imbaa hayamo kina imidine. <sup>28-29</sup> Ogona targadheebhode; duukinte dahaana wul Naasasa upsinam qansayse duukira kenin dhaabhayno woda niva ko nive. Payyan waadadhanaa dembhira dhaabhayse sadaka keda dee; siyon waadadhanaa eena dembhira kinin dhaabhonsa budonte kedar pirda ko pirdadhe” kena ki hamade.

### *Yesusna Tarjaana Eena*

<sup>30</sup> “Inta isa hayamoka yer kalaar hayana damattine; ko dahaannaar Imbaakalanka inin qansonam ida pirde. Iam nittsaasa bhocchinamne, isa bhocchinam hayana inin zagiminna, isa pirdino tipane. <sup>31</sup> Inta meten innonna i tarjina, isa tarjamono gonteho. <sup>32</sup> Ina tarjea eedi kala daane; kidiar ina kinin tarjayno tarjamono gon konin dohonam dhesayda dhese. <sup>33</sup> Yedi eenaam Wanniskal ye yittsade; kidiar goninna

tarjidine. <sup>34</sup> Ogoam inin yena giyayno yenin dhaqoadettsine; eedikalanka tarjamo iam zaskonnatehe. <sup>35</sup> Wannisar kattsi shaakea nuudettsi ki dahade; yediar likka wodana kisa shaakanka wozadhana ye nashade.

<sup>36</sup> “Wannis ina kinin tarjorra sagi tarja isa daane; isa tarjamonoar Imba inin waadahoadettsi ina kinin imoono waadimanone. Ogono inin waadadhayno waadimano Imba iam kinin nittsondettsi innon goynsa koda tarje. <sup>37</sup> Iam nittsaa Imbaar ina tarjidine. Yediar kisa upsinam qanseetene; kiamaar haapeetene. <sup>38</sup> Kinin nittsaadar woylamin yenin qajaamonna, kisa upsinoar yekal qolehe. <sup>39</sup> Yedi Mathaap Gazante rooro wul lay sadanam yenin haapea yena konin maatenna, yedi Mathaapinam payya hayayse marmaraate yeda nabbabe; ogono Mathaapinoar ina tarjaynone. <sup>40</sup> Ko dahaannaar ogo sadanam haapania ikal nivana zagattene.

<sup>41</sup> “Inta eedikalanka gobshinam zagattine. <sup>42</sup> Ko dahaannaar inta yeam dhesidine; Barjosa nashimmakkonin yekal qolmonam dhesayda dhese. <sup>43</sup> Inta Imbasaya hayamonka i nivade; yedi iam tiyeetene. Eedi ab yisa hayamonka ki nivina, kiam tiyeeda tiye. <sup>44</sup> Yedi kinka kikalanka gobshin zagayna, kalaa Barjokalanka haapadhen gobshinam zagimina eena, haminee idar woylamin qajana dame? <sup>45</sup> Inta Imbasaya birante yeam inin bersea yena ko maatabhoode. Yeam bersea daane; agaar yenin kidar qaabe hayea Musene. <sup>46</sup> Muse innon goynsa kinin thaaponna, kinin thaaponam gonne hamayse tiydi ye hanna, idar woylamin ini qajeeda qaje. <sup>47</sup> Kinin thaaponam gonne hamayse ye tiyaamma, isa upsinam gonne hamayse haminee tiye?” kena ki hamade.

## 6

### *Yesus Shii Dong Eenaam Kinin Kunsoono Maat 14:13-21; Marq 6:30-44; Luq 9:10-17*

<sup>1</sup> Ogosa budonte Yesus Thibiriyadoos hambhen Galila bazinsa saabar ki sagade. <sup>2</sup> Thoothino eenoar Yesus hajadhaanaam pacchaate kinin waadadhon tarshen yerinam konin haaponna, Yesusbesana ko yivade. <sup>3</sup> Ogo wodanka Yesus dhukandar utayse yisa paanan yivayna eenabesana kinka ki dooqade. <sup>4</sup> Ayiwd eensa Paasikan\* bavallo ko yeskade.

<sup>5</sup> Ogo wodanka Yesus dheg hamayse thoothino eno yikal konin nivenka koam shedayse Pilbhoosna yi giyna: “Ko eenin itsoadettsi gala hamoroo shano?” kina ki hamade. <sup>6</sup> Yesus yin kinin giyoona Pilbhoossa bhochinam dhesannane; yinin hayenam birayse dhesa ki dhese.

<sup>7</sup> Pilbhoosaar kina yinin maasenka, “Wulna likka likka kashate kena yeskisana mato lamaa birreka<sup>†</sup> shandhea gala hattear yeekehe” hamayse kina ki maasade.

<sup>8</sup> Yesussa paanan yivaynasa kalaa, Simum Bhethiroossa indanaasa Indirias yi giyna: <sup>9</sup> “Mattsu balasha dongbee kaara lamaabe yedaa naasi kalaa kote daane; ko dahaannaar igin galana koaddhan eenna hamin ke yeeke?” kina ki hamade. <sup>10</sup> Yesusaar yisa paanan yivaynaka “Eenam dottsee” kena ki hamade. Ogo raqintear thoothi shudhin dohonna, eno daran ko dooqade. Anngina gembhasa paydino shii dongaddhane.

<sup>11</sup> Yesus balashanam tiyayse Barjoam miskeka gobshayse dooqon eenna kenin imoadettsi ki hayade; kaaranamaar agaadettsi yin ki hayade. Eno wul yina zaskaadettsi ko itsade.

<sup>12</sup> Itsayse kinin mishonsa budonte, Yesus yisa paanan yivaynana “Dirma kalaar shidhoamadettsi wulam pucchee” kena ki hamade. <sup>13</sup> Ogonante mattsin balashan dongra een itsaysaka shidhoono dirmano ke pucchaysaka, sharqa tabhi lamaa ko thoothade.

\* <sup>6:4</sup> “Paasika” hamen upsinam Haalin Mallan mathaapinsa macchinte thaapadhaanar shedaa. † <sup>6:7</sup> Wodan ogoka eedi kalaana rooro kalaa waadimana kashadhadayno birre kalaane.

<sup>14</sup> Eenoar Yesusin hayon tarshen yerinam yinin haapon wodanka, “Kaa gon ‘Peen kodar niva ki nive’ hambhea Barjokala qansayse eenna giyeane” ko hamade. <sup>15</sup> Ogona Yesus eeno kantaka yedayse bitinsana kiam konin zagonam dhesayse, pir yimal dhukandar yivayse ki dooqade.

*Yesus Bazindar Rooka Tigate Kinin Nivoono  
Maat 14:22-27; Marq 6:45-52*

<sup>16</sup> Peenin sootenka Yesussa paanan yivayna bazinsa apondar ke yivade. <sup>17</sup> Bazindara sagadhen gonngalantear ardayse bazinsa saabar dohon Qipirnaahoomdar yivite ke dahade. Ogo wodanka peeno thipane; Yesusaar akar kekal nivadehe. <sup>18</sup> Wura kanta jibarshonna, bazino shoan ko yedade. <sup>19</sup> Yesussa paanan yivayna bazindar sagadhen gonngalanka bazinsa shaarinte kenin yeskonsa budonte‡, Yesus bazindar rooka tigate nivite kenin dohon gonngalansa gasante kinin theedenka kiam haapayse ke kurtumbhade. <sup>20</sup> Kidiar “Intane, kurtumbheebhode!” kena ki hamade. <sup>21</sup> Ogonante kediар yikal gonngalante kiam arsana ke nashade; saana gonngalano kenin yiven raqindar ko yeskade.

*Yesus Sadanam Imea Balasha Kinin Dohoono*

<sup>22</sup> Kina hamon bazinsa saabar dahaana eena naa bazindar gonngala kalaa bish konin dohonam ke haapade. Yesussa paanan yivaynaar yimal bish kenin yivonbee Yesus kembesana kinka bazindara sagadhen gonngalante kinin ardaamonbeam ke dhesade. <sup>23</sup> Ko dahaannaar waani bazindara sagadhayna gonngalana Thibiriyyadoos katamara utayse Yesus Barjoam gobshayse eenam balashan kinin kunson raqinte ke nivade. <sup>24</sup> Eeno Yesusbbee kisa paanan yivayna eenabe raqin ogote kenin qolmonam yinin haapon wodanka, igin a bazindara sagadhayna gonngalaran ardayse Yesusam zagate Qipirnaahoomdar ke yivade.

<sup>25</sup> Bazinsa saabar kiam yinin haapenka, “Woam Dhettsea, kote haa nivaa?” kina ke hamade. <sup>26</sup> Yesusaar kena yin ki giyade: “Inta yena gon ida giye: Iam yenin zagayno balashanam yelin itsonnabee yelin mishonnabene; tarshen yerinam yelin haaponnatehe. <sup>27</sup> Ko dahaannaar, inta Eedi Naas yena inin imen, rooro wul lay dehen sadanna maaten galanna waadadhee; kayen galanna waadadheebhode. Barjo Imba iam yinin nittsonam dhaydine” kena ki hamade.

<sup>28</sup> Ta keeda “Barjosa waadimanam waadadhana yer haroo waadadho?” hamayse kiam ke oysade. <sup>29</sup> Yesusaar “Barjosa waadimano yinne: Kinin yittsaadar woylamin ye qajene” hamayse kena ki maasade. <sup>30</sup> Kediар kina yin ke giyade: “Ta keeda koam shadayse hadar woylamin wonin qajoadettsi tarshea yer haraa wona waadadhe? Haraa wona haye? <sup>31</sup> ‘Kinin itsoadettsi cecira balasha kena ki imade’ hamayse thaapadhoneettsi ena wosa imbana darante manna hambhen galanam ke itsade” kina ke hamade. <sup>32</sup> Yesus “Inta yena gon ida giye: Gonin balashanam cecira yena imea Imbane; cecira balashanam yena imaa Musetehe. <sup>33</sup> Barjoyn imea balasha cecira hanchaa, peendar dohon eenna sadan imeane” kena ki hamade. <sup>34</sup> Ogonante “Imbo, balashan ogoam rooro wul wona imaa” kina ke hamade.

<sup>35</sup> Yesusaar kena yin ki giyade: “Sadan imea balashaa intane; ikal nivea hamin ko dahaakaar daaqardhehe; pir idar woylamin qajeaa hamin ko dahaakaar dheebardehe. <sup>36</sup> Ko dahaannaar yena inin giyaadettsi, yedi iam shadaysear idar woylamin qajeetene. <sup>37</sup> Imba ina kinin imoono wul ikal koda nive; ikal nivear hamin ko dahaakaar kiam mayanka bulattine. <sup>38</sup> Inta cecira inin nivoono iam nittsaasa bhocchinam hayanane; isa bhocchinam hayana nivaatine. <sup>39</sup> Iam nittsaasa bhocchinoar ina kinin imaana eenasa kala hattear inin kaysoamadettsibee macchin rooroakaar keam dembhira inin

‡ <sup>6:19</sup> “Bazinsa shaarinte kenin yeskonsa budonte” Girik aponka “kilometir dongaddha kenin yivonsa budonte” koda hame. <sup>6:31</sup> Maz 78:24; 105:40. <sup>6:31</sup> Ut 16:15bee 31be.

dhaasoadettsibene. <sup>40</sup> Imbasaa bhocchino Naasaam shedayse kidar woylamin qajeaa rooro wul lay dehen sadanam kinin haapoadettsine; intaar macchin rooroaka kiam dembhira dhaasayda dhaase” kena ki hamade.

<sup>41</sup> Ogonante Yesus “Cecira hanchaa balasha intane” kinin hamon goynka Ayiwd eena kidar gundumite <sup>42</sup> yin ke guyade: “Agaa Yoseep naasa Yesustayu? Imbaabee indanbe wonin dhesaynatayu? Ta keeda ‘Cecira i nivade’ hamayse hamin ki yin giyaa?” ke hamade.

<sup>43</sup> Yesusaar kena yi giyna: “Kinka kikal gundumeebhode. <sup>44</sup> Iam nittsaa Imba yiam eelaamma ikal nivana damea solehe; intaar macchin rooroaka kiam dembhira dhaasayda dhaase. <sup>45</sup> Kedi wul Barjokalanka dhesaana keda maate’ hamayse Barjokala qansayse eenna giyaynasa mathapinte thaapadhidine; ta keeda Imbakalanka qansayse dhesaana wul ikal keda nive. <sup>46</sup> Yin giyntano Imbaam haapaa eedi daane hamintatehe; Imbaam haapaa Barjokalanka nivaa kidi bishne. <sup>47</sup> Inta yena gon ida giye: Idar woylamin qajeasa rooro wul lay dehea sada kisa daane. <sup>48</sup> Sadan imea balasha intane. <sup>49</sup> Yesa imbanan darante mannan hambhen galanam ke itsade; ko dahaannaar kedi diydine. <sup>50</sup> Cecira taaki hanchaa balashaa kaane; agaa balashaam itsaa ea rooro wul dembhi diyehe. <sup>51</sup> Cecira hanchaa sadan imea balashaa intane; agaa balashaam itsea rooro wul lay dehen sadanka kida dee. Peendar dohon eenna sada konin maatoadettsi inin imayno balashano isa waanone” kena ki hamade.

<sup>52</sup> Ogona Ayiwd eena “Kaa ea kisa waanam wonin itsoadettsi hamin ki wona imana dame?” hamayse kinka palimite ke dahade. <sup>53</sup> Ogonante Yesus kena yin ki guyade: “Inta yena gon ida giye: Eedi Naasisa waanam ye itsaamma, kisa zombhinamaar ye wucaamma, sada yesa solehe. <sup>54</sup> Isa waanam itseabee isa zombhinam wuceabesa rooro wul lay dehea sada kisa daane; intaar macchin rooroaka kiam dembhira dhaasayda dhaase. <sup>55</sup> Isa waano gon hama galane; isa zombhinoar gon hama wucadheane. <sup>56</sup> Isa waanam itseabee isa zombhinam wuceabe inka kida dee; intaar kanka ida dee. <sup>57</sup> Sadan imea Imba iam kinin nittsondettsibee inta kinnon goynka sadaka inin dohondettsibe, isa waanam itsea pir innon goynka sadaka kida dee. <sup>58</sup> Ta keeda cecira hanchaa balasha kaane. Ena wosa imbanan darante mannan hambhen galanam itsayse kenin diyondettsitehe; balashan koam itsea rooro wul lay dehen sadanka kida dee” kena ki hamade.

<sup>59</sup> Yesus ogoam kinin giyoono Qipirnaahoom Ayiwd eensa bukin raqinte eenam yinin dhettsenkane.

### *Rooro Wul Lay Dehen Sadansa Upsino*

<sup>60</sup> Yesussa paanan yivayna eenasa thoothina eena kinin giyenam yinin qansenka, “Dhalqa kaa kattsi dethane; hayne tiyana damea?” ke hamade. <sup>61</sup> Yesusaar yisa paanan yivayna dhalqin ogoka kinin gundumonam yisa woylaminka dhesayse, “Dhalqa kaa yena goa maatidu? <sup>62</sup> Ta keeda Eedi Naas birayse yinin dohondar maataate tura kinin yivenam ye haapidianna, yedi haminee giye? <sup>63</sup> Sadan imayno Manpas Gazanone; eedisa kanta yer harrnaar pootehe. Inin yena giyoono upsino sadan imen Manpasinam bavaynone. <sup>64</sup> Ko dahaannaar yesa iira inin giyenam gonne hamayse tiymina daane” kena ki hamade. Yesus ogoam kinin giyoono gonne hamayse tiymina haybe kenin dohonbee yettsate imea hay kinin dohonbeam birara yedayse yinin dhesonnane.

<sup>65</sup> Yesus tapir “‘Barjo Imba ikal ki nive ki hayaamma, ikal hayyear nivana damehe’ hamayse inin yena giyoono ogonane” kena ki hamade.

<sup>66</sup> Ogo wodanka kisa paanan yivayna eensa shaarira thoothina eena budoka ke maatade; ogora yedayse kimbesana kinka yivanam ke garade. <sup>67</sup> Yesusaar tabhi lamaana yisa paanan yivaynana “Yediar ta ikala yivana zagee zago?” kena ki hamade.

<sup>68</sup> Simumon Bhethiroos yi giyna: “Imbo, wodi haydaroo yivo? Rooro wul lay dehen sadan

imea upsi hakal daane. <sup>69</sup> Barjoyn qaadhaa Gazaa Ea hanin maatonam gonne hamayse wodi tiydine; dhesidine” hamayse kina ki maasade.

<sup>70</sup> Yesusaar “Ye tabhi lamaanaam kamaa intatayu? Yesa iira kalaa Seethaanne” kena ki hamade. <sup>71</sup> Ogoam kinin giyoonoar Asqoronto peen ea Simoon naasa Yiwdasane; kidi tabhi lamaanasa kalaa dahayse os birante Yesusam yettsate kinin imennane.

## 7

### *Yesus Bavaalindar Kinin Yivoadettsi Kiam Oysadhoono*

<sup>1</sup> Ogosa budonte Yesus Yiwda peente yaayana yinin nashaamonna, Galila peente kida yaaye. Harrna hambhidianna, Ayiwd eenam entsayna kiam deesana kenin zagenne.

<sup>2</sup> Ayiwd eensaarbaarante dooqayse gobshadhyano bavallo ko yeskade. <sup>3</sup> Ogonante Yesussa indanaana kina yi giyna: “Hambesana yivayna thoothina eena hanin waadahen tarshen waadimanam kenin shedoadettsi kora dhaabhayse Yiwda peendar yivaa.

<sup>4</sup> Harrna hambhidianna, eenkal dhesadhana zagea waadiman yinnonam aachika waadadhehe; yaar iginaam hanin waadadhenna, peendar dohon eenna haam dhahaa” kina ke hamade. <sup>5</sup> Kisa indanaana ogoam kenin giyoono kedi yina kidar woylamin kenin qajaamonnane.

<sup>6</sup> Yesus “Isa wodano akar yeskadehe; yena wodano wul agoonone. <sup>7</sup> Peendar dohon eeno yeam jibbana damehe; iam jibba ko jibbe. Harrna hambhidianna, inta eensa waadimano siya konin dohonam kodar inin tarjennane. <sup>8</sup> Yedi ogo bavaalindar yivee; isa wodano akar konin yeskaamonna, inta [akar] bavaalindar yivattine” kena ki hamade. <sup>9</sup> Ogoam kena yin giyayse Galila peente ki shidhade.

<sup>10</sup> Kisa indanaana bavaalindar kenin yivonsa budonte, Yesus may dayma aadhimeka ogo bavaalindar ki yivade. <sup>11</sup> Ayiwd eenam entsaynaar “Kidi hamote ki dahaa?” hamayse bavaalin gobshota nivon eensa shaarinte zagite ke dahade. <sup>12</sup> Zarsinsa shaarinte kinnon goynsa thoothi gundume ko dahade. Waani eenaar “Kidi eedi payyane” kenin hamenka, waani eena “Aavav, kidi eenam kida dhaddhise” hante ke dahade. <sup>13</sup> Ko dhaaannaar eeno Ayiwd eenam entsaynana yinin kurtumbhonna, hayyear kisa may giyehe.

### *Yesus Bavaalin Raqinte Kinin Haapadhoono*

<sup>14</sup> Taarbaarante dooqayse bavaalin gobshadhyyna rooronasa gidi lamante Yesus Barjosa gazan ooninsa mayante yivayse eenam dhettsan ki yedade. <sup>15</sup> Ayiwd eenam entsaynaar “Ea kaa yiggin timmirinam timmirima ko wulam hamin ki dhesana damaa?” hamayse targadhite ke dahade. <sup>16</sup> Ogonante Yesus “Isa timmirino iam nittsaakalankane; ikalankatehe. <sup>17</sup> Iam nittsaakalankane; ikalankatehe. <sup>18</sup> Yikalanka giyea yisa metensa gobshinam kida zage. Yiam nittsaasa gobshinam zagea ea kidi gonin eane; buuda kikal solehe. <sup>19</sup> Muse yigginam yena imittayu? Ko dhaaannaar yesa shaarira yigginam toolea eedi kala hattear solehe. Ta deesana iam harrnee zaga?” kena ki hamade.

<sup>20</sup> Eenoar kina yinin maasenka, “Beero hadar dahade! Hayne haam deesana zagea?” ke hamade. <sup>21</sup> Yesusaar kena yi giyna: “Inta yer kalaa i waadadhade; yedi wul yerin ogoam shedayse yeda targadhite. <sup>22</sup> Muse qaaman taxadhensa gilonam yena ki imade; ogono gilono konin nivoono wosa imbanakalankane, Musekalankatehe. Yedi ukunsen rooroakaar eensa qaamanam yeda taxe. <sup>23</sup> Ta keeda Musesa yiggino konin shidhoamadettsi eensa qaamanam ukunsen rooroaka taxadhidianna, inta ukunsen rooroaka eensa bishin wulam inin pacchonna, iam wacimee wacimo? <sup>24</sup> Pirdinam tipamoka pirdee; eedisa woti shedayse pirdeebhode” kena ki hamade.

### *Barjoyn Qadhaa Kiristoos Goynsa Dhaabhoono Palimeno*

<sup>25</sup> Keeda Yerusaalem eensa shaarira waani waani eena “Hayonayn deesanna zagea ea kaatayu? <sup>26</sup> Marrato! Kidi yisa dhalqinam may hayayse kida giye; kediар kikal yer kala hattear giyehe. Way ea kaa Barjoyn qadhaa Kiristoos kinin dohonam hayona gon kiam kedi dhesidu? <sup>27</sup> Ko dahaannaar ea kaa hamora kinin nivonam dhesooda dhese; Barjoyn qadhaa Kiristoosin nivenka, hamora kinin nivonam hayyear kiam dhesehe” ke hamade. <sup>28</sup> Ogonante Yesus Barjosa gazan ooninsa mayante eenam yinin dhettsenka upsi gebhika “Iam dheseeda dhese; hamora inin nivonam dheseeda dhese. Isa bhocchika nivaatine. Iam nittsaa gon hamaane. Ko dahaannaar yedi kiam dhesattene. <sup>29</sup> Inta kiam dhesayda dhese. Harrna hambhidianna, iam ki nittsaysaka kikalanka i nivade” hamayse ki guyade.

<sup>30</sup> Ogonante hayona kiam yedana ke zagade; ko dahaannaar kisa wodano akar yeskaamonna, hayyear kiam yedadehe. <sup>31</sup> Eensa iira thoothino eeno kidar woylamin ko qajade. “Barjoyn qadhaa Kiristoos yinin nivon wodanka, ea kaanin waadadhaana tarshayna yerradara sagi waadadhok?” hamayse ke guyade.

### *Yesusam Kenin Yedoadeettsi Poolisanaam Kidar Yittsadhoono*

<sup>32</sup> Thoothino eeno kinnon goynka konin gundumenka Parisa eena ke qansade; ogonante gudullasa hayonabee Parisa eenabe Yesusam kenin yedoadeettsi yisa poolisanaam ke yittsade. <sup>33</sup> Ogo wodanka Yesus “Likka wodana yembesana kinka ida dee; ogosa budonte iam nittsaadar ida yive. <sup>34</sup> Iam zageeda zage, iam haapattene; inin dohon raqinte yedi nivana damattene” kena ki hamade. <sup>35</sup> Ogonante Ayiwd eensa entsana yin ke guyade: “Wonin kiam haapoamadettsi ea kaa hamodar yivana ki haye? Way Ayiwdtay hamon eensa shaarinte wanthimayse dahaana Ayiwd eenakal yivayse Ayiwdtay hamon eenam dhettsana ki hayo? <sup>36</sup> Kidiar ‘Iam zageeda zage, haapattene; inin dohon raqinte nivana damattene’ hamayse kinin giyoono upsino kisa hamin giyntane?” hamayse kinka kikal ke dhalqade.

### *Sadan Imayno Noqono*

<sup>37</sup> Bavaalinsa macchea rooroa gebhaaka Yesus woyayse, “Hayyear dheebardhaa dahaa yi hanna, ikal nivayse ki wuce. <sup>38</sup> Idar woylamin qajea Mathaap Gazanin giyendettsi sadan imayno noqono kisa iira koda ele” hamayse upsi gebhika ki guyade. <sup>39</sup> Ogoam kinin giyoonoar kidar woylamin qajayna kenin tiyen Manpas Gazan goynsane. Yesus akar kinin gobshaamonna, Manpas Gazano akar eendar hanchadehe.

### *Eensa Shaarinte Edime Dhaabhoono*

<sup>40</sup> Ogonante eensa iira waani eeno dhalqin ogoam yinin qansen wodanka, “Kaa gon ‘niva ki nive’ hambhea Barjokala qansayse eenna giyeane” ke hamade. <sup>41</sup> Waani eeno “Kaa Barjoyn qadhaa Kiristoosne” ke hamade. Waani eeno tapir “Gon Barjoyn qadhaa Kiristoos Galila peera niva ki nivo? <sup>42</sup> Barjoyn qadhaa Kiristoos Dawtsa muldhara kinin adhadhendettsibee Dawtin adhadhon kataman Betelemla kinin nivendettsibe Mathaap Gazante thaapadhittayu?” ke hamade. <sup>43</sup> Ogonante kinnon goynka eensa shaarinte edime ko dhaabhade. <sup>44</sup> Kesa shaarira waani waani eeno yedana kiam ke zagade; ko dahaannaar hayyear kiam yedadehe.

### *Ayiwd Eenam Entsayna Yesusdar Woylamin Kenin Qajaammo*

<sup>45</sup> Gudullasa hayonabee Parisa eenabekal poolisana maataate ke nivade. Gudullasa hayonabee Parisa eenabe “Yedi kiam harrnee bavima garaa?” kena ke hamade. <sup>46</sup> Poolisanaar “Ea agaanin giyendettsi eedi hayyear giyayse dhesehe” hamayse kena ke maasade. <sup>47</sup> Parisa eena, “Yedi keeda taysee taysadhaaw? <sup>48</sup> Hayona eenasa way Parisa eensa shaarira kidar woylamin qajaa daaw? <sup>49</sup> Ko dahaannaar Musesa yigginam dhesimino eeno ogono ashadhoonone” hamayse kena ke maasade.

<sup>50</sup> Parisa eenasa kalaa kosa birayse Yesuskal nivaa Niqodimos yi giyna: <sup>51</sup> “Wonnon yigginka eedi kalaa birayse kinin giyenam qansimabee har kinin waadadhonam dhesimabe kidar pirda ko pirdadho?” kena ki hamade. <sup>52</sup> Kediar kina yi giyna: “Yaa Galila peeraw? Barjokala qansayse eenna giye Galila peera kinin dhaabhiminam marmarayse dhesaa!” kina ke hamade. <sup>53</sup> [Ogora kedi wul yisa onnadar ke yivade.

## 8

### *Sharmucimakkon Ko Hayaka Yedadhoono Edono*

<sup>1</sup> Yesus raqin ogora dhaabhaye, Dabirezayt dhukandar ki yivade. <sup>2</sup> Burin sedhiman Barjosa gazan ooninsa mayante maataate ki nivade; eeno wulaar kikal ko nivade; kidiar dooqayse keam dhettsite ki dahade. <sup>3</sup> Musesa yigginam dhettsaynabee Parisa eenabe sharmucimakkoka yedadhon edonam kikal bavate nivayse eensa shaarinte koam woysayse, <sup>4</sup> “Dhettsea, edon koam sharmucimakko ko hayaka ko yedadhade. <sup>5</sup> Muse ogodettsi sharmucimakkon hayen edonam seenika paxate wonin deesoadeettsi yigginte wona giydine; ya ta kosa haminaa giye?” kina ke hamade. <sup>6</sup> Ogora kenin giyoono kiam bersana goyti haapana zagayse kiam taysayse ke shedade. Yesusaar yirk hamayse yisa aaninka peendar ki thaapade.

<sup>7</sup> Maasayse maasayse kiam kenin oysenka, tura dheg hamayse, “Yesa shaarira seesoysa qolmaa birayse koam seenika ki paxe” kena ki hamade. <sup>8</sup> Tapir yirk hamayse peendar ki thaapade.

<sup>9</sup> Kediar dhalqin ogoam yinin qansen wodanka, donzanara yedayse agaa raqara kalaa kalaa yivate ke maqade; Yesusbbee edonbe bish ke shidhade. <sup>10</sup> Ogosa budonte Yesus tura dheg hamayse, “Ya edono, haam bersayna eena hamote ke dahaa? Hadar pirdea eedi qolaaw?” kona ki hamade. <sup>11</sup> Kodiar “Imbo, eedi kala hattear qolehe” kina ko hamade. Yesusaar “Intaar hadar pirdattine. Yivaa; keeda kaara os seeso hayaabhode” kona ki hamade.]

### *Peen Kodar Dohon Eensa Shaakaa Yesus Kinin Maatoono*

<sup>12</sup> Tapir Yesus eenna yi giyna: “Peen kodar dohon eensa shaakaa intane. Isa paanan nivea eana sadansa shaakano kina shaaka ko shaake; thipante yaayehe” hamayse kena ki giyade.

<sup>13</sup> Parisa eenaar “Ya hannon metenna hada tarje; hasa tarjamonam gonne hamayse tiidhehe” kina ke hamade. <sup>14</sup> Yesusaar yin giyayse kena ki maasade: “Meten innonna i tarjina, hamora inin nivonbee hamodar inin yivenbeam inin dhesenna, isa tarjamono gonne. Yediar hamora inin nivonbee hamodar inin yivenbeam dhesattene. <sup>15</sup> Yedi eedi bhocchika pirdinam yeda pirde; inta eedi kaladar hattear pirdattine. <sup>16</sup> I pirdidianna, inta imal bish dayma, iam nittsaa Imba imbete kinin dohonna, isa pirdino gonne. <sup>17</sup> Eedi lamaasa tarjamono gonne hamayse konin tiidhayno yesa yigginte thaapadhidine. <sup>18</sup> Innon goynsa tarjea intane; iam nittsaa Imbaar innon goynsa kida tarje” kena ki hamade.

<sup>19</sup> Kediar “Hamba hamote ki dahaa?” kina ke hamade. Yesusaar yin giyayse kena ki maasade: “Iamaar way Imbaamaar dhesattene; iam ye dhesidianna, Imbaamaar ini dheseeda dhese” ki hamade. <sup>20</sup> Yesus Barjosa gazan ooninsa mayante eenam yinin dhettsenka, koymon dhabadhen saathinkal theedi dahayse dhalqin ogoam ki giyade. Kisa wodano akar yeskaamonna, hayyear kiam yedadehe.

### *Barjodar Woylamin Kinin Qajaamonsa Yesusin Giyoono*

<sup>21</sup> Yesus tapir “Yivayda yive; yediar iam zageeda zage; yesa seesonkaar diyeeda diye. Inin yiven raqindar yedi yivana damattene” kena ki hamade. <sup>22</sup> Ayiwd eenam entsaynaar “‘Inin yiven raqindar yedi yivana damattene’ kinin hamoono yiam deesanaw?

Haydhe!” ke hamade. <sup>23</sup> Yesusaar “Yedi choobarne, inta bhaabarne; yedi peen korane, inta peen koratehe. <sup>24</sup> Ta keeda ‘Yedi yesa seesonka diyeeda diye’ yena i hamade. Inta hay inin dohonam gonne hamayse ye tiyaamma, yedi yesa seesonka diyeeda diye” kena ki hamade. <sup>25</sup> Kediar “Ya hayne?” kina ke hamade. Yesusaar “Birara yedayse yena inin giyaadettsine. <sup>26</sup> Yesa inin giyeabee yennon goynsa inin pirdeabe thoothi yer daane. Ko dahaannaar, iam nittsaa gon hamaane; intaar kikala inin qanson ogoam peen kodar dohon eenna ida giye” kena ki hamade.

<sup>27</sup> Kediar Imbaasa kena kinin giyenam dhesadehe. <sup>28</sup> Ogonante Yesus kena yin ki giyade: “Eedi Naasiam yenin ziiten wodanka, inta hay inin dohonbee, Imbaar iam kinin dhetsonam inin giyenbee, isa meteka yer kala hattear inin hayminbeam ogo wodanka dheseeda dhese. <sup>29</sup> Iam nittsaa imbesanane; inta kiam wozisenam rooro wul inin waadadhenna, imal iam garadehe” kena ki hamade. <sup>30</sup> Yesus dhalqin ogoam kinin giyenka, thoothino eeno kidar woylamin ko qajade.

### *Seesora Utadhen Goyno*

<sup>31</sup> Yesus yidar woylamin qajaana Ayiwd eenna, “Yedi isa upsinka daahaana ye hanna, gon isa paananka yivayna eenane. <sup>32</sup> Goninam dheseeda dhese, gonnoor worsho maatayse yenin deherra yeam bula ko bule” kena ki hamade. <sup>33</sup> Kediar kina yinin maasenka, “Wodi Abraamsa muldharaane; eedi kalana hattear worsho maatootone. Ta ya ‘Worsho maatayse yenin deherra yeam bula ko bule’ hamayse haminaa wona giyaa?” kina ke hamade.

<sup>34</sup> Yesus yin giyayse kena ki maasade: “Inta yena gon ida giye: Seeso waadadhea wul seesosa worhone. <sup>35</sup> Eedi worsho eedisa ooninte rooro wul dehehe; naasi yi hanna, rooro wul daa ki dee. <sup>36</sup> Ta keeda Naasa eedisa worsho maatayse yenin deherra yeam kinin bulenna, gon uteeda ute.

<sup>37</sup> “Abraamsa muldhara yenin maatenam dhesayda dhese; ko dahaannaar isa upsinam yenin tiyaamonna, iam deesana yeda zage. <sup>38</sup> Inta Imbakal inin haaponam ida giye; yediar imbaa yenteakalanka yenin qansonam yeda waadadhe” kena ki hamade. <sup>39</sup> Kediar kina yinin maasenka, “Wosa imbaa Abraamne” kina ke hamade. Yesus kena yin ki giyade: “Abraam naana ye hanna, Abraamin waadadhen waadimanam ini yeda waadadhe. <sup>40</sup> Ko dahaannaar Barjokalanka inin qanson goninam yena giyea iam deesana yeda zage; Abraam yin hayadehe. <sup>41</sup> Yedi imbaa yenteasa waadimanam yeda waadadhe” kena ki hamade. Kediar “Wodi baskamoka adhadhootone. Imba kalaa wosa daane; kidiar Barjone” kina ke hamade.

<sup>42</sup> Yesusaar kena yin ki giyade: “Barjo yesa Imba ki hanna, iam ini nasheeda nashe. Harrna hambhidianna, inta Barjokalanka i nivade; kidi iam ki nittsade; inta innon bhocchinka nivaatine. <sup>43</sup> Inin giyenam yenin bhocchimino harrnane? Isa upsinam qansana yenin damaamonnane. <sup>44</sup> Yedi yesa imbaa Seethaankalankane; kisa anngarmanam waadadhana yeda nashe. Kidi ena birara yedayse eediam deesseane; gonin kikal qolmonna, kidi goninka woyadehe. Buudaabee buudansa imbaa yinin dohonna, buudanam yinin giyenka yisa bhocchira kida giye. <sup>45</sup> Intaar goninam inin giyenna, inin giyenam gonne hamayse tiyatene. <sup>46</sup> Yesa iira ‘Ya seeso haydine’ hamayse ina dhiidhimea hayne? Ta goninam giyea i hanna, inin giyenam harrnee tiyan garaa? <sup>47</sup> Barjo naas maataa Barjosa upsinam kida qanse; yenin qansimino Barjosa naasi yenin dahaamonnane” kena ki hamade.

### *Yesus Abraamam Birayse Kinin Dohoono*

<sup>48</sup> Ayiwd eenam entsaynaar kina yi giyna: “‘Ya Sammaria eedine; beero hadar dahade’ wosa hamintano gontayu?” kina ke hamade. <sup>49</sup> Yesusaar kena yinin maasenka, “Idar beero qolehe. Ko dahaannaar inta Imbaam ida gobshe; yediar iam yeda bage. <sup>50</sup> Intaar isa gobshinam zagattine. Inin gobshadhoodettsi zagea daane; pirdea kidine. <sup>51</sup> Inta yena gon ida giye: Inin giyen upsinam toolea hayyear dembhi diyehe” ki hamade.

<sup>52</sup> Ayiwd eenam entsaynaar “Beero hadar dohonam ta wodi dhesidine. Abraamaar diydine; Barjokala qansayse eenna giyaynaar diydine. Ya ‘Inin giyen upsinam toolea dembhi diyehe’ hada hame. <sup>53</sup> Ta ya wosa imbaa Abraamdarar sagaa sago? Kidi diydine; Barjokala qansayse eenna giyaynaar diydine; ya haam hayyea hame?” kina ke hamade. <sup>54</sup> Yesusaar yin giyayse kena ki maasade: “Inta iam i gobshina, isa gobshino pootehe. Iam gobshea ‘Kidi wosa Barjoane’ yenin hamea Imbane. <sup>55</sup> Yedi kiam dheseetene; inta kiam dhesayda dhese. ‘Kiam dhesattine’ i hamidianna, ini yedettsi buuda eedi i maatade. Ko dahaannaar kiam dhesayda dhese; kisa upsinam toolayda toole. <sup>56</sup> Yesa imbaa Abraam isa rooronam anngardhite shedana kattsi wozadhite ki dahade; ogoraar shedayse ki wozadhade” ki hamade.

<sup>57</sup> Ayiwd eenam entsaynaar “Ya akar eedi lamaa kaysa apo tabhi leveysa maataama ea Abraamam ya haapidu?” kina ke hamade. <sup>58</sup> Yesusaar “Inta yena gon ida giye: Abraam adhadhima birayse inta daane” kena ki hamade. <sup>59</sup> Ogonante kiam paxayse deesana seeni ke tiyade; Yesusaar kekalanka aadhimbhaye Barjosa gazan ooninsa mayara utayse ki yivade.

## 9

### *Yesus Aapin Kayaa Eam Kinin Pacchoono*

<sup>1</sup> Yesus goynka kinin yivenka, aapi kaya dahayse adhadhaa eedi kalaam ki haapade. <sup>2</sup> Yesussa paanan yivaynaar Yesuskal “Woam Dhettsea, ea kaa aapi kaya dahayse kinin adhadhoadettsi seeson hayaa hayne? Kidimoo? Kiam adhaana eenaw?” hamayse kiam ke oysade. <sup>3</sup> Yesusaar kena yinin maasenka, “Barjosa waadimanam kanka konin dhesadhoodettsine; kidi way kiam adhaana eena seeso kenin hayonnatehe. <sup>4</sup> Rooron daaka iam nittsaasa waadimanam haya iam koda zaske; hayyear waadadhana kinin damimino sooti niva ko nive. <sup>5</sup> Peendar inin dohonka, peendar dohon eensa shaakaa intane” ki hamade.

<sup>6</sup> Ogoam yinin giyonsa budonte yirk hamayse pathika peenam capshayse aapin kaya easa aapinam ki qadhade. <sup>7</sup> Ogora eana “Yivayse Seeloom dalbante shiidhaa” kina ki hamade. “Seeloom” hamintano “nittsadhaa” hamintane.

Ogonante ea yivayse yisa aapinam shiidhayse, shedada ki nivade. <sup>8</sup> Kisa gurdan een-abee birayse yer ki miskaka kiam shedaana eenabe “Kaa ea dooqayse miskimeatayu?” ke hamade. <sup>9</sup> Waani eena “Kaa kidine” ke hamade; waani eena “Aavav, kaa kiam kida maate, kiditehe” ke hamade. Kidiar “Intane” kena hamite ki dahade. <sup>10</sup> Eenaar “Ta keeda aapino hanno hamin hayayse ko sheda?” kina ke hamade. <sup>11</sup> Kidiar kena yinin maasenka, “Yesus hambhea ea peenam pathika capshayse isa aapinam qadhayse, ‘Seeloom yivayse shiidhaa’ ina ki hamade; intaar yivayse i shiidhade; isa aapinoar ko shedade” kena ki hamade. <sup>12</sup> Kidiar “Ea agaa ta hamote ki dahaa?” ke hamade. Kidiar “Hamote kinin dohonam inta dhesattine” ki hamade.

<sup>13</sup> Kedi ena aapin kayaa eam Parisa eenakal entsate ke yivade. <sup>14</sup> Yesus peenam pathika capshayse easa aapindar qadhayse kinin pacchoono wodano Ayiwd eensa ukunsen rooroakane. <sup>15</sup> Ogonante Parisa eena “Hamin hayaysea sheda?” hamayse pir kiam ke oysade. Kidiar “Pee caapi tiyayse isa aapindar ki qadhaysaka shiidhayse i shedade” kena ki hamade.

<sup>16</sup> Ogonante Parisa eensa shaarira waani eena “Ea agaa ukunsen rooroam kinin gobshiminna, kidi Barjokalankatehe” ke hamade. Waani eena tapir “Kidi seeso eedi ki hanna, ogodettsi tarshayna yerraam hamin ki waadadhana dame?” ke hamade. Ogoka kesa shaarinte edime ko dhaabhade. <sup>17</sup> Ogona yisa aapin kayaa eana “Aapin hannon kinin pacchonna, ya ea agaasa hamina giye?” hamayse tapir kiam ke oysade. Kidiar “Barjokala qansayse eenna giyeane” kena ki hamade.

<sup>18</sup> Ayiwd eenam entsaynaar kiam adhaana eenaam eelayse keam oysate yinin dhesenka yekka, kidi ena aapi kaya kinin dohonbee ta kinin shedenbeam gonni hamayse

kedi tiyadehe. <sup>19</sup> Ogonante kisa imbanana yi giyna: “Yedi ‘Aapi kaya maatayse ki adhadhade’ yenin hamea yesa naasa kaa kidiw? Ta hamin hayayse ki shedaa?” hamayse keam ke oysade. <sup>20</sup> Kedi imbanaar “Kaa wosa naasi kinin dohonbee ena aapi kaya maatayse kinin adhadhonbeam wodi dhesooda dhese. <sup>21</sup> Ko dahaannaar ta hamin hayayse kinin shedonam dhesattone; aapinam kisaar hayn pacchonam wodi dhesattone. Yedi kiam oysee. Kidi eedi gebhine; yinnon metensa yinti giyana dama ki dame” kena ke hamade. <sup>22</sup> Imbana yin kenin giyoono Ayiwd eenam entsaynana yinin kurtumbhonnane. Harrna hambhidiana, “‘Yesus Barjoyn qadhaa Kiristosne’ hamayse tarjea eedi daa ki hanna, bukin raqira bulooda bule” hamayse Ayiwd eenam entsayna birayse kinka kenin dhalqonnane. <sup>23</sup> Ogona kisa imbanaa “Kidi eedi gebhine; kiam oysee” ke hamade.

<sup>24</sup> Ogonante aapin kayaa eam lansi eelayse, “Ya gon giyayse Barjoam gobshaa! Ea agaa seeso eedi kinin maatonam wodi kiam dhesooda dhese” kina ke hamade. <sup>25</sup> Kidi kena yinin maasenka, “Seeso eedi kinin maatonam inta dhesattine; inta yer kalaa ida dhese. Ogonoar isa aapin kayon konin shedoaddettsi kinin hayonam bish ida dhese” ki hamade. <sup>26</sup> Kediar tapir “Hana har ki haya? Aapin hannonam hamin hayayse ki pacchaa?” kina ke hamade. <sup>27</sup> Kediar kena yinin maasenka, “Ini birayse yena inta giydine; yedi qanseatene. Pir qansana harrnee zaga? Yediar kisa paanan yivayna eena maatana zagee zago?” kena ki hamade. <sup>28</sup> Kediar kiam iirayse, “Ya ea agaasa paanan yiveane; wodi Musesa paanan yivaynane. <sup>29</sup> Barjo Musena kinin giyonam dhesooda dhese; ea kaa hamora kinin dohonam dhesattone” kina ke hamade.

<sup>30</sup> Ear kena yin ki giyade: “Yedi hamora kinin dohonam yenin dhesaammo ogono tarshea yerne. Kidi isa aapinam pacchidine. <sup>31</sup> Barjoam kurtumbheabee Barjosa bhocchinam waadadheabe kinin giyenam Barjo qansa ki qanse; seeson enaan Barjoyn qansiminam dhesooda dhese. <sup>32</sup> ‘Aapi kaya maatayse adhadhaa eediam pacchaa daane’ hambhenam peen pijadhorra yedayse qansadhadehe. <sup>33</sup> Ea agaa Barjokala yi dahaamma, ini yer kalaar waadadhana damehe” kena ki hamade. <sup>34</sup> Kediar “Ya seesoka dahayse adhadhaa woama dhettsso?” hamayse bukin raqira kiam ke bulade.

### *Aapin Yisa Shadayna Aapin Shedimina Kenin Maatoono*

<sup>35</sup> Eam bukin raqira kenin bulonam Yesus qansidine. Kiam yinin haapenka, “Ya Eedi Naasdar woylamin qajaa qajo?” kina ki hamade. <sup>36</sup> Kediar “Imbo, kidar woylamin inin qajoaddettsi kidi hayne?” ki hamade. <sup>37</sup> Yesusaar kina yi giyna: “Ya kiam haapidine; taar hambesana kinka dhalqeaa kidine” kina ki hamade. <sup>38</sup> Kediar “Imbo, inta hadar woylamin qajayda qaje” hamayse kina ki goodimade.

<sup>39</sup> Yesusaar “Aapin kayaana kenin shedoaddettsi, aapin yisa shadaynaar shedimina kenin maatoadettsi inta peen kodar inin nivoono eenam kikala edanane” ki hamade. <sup>40</sup> Parisa eensa shaarira kimbesana kinka dahaana ogoam qansayse, “Ta wodiar aapiysa shediminaw?” kina ke hamade. <sup>41</sup> Yesusaar kena yin ki giyade: “Yedi aapiysa shedimina ye hanna, ini seeso yena maatehe; ta keeda ‘Shedooda shede’ yenin hamonna, seeso eedi maatayse shidheeda shidhe” kena ki hamade.

## 10

### *Yesus Payyan Gishiman Gishea Kinin Dohoono*

<sup>1</sup> Yesus “Inta yena gon ida giye: Yaana kerinka ardimaa goytii abka ardea ea diibibee buurate itseabene. <sup>2</sup> Kerinka ardea ea yaanaam gisheane. <sup>3</sup> Kerin toolea kina kerinam kida bule. Yaanaar kisa upsinam qansa ke qanse. Kediar yisa yaanaam kesa naabenka eelada keam mayanka kida bule. <sup>4</sup> Yisa yaana wulam yinin bulonsa budonte kesa birante kida yive; yaanaar kisa upsinam yinin dhesenna, kisa paanan keda yive. <sup>5</sup> Eedi absa upsinam kenin dhesiminna, kikala goba ke gobe; hamin ko dahaakaar kisa paanan

yivehe” kena ki hamade. <sup>6</sup> Yesus kamsin ogoam kena ki giyade; kedi kinin giyonam bhocchadehe.

<sup>7</sup> Ogonante Yesus tapir “Inta yena gon ida giye: Yaanasa kerea intane. <sup>8</sup> I nittsima iam birayse nivaana wul diibibee buurate itsea eedibene; ko dahaannaar yaana kesa upsinam qansadehe. <sup>9</sup> Kerea intane; inka ardea kidi dhaqa ki dhaqe. Arda ki arde; uta ki ute; yinin itsenam kida haape.

<sup>10</sup> “Diibin nivayno diibanabee, taxanabee, kaysanabe bishne. Inin nivoono sada kenin haapoadettsibee ogono sadano kena konin thoothoadettsibene. <sup>11</sup> Payyan gishiman gishea intane. Payyan gishiman gishea yisa sadanam yaanana hamayse saskate kida ime. <sup>12</sup> Yaanasa imba maataama gishea ea yaayoayn nivonam yinin haapen wodanka, yaanaam garayse kida gobe; yaayoar keam yeda ki yede; yaanaamaar kikalanka thar thar kida haye. <sup>13</sup> Gishea ea yaanaam garayse kinin gobayno yaana kinti kenin dahaamonnabee yaanana yinin burqadhiminnabene.

<sup>14-15</sup> “Payyan gishiman gishea intane. Barjo Imbaar iam dhesendettsi, intaar Barjo Imbaam inin dhesendettsi, isa yaanaam dhesayda dhese; isa yaanaar iam dhesa ke dhese. Isa sadanam kena hamayse saskate ida ime. <sup>16</sup> Kina yaanasa iir qolmina yaati ab isa daane; keamaar tapir bava iam koda zaske. Isa upsinam qansa ke qanse. Kedi zelen kallon yaana keda maate; keam gishea eedi kalaane.

<sup>17</sup> “Isa sadanam maasate dhaasana dembhingga saskate imayda ime; ogonante Imbaa iam kida nashe. <sup>18</sup> Inta isa sadanam saskate inti ida ime; ikalanka koam hayyear tiyehe. Isa sadanam imanabee maasate tiyanabe isa hayamo daane; ko upsinam inin tiyoono Imbakalankane” ki hamade.

<sup>19</sup> Igina upsinaka Ayiwd eenam entsaynasa shaarinte tapir edime ko dhaabhade. <sup>20</sup> Kesa shaarira thoothino eeno “Rum kidar daane; kidi bardhidine. Kinin giyenam harrnee qanse?” ke hamade. <sup>21</sup> Waani eenoar “Igina upsina rum yindar dahaa eedisa upsitehe; rum aapin kayaanasa aapinam pacchana dama ko damo?” ke hamade.

### Ayiwd Eena Yesusin Gyonam Gonne Hamayse Kenin Tiyaammo

<sup>22</sup> Yerusaalem gidir Barjosa gazan ooninam minngamora gazisadhaana rooronaam gobshadhyino bavallo ko yeskade; ogono wodanoar bargi wodane. <sup>23</sup> Yesusaar Barjosa gazan ooninsa mayante Solomoon baaransa demenka yaayte ki dahade. <sup>24</sup> Ayiwd eenam entsaynaar kisa gasante bukayse, “Hamaaka yekka qothimaate haam wo toolo? Ya Barjoyn qadhaa Kiristoos ha daana, may wona giyaa!” kina ke hamade.

<sup>25</sup> Yesusaar kena yinin maasenka, “Inta yena giydine; yediar inin giyonam gonne hamayse tiyeetene. Inta Imbassa naabenka inin waadadhayno waadimano ina koda tarje. <sup>26</sup> Yediar isa yaana yenin dahaamonna, isa dhalqinam gonne hamayse tiyattene. <sup>27</sup> Isa yaana isa upsinam qansa ke qanse; intaar keam dhesayda dhese; isa paananka niva ke nive. <sup>28</sup> Intaar rooro wul lay dehen sadanam kena ida ime; kedi rooro wul lay kayehe. Isa aanira hayyear keam sarate tiyehe. <sup>29</sup> Keam ina imaa Imba wuldara saga ki sage; Imbasaa aanira keam sarate tiyana damea hayyear solehe. <sup>30</sup> Imbee Imbabe wodi kalaane” kena ki hamade.

<sup>31</sup> Ayiwd eenam entsayna Yesusam paxana pir seeni ke tiyade. <sup>32</sup> Yesus “Imbakalanka thoothi payya waadimanam yena i dhahade; igina waadimanasa waadima hamaasa iam ye paxe?” hamayse keam ki oysade. <sup>33</sup> Ayiwd eenam entsaynaar “Haam wonin paxayno hasa payyan waadimanna dayma, Barjoam hanin iirennane; ogonoar ya eedi dahayse haam Barjo hanin hayonnane” hamayse kina ke maasade.

<sup>34</sup> Yesusaar yin giyayse kena ki maasade: “Yesa yigginte ‘Yedi barjonane i hamade’ hamayse Barjoyn giyoono thaapadhittayu? <sup>35</sup> Mathaap Gazanam ookana damimehe. Barjosa upsinin yina nivaana eenaka ‘Yedi barjonane’ Barjo keam hamidi ki hanna, <sup>36</sup> ‘Inta Barjo Naasane’ inin hamonna, yedi Imba kinin gazisaa, peen kodar kinin

nittsaa ‘Barjoam hada iire’ hamayse haminee iam giyaa? <sup>37</sup> Inta Imbaswa waadimanam i waadadhiminna, iam gonnesse hamayse tiyeebhode. <sup>38</sup> Imbaswa waadimanam i waadadheea hanna, iam gonnesse hamayse ye tiyaammaar, isa waadimanam gonnesse hamayse tiyee. Imba inka kinin dohonbee intaar Imbaka inin dohonbeam ogoka payya hayayse dheseeda dhese” kena ki hamade. <sup>39</sup> Kediar tapir kiam yedana ke zagade; kidiar kekalanka dhaqate ki yivade.

<sup>40</sup> Yesus Wannisin birayse eenaam kinin shivon Yordaanoos baynsa saabar tapir yivayse raqin ogotear ki dooqade. <sup>41</sup> Thoothino eenoar kikal ko nivade. Kediar “Wannis tarshea yer kala hattear waadadhadehe; ko dahaannaar Wannis ea agaasa kinin giyoono wul gonnesse” hamite ke dahade. <sup>42</sup> Ogo raqinte thoothino eeno Yesusdar woylamin ko qajade.

## 11

### *Alaazarin Diyoono*

<sup>1</sup> Mayriyambee indanaan Martabeyn dohon Bitaania gurdante dehea Alaazar hambheea eedi kalaa hajadhyayse ki dahade. <sup>2</sup> Mayriyamaar Imbaa wontea Yesussa roonam gaamen shittonka qadhyayse meten sitinka qodoonone; hajadhaa Alaazaraar kosa indanaasane. <sup>3</sup> Ogonante Mayriyambee Martabe “Imbo, hanin nashea hajadhidine” hamayse apo Yesusdar ke yittsade. <sup>4</sup> Yesusaar upsin ogoam qansayse, “Burqono ogono Barjo Naasayn yinka gobshadhoodettsi Barjosa gobshinnane; dembhina yeskiseatehe” ki hamade.

<sup>5</sup> Yesus Martabee, indanaan Mayriyambee, Alaazarbeam kida nashe. <sup>6</sup> Kidi yinin daahaa raqate Alaazarsa burqonam qansayse rooro lamaa ki dooqade. <sup>7</sup> Ogosa budonte yisa paanan yivaynakal “Tapir Yiwda peendar wo yive” kena ki hamade. <sup>8</sup> Kisa paanan yivayna eenaar “Woam Dhettsea, rooro likkasa birayse Ayiwd eenam entsayna seenika paxate haam deesana ke zagade; tapir ya ogodar yivaa yivo?” kina ke hamade. <sup>9</sup> Yesusaar kena yinin maasenka, “Rooro kalaasa dahaana savaatina tabhi lamaatayu? Rooronka yaayea eedi daahaa ki hanna, peen kosa shaakanka kinin shedenna goa kiam qanehe. <sup>10</sup> Sootinka yaayea ki hanna, shaakayn kisa qolmonna, goa kiam qana ko qane” kena ki hamade.

<sup>11</sup> Kena yin yinin giyonsa budonte “Wosa nashoa Alaazar raatidine; ko dahaannaar kiam raatira dhaasana ida yive” kena ki hamade. <sup>12</sup> Kisa paanan yivayna eena “Ta keeda Imbo, yi raatidianna, paasha ki paashe” kina ke hamade. <sup>13</sup> Yesusaar Alaazarsa dembhin goynsa ki giyade; kediar raat kinin raatonsa kinin giyea kena ko maatade. <sup>14</sup> Ogo wodanka Yesus kena may “Alaazar diydine. <sup>15</sup> Yedi idar woylamin yenin qajoadettsi konin hayenna raqin ogote inin dahaamonna, yenante ida wozadhe. Ta keeda kikal wo yive” kena ki hamade. <sup>16</sup> Ogonante Didimos\* hambheea Toomaase Yesussa paanan yivayna yettsinakal “Kimbesana diyota wodiar wo yive” kena ki hamade.

### *Yesus Dembhira Dhaaseabee Sadan Imeabe Kinin Maatoono*

<sup>17</sup> Yesusin nivenka, Alaazar duukadhaysaka rooro oydi konin maatonam ki qansade. <sup>18</sup> Bitaania Yerusaalemkala kilometir makkamaddha koda pegadhe. <sup>19</sup> Ayiwd eensaar thoothina eena Martabee Mayriyambesa indanaasasa dembhin goynsa keam wocchinsana kekal nivayse ke dahade.

<sup>20</sup> Martaar Yesusin nivonam yinin qansenka, kiam chocchana ko utade; Mayriyamaar ooninte dooqayse ko dahade. <sup>21</sup> Martaar Yesusna “Imbo, ha ini kote daana, indanaasa diyehe. <sup>22</sup> Ta Barjoam hanin misken wulam Barjo hana kinin imenam dhesayda dhese” kina ko hamade. <sup>23</sup> Yesusaar “Hambanaasa dembhira kida dhaabhe” kona ki hamade. <sup>24</sup> Martaar “Dembhira dhaabhadhen macchin rooroaka kinin dhaabhenam dhesayda dhese” kina ko hamade. <sup>25</sup> Yesusaar kona “Eenaam dembhira dhaaseabee kena dehen

\* <sup>11:16</sup> “Didimos” hamintano “menti” hamintane.

sadan imeabe intane; idar woylamin qajea yi diyaakaar, sadaka daa ki dee. <sup>26</sup> Sadaka dahayse idar woylamin qajayna wul rooro wul dembhi diyehe. Ogoam gonne hamayse tiyaa tiyo?” ki hamade. <sup>27</sup> Kodiar “Ee, Imbo, ya ‘Peen kodar niva ki nive’ hambhaa Kiristoos, Barjo Naasa hanin dohonam gonne hamayse tiyayda tiye” kina ko hamade.

<sup>28</sup> Ogoam kikal konin dhalqonsa budonte, yivayse yinnon indanaan Mayriyamam aachika eelayse, “Dhettsea nivayse haam kida eele” kona ko hamade. <sup>29</sup> Kodiar ogoam yinin qansenka, saanawa dhaabhayse Yesuskal ko yivade. <sup>30</sup> Yesusaar Martayn kikal keeron raqinte ki dahade; akar gurdandar ardadehe. <sup>31</sup> Koam wocchinsada kombesana kinka ooninte dahaana Ayiwd eenaar Mayriyam kekalanka saanawa utaate konin yivonam haapayse Alaazarsa duukin raqindar eepana konin yivea kena ko maataysaka, kedi kosa paananka ke yivade.

<sup>32</sup> Mayriyam Yesuskal nivayse kiam yinin haapenka kisa roondar dhambayse, “Imbo, ha ini kote daana, indanaasa diyehe” kina ko hamade. <sup>33</sup> Yesusaar konin eepenkabee kombesana nivaana Ayiwd eenaar kenin eepenkabe keam shedayse, qaabonka yisa kattsi burqadhyse, <sup>34</sup> “Hamotee kiam duukaa?” kena ki hamade. Kediar “Imbo, shedota wombесана dhaabhaa” kina ke hamade. <sup>35</sup> Yesusaar ermitka ki eepade. <sup>36</sup> Ogonante Ayiwd eenaar “Hamin kiam kinin nashenam shedee” ke hamade. <sup>37</sup> Kesa shaarira waani eena “Ea kaa aapin kayaa easa aapinam pacchaa ta Alaazarin diyamadettsi kiam hayano bashaw?” hamayse ke giyade.

### *Yesus Alaazaram Dembhira Kinin Dhaasoono*

<sup>38</sup> Yesusaar pir yisa iinka kattsi burqadhaate duukindar ki yivade. Alaazarin duukad-hoono coopasa irne; coopansa aponam seenika ko shupadhade. <sup>39</sup> Yesus “Seeninam dhaasee” ki hamade. Diyaasaar indanaano Marta “Imbo, ki diyaysaka kina rooro oydi konin dohonna, coqima garehe” kina ko hamade. <sup>40</sup> Yesusaar “Idar woylamin ha qajidianna Barjosa gobshinam hanin haapenam hana giyati?” kona ki hamade.

<sup>41</sup> Ogonante seeninam ke dhaasade. Yesusaar tura cecin shedayse, “Imbo, inin giyenam hanin qansonha haam ida gobshe. <sup>42</sup> Roro wul inin giyenam hanin qansenam dhesayda dhese; ko dahaannaar iam hanin nittsonam isa gasante woyaana eena gonne hamayse kenin tiyoadettsi i giyade” hamayse ki miskade.

<sup>43</sup> Yesus yin kinin giyonsa budonte upsi gebhika “Alaazar, ora utaa!” hamayse ki eelade. <sup>44</sup> Diyaa Alaazaraar kisa aaninbee roonbe dhaxadhonka duukira ki utade; kisa aapin kerroar apalanka ochadhondar ko dahade. Yesusaar “Kiam bulee; ki yive” kena ki hamade.

### *Yesusdar Woogintaka Dhaabhadhoono*

*Maat 26:1-5; Marq 14:1-2; Luq 22:1-2*

<sup>45</sup> Ogonante Mayriyamkal nivaana eenasa shaarira Yesusin waadadhonam haapoono Ayiwd eensa thoothino eneo kidar woylamin ko qajade. <sup>46</sup> Waani waani eena Parisa eenakal yivayse Yesusin waadadhonam kena ke giyade.

<sup>47</sup> Ogonante gudullasa hayonabee Parisa eenabe peensa donzanaam yikal pucchayse, “Ta hamino hayo? Ea kaa thoothi tarshea yer kida waadadhe. <sup>48</sup> Sun kiam wo garanna, eneo wul kidar woylamin koda qaje; ogona Roome eena nivayse Barjosa gazan ooninbee wosa eenbeam kaysa ke kayse” ke hamade. <sup>49</sup> Kesa iira kalaa, ogo wodanka gudullasa gebhaa maataa Qayappa kena yi giyna: “Yediar yer kala hattear dhesattene. <sup>50</sup> Wosa een wulin kayerra eedi kalaa wo wulna diydi ki hanna payya konin maatenam bhocchattenu?” kena ki hamade.

<sup>51</sup> Ogoam kinin giyaynoar kisa bhocchinkatehe; ko dahaannaar ogo wodanka gudullasa gebha yinin dohonna, Yesus Ayiwd eenna kinin diyendettsi hamota dohonam ki

giyade.<sup>†</sup> <sup>52</sup> Ogonoar Yesussa dembhino Ayiwde eenha bishtehe; ko dahaannaar thar thar hamayse dahaana Barjo naana wulam pir raq kalaadar kinin pucchoadettsine.

<sup>53</sup> Ogonante roroa agaara yedayse kiam deesana kinka ke dhalqade. <sup>54</sup> Ogona Yesus Ayiwde eensa shaarinte may yaayadehe; ko dahaannaar daransa gasante dohon Epreem hambhen katamandar ki yivade. Ogoteer yisa paanan yivaynabesana ki kappade.

<sup>55</sup> Ayiwde eensa Paasikan<sup>‡</sup> bavallo ko yeskade. Thoothino eenoar meten yinnonam gazisana hamayse Paasikan roroasa birayse peen yinnora Yerusaalemdar ko yivade.

<sup>56</sup> Ogote Yesusamaar zagite ko dahade. Barjosa gazan ooninsa mayante woyayse kinka kikal “Har ko yena maate? Ogo bavaalindar nimbha shidho ki dew?” hamayse ko dhalqade. <sup>57</sup> Gudullasa hayonabee Parisa eenabe kiam yedana, kinin dohon raqinam dhesea eedi daa ko hanna, kena kinin dhoadettsi ke giyade.

## 12

### *Mayriyam Gaamen Shittonka Yesusam Konin Qadhoono Maat 26:6-13; Marq 14:3-9*

<sup>1</sup> Paasikan\* roronaam gobshanna roro lax shidhaysaka Yesus dembhira kinin dhaasaa Alaazarin dohon Bitaania gurdandar ki nivade. <sup>2</sup> Ogoteer sootie gala kina ashkayse ke imade. Martaar keam kunsite ko dahade; Alaazaraar Yesusbesana dooqaana eenasa eedi kalaane. <sup>3</sup> Mayriyam koymo gebhika shanshadhen naardoosira bish ashkadhon bikkole kala gaamea shitto tiyayse Yesussa roonam qadhyayse yisa metensa sitinka ko qodade; onnoar naardoos shittonsa gaamenka ko thoothade.

<sup>4</sup> Ko dahaannaar kisa paanan yivayna eenasa shaarinte kiam yettsate imana hayea Asqoronto peen ea Yiwda <sup>5</sup> “Gaamen shitton koam birre mato makkamdar shanshayse koymon ogoam qambhinana imbhimino harrnane?” ki hamade. <sup>6</sup> Ogoam kinin giyoonoar diibi yinin dohonnane; gon qambhinana burqadhaysetehe. Ogonoar kesa birre yedea maatayse kosa iira birrenam yinin tiyennane.

<sup>7</sup> Yesusaar “Konin hayoono iam duukadhea roroasa ashkimbhe konin dohonna, koam garaa. <sup>8</sup> Qambhina roro wul yembesana keda dee; inta roro wul yembesana dhattine” kena ki hamade.

<sup>9</sup> Ayiwde eensa thoothino eeno Yesus ogote kinin dohonam dhesayse ko nivade. Ogonoar diira kinin dhaasaa Alaazaram pir shedanane; Yesusna bish nivadehe.

<sup>10</sup> Gudullasa hayona Alaazaramaa deesana kinka ke dhalqade. <sup>11</sup> Harrna hambidianna, Alaazarsa diira dhaabhidin goynsa Ayiwde eensa thoothino eeno kekalanka edimayse Yesusdar woylamin qajaate konin dohonnane.

### *Yesus Gebhi Gobshinka Yerusaalem Kinin Ardoono Maat 21:1-11; Marq 11:1-11; Luq 19:28-40*

<sup>12</sup> Kina hamon bavaalinam gobshota nivoono thoothino eeno “Yesus Yerusaalem nivite ki dahade” hambhenam yinin qansenka, <sup>13</sup> meetha haccha yinka yedayse kiam tiyana utayse,

“Gobshi kina ko dee;

Barjo Imbasa naabenka nivea Israveel eensa bitaa kidi gobshadhaane” hante upsi gebhika kiam ko gobshade.

<sup>14-15</sup> Ogora

“Yedi Thiyoon katamante dahaana eenato, kurtumbheebhode!

Marrato! Yesa bitaa ukuli ootodar dooqayse kida nive”

<sup>†</sup> **11:51** Qayappa dhesima Barjosa bhocchinam ki giyade. <sup>‡</sup> **11:55** “Paasika” hamen upsinam Haalin Mallan mathaapinsa macchinte thaapadhaanar shedaa. <sup>\*</sup> **12:1** “Paasika” hamen upsinam Haalin Mallan mathaapinsa macchinte thaapadhaanar shedaa. **12:8** Yaggi 15:11. **12:13** Maz 118:26. **12:14-15** Zakka 9:9.

hamayse thaapadhondettsi, Yesus ukuli ooto haapayse daran ki dooqade. <sup>16</sup> Yesussa paanan yivaynaar ogo wulam birayse bhocchadehe; ko dahaannaar Yesus cecindar utayse kinin gobshadhonsa budonte, ogono wul kinnon goynsa thaapadhonbee waadadhadhonbe ogo wodanka kena bhoq ko hamade.

<sup>17</sup> Yesus Alaazarum duukira eelayse kinin dhaasenka kimbesana kinka dahaana eena ogosa ke tarjade. <sup>18</sup> Thoothino eeno ogo tarshen yerin kinin waadadhonam yinin qansonna, kiam tiyana ko utade. <sup>19</sup> Ogonante Parisa eena yi giyna: “Marrato! Ta keeda hamino hayo? Eeno wul kisa paanan ko yivade” kinka kikal ke hamade.

<sup>20</sup> Bavaalin rooronaka Barjona goodimota Yerusaalemdar nivon eensa shaarira waani waani eena Girik eedine. <sup>21</sup> Kediar Galila peensa Beetesayda katamara nivaa Pilbhooskal nivayse, “Imbo, Yesusam shedana woda zage” hamayse kiam ke oysade. <sup>22</sup> Pilbhoosaar yivayse Indiriasna ki guyade; Indiriasbee Pilbhoosbe kinka yivayse Yesusna ke guyade.

<sup>23</sup> Yesusaar maasayse “Eedi Naasin gobshadhyino wodano yeskidine. <sup>24</sup> Inta yena gon ida giye: Gazgonsa aapi peente wavayse yi capaamma, baqalima koda shidhe; yi capidianna, baqalayse thoothi aapi koda ushe. <sup>25</sup> Sadan yinnonam nashea koam kaysa ki kayse; peen kodar sadan yinnonam jibbea rooro wul lay dehen sadanna koam gisha ki gishe. <sup>26</sup> Ina waadadhea yi hanna, isa paananka ki nive; ina waadadhea ea inin dohon raqinte kida dee; ina waadadhea eam Imba kiam gobsha ki gobshe” kena ki hamade.

### *Yesus Yidar Yesken Gaalenbee Dembhinbesa Kinin Giyoono*

<sup>27</sup> Yesus yi giyna: “Ta isa sadano kattsi gaalidine. Hariy hamo? ‘Imbo, ogo gaalen wodara iam dhacchaa!’ i hamo? Ko dahaannaar inin nivoono ogo gaalenam tiyanane.

<sup>28</sup> Imbo, hasa naabenam gobshaa!” ki hamade. Ogo wodanka “Intaar isa naabenam gobshidine; tapir koam ida gobshe” hamea upsi cecira ko nivade.

<sup>29</sup> Ogote woyayse qansaana eena “Kaa guganatne” ke hamade; waani eenaar “Barjosa gaana kina ki guyade” ke hamade. <sup>30</sup> Yesus yin giyayse kena ki maasade: “Ogono upsino cecira yena hamayse ko nivade, ina hamayse nivadehe. <sup>31</sup> Ta peen kodar pirdino yeskidine; ta peen koam wottsea Seethaanam mayandar kida dhabadhe. <sup>32</sup> Eedi Naas peen kora tura ki ziitadhidianna, een wulam yidar eela ki eele” ki hamade. <sup>33</sup> Ogono yin kinin giyoono hamin hama dembhi yinin diyensa keam bhocchisana ki guyade.

<sup>34</sup> Ogora thoothino eeno “Wodi Barjoyn qadhaa Kiristoos rooro wul lay kinin dehenam Musesa yigginte wodi qansidine. Ya ‘Eedi Naas tura ziitadha kiam koda zaske’ hamayse haminaa giyaa? Agaa Eedi Naas hayne?” hamayse kiam ke oysade. <sup>35</sup> Yesusaar “Akar likka wodana shaaka yembesana kida dee. Thipan yedar yeskoamadettsi shaakan yekal daaka yaayee. Thipante yaayea hamodar yinin yivenam dhesehe. <sup>36</sup> Shaaka yekal daaka, shaaka eedi maatana shaakaadar woylam qajee” kena ki hamade. Yesusaar ogoam giyayse kekalanka yivayse ki aadhimbhade.

### *Ayiwd Eena Yesusdar Woylamin Kenin Qajaammo*

<sup>37-38</sup> Ko dahaannaar Yesus igina tarshayna yerraam kesa birante ki waadadhaakaar Barjokala qansayse eenna giyea Isias

“Imbo, wosa tarjamonam gonne hamayse hayne tiyaa?

Barjosa kantanosis hayna ko haapadhaa?”

hamayse kinin giyoono upsino konin thoothoadettsi kidar woylamin qajadehe.

<sup>39-40</sup> Isias pir

“Aapinka kinin shedoamadettsi,  
woylaminkaar kinin bhocchoamadettsi,  
ogoraar ke maataysaka keam kinin pacchoamadettsi,  
Barjo kesa aapinam ki kaysade;

kesa woylaminamaar ki duttsade”

ena ki hamade. Ogonante kedi Yesusdar woylamin qajana damadehe. <sup>41</sup> Isias ogoam kinin giyoono Yesussa gobshinam shedayse kisa ki giyade.

<sup>42</sup> Ko dhaaannaar Ayiwd eenam entsayna eenasa shaarira shidhima thoothina eena kidar woylamin ke qajade. Ko dhaakaar Ayiwd eensa bukin raqira keam kenin buloamadettsi Parisa eenaam kenin kurtumbhonna Yesussa tarjadehe. <sup>43</sup> Ogoam yin kenin hayoono Barjoyn keam gobsherra, eedin keam gobshenam kenin nashonnane.

<sup>44</sup> Yesusaar upsi gebhika yin ki giyade: “Idar woylamin qajea iam nittsaadar woylamin kida qaje; idar bishtehe. <sup>45</sup> Iam haapea iam nittsaamaar ta haapidine. <sup>46</sup> Idar woylamin qajea wul thipante kinin doamadettsi inta shaaka maatayse peendar i nivade.

<sup>47</sup> Inta peendar dohon eenam dhacchana i nivade; peendar dohon eendar pirdana nivaatine. Ogonante isa upsinam qansayse toolimadar pirdea intatehe. <sup>48</sup> Iam jibbeabee isa dhalqinam tiyma eabedar pirdea daane. Inin giyoono upsino yinti macchin rooroaka kidar koda pirde. <sup>49</sup> Harrna hambhidianna, inta isa qaaboka giyatine; ko dhaaannaar iam nittsaa Imba yinti har inin giyenbee hamin inin giyenbeam ina ki imade. <sup>50</sup> Kinin giyoonoar rooro wullay daadhea sadandar konin yeskisenam dhesayda dhese. Ogonante inin giyayno Imba ina kinin giyaadettsi ida giye” ki hamade.

## 13

### *Yesus Yisa Paanan Yivaynasa Roonam Kinin Shivoono*

<sup>1</sup> Yesus Paasikan\* rorronaam gobshadhensa birayse, peen kora Barjo Imbaakal kinin yiven wodanin yeskonam ki dhesade. Peen kodar dhaana eena yinnaam kidi nashidine; yinin nashaanaam macchi ki nashade.

<sup>2-4</sup> Birayse Seethaan Simoon naasa Asqoronto peen ea Yiwdasa woylaminte Yesusam yettsate kinin imoadettsi qaabo kina ki imade. Yesus Barjo Imbaa yer wulam kisa aanindar kinin imonbee, Barjokala kinin nivonbee, Barjodar kinin yivenbeam ki dhesade. Sootin galan itsite ke daaka, Yesus dhaabhayse yinin qaadhon apalanam wodayse, bishin qodadhen apalanam tiyayse ki dhaximbhade. <sup>5</sup> Ogoraar shaaqante noqo kahayse, yisa paanan yivaynasa roonam shivayse, yinin dhaximbhon apalanka kesa roonam qodan ki yedade.

<sup>6</sup> Yesus Simoon Bhethirooskal kinin nivenka, Bhethiroosaar “Imbo, ya isa roon shivaa shivo?” kina ki hamade. <sup>7</sup> Yesus yinin maasenka, “Inin hayenam ya ta dhesattane; budobar koam hada bhocche” kina ki hamade. <sup>8</sup> Bhethiroosaar “Yer hamin hambhaakaar isa roonam shivattane” kina ki hamade. Yesusaar “Hasa roonam i shivaamma, imbesana dahattane” kina ki hamade. <sup>9</sup> Simoon Bhethiroosaar “Imbo, isa aaninbee isa metenbeam shivaa; isa roon bish shivaabhode!” kina ki hamade. <sup>10</sup> Yesusaar “Kosa birayse bishinam shiidhaa ea roonam bish shiidha kiam ko zaske; kisa bishino wul payyane. Yedi payyane; ko dhaaannaar yedi wul payyatehe” kina ki hamade. <sup>11</sup> Yettsate kiam imea eam Yesus yinin dhesenna, “Yedi wul payyatehe” ki hamade.

<sup>12</sup> Kesa roonam yinin shivonsa budonte, apalan yinnonam qaadhayse, pir maataate dooqayse kena yin ki giyade: “Inin yena hayonam yedi bhocchee bhoccho? <sup>13</sup> Yedi Dhettsea way Imbo iam yeda hame; yenin giyaadettsi inin dohonna, payyee giyade.

<sup>14</sup> Ta inta yesa Imbabee Dhettseabe dahayse yesa roonam i shividiana, yedi taar kinka kisa roonam yenin shivoadettsi yeam koda zaske. <sup>15</sup> Inta yena inin hayondettsi yedi pir yenin hayoadettsi kamsin koam yena i dhahade. <sup>16</sup> Inta yena gon ida giye: Waadadhea ea kiam waadiseara sagehe; ergadhaa ea kiam ergaara sagehe. <sup>17</sup> Ogoam dhesayse ye haydianna, yedi gobshadhaanane.

12:39-40 Isi 6:9-10. \* 13:1 “Paasika” hamen upsinam Haalin Mallan mathaapinsa macchinte thaapadhaanar shedaa.

<sup>18</sup> “Ko dhalqinam inin giyayno ye wulsatehe; inta inin kamaanaam dhesayda dhese. Ko daahaannaar Mathaap Gazante ‘Innon balashanam itsea idar ki dhaabhade’ hamb-hoono upsino konin thoothoadettsine. <sup>19</sup> Yin konin maatonsa birayse ta yena inin giyayno, konin thoothonsa budonte inin hay dohonam gonne hamaye yenin tiyoadettsine. <sup>20</sup> Inta yena gon ida giye: Inin yittsea hayyeamaar chocchamon tiyea iam kida tiye; iamaar tiyea iam nittsaam kida tiye” kena ki hamade.

### *Yesus Birayse Kiam Yettsate Imea Easa Kinin Giyoono*

*Maat 26:20-25; Marq 14:17-21; Luq 22:21-23*

<sup>21</sup> Yesus ogoam yin giyayse yisa manpasinka kattsi qaabayse, “Inta yena gon ida giye: Yesa shaarira kalaam yettsate ima ki ime” hamaye kena ki giyade. <sup>22</sup> Kisa paanan yivayna eenaar dhalqin ogoam haysa kinin giyenam yinin dhesaamonna, kinka kiam kiam shedan ke yedade.

<sup>23</sup> Kesa iira kalaam Yesusin nashea Yesuskal theedi ki dooqade. <sup>24</sup> Ogonante Simoon Bhethiroos aapi kina qunthayse, “Haysa kinin giyenam wona oysaa” kina ki hamade.

<sup>25</sup> Kidiar Yesussa sadankal theedayse, “Imbo, agaa hayne?” hamaye kia oysade.

<sup>26</sup> Yesusaar “Balashanam woothinte duggayse aponte inin arsea agaa kidine” hamaye kina ki maasade. Balashanamaar woothinte duggayse Asqoronto peen ea Simoon naasa Yiwdana ki imade.

<sup>27</sup> Ogo balashanam aponte kinin arsonsaa budobar, saanawa Seethaan Yiwdasa woy-laminte ki ardade. Ogona Yesusaar “Hanin hayenam saanawa hayaa” kina ki hamade.

<sup>28</sup> Ko daahaannaar ogote galandar dooqaana eena Yesus harrna ogoam kina kinin giyonam hayyear dhesadehe. <sup>29</sup> Yiwda birre yedea kinin dohonna, Yesus kina “Bavaala gobshana wona zaskenam shanaa” way “Qambhinana iminto imaa” kinin hamaa waani eenana ko maataade. <sup>30</sup> Yiwdaar balashanam tiyanka saana ki utade. Kinin utenka peeno sootine.

### *Imbhoono Hallo Upsino*

<sup>31</sup> Yiwdayn utonsa budonte Yesus yin ki giyade: “Ta Eedi Naas gobshadhota ki dahade; Barjoar kanka kida gobshadhe. <sup>32</sup> Barjoar kanka ki gobshadhidianna, Barjo pir Naasaam yinka gobsha ki gobshe; saanawa kiam kida gobshe.

<sup>33</sup> “Naanato, akar likka wodana yembesana kinka ida dee. Iam zageeda zage; Ayiwd eenam entsaynana ‘Inin yiven raqinte nivana damattene’ inin kena hamondettsi, ta yena pir ogoam ida giye. <sup>34</sup> Kinka kiam kiam yedin nashoadettsi haali upsi yena ida ime. Inin yeam nashondettsi, yedi pir kinka kiam kiam nashee. <sup>35</sup> Kinka kinka nashimmakko yesa daa ko hanna, isa paanan nivayna eena yedin maatonam eeno wul yeam ogoka dhesa ko dhese” kena ki hamade.

### *Yesus Bhethiroosin Marimenam Birayse Kinin Giyoono*

*Maat 26:31-35; Marq 14:27-31; Luq 22:31-34*

<sup>36</sup> Simoon Bhethiroosaar “Imbo, hamoa yive?” hamaye kiam ki oysade. Yesusaar “Ta isa paananka inin yiven raqindar nivana damattane; bere isa paanan nivaada nive” hamaye kina ki maasade. <sup>37</sup> Bhethiroosaar “Imbo, ta hasa paanan yiva iam marayno hare? Isa sadanam ko hannaar hana saskate imayda ime” kina ki hamade. <sup>38</sup> Yesusaar kina yinin maasenka, “Ya gon hasa sadanam ina saskate imaa imo? Inta hana gon ida giye: Makkam goyt ‘Inta kiam dhesattine’ hamaye iam hanin marimenka yekka kina sootin baacha qiiqehe.”

## 14

### *Barjodar Yeskisea Goytea Yesusin Dohoono*

<sup>1</sup> “Yesa woyleminka qaabayse gaaleebhode; Barjodar woylem qajee, idarar pir woylem qajee. <sup>2</sup> Imbaso ooninte thoothi daadhea raq daane; yin ko dahaamma, ini yena giyayda giye. Raq yena ashkota ida yive. <sup>3</sup> Yivayse raq yena inin ashkonsa budonte, inin dohon raqinte yedi pir yenin doadettsi lansi nivayda nive; ikalar yeam tiyayda tiye. <sup>4</sup> Inin yiven goynamaar dheseeda dhese” kena ki hamade.

<sup>5</sup> Toomaasear “Imbo, hamodar hanin yivenam dhesattone; hamin hayayse goynam woda dhese?” kina ki hamade. <sup>6</sup> Yesusaar kina yinin maasenka, “Goyteabee, gonin hamaabee, sadabe intane; inka dayma goyti abka eedi hay ki hannaar Barjo Imbakal nivana damea qolehe. <sup>7</sup> Iam ye dhesanna, Imbaamaar pir dheseeda dhese. Ta keeda kaara kiam yedi dhesidine; kiam yedi haapidine” kena ki hamade.

<sup>8</sup> Pilbhoosaar “Imbo, Barjo Imbaam wona ha dhaanna, yeeka ko yeeke” kina ki hamade. <sup>9</sup> Yesusaar “Ya Pilbhooso, koka yekka yembesana kinka inin dehenka iam dhesattanu? Iam haapaa Imbaam haapidine. Ta ya ‘Barjo Imbaam wona dhahaa’ hamayse haminaa giyaa? <sup>10</sup> Inta Imbaka inin dohonbee Imbaar inka kinin dohonbeam gonne hamayse tiyattanu? Inka dahaa Imba waadimanam kida waadadhe; inin yena giyen upsinam ikalanka giyattine. <sup>11</sup> Inta Imbaka inin dohonbee Imbaar inka kinin dohonbeam gonne hamayse isa upsinam tiyee. Yin ko dahaamma, inin waadadhen waadimanam shedayse gonne hamayse tiyee. <sup>12</sup> Inta yena gon ida giye: Idar woylem qaje inin waadadhen waadimanam kidi pir kida waadadhe; ogora sagi kida waadadhe. Harrna hambhidianna, inta Imbadar inin yivennane. <sup>13</sup> Imbaar i kisa Naasaka kinin gobshadhadettsi isa naabenka yenin misken wulam yena hayayda haye. <sup>14</sup> Yer har ko hannaar isa naabenka iam yenin miskenam inta yena hayayda haye.

### *Yesus Manpas Gazan Goynsa Kinin Giyoono*

<sup>15</sup> “Iam nashayna ye hanna, inin giyen upsinam toolee. <sup>16</sup> Intaar Imbaam ida miske; rooro wul lay yembesana kinin doadettsi ab yeam wocchinsea yena kida ime. <sup>17</sup> Kidiar goninsa Manpasne. Peendar dahayna eena kiam haapiminabee dhesiminabe kenin dohonna, kiam tiyana damehe; ko dahaannaar yembesana kinka kinin dohonnabee os birante yesa iinte kinin dehennabe yedi kiam dheseeda dhese.

<sup>18</sup> “Imbaysa qolmina naanadettsi yeam inta garattine; yekal nivayda nive. <sup>19</sup> Likka wodasa budonte peendar dahaana eena iam haapehe; yedi iam haapeeda haape. Inta sadaka inin dehenna, yediar sadaka yeda dee. <sup>20</sup> Inta Imbaka inin dohonam, yediar inka yenin dohonam, intaar yenka inin dohonam agaa rooroaka dheseeda dhese. <sup>21</sup> Isa upsinam tiyayse koam toolea iam nashea kidine. Iam nasheamaar Imba nasha ki nashe; intaar kiam nashayda nashe; iamaar kina dhaayda dhee” kena ki hamade.

<sup>22</sup> Asqoronto peen ea Yiwda dayma aba Yiwda “Imbo, peendar dahayna eenana dayma wona bish haam hanin dhahayno harrnane?” hamayse kiam ki oysade.

<sup>23</sup> Yesusaar kina yinin maasenka, “Iam nashea hay ki hannaar, isa upsinam toola ki toole; Imbaar kiam nasha ki nashe. Wodiar kikal nivooda nive; kimbesana kinka woda dee. <sup>24</sup> Iam nashima isa upsinam toolehe. Yenin qansayno upsinoar iam nittsaa Imbasane, intitehe.

<sup>25</sup> “Ta yembesana dahayse koam yena i giyade. <sup>26</sup> Ko dahaannaar Imba isa naabenka yena kinin nittsayno, wocchinsayno Manpas Gazano, wulam yena koda dhettse; inin yena giyon wulam yena koda bhoccise.

<sup>27</sup> “Payyamonam yena ida gare; isa payyamonam yena ida ime. Inin yena imayno payyamono peen konin imendettsitehe. Yesa woyleminka qaabayse gaaleebhode, kurtumbheebhode. <sup>28</sup> ‘Inta yivayda yive; yekalar maatayse nivayda nive’ inin yena hamonam yedi qansidine. Iam nashayna ye hanna, Imbakal inin yivenka ini yeda wozadhe; harrna hambhidianna, Imba idara kinin sagennane. <sup>29</sup> Ogoyn thoothonsa budonte inin giyonam gonne hamayse yenin tiyoadettsi ta konin maatensa birayse koam inta yena giydine. <sup>30</sup> Ta keeda yembesana kinka thoothi dhalqattine; harrna

hambhidianna, peen koam wottsea Seethaan kida nive. Idar kisa kanta qolehe. <sup>31</sup> Ko daahaannaar Imbaam inin nashenam peen kodar dohoono eeno konin dhesoadettsi, Imba ina kinin giyon ogoam ida haye.

“Dhaabhee, kora wo yive.

## 15

### *Gonin Hamaa Woynea Hattasa Kamsino*

<sup>1</sup> “Gonin hamaa woynea hatta intane; koraar Imbane. <sup>2</sup> Aapin ushimin idar dohon antin wulam Imba taxayse kida dhabe; aapin ushen antin wulam thoothi konin ushoadettsi koam murdayse kida ashke. <sup>3</sup> Inin yena giyon upsin goynka ta yedi payya maatidine. <sup>4</sup> Yedi inka dehee; intaar yenka ida dee. Antino hattadar yi daahaamma yimal aapi ushana konin damimadettsi, yin yedi taar inka ye daahaamma aapi ushana damattene.

<sup>5</sup> “Woynea hatta intane; yediar antinane. Hayyear inka ki daana, intaar kanka i daana, kidi thoothi aapi usha ki ushe. Harrna hambhidianna, inka ye daahaamma, yer kala hattear hayana damattene. <sup>6</sup> Inka dayma ea hattonsa antindettsi taxate kiam mayante dhabadhaysaka kida wocche; iginaamaar buurate nuunte dhabayse koda koqadhe. <sup>7</sup> Inka daa ye hanna, isa upsinoar yekal daa ko hanna, yedin nashen wulam miskee; yena imba ko imbhe. <sup>8</sup> Thoothi aapi ye ushidiana, isa paanan nivayna eena yedin maatonam yeda dhee; Imbaar ogoka gobsha ki gobshadhe.

<sup>9</sup> “Imba iam kinin nashondettsi, intaar yeam nashidine; isa nashimmakkonka dehee. <sup>10</sup> Inta Imbasaa upsinam toolayse kisa nashimmakkonka inin dohondettsi, isa upsinam ye toolina isa nashimmakkonka yeda dee. <sup>11</sup> Isa wozano yenka konin doadettsi, yesa wozanoar konin thoothoadettsi koam yena inta giydine.

<sup>12</sup> “Inin yeam nashondettsi kinka kiam kiam yedin nashoadettsi isa upsino konone. <sup>13</sup> Sadan yinnonam yisa nashonana saskayse imara sagi nashimmakko haykalar qolehe. <sup>14</sup> Inin yena giyonam hayayna ye hanna, yedi isa nashonane. <sup>15</sup> Ta keeda kaara os ‘Ina waadadhaynane’ yeam hamattine; harrna hambhidianna, waadadhea ea yiam waadiseayn hayenam dhesehe. Ko daahaannaar Imbakala inin qanson wulam yena inin dhettonna, ‘Isa nashonane’ yeam inta hamidine. <sup>16</sup> Inta yeam i kamade; yedi iam kameetene. Yivayse aapi yedin ushoadettsibee yesa aapinoar konin doadettsibe yeam kamayse i wodade. Ogona Imba isa naabenka yedin misken wulam yena kida ime. <sup>17</sup> Kinka kiam kiam yedin nashoadettsi yena inin giyayno upsino konone.

### *Yesussa Paanan Yivaynaam Eenin Jibbayno*

<sup>18</sup> “Peen kodar dohoono eeno yeam jibbidi ko hanna, yesa birayse iam konin jibbonam dhese. <sup>19</sup> Peen ko eena ye daana, ini peen kodar dohoono eeno kenti yedin dohonna yeam nasha ko nashe. Ko daahaannaar inta peen kodar dohon eensa iira yeam i kamade; ogona peen kosa yedin daahaamonna, peen kodar dohoono eeno yeam jibba ko jibbe. <sup>20</sup> ‘Waadadhea ea kiam waadiseadara sagehe’ hamayse inin yena giyon upsinam bhocchee. Iam oytidi ke hanna, yeamaar pir oytu ke oyte. Isa upsinam toolidi ke hanna, yesa upsinam toola ke toole. <sup>21</sup> Iam nittsaam kenin dhesimonna, ko wulam isa naaben goynka yedar keda haye. <sup>22</sup> Inta nivayse kena i giyaamma, ini kena seeso maatehe; keeda seeso kenin waadadhonsa kenin imea upsi qolehe. <sup>23</sup> Iam jibbea Imbaam pir jibba ki jibbe. <sup>24</sup> Eedi abin waadadhaamon waadimanam kesa shaarinte i waadadhaamma, ini kena seeso maatehe. Keeda inin waadadhonam shadayse imbee Imbabeam kedi jibbidine. <sup>25</sup> Ogonoar kesa yigginte ‘Sun iam ke jibbade’ hamayse thaapadhoono konin thoothoadettsine.

<sup>26</sup> “Inta Imbakala inin nittsayno, kikalaar utayno, yeam wocchinsen gonin Manpasin nivon wodanka, kodi innon goynsa tarja ko tarje. <sup>27</sup> Yedi taar birara yedayse imbesana yenin dohonna, innon goynsa tarjeeda tarje.

## 16

<sup>1</sup> “Yena goa konin maatoamadettsi ogoam yena inta giydine. <sup>2</sup> Ayiwd eensa bukin raqiraar yeam bula ke bule; ogoraar saskayse pir yeam deesayna wul ‘Inta Barjosa waadima eedine’ kenin hamayno woda koda nive. <sup>3</sup> Ogoamaar yedar kenin hayayno Imbabee imbeam kenin dhesimonnnane. <sup>4</sup> Ko dahaannaar wodayn yeskenka, inin yena giyonam yenin bhocchoadettsi koam yena inta giydine.

### *Manpas Gazansa Waadimano*

“Yembesana kinka inin dohonna, ko wulam yena birayse giyma i garade. <sup>5</sup> Keeda iam nittsaadar yivayda yive. Yesa shaarira ‘Hamoa yive?’ hamayse iam oysea solehe. <sup>6</sup> Ta koam inin yena giyonna, yesa woylaminte sii qaabe thoothidine. <sup>7</sup> Inta yena gon ida giye: I yividiana, yena aga ko age. Harrna hambhidianna, i yivaamma wocchinsea yekal nivehe; i yividiana, kiam yekal nittsayda nittse. <sup>8</sup> Kidiar nivayse seesonbee, tipamonbee, pirdin goynbesa peendar dahaana eenam bhocchisa ki bhochise: <sup>9</sup> Seeson goynsa keam kinin bhocchisayno idar woylamin kenin qajimonnane; <sup>10</sup> tipamon goynsa keam kinin bhocchisayno Imbakal inin yivenabee keeda iam yenin haapiminnabene; <sup>11</sup> pirdin goynsaar keam kinin bhocchisayno peen koam wottsea Seethaandar konin pirdadhonnane.

<sup>12</sup> “Inin yena giyayno akar thoothi yer daane; ko dahaannaar ta yena i giydianna, yedar koda dethe. <sup>13</sup> Bere goninsa Manpasino konin nivon wodanka, gonin wulam yenin dhesoadettsi yeam entsa ko entse. Harrna hambhidianna, yinin qanson wulam koda giye; yikalanka konin giymonnane. Kodi os birante nivenam yena giya ko giye. <sup>14</sup> Inti maatonam tiyayse yena konin giyenna, iam gobsha ko gobshe. <sup>15</sup> Imbaso dohoono wul intine; ogonante ‘Innora tiyayse yena giya ko giye’ inin hamoono ogonane.

### *Yesa Siino Wozadar Konin Ookimayno*

<sup>16</sup> “Likka roorosa budobar iam haapattene; pir likka roorosa budobar iam haapeeda haape” kena ki hamade. <sup>17</sup> Kisa paanan yivayna eenasa waani waani eena “‘Likka roorosa budobar iam haapattene; pir likka roorosa budobar iam haapeeda haape’ pir, ‘Imbakal inin yivennane’ kisa hamintano hamin giyntane?” kinka kikal ke hamade. <sup>18</sup> “Ta keeda ‘likka roorosa’ kinin hamoono kisa hamin giyntane? Kinin giyenam dhesattone” hamayse kinka dhalqite ke dahade.

<sup>19</sup> Yesusaar kiam oysana kenin zagonam dhesayse kena yin ki giyade: “‘Likka roorosa budobar iam haapattene; pir likka roorosa budobar iam haapeeda haape’ inin hamonna ye kinka kiam kiam oyso? <sup>20</sup> Inta yena gon ida giye: Yedi eepeeda eepe, qayteeda qayte; peen kodar dohoono eeno ko hanna, wozadha ko wozadhe. Yediar sii eed yeda maate; ko dahaannaar yesa siino wozadar ookima ko ookime. <sup>21</sup> Maa adhiman roroa kosa yeskenka koda burqadhe. Ko dahaannaar naasin yinin adhonsa budonte, ‘Peen kodar naasi inta adhidine’ hamayse wozaka yisa gaalenam koda wale. <sup>22</sup> Ogodettsi yedi ta yesa woylaminka burqadheeda burqadhe. Ko dahaannaar pir yeam ida shede; yesa woylaminkaar wozadheeda wozadhe; yesa wozanamaar yekalanka tiyea hayyear solehe.

<sup>23</sup> “Ogo wodanka ikalanka yer kala hattear miskattene. Inta yena gon ida giye: Imba isa naabenka yenin misken wulam yena ima ki ime. <sup>24</sup> Ta koka yekka isa naabenka yer kala hattear miskeetene. Yesa wozano konin thoothoadettsi miskee; tiyeeda tiye.

<sup>25</sup> “Koam yena kamsika i giyade. Ko dahaannaar keeda kaara os kamsika inin giymino woda koda nive; ogo wodanka Imba goynsa yena may ida giye. <sup>26</sup> Ogo

wodanka isa naabenka miskeeda miske; intaar ‘Yena Imbaam ida miske’ yena hamat-tine. <sup>27</sup> Harrna hambhidianna, yedi iam yenin nashonna, Barjokalankaar inin nivonam gonне hamayse yenin tiyonna, Imba kidi yeam nasha ki nashe. <sup>28</sup> Imbakalanka utayse peen kodar i nivade; pir peen koam garayse Imbadar yivayda yive” kena ki hamade.

<sup>29</sup> Kisa paanan yivayna eenaar “Shedaa! Ta kamsika giyattane; may hada giye. <sup>30</sup> Wulam hanin dhesenbee hayyear haam oysa zaskiminbeam ta wodi dhesidine; ogona Barjokalanka hanin nivonam gonне hamayse wodi tiydine” kina ke hamade.

<sup>31</sup> Yesusaar yin giyayse kena ki maasade: “Ta yedi inin giyonam gonне hamayse yedi tiydu? <sup>32</sup> Yedi wul kalaa kalaa yesa onnadar thar thar hamayse yenin yivayno, iamaar imal yenin garayno woda niva ko nive, ogonoar ta yeskidine; ko dahaannaar Imba imbesana kinin dohonna, inta ta imaltehe. <sup>33</sup> Inka yena payyamoyn doadettsi inta yena ogoam giydine. Peen kodar yenin dehenka, gaale yedar yeska ko yeske. Ko dahaannaar kurtumbheebhode! Inta peen koam bashidine” kena ki hamade.

## 17

### *Yesus Imbaam Kinin Miskoono*

<sup>1</sup> Yesus ogoam yinin giyonsa budobar tura cecin shedayse yin giyayse ki miskade: “Imbo, wodano yeskidine; hasa Naasa haam kinin gobshoadettsi kiam gobshaa. <sup>2</sup> Hanin kina imaana wulna rooro wul lay daadhea sadan kinin imoadettsi een wuldar hayamo kina ha imade. <sup>3</sup> Gonin hama Barjo bish maataa hambee hanin nittsaa Yesus Kiristoos-beam kenin dhesoadeettsi rooro wul lay daadhea sada agaane. <sup>4</sup> Inin waadahoadettsi ina hanin imon waadimanam macchayse, peen kodar haam inta gobshidine. <sup>5</sup> Keeda Imbo, peen pijadhima birayse hakal isa dohon gobshinka ya pir iam hakal gobshaa.

<sup>6</sup> “Peen kodar dohon eensa shaarira ina hanin imaana eenana hasa naabenam kena inta dhettsidine. Kedi hanti ke dahade, inaar keam ha imade; hanin giyen upsinamaar kedi toolidine. <sup>7</sup> Ina hanin imoono wul hakalanka konin dohonam ta kedi dhesidine. <sup>8</sup> Harrna hambhidianna, ina hanin imon upsinam intaar kena imidine; kedi ogoam ke tiyade. Hakalankaar inin nivonam gon kedi dhesidine; hanin iam yittsonam kedi gonне hamayse tiydine. <sup>9</sup> Ina hanin imaana eenana haam ida miske; igina kedi hanti kinin dohonna, kena haam ida miske; peen kodar dohon een waanina haam miskattine. <sup>10</sup> Inti maataana wul hantine; hanti maataana wul intine; intaar kena gobshadhidine.

<sup>11</sup> “Keeda kaara os peen kodar inta dahattine, kedi peendar keda dee; inta hadar ida yive. Gazaa Imbo, igina eena wodettsi kalaa kinin maatoadeettsi ina hanin imon hasa naabenka keam toolaa. <sup>12</sup> Kembesana kinka peendar inin dohonka hanin ina imon hasa naabenka inta keam toolite i dahade; inta keam toolidine. Mathaap Gazante thaapadhoono konin thoothoadettsi agaa kayendar yivea ea bishkalanka kesa iira kala hattear kayadehe.

<sup>13</sup> “Taar hadar ida yive; isa dohoono wozano kenka konin thoothoadettsi peen kodar inin dohonka yerra iginaam ida giye. <sup>14</sup> Hasa upsinam kena inta imidine. Intaar peendar dahayna eenabesana kala inin dahaamadettsi kedi peendar dahayna eenabesana kala kinin dahaamonna, peendar dahayna eena keam jibbidine. <sup>15</sup> Siyonkalanka keam hanin tooloadettsi ida miske; peen kora keam hanin buloadettsi miskattine. <sup>16</sup> Intaar peendar dohon eenbesana kala inin dahaamadettsi, kedi peendar dohon eenbesana kalaatehe. <sup>17</sup> Goninka keam gazisaa; upsinoar hasa gonне. <sup>18</sup> Peendar dohon eendar iam hanin yittsonettsi, intaar keam yin peendar dohon eendar i yittsade. <sup>19</sup> Kedi gon gazimbhaana kinin doadettsi inta kena hamayse iam gazinsidine.

<sup>20</sup> “Kena bish dayma kinin giyen upsinam qansayse idar woylamin qajaynanaar haam ida miske. <sup>21</sup> Imbo, ya inka hanin dohondettsi, intaar hanka inin dohondettsi, igina taar wonka kinin doadettsi ida miske. Inin miskaynoar hanin iam yittsonam peendar dahayna eena gonне hamayse kinin tiyoadettsi, idar woylamin qajayna wul

kinka kala ke maate hamayse haam ida miske. <sup>22</sup> Wodi kinka kala wonin dohondettsi kediar kinka kala kenin maatoadettsi, ina hanin imon gobshinam inta kena imidine. <sup>23</sup> Intaar kenka inin dohondettsi, yaar inka hanin dohondettsi, kediar gon kinka kala kenin maatoadettsi haam ida miske. Peen kodar dohoono eeno iam hanin yittsonbee, iam hanin nashondettsi keam hanin nashonbeam ogoka dhesa ko dhese.

<sup>24</sup> "Imbo, peen pijadhima birayse iam hanin nashonna, ina hanin imon gobshinam kenin shedoadettsi, ina hanin imaana kedi taar inin dohonte imbesana kinka kenin doadettsi ida nashe. <sup>25</sup> Tipaa Imbo, peendar dohoono eeno haam dhesadehe. Inta haam dhesidine; iginaar hanin iam nittsonam kedi dhesidine. <sup>26</sup> Iam hanin nashoono nashimmakkono kesa iinte konin doadettsibee inta kesa iinte inin doadettsibe intaar hasa naabenam kena dhettsidine; pir kena dhettsayda dhetts" hamayse ki miskade.

## 18

### *Yesussa Banqin Eenayn Kiam Yedoono* Maat 26:47-56; Marq 14:43-50; Luq 22:47-53

<sup>1</sup> Yesus ogoam yinin giyonsa budonte, ogora utayse Qediroon baynsa saabar yisa paanan yivaynabesana kinka haagan kordhon haaminte yivayse ke ardade. <sup>2</sup> Yesusaar kisa paanan yivayna eenabete thoothi woda ogote kenin bukenna, yettsate kiam imea Yiwda pir raqinam dhesa ki dhese.

<sup>3</sup> Ogonante Yiwda Roome poolisanabee Ayiwd poolisanabeam yinka entsate raqin ogote ki nivade. Kedi Ayiwd poolisana gudullasa hayonabee Parisa eenabekalanka nittsadhaanane. Kediar paanoosbee, kuushabee, banqin koymobeam yinka bavate ke nivade.

<sup>4</sup> Yesus yidar yesken wulam dhesayse kekal nivayse, "Yedi hayyeame zage?" kena ki hamade. <sup>5</sup> Kediar "Naazret peen ea Yesusam woda zage" hamayse kina ke maasade. Yesus kena "Intane" ki hamade. Yettsate kiam imea agaa Yiwda pir kembesana kinka woyayse ki dahade. <sup>6</sup> Yesusaar "Intane" kena ki hamaysaka, kedi budoka yivayse peendar ke dhambade.

<sup>7</sup> Pir "Hayyeame zage?" hamayse keam ki oysade. Kediar kina yinin maasenka, "Naazret peen ea Yesusam woda zage" ke hamade. <sup>8</sup> Yesusaar kena "Intane' yena iam hamaati? Ta yenin zagea inta i hanna, kina eena ke yive; keam garee" ki hamade. <sup>9</sup> Ogonoar Yesus "Igina ina hanin imaanara eedi kala hattear kaysaatine" hamayse kinin giyoono upsino konin thoothoadettsine.

<sup>10</sup> Halpan dhaximbhaa Simoon Bhethiroosaar yisa halpanam gochayse gudullasa gebhaana waadadhea easa qaamia mizaqaam taxate ki dhabade; waadima easa nammo Malkoosne. <sup>11</sup> Yesusaar Bhethiroosna "Hasa halpanam halpan ooninte arsaa. Imba ina kinin imon gaalen wucimanam inta wucattinu?" kina ki hamade. <sup>12</sup> Ogora Roome poolisanabee, keam wottseabee, Ayiwd eensa hayonayn nittsaana poolisanabe Yesusam yedayse ke dhaxade.

### *Yesusam Gudula Hannadar Kinin Baadhoono* Maat 26:57-58; Marq 14:53-54; Luq 22:54

<sup>13</sup> Biraysear Qayappasa baysa Hannadar kiam entsate ke yivade; Qayappa wodan ogoka Ayiwd eensa gudullasa gebha kidine. <sup>14</sup> Qayappa "Eedi kalaa een wulna diydi ki hanna payyane" hamayse Ayiwd eensa entsanaam kiilaa kidine.

### *Bhethiroos Yesusam Kinin Marimoono* Maat 26:69-70; Marq 14:66-68; Luq 22:55-57

<sup>15</sup> Simoon Bhethiroosbee waa Yesussa paanan yivea eabe Yesussa paananka ke yivade. Ogonoar Yesussa paanan yivea ea gudullasa gebhaakal dhesadhaane; kidi gudul-lasa gebhaasa kerminte Yesusbesana ki ardade. <sup>16</sup> Bhethiroosaar mayante kerinkal ki

woyade. Ogona gudullasa gebhaakal dhesadhea waa Yesussa paanan yivea ea kerin toolen edonkal nivayse kombesana dhalqayse Bhethiroosam ki arsade. <sup>17</sup> Ogoni kerin toolayno waadiman edono Bhethiroosna “Ya pir ea agaasa paanan yivayna eenasa kalaatayu?” kina ko hamade. Kidi “Intatehe” ki hamade.

<sup>18</sup> Peenin kattsi qajenna, waadimayna eenabee poolisanabe nuu guttsayse nuunsa gasante woyayse kicardhite ke dahade; Bhethiroos pir kembesana kinka woyayse kicardhite ki dahade.

*Gudullasa Gebhaa Yesusam Kinin Oysoono  
Maat 26:59-66; Marq 14:55-64; Luq 22:66-71*

<sup>19</sup> Ogo wodanka gudullasa gebhaa Yesusam kisa paanan yivaynabee kisa timmir-inbesa kiam ki oysade. <sup>20</sup> Yesusaar kina yinin maasenka, “Inta peen kodar dohon een wulna may i giyade; Ayiwd eeno wul konin buken kosa bukin raqinbee Barjosa gazan ooninsa mayanbesa iir rooro wul ida dhettse; aachika kala hattear giyatine. <sup>21</sup> Ta harrnaa iam oyse? Inin giyenka qansaanaam oysaa. Kedi inin giyonam dhesa ke dhese” kina ki hamade.

<sup>22</sup> Ogoam kinin giyenka, ogote daahaana poolisanasa kalaa “Ta ya gudullasa gebhaana yin giyaysea maaso?” hamayse Yesusam ki cavade. <sup>23</sup> Yesus maasayse “Siya i giydianna, siyon inin giyonam tarja; gon i giydianna, harrnaa iam ceve?” kina ki hamade.

<sup>24</sup> Ogosa budobar Hanna Yesusam dhaxinka ki daaka gudullasa gebhaa Qayappadar kiam ki yittsade.

*Bhethiroos Yesusam Pir Kinin Marimoono  
Maat 26:71-75; Marq 14:69-72; Luq 22:58-62*

<sup>25</sup> Simumon Bhethiroos woyayse nuu kicardhite ki daaka, “Ya taar Yesussa paanan yivayna eenasa kalaatayu?” kina ke hamade. Kidiar “Intatehe” hamayse ki mari-made. <sup>26</sup> Gudullasa gebhaana waadimayna eenasa kalaa, Bhethiroosin qaamin taxaasa muldha maataa ea “Haaqan kordhon haaminte kimbesana kinka ha daaka haam haapaati?” kina ki hamade. <sup>27</sup> Bhethiroosaar pir “Kiam dhesattine” hamayse ki marimade. Ogo yin kinin marimenka, saanawa baacha ki qiiqade.

*Yesusam Bhilathoosdar Yedate Yiidhoono  
Maat 27:1-2bee 11-26be; Marq 15:1-15; Luq 23:1-25*

<sup>28</sup> Ayiwd eenam entsayna eena Yesusam Qayappakalanka peen wottseasa kermin iinte kiam arsota entsate ke yivade. Ogono wodano burin sedhimanne; kediari Paasikan\* galanam itsa keam zaskenna, yinin minngimoamadettsi peen wottseasa kermin iinte ardadehe. <sup>29</sup> Ogonante peen wottsea Bhilathoos mayan kekal utayse, “Ea kaam yelin bersensa kisa seesono hare?” hamayse keam ki oysade. <sup>30</sup> Kediari kina yinin maasenka, “Kaa ea siya waadadhea ki dahaamma, yedayse hadar ini kiam bavattone” kina ke hamade. <sup>31</sup> Bhilathoosaar “Yedi kiam entsate yivayse yennon yiggindettsi kidar pirdee” kena ki hamade. Ayiwd eenam entsayna eenaar “Wodi haydarar dembhi pirdi pirdayse wonin deesoadeettsi Roome yigginte wona giidhadehe” kina ke hamade. <sup>32</sup> Ogoam kenin giyoono Yesus hamin dhaaa dembhi kinin diyensa kinin giyoono upsino konin thoothoadettsine.

<sup>33</sup> Bhilathoosaar pir maatayse kermin iinte ardayse Yesusam eelayse, “Ayiwd eensa bitaa yaw?” kina ki hamade. <sup>34</sup> Yesusaar kina maasayse “Ya koam hanin giyayno hasa qaaboramoo? Waani eenow isa hana giyoono?” kina ki hamade. <sup>35</sup> Bhilathoosaar kina maasayse “Inta Ayiwd eediw? Haam yettsate ina imaana hasa peen eenabee gudullasa hayonabene. Ya haraa haya?” kina ki hamade. <sup>36</sup> Yesusaar maasayse “Isa bitamono peen koratehe. Isa bitamono peen kora ko hanna, Ayiwd eenam entsayna iam kenin yedoamadettsi ina waadimayna eena ini kembesana banqi keda kanse; yin

\* **18:28** “Paasika” hamen upsinam Haalin Mallan mathaapinsa macchinte thaapadhaanar shedaa.

ko dahaakaar isa bitamono peen koratehe” kina ki hamade. <sup>37</sup> Bhilathoosaar “Keeda ya bitiw?” kina ki hamade. Yesusaar maasayse “Inin bit dohonam hasa giydino gonne; inta goninna tarjana i adhadhade, ogona pir peen kodar i nivade. Gon maataa wul isa upsinam kida qanse” kina ki hamade. <sup>38</sup> Bhilathoosaar “Gonno hare?” kina ki hamade.

Koamaar yin giyayse pir Ayiwd eendar utayse, “Inta kisa kala hattear seeso haapaa-tine. <sup>39</sup> Ko dahaannaar Paasikan rooroaka dhaxadhon eensa shaarira eedi kalaam inin yena bulea dambi yesa daane. Ta keeda Ayiwd eensa bitaam yena dhaxira inin buloadettsi yedi nashee nasho?” kena ki hamade. <sup>40</sup> Kediar “Kiamtehe! Wona Barbaanam bulima” hamada pir ke ilatade. Barbaanaar eedi koymo buurite itseane.

## 19

### *Poolisana Yesusdar Kenin Bagoono*

*Maat 27:27-31; Marq 15:16-20*

<sup>1</sup> Ogo wodanka Bhilathoos Yesusam poolisanaka ki qansisade. <sup>2</sup> Poolisanaar ukumbha qorayse kisa metendar ke wodade; pir apala zoo kiam ke qattsade. <sup>3</sup> Kikal theedayse, “Ayiwd eensa bitaa, payyamo hana ko dee” hamada kiam ke bagade; pir kiam cavite ke dahade.

<sup>4</sup> Bhilathoosaar pir mayanka utayse, “Marrato! Ea kaasa seeso kala hattear inin haapaamonam yenin dhesoadettsi mayanka kiam yena ida bule” kena ki hamade.

<sup>5</sup> Yesusaar ukumbhanka qurayse ashkadhonam yisa metendar wodayse apala zoo qaadhayse mayanka ki utade. Bhilathoosaar “Marrato, yesa ea kash!” kena ki hamade.

<sup>6</sup> Gudullasa hayonabee kesa poolisanabe kiam yinin haapenka, “Kiam ziitima! Zi-itima!” hante ke ilatade. Bhilathoosaar “Inta kisa seeso kala hattear inin haapaamonna, yedi kiam entsate yivayse ziitee” kena ki hamade. <sup>7</sup> Igina Ayiwd eenam entsaynaar kina yinin maasenka, “Wosa yiggi daane; yiam Barjo Naas kinin hayonna, wosa yigginka diya kiam ko zaske” kina ke hamade.

<sup>8</sup> Ogonante Bhilathoos upsin ogoam yinin qansenka ini hamora sagi ki kurtumbhade.

<sup>9</sup> Pir maatayse kerminsa iinte ardayse Yesuskal “Ya hamora nivaa?” kina ki hamade. Yesusaar yer kala hattear kina maasadehe. <sup>10</sup> Ogonante Bhilathoosaar “Ina giyattanu? Haam dhaxira bulanabee ziitanabe isa hayamo dohonam ya dhesattanu?” kina ki hamade. <sup>11</sup> Yesusaar kina yinin maasenka, “Barjokala hana imbhamma idar hasa hayamo solehe; ogonante iam yettsate hana imaa easa seesono hannora sage” kina ki hamade.

### *Yesusdar Dembhin Pirdin Pirdadhoono*

*Maat 27:26; Marq 15:15; Luq 23:24-25*

<sup>12</sup> Ogosa budonte Bhilathoos Yesusdar pirdima yittsana ki zagade. Ko dahaannaar Ayiwd eeno kina yi giyna: “Ya ea kaam pirdima ha garina, ya Roome peen bitaasa nashotehe; meten yinnonam bit hayayna wul Roome bitaam jibbaynane, nashay-natehe” hante ko ilatade. <sup>13</sup> Bhilathoosaar dhalqin ogoam qansayse Yesusam mayanka ki bulade. “Seeni Labha” hambhen raqinte pirdin borkotondar ki dooqade; ogono ranqo Ibra aponka “Gebeta” koda hambhe. <sup>14</sup> Paasikan\* rooroana ashkimbhadrhayno rooro ko dahade; wodanoar savaat laxaddhane.

Bhilathoosaar Ayiwd eenna “Marrato, yesa bitaa kash!” kena ki hamade. <sup>15</sup> Kediar “Ea kaam kaysima! Kaysima! Kiam ziitaa!” hante ilataate ke waajade. Bhilathoosaar “Yesa bitaam i ziito?” kena ki hamade. Gudullasa hayonaar “Roome peen bitaara ab bit wosa solehe” hamayse kina ke maasade. <sup>16</sup> Ogo wodanka masqalindar konngayse kiam kinin ziitoadettsi kena saskate ki imade.

<sup>19:7</sup> Lewi 24:16. \* <sup>19:14</sup> “Paasika” hamen upsinam Haalin Mallan mathaapinsa macchinte thaapadhaanar shedaa.

*Yesusam Masqalindar Ziitadhoono  
Maat 27:32-44; Marq 15:21-32; Luq 23:26-43*

Ogosa budonte Yesusam yedayse ke yivade. <sup>17</sup> Kidiar yinin ziitadhen masqalinam kedaye “Eedisa Metedettsi Maataa Raq” way Ibra aponka Golgota hambhea raqadar ki utade. <sup>18</sup> Ogo raqintear eedi lamaa Yesussa warkatambarbee mizaqimbarbe hayayse, Yesusamaar kesa shaarinte masqalindar konngayse ke ziitade.

<sup>19</sup> Bhilathoosaar pir thaapi thaapayse masqalindar ki ziitisade. Thaapadhoono thaapino “Ayiwd eensa bitaa Naazret ea Yesus” hamaynone. <sup>20</sup> Yesusamaar ziitadhoono ranqo katamankal theedi konin dohonna, Ayiwd eensa thoothina eena thaapadhon ogoam ke nabbabade; thaapadhoonoar Ibrabee, Roomebee, Girikbe aponkane. <sup>21</sup> Ogonante Ayiwd gudullasa hayona Bhilathoosna, “‘Kidi “Inta Ayiwd eensa bitaane” ki hamade’ hamayse thaapaa; ‘Ayiwd eensa bitaa’ hamayse thaapaabhode” kina ke hamade. <sup>22</sup> Bhilathoosaar “Inin thaapenam inta thaapidine” hamayse ki maasade.

<sup>23</sup> Poolisanaar Yesusam yinin ziiton wodanka kisa apalanam tiyayse ke wulna konin yeskoadettsi raq oyiditar ke kashade. Jaagadhaama apala gudubhaam pir ke tiyade. Apallo ogonoar bhaara choo nukindar ko ashkadhadde. <sup>24</sup> Ogonante kinka kikal “Hayna konin yeskenam dhesana daran itha wo dhabe; koam hattsattone” ke hamade.

“Isa apalanam kinka ke kashimade;

isa apalandar itha ke dhabade”

hamayno Mathaap Gazante thaapadhoono upsino konin thoothoadettsi poolisanaar yin ke hayade.

<sup>25</sup> Ogo wodanka Yesussa indanbee, indansa indanaanbee, Qeliyobha geshon Mayriyambee, Megdela peen edon Mayriyambe kisa masqalinkal theedi woyayse ke dahade. <sup>26</sup> Yesusaar indanbee yisa paanan yivayna eenasa yinin nasheabeam kikal woyayse ke daaka keam haapayse indanka “Indo, hasa naasaam sheda!” kona ki hamade. <sup>27</sup> Ogora yisa paanan yiveana “Shedaa! Inda<sup>†</sup> kosha” kina ki hamade. Keeda agaa wodara yedayse kisa paanan yivea oonin yinnondar koam entsate ki yivade.

*Yesusin Diyoono  
Maat 27:45-56; Marq 15:33-41; Luq 23:44-49*

<sup>28</sup> Ogosa budonte Yesus kisa giidhon yer wulin maqonam dhesayse, Mathaap Gazante thaapadhoono upsino konin thoothoadettsi “I dhee bardhade” ki hamade. <sup>29</sup> Ogotear woyni thorkaa wucadhen koymonka thoosadhaa dahade; kediawoynin thorkonam saaroka tittsayse yisoobh hambhea hattasa koolinka kisa apondar ke yeskisade. <sup>30</sup> Yesusaar woynin thorkonam yinin wuconsa budonte, “Keeda maqidine” hamayse meten yinnonam yirk hayayse ki diyade.

*Yesussa Demente Banqinka Uxadhoono*

<sup>31</sup> Ukunsen rooroana ashkimbhahayno rooro konin dohonnabee agaa ukunsen rooroa kattsi detha rooro kinin dohonnabe, Ayiwd eenam entsaynaar ziitadhaana eenasa leesino ukunsen rooroaka masqalindar konin doamadettsi saana ke diye kesa gubeezinam aysayse keam masqalira hanchadhoodettsi Bhilathoosam ke miskade. <sup>32</sup> Poolisanaar nivayse kimbesana masqalindar ziitadhaana eenasa gubeezinam ke aysade. <sup>33</sup> Yesuskal kenin nivenka kidi birayse kinin diyonam shadayse kisa gubeezinam aysadehe. <sup>34</sup> Ko dahaannaar poolisanasa kalaa kisa demenam banqika ki uxade; saanawa zombhibee noqobe ko utade. <sup>35</sup> Ogoam haapaar tarjidine; kisa tarjamonoar gon. Yedi pir gonne hamayse yenin tiyoadettsi kidi gonin kinin giyenam kida dhese. <sup>36</sup> Ogono yin maatoono “Kisa lepinsa kala hattear aysadhehe” hamayse Mathaap

19:24 Maz 22:18.    † 19:27 Kaa raqaate “Inda kosha” hamayno Girik peen aponka “Handa kosha” koda hame.  
19:36 Ut 12:46.

Gazante thaapadhoono upsino konin thooothoadettsine. <sup>37</sup> Pir mathaapinsa waani raqinte “Agaa yinin uxaa eam sheda ke shede” koda hame.

*Yesusam Duukadhoono  
Maat 27:57-61; Marq 15:42-47; Luq 23:50-56*

<sup>38</sup> Ogosa budonte Ayiwd eenam entsaynana yinin kurtumbonna, aachika Yesussa paanan yivea Armatias katamara nivaa Yoseep Yesussa leesinam tiyana Bhilathoosam ki miskade. Bhilathoosaar leesinam kina imbhoodettsi ki guyade. Ogonante nivayse Yesussa leesinam ki tiyade. <sup>39</sup> Pir birayse sootinka Yesuskal nivaa Niqodimos eedi kalaa kaysa apo tabhi kiloaddha gochea kerbe hambhen gaamen shittonbee walqobeka worsadhonam bavate ki nivade. <sup>40</sup> Yesussa leesinamaar tiyayse Ayiwd eenin qunthen dambindettsi qunthayse gaamen shittonam laalayse apalanka kiam ke ochade. <sup>41</sup> Kinin ziitadhon raqinkal theedi haaqa kordhaa haami ko dahade; haaqan kordhon haaminte eedin duukadhaama duuki oolo ko dahade. <sup>42</sup> Ogonante duukin ranqo theedi konin dohonnabee Ayiwd eensa ukunsen rooroana ashkimbahayno rooro konin dohonnabe Yesussa leesinam ogote ke duukade.

## 20

*Yesusin Dembhira Dhaabhoono  
Maat 28:1-10; Marq 16:1-8; Luq 24:1-12*

<sup>1</sup> Gabansa rooroa bira Wuudi seddhiman peen thipa daaka, Megdela peen edono Mayriyam Yesussa duukindar ko yivade; duukin oolon shupadhoono senno apora gunngumayse ko daaka ko haapade. <sup>2</sup> Kodiar gobate Simoon Bhethiroosbee Yesusin nashea kisa paanan yivea waabekal nivayse, “Imba Yesussa leesinam duukira ke tiyade; hamote kiam kenin wodonam dhesattone” kena ko hamade.

<sup>3</sup> Ogonante Bhethiroosbee Yesussa paanan yivea waabe utayse duukindar yivan ke yedade. <sup>4</sup> Lamaanaar kinka gobite ke daaka, kesa waa Bhethiroosam saana gobaka duukinam birayse ki yeskade. <sup>5</sup> Yirk hamayse kinin shedenka, leesinam yinka ochadhoono apallo ogote ko dahaysaka ki haapade; ko dahaannaar kidi duukinte ardadehe. <sup>6</sup> Simoon Bhethiroosaar kisa budonte nivayse duukinte ki ardade; Yesussa leesinam yinka ochadhoono apallo ogote ko daaka, <sup>7</sup> pir kisa meten ochadhaa apalam, kisa leesinam ochadhon apalanbesana dayma yimal raq abir ki daaka ki haapade. <sup>8</sup> Ogo wodanka birayse duukindar yeskaa Yesussa paanan yivea waa duukinsa iinte ki ardade; ogora shedayse Yesus dembhira kinin dhaabbonam gonne hamayse ki tiyade. <sup>9</sup> “Dembhira dhaabha kiam ko zaske” hamayno Mathaap Gazante thaapadhon upsinam akar kedi dhesadehe. <sup>10</sup> Ogora kedi lamaana onna yinnadar maatayse ke yivade.

*Yesus Megdela Peen Edon Mayriyamna Kinin Haapadhoono  
Marq 16:9-11*

<sup>11</sup> Mayriyam eepada duukinkal ko woyade. Pir eepada yirk hamayse duukinsa iinaam ko shedade. <sup>12</sup> Apala cawli qaadhaana Barjosa gaanana lamaana Yesussa leesin wodadhon raqinsa kalaa metembar, lansoar roonbar dooqayse ke daaka keam ko haapade. <sup>13</sup> Kediar “Ya edono, harrnaa eepe?” kona ke hamade. Kodiar “Isa Imbaam kedi tiydine; hamote kiam kenin wodonam dhesattine” kena ko hamade.

<sup>14</sup> Ogoam yin giyayse budoka wal hamayse konin shedenka, Yesus ogote woyayse ki daaka kiam ko haapade; Yesus kinin dohonom kodi dhesadehe. <sup>15</sup> Yesusaar “Ya edono, harrnaa eepe? Hayyeama zage?” kona ki hamade. Kodiar haaqan kordhon haaminte waadadhea eedi kona kinin maatonna, “Imbo, ha kiam tiydianna, hamote hanin wodonam ina giyaa; intaar kiam tiyayda tiye” kina ko hamade. <sup>16</sup> Yesusaar “Mayriyam” kona ki hamade. Kodiar kidar wal hamayse Ibra aponka “Rebuuni!” ko

hamade; kosa bulinoar “Dhettsea” hamintane. <sup>17</sup> Yesusaar “Akar Imbadar tura inin yivaamonna, iam kaamaabhode; ko dhaaannaar imbanaanakal yivayse, ‘Inta imbee yembesa Imba maataa, pir imbee yembesa Barjo maataakal ida yive’ hamayse kena giyaa” kona ki hamade.

<sup>18</sup> Ogona Megdela peen edono Mayriyam Yesussa paanan yivayna eenakal yivayse, “Imbaam inta haapidine” kena ko hamade. Ogora Yesusin kona giyonam kena ko giyade.

### *Yesus Yisa Paanan Yivayna Eenana Kinin Haapadhoono*

*Maat 28:16-20; Marq 16:14-18; Luq 24:36-49*

<sup>19</sup> Agaa gabaasa biraa roroa Wuudi sootin Yesussa paanan yivayna eena kinka bukayse, Ayiwd eenam entsaynaam kurtumbhintaka kerinam yidar diithayse ke daaka, Yesus kekal ki nivade. Kesa shaarintear woyayse, “Payyamo yena ko dee” kena ki hamade. <sup>20</sup> Yin giyayse yisa aaninbee demenbeam kena ki dhahade. Kisa paanan yivayna eenaar Imbaa Yesusam yinin haapenka kattsi ke wozadhade.

<sup>21</sup> Yesus pir “Payyamo yena ko dee; Imba iam kinin yittsondettsi inta taar yeam ida yittse” kena ki hamade. <sup>22</sup> Yin giyayse kedar uf hamayse, “Manpas Gazanam tiyee. <sup>23</sup> Yedi eensa seesonam ko shidhe ye hamina, kesa seesono kena shidha ko shidhe; yedi eensa seesonam ye garima, kenaar gardhehe” kena ki hamade.

### *Yesusbee Toomaasebe*

<sup>24</sup> Ko dhaaannaar Yesusin niven wodanka tabhi lamaanasa kalaa, Didimos hambhea Toomaase kekal qolehe. <sup>25</sup> Yesussa paanan yivaynasa waani “Imbaam wo haapade” kina ke hamade. Kidiar “Kisa aaninte konngadhonsa madanam i haapaamma, isa aaninsa surkenka kisa konngadhon raqinam i kaamaamma, kisa uxadhon demenam isa aaninka i kaamaamma gonnie hamayse tiyattine” kena ki hamade.

<sup>26</sup> Rooro lankaysa budonte kisa paanan yivayna eena tapir ooninsa iinte ke dahade; Toomaasear kembesana kinka ki dahade. Kerro diithimi ko daaka Yesus kekal nivayse kesa shaarinte woyayse, “Payyamo yena ko dee” kena ki hamade. <sup>27</sup> Ogosa budonte Toomaasena “Hasa aaninsa surkenka isa annaam kaamayse shedaa; aanin hannonka isa uxadhon demenam kaamaa. Idar woylam qajaa, qothimaabhode” kina ki hamade. <sup>28</sup> Toomaasear “Isa Imbaa, isa Barjoa!” hamayse kina ki maasade. <sup>29</sup> Yesusaar “Iam hanin haaponna idar woylamina qajade; haapima idar woylamin qajayna eena gobshadhaanane” kina ki hamade.

### *Mathaapa Kaasa Qaabono*

<sup>30</sup> Yesusaar mathaapa kaate thaapadhaama thoothi tarshea yer yisa paanan yivaynasa birante waadadhidine. <sup>31</sup> Ko dhaaannaar koam thaapadhoono Yesus Barjoyn qadhaa Kiristoos, Barjo Naas kinin dohonam gonnie hamayse yenin tiyoadettsibee kidar woylamin qajayse kisa naabenka sadaka yenin doadettsibe hamaysene.

## 21

### *Yesus Yisa Paanan Yivayna Tobbhaanana Kinin Haapadhoono*

<sup>1</sup> Ogosa budonte Yesus Thibiriyyadoos bazinsa aponte yisa paanan yivaynakal pir ki haapadhare. Kinin haapadhoonoar yinne:

<sup>2</sup> Simoon Bhethiroosbee, Didimos hambhea Toomaasebee, Galila peensa Qaana katamara nivaa Natinaveelbee, Zabdoos naanabee, Yesussa paanan yivaynasa lamaana waanibe kinka ke dahade. <sup>3</sup> Simoon Bhethiroos “Inta kaaran qazota ida yive” kena ki hamade. Kidiar “Wodi hambesana yivooda yive” kina ke hamade. Utayse bazindara sagadhen gonngalante ardayse ke yivade; sootin ogo kaara kala hattear yedadehe.

<sup>4</sup> Peen sedhaysaka Yesus bazinsa aponte ki woyade; kisa paanan yivayna eena Yesus kinin dohonam dhesadehe. <sup>5</sup> Yesusaar “Naanato, kaara yekal daaw?” kena ki hamade.

Kediar “Qolehe” hamayse kina ke maasade. <sup>6</sup> Kidiar “Kaaran qazadhen zaaninam bazindara sagadhen gonngalansa mizaqimbar dhabee; yedeeda yede” kena ki hamade. Ogonante kediar ke dhabade; thoothi kaaranin yedadhon, gochayse bulano keam bashidine.

<sup>7</sup> Yesusin nashea kisa paanan yivea ea Bhethiroosna “Kaa kidi Imbane!” kina ki hamade. Ogonante Simoon Bhethiroos Imbaa kinin dohonam yinin qansenka, pundiri yinin dohonna apalan yinnonam qaadhaye bazinte ki bhulade.

<sup>8</sup> Yesussa paanan yivayna waani eedi tabhi kaysa dhundhuma bish bazinsa apora kenin pegadhonna, kaaran iir thoothon zaaninam gochayse bazindara sagadhen gonngalanka ke nivade.

<sup>9</sup> Gonngalara peendar kenin utenka, balashabee nuun qolshinandar wodadha kaarabe ke haapade. <sup>10</sup> Yesusaar “Ta yenin yedonkaarara bevee” kena ki hamade. <sup>11</sup> Simoon Bhethiroosaar bazindara sagadhen gonngalante ardayse eedi tobbhaa kaysa apo tabhi makkam gembha kaaranaka thoothon zaaninam peendar ki gochade; ogoad-dha hamon kaaran ko yedaakaar zanno havadehe.

<sup>12</sup> Yesusaar “Kote nivayse itsee” kena ki hamade. Kisa paanan yivaynasa kala hattear “Ya hayne?” hamayse kiam oysana zagaa eedi qolehe; Imbaa kinin dohonam kedi dhesidine. <sup>13</sup> Yesus balashanam tiyayse kena ki imade; kaaranamaar ogodettsi kena ki imade. <sup>14</sup> Yesus dembhira yinin dhaabhonsa budonte yisa paanan yivaynana kinin haapadhenka kono kisa goyt makkansone.

### *Yesusbee Bhethiroosbe*

<sup>15</sup> Galan kenin itsensa budonte Yesus Simoon Bhethirooskal “Wannissa naasa\* Simoon, kinara sagi iam ya nashaa nasho?” kina ki hamade. “Ee, Imbo, haam inin nashenam ya dhesaada dhese” kina ki hamade. “Isa anqanaam gisha!” kina ki hamade.

<sup>16</sup> Pir lango “Wannissa naasa Simoon, iam ya nashaa nasho?” kina ki hamade. “Ee, Imbo, haam inin nashenam ya dhesaada dhese” kina ki hamade. “Isa yaanaam gisha!” kina ki hamade.

<sup>17</sup> Makkanso goyt “Wannissa naasa Simoon, iam ya nashaa nasho?” kina ki hamade. Makkanso goyt “Iam ya nashaa nasho?” kinin hamonna Bhethiroos woylaminka yisa atayse, “Imbo, ya wulam hada dhese; haam inin nashenam ya dhesaada dhese” kina ki hamade. Yesusaar “Isa yaanaam gisha! <sup>18</sup> Inta hana gon ida giye: Ya barsh hanin dohonka hasa qalbathanam karnante hanti dhaxayse hanin nashendar hada yive. Ko daahaannaar hanin gecchenka aanin hannonam hada pishke; eedi ab hasa qalbathanam karnante hana kida dhaxe; yivana hanin nashimondar haam kida entse” kina ki hamade. <sup>19</sup> Hamindettsi dembhika Barjoam kinin gobshenam kina eshkana ogoam ki guyade. Ogoamaar yin guyayse, “Isa paanan nivaa” kina ki hamade.

### *Bhethiroos Waa Yesussa Paanan Yiveasa Kinin Oysoono*

<sup>20</sup> Bhethiroos budoka wal hamayse kinin shedenka, Yesusin nashea kisa paanan yiveam kesa paananka kinin nivenka kiam ki haapade. Kidi anngala sootin galandar kenin dohon wodanka Yesussa sadankal theedayse, “Imbo, haam yettsate imea hayne?” hamayse oysaa kidine. <sup>21</sup> Bhethiroosaar kiam haapayse Yesusna “Imbo, ea kaa keeda hamin ki hame?” kina ki hamade. <sup>22</sup> Yesusaar “Inin nivenka yekka kinin doadettsi i zagidianna, haam gidir arsoono hare? Ya isa paanan nivaa!” kina ki hamade.

<sup>23</sup> Ogonante agaa Yesussa paanan yivea ea “Dembhi keeda diyehe” hamayno dhalqino imbaanaanasa shaarinte ko qansimade. Ko daahaannaar Yesus “Inin nivenka yekka kinin doadettsi i zagidianna, haam gidir arsoono hare?” ki hamade; “Dembhi diyehe” hamadehe.

\* 21:15 21:15-17: “Wannissa naasa Simoon” hamenam Maat 16:17dar “Yoona naasa Simoon” koda hame.

<sup>24</sup> Yerra iginana tarjaabee thaapaabe kisa paanan yivea ea agaane; kisa tarjamonoar gon konin dohonam dhesooda dhese. <sup>25</sup> Waani pir Yesusin waadadhoono thoothi yer daane; wulam kalaa kalaa thaapadhidianna, ini thaapadhayna mathaapinana peeno kono yeekehe hamayse ida bhocche.

## Kiristoos Yisa Tarjamonnante Kinin Yittsaana Eenasa Waadimano

### *Ardinta*

Yittsadhaanasa Waadiman mathaapino Luqaas Toploosna kinin thaapaana mathaapinasa langoane. Luqaasin thaapaa bira mathaapa Yesus Kiristoossa dhacchintan upseane; ogonoar Yesus kinin waadadhonbee dhettonbeam koda dhee. Kaa langoa mathaapa Yesus kinin kamaana yittsadhaana eena waadimanam hamin kinin yedonam koda dhee.

Ogodeltsi Luqaas eedi makkam kaysa apo dongaddha levenka yekka dohon Barjodar woylemin qajadhensa biron eerinam ki thaapade. Ogo eerino dhaqintasa giyayno payya upsine. Luqaas eerinsa yedidino Yesusin Betelemir kinin adhadhonbee gishiman gishaynasa tarjamonbene. Kisa eerinsa macchindar Bhawloos Roome katamante dhaxadhayse payyamoka Yesus Kiristoossa giyada kinin tarjonam Luqaas ki thaapade.

Ko Yittsadhaanasa Waadiman mathaapinam Luqaas Manpas Gazanka entsadhye ki thaapade. Imbaa Yesus cecindar ki yivima birayse kisa paanan yivaynana kinin giyoono macchino upsino "Manpas Gazanin yedar hanchon wodanka kantanam yeda tiye" hamaynone. Ogo qaabe yinindar hayhen upsinin thoothayno yittsadhaanasa waadiman mathaapinte may thaapadhidine. Yesussa paanan yivayna Kiristoossa kinin tarjonbee waadadhonbe wul Manpas Gazanka entsadhye kisa kantankane. Kedi maatayse maatayse Manpas Gazanka ke thoothade. Dhabibee, pakalmakkobee, kiilimenbeam zasken goynka Manpas Gazano Barjodar woylem qajaynaka waadadhite ko dahade. Manpas Gazansa nivintanka Ayiwd eenabee, Sammaria eenabee, Ayiwdtay hamma eenabe kinka kala maatintanam haapayse gebhi miske ooni ke maatade.

Yittsadhaanasa Waadiman mathaapinte haapadhayna eenara Bhethiroosbee Bhawloosbena raq gebhi imbhidine. Bhethiroosin waadadhonam kashi 1-12dar, pir Bhawloosin waadadhonam kashi 13-28dar thoothi koda haapadhe. Yerusaalemir woysadhon misken ooninsa bira entsaa Bhethiroosne. Yerusaalemsa gasante dohon raqinte, kamsina Sammariabee Qesaariabe, Bhethiroos waadadhima igin misken onna woyadehe. Yiwda peera ab, Sooria peera yedayse Roome katamanka yekka Barjosa dhacchintan upsinam giyan waadimanam thoothika waadadhaa Bhawloosne. Bhawloos Galatiabee, Moqodooniabee, Akayabee, Isiya peentebe misken onnaam ki woysade. Kiristoosdar kesa woylemin qajintanka wocchimbhayse ke gebhe zasken timmirinbee kiilimenbeam ki imade.

Mathaapasa aapi maataa bhocchea Yittsadhaanasa Waadiman mathaapinte 1:8dar koda haapadhe. Mathaapaam raq oydidar kashana dandima ko dandime:

1. Ardinta: Yittsadhaanana Yesusin elqimoono (1:1-11)
2. Barjosa dhacchintan upsino Yerusaalemir: Misken ooninsa birono (1:12-8:3)
  - a) Bhethiroosin waadadhoo (1:12-5:42)
  - b) Isthipaanoosin waadadhoo (6:1-8:3)
3. Barjosa dhacchintan upsino: Sammariabee Yiwda peentebe misken ooninsa workidino (8:4-11:18)
  - a) Pilhoosin waadadhoo (8:4-40)
  - b) Sawl waadimansa birono (9:1-31)
  - c) Bhethiroos waadimansa macchino (9:32-11:18)
4. Barjosa dhacchintan upsino peensa macchinka yekka konin yeskoono (11:19-28:31)
  - a) Barnabaasin waadadhoo (11:19-12:25)
  - b) Bhawloosin waadadhoo (13:1-21:16)

c) Bhawloosin Yerusaalembee, Qesaariabee, Roomeber Barjosa dhacchintan upsinam kinin giyoono (21:17-28:31)

Kaa mathaapa Haali Mallan mathaapin wulam kinka kalaa kida haye. Oynna Barjosa Dhacchintan mathaapinadar yedadhon eerinam Yittsadhaanasa Waadiman mathaapinte koda maqe. Kiristoos peen kodar sadanka kinin dohonsa budonte kisa tarjamonnante Yittsadhaanasa Waadimano koda guttse. Imbaa Yesus Maatoos 16:18dar misken ooninsa kinin giyonin thoothonam Yittsadhaanasa Waadiman mathaapinte ko thaapadhade. Pir kaa mathaapa waani warqannar misken ooninna imben timmirinna goyti kida ashke.

Ogodeltsi misken onna hamin kinin yedadhonbee, ena daahaana entsanabee, misken onnasa gebhintanbeam wonin oysea thoothi oysimesa malsino kaa mathaapaate koda haapadhe. Bhawloos warqatinam kinin thaapoono misken onna hamin kinin woysadhonbee warqatinte thaapadhoono bhocchino ena dohon misken ooninte waadimadar hamin kinin hacchonbeam koda dhee. Birono misken ooninam woysabee, tarjabee, Barjosa dhacchintan upsinam hamin workisa zaskenbeam may koda dhee.

Yittsadhaanasa Waadiman mathaapino Manpas Gazansa waadimano kattsi zaskayno konin dohonam koda giye. Ena dohoono misken onno ogoam dhettsa bish dayma, yisa sadanka may konin haaponbee konin dhesonbene.

<sup>1-2</sup> Toplooso, Yesus waadiman yinnonam yinin yedon wodara cecindar yinin yivenka yekka, kinin waadadhonbee dhettsone wulam biraa mathaapadar inta thaapidine. Cecindar kinin utensa birayse yisa tarjamonnante kamayse yinin yittsaana eenana Manpas Gazanka “Yin hayee” hamayse ki giyade. <sup>3</sup> Ogonoar dembhira yinin dhaabhonsa budonte, eedi lamaa kaysa rooroka yekka thoothi tarjaka may kena sadanka dahayse haapadhaate Barjosa bitamonam kena giyaate ki dhahade. <sup>4</sup> Kembesana kinkaar yinin dohon wodanka Yerusaalemra kinin utoamadettsi kena ki giyade. Ko daahaannaar, “Inin yena giyoono Imba ‘Yena imayda ime’ kinin hamonam toolee. <sup>5</sup> Harrna hambhidianna, Wannis eenaam noqoka ki shivade; yedi likka roorosa budonte, Manpas Gazanka yeda shiidhe” kena ki hamade.

### *Yesus Cecindar Kinin Utoono*

<sup>6</sup> Kediar kinka bukayse kenin dohonka, “Imbo, Israveel eena maataate kinin bitimoadettsi hanin hayayno wodano taakiw?” hamayse kiam ke oysade. <sup>7</sup> Yesusaar kena yinin maasenka, “Imba yisa hayamonka kinin bhocchon wodanbee levenbeam ye dhese yena imbhadehe. <sup>8</sup> Ko daahaannaar Manpas Gazanin yedar hanchon wodanka kantanam yeda tiye; Yerusaalembee, Yiwda peen wulbee, Sammaria peenbe, pir peensa gasanka yekka, isa tarja yeda maate” ki hamade.

<sup>9</sup> Yesus ogoam yinin giyonsa budonte, kiam keda shedika tura cecindar ki yivade; polonoar kesa aapira aachayse kiam ko tiyade. <sup>10</sup> Kinin yivenkaar kedi tura cecin shedayse ke daaka, marrato! Apala cawli qaadhaana eena lamaa kesa gasante ke woyade. <sup>11</sup> “Yedi Galila eenato, tura cecin shedada harrnee woyaa? Agaa yekalanka cecindar tiidhaa Yesus cecindar kinin yivenka yenin shedaadettsi, yin maataate kida nive” kena ke hamade.

### *Yiwdas Raqante Maatiasam Kambhoono*

<sup>12</sup> Ogo wodanka Dabirezayt hambhen dhukara Yerusaalemdar ke maatade; Dabirezayt dhukano Yerusaalemkal theedine.\* <sup>13</sup> Yerusaalem gidir nivayse yinin dehen ooninsa zulondar woysadhon oonin ke utade. Kediar Bhethiroosbee, Wannisbee, Yayqoobbee, Indiriasbee, Pilhoosbee, Toomaasebee, Barteleemoosbee, Maatoosbee, Ilpoos naasa Yayqoobbee, peen yinnonna bish qaabea Simoonbee, Yayqoob naasa

\* <sup>1:12</sup> “Theedine” hambhayno Girik mathaapinte, “Theedine; ukunsen rooroaka yiidhayno goytine” koda hame. Ogono taaka shii kalaaddhane.

Yiwdabe, <sup>14</sup> pir maa waanibee, Yesussa indan Mayriyambbee, Yesussa kannabe kinka maatayse rooro wul Barjoam miskana bhocchi kalaaka bukite ke dahade.

<sup>15</sup> Ogo wodanka bukaana eedi lax kaysa maatayna Yesussa paanan yivayna eenasa shaarinte Bhethiroos woyayse yin ki giyade: <sup>16</sup> “Imbanaanato, Yesusam yedaana eenasa entsaa Yiwdana Manpas Gazano birayse Dawtsa aponka kinin giyoono Mathaap Gazante thaapadhoono thootha ko zaskade. <sup>17</sup> Yiwda wombесана paydadhaa, ko Barjosa waadimanna kambhaa eedi ki dahade” ki hamade.

<sup>18</sup> Ea agaa kisa siyon waadimanna kashadhon koymonka pee ki shanade. Kidi gupana ki dhambaysaka kisa iino bhaqayse nuqurtino ko utade. <sup>19</sup> Ogoro yerro Yerusaalem gidir dohon een wulkal ko dhesimade. Ogonante peen ogoam kesa aponka “Akeldama” hamayse ke eelade; kosa bulinoar “zombhi pee” hamintane.

<sup>20</sup> Bhethiroos pir “Ogoroar yin konin dohoono Mazmur mathaapinte ‘Kinin dahayno ranqo eedin qolmino ko dee; eediar gidir ko dahabhoode’ taar, ‘Kisa hayamonam eedi ab ki tiye’ hamayse thaapadhonnane.

<sup>21</sup> “Ogonante Imbaa wontea Yesus wosa shaarinte kinin dohon wodan wulka wombесана kinka dahayna eenasa shaarira, <sup>22</sup> Wannisin shiverra yedayse Imbaa wontea Yesus cecindar kinin yivaa rooroaka yekka dahayna eenasa kalaa wombесана kinka Yesussa diira dhaabhidinsa tarja maata ko kiam zaske” ki hamade.

<sup>23</sup> Ogonante kesa shaarira eedi lamaam ke woysade; kedi Bersaabs way Iyosthos hambhea Yoseepbee Maatiasbene. <sup>24-25</sup> Barjodar woylamin qajayna eenaar yin giyayse Barjoam ke miskade: “Een wulsa woylamin dhesea Imbaa wontea Yesuso, hasa tarja hayayse yiam hanin nittsaa kinin doadettsi, eena igin a lamaanasa hayyeam hanin kamonom wona eshkaa. Kono waadimano Yiwda yisa raqinte yivan kinin garoono waadimanone” hamayse kiam ke miskade. <sup>26</sup> Ithaar ke dhabade; ithanoar Maatiasdar ko wavade. Ogonante kidiar tabhi kalaana Kiristoos yisa tarjamonnante kinin yittsaan-abesana kinka ki paydadade.

## 2

### *Manpas Gazano Barjodar Woylamin Qajayna Eenadar Konin Hanchoono*

<sup>1</sup> Bhentheqosthe\* bavaala yeskaysaka Yesussa paanan yivayna eena wulraq kalaadar bukayse ke dahade. <sup>2</sup> Bhocchadhima wura kantadettsi maatoono upsi cecira ni-vayse kenin dohon ooninka ko thoothade. <sup>3</sup> Nuusa laabhinadettsi maatayna atabh kashimayse kesa metena metenadar ko dooqade. <sup>4</sup> Kedi wulaar Manpas Gazanka ke thoothade. Manpasinoar kenin giyoadettsi kena imoono apo waana waanaka giyan ke yedade.

<sup>5</sup> Ogo wodanka peen wulra nivaana Ayiwd eenasa Barjona goodimintaka wocchimb-hayna eena Yerusaalem gidir ke dahade. <sup>6</sup> Ogo upsinam yinin qansen wodanka thoothino eeno ko bukade; eeno ogono wul kesa aponka kinin giyenka keam kinin qansonna yinin giyemam ke bashadhade. <sup>7</sup> Kattsi targadhayse yin ke giyade: “Marrato! Igina giyayna eena wul Galila eenatayu? <sup>8</sup> Ta keeda wodi wul wonnon aponka kinin giyenka woda qanse. Yin hamin ko maataa? <sup>9</sup> Wodi Bharte eenabee, Meedon eenabee, Elaam eenabee, Mesbhethoomia eenabee, Yiwda eenabee, Qebhedoqia eenabee, Bhanthoos eenabee, Isiya eenabee, <sup>10</sup> Pirlia eenabee, Bhinpilia eenabee, Gibth eenabee, Qerena katamansa gasante dohon Liibia eenabe; pir Roome katamara nivaana Ayiwd eenabee

1:20 Maz 69:25.    1:20 Maz 109:8.    \* 2:1 “Bhentheqosthe” hamen upsinam Haalin Mallan mathaapinsa macchinte thaapadhaanar shedaa.

Barjodar woylamin qajintanka Ayiwd eenadar ardaana eenabe; <sup>11</sup> tapir Qerthes eenabee, Areb eenabe dahayse Barjosa gebhon waadimanam wodi wul wonnon aponka kenin giyenka qansite wo dahade” ke hamade. <sup>12</sup> Eena wul targadhayse yinin giyen bashadhayse, kinka kikal “Kono yer hare?” ke hamade. <sup>13</sup> Waani eeno ko hanna, “Wucadhenam wucayse ke bardhade” hamayse keam ko bagade.

*Bhethiroos Eenana Kinin Tarjoono*

<sup>14</sup> Ogo wodanka Bhethiroos tabhi kalaana Kiristoos yisa tarjamonnante kinin yittsaanabesana kinka woyayse, upsi gebhika eenana yin ki giyade: “Yedi Yiwda peen eenabee Yerusaalem gidir dahaana eena wulbeto, inin yena giyenam qansee; payya hayayse dhesee. <sup>15</sup> Yenin qaabendettsi eena igina bardhaanatehe; peen sedhaysaka savaat makkamne. <sup>16</sup> Ko dahaannaar ta ko yenin qansayno dhalqino ena Barjokala qansayse eenna giyea Yuveelin giyonone:

<sup>17</sup> ‘Barjo yin ki giyade:

“Macchin rooroaka yin koda maate:

Een wuldar isa Manpasinam ida laale.

Naana yenna annginabee maanabe Barjokala qansayse eenna keda giye;  
barshina naana yennaar Barjoyn kena dhohon shedintonam keda haape;  
yesa donzanaar haama keda haape.

<sup>18</sup> Igina rooronaka annginabee maanabe ina waadimayna eenadar isa Manpasinam ida laale;

kediar ikala qansayse eenna keda giye.

<sup>19</sup> Tura cecinte tarshen yerinaam,

mia peentear milkitinam ida dhee;

zombhibee, nuubee, cubabe koda haapadhe.

<sup>20</sup> Kattsi gebhi maatayno tarshayno Barjosa rooronin nivonsa birayse hayno thipa ko thiipe,

arpinoar zombhidettsi maatayse koda ookime.

<sup>21</sup> Barjosa naabenam eelayna wul dhaqa ke dhaqe”

ki hamade’

hamayse ki giyade.

<sup>22</sup> “Yedi Israveel eenato, upsina kinaam qansee: Yenin dhesendettsi Barjo Naazret ea Yesusbar yesa shaarinte kinin waadadhon kattsi tarshen yerinbee milkitinbe goynka Barjokalanka nivaa ea kinin dohonam yena ki tarjade. <sup>23</sup> Yesusam Barjo birayse kinin bhocchonbee kinin dhesondettsibe yena saskate kiam ko imbhade; yediar see-sion eenasa aaninka kinin ziitadhoodettsi hayayse ye dettsade. <sup>24</sup> Barjoar dembhisa gaalenam bashayse diira kiam ki dhaasade; harrna hambhidianna, dembhinoar kiam yedayse kinin dhaabhoamadettsi marana damadehe. <sup>25</sup> Dawtaar kinnon goynsa yin ki giyade:

‘Barjoam rooro wul isa birante ida shede;  
imbesana kinka kinin dohonna gibazattine.

<sup>26</sup> Ogonante isa woylammo ko wozadhade;

isa atambhoar wozanka ko thoothade;

pir isa waanoar Barjodar qaabe hayayse koda dee.

<sup>27</sup> Harrna hambhidianna, isa sadanam diyaana eenayn dohon raqinte garattane;  
Gazaa hasa Naasaar kinin capoadettsi kiam hayattane.

<sup>28</sup> Sadaka daadhensa goynam ina ha dhetttsade;

imbesana kinka hanin dohonna, ina wozanam hada thoose’  
ki hamade.

29 "Imbanaanato, ena wosa eykea Dawt kinin diyonbee, kinin duukadhonbee, kisa duukinoar kinaka yekka wosa gasante dohonbeam qothimima yena ida giye. 30 Dawt Barjokala qansayse eenna giyea kinin dohonnabee, Barjo 'Hasa muldhara hasa bitammon borkotondar ida wode' hamayse malla kina yinin ardonam yinin dhesonnabe, 31 birayse shedayse, Barjoyn yiam qadhaa Kiristoosam diyaana eenayn dohon raqinte kinin garoamadettsibee kisa waanar duukinte konin capoamadettsibe diira kinin dhaabhenam ki guyade. 32 Kaa Yesusam Barjo diira kiam ki dhaasade; yerin kosa wodi wul tarjana eenane. 33 Ogonante Barjo yisa mizaqimbar dhev dhev hayayse kiam ki wodade. Kisa Imbaa Barjo 'Yena Manpas Gazanam imayda ime' hamonam Yesus tiyayse ogo yenin haapenbee yenin qansenbeam ki laalade. 34-35 Dawt yina cecindar utadehe; ko dahaannaar Dawt yinti yin ki guyade:

'Barjo isa Imbaana,

"Haam jibbayna eenaam hasa hayamon demente inin hayenka yekka,  
isa mizaqimbar dooqaa" kina ki hamade'

hamayse ena ki guyade. 36 Ta keeda yenin ziitaa kaa Yesusam Imbaabee qadhadhaa Kiristoosbe kiam Barjoyn hayonam Israveel eena wul gon ke dhese" ki hamade.

37 Eenaar dhalqin ogoam yinin qansenka, yisa woyleminka kattsi atayse Bhethiroosbee waani Kiristoos yisa tarjamonnante kinin yittsaana eenabena "Imbanaanato, ta keeda yer har wo hayo?" kena ke hamade. 38 Bhethiroosaa kena yin ki guyade: "Seeson waadiman yennonam garayse Barjodar maatee; yesa seesonam yena shiishadhadettsi yedi yesa meteka meteka Yesus Kiristoossa naabenka shiidhee; Barjo yena imayno Manpas Gazanamaar tiyeeda tiye. 39 Harrna hambhidianna, Barjo 'imayda ime' kinin hamon Manpas Gazano yembee, yesa naanabee, Imbaa wosa Barjo yikal kinin eelayna pegente dahaana eena wulbenane" ki hamade.

40 Bhethiroos thoothi kena yinin tarjenka, "Ko wodanka dahaana siyana eenadar niven Barjosa wacimera dhaqee!" hamayse keam ki kiilade. 41 Kisa dhalqinam tiyaana eena ke shiiddhade; ogo rooronka shii makkamaddha Barjodar woylemin qajayna eena kedar ke ardade. 42 Kediar Kiristoos yisa tarjamonnante kinin yittsaana eena kenin dhettsenam qansintabee, kinka kalaa dayntabee, kinka gala itsintabee, † Barjoam miskintabeka ke wocchimbhade.

### *Barjodar Woylemin Qajayna Eena Kenin Kalaa Maatoono*

43 Ogo wodanka Kiristoos yisa tarjamonnante kinin yittsaana eenaka thoothi tarsheabee Barjosa hayamon dhehea yerbe yinin waadadhonna eena wul ke kurtumbhade. 44 Barjodar woylemin qajayna eena wul kinka kalaa ke dahade; yisa dohon yer wulamaar kinka ke kashimade. 45 Yisa haaminbee dohon koymonbeam shanshayse een wulna zaskendettsi ke kashimade. 46 Rooroa roroaka Barjosa gazan ooninte woylem kalaaka maatayse keda buke; kinka yisa onnar kiam eelayse wozadhaate woylem payyaka kinka galanam keda kumme. 47 Barjoamaar keda gobshe; eeno wulaar keam koda gobshe. Imbaa wontea Yesusaar kidar woylemin qajayse dhaqayna eenaam roroaka roroaka kedar kida arse.

## 3

### *Ea Roon Wobaanin Paashoono*

<sup>1</sup> Bhethiroosbee Wannisbe Barjoam miskadhen sal savatka Barjosa gazan oonindar ke yivade. <sup>2</sup> Ogo wodanka adhadhorra yedayse rooysa wobaa eedi kalaam eedi waani kedayse ke nivade; kiamaar roro wulka bavayse "Kerro Goobeno" hamayse yiam eldhen Barjosa gazan ooninsa mayante ardadhen kerin gasante kiam keda wode. Ear ogote dooqayse Barjosa gazan ooninsa mayante ardayna eenakalanka yer kida miske.

2:30 2 Saam 7:12-13; Maz 132:11. 2:34-35 Maz 110:1. † 2:42 Kedi kinka maatayse kenin itsonsa macchinte Imba wontea Yesussa dembhinam bhocchisen galanam keda itse.

<sup>3</sup> Kidiar Bhethiroosbee Wannisbe Barjosa gazan ooninsa mayante kenin ardenka keam shedayse yer keam ki miskade. <sup>4</sup> Kidiar payya hayayse kiam ke shedade; Bhethiroos “Woam shedaa!” kina ki hamade. <sup>5</sup> Ear yer kina imana kenin hayea konin maatonna keam ki shedade.

<sup>6</sup> Bhethiroosaar “Koymo kala hattear ikal qolehe; ko daahaakaar ikal dohonam hana imayda ime. Naazret peen ea Yesus Kiristoossa naabenka dhaabhaye yaaya!” kina ki hamade. <sup>7</sup> Kisa mizaqin aaninamaar yedayse kiam ki dhaasade; saanawa kisa roonbee gaaran buqonbe ko wocchimbhade. <sup>8</sup> Lav hamayse woyayse yaayan ki yedade. Yaayadabee, bhuladabee, Barjoam gobshadabe Barjosa gazan ooninsa mayante kem-besana kinka ki ardade. <sup>9</sup> Eena wulaar yaayada Barjoam kinin gobshenka kiam ke haapade. <sup>10</sup> Barjosa gazan ooninsa mayante ardadhayno Kerin Goobensa gasante dooqayse eenkala yerin miskea ea kinin dohonam ke dhesade. Kinin yaayenamaar haapayse kattsi ke targadhade.

### *Bhethiroos Barjosa Gazan Ooninsa Mayante Kinin Tarjoono*

<sup>11</sup> Ear Bhethiroosbee Wannisbeam yedayse ki daaka, eeno wul targadhaate kekal gobayse Soloomoon Baaran hambhen raqinte ke nivade. <sup>12</sup> Bhethiroosaar eenaam shadayse kena yin ki giyade: “Yedi Israveel eenato, yerin koka harrnee targadhe? Wodi wosa kantabee wosa gazamobeka ea kaa ki yaaye wonin hayaadettsi maasayse harrnee woam shede? <sup>13</sup> Wosa eykena Abraambee, Yisaaqbee, Yayqoobbesaar Barjoa, kisa Naasa Yesusam ki gobshade. Yediar Bhilathoosna saskate kiam ye imade; Bhilathoosaar kiam bulana kinin bhocchenka, ‘Kiam zagattone’ hamayse ye giyade. <sup>14</sup> Yediar gazabee tipabe maataa eam ‘Kiam zagattone’ hamayse, een deesaa eam yena buldhoadettsi ye miskade. <sup>15</sup> Sadanka daadhen imea eam ye dettsade; Barjoar diira kiam ki dhaasade. Ogona wodi tarjanane. <sup>16</sup> Kaa yenin haapeabee yenin dheseabe kinin paashoono Yesudar woylamin qajintakane; Yesussa naabenka dhaqayse ki wocchimbhade. Yesusbar haapadhen Barjodar woylamin qajintakaar ye wulsa birante payyamo kidi haapidine.

<sup>17</sup> “Taar imbanaanato, yembee yeast wottsaynabe dhesima Yesudar yenin waadahonam dhesayda dhese. <sup>18</sup> Barjoar ena birayse yikal qansayse eenna giyayna wulsa aponka ‘Barjoyn qadhaa Kiristoos gaale tiya kiam ko zaske’ kinin hamoono konin thoothoadettsi ki hayade. <sup>19</sup> Ta keeda yesa seesonam yena gardhoadettsi seeson waadimanam garayse Barjodar maatee. <sup>20</sup> Yin ye hayna Barjokala ookime woda yena nivasane. Barjoar ena birayse yena kamayse kinin qadhaa Yesusam kida nittse. <sup>21</sup> Barjo enara yedayse kikala qansayse eenna giyayna gazana eenasa aponka kinin giyondettsi, yer wul haalisadhenka yekka Yesus cecinte kappa kiam ko zaske. <sup>22</sup> Musear ‘Imbaa yesa Barjo iam kinin dhaasondettsi

yesa shaarira Barjokala qansayse eenna giyea eam yena dhaasa ki dhaase; kinin yena giyen wulam qansee.

<sup>23</sup> Ogo Barjokala qansayse eenna giyea eakal qansima eedi hayyear eensa shaarira edimayse ki kaye’

hamayse ki giyade. <sup>24</sup> Ogodettsi Saameeldara yedayse daahaana Barjokala qansayse eenna giyayna wul ta ko wodansa kedi giydine. <sup>25</sup> Yedi Barjokala qansayse eenna giyayna eenaka kinin imon upsinam tiyayna eenane. Barjo Abraamna ‘Hasa mulhanaka peendar dohoono eeno wul gobshadhoono koda maate’ hamayse wosa eyken-abesana kinin ardon mallanam yedi tiyayna eenane. <sup>26</sup> Barjo Naasa yinteam dhaasayse kinin yittsoono birayse yenane. Ogono yin kinin hayoonoar yedi kalaa kalaana yesa siyon waadimara yeast maasintaka yeast gettsanane” kena ki hamade.

## 4

*Bhethiroosbee Wannisbeam Pirdayna Eenasa Birante Kenin Baadhoono*

<sup>1</sup> Bhethiroosbee Wannisbe eenana kenin giyenka, gudullabee, Barjosa gazan ooniam toolayna eenasa wottseabee, Saduqa eenabe kedar ke nivade. <sup>2</sup> Bhethiroosbee Wannisbe eenam kenin dhettsenbee Yesuska diira dhaabhinta dohonam kenin giybenka ke wacimade. <sup>3</sup> Keam yedaysear peenin ibanonna, peenin sedhenka yekka dhaxin ooninte keam ke dhaskade. <sup>4</sup> Ko dahaannaar Bhethiroosbee Wannisbesa dhalqinam qansaana eenasa shaarinte thoothino eeno Barjodar woylamin ko qajade; ogo wodanka Barjodar woylamin qajon eensa paydino shii dongaddha ko yeskade.

<sup>5</sup> Peen sedhaysaka Ayiwd eenam wottsaynabee, peensa donzanabee, Musesa yigginam dhettsaynabe Yerusaalem gidir ke bukade. <sup>6</sup> Bukaana eenasa shaarinte gudullasa gebhaa Hannabee, Qayappabee, Wannisbee, Iskindirosbee, gudullasa gebhaasa muldhana wulbe ke dahade. <sup>7</sup> Kediar Bhethiroosbee Wannisbeam yisa shaarinte keam woysayse, “Ogo yenin hayoona har kantakabee haysa naabenbeka ye waadadhaa?” hamayse keam ke oysade.

<sup>8</sup> Ogo wodanka Bhethiroos Manpas Gazanka thoothayse kena yin ki guyade: “Yedi eenam wottsaynabee peensa donzanabe, <sup>9</sup> ea woboana waadadhadhon payyan waadimanka hamin kinin paashonam kina woam oysadhianna, <sup>10</sup> kiam yenin ziitaa Barjoar diira kiam dhaasaa Naazret ea Yesus Kiristoossa naabenka ea kaa paashayse yesa birante kinin woyondettsi, yembee Israveel een wulbena ko dhesime. <sup>11</sup> Ogonoar yedi ooninam woysayna eena bagayse yenin dhabaa seenia kidine; agaa seeniar kattsi ooninna zaskea ki maatade. <sup>12</sup> Dhaqinta kikalanka ab haykaar qolehe; wonin dhaqoadeettsi zaskea eennaar imbhaa Yesus naabera cecinsa choobar naabe ab qolehe” kena ki hamade.

<sup>13</sup> Yiwda peensa donzana Bhethiroosbee Wannisbe kurtumbhima kenin giyonam yinin haapenka, raq yinna imbhaammabee timmirinsa qolminabe kenin maatenam yinin dhesenka kedi targadhidine; Yesusbesana kinka ena kenin dohonam kedi dhesidine. <sup>14</sup> Yissa burqonka paashaa ear kembesana kinka woyayse ki daaka kiam kenin shedenka yinin giyena ke bashadhade. <sup>15</sup> Yiwda peensa donzana os mayanka keam bulayse, yin giyayse kinka ke dhalqade: <sup>16</sup> “Eena kinadar yer har wo hayo? Ogono yer tarshayno kenin waadadhoono Yerusaalem gidir dahaana eena wulkal dhesimidine; ogonante wodi marimana damattone. <sup>17</sup> Ko dahaannaar eenakal dhalqino kono kattsi konin workoamadettsi, keeda kaara os eedi haynaar Yesussa naabenka kenin giyoamadettsi wocchinsayse kena wo giye” ke hamade.

<sup>18</sup> Keam eelayse, Yesussa naabenka eenna hamin ko dahaakaar kenin giyoamadettsibe kenin dhetsoamadettsibe wocchinsayse kena ke guyade. <sup>19</sup> Bhethiroosbee Wannisbe yin giyayse kena ke maasade: “Ta yedi pirdee: Barjona ee hamara yena ee haminta Barjo birante zaskaynow? <sup>20</sup> Wodi wonin haaponbee wonin qansonbeam giyara lay hamana damattone” kena ke hamade. <sup>21</sup> Yiwda peensa donzana hamin keam yinin dhabshenam ke bashadhade; ogonoar zarsinam kenin kurtumbhonna keam kattsi kurtunsayse ke garade. Ogonoar zarsino yerin hamon wulka Barjoam gobshite konin dohonnane. <sup>22</sup> Harrna hambhidianna, ogo tarshea yerinka yiam pacchadhaa easa lendho eedi lamaa kaysadara sagi ko dahade.

*Barjodar Woylamin Qajayna Eena Barjoam Kenin Miskoono*

<sup>23</sup> Bhethiroosbee Wannisbe dhaxira keam buldhaysaka, yisa eedanakal nivayse gudullasa hayonabee peensa donzanabe kena hamon wulam ke guyade. <sup>24</sup> Kediar ogoam yinin qansenka woylem kalaaka upsinam dhevayse Barjodar yin giyayse

ke miskade: "Imbo, cecinbee, peenbee, bazinbeam, kesa iiinte dohon wulam pijaa yane.  
<sup>25</sup> Manpas Gazanka hasa waadiman ea wosa eykea Dawtsa aponka ha giyna:

'Ayiwdtay hamma eena harrna ke wacimaa?

Eenoar pootimin yerinam harrna ko bhocchaa?

<sup>26</sup> Peensa binna banqinna ashkimbhayse,

wottsaynaar kinka bukayse

Barjobee kinin qadhaa Kiristoosbedar ke dhaabhade'

hamaysea giyade. <sup>27</sup> Herodisbee Bhentheawaai Bhilathoosbe, Ayiwdtay hamma eenabeee Israveel eenabe kinka kataman kote bukayse, hanin qadhaa gazaa hasa Naasa Yesusdar gon ke dhaabhade. <sup>28</sup> Kenin dhaabhoono ya birayse hasa kantanbee bhocch-inbeka hanin bhocchonam waadadhanane. <sup>29</sup> Taar Imbo, kenin kurtunsenam shedaa; wodi hana waadimayna eena kurtumbhima hasa upsinam wonin giyoadettsi woam wocchinsaa. <sup>30</sup> Gazaa hasa Naasa Yesussa naabenka hajadhaana eenaam pacchotabee, tarshea yer hayotabee, milkit dhootabe aanin hannonam pishkaa" hamayse Barjoam ke miskade.

<sup>31</sup> Barjoam kenin miskonsa budonte, bukayse kenin dohoono ranqo ko shohade; kedi wulaar Manpas Gazanka ke thoothade; Barjosaar upsinam kurtumbhima ke giyade.

### *Barjodar Woylamin Qajayna Kinka Kalaa Kenin Maatoono*

<sup>32</sup> Barjodar woylamin qajayna eena wul woylam kalaabee qaabo kalaabeka ke dahade. Yer wul kesa kalaa ko dahade; kesa dohorra yer kala hattear "Kaa intine" hamayse giyea eedi golehe. <sup>33</sup> Kiristoos yisa tarjamonnante kinin yittsaana eenaar Imbaa wontea Yesus dembhira kinin dhaabhonam gebhon kantanka eenna ke tarjade. Barjosa sunin imintono ke wuldar ko dahade. <sup>34-35</sup> Haamibee oonibe yisa dahaana wul shanshaate koymonam bavayse Kiristoos yisa tarjamonnante kinin yittsaana eenana ke imade. Kiristoosin yittsaanaar een wulna keam zaskendettsi kinin imonna, kesa shaarinte gaale eed kala hattear golehe.

<sup>36</sup> Qobhiroos gidir adhadhaa Lewi muldha maataa Yoseep hambhea eedi kala ki dahade. Kiristoos yisa tarjamonnante kinin yittsaana eenaar "Barnabaas" hamayse kiam ke eelade; "Barnabaas" haminta "wocchinsea ea" hamintane. <sup>37</sup> Kidiar yisa haaminam shanshayse, koymonam bavayse Kiristoos yisa tarjamonnante kinin yittsaana eenana ki imade.

## 5

### *Hananiabee Sabhirabe*

<sup>1</sup> Hanania hambhea kisa geshon Sabhirabesana yisa haami ke shanshade. <sup>2</sup> Hanania geshonda dhesika haamin yinin shanshon birerra antinam yina shiishayse, antinam Kiristoos yisa tarjamonnante kinin yittsaana eenana bavayse ki imade.

<sup>3</sup> Bhethiroosaar "Hanania, Manpas Gazanam ha taysebee haamin hanin shanshona antinam hanin shiishoadettsibe Seethaan hasa woylaminte harrna ki ardaa? <sup>4</sup> Hanin shanshensa birayse hammo hantitayu? Hanin shanshona budontesin koymono hasa aaniyatayu? Ta yerin koam hasa woylaminka harrnaa bhocchaa? Hanin taysoono Barjoamne, eediamtehe" kina ki hamade. <sup>5</sup> Hananiar dhalqin ogoam yinin qansenka dhambaye ki diyade. Yerin ogoam qansaana eena wul kattsi ke kurtumbhade. <sup>6</sup> Barshinaar dhaabhaye kisa leesinam ochayse tiyate ke duukade.

<sup>7</sup> Hanania diyaysaka savaat makkamsa budonte kisa geshono raqin ogote ko nivade; kodi geshoadar yeskon yerinam dhesadehe. <sup>8</sup> Bhethiroosaar "Yesa haaminam yinin shanshoono koymona kinadar? Ina giyaa" hamayse koam ki oysade. Kodiar "Gon iginadarne" kina ko hamade. <sup>9</sup> Bhethiroosaar "Barjo Imbasa Manpasinam taysate shedana haminee kinka dhalqaa? Shedaa! Hasa geshoam duukayse maatayna eena

mayante yeskidine; ta haamaar bulayse duuka ke duuke” kona ki hamade. <sup>10</sup> Kodiar saana kisa roonkal dhambaye ko diyade. Geshoam duukaana eenaar kenin ardenka diyayse ko daaka koam haapayse tiyate geshoakal koam ke duukade. <sup>11</sup> Barjodar woylamin qajayna eena wulbee dhalqin koam qansaana eena wulbe kattsi ke kurtumbhade.

### *Yittsadhaanayn Waadadhon Tarshayno Yerro*

<sup>12</sup> Kiristoos yisa tarjamonnante kinin yittsaana eena thoothi milkitbee tarshea yerbeam eensa shaarinte waadadhite ke dahade. Barjodar woylamin qajayna eena wulwoylam kalaaka maatayse Solomoon Baaran hambhen raqinte bukite ke dahade. <sup>13</sup> Waani eensa eedi kala hattear kembesana kinka dahaana wocchimbhea eedi qolehe; ko dahaannaar eeno keam gobshite ko dahade. <sup>14</sup> Imba Yesusdar woylamin qajayna annginabee maanabesa paydino kattsi thoothada ko yivade.

<sup>15</sup> Kiristoos yisa tarjamonnante kinin yittsaana eenayn waadadhen tarshen waadi man goynka, eeno hajadhaana eenaam goyn apondar bulayse haaqabee eebhebedar keam ko wodade; ogono yin kinin hayoonoar Bhethiroos raqin ogoka kinin yivenka kisa shipeno hattear kesa waani waanidar konin yeskoadettsine. <sup>16</sup> Pir eena Yerusaalemса gasante dahaana gurdanara hajadhaanabee rumin dhaasite gaalaynabeam ke bavade; kedi wulaar burqora paashite ke dahade.

### *Yesus Yisa Tarjamonnante Kinin Yittsaanadar Oytaydha Yeskoono*

<sup>17</sup> Saduqa eensa shaarira gudullasa gebhaabee kimbesana kinka dahaana yettsina wulbe woogintaka Kiristoos yisa tarjamonnante kinin yittsaanadar ke dhaabhade.

<sup>18</sup> Keam yedayse dhaxin ooninte ke dhaskade. <sup>19-20</sup> Barjosa gaana sootinka dhaxin ooninsa kerinaam bulayse keam entsate yivayse, “Yedi yivayse Barjosa gazan ooninsa mayante woyayse, ko haalin sadanka daadhensa upsin wulam eenna giyee” hamayse keam ki yittsade. <sup>21</sup> Kiristoos yisa tarjamonnante kinin yittsaana eenaar upsin ogoam yinin qansenka, burin sedhiman Barjosa gazan ooninsa mayante ardayse eenaam dhettisan ke yedade.

Ogo wodanka gudullasa gebhaabee kimbesana kinka dahaana eenabe nivaysaka, Yiwda peensa donzanabee Israveel eensa shaarira donzana wulbeam eelate ke buskade. Kiristoos yisa tarjamonnante kinin yittsaana eenaamaar kinin bovoadettsi dhaxin oonindar poolisanaam ke yittsade. <sup>22</sup> Poolisana dhaxin ooninte yivayse Kiristoos yisa tarjamonnante kinin yittsaanaam haapadehe. Maataate peen donzanakal nivayse, <sup>23</sup> “Dhaxin ooninam diithadhysaka, toolayna eenaar kerindar woyayse ke daaka keam wo haapade. Ko dahaannaar dhaxin ooninsa kerinaam wonin bulenka ooninte hayyeamaar haapootone” kena ke hamade.

<sup>24</sup> Barjosa gazan ooninam toolayna eenasa wottseabee gudullasa hayonabe dhalqin ogoam yinin qansenka, “Kono yer hamin hamonne?” hamayse kinin giyayno keam ko bashade. <sup>25</sup> Ogo wodanka eedi kalaa nivayse, “Marrato! Dhaxin ooninte yedin dhaxaana eena Barjosa gazan ooninsa mayante woyayse eenam dhettsite ke dahade!” hamayse kena ki giyade. <sup>26</sup> Ogona Barjosa gazan ooninam toolayna eenasa wottseabee poolisanabe yivayse keam ke bavade. Poolisana “Eeno woam seenika paxate deesasane” hamayse kinin kurtumbhonna, keam kinin bovoono kantakatehe.

<sup>27</sup> Keam bavate nivayse peensa donzanasa birante ke woysade. Gudullasa gebhaa

<sup>28</sup> “Yesussa naabenam eelintaka eenam yedin dhettsoamadettsi wocchinsayse yena wodi giydine. Ko dahaannaar, marrato! Yerusaalemir yesa timmirino raq wulir yeskidine; ea agaasa zombhinamaar wodar hayana ye zagade” hamayse kedar ki dhiidhimade.

<sup>29</sup> Bhethiroosbee waani Kiristoos yisa tarjamonnante kinin yittsaanabe yin giyayse ke maasade: “Eedina ee hamintara Barjona ee haminta ko woam zaske. <sup>30</sup> Yedi

masqalindar konngayse yenin ziiitayse deesaa Yesusam wosa eykenasa Barjoa demb-hira kiam ki dhaasade.<sup>31</sup> Ogonoar Barjo Yesusam Entseabee Dhaccheabe hayayse yisa mizaqinte gobshinka kiam dhev dhev ki hayade. Ogoam yin kinin hayoono Israveel eena seeson waadimanam garayse Barjodar kenin maatoadettsibee kesa seesonam kena gardhoadettsibe zagaysene.<sup>32</sup> Dhalqin ogosa wodiar tarjanane; Barjo yina ee hamayna eenana kinin imoono Manpas Gazanoar tarjane” kena ke hamade.

<sup>33</sup> Yiwda peensa donzanaar dhalqin ogoam yinin qansenka kattsi dhagadhayse deesana keam ke qaabade. <sup>34</sup> Ko dahaannaar een wulin gobshea Musesa yigginam dhettsea Gamalial hambhea Parisa eedi kalaa Yiwda peensa donzanasa shaar-inte dhaabhayse Kiristoos yisa tarjamonnante kinin yittsaana eenam likka wodana mayanka keam kenin buloadettsi kena ki giyade. <sup>35</sup> Ogora kena yin ki giyade: “Yedi Israveel eenato, eena iginadar yenin hayota dohon yerinka mete yesaam gishee. <sup>36</sup> Ena birayse Toodas hambhea ea ‘Inta eedi gebhine’ hamayse dhaabhidine; eena mato oydiaddhana kimbesana kinka dhalqayse ke yivade. Ogora kiam deesadhaysaka kimbesana kinka yivaynaar thar thar ke hamade; kisa qaabonoar pootimino maatayse ko shidhade. <sup>37</sup> Ogosa budontear eensa naabenam thaapadhen levenka Galila peen ea Yiwda dhaabhayse thoothino eeno kisa paananka konin yivoadettsi haydine. Kiam deesadhysaka kisa paanan yivayna wul thar thar ke hamade. <sup>38</sup> Taar inin yena giyayno igma eenakalanka pegadhayse keam yenin garoadettsine. Harrna hambhidianna, ogo kesa qaabonbee kesa waadimanbe eedikalanka ko daana kaya ko kaye. <sup>39</sup> Barjokalanka nivoono ko hanna, keam kaysana damattene; tapir Barjosa waadimanam jibbintaka kimbesana kinka gemmaana yeda maate” hamayse keam ki kiilade. Kediar kisa kiilimenam ke tiyade.

<sup>40</sup> Ogora Kiristoos yisa tarjamonnante kinin yittsaana eenam eelayse kenin qand-hoadettsi hayayse Yesussa naabenka kinin giyoamadettsi kena giyayse keam ke garade.

<sup>41</sup> Kediar “Yesussa naabenna bagadha yiam zaskayna eenane” hamayse Barjo keam paydonna wozadhintaka Yiwda peensa donzanakalanka utayse ke yivade. <sup>42</sup> Roro wul Barjosa gazan ooninsa mayantebbee eensa onnarbe Yesus Barjoyn qadhaa Kiristoos kinin dohondettsi eenam dhettsintaka Barjosa dhacchintan upsinam giyte ke dahade.

## 6

### *Tobbhaana Eenayn Kambhoono*

<sup>1</sup> Ogo wodanka Barjodar woylamin qajayna eena thoothada kinin yivenka, Girik aponka dhalqayna Ayiwd eena “Roroaka rooroaka imbheng yerinka wosa maana qambhinaam yedi walidine” hamayse Yiwda peente adhadhaana Ayiwd eenadar ke gundumade. <sup>2</sup> Ogonante tabhilamaa Kiristoos yisa tarjamonnante kinin yittsaana eena Barjodar woylamin qajayna eena wulam yikal eelayse kena yin ki giyade: “Barjosa upsinam giynta garayse yer itsadhea kasha woam zaskehe. <sup>3</sup> Ta keeda imbanaanato, yisa payyamon waadimanna tarjadhaana, pir Manpas Gazanbee pakalmakkonbeka thoothaana eedi tobbhaa imbheng yerinam kashayna yesa iira kamee; keam waadiman ogodar woda wode. <sup>4</sup> Wodiar Barjoam miskaatebee Barjosa upsinam eenna giyaatebe woda wocchimbhe” kena ke hamade.

<sup>5</sup> Kesa dhalqino ogono een wulam ko wozisade; ogora Barjodar woylamin qajintanbee Manpas Gazanbeka thoothaa Isthipaanoos, pir Pilbhoosbee, Bhirkoroosbee, Niqaronbee, Thimoonabee, Bharmenabee, Ayiwd eenasa Barjodar woylamin qajintante ardaa Anthokia kataman ea Niqolaasbeam ke kamade. <sup>6</sup> Igina eenamaar Kiristoos yisa tarjamonnante kinin yittsaana eenasa birante ke woysade; kediar Barjoam miskayse aaninam yisa kedar wodayse waadiman ogodar keam ke wodade. <sup>7</sup> Barjosa upsinor workada ko yivade; Yerusaalem gidir Barjodar woylamin qajayna eenasa paydino kattsi thoothada ko yivade; gudullasa thoothina Barjodar woylamin ke qajade.

### *Isthipaanoosam Yedadhoono*

<sup>8</sup> Isthipaanoosaar Barjosa sunin imintonbee kantanbeka thoothayse eensa shaarinte kattsi tarshea yerbee gebhi milkitbe kida waadadhe. <sup>9</sup> Ogo wodanka Qerenabee, Iskindirabee, Kilqiabee, Isiyabera maataana, “Worshamo Utaanasa Buki Raq” hambhen Ayiwd eensa bukin raqira waani waani eeno Isthipaanoosdar dhaabhaye ko palimade. <sup>10</sup> Ko dahaannaar kinin giyen pakalmakkonbee Manpasinbeam bashana damadehe.

<sup>11</sup> Ogo wodanka, “Ea kaa Musebee Barjobeam kinin iirenka wodi qansidine” hamayna eenam aachika kidar ke dhaasade. <sup>12</sup> Zarsinbee, donzanabee, Musesa yigginam dhettsaynabeam ke dhagattsade. Ogona Isthipaanoosam yedayse Yiwda peensa donzanasa birante kiam entsate ke yivade. <sup>13</sup> “Ea kaa Barjosa gazan ooninbee Musesa yigginbeam iiran garadehe” hamayse kidar buudamoka tarjayna eenam ke bavade. <sup>14</sup> Kediar “‘Naazret Yesus oonin koam kottsa ki kottse; Musear wona kinin giyon sharqanam kida ooke’ hamayse kinin giyenka wodi qansidine” hamayse kidar ke tarjade. <sup>15</sup> Ogote dooqaana Yiwda peensa donzana wul Isthipaanoosam payya hayayse kinin shedenka, kisa wotino Barjosa gaana wotindettsi maatayse kena ko haapadhade.

## 7

### *Isthipaanoossa Dhalqino*

<sup>1</sup> Gudullassa gebhaa Isthipaanoosna “Dhalqino ogono gonu?” hamayse kiam ki oysade. <sup>2</sup> Isthipaanoosaar yi giyna: “Imbanaanato, inin giyen qansee! Wosa imbaa Abraam Kaaran katamandar yimbha birayse Mesbhethoomia ki daaka, gobshadhaa Barjo kina haapadhayse, <sup>3</sup> ‘Hasa peenbee hasa muluhanbera edimayse inin hana dhehen peendar yivaa’ kina ki hamade. <sup>4</sup> Ogo wodanka Abraam Baabiloon\* peera utayse Kaaran katamante ki dooqade; Abraam imbaa kisa diyonsa budonte, ta yenin dohon peendar Barjo kiam entsate ki nivade. <sup>5</sup> Raqin ogote roosa taakaaddha hattear pee kina imadehe; ko dahaannaar peen ogoam kimbee kisa muluhanabena yinin imendettsi Barjo malla kina ardidine. Ogo mallanam kina kinin ardoono Abraam naasi kisa qolmon wodankane. <sup>6</sup> Barjoar ‘Hasa muldhana eedi peer chocchi maatayse keda dee. Ogotear mato oydi leve eeno keam worsho maasayse koda galshe’ kina ki hamade. <sup>7</sup> Taar, ‘Keam worsho maasen eendar pirdayda pirde; ogosa budontear peen ogora utayse raqin kote ina goodima ke goodime’ hamayse Barjo kina giydine. <sup>8</sup> Barjo kina kinin ardon mallansa milkit qaama taxadhintasa gilo kina ki imade. Ogonante Abraam yisa naasa Yisaaq adhadhaysaka lankaysoa roroaka qaamanam ki taxade; Yisaaq yisa naasa Yayqoobsa qaamanam ki taxade; Yayqoobaar tabhi lamaa Israveel eenasa muldhana maataana yisa naanasa qaamanam ki taxade.

<sup>9</sup> “Yayqoob naana indanaasa Yoseepdar woogimbhayse Gibth peente worsho kinin doadettsi kiam ke shanshade. Barjoar kimbesana kinka ki dahade; <sup>10</sup> kisa gaalen wulra kiam ki bulade. Barjoar Gibth peen bitaa Paaronsa birante gembhakobee pakalmakkobeam kina ki imade. Bitaar Gibth eenbee yisa oonin wulbedar wottsea kiam ki hayade.

<sup>11</sup> “Ogo wodanka Gibth peenbee Kanaan peen wulbedar gebhi galshea basho ko utade; wosa eykenaar isin haapanaa damadehe. <sup>12</sup> Yayqoobaar Gibth peente isinin dohonam yinin qanson wodanka, wosa eykenaam ogodar birayse ki yittsade. <sup>13</sup> Lanson Gibth peendar maataate kenin yivon wodanka, Yoseep indanaanana yiam ki dhettssade; Yoseepsa oonin eenaar Gibth peen bitaakal ke dhesimade. <sup>14</sup> Yoseep imbaa Yayqoobbee kisa oonin eenabe, eedi makkam kaysa apo tabhi dongna wulam ‘Ikal nivee’ hamayse

---

\* 7:3 Pija 12:1. \* 7:4 “Baabiloon” hambhensa naabe makkamne; lansono “Sinavor”, makkansono “Kelda” koda hambhe. 7:5 Pija 12:7; 13:15; 15:18; 17:8. 7:7 Pija 15:13-14; Ut 3:12. 7:8 Pija 17:10-14; 21:4. 7:9 Pija 37:11bee 28be; 45:4. 7:10 Pija 41:39-44. 7:12 Pija 42:1-3. 7:13 Pija 45:1-4.

ki elsade.<sup>15</sup> Yayqoob Gibth peendar ki yivade. Kimbee wosa eykenabe ogote yivayse ke diyade. <sup>16</sup> Kesa leesinam Seekeemdar bavate nivayse Abraam Hamoor naanakalanka birrenka kinin shanon duukin raqinte ko duukadhade.

<sup>17</sup> “Barjo Abraamna kinin ardoono mallano konin thoothayno wodan konin theedenka, Gibth peente dahaana wosa eykena kattsi thoothada ke yivade. <sup>18</sup> Ogo wodanka Yoseepsa waadimanam dhesima bit kalaa Gibth peente ki bitimade. <sup>19</sup> Bitaa agaa wosa eendar cubbo goytika dhaabhaye, imbana naana kinin diyoadettsi gurdansa gasandar bavate yivayse ke dhabe wosa eykenaam ki galshade.

<sup>20</sup> “Ogo wodanka Muse ki adhadhade; kidiar Barjosa birante dantanka payya naasi ki maatade. Arpi makkamna imbaa ooninte ki gebhade. <sup>21</sup> Kiam dhabadhaysakaar Gibth peen bitaasa naano kiam bavate nivayse naasi yintidettsi kiam ko gettsade. <sup>22</sup> Musear Gibth eenasa pakalmakkon wulam ki dhesade; dhalqinbee waadimanbeka eedi wocchi ki maatade.

<sup>23</sup> “Musesa eedi lamaa kaysa leve maataysaka, muldhana yisa Israveel eenam shedana ki qaabade. <sup>24</sup> Muldhana kalaam Gibth eedi kalaa qanayse ki kupaka shadayse kiam ki kelshade; kupadhaasa halon maasana hamayse Gibth eam qanate ki deesade. <sup>25</sup> Kisa muldhana eenna worsho maatayse kinin dohorra Barjo kanka keam kinin buleadettsi kinin bhocchea kina ko maatade; kidiar ogoam bhocchadehe.

<sup>26</sup> “Kina hamon Israveel eensa shaarira lamaana eena kinka ke kansaka shadayse keam marsana zagayse, ‘Marrato! Yedi kinka kisa muldhana dahayse harrnee kinka kanse?’ kena ki hamade. <sup>27-28</sup> Agaa yisa aanantaam qanea ea ‘Woam wottseabee wodar pirdeabe haam hayaa hayne? Naa Gibth eam hanin deesondettsi ta iamaar deesanaa qaabaaw?’ hamayse Museam ki kupade. <sup>29</sup> Musear dhalqin ogoam yinin qansenka, gobate Miidiam peente barqate yivayse ki dooqade; ogotear naasi lamaa ki adhade.

<sup>30</sup> “Muse peen ogote eedi lamaa kaysa leve kinin dooqonsa budonte, Siina dhukankal darante hatton kodonsa shaarinte nuunsa laabhinanka Barjosa gaana kina ki haapadhade. <sup>31-32</sup> Musear ogoam yinin haapenka targadhidine. Shedana gasante kinin theedenka, ‘Inta hasa eykena, Abraambee, Yisaaqbee, Yayqoobbesa Barjoane’ hamen Barjosa upsin ki qansade. Musear kurtumbhayse yinin gibazonna shedana damadehe. <sup>33</sup> Barjoar ‘Hanin woyoono ranqo pee gaza konin dohonna, hasa roora dunngurinam bulaa! <sup>34</sup> Gibth gidir dohon isa zarsinsa gaalenam gon i haapade; kinin gaalaate ilatenam inta qansayse keam dhacchana i nivade. Ya kote nivaa; inta haam Gibth peendar ida yittse’ kina ki hamade.

<sup>35</sup> “Israveel eena Musena ‘Woam wottseabee wodar pirdeabe haam hayaa hayne?’ hamayse kiam ke bagade. Ko dahaannaar Barjo Museam ogo kodonte yeden nuunte kina haapadhaa Barjosa gaanaaka wottseabee worshamora buleabe hayayse kedar kiam ki yittsade. <sup>36</sup> Ea agaa Gibth peenbee, Ertera bazinbee, eedi lamaa kaysa leveka yekka darantebe tarshea yer waadadhaate Gibth peera keam bulayse ki entsade. <sup>37</sup> Israveel eenana ‘Barjo yesa naanasa iira idettsi kikala qansayse eenna giyeam yena kida dhaase’ kena hamaa Musene. <sup>38</sup> Darante bukayse dahaana wosa eykenabee Siina dhukandar kina giyaa Barjosa gaanaabesana kinka dahaa kidi Musene; lay dehen upsinam wona giyana tiyaa kidine.

<sup>39</sup> “Wosa eykena kina ee hamana zagadehe; yisa woylaminkaar Gibth peendar maatana anngardhayse kiam ke bagade. <sup>40</sup> Aaronhaar ‘Gibth peera woam bulaa Musedar har yeskonam dhesattone; wosa birante yivada woam entsayna barjona wona ashkaa’ kina ke hamade. <sup>41</sup> Ogo wodanka ‘Wosa barjone’ hamayse ootodettsi maaton yer ashkayse machadhea marsha kina ke machade; yisa aaninka yinin ashkon yerinka

ke wozadhade. <sup>42</sup> Barjoar kekalanka ki edimade; cecinsa wanconana kinin goodi-moadettsi keam ki garade. Ogonoar Barjokala qansayse eenna giyaynasa mathaapinte thaapadhoono

'Yedi Israveel eenato,

eedi lamaa kaysa leve darante  
qolla marshan yenin machoono inaw?

<sup>43</sup> Tiyayse yenin yaayen Molooksa apalan ooninbee

Repaan hambhen barjoosa eezinin kamsinbena  
yesaaninkashkayse

yenin goodimayna yesa barjonane.

Intaar Baabiloon peera os yeam ida oyte'

hamayse thaapadhidine.

<sup>44</sup> "Wosa eykena darante Barjo kembesana kinka kinin dohonam tarja maatayno apalan onno kekal ko dahade; ogo apalan ooninam Barjo Musena kinin giyonbee kinin dhohon kamsindettsibe ko ashkadhadde. <sup>45</sup> Barjo kesa birantear kinin oytana Barjoam dhesimina eenasa peenam kinin tiyon wodanka, wosa eykena ogo yinin tiyon apalan ooninam Iyaasobesana ogo raqinte ke arsade; Dawtsa wodanka yekkaar ogote ko dahade. <sup>46</sup> Dawtaar Barjosa birante shawkadhanam haapayse, Yayqoob Barjoana ooni woysana kiam ki miskade. <sup>47</sup> Ko dahaannaar Barjona oonin woysaa Soloomoonne. <sup>48</sup> Yin ko dahaannaar Wuldara Sagea Barjo eedinin aanka woyson ooninte dooqehe. Ogonoar Barjokala qansayse eenna giyea kinin yin giyondettsi:

<sup>49</sup> 'Barjo yi giyna: "Cecino bitimayse inin dooqayno borkotonone;  
peenoar roon inin wodaynone.

Ta keeda ina yenin woysayno onno hamin dohoonone?

Inin ukunsayno rango hamin dohoonone?

<sup>50</sup> Ko wulam inin ashkoono isa aankatayu?" kida hame'  
hamayse ki giyade.

<sup>51</sup> "Yedi qoocan woysayna eenato, yesa woylaminka Barjoam dhesiminabee giidhendar qaami wodiminabetsi, yediar yesa eykenadettsi rooro wul Manpas Gazanam yeda jibbe. <sup>52</sup> Yesa eykena Barjokala qansayse eenna giyaynasa kinin oytama hayne? Kedi tipaa easa nivintanam birayse giyaynaam ke deesade; yedi taar agaa eam dembhina saskate imayse kiam ye dettsade. <sup>53</sup> Yedi Barjosa gaananaka imbhon yigginam ye tiyade; ko dahaannaar koam tooleetene" kena ki hamade.

### Isthipaanoosam Seenika Paxate Deesadhoono

<sup>54</sup> Yiwda peensa donzana dhalqin ogoam yinin qansenka Isthipaanoosdar yisa woylaminka kattsi wacimayse hamma ke gavade. <sup>55</sup> Kidiar Manpas Gazanka thoothayse tura cecinte kinin shedenka, Barjosa gobshinbee Barjosa mizaqimbar woyaa Yesus-beam haapayse, <sup>56</sup> "Marrato! Cecino bulimayse ko daaka, Eedi Naas Barjosa mizaqimbar ki woyaysaka haapite i dahade" ki hamade.

<sup>57</sup> Kedi upsin yisa dheg hayayse ilataate qaaminaam yedayse wulatte Isthipaanoosdar ke dhaabhade. <sup>58</sup> Katamarraar bulayse deesana seenika kiam paxan ke yedade. Kediar kisa iirimensa tarjana apalan yinnonam Sawl hambhea barsh kalaasa roon demente ke wodade. <sup>59</sup> Seenika kiam kinin paxenka Isthipaanoos "Imbo Yesuso, isa sadanam tiyaa" hamayse ki miskade. <sup>60</sup> Ogoraar kumpurdhayse yin giyayse ki diyade: "Imbo, ogo kesa seesonam paydaabhode" hamayse upsi gebhika ki ilitade.

<sup>1-2</sup> Sawlaar Isthipaanoosam deesadhenka kembesana kinka ki wormade. Barjona goodimintaka wocchimbhayna eena Isthipaanoosam ke duukade; kattsi eepiar kina ke eepade. Agaa rooroaka Yerusaalem gidir dahaana Barjodar woylamin qajayna eenadar kattsi oytaydha ko dhaabhade; Kiristoos yisa tarjamonnante kinin yittsaana eena shidhaysaka, Barjodar woylamin qajayna eena wul Yiwda peenbee Sammaria peenbedar thar thar ke hamade. <sup>3</sup> Sawlaar Barjodar woylamin qajayna eenaam kaysana zagayse, Barjodar woylamin qajayna eena wulsa onnar ardayse annginabee maanabeam gochate dhaxin ooninte keam ki dhaskade.

### *Kiristoossa Dhacchintan Upsinam Sammaria Gidir Giidhoono*

<sup>4</sup> Thar thar hamayse yivaana Barjodar woylamin qajayna eenaar yinin yivon raqin wulir Kiristoossa dhacchintan upsinam eenna ke giyade. <sup>5</sup> Pilbhoosaar Sammaria katamandar yivayse Barjoyn qadhaa Kiristoos goynsa kena giyte ki dahade. <sup>6</sup> Eenaar Pilbhoossa dhalqinam yinin qansenbee kinin waadadhon tarshen yerinam yinin haapen wodankabe, kinin giyen upsinam woylam kalaaka payya hayayse ke qansade. <sup>7</sup> Beeronaar upsin yisa dheg hayayse ilatada thoothin eendara ke utade; thoothi hajimonka malgimaana eenabee roon wobaana eenabe ke paashade. <sup>8</sup> Ogonante kataman ogote gebhi woza ko dahade.

<sup>9</sup> Kataman ogote Simoon hambhea eedi kalaa ki dahade. Ea agaa katamante marsha hayaate Sammaria gidir dohon eenaam tarshite ki dahade; kidiar “Inta eedi gebhine” hamayse kida giye. <sup>10</sup> Een wulsa iira likkanabee gembhabee “Gebhi Barjo kantan yisa dahaa ea kaane” hamada kinin giyenam payya hayayse keda qanse. <sup>11</sup> Harrna hambhidianna, thoothi wodara yedayse marshanka tarshite kinin waadadhonnane. <sup>12</sup> Ko dahaannaar Pilbhoos Barjosa bitamonbee Yesus Kiristoos naabenbesa wozisen upsinam kinin giyonam qansayse kenin tiyon wodanka annginabee maanabe shiindhite ke dahade. <sup>13</sup> Simoon yintiar Barjodar woylamin qajayse shiindhayse Pilbhoosbesana kinka ki dahade; Pilbhoosin waadadhen kattsi tarshen yerinbee milkitinbeam yinin sheden wodanka kidi targadhite ki dahade.

<sup>14</sup> Yerusaalem gidir dahaana Kiristoos yisa tarjamonnante kinin yittsaana eena Sammaria eena Barjosa upsinam kenin tiyonam qansayse Bhethiroosbee Wannisbeam kekal ke yittsade. <sup>15</sup> Kediar kekal yinin nivon wodanka Manpas Gazanam kenin tiyoadettsi kena Barjoam ke miskade. <sup>16</sup> Harrna hambhidianna, Sammaria eena Imbaa wontea Yesussa naabenka ke shiindhade; Manpas Gazano kesa eedi kaladar hattear hanchadehe. <sup>17</sup> Ogo wodanka Bhethiroosbee Wannisbe yisa aaninam eenadar ke wodade. Eenaar Manpas Gazanam ke tiyade.

<sup>18</sup> Kiristoos yisa tarjamonnante kinin yittsaana aaninam yisa eenadar kenin wodenka Manpas Gazan imbonam Simoon yinin haapenka, birre kena bavayse, <sup>19</sup> “Intaar isa aaninam inin wodayna wul Manpas Gazanam kenin tiyoadettsi hayamon koam inaar imee” ki hamade. <sup>20</sup> Bhethiroosaar kina yin ki giyade: “Barjosa imintonam birreka shanana hanin bhocchonna, hambee hasa birrenbe kinka kayee. <sup>21</sup> Hasa woylamino Barjo birante tipa konin dahaamonna, ko waadimante waadadhana hasa raq qolehe. <sup>22</sup> Ta keeda hasa siyon qaabon koam garayse Barjodar maataa; way hasa woylaminsa qaabonam hana garea ki hanna, Barjoam miskaa. <sup>23</sup> Harrna hambhidianna, ya gebhi woogintoka hanin thoothonbee seesoka dhaxadhaa hanin dohonbeam ida haape” kina ki hamade. <sup>24</sup> Simoonaar yi giyna: “Yenin giyon wulra yer kalaar idar yeskoamadettsi yedi ina Barjoam miskee” kena ki hamade.

<sup>25</sup> Bhethiroosbee Wannisbe yinin tarjonbee Imbaa wontea Yesussa upsinam eenana yinin giyonbesa budonte, Sammaria peensa gurdana thoothinar Barjosa dhacchintan upsinam eenana giyada Yerusaalem katamandar ke maatade.

### *Pilbhoos Tobbhea Eam Kinin Shivoono*

<sup>26</sup> Barjosa gaana Pilbhoosna “Dhaabhayse hayn utensa mizaqimbar yivayse Yerusaalemra daran goynka Gaaza katamandar yiven goynka yivaa” kina ki hamade. <sup>27</sup> Kidiar dhaabhayse ki yivade. Marrato! Eedi kalaa Tobbhea peen ea bua Barjona goodimana Yerusaalemdar birayse ki yivade. Ea agaa Yindeke hambhen Tobbhea peen mayn bitinsa yer wulam wottsea hayamoysa dahaa eedine. <sup>28</sup> Kidiar Yerusaalemra yinin maatenka sargalladar\* dooqayse Barjokala qansayse eenna giyea Isias mathaapinam kida nabbabe. <sup>29</sup> Manpas Gazanoar Pilbhoosna “Ogo sargallankal theedaa” kina ko hamade. <sup>30</sup> Pilbhoosaar gobate yivayse, Barjokala qansayse eenna giyea Isias mathaapinam kinin nabbabenka qansayse, eana “Ta hanin nabbabayno hana arda ko ardo?” kina ki hamade. <sup>31</sup> Kidiar “Ina giyea eedi qolma hamin ko ina arde?” ki hamade. Pir Pilbhoosna “Sargallandar utayse ikal dooqaa” hamayse kiam ki miskade.

<sup>32</sup> Tobbhea ear kinin nabbabayno ranqo yin giyaynone:

“Kidi taxana qandhea yaatidettsine;  
sitin taxadhenka lay hamea yaatidettsi  
kidi giyana apo buladehe.

<sup>33</sup> Kiam ooshinsayse, tipa pirdiar kina pirdadhadehe;  
peendar sadaka kinin dahayno konin maqonna,  
kisa adhadhinsa giyana damea hayne?”

koda hame. <sup>34</sup> Tobbhea ear Pilbhoosna “Barjokala qansayse eenna giyea ogoam kinin giyoono haynane? Yinnon metensamoo? Eedi absaw? Ina giyaa” kina ki hamade.

<sup>35</sup> Pilbhoosaar kinin nabbabon ogosa iira yedayse Yesus goynsa dhacchintan upsinam kina ki giyade.

<sup>36</sup> Goynka kenin yivenkaar noqo yinin dohon raqante ke yeskade. Tobbhea ear “Shedaa! Kote noqo daane; kosa iir inin shiidhoamadettsi iam marea yer daaw?” ki hamade. <sup>37</sup> [Pilbhoosaar “Gonin hamon woylaminha Barjodar woylam ha qajidiana, shiidhana damaada dame” kina ki hamade. Tobbhea ear “Yesus Kiristoos Barjo Naas kinin dohonam dhesayse inta kidar woylam qajayda qaje” kina ki hamade.] <sup>38</sup> Tobbhea ea kenin yiven sargallanam woysadhoodettsi ki giyade. Ogora Pilbhoosbee Tobbhea eabe kinka noqonte ardayse Pilbhoos eam ki shivade. <sup>39</sup> Noqora ke utaysaka saana Barjosa Manpasino Pilbhoosam raq abdar ko tiyade. Tobbhea ear wozadhaate goynka ki yivade; Pilbhoosam lansi haapadehe.

<sup>40</sup> Pilbhoosaar Azothoos katamante ki haapadhade; Qesaaria katamante yinin nivenka yekka, kataman wulir yivaate Barjosa dhacchintan upsinam ki giyade.

## 9

### Sawl Barjodar Woylamin Kinin Qajoono Yi Waa 22:3-16; 26:12-18

<sup>1</sup> Sawl Imbaa wontea Yesusdar woylamin qajayna eenaam deesota akar keam kurtunsada gudullasa gebhaakal ki yivade. <sup>2</sup> “Yesusdar woylamin qajayna eena annginabee maanabesa inin haapaanaam dhaxayse keam Yerusaalemdar bavate inin nivoadettsi, Demasqo gidir Ayiwda eenasa bukin ranqaam wottsayna eenana inin imea warqat thaapate ina imaa” hamayse kiam ki oysade.

<sup>3</sup> Yivada Demasqo gidir yeskana kinin hayenka, kisa gasante ki bhocchima cecira bhalqantayno shaaka ko shaakade. <sup>4</sup> Peendar ki dhambade. Ogora “Sawl, Sawl! Harrnaa iam oyte?” hamea upsi ki qansade. <sup>5</sup> Sawlaar “Imbo, ya hayne?” ki hamade. Kidiar

\* <sup>8:28</sup> “Sargalla” hamen upsinam Haalin Mallan mathaapinsa macchinte thaapadhaanar shedaa. <sup>8:33</sup> Isi 53:7-8.

“Inta hanin oytea Yesusne.\* <sup>6</sup> Ta keeda dhaabhayse katamandar yivaa. Waadadhan haam zaskenam hana giidha ko giidhe” kina ki hamade.

<sup>7</sup> Sawlbesana yivayna eena upsinam qansaate hayyeamaar yinin haapaamonna, lay hamayse ke woyade. <sup>8</sup> Sawlaar yinin dhamborra ki dhaabhade; aapinin kisa pak hamenka haapanam damadehe; enoar kisa aaninam yedayse entsate Demasqo katamante kiam ke yeskisade. <sup>9</sup> Roro makkamna aapino kisa shedana damadehe; ogo wodanka kidi itsimabee wucimabe ki kappade.

<sup>10</sup> Demasqo katamante Hanania hambhea Barjodar woylamin qajea eedi kalaa ki dahade. Kidiar Barjoyn kina dhohon shedintonam kinin haapenka, Imbaa wontea “Hanania” hamayse kiam ki eelade. Kidiar “Imbo, inta kayne” ki hamade. <sup>11</sup> Imbaa wontear “Dhaabhayse Gaz hambhen goynka yivaa; ogote Yiwda ooninte Sawl hambhea Therses eam zaga. Kidi ta Barjoam miskite ki dahade. <sup>12</sup> Sawlsa aapino pir konin she-doadettsi Hanania hambhea ea kikal ardayse aaninam kidar kinin wodenka, Barjokala shedintonam ki haapade” kina ki hamade.

<sup>13</sup> Hananiar yin ki guyade: “Imbo, ea kaa Yerusaalem gidir dohon hasa een gazandar yer siya kinin hayonam thoothin eenkalanka inta qansidine. <sup>14</sup> Kotear hasa naabenam eelayna wulam dhaxota gudullasa hayonakalanka hayamo tiydine” kina ki hamade.

<sup>15</sup> Imbaa wontear Hananiana yin ki guyade: “Kidi Ayiwdtay hamma eenabee, peensa binnabee, Israveel eenabena isa naabenam kinin dhettsoadettsi inin kamaa ea kinin dohonna kikal yivaa! <sup>16</sup> Isa naabenna hamayse hamaddha gaale haapan kiam konin zaskenam inta kina dhaayda dhee” kina ki hamade.

<sup>17</sup> Ogonante Hanania yivayse Sawlin dohon ooninte ki ardade. Aaninam yisa Sawldar wodayse, “Imbanaasa Sawlo, kote hanin nivenka goynte hana haapadhaa Imbaa wontea Yesus tapir aapino hasa konin she-doadettsibee Manpas Gazanka hanin thoothoadettsibe iam hakal ki nittsade” kina ki hamade. <sup>18</sup> Saanawa opiridettsi yer kisa aapira ko wavade. Ogora kisa aapinoar ko haapade; dhaabhaysear shiidhimbhe ki shiidhimbhade; <sup>19</sup> galaar itsayse ki wocchimbhade.

### *Sawl Demasqo Katamante Kinin Dohoono*

Sawl Demasqo katamante dhaana Barjodar woylamin qajayna eenabesana kinka likka roorona ki dooqade. <sup>20</sup> Saana Sawl Yesus goynka “Kidi Barjo Naasane” hamayse Ayiwdtay eenasa bukin ranqar giyan ki yedade. <sup>21</sup> Kisa dhalqinam qansaana eena wulaar “Ea kaa Yerusaalem gidir naaben ogoam eelayna eenaam oytayeatayu? Ta kote kinin nivoono keam dhaxayse gudullasa hayonakal bavate yivotatayu?” hamada targadhite ke dahade. <sup>22</sup> Sawlaar wocchimbhada ki yivade. Yesus Barjoyn qadhaa Kiristoos gon kinin dohonam kinin giyenka Demasqo gidir dhaana Ayiwdtay eenam malsi kina maasana damadehe.

<sup>23</sup> Thoothi roorosa budonte, Ayiwdtay eenam Sawlam deesana kinka ke dhalqade; <sup>24</sup> kidiar kesa qaabonam dhesidine. Kedi kiam deesota sootinbee rooronbe katamansa kerram toolite ke dahade. <sup>25</sup> Ko dhaaannaar kisa paanan yivayna eena sootinka sharankonte kiam wodayse seenika woysadhon kerminsa maskootinka hanchayse kiam ke yittsade.

### *Sawl Yerusaalem Gidir Kinin Nivoono*

<sup>26</sup> Sawl Yerusaalem gidir yinin yeskon wodanka Barjodar woylamin qajayna eenabesana kinka doota ki zagade; kedi wulaar Barjodar woylamin kinin qajonam gonni hamayse yinin tiyaamonna kiam ke kurtumbhade. <sup>27</sup> Barnabaasaar Kiristoos yisa tarjamonnante kinin yittsaana eenakal Sawlam yinka entsayse Imbaa wontea Yesus goynte hamin kina kinin haapadhonbee, kina kinin giyonbee, Demasqo gidir Sawl

\* 9:5 Waani waani mathaapinasa iir “Uxayno anngamonam hanin jibbenka kattsi hana koda dethe” koda hame. Pir, “Sawl gibazada kurtumbheka targadhate, ‘Imbo, har i hana waadadhoodettsi ha nashe?’ kina ki hamade” koda hame. Ogonoar kashi 22:10bee kashi 26:14bedar thaapadhidine.

Yesussa naabenka hamin wocchimbhayse kinin giyenbeam kena ki guyade. <sup>28</sup> Ogonante Sawl kembesana kinka maatayse Yerusaalem gidir may ki yaayade. Imbaa wontea Yesussa naabenkaar kurtumbhima eenna giyte ki dahade. <sup>29</sup> Girik aponka dhalqayna Ayiwde eena kinka dhalqada kembete kinka ki palimade; kediari kiam deesana ke zagade. <sup>30</sup> Barjodar woylamin qajayna eenaar ogoam yinin dhesenka, Qesaaria kamatante kiam entsate yivayse Therses katamandar kiam ke yittsade. <sup>31</sup> Yiwda peenbee, Galila peenbee, Sammaria peen wulber dahaana Barjodar woylamin qajayna eena payyamoka ke dooqade; kediari ke kantimbhade; Barjoam gobshada Manpas Gazanka wocchimbhada ke thoothade.

### *Bhethiroos Liidabee Iyoobhebe Gidir Kinin Dohoono*

<sup>32</sup> Bhethiroos igina peena wulir yaayada Liidar dahaana Barjodar woylamin qajayna eenakal ki yivade. <sup>33</sup> Raqin ogotear leve lankayna burqoka malgimayse wodhaa Eniya hambhea eam ki haapade. <sup>34</sup> Bhethiroosaar “Eniya, Yesus Kiristoos haam pacchidine; dhaabhayse hanin wodhon eebhenam maasaa!” kina ki hamade. Kidi saanawa ki dhaabhade. <sup>35</sup> Liidabee Saaroonaber dohoono eeno wul Eniyaam shedayse Imbaa wontea Yesusdar woylamin ko qajade.

<sup>36</sup> Iyoobhe katamantear Thabita hambhayno Barjodar woylamin qajayno ko dahade; kosa naabensa bulino Girik peen aponka Dorqa<sup>†</sup> hamintane. Kodi roro wul payya yer hayaynobee qambhinanaar iminto imaynobe ko dahade. <sup>37</sup> Ogo wodanka kodi hajadhayse ko diyade. Kediari kosa leesinam shivayse ooninsa zulonte woysadhon ooninte koam ke wodade.

<sup>38</sup> Liida Iyoobhesa gasante theedi yinin dohonna, Iyoobhe gidir dahaana Barjodar woylamin qajayna eena Bhethiroos Liida gidir kinin dohonam qansayse, “Bannzo! Kappima wokal nivaa” hamayse eena lamaanaam kidar ke yittsade.

<sup>39</sup> Bhethiroosaar dhaabhayse kembesana kinka ki nivade; ke yeskaysaka ooninsa zulonte woysadhon ooninte kiam entsate ke utade. Maana qambhina wul Dorqa sadanka yinin dohon wodanka kena konin waadadhoono qamushinabee apallabeam dhaaate Bhethiroos birante woyayse keda eepe.

<sup>40</sup> Bhethiroosaar eena wulam mayanka keam bulayse kumpurdhayse Barjoam ki miskade. Leesindar wal hamayse, “Thabita, dhaabhaa” kona ki hamade; kosa aapin pak hamaysaka Bhethiroosamaar shadayse dhaabhate ko dooqade. <sup>41</sup> Kidiari kosa aarinam yedate koam ki dhaasade; Barjodar woylamin qajynabee maana qambhinabeam yikal eelayse sadaka kesa birante koam ki woysade.

<sup>42</sup> Ogono yerroar Iyoobhe gidir dohon een wulna ko dhesimade; thoothino eenoar Imbaa wontea Yesusdar woylamin ko qajade. <sup>43</sup> Bhethiroosaar Simoon hambhea eebhen kuccheakal thoothi roorona Iyoobhe gidir ki dooqade.

## 10

### *Bhethiroosbee Qorneloosbe*

<sup>1</sup> Qesaaria katamante Qorneloos hambhea eedi kalaa ki dahade. Kidiari “Thailiansa banqin eena” hambaynasa mato alaqane. <sup>2</sup> Kidiari Barjona goodimaate wocchimbheane; yimbee oonin eena yinnabe Barjoam kurtumbaynane; qambhinana iminto imeabee Barjoam rooro wul miskeabene.

<sup>3</sup> Roro kalaa savaat sal maataysaka Barjosa gaana kikal kinin ardenbee “Qorneloos” hamayse kiam kinin eelenbeka Barjoyn kina dhohon shadintonka may kiam ki haapade. <sup>4</sup> Qorneloosaar Barjosa gaanaam dhari kiam shedaate targadhayse, “Imbo, hare?” ki hamade. Barjosa gaanaar kina yin ki guyade: “Barjoam hanin miskenbee qambhinana hanin imayno hasa imintonbeam Barjo birante hana bhocchadhidine.

<sup>†</sup> 9:36 “Thabita” way “Dorqa” haminta Banen aponka “guumi” hamintane.

<sup>5</sup> Taar Iyoobhe gidir eenaam yittsayse Bhethiroos hambhea Simoonam elsa. <sup>6</sup> Kidi ta bazinsa gasante dahaa eebhen kucchea Simoon ooninte chocchi maatayse ki dahade” kina ki hamade.

<sup>7</sup> Ogoam giyaa gaanaar kikalanka edimayse ki yivaysaka, Qorneloos yisa waadimay-nasa lamaanabee kimbesana kinka dahaana banqin eenabera Barjona goodimaate wocchimbhea kalaam eelayse, <sup>8</sup> yer wulam kena yinin guyonsa budonte, Iyoobhe gidir keam ki yittsade.

<sup>9</sup> Kina hamon kenin yivenka katamante ke theedaysaka, savaat lax maatenka Bhethiroos Barjoam miskota ooninsa zulonte ki utade. <sup>10</sup> Ogotear daaqardhayse kummana ki zagade; galan akar ashkadhenka Barjoyn kina dhohon shedintonam ki haapade. <sup>11</sup> Kinin haapoono shedintonoar cecin bulimaka gasana oyrra yedadhoono apala gebhidettsino peendar konin hanchenam ki haapade. <sup>12</sup> Ogo apalante rooysa oydi dahaana wulbee, iinka peendar gochimayna yerrabee, cecindar pillayna aptinabeam ki haapade. <sup>13</sup> “Bhethirooso, dhaabhayse igina yerram taxayse itsaa” hamea upsi kikal ko nivade. <sup>14</sup> Bhethiroosaar “Imbo, yintehe; inta payyatay hamon yerin qaysinam itsayse dhesattine” ki hamade. <sup>15</sup> Taar lansi “Barjoyn gazinsonam ya ‘Qaysine’ hamaabhode!” hamea upsi kikal ko nivade. <sup>16</sup> Ogono yeroor makkam goyt kina yinin haapadhonsa budonte, saanawa apaladettsinam tura cecindar ko tiidhade.

<sup>17</sup> Bhethiroos “Inin shedonsa bulino har ko doo?” hante qaabada ki daaka, marrato! Qorneloosin keam yittsaana eena Simoonsa oonin oysate kisa mayan nivayse kerindar ke woyade. <sup>18</sup> Kediar eelayse, “Bhethiroos hambhea Simoon chocchi maatayse kinin dohoono kotew?” hamayse ke oysade. <sup>19</sup> Bhethiroosaar Barjoyn kina dhohon shedintonam qaabada ki daaka, Manpas Gazano “Shedaa! Eedi makkam haam zaga ke zage. <sup>20</sup> Dhaabhayse hanchaa; inin keam nittsonna qothimima kembesana kinka yivaa!” kina ki hamade. <sup>21</sup> Bhethiroosaar eenakal hanchayse, “Marrato! Yenin zagea ea intane; yenin nivoono harrnane?” kena ki hamade. <sup>22</sup> Kediar “Wonin nivoono mato alaqa Qornelooskalankane. Kidiar tipa eabee Barjoamaar kurtumbheabene; pir Ayiwdeeno wul kina koda tarje. Haam yisa ooninte elsayse hanin guyenam kinin qansoadettsi Barjosa gaana gaza kina ki guyade” kina ke hamade. <sup>23</sup> Bhethiroosaar ooninte keam arsayse keam ki wottsaade.

Kina hamon dhaabhayse kembesana kinka ki yivade; Iyoobhe gidir dahaana Barjodar woylamin qajayna eenasa waani waani eena kimbesana kinka ke yivade. <sup>24</sup> Ogosa kina hamon Qesaaria katama ke yeskade; Qorneloosaar yisa muldhanaabeyisa yettsinabeam yikal eelayse Bhethiroosam kaalite ke dahade. <sup>25</sup> Bhethiroos nivayse ooninte kinin ardenka, Qorneloos kikal theedayse kisa roondar dhambayse kina ki goodimade. <sup>26</sup> Bhethiroosaar “Dhaabhaa! Intaar hadettsi eedine” hamayse kiam ki dhaasade. <sup>27</sup> Kimbesana kinka dhalqada ooninte ki ardade. Thoothino eenoar bukayse ke daaka keam shedayse, <sup>28</sup> yin kena ki guyade: “Ayiwd eena Ayiwday hamma eenabesana kinka kalaa kinin dohonbee kesa ooninte ardintabe wosa yiggin goynka zaskiminam yedi yemal dheseeda dhese; ko dahaannaar hayyeamaar ‘Gazimbhaamane’ way ‘Qaysine’ inin hamoamadettsi Barjo ina dhaydine. <sup>29</sup> Ogonante iam yenin eelenka palime qolma yekal i nivade; ta harrna iam yenin eelonam dhesana ida zage” kena ki hamade.

<sup>30</sup> Qorneloosaar yin ki guyade: “Kina rooro oydisa birayse kaa wodaaka savaat salka oonin innonte Barjoam miskite i dahade. Marrato! Bhalqantidettsi maaten apala qaadhaa eedi kalaa isa birante ki woyade. <sup>31</sup> ‘Qornelooso, Barjo hasa miskenam qansidine; qambhinana hanin imen hasa imintonamaar bhocchidine. <sup>32</sup> Ta keeda Iyoobhe katamadar eedi yittsayse Bhethiroos hambhea Simoonam elsa. Kidi bazinsa aponte dohon eebhen kucchea Simoonsa ooninte chocchi maatayse ki dahade’ ina ki hamade. <sup>33</sup> Ogonante saana upsi hadar i yittsade; yaar ikal hanin nivenka payyaa

hayade. Ta keeda Barjo hana kinin giyon wulam qansana wodi wul Barjo birante kote bukayse toolite wo dahade” kina ki hamade.

### *Bhethiroossa Dhalqino*

<sup>34</sup> Bhethiroos yin ki giyade: “Barjo eedisa woti shedayse waadadhima kinin dohonam taaki gon inta dhesidine. <sup>35</sup> Pee hamote dahaa eedi yi daaka Barjoam kurtumbhea tipa hayea ki hanna, Barjo kiam kida tiye. <sup>36</sup> Barjo ‘Yesus Kiristoosbar payyamono koda haapadhe’ hamayse dhacchintan upsinam Israveel eenana ki yittsade. Yesus Kiristoos een wulsa Imbaane. Een wulsa Imbaa maataa Yesus Kiristoosbar Israveel eenana Barjoyn yittsoono payyansa dhacchintan upsino konone. <sup>37</sup> Wannisin giyon shiidhimensa budonte, Galila peera yedayse, Yiwda peen wulir dohon yerinam yedi dheseeda dhese. <sup>38</sup> Ogonoar Barjo Naazret peen ea Yesusam Manpas Gazanka kiam kinin qadhonbee kantan kina kinin imonbeam dheseeda dhese. Barjoar kimbesana kinka kinin dohonna, Yesus payya yer hayadabee Seethaanin yisa kantanka galshayna eena wulam pacchadabe ki yaayade.

<sup>39</sup> “Ayiwd eenasa peentebee Yerusaalem katamantebe kinin hayon yer wul goynka wodi tarjanane. Ogora masqalindar ziitayse kiam ke deesade. <sup>40</sup> Barjo makkansoa rooroaka diira kiam ki dhaasade; may kinin haapadhoadettsi ki hayade. <sup>41</sup> May kinin haapadhoonoar birayse Barjoyn kamaana tarjana eenanane, een wulnatehe; igin tarjana diira kinin dhaabhonsa budonte kimbesana kinka itsaanabee wucaanabe wodine. <sup>42</sup> Kisa upsinam eenna wonin giyoadettsi, pir Yesus sadanka dahaana eenabee diyaana eenabedar kinin pirdoadettsi Barjoyn kiam wodaa kinin maatonam wonin tarjoadettsi wona ki giyade. <sup>43</sup> Kidar woylamin qajea wul kisa naabenka seesonsa garintonam kinin haapendettsi Barjokala qansayse eenna giyayna eena wul kina ke tarjade” kena ki hamade.

### *Ayiwdtay Hamma Eena Barjodar Woylamin Qajayne Manpas Gazanam Kenin Tiyoono*

<sup>44</sup> Bhethiroos ogoam giyte ki daaka, kinin giyen upsinam qansayna eena wuldar Manpas Gazano ko hanchade. <sup>45</sup> Bhethiroosbesana nivaana Barjodar woylamin qajayna Ayiwd eena Barjo Ayiwdtay hamma eenana Manpas Gazanam kinin imonam yinin haapenka kedi targadhidine. <sup>46</sup> Manpas Gazanam kena imbhonam kinin dhesoono Ayiwdtay hamma eena apo abka kinin giyenbee Barjoam kinin gobshenbeam yinin qansonnanne. Ogo wodanka Bhethiroos <sup>47</sup> “Igina eena wodettsi Manpas Gazanam kedi tiydine. Ta keeda noqoka kinin shiidhimbhoadettsi hayne keam marea?” ki hamade. <sup>48</sup> Ogonante Yesus Kiristoossa naabenka kinin shiidhimbhoadettsi ki giyade. Ogosa budonte Bhethiroos kembesana kinka likka rooro kinin dooqoadettsi kiam ke miskade.

## 11

### *Bhethiroosdar Dhaabhoono Palimeno*

<sup>1</sup> Ayiwdtay hamma eena Barjosa upsinam qansayse kinin tiyonam Yiwda peente daahaana Kiristoos yisa tarjamonnante kinin yittsanaa eenabee kidar woylamin qajaana waani eenabe ke qansade. <sup>2</sup> Bhethiroos Yerusaalem ki yivaysaka qaaman taxadhen goyn tipisayna Barjodar woylamin qajayna kimbesana ke palimade. <sup>3</sup> “Ya qaaman taxadhamma eenasa ooninte ardayse kimbesana kinka harrnaa kummaa?” hamayse kina ke dhiidhimade. <sup>4</sup> Bhethiroosaa birara yedayse yer wulam yin ki giyade: <sup>5</sup> “Inta Iyoobhe katamante Barjoam inin miskenka Barjoyn ina dhohon shedintonka inin haapenka, gasana oyrra apala gebhidettsino cecira hanchayse ikal ko nivade. <sup>6</sup> Koamaar bhocchika inin shedenka, roo oydika daahaana qollabee, dammabee, iinka peendar gochimayna yerrabee, cecindar pillayna aptinabeam i haapade. <sup>7</sup> ‘Bhethirooso, dhaabbayse igina yerraam taxayse itsaa’ hamayno upsino

ina ko qansimade. <sup>8</sup> Intaar ‘Imbo, yintehe! Payyatay hamon yerin qaysinam itsate dhesattine’ i hamade. <sup>9</sup> Tapir lansi ‘Barjoyn gazinsonam ya “Qaysine” hamaabhode!’ hamea upsi cecira ko nivade. <sup>10</sup> Ogono yerro makkam goyt yin konin haapadhonsa budonte, apaladettsino wul tura cecindar ko tiidhade.

<sup>11</sup> “Marrato! Ogora kappima Qesaaria katamara eedi makkam waani keam ikal nittsadhaysaka wonin dohon oonindar ke yeskade. <sup>12</sup> Manpas Gazanoar qothimima kembesana kinka inin yivoadettsi ina ko guyade; igina laxna imbanana imbesana kinka ke yivade. Qorneloos hambhea easa ooninte wo ardade. <sup>13</sup> Kidiar ‘Barjosa gaana isa ooninsa iinte woyayse ki daaka kiam i haapade. Barjosa gaanaar ina “Iyoobhe gidir eedi yittsayse Bhethiroos hambhea Simoonam elsa. <sup>14</sup> Bhethiroosaar hambee hasa oonin eena wulbe yedin dhaqensa upsi hana kida giye” ki hamade’ hamayse Qorneloos wona ki guyade.

<sup>15</sup> “Intaar giyan inin yedenka, Manpas Gazano birayse wodar yinin hanchondettsi kedalar ko hanchade. <sup>16</sup> ‘Wannis eenam noqoka ki shivade; yedi Manpas Gazanka yeda shiidhe’ hamayse Imbaa wontea Yesusin giyoono upsino bhoq ina ko hamade. <sup>17</sup> Ta keeda Imbaa wontea Yesus Kiristoosdar woylamin qajaana wona Barjoyn imon imintonam kenaar imidi ki hanna, Barjosa qaabonam marana damea inta hayne?’ ki hamade.

<sup>18</sup> Eenaar ogoam yinin qansen wodanka lay ke hamade. “Ta keeda Barjo Ayiwday hamma eenana seeson waadimanam garayse kidar maatayse sada kenin haapoadettsi kena imidine” hamayse Barjoam ke gobshade.

### *Barjodar Woylamin Qajayna Anthokia Eenaam “Kiristiyan” Kenin Hambhoono*

<sup>19</sup> Isthipaanoos deesadhaysaka dhaabhon oytaydhan goynka Barjodar woylamin qajayna eena Pinqe peenbee, Qobhiroos peenbee, Anthokia katamanbeka yekka ke yivade. Kiristoossa dhacchintan upsinamaar Ayiwd eenana bish ke guyade; waani eenna guyadehe. <sup>20</sup> Ko dahaannaar kesa iira Qobhiroosbee Qerenabera nivaana waani waani eena Anthokia kataman yivayse Ayiwday hamma eenana Imbaa wontea Yesussa dhacchintan upsinam kena ke guyade. <sup>21</sup> Barjoar keam kelshite ki dahade; thoothino eenoar Imbaa wontea Yesusdar woylamin qajayse Barjodar ke maatade.

<sup>22</sup> Yerusaalem gidir dahaana Barjodar woylamin qajayna eena ogo kesa dhalqinam yinin qansenka, Barnabaasam Anthokia katamandar ke yittsade. <sup>23-24</sup> Kidiar yivayse Barjo yisa sunin imintonka kinin waadadhonam yinin haapenka ki wozadhade. Barnabaas Manpas Gazanbee Barjodar woylamin qajintanbeyn thoothaa payya eedi kinin dohonna, eena wul woylaminka yisa wocchimbhayse Imbaa wontea Yesusdar woylam qajaate kenin doadettsi keam ki kiilade. Ogonante thoothino eenoar Imbaa wontea Yesusdar woylam ko qajade.

<sup>25</sup> Ogosa budonte, Barnabaas Sawlam zagana Therses katamandar ki yivade. <sup>26</sup> Kiam yinin haapenka Anthokia katamante entsate ki nivade; ogote dahaana Barjodar woylamin qajayna eenabesana kinka bukayse leve kalaana thoothina eenaam ke dhettsade. Barjodar woylamin qajayna eenaam “Kiristiyan” keam hambhoono birayse Anthokia katamantene.

<sup>27</sup> Ogo wodanka Barjokala qansayse eenna guyayna eena Yerusaalemra Anthokia katamandar ke nivade. <sup>28</sup> Kesa shaarira Agaabos hambhea ea dhaabhayse peen wuldar gebhi basho nivenam Manpas Gazano kina dhahaysaka hamota dohonam ki guyade; ogono daaqinoar Roome peen Bitaa Qelawdoos wodanka ko dahade. <sup>29</sup> Ogonante Barjodar woylamin qajayna eena wul yinin damaadettsi yisa birre bulayse Yiwda peente dahaana imbaanaanana yittsana ke qaabade. <sup>30</sup> Birrenamaar bulayse Barnabaasbee Sawlbesa aaninka Yiwda peente dahaana Barjodar woylamin qajayna eenasa donzanana ke yittsade.

## 12

### *Barjodar Woylamin Qajaanadar Oytaydhayn Yeskoono*

<sup>1</sup> Ogo wodanka Bitaa Herodis Barjodar woylamin qajayna eena waani waaniam oytan ki yedade. <sup>2</sup> Wannissa indanaasa Yayqoobamaar halpaka kiam ki dettsade. <sup>3</sup> Ogono yerro Ayiwd eenaam konin wozisonam yinin haapenka Bhethiroosamaar ki yettsade. Ogonoar yin konin maatoono Ayiwd eenasa irshonin qolmin balashan kenin itsen Paasikan\* rooroakane. <sup>4</sup> Bhethiroosam yettsayse dhaxin ooninte kiam ki dhaskade; Paasikan rooroasa budonte eensa birante kidar pirdota qaabayse eedi oydi oydi maatayse kiam kenin tooladettsi tabhi lax poolisanana kiam ki imade. <sup>5</sup> Ogonante Bhethiroosam dhaxin ooninte dhaskayse kida toldhe; ko dahaannaar Barjodar woylamin qajayna eena kina Barjoam wocchimbhayse miskaate ke dahade.

### *Barjosa Gaana Bhethiroosam Dhixin Oonira Kinin Buloono*

<sup>6</sup> Herodis Bhethiroosam eensa birante pirdota kinin qaabon wodanka, sootin ogo sansala lamaaka kiam dhaskayse poolisana lamaanasa shaarinte raatayse ki dahade; waani poolisanaar dhaxin ooninsa kerinam keda toole. <sup>7</sup> Marrato! Barjosa gaana dhesadhima ki haapadhade; Bhethiroosin dohon ooninsa iinte shaaka ko shaakade. Barjosa gaanaar Bhethiroossa demenam qanate dhaasayse, “Saana dhaabhaa!” kina ki hamade. Ogo wodanka sansalloar kisa aanira ko wavade. <sup>8</sup> Gaanaar “Hasa apalanam dhaximbhaa; dunngurinamaar roonte arsaa” kina ki hamade. Bhethiroosaar kina giidhondettsi ki hayade. Gaanaar pir “Hasa apalan qaadhaa; isa paanan nivaa” kina ki hamade. <sup>9</sup> Bhethiroosaar utayse kisa paanan ki yivade. Barjoyn kina dhohon shedintonka kinin haapaa kina ko maatade; Barjosa gaana hayayno yer wul gon yer kina maatadehe. <sup>10</sup> Biron kerin tooleabee lanson kerin tooleabekala sagayse katamandar uten anngamon kerinkal ke yeskade. Kerroar eedi kaamima yinti bulmaysaka utayse goyti kallonka ke yivade; saanawa Barjosa gaana Bhethirooskalanka edimayse ki yivade.

<sup>11</sup> Bhethiroosaar maasayse kinin bhocchenka, “Barjo yisa gaanaam ikal nittsayse Herodissa aanirabee Ayiwd eena kenin toolen yerin wulbera iam kinin dhacchonam ta gon inta dhesidine” ki hamade.

<sup>12</sup> Yinin bhocchon wodanka, Marqoos hambhea Wannissa indan Mayriyam oonindar ki yivade; ogote thoothino eeno bukayse Barjoam miskite ko dahade. <sup>13</sup> Bhethiroosaar mayan kerinam kinin kokkenka Rooda hambhayno waadima maa kallo kidi hay kinin dohonam dhesana kerindar ko nivade. <sup>14</sup> Bhethiroossa upsinam yinin dhesenka, yisa wozanka dhaabhoono kerinam bulma gobaka ooninte ardayse, “Bhethiroos kerinte nivayse woydine” hamayse kena ko guyade. <sup>15</sup> Kediar “Ya bardhidine” kona ke hamade. Kodiar “Gon kidine” hamaate kekal paliman ko yedade. Kediar “Kisa shiponone” ke hamade.

<sup>16</sup> Bhethiroosaar kerinam kokkaate ki dahade; kediar kerinam bulayse kiam yinin haapenka targadhidine. <sup>17</sup> Bhethiroosaar aanka lay hamee hamayse Barjo dhaxin oonira hamin kinin bulonam kena guyayse, “Koam Yayqoobbee Barjodar woylamin qajaana waanibena giyee” kena ki hamade. Ogora kekalanka edimayse raq abdar ki yivade.

<sup>18</sup> Peen sedhaysaka burin, “Bhethiroosam hare bavate yivoono?” hamayse poolisana shaarinte goore gebhi ko dhaabhade. <sup>19</sup> Bitaa Herodissaar Bhethiroosam zagayse yinin bashadhenka dhaxin ooninam toolayna eenaam marmarayse kenin deesadhoodettsi ki guyade. Ogoraar Herodis Yiwda peera Qesaaria katamandar yivayse ki dooqade.

### *Herodissa Diydino*

---

\* <sup>12:3</sup> “Paasika” hamen upsinam Haalin Mallan mathaapinsa macchinte thaapadhaanar shedaa.

<sup>20</sup> Herodis Thiroosbee Sidoona eenabedar kattsi wacimidine. Kediar kinka kalaa maatayse bitaasa ooninam wottsea Bilasthoos nivayse keam kinin kelshoadettsi miskayse bitaakal qaashimota ke oysade. Ogoam kenin yin hayoono kesa galan kenin haapayno bitaayn wottsen peera konin dohonnane.

<sup>21</sup> Aanin qunthadhaa rooroaka Bitaa Herodis bitamon apalan qaadhayse bitamon borkotondar dooqayse eenna dhalq giyan ki yedade. <sup>22</sup> Eenoar “Kono barjosa upsine, eedi upsithehe” hamayse upsi gebhika ilatan ko yedade. <sup>23</sup> Herodis Barjoam gobshima kinin garonna, saana Barjosa gaana kiam ki cavade; ogora kisa bishin qaydhaysakaar ki diyade.

<sup>24</sup> Barjosa upsino gebhaatebee thoothaatebe ko yivade. <sup>25</sup> Barnabaasbee Sawlbe keam nittsadhon waadiman yisa macchayse Yerusaalemra Anthokiadar ke maatade; Marquoos hambhea Wannisamaar yinka entsate ke yivade.

## 13

### *Manpas Gazano Barnabaasbee Sawlbeam Yisa Waadimanna Konin Kamoono*

<sup>1</sup> Anthokia gidir dohon misken ooninte Barjokala qansayse eenna giyaynabee enaanam dhettsaynabe ke dahade; kediar Barnabaasbee, Thiya hambhea Simoonbee, Qerena peen ea Lukiyooosbee, peen wottsea Herodisbesana kinka gebhaa Minahebee, Sawlbene. <sup>2</sup> Barjodar woylamin qajaana eena kenin goodimenkabee itsima Barjoam kenin miskenkabe, Manpas Gazano “Barnabaasbee Sawlbeam inin eelon waadimanna ina keam edee” ko hamade. <sup>3</sup> Ogo wodanka itsima Barjoam miskayse aaninam yisa kediar kenin wodonsa budonte, keam ke yittsade.

### *Barnabaasbee Sawlbe Qobhiroos Gidir Kenin Dohoono*

<sup>4</sup> Barnabaasbee Sawlbeam Manpas Gazano keam yittsaysaka Selewqia kataman ke yivade; ogoraar bazindara sagadhen gonngalante ardayse Qobhiroos peendar ke yivade. <sup>5</sup> Ogote Silmaana katamante yinin yeskenka Ayiwda eenasa bukin ranqar ardayse Barjosa upsinam giyte ke dahade; Wannisaar keam kelshite ki dahade.

<sup>6</sup> Qobhiroos peensa gasara yedayse macchin Bhapu kataman kenin yesken wodanka, Baryesus hambhea Ayiwda eenasa eedi mooro kalaam ke haapade. Kidiar buudamoka “Barjokala qansayse eenna inta giyeane” hameane. <sup>7</sup> Kidiar qaabeysa dahaa Sargiyooos Bhawloos hambhea peen wottseakal ki dahade. Sargiyooos Bhawloosaar Barnabaasbee Sawlbeam eelayse Barjosa upsinam qansota ki zagade. <sup>8</sup> Ko dahaannaar Girik peen aponka “Elmaas” hamayse eldhea mooroa ea Baryesus peen wottsea Barjodar woylamin kinin qajoamadettsi zagayse, Barnabaasbee Sawlbeam ki jibbade. <sup>9</sup> Bhawloos hambhea Sawl Manpas Gazanka thoothayse Baryesusam jalayse, <sup>10</sup> “Cubbobee siyamobeka thoothaa ya Seethaandettsea, tipan waadiman wulsa banqin ea, Imba Yesussa gaz hamon goynam wobsan garattanu? <sup>11</sup> Taar shedaa! Imba Yesus hadar pirda ki pirde; aapino hanno woda likkana kaya ko kaye; haynam haapattane” kina ki hamade. Ogora saanawa gudabee thipabe kidar ko hanchade; kisa aaninam yedayse entsea eedi zagada, yisa gasante yaayan ki yedade. <sup>12</sup> Ogo wodanka Imbaa wontea Yesussa yinin qanson timmirinka peen wottsea targadhayse, maaton yerinam yinin haapenka Barjodar woylamin ki qajade.

### *Bhawloosbee Barnabaasbe Bhisdia Gidir Dohon Anthokiadar Kenin Yivoono*

<sup>13</sup> Bhawloosaar yettsina yinnabesana kinka bazindara sagadhen gonngalante ardayse Bhapu katamara dhaabhayse Bhinpilia gidir dohon Bherge katamandar ke yivade; Marquoos hambhea Wannisaar kekalanka edimayse Yerusaalemdar maatayse ki yivade. <sup>14</sup> Kediar Bhergera dhaabhayse Bhisdia gidir dohon Anthokia katamandar ke yivade; ukunsen rooroakaar Ayiwda eensa bukin raqinte ardayse ke dooqade.

<sup>15</sup> Musebee ena Barjokala qansayse eenna giyayna eenabesa mathaapinam nabbabad-honsa budonte, Ayiwd eensa bukin raqinam wottsayna eena “Imbanaanato, eenaam yenin kiilea dhalq yesa daa ko hanna giyee” hamayse Bhawloosbekal eedi ke yittsade.

<sup>16</sup> Ogonante Bhawloos dhaabhayse aanka yisa dhahayse kena yin ki guyade: “Yedi Israveel eenabee waani Barjoam kurtumbhayna eenabeto, qansee! <sup>17</sup> Igina Israveel eenasa Barjoa wosa eykenaam kamayse Gibth peente chocchidettsi maatayse ke daaka keam eedi gebhi ki maasade. Yisa kantanka ogo peera entsayse keam ki bulade.

<sup>18</sup> Darantear eedi lamaa kaysa leveaddha kena ki darshade.\* <sup>19</sup> Kanaan peentear binna tobbhaanaam kaysayse kesa peenam kenin tiyoadettsi ki hayade.

<sup>20</sup> “Ogosa budonte, mato oydibee eedi lamaa kaysa apo tabhibe (450) leveaddha Barjokala qansayse eenna giyea Saameel wodanka yekka banqi uxate keam entsada kedar pirdyna eenaam kena ki imade.† <sup>21</sup> Ogora bit kena bitinsadhoodettsi ke miskade; Barjoar Biiniam muldhara nivaa Qiis naasa Saavolam eedi lamaa kaysa leveka yekka kena ki bitinsade. <sup>22</sup> Kiamaar yinin bulonsa budonte, kedar kinin bitimoadettsi Dawtam ki dhaasade. Barjoar ‘Kattsi isa woylaminin nashea, inin bhocchea wulam waadadhea Isey naasa Dawtam i haapade’ hamayse Dawtna ki tarjade.

<sup>23</sup> “Ogo Dawt muldhara Barjo ‘nittsayda nittse’ kinin hamon upsindettsi Israveel eenana Dhacchea Yesusam ki nittsade. <sup>24</sup> Yesusin nivonsa birayse Shivea Wannis Israveel eena wulna seeson waadimanam garayse Barjodar kinin maatonam eshkea shiidhime kinin shiidhoodettsi kena ki guyade. <sup>25</sup> Shivea Wannisaar waadiman yin-nonam macchanna kinin hayenka, ‘Inta yekal hayyi maataa? Inta Barjoyn qadhaa Kiristostehe; ko dahaannaar inta kisa dunngurinsa dhaxinam ko hannaar, bulana iam zaskima isa budonte kida nive’ ki hamade.

<sup>26</sup> “Imbanaanato, Abraamsa muldhara adhadhaanabee waani Barjoam kurtumbhayna eenabe, kono dhaqintansa upsino wona ko nittsadhade. <sup>27</sup> Yerusaalem gidir dohon eenbee kosa hayonabe Yesus dhacchea kinin dohonam dhesadehe; Ayiwd eensa ukunse rorona wulka nabbabadhayno ena birayse Barjokala qansayse eenna giyayna eenasa upsinaamaar kedi bhocchadehe. Dembhisa pirdi kidar ke pirdade. Ogo yin kinin hayonka thaapadhonam ke thoosade. <sup>28</sup> Dembhina kiam yeskisea seeso kalaar ke haapaammaar, kiam deesadhoodettsi Bhilathoosam ke miskade. <sup>29</sup> Kinnon goynsa thaapadhon wulam ke thoosaysaka masqlira kiam hanchayse seeni layta palsate ashkadhon duukin oolonte kiam ke duukade. <sup>30</sup> Barjoar diira kiam ki dhaasade. <sup>31</sup> Kimbesana kinkaar Galilara Yerusaalem nivaana eenakal thoothi wodana ki haapad-hade. Kedi ta eenna kisa tarjana maatayse ke dahade.

<sup>32</sup> “Wodiar ena wosa eykenana Barjoyn ‘imayda ime’ hamon wozisen upsinsa yena woda giye. <sup>33</sup> Mazmur mathaapinsa kashi lamaar, Barjo

‘Ya isa Naasane;

kina haam i adhade’

hamayse thaapadhondettsi, Yesusam diira dhaasintaka ogo qaabe yindar haydhen upsinam wo kesa naanana ki thoosade. <sup>34</sup> Barjo kinin capoamadettsi diira kiam kinin dhaasonam dhaana,

‘Gon hama Dawtna inin imon

gazan qaabe yindar haydhen yerinam yena ida ime’

ki hamade. <sup>35</sup> Pir Mazmur mathaapinte

‘Gazaa hasa Naasa kinin capoadettsi hayattane’

\* <sup>13:18</sup> “Kena ki darshade” hamenam kala kala mathaapindar “keam ki toolade” koda hame. † <sup>13:20</sup> Kala kala Girik mathaapinte paydi 20dar yin koda giye: “Ko wul kinin hayoono mato oydibee eedi lamaa kaysa apo tabhibe (450) leventene. Ogosa budonte, Barjokala qansayse eenna giyea Saameelin dohon wodanka yekka banqi uxintaka keam entsada kena pirdyna eenaam ki imade” koda hame. <sup>13:22</sup> 1 Saam 13:14. <sup>13:25</sup> Maat 3:11; Marq 1:7; Luq 3:16; Wannis 1:20bee 27be. <sup>13:33</sup> Maz 2:7. <sup>13:34</sup> Isi 55:3. <sup>13:35</sup> Maz 16:10.

ki hamade.

<sup>36</sup> “Dawtaar wodan yinnon wulka Barjosa qaabonam yinin waadadhonsa budonte, ki diyade. Ena kisa eykenakal ki duukadhaysaka ki capade. <sup>37</sup> Kaa diira Barjoyn yiam dhaasaa agaa ea capadehe.

<sup>38</sup> “Ta imbanaanato, yena giidhonam bhocchee: Seesosa garinto Yesubar haapad-henam dhese. <sup>39</sup> Kidar woylamin qajea wul Muse yigginin tipa maasana damaamorra Yesuska tipa eedi kida maate. <sup>40</sup> Ogona ena Barjokala qansayse eenna giyayna eenaka yin giidhoono yedar yeskoamadettsi mete yesaam gishee:

<sup>41</sup> ‘Yedi bagimaynato,  
shedaye targadhee; kayee!

Harrna hambidianna, eedi hayyear yena giydi ki hannaar  
yenin gonno hamimin waadiman yesa wodanka ida waadadhe’  
hamayse ko thaapadhadde” kena ki hamade.

<sup>42</sup> Bhawloosbee Barnabaasbe Ayiwd eenasa bukin ranqira kenin utenka, niven ukun-sen rooroaka dhalqin koam kenin giyoadettsi eena keam ke miskade. <sup>43</sup> Bukiraar kenin utonsa budonte, Ayiwd eenabee Ayiwd eenasa Barjodar woylamin qajintante ardayse Barjona goodimayna eenabesa shaarira thoothino eeno Bhawloosbee Barnabaasbesa paanan yivan ko yedade. Kediar kena yinin giyenka Barjosa sunin imintonka wochimbhayse kenin doadettsi keam ke kiilade.

<sup>44</sup> Guttsea ukunsen rooroaka eena likka bish kenin shidhenka, katamante dohoono eeno wul Barjosa upsinam qansana ko bukade. <sup>45</sup> Ayiwd eenaar thoothin een konin bukonam yinin haapenka wooginto kesa iir thoothonna, Bhawloosin giyayno “buudane” hamaate kiam ke iirade. <sup>46</sup> Bhawloosbee Barnabaasbe kurtumbhima “Barjosa upsinam birayse yena giya ko zaskade. ‘Zagattone’ ye hamannabee rooro wul lay dehen sadan yena konin haapadhoamadettsi ye pirdannabe, Ayiwday hamma eenakal woda yive. <sup>47</sup> Harrna hambidianna, ogodettsi Barjo yi giyna:

‘Peendar dohoono eeno wul hanka konin dhaqoadettsi  
Ayiwday hamma eenana shaaka haam i hayade’  
hamayse wona kinin giyonnane” kena ke hamade.

<sup>48</sup> Ayiwday hamma eenaar koam qansayse kattsu ke wozadhade; Barjosa upsinamaar ke gobshade. Roro wul lay dehen sadanna Barjoyn yina kamaana wul kidar woylamin ke qajade.

<sup>49</sup> Imbaa wontea Yesus goynka dhalqino ogono peen wulir ko workade. <sup>50</sup> Ko dhaaannaar Ayiwd eena Bhawloosbee Barnabaasbedar Barjona goodimayna gobshad-haana mansen naanabee katamante gembha eenabeam ke dhaasade. Oytaydaa kediar bavayse kesa peera keam ke bulsade. <sup>51</sup> Kediar kena tarja konin doadettsi roondar yisa dohon silalinam iir dinsayse Iqoniyoon katamandar ke yivade. <sup>52</sup> Barjodar woylamin qajayna eena wozabee Manpas Gazanbeka thoothayse ke dahade.

## 14

### *Bhawloosbee Barnabaasbe Iqoniyoon Gidir Kenin Dohoono*

<sup>1</sup> Iqoniyoon katamante Anthokiar maatondettsi ko maatade; Bhawloosbee Barnabaasbe Ayiwd eensa bukin raqinte ardayse Barjosa upsinam kena ke giyade. Ogo goynka Ayiwd eenabee Ayiwday hamma eenabesa shaarira thoothina eena Barjodar woylamin ke qajade. <sup>2</sup> Barjodar woylamin qajaamma Ayiwd eena ke hanna, Ayiwday hamma eenam dhaasayse Barjodar woylamin qajayna eenam kenin jibboadettsi ke hayade. <sup>3</sup> Ogonante Bhawloosbee Barnabaasbe Imbaa wontea Yesus goynsa kur-tumbhima giyada kataman ogote thoothi rooro ke dooqade; Imbaa wontea Yesusaar

milkitbee yer tarsheabeam kenin hayoadettsi hayamo kena imintaka kisa sunin im-intonsa giidhayno upsino gon konin maatenam ki tarjade. <sup>4</sup> Katamante dohon eenoar lamaadar kashimayse, antina Ayiwde eenakal antina kesa Kiristoos yisa tarjamonnante kinin yittsaana Bhawloosbee Barnabaasbekal ke maatade.

<sup>5</sup> Ayiwdtay hamma eenabee Ayiwde eenababe ke hanna, yiam wottsayna kinka Bhawloosbee Barnabaasbeam galshanabee seenika keam paxate deesanabe ke zagade.

<sup>6</sup> Bhawloosbee Barnabaasbe ogoam dhesayse, Loqonia peente dahaana Listhirabee Derbebe katamanadar, pir kesaar gasante dahaana peenadar gobate ke yivade.

<sup>7</sup> Ogoteear Barjosa dhacchintan upsinam giyte ke dahade.

### *Bhawloosbee Barnabaasbe Listhirabee Derbebe Gidir Kenin Dohoono*

<sup>8</sup> Yinin adhadhorra yedayse rooysa woboa, yaaya dhesima eedi kalaa Listhira gidir ki dahade. <sup>9</sup> Ea agaa dooqayse Bhawloosin giyenam qansite ki dahade. Bhawloos kiam kinin shedenka, paashana Barjodar woylamin kinin qajonam haapayse <sup>10</sup> upsi gebhika, “Dhaabhayse roon hannonka woyaa!” kina ki hamade. Kidi saana dhaabhabh hayayse yaayan ki yedade.

<sup>11</sup> Eenaar Bhawloosin hayonam yinin haapenka, upsinam yisa kattsi dheg hayayse Loqonia peen aponka “Igina barjona eedidettsi maatayse wokal ke hanchade” ke hamade. <sup>12</sup> Barnabaasamaar “Dia”\* ke hamade; Bhawloosamaar dhalqin kattsi kinin giyonna, “Hermeen”† kiam ke hamade.

<sup>13</sup> Katamansa gasante dohon Dia hambhea barjoasa gazan ooninte waadadhea gudula waakibee aamanka ashkadhaana gobshin yerrabeam katamansa kerindar bavayse, zarsino kinka maatayse Bhawloosbee Barnabaasbena marsha machana ki zagade.

<sup>14</sup> Kiristoos yisa tarjamonnante kinin yittsaana Barnabaasbee Bhawloosbe koam yinin qansenka, dhagaka apalam yisa hattsayse eenkal gobate yivayse upsi gebhika yin ke giyade: <sup>15</sup> “Yedi eenato, koam harrnee hayaa? Wodiar pir yedettsi eedine. Ogo pootimon yerinam garayse cecinbee, peenbee, bazinbee, kesa iir dohon yerin wulbeam pijaa sadanka dahaa Barjodar yenin maatoadettsi Barjosa dhacchintan upsinam yena woda giye. <sup>16</sup> Barjo kosa birayse Ayiwdtay hamma eena wulam yisa bhocchinka kinin yivoadettsi keam ki garade. <sup>17</sup> Ko dahaannaar payya yena hayada, ceciraar doobi qansada, isinnoar wodanka konin ushoadettsi hayada, yesa woylaminamaar galabee wozabeka yinin micchenka, igina kinin waadadhaana wul kisa tarjane” kena ke hamade. <sup>18</sup> Ogoam kena giyayse eeno marshanam kena konin machoamadettsi kinin maroono gebhi gaalekane.

<sup>19</sup> Ko dahaannaar Ayiwde eena Anthokiabee Iqoniyoonbera Listhira katamandar ke nivade; kataman ogosa eenaam yidar maasayse Bhawloosam seeninka paxayse, “Diydine” hamayse katamara os mayanka gochate ke dhabade. <sup>20</sup> Barjodar woylamin qajayna eena nivayse kisa gasante ke woyaysaka, kidi dhaabhayse katamante ki ardade. Kina hamon sedhiman Barnabaasbesana Derbe katamandar ki yivade.

### *Bhawloosbee Barnabaasbe Sooria Peente Dohon Anthokia Katamandar Kenin Maittoono*

<sup>21-22</sup> Ogo Derbe katamantear Barjosa dhacchintan upsinam giyayse thoothi Barjodar woylamin qajayna eenaam yinin haaponsa budonte, Bhawloosbee Barnabaasbe anngala kinin yivon Listhirabee, Iqoniyoonbee, Anthokiabe katamana gidir dahaana Barjodar woylamin qajayna eenaam wocchinsada, Barjodar woylamin yinin qajenkaar wocchimbhayse kinin doadettsi keam kiilada, “Barjosa bitamon raqinte thoothi gaaleka arda woam ko zaske” hamaate maatayse ke yivade. <sup>23</sup> Misken oonin wulir

\* <sup>14:12</sup> “Dia” Girik eena kattsi kinin goodimea kesa barjoane. † <sup>14:12</sup> “Hermeen” Girik eenayn goodimayna barjona wulsa yittsadhaanasa gaanane.

itsima Barjoam miskintaka, donza kena kamayse yinin wodonsa budonte, kenindar woylamin qajaa Imbaa wontea Yesusna elqimayse keam ke imade.

<sup>24</sup> Ogora Bhawloosbee Barnabaasbe Bhisdia peen goynka Bhinpilia peendar ke yivade. <sup>25</sup> Bherge katamante Barjosa upsinam yinin giyonsa budonte, Athaalia katamandar mia ke hanchade. <sup>26</sup> Ogora kenin macchon waadimansa Barjosa sunin imintonna elqimbahdahysaka iira kenin utton Sooria peen Anthokia katamandar bazindara sagadhen gonngalanka maataate ke yivade.

<sup>27</sup> Anthokia katamante yinin yeskon wodanka, Barjodar woylamin qajayna eenam buskayse Barjo kembesana kinka kinin waadadhon wulbee Ayiwdtay hamma eenana Barjodar woylamin qajintasa goyti kena kinin bulonbeam kena ke giyade.

<sup>28</sup> Bhawloosbee Barnabaasbe ogote Barjodar woylamin qajayna eenabesana kinka woda thoothina ke dooqade.

## 15

### *Yerusaalemir Bukadhoono*

<sup>1</sup> Waani waani eeni Yiwda peera Anthokia katamandar nivayse, “Musena imbhon gilonka yesa qaamanam ye taxadhaamma, dhaqana damattene” hamayse Barjodar woylamin qajayna eenam dhettsite ke dahade. <sup>2</sup> Bhawloosbee Barnabaasbe kesa timmirinam kenin tiyaamonna, kattsi kekal ke palimade. Ogo wodanka Bhawloosbee, Barnabaasbee, misken ooninte bukayna eenasa waani waani eenabe Yerusaalem gidir yivayse Kiristoos yisa tarjamonnante kinin yittsaanabee misken ooninsa donzanabekal bukayse palimen ogosa kenin dhalqoadettsi kena ko giidhade.

<sup>3</sup> Anthokiar dohon misken oonira kenin yittsadhenka Pingebbe Sammariabera sagada Ayiwdtay hamma eena hamin Barjodar kenin maatonam giyaate giyaate ke yivade; dhalqino ogono Barjodar woylamin qajayna wulam kattsi wozisidine.

<sup>4</sup> Yerusaalemir kenin yesken wodanka Barjodar woylamin qajaynabee, Kiristoos yisa tarjamonnante kinin yittsaanabee, misken ooninsa donzanabe keam ke tiyade; Barjoar kembesana kinka kinin waadadhon wulam Bhawloosbee Barnabaasbe kena ke giyade.

<sup>5</sup> Parisa eensa shaarira Barjodar woylamin qajaana waani waani eena dhaabhayse, “Barjodar woylamin qajayna Ayiwdtay hamma eenana qaamanam ye taxebee Musesa yigginam kenin tooloadettsi kena ye giyabe yeam ko zaske” kena ke hamade.

<sup>6</sup> Kiristoos yisa tarjamonnante kinin yittsaanabee misken ooninsa donzanabe dhalqin ogo goynka kinka dhalqana ke bukade. <sup>7</sup> Thoothi kenin palimona budonte, Bhethiroos dhaabhayse kena yin ki giyade: “Imbanaanato, Ayiwdtay hamma eena inin giyen Barjosa dhacchintan upsinam qansayse Barjodar woylamin kenin qajoadettsi Barjo ena birayse yennon iira iam kinin kamonom yedi dheseeda dhese. <sup>8</sup> Eensa woylaminam dhesea Barjo wona Manpas Gazanam yinin imondettsi kenaar imayse kesa ki tarjade. <sup>9</sup> Barjodar woylamin kenin qajenka Barjo kesa woylaminamaar kinin gazinsenna, kembee wombesa shaarinte yer kalaaka edime kidi hayadehe. <sup>10</sup> Ta eykena wonnabee wombe baskana wonin damimon baskenam Barjodar woylamin qajayna eenam baskisintaka ta Barjoam harrnee taysate shede? Kiam taysate shedeebhode! <sup>11</sup> Imbaa wontea Yesus Kiristoossa sunin imintonka wonin dhaqondettsi, kediар dhaqdine hamayse woda tipise” kena ki hamade.

<sup>12</sup> Eeno wulaar lay hamayse Barnabaasbee Bhawloosbe Barjo kennon goynka Ayiwdtay hamma eenasa shaarinte kinin waadathaana milkitinabee tarshayna yerra wulbeam ke giyaka ko qansade. <sup>13</sup> Kediар giyate kenin macchonsa budonte, Yayqoob yin ki giyade: “Imbanaanato, ikal qansee. <sup>14</sup> Barjo yisa naabenna maatayna Ayiwdtay hamma eensa shaarira tiyana ena birayse kena hamin kinin bhocchonam Simoon giydine. <sup>15</sup> Dhalqino ogono Barjokala qansayse eenna giyaynasa dhalqinbesana kalaane. Ogonoar:

**16-17** ‘ “Ogosa budonte shidhaana eenabee innon naabenka eldhaana Ayiwdtay hamma eena wulbe Barjoam kenin zagoadettsi maatate nivayse dhambon Dawtsa apalan ooninam ida woyse; kosa yiiponamaar maasayse pir koam ida ashke” hamayse **18** ena birara yedayse ko wulam dhettsaa Barjo ki guyade’ hamayse ko thaapadhade. **19** Ogonante isa qaabono Ayiwdtay hamma eensa shaarira Barjodar maatayna eenaam wonin galshoamadettsine. **20** Ko dahaannaar aaninka ashkadhaana barjonana marshan machadhon waankalankabee, sharmuci-makkonkalankabee, taxadhima diyaana qollasa waankalankabee, zombhinkalankabe kenin pegadhoodettsi hamayse kena wo thaape. **21** Harrna hambhidiana, enara yedayse ukunsen roorona wulka Ayiwd eensa bukin raqinte Musesa yigginam nabbabadhaatebee katamana wulir giidhaatebe ko daadhade” kena ki hamade.

### *Yerusaalem Gidir Bukaana Eenayn Thaapoono Warqanno*

**22** Ogo wodanka Kiristoos yisa tarjamonnante kinin yittsaanabee, misken ooninsa donzanabee, misken ooninte dohon een wulbe kinka hamayse, kesa iira eedi kamayse Bhawloosbee Barnabaasbesana Anthokiadar yittsana kinka ke dhalqade. Ogonante Barjodar woylamin qajyna eenaam entsintanka dhesadhaana Bersaabas hambhea Yiwdabee Sillaasbeam ke kamade. **23** Yinin thaapon warqatinam kesa aaninka ke yittsade; warqannoar yin koda giye:

“Wodi Kiristoos yisa tarjamonnante woam kinin yittsaanabee misken ooninsa donzanabe wonin thaapoono Anthokiabee, Sooriabee, Kilqiabesa gidir dahaana Ayiwdtay hamma eenasa shaarinte dahaana imbananato, ‘Nagaya’ yena woda hame.

**24** “Wosa iira waani waani eena wo kena giyma yekal nivayse dhalq yena giyntaka yeam kenin galshonbee yeam warkata kenin entsonbeam wodi qansidine. **25** Ogonante kinka bukayse wonin dhalqonsa budonte woylam kalaatayse, wonin nashayna wosa imbananana Barnabaasbee Bhawloosbedar eedi kamayse yekal keam yittsana wo zagade. **26** Kedi wosa Imbaa Yesus Kiristoossa naabenna yisa sadanam dembhingga ke imade. **27** Ogonante Yiwdabee Sillaasbe wonin yena thaaponam pir yena kinin giyoadettsi yekal keam wo yittsade.

**28-29** “Aaninka ashkadhaana barjonana marshan machadhon waankalankabee, zombhinkalankabee, taxadhima diyaana qollasa waankalankabee, pir sharmuci-makkonkalankabe yenin pegimbhoodettsi, igina yeam zaskaynara ab baske yedar wonin wodoamadettsi wombee Manpas Gazanbena payya maatayse ko haapadhade. Igina wulra yeam ye toolanna, payya yeda haye. Payyamo yena ko dee” hamayse ke thaapade.

**30** Igina yittsadhaana eenaar kekalanka edimayse Anthokia katamandar ke yivade; misken ooninte dahaana eenaam buskayse warqatinam kena ke imade. **31** Barjodar woylamin qajynaar ogo warqatinam nabbabayse kesa kiilimenka kattsi ke wozadhade. **32** Yiwdabee Sillaasbe Barjokala qansayse eenna giyayna yinin dohonna, thoothi kilayse keam ke wocchinsade.

**33-34** Yiwdabee Sillaasbe likka roorona Anthokia gidir kinin dooqonsa budonte, Barjodar woylamin qajyna imbaanaana keam payyamoka kinin yittsaka, kediir birayse yiam yittsaana eenakal ke maatade. [Sillaas ogote shidhana ki zagade.] **35** Bhawloosbee, Barnabaasbee, waani een thoothinbesana kinka Imbaa wontea Yesussa dhacchintan upsinam dhettsadabee giyadabe Anthokiar ke dooqade.

### *Bhawloosbee Barnabaasbe Kenin Edimoono*

<sup>36</sup> Likka roorosa budonte, Bhawloos Barnabaasam “Wodi maatayse Imbaa wontea Yesussa upsinam wonin giyaana katamana wulir wosa imbananaam yivayse wo shede; hamin kenin dohonam wo dhese” kina ki hamade. <sup>37</sup> Barnabaas Marqoos hambhea Wannis kembesana kinka ki yive ki zagade. <sup>38</sup> Bhawloosaar Marqoos kembesana kinka ki yive nashadehe. Harrna hambhidianna, Bhinpilia gidir kidi kekalanka edimayse kinin shidhonnabee waadadhana kembesana kinka kinin yivaamonnabene. <sup>39</sup> Ogo goynka Barnabaasbee Bhawloosbesa shaarinte kattsi palime konin dhaabhonna, kikalanka ke edimade. Ogonante Barnabaas Marqoosam yinka entsayse bazindara sagadhen gonngalante ardayse Qobhiroos ki yivade. <sup>40</sup> Bhawloosaar Sillaasam ki kamade; Barjodar woylamin qajayna eena Bhawloosam Barjosa sunin imintonna kinin elqimonsa budonte, ki yivade. <sup>41</sup> Kidiar Sillaasbesana Barjosa misken ooninte dahaana eenaam wocchinsada Sooriabee Kilqiabe gidir ki yaayade.

## 16

### *Thimaatoos Bhawloosbee Sillaasbesana Kinin Yaayoono*

<sup>1</sup> Bhawloos Derbebee Listhirabe gidir ki yeskade. Listhira gidir Thimaatoos hambhea Barjodar woylamin qajea ea ki dahade. Kisa indanoar Ayiwd eensa shaarira Barjodar woylamin qajaynone; kisa imbaa Girik eedine. <sup>2</sup> Thimaatoosna Listhirabee Iqoniyoonbe gidir dahaana Barjodar woylamin qajayna eena ke tarjade. <sup>3</sup> Bhawloos Thimaatoos kimbesana ki yive ki zagade. Peen ogote dahaana Ayiwd eenana hamayse kisa qaamanam ki taskade; ogonoar kisa imbaa Girik eedi kinin maatonam Ayiwd eena wul kenin dhesennane.

<sup>4</sup> Katamana wulir kinin yaayenka, Yerusaalemir dahaana Kiristoos yisa tarjamonnante kinin yittsaanabee misken ooninsa donzanabe kinin guyon dhalqinam kinin tooloadettsi Barjodar woylamin qajayna eenana ke guyade. <sup>5</sup> Ogonante misken ooninte dahaana eena Barjodar woylam qajintaka keda wocchimbhe; rooroa rooroaka waani eeno Barjodar woylam konin qajenna, kesa paydino thoothada ko yivade.

### *Bhawloos Moqodoonia Peendar Kinin Yivoadettsi Kinin Eldhoono*

<sup>6</sup> Bhawloosbeyn Isiya peente Barjosa upsinam giyoamadettsi Manpas Gazano keam konin maronna, Pirgiabee Galatia peenbesa shaarinka ke yivade. <sup>7</sup> Misia peen yeskayse Bitaania peendar yivana ke zagade; ko dahaannaar Yesussa Manpasino ogodar kinin yivoamadettsi keam ko marade. <sup>8</sup> Ogonante Misiabar Thirovadda katamandar ke hanchade. <sup>9</sup> Ogo sootin Bhawloos Barjoyn kina dhohon shedintonka yer ki haapade. Ogo shedintonka Moqodoonia peen eedi kalaa Bhawlooskal woyayse, “Woka! Moqodoonia nivayse woam kelshaa!” hamayse kiam ki miskade. <sup>10</sup> Bhawloos Barjokala shedintonam kinin shedonsa budonte, saana Moqodoonia peendar yivota wo zagade. Harrna hambhidianna, Barjosa dhacchintan upsinam kena wonin giyoadettsi Barjoyn woam eelonam wonin dhesonnane.

### *Liidia Barjodar Woylamin Konin Qajoono*

<sup>11</sup> Thirovadda katamara bazindara sagadhen gonngalante ardayse gaz hamayse Samotiraaqe peen wo yeskade; ogora guttsea rooroaka Naabhule kataman wo yivade. <sup>12</sup> Ogora dhaabhayse Pilbhisoo kataman wo yeskade. Pilbhisoo katamano Moqodoonia gidir dohoono Roome eenarin woysoono katama gaarine. Kataman ogote rooro likka wo dooqade.

<sup>13</sup> Ayiwd eensa ukunse rooroaka katamansa kerinka utayse “Barjoam miskadhayno raq ogote ko dahade” hamayse wonin bhocchonna baynsa aponte wo yivade. Ogote dooqayse bukaana maanana Barjosa upsinam wo guyade. <sup>14</sup> Qansaana eenasa shaarinte Tiathiron katamara nivoono apala zoo shanshayno Liidia hambhayno maa kallo ko dahade; kodiar Barjona goodimaynone. Bhawloosin giyenam gonne hamayse konin

tiyoadettsi Imbaa Yesus kosa woylaminam ki bulade. <sup>15</sup> Kombee oonin eena konnabe shiidhimbhen kenin shiidhimbhonsa budonte, “Imbaa wontea Yesusdar woylamin inin qajenam gonne ye hamidianna, oonin innonte nivayse dooqee” konin hamenka, ee wonin hamoadettsi kattsi woam ko miskade.

### *Pilbhisoos Katamante Bhawloosbee Sillaasbeyn Dhaxadhoono*

<sup>16</sup> Roro kalaa Barjoam miskadhen raqinte wonin yivenka, os birante maaten yernam koam giisayno beero yindar dohoono maa worsho kallo goynte wodar ko keerade. Kodiar os birante maaten yerinam giyntaka yiam wottsaynana thoothi birre koda pucche. <sup>17</sup> Kodi Bhawloosbee wombesa paanan yivada, “Igina eena Wuldara Sagea Barjoana waadimayna eenane. Kedi dhaqintansa goynam yena keda giye” hamayse upsi gebhika giyte ko dahade. <sup>18</sup> Kodiар thoothi roorona yin konin guyonna, Bhawloos dhagaka budoka wal hamayse beeroana “Yesus Kiristoossa naabenka kodara hanin utoadettsi hana ida giye” ki hamade. Ogora saanawa beeroa kodara ki utade.

<sup>19</sup> Koam wottsaynaar “Konka wonin haapayno birreno wosa shidhidine” hamayse, Bhawloosbee Sillaasbeam yedayse gochate hayonayn dohon gaban raqinte keam ke bavade. <sup>20</sup> Kataman wottsaynasa birante keam bavaysear, “Kina eena Ayiwd eedi dahayse wosa katamante eenaam kidar keda dhaase. <sup>21</sup> Wodi Roome eedi dahayse gonne hamayse tiyabee waadadhabe woam zaskimin dambinam wona keda giye” ke hamade. <sup>22</sup> Eeno wulaar kinka maatayse Bhawloosbee Sillaasbedar ko dhaabhade. Kataman wottsaynaar Bhawloosbee Sillaasbedara apalan bulayse haljoka kenin qandhoadettsi ke guyade. <sup>23</sup> Thoothi keam yinin qanonsa budonte, dhixin ooninte keam ke dhaskade; dhixin ooninam toolea ear wocchimbhayse keam kinin tooloadettsi kina ke guyade. <sup>24</sup> Kidiar dhalqin ogoam qansayse dhixin ooninsa gulinte keam arsayse kesa roonam haaqana gulantana lamaanasa shaarinte ki dhaxade.

<sup>25</sup> Sootin kiaddha laman Bhawloosbee Sillaasbe Barjoam miskada mazmurka kiam keda gobshe; waani dhaxadhaana eenaar kenin giyenam qansite ke dahade. <sup>26</sup> Dhesadhima dhixin ooninin shohenka yekka, gebhi peeno ko zigimade. Saanawa dhixin ooninsa kerra wul ke bulimade; dhixin ooninte dahaana eena wulsa sansalano ko bulimade.

<sup>27</sup> Dhixin ooninam toolear yinin raatorra dhaabhayse dhixin ooninsa kerin bulimonam yinin haapenka, dhaxadhaana eena utate yivaa kina konin maatonna, yiam deesota qaabayse halpa ki gochade. <sup>28</sup> Bhawloosaar upsi gebhika “Wodi wul kote daane; ya hadar yer siya yeskisaabhode!” hamayse kina ki guyade.

<sup>29</sup> Dhixin ooninam toolear “Shaaka ina bevee!” hamayse dhixin ooninsa gulinte gobate yivayse kurtumbheka gibazada Bhawloosbee Sillaasbesa birante ki dhambade. <sup>30</sup> Mayante keam bulayse, “Imbanato, inin dhaqoadettsi har haya iam ko zaske?” kena ki hamade. <sup>31</sup> Kediar “Imbaa wontea Yesusdar woylamin qajaa; hambee hasa oonin eenabe dhaqeeda dhaqe” kina ke hamade. <sup>32</sup> Kimbee kisa ooninte dahaana wulbena Imbaa wontea Yesussa upsinam ke guyade. <sup>33</sup> Sootin savaatin ogoka Bhawloosbee Sillaasbeam dhixin oonira entsate yivayse kesa hajiminam ki shivade; saanawa yimbee oonin eena yinna wulbe shiidhimbhe ke shiidhimbhade. <sup>34</sup> Yisa oonindar entsate yivayse gala kena ki imade. Yimbee oonin eena yinnabe Barjodar woylamin kenin qajonna kattsi ke wozadhade.

<sup>35</sup> Peen sedhaysakaar kataman wottsayna eena “Igina eenaam bulaa” hamayse dhixin ooninam tooleakal poolisanaam ke yittsade. <sup>36</sup> Dhixin ooninam toolea “Yenin buldhoadettsi kataman wottsayna eena upsi ke nittsade; ta keeda utayse nagaya yivee” hamayse upsin ogoam Bhawloosna ki guyade. <sup>37</sup> Bhawloosaar poolisanana “Wodi Roome eedi dahayse wodar pirdadhima eensa birante qanayse dhixin ooninte woam ke dhaskade. Ta woam aachika bulate ke yittso? Yin dehehe! Yinti nivayse woam bulate ke yittse” ki hamade.

<sup>38</sup> Poolisanaar dhalqin ogoam kataman wottsayna eenana ke giyade. Kataman wottsayna eenaar Bhawloosbee Sillaasbe Roome eedi kenin dohonam yinin qansenka ke kurtumbhade. <sup>39</sup> Ogonante yinti nivayse, “Wodi dhabidine; wona garee” hamayse dhaxin oonira keam ke bulade. Ogo katamara kenin yivoadettsi keam ke miskade.

<sup>40</sup> Bhawloosbee Sillaasbe dhaxin oonira utayse Liidia ooninte ke ardade; ogote Barjodar woylamin qajaana eenaam yinin wocchinsonsa budonte, kataman ogora ke utade.

## 17

### *Bhawloosbeyn Teselonqedar Yivoono*

<sup>1</sup> Bhawloosbee kimbesana waadadhayna eenabe Ampibholisbee Abhilooniabeka sagayse Teselonqe kataman ke yeskade. Ogotear Ayiwd eenasa buki raq ko dahade.

<sup>2</sup> Bhawloosaar yisa dambindettsi kekal ardayse, gaba makkam ukunse rooro makkam Mathaap Gazara kembesana dhalqada keam ki dhettsade. <sup>3</sup> Mathaapira kena yinin giyenka, Kiristoos gaale haapayse dembhira dhaabha kiam zaskenam kena dhettsada, “Agaa inin yena giyea Yesus Barjoyn qadhaa Kiristoosne” ki hamade. <sup>4</sup> Kesa shaarira waani waani eena Bhawloossa dhalqinam yinin qanson wodanka gonne hamayse Bhawloosbee Sillaasbedar ke maatade. Ogodettsi Barjona goodimayna thoothi Girik eenabee katamante dhesadhaana maana waanibe kedar ke maatade.

<sup>5</sup> Ayiwd eena kedar woogintaka waadiman garayse sun yaayayna siyana eenaam bavayse kedar ke dhaasade. Katamante goore dhaasayse Bhawloosbee Sillaasbeam eenna imana Iyaasoonda ooninam ke karade. <sup>6</sup> Ko dahaannaar kenin haapad-haamonna, Iyaasonbee waani Barjodar woylamin qajayna eenabeam katamanam wottsaynakal yedate keam yivayse, yin giyayse ke ilatade: “Kina peen wulir gooren dhaasaana eena ta pir kote ke nivade; <sup>7</sup> Iyaason keam tiydine. Kedi wul ‘Yesus hambhea waana bit daane’ hante Roome peen bitaasa upsinam keda jibbe” ke hamade.

<sup>8</sup> Eenabee katamanam wottsaynabe dhalqin ogoam yinin qansenka ke targadhade.

<sup>9</sup> Iyaasonbee Barjodar woylamin qajayna waani eenabeam waasi elsayse keam ke garade.

### *Bhawloosbeyn Beeriadar Yivoono*

<sup>10</sup> Barjodar woylamin qajayna eena saana Bhawloosbee Sillaasbeam sootika Beeria katamandar ke yittsade. Yinin yeskenkaar Ayiwd eensa bukin raqinte ke ardade.

<sup>11</sup> Beeria eeno Teselonqe gidir dohon eendara sagi woylaminka payya qaabayno konin dohonna, kattsi wozaka Bhawloosbeyn giyen upsinam kedi qansidine. Upsino ogono gon konin dohonam dhesana Mathaap Gazanam rooro wulka marmarate keda shede.

<sup>12</sup> Ogonante kesa iira thoothino eeno Barjodar woylamin ko qajade; yin pir Girik eensa shaarira thoothi dhesadhaana maa waanibee anngi waanibe Barjodar woylamin ke qajade.

<sup>13</sup> Teselonqe katamante dahaana Ayiwd eena ke hanna, Bhawloos Beeria katamante pir Barjosa upsinam kinin giyonam yinin dhesenka, kataman ogote pir nivayse eenaam pucchayse goore ke dhaasisade. <sup>14</sup> Ogo wodanka Barjodar woylamin qajayna eena saana Bhawloosam bazinsa gasante kinin yivoadettsi kiam ke yittsade. Sillaasbee Thimaatoosbe Beeria katamante ke shidhade.

<sup>15</sup> Bhawloosam suudana yivaana eena Atena katamante kiam ke yeskisade. “Sillaasbee Thimaatoosbe saana ikal ke yeske” hamen Bhawloossa ergenam yinka tiyate ke maatade.

### *Bhawloos Atena Katamante Kinin Dohoono*

<sup>16</sup> Bhawloos Atena katamante Sillaasbee Thimaatoosbeam kaalaate kinin dehenka, katamante aaninka ashkadhaana barjonayn thoothonam yinin haapenka qaabenka ki

atade. <sup>17</sup> Ogonante Ayiwd eensa bukin raqinte Ayiwd eenabee Barjona goodimayna Ayiwdtay hamma eenabekal ki dhalqade; taar gaban raqinte yinin haapayna eenabesana rooro wul ki palimade. <sup>18</sup> Epqorossabee Istoyk hambheabe timmirin dhesana eena kidar ke palimade. Waani waani eenaar “Kaa sun waraqea ta har giyota ki zage?” ke hamade; waani eenaar “Barjona hallasa giyea kida maate” ke hamade. Ogono kenin giyoono Yesusbbee kisa diira dhaabhidinbesa Bhawloosin guyonnane.

<sup>19</sup> Ogonante Bhawloosam Aryospagos hambhen bukin raqinte kiam entsate nivayse kina yin ke giyade: “Kono hanin giyayno timmirino hallo har konin dohonam wona giyaa. <sup>20</sup> Hanin giyayno yerro haali yer ko maatade; ta hanin giyen yerinam har konin dohonam dhesana woda zage” kina ke hamade.

<sup>21</sup> Ogono yin kenin giyoono Atena een wulbee gidir dahaana shonnabe haali yer giyadabee qansadabe wodanam saskota bish kenin nashennane.

<sup>22</sup> Bhawloosaar Aryospagos gidir bukaanasa shaarinte woyayse kena yin ki giyade: “Atena eenato, yer wulka waana waana hamma barjonana yedin kurtumbhenam inta dhesidine. <sup>23</sup> Ogonoar yesa katamante yaayada yedin goodimayna yerram inin shedenka, ‘Dhesimaama Barjoana’ hamayse daran thaapadhon marshan machadhea raqaam i haapade. Ta keeda kiam dhesima yedin goodimea Barjoa agaasa inta yena ida giye. <sup>24</sup> Barjo peenbee peendar dohon yer wulbeam pijaa kidine; cecinbee peenbesa Imbaa kinin dohonna, eedin woysen gazan ooninte dehehe. <sup>25</sup> Kidi sadanka daadhenbee, upsinbee, yer wulbeam een wulna kinin imenna yer har kikalanka joogimonna, eedi kiam kelshoadettsi zaskehe. <sup>26</sup> Kidi peendar dohon zarsin wulam eedi kalaara pijayse peen wuldar kinin doadettsi ki hayade. Pir kenin dehen kesa raqinsa maalenbee wodanbeam kashate ki imade. <sup>27</sup> Ogono kinin yin hayoonoar eeno Barjoam konin zagoadettsibee marmarayse kiam konin haapoadettsibene. Ko dahaannaar wo kalaa kalaanakal kidi pegetehe. <sup>28</sup> Harrna hambhidianna, sadanka daadhenam wonin haapenbee, wonin yaayenbee, wonin dohonbe kankane; ogonoar yesa gaadin bulaynasa waani waani eena ‘Wodiar kisa naanane’ hamayse kinin dhaasondettsine. <sup>29</sup> Ta wodi Barjo naana wonin dohonna, Barjoam ‘Eedi yisa pakalmakkobee qaabobeka worqibee, birrebee, seenibera kinin ashkaadettsine’ hamayse bhoccha woam zaskehe. <sup>30</sup> Kosa birayse eeno dhesima konin hayonam Barjo darshayse kena garidine; ta keeda peen wulir dohoono eeno wul siyon waadimanam garayse Barjodar konin maatoadettsi kida giye. <sup>31</sup> Kidi yinin kamaa ea goynka een wuldar tipamoka yinin pirden rooron wodidine; ogono kiam diira dhaasintaka ki tipisade” kena ki hamade.

<sup>32</sup> Diira dhaabhadhen goynsa yinin qanson wodanka, antina eena ogoam hancaate ke bagade; antina eena “Dhalqin ogo goynka tapir hanin giyenam woda qanse” kina ke hamade.

<sup>33</sup> Ogora Bhawloos kesa shaarira utayse ki yivade. <sup>34</sup> Waani waani eena kimbesana kinka wormayse Barjodar woylamin ke qajade. Kesa iira pir Aryospagos eenasa kalaa Diyonisioosbee, Demaaris hambhen maa kallonbee, waani eenabe ke dahade.

## 18

### Bhawloos Qorontoos Katamandar Kinin Yivoono

<sup>1</sup> Ogosa budonte, Bhawloos Atena katamara utayse Qorontoos katamandar ki yivade. <sup>2</sup> Ogoteear Bhanhoos peente adhadhaa Aqila hambhea Ayiwd eam ki haapade. Kidiar likka wodasa birayse geshon yinnon Bhirsqillabesana kinka Thaalian peera ki nivade; harrna hambhidianna, Ayiwd eena wul Roome katamara kinin utoadettsi Bitaa Qelawdoosin guyonnane. Bhawloosaar kekal ki yivade. <sup>3</sup> Kisa waadimanoar kennondettsi konin dohonna, kekal dooqayse ki waadadhade; ke wulsa waadimanoar apala ooni ashkintane. <sup>4</sup> Bhawloosaar ukunsen roorona wulka Ayiwd eensa bukin raqinte ardayse

Ayiwd eenabee Girik eenabesana kinka dhalqaate Barjosa dhacchintan upsinam gonne hamayse kenin tiyoadettsi giyte ki dahade.

<sup>5</sup> Sillaasbee Thimaatoosbe Moqodoonia peera kenin nivenka, Bhawloos Yesus Barjoyn qadhaa Kiristoos kinin dohonam Ayiwd eenana tarjada Barjosa upsinam rooro wul guyada wocchimbhite ki dahade. <sup>6</sup> Ko daahaannaar kiam ke jibbaysakabee ke iiraysakabe Bhawloos kedar tarjamo konin doadettsi yisa apalansa silalinam dinsayse, “Barjo yedar kinin pirdayno yesa seesonkane; ogona inta oysadhattine. Keeda kaara inta Ayiwdtay hamma eenakal ida yive” kena ki hamade. <sup>7</sup> Ayiwd eensa bukin raqira utayse Titoos Iyosthos hambhea eakal ooninte ki ardade. Ea agaar Barjona goodimeane; kisa onnoar Ayiwd eensa bukin raqinsa gasante ko dahade.

<sup>8</sup> Ayiwd eensa bukin raqinam wottsea Qerisbhoosbee oonin eena kinna wulbe Imbaa wontea Yesusdar woylamin ke qajade; Qorontoos eensaar thoothina eena Bhawloosin giyenam qansayse Imbaa wontea Yesusdar woylam qajayse ke shiidhade.

<sup>9</sup> Sootin Imbaa wontea Yesusin kina dhohon shedintonka Bhawloosna yin ki giyade: “Kurtumbhima giyaa! Lay hamaabhode! <sup>10</sup> Harrna hambidianna, inta hambesanane; kataman kote isa thoothi eedi konin dohonna, hadar gaale yeskisana dhaabhea eedi qolehe” kina ki hamade. <sup>11</sup> Ogonante Bhawloos Barjosa upsinam dhetsada leve kalaabee arpi laxbe kekal ki dooqade.

<sup>12</sup> Galiyoos Akaya peenam kinin wottsen wodanka, Ayiwd eena kinka kalaa maatayse Bhawloosdar ke dhaabhade. Pirdin raqintear kiam entsate ke nivade. <sup>13</sup> “Ea kaa yiggin qolmon goynka Barjona kinin goodimoadettsi eenaam yidar kida maase” ke hamade.

<sup>14</sup> Bhawloos malsi maasana kinin hayenka, Galiyoos Ayiwd eenna “Yedi Ayiwd eenato, gemmayse way gebhi siya yer ki hayanna, yenin giyenam darshayse qansa iam ko zaske. <sup>15</sup> Ko daahaannaar dhalqinbee, naabenbee, yesa yigginbe goynka yedi palimayna ye hanna, yemal koam macchee. Inta dhalqin kodettsinam pirdana zagattine” kena ki hamade. <sup>16</sup> Yin giyayse pirdin raqira kantaka keam ki bulsade. <sup>17</sup> Ogo wodanka kedi wul Ayiwd eensa bukin raqinam wottsea Sostensam yedayse pirdin raqinsa birante kiam ke qanade. Ogo wul haydhenka Galiyoos lay ki hamade.

### *Bhawloos Anthokia Katamandar Kinin Maatoono*

<sup>18</sup> Bhawloos thoothi rooro Qorontoos katamante yinin dooqonsa budonte, imbaanaanaam nagaysayse bazindara sagadhen gonngalante ardayse Sooria peendar yivana ki dhaabhade; Bhirsqillabee Aqilabe kimbesana kinka ke dahade. Kidi Barjobesana malla yinin ardonna, Kinkiria katamante metenam yisa ki haadadhade.

<sup>19</sup> Epsoon kataman yeskayse ogote Bhirsqillabee Aqilabeam ki garade; kidiar Ayiwd eensa bukin raqinte ardayse Ayiwd eenabesana kinka ki dhalqade. <sup>20</sup> Kediar yikal thoothi wodana kinin doadettsi kenin miskenka kidi kena ee hamadehe. <sup>21</sup> Ko daahaannaar kekalanka edimayse yivota yinin dhaabhenka, “Barjo giyanna yekal inta maatasane” kena ki hamade. Epsoorra dhaabhayse bazindara sagadhen gonngalante ardayse ki yivade.

<sup>22</sup> Bazira sagayse Qesaaria katamante yinin yeskenka, Yerusaalem yivayse misken ooninte dahaanaam yinin nagaysonsa budonte, Anthokia katamandar ki yivade. <sup>23</sup> Ogotear likka woda kappayse, ogora dhaabhayse Galatia peenbee Pirgia peentebe yaayaate Barjodar woylamin qajayna eena wulam wocchinsada ki yivade.

### *Abhiloos Epsoonbee Qorontoosbe Gidir Kinin Dohoono*

<sup>24</sup> Iskindira katamante adhadhaa Abhiloos hambhea Ayiwd eedi kala Epsoon gidir ki nivade; kidi Mathaap Gazanam dhesea maatayse, yisa upsinkaar eediam wozisea eedi ki dahade. <sup>25</sup> Imbaa wontea Yesus goynsa timmiriysa dahaa maatayse woylaminka wocchimbhayse giyntaka Yesus goynam may eenna ki dhetsade. Ko daahaannaar, kinin dhesoono Wannisin shivensa bishne. <sup>26</sup> Kidiar Ayiwd eensa bukin raqinte

kurtumbhima giyan ki yedade. Bhirsqillabee Aqilabe kinin giyenam yinin qansen wodanka yinka kiam entsate nivayse Barjosa goynam ena kinin dhesera saskayse kina ke guyade. <sup>27</sup> Kidiar Akaya peendar yivota yinin zagon wodanka, Epsoon katamante daahaana Barjodar woylamin qajayna eena kiam ke wocchinsade; ogora Akaya peente daahaana Barjodar woylamin qajayna eenana kiam kinin tiyoadettsi warqat ke thaapade. Abhiloosaar Akaya peente yinin yeskenka, Barjosa sunin imintonka Barjodar woylamin qajaynaam kattsi ki kelshade. <sup>28</sup> Ogonoar Yesus Barjoyn qadhaa Kiristoos kinin dohonam Mathaap Gazara dhettada gebhi kantaka een wulsa birante palimayna Ayiwd eenaam ki bashade.

## 19

### *Bhawloos Epsoon Katamante Kinin Dohoono*

<sup>1</sup> Abhiloosaar Qorontoos katamante ki daaka, Bhawloos bhaabar sagayse Epsoon kataman yeskayse, waani waani Barjodar woylamin qajaana eenaam ogote ki haapade. <sup>2</sup> “Barjodar woylamin yelin qajon wodanka, Manpas Gazanam yedi tiydu?” kena ki hamade. Kidiar “Tiyootone; Manpas Gazan dohonamaar qansootone” kina ke hamade. <sup>3</sup> Kidiar “Yin ko hanna, har shiidhimbhe ye shiidhimbhaa?” kena ki hamade. Kidiar “Wannissa shiidhimbhenkane” ke hamade. <sup>4</sup> Bhawloosaar “Wannis yisa budonte niveadar woylamin kinin qajoadettsi eenana giyada seesonam yisa garayse Barjodar kinin maatonam dhaana keam ki shivade; agaa Wannissa budonte nivaa Yesusne” kena ki hamade. <sup>5</sup> Ogoam yinin qansenka Imbaa wontea Yesussa naabenka ke shiiddhade. <sup>6</sup> Bhawloosaar aaninam yisa kedar ki wodaysaka, Manpas Gazano kedar ko hanchade; apo abkaar ke dhalqade; pir Barjokala qansayse eenna ke guyade. <sup>7</sup> Igina eena wul kidar tabhi lamaaddhane.

<sup>8</sup> Bhawloosaar Ayiwd eensa bukin raqinte ardayse Barjo bitamonsa kinin giyenam gonne hamayse kinin tiyoadettsi palimada arpi makkamaddha kekal kurtumbhima kena ki guyade. <sup>9</sup> Waani waani eena iinka siyon bavaana eena Imbaa wontea Yesussa goynam eensa birante iirada, “Wodi hanin giyenam gonne hamayse tiyattone” ke hamaysaka Bhawloos kekalanka ki edimade. Barjodar woylamin qajayna eenaam yinka tiyayse Thiranoosin eenaam dhettsen ooninte rooro wul eenaam kida dhettse. <sup>10</sup> Bhawloos ogoam kinin hayoona leve lamaaddhane. Ogonante Isiya peente daahaana Ayiwd eenabee Girik eena wulbe Imbaa wontea Jesus goynsa kedi qansidine.

### *Barjo Bhawlooska Tarshen Waadiman Kinin Waadadhoono*

<sup>11</sup> Barjo Bhawloossa aaninka kattsi tarshen yer ki hayade. <sup>12</sup> Ogo goynka eena Bhawloossa bishin kaamaa apala yinka tiyayse hajadhaana eenaam kinin kaamenka, kesa burqora keda paashe; beeronaar kedara ute.

<sup>13</sup> Beeronamaar eenadara bulada hamotear yaayayna waani Ayiwd eena “Bhawloosin giyea Yesussa naabenka yelin utoadettsi yena ida giye” hamaate beeronaam eendara bulota ke zagade. <sup>14</sup> Ayiwd een gudullasa hayoa Asqewasa naana tobbhaanaar yin hayte ke dahade. <sup>15</sup> Ko dahaannaar beerono “Yesusam dhesayda dhese; Bhawloosamaar dhesayda dhese; yedi kina haybene?” hamayse kena ki maasade. <sup>16</sup> Beeron yindar dahaa ea kedar bhulayse ke wulam qanada ki bashade; kesa bishin hajimbhaysaka ogo oonira pundiri gobate ke yivade.

<sup>17</sup> Ogonoar Epsoon gidir dohoono eeno wul Ayiwd eenabee Girik eenabekal konin qansimonna kedi wul kurtumbhan ke yedade. Imbaa wontea Yesussa naabeno kattsi ko gobshadhade. <sup>18</sup> Barjodar woylamin qajaana eenasa shaarira thoothino eeno yinin waadadhon siyon waadimanam buuthada nivite ke dahade. <sup>19</sup> Palpalan hayayna eenasaar thoothina eena een wulsa birante palpalan kinin hayen mathaapinam puchayse ke koqade. Mathaapinasa bazanam paydadhenka eedi lamaa kaysa apo tabhi

shii (50,000) birre ko maatade. <sup>20</sup> Ogoka Imbaa wontea Yesussa dhacchintan goynam giyayno upsino kattsi workaatebee bashaatebe ko yivade.

### *Epsoon Katamante Gooren Dhaabhoono*

<sup>21</sup> Ogo wulsa budonte, Bhawloos yisa woylaminka “Moqodoonia peenbee Akaya peenbeka sagayse Yerusaalem ida yive; ogote inin yeskonsa budonte, Roome katamadar yiva iam ko zaske” hamayse ki bhocchade. <sup>22</sup> Ogonante yimbesana waadimayna eenasa eedi lamaa, Thimaatoosbee Erasthoosbeam, Moqodoonia peente yittsayse kidi yinti likka wodana Isiya peente ki dooqade.

<sup>23</sup> Ogo wodanka Imbaa wontea Yesussa goynna Epsoon katamante goore gebhi ko dhaabhade. <sup>24</sup> Anngamo birre paxea Dimethiroos hambhea eedi kalaa barjono Arthemissa gazan ooninsa kamsi maatea anngamo birrera ashkayse thoothina anngamon birren paxayna eenana koymo thoothi ki hapsade. <sup>25</sup> Dimethiroosaar anngamon birren paxaynabee kedettsi waadadhayna waani eenabeam eelayse yikal keam pucchayse, “Yedi kina eenato, wodi koymon wonin haapayno waadiman ogoka konin dohonam dheseeda dhese. <sup>26</sup> Agaa Bhawloos ‘Eedi aanka ashkaana barjona gon barjotehe’ hamayse Epsoon gidir bish dayma Isiyaar thoothino eeno kinin giyenam gonne konin hamoadettsi, keam kinin dhaddhinsonam yedi haapidine, pir yedi qansidine. <sup>27</sup> Ogo goynka wosa waadimanam baginta bish dayma, Isiya peentebee peen wulir dohon eeno wul yinin goodimayno gembho barjono Arthemissa gazano onno pootima maatayse koda shidhe; Arthemissa gembhakono sun koda shidhe” kena ki hamade.

<sup>28</sup> Eenaar ogoam yinin qansenka kattsi dhagadhayse, “Wo Epsoon eenasa barjono Arthemis kodi gembhone” hamada ke ilatade. <sup>29</sup> Kataman wulir goore ko dhaabhade; eenaar kinka kalaa maatayse Bhawloosbesana yaayayna Moqodoonia eena Gayoosbee Aristhirokoosbeam yedayse gochate bukin raqinte keam ke yivade. <sup>30</sup> Bhawloos bukaana eenakal yivota ki zagaysaka, Barjodar woylamin qajayna eena kinin yivoamadettsi kiam ke marade. <sup>31</sup> Isiya peenam wottsayna eenasa kisa nasho maataana waani waani eenaar Bhawlooskal eedi yittsayse, “Eenin buken raqinte yivayse hanin haapadhoamadettsi!” hamayse kiam ke miskade.

<sup>32</sup> Eenasa shaarinte kattsi goore yinin dohonna, thoothino eeno harrna yinin bukonam dhesehe. Ogona antina yer waana giyaate keda ilate; antinaar tapir yer waana giyaate keda ilate. <sup>33</sup> Waani waani Ayiwd eena Iskindirosam yisa shaarira eensa birante kiam ke woysade; antina payya hayayse kinin palimoadettsi kiam ke kiilade. Iskindiros lay kinin hamoadettsi aanka dhahayse paliman ki yedade. <sup>34</sup> Ko dahaannaar Iskindiros Ayiwd eedi kinin dohonam eeno wul yinin dhesenka, “Wo Epsoon eenasa barjono Arthemis kodi gembhone” hamaate savaat lamaaddha wulatte ke ilatade.

<sup>35</sup> Macchindar katamansa thaapin waadadhea ea eenaam lay haysayse kena yin ki giyade: “Yedi kina Epsoon eenato, gembho Arthemissa gazan ooninbee cecira hanchon kosa kamsinbeam yelin toolayno een wulna dhesimidine. <sup>36</sup> Koam buudane hamea eedin qolmonna, lay yelin hamoadettsibee yer kalaa gibayse yelin hayoamadettsibe yeam koda zaske. <sup>37</sup> Harrna hambhidianna, onna gazanaam buuraammabee wosa barjono Arthemisam iiraamma eenabeam kote yedate ye nivade. <sup>38</sup> Ta Dimethiroosbee kimbesana kinka daaana anngamon birren paxayna eenabe eediam bersana kinin zagenaa, pirdayna eena daane; pirdin imbhensa woda daane; ogote yivayse ke palime. <sup>39</sup> Ab yer yelin zagea daa ko hanna, zarsino yigginin giyendettsi bukayse ko shede. <sup>40</sup> Harrna hambhidianna, kina haydhon yerinna ‘Goore ke dhaasade’ hamayse wonin bersadhoamadettsi woda kurtumbhe. ‘Kono gooreno harka ko dhaabhaa?’ hamayse woam oysadhidianna, wonin imea malsi wokal qolehe” kena ki hamade. <sup>41</sup> Ogoam yinin giyonsa budonte, bukaana eena yisa onnadar kinin yivoadettsi keam ki yittsade.

## 20

### *Bhawloos Moqodooniabee Girikbedar Kinin Yivoono*

<sup>1</sup> Ogo gooren woyonsa budonte, Bhawloos Barjodar woylamin qajayna eenaam yikal eelayse keam kiilate ki wocchinsade; ogora keam nagaysayse Moqodoonia peendar ki yivade. <sup>2</sup> Peen ogoka sagaate yinin yivenka, Barjodar woylamin qajaana eenaam thoothi kiilimeka keam wocchinsayse Girik peendar ki yivade. <sup>3</sup> Ogotear arpi makkam yinin dooqonsa budonte bazindara sagadhen gonngalante ardayse Sooria peendar yivota kinin hayenka, Ayiwd eena kina siya kenin ooshonam dhesayse Moqodooniaka maatayse yivota ki qaabade. <sup>4</sup> Beeria kataman ea Bhirhus naasa Sobhathirosbee, Teselonqe kataman eena Aristhirokoosbee, Sikondusbee, Derbe kataman ea Gayoosbee, pir Thimaatoosbee, Isiya peen eena Tikiqoosbee, Thiropimoosbe kimbesana kinka ke yivade. <sup>5</sup> Kedi woam birayse yivayse Thirovadda gidir ke toolade.

<sup>6</sup> Wodiar irshonin qolmin balashan kummadhen bavaalinsa budonte, Pilbhisooz katamara bazindara sagadhen gonngalanka dhaabhayse rooroa dongsoaka Thirovadar kekal yeskayse rooro tobbhaa ogote wo dooqade.

### *Bhawloos Thirovaddar Kisa Macchino Yaayeno*

<sup>7</sup> Gabansa bira rooroa balashanam kashate kinka kummota bukayse wo daaka, Bhawloos sedhiman yivota yinin hayenka, bukaana eenana guyada dhalqinamaar sootin kiaddha lamanka yekka ki gudubhsade.

<sup>8</sup> Wonin bukon ooninsa zulonte woysadhon ooninte thoothi shaaka ko dahade. <sup>9</sup> Ewtheekis hambhea naasi barsh kalaa ooninsa maskootindar ki dooqade. Bhawloos dhalqinam kinin gudubhsonna naasa agaam kattsi gindhe kiam ko yedade; gindhenin kiam bashonna, ooninsa zulonte woysadhon oonin makkansonsa maskootra mia ki dhambade; eenin kiam dhaasenka, diyayse ki dahade.

<sup>10</sup> Bhawloosaar hanchayse naasadars yirk hamayse naasaam incayse eenna “Kidi sadaka daane; targadheebhode!” kena ki hamade. <sup>11</sup> Ogora Bhawloos maataate utayse Barjodar woylamin qajayna eenabesana kinka balashanam ki itsade. Peenin sedhenka yekka eenbesana kinka dhalqayse ki yivade.

<sup>12</sup> Eenaar dhaqaa naasaam kisa oonindar ke tiyade; ogonante kedi wozadhayse kattsi ke wocchimbhade.

### *Bhawloos Thirovaddara Milithi Katamandar Kinin Yivoono*

<sup>13</sup> Bhawloos Asoos kataman rooka yivota yinin qaabonna, birayse wodi ogote yeskayse kiam wo tiye ki zagade. Ogonante bazindara sagadhen gonngalante ardayse Asoos katamandar wo yivade. <sup>14</sup> Asoos gidir Bhawloosbesana kinka keerayse bazindara sagadhen gonngalanka kiam tiyayse Mithilin katamandar wo yivade. <sup>15</sup> Burin ogora dhaabhayse Kiyoos peensa birante dohon raqindar wo yeskade; ogoraar kina hamon dhaabhayse Saamoosdar yivayse kina hamon Milithi kataman wo yeskade. <sup>16</sup> Bhawloos Isiya gidir kappana yinin zagaamonna, Epsoon ardima sagayse yivota ki qaabade. Ogonoar, yi damidianna, Bhentheqosthe bavaalam Yerusaalem gidir saskana zagayse ki gibade.

### *Bhawloos Epsoon Miskenn Ooninsa Donzanabesana Kinka Kinin Dhalqoono*

<sup>17</sup> Bhawloos Milithi katamara Epsoon katamante eedi yittsayse misken ooninsa donzanaam yikal ki elsade. <sup>18</sup> Kikal ke nivaysaka kena yin ki giyade: “Isiya gidir inin arorra yedayse rooro wul yembesana kinka hamin inin dohonam yedi dheseeda dhese. <sup>19</sup> Ayiwd eena idar siya hayota ooshayse gaalebee eepibeem ke bavaakaar inta metenam isa toskayse Imbaa wontea Yesusna i waadadhade. <sup>20</sup> Thoothin eenin buken raqintebbee yesa onnarbe yeam i dhettsade; yena pooten wulam inin giyenka shiishaatine. <sup>21</sup> Ayiwd eenabee Ayiwdtay hamma eenabe seeson waadimanam garayse Barjodar ke maatebee wosa Imbaa Yesus Kiristoosdar woylamin ke qajebe hamayse

wocchinsayse kena i tarjade. <sup>22</sup> Taar iam Manpas Gazano kantaka konin dhaasonna Yerusaalem ida yive. Ogote har idar yeskenam dhesattine; <sup>23</sup> ko dahaannaar dhaxibee gaalebe idar konin yeskenam Manpas Gazano kataman wul gidir ina wocchinsayse koda giye. <sup>24</sup> Inta gobenbee Imbaa wontea Yesuskalanka inin tiyoono waadimanbeam inin macchoadettsi, ogo Barjosa sunin imintonsa dhacchintan upsinam guyana ‘Sadano inno ina poota ko poote’ hamayse qaabattine.

<sup>25</sup> “Taar marrato! Inta Barjosa bitamon goynsa guyada ye wulsa shaarinte inin yaayoono keeda kaara os iam yenin haapiminam dhesayda dhese. <sup>26</sup> Ogonante inta een wulsa zombhira gaza ea inin maatenam kina rooroaka yena ida tarje. <sup>27</sup> Harrna hambidianna, Barjosa qaabon wulam yena guyara hamin ko dahaakaar shiishaatine. <sup>28</sup> Yisa Naasasa zombhinka kinin shanoono Barjosa misken ooninam yenin tooloadettsi Manpas Gazano yeast misken ooninam toolayna hayayse konin kamonna, Barjo een wulbee yennon metenbeam gishee. <sup>29</sup> Inin yivonsa budonte yaanana burqadhima sareya yaayodettsi maatayna eena yesa shaarinte kenin ardenam dhesayda dhese. <sup>30</sup> Tapir yesa shaarira waani waani eena dhaabhayse wobon dhalqinam guyate Barjadar woylamin qajayna eenaam yidar keda maase. <sup>31</sup> Ogonante leve makkam sootinbee rooronbe eepada ye kalaa kalaana inin kiilonam bhocchada qaymayse toolee.

<sup>32</sup> “Taar Barjobee kisa sunin imintonsa upsinbena yeast inta elqimidine; ogono upsin yeast wocchinsanabee gazisadhaana wulsa shaarinte raq yena imana dame-abene. <sup>33</sup> Inta haysaar birrebee, worgibee, apalabe anngardhaatine. <sup>34</sup> Inta aanin innonka imbee imbesana waadadhaynabena zaskenam waadadhayse inin haaponam yedi yenti dheseeda dhese. <sup>35</sup> ‘Tiyea eadara imea kattsi gobshadhaane’ hamayno Imbaa wontea Yesussa dhalqinam bhocchintaka idettsi waadadhate eedi kantaysa qolminaam kelsha woam zaskenam goyti wulka yena inta dhaydine” kena ki hamade.

<sup>36</sup> Ogoam yinin guyonsa budonte Bhawloos kumpurdhayse ke wulbesana Barjoam ki miskade. <sup>37</sup> Kedi wulaar kattsi eepaate Bhawloosam incaye ke sunqade. <sup>38</sup> Kattsi qaabonka kenin atoono “Keeda kaara os iam haapattene” kinin hamonnane. Ogora bazindara sagadhen gonngalankal kimbesana yivayse kiam ke suudade.

## 21

### *Bhawloos Yerusaalemdar Kinin Yivoono*

<sup>1</sup> Kekalanka wonin edimonsa budonte, bazindara sagadhen gonngalante ardayse dhari Qoos peendar wo yivade. Ogora kina hamon Ruud peen wo yeskade. Ogoraar Bhathira katamandar wo yivade. <sup>2</sup> Ogote pir Pinqe peendar yivea gonngala haapayse kanka yivan wo yedade.

<sup>3</sup> Qobhiroosam shedayse wosa warkatambar koam garayse Sooria peente Thiroos katamante wo yeskade; harrna hambidianna, bazindara sagadhen gonngalante dohon koymonam ogote buldhennane. <sup>4</sup> Barjodar woylamin qajayna eenaamaar zagate haapayse kembesana kinka rooro tobbhaa wo dooqade. Kedi Manpas Gazanka entsad-hayse Bhawloosna “Yerusaalemdar yivaabhode!” hamayse kina ke guyade. <sup>5</sup> Igina roorona maqaysaka dhaabhayse wo yivade; Barjodar woylamin qajayna annginabee, maanabee, naanabe kinka katamansa gasanka yekka woam entsaate ke bulade. Bazinsaar gasante kumpurdhayse Barjoam wonin miskonsa budonte kinka kiam nagaysayse wo edimade. <sup>6</sup> Wodi bazindara sagadhen gonngalante wo ardade; kedi yisa onnadare ke maatade.

<sup>7</sup> Wodiar bazindara sagadhen gonngalanka Thiroosra dhaabhayse Bhethellemays kataman wo yeskade; ogotear Barjodar woylamin qajaynaam nagaysayse kembesana kinka rooro kalaa haaqayse wo wodhade. <sup>8</sup> Ogora kina hamon dhaabhayse Qesaaria kataman wo yivade. Eenna galan ke kashe kambhaana tobbhaanasa kalaa, Barjosa

dhacchintan upsin giyea Pilbhooskal ooninte ardayse kimbesana kinka wo dooqade.  
<sup>9</sup> Pilbhoossa anza kembhaamma oydi Barjokala qansayse eenna giyayna ke dahade.

<sup>10</sup> Thoothi rooro ogote wonin dohonsa budonte Agaabos hambhea Barjokala qansayse eenna giyea Yiwsa peera ki nivade. <sup>11</sup> Wokal nivayse Bhawloossa qalbathanam tiyayse yisa aaninbee roonbeam dhaxayse, “Manpas Gazano ‘Qalbathan kosa imbaam Yerusaalemir dahaana Ayiwd eena yin dhaxayse Ayiwday hamma eenana kiam saskate keda ime’ hamayse ina ko giyade” wona ki hamade.

<sup>12</sup> Ogoam wonin qansenkaar wombee ogote dahaana eenabe Bhawloos Yerusaalem-dar kinin yivoamadettsi miskite wo dahade. <sup>13</sup> Bhawloosaar “Eepada isa woylaminam yenin koqayno harrnane? Inta Imbaa wontea Yesussa naabenna hamayse Yerusaalem gidir dhaxi bish dayma, diyanaar ashkimbhidine” hamayse wona ki maasade. <sup>14</sup> Wonin kiilenam qansattine kinin hamonna, “Keeda Barjosa bhocchi ko dee” hamayse wo garade.

<sup>15</sup> Igina rooronasa budonte, ashkimbhayse Yerusaalem yivana wo dhaabhade. <sup>16</sup> Qesaaria gidir dahaana waani waani Barjodar woylamin qajayna eenar wombесана kinka ke nivade. Kediar wonin dehen Minasoon oonindar woam ke entsade; kidiar birana Barjodar woylamin qajaana eenasa kalaa Qobhiroos peen eedine.

### *Bhawloos Yerusaalemir Yayqoobam Shedo Kinin Yivoono*

<sup>17</sup> Yerusaalem wo yeskaysaka Barjodar woylamin qajayna eena wozaka woam ke tiyade. <sup>18</sup> Kina hamon Bhawloos wombесана kinka Yayqoob oonindar ki yivade; misken ooninsa donzana wul ogote wo hanna ke dahade. <sup>19</sup> Bhawloos keam yinin nagaysonsa budonte, yisa waadimanka Barjo Ayiwday hamma eenasa shaarinte kinin waadadhon wulam shiishima kena ki giyade.

<sup>20</sup> Kediar ogoam yinin qansenka Barjoam ke gobshade. Ogosa budonte, Bhawloosna yin ke giyade: “Wosa imbanasa, Ayiwd eensa shaarira Barjodar woylamin qajaana thoothi shii kinin dohonam hada haape; kedi wul Musesa yiggin goynka kattsi woogimbhayna eenane. <sup>21</sup> Ya Ayiwday hamma eenasa shaarinte dahaana Ayiwd eena wulna ‘Yesa naanasa qaamanam taxeebhode; yesa sharqanam tooleebhode’ hamayse giyntaka Musesa yigginam kinin garoadettsi hada dhettse hamayse giidhaka kedi qansidine.

<sup>22</sup> “Ta hamin ko haydhe? Hanin nivonam kesa qansano shidhehe. <sup>23</sup> Ogonante wonin hana giyenam hayaa. Wosa shaarira mallaya dahaana eedi oydi ke dahade. <sup>24</sup> Iginaam hanka tiyayse kembesana kinka haam gazinsaa; kesa meten haadadhayse kinin gazimbhoodettsi imben koymonam kena kashaa. Koam hanin hayenna hadar giidhayno wul sun konin dohonbee ya hamal Musesa yigginam toolea hanin dohonbeam Ayiwd eena wul keda dhese.

<sup>25</sup> “Barjodar woylamin qajaana Ayiwday hamma eenana ko hanna, ‘Aaninka ashkad-haana barjonana marshan machadhon waankalankabee, zombhinkalankabee, taxad-hima diyaana qollasa waankalankabee, pir sharmucimakkonkalankabe yenin pegimb-hoodettsi ko zaske’ hamen upsinam warqatdar thaapayse kena wodi yittsidine” kina ke hamade.

<sup>26</sup> Ogona kina hamon Bhawloos eensaam entsate nivayse kembete ki gazimbhade; Barjosa gazan ooninsa mayante ardayse gazimbhan waadimanam kinin maccheabee ke kalaa kalaanana Barjona marshan machadhea rooroabesa aan ki qunthade.

### *Bhawloosin Barjosa Gazan Ooninsa Mayante Yedadhoono*

<sup>27</sup> Roorona tobbhaana maqana hayenka, Isiya peera nivaana Ayiwd eena Bhawloosam Barjosa gazan ooninsa mayante yinin haapenka, een wulam dhaasayse kiam ke yedade. <sup>28</sup> “Israveel eenato, woam kelshee! Wosa eenbee, yigginbee, raqin kobeam bagaate peen wulir dohon een wulam dhettsea ea kaane. Pir Girik eensaam

Barjosa gazan ooninsa mayante arsintaka ogo gazisadhon raqinam minngisidine” hamayse ke ilatade.

<sup>29</sup> Ogoam kenin giyoonoar birayse Epsoon ea Thiropimoosam Bhawloosbesana kinka katamante yinin haaponna, Bhawloos Barjosa gazan ooninsa mayante kiam kinin arsaa kena konin maatonnane.

<sup>30</sup> Kataman wul eeno targadhayse saana bukayse Bhawloosam yinka gochate kerminsa mayanka kiam ke bulade; saana Barjosa gazan ooninsa kermin kerram ke diithade. <sup>31</sup> Eeno Bhawloosam deesana konin zagenka, “Yerusaalem katamano wul targadhayse ko jeekade” hamayno dhalqino Roome shii alaqakal ko yeskade. <sup>32</sup> Ogonante kidi saana poolisanabee mato alaqanabeam yinka tiyayse gobaka Ayiwd eenakal ki yivade. Kidiar shii alaqabee poolisanabeam yinin haapenna, Bhawloosam qanan ke garade.

<sup>33</sup> Shii alaqqa theedayse Bhawloosam yedayse sansala lamaaka kinin dhaxadhoodettsi ki guyade. Ogora hay kinin dohonbee har kinin waadadhonbeam oysan ki yedade.

<sup>34</sup> Zarsino waani waani yer kala konin giyenka, waani kesa pir yer waana ko guyade. Ogonante shii alaqqaar zarsinsa ilitira dhaabhon gonin hamon dhalqinam dhesana yinin damaamonna, Bhawloosam poolisanayn dohon raqindar kinin tiidhoodettsi ki guyade. <sup>35</sup> Bhawloos tigate utadhen kerinkal kinin yeskenka, eensa gebhi wacimenka dhaabhoono poolisana Bhawloosam kedayse ke yivade. <sup>36</sup> Ogoно eenoor “Kiam deesee!” hamayse ilatada kesa paananka keda yive.

### *Bhawloos Palimada Kinin Marimoono Yi Waa 9:1-19; 26:12-18*

<sup>37</sup> Poolisanaar yinin dohon raqinte kiam arsana kenin hayenka Bhawloos shii alaqanaa “Yer kalaa i hana giyoadettsi ya ina ee hamaa hamo?” hamayse kiam ki oysade. Kidiar “Ya Girik aponam dhesaa dheso? <sup>38</sup> Ya Roome bitaadar goore dhaasana kosa birayse een deesayna shii oydi eenaam hanka entsate darandar yivaa Gibth eatayu?” kina ki hamade. <sup>39</sup> Bhawloosaar “Inta Kilqia gidir dhesimon Therses katamante adhadhaa Ayiwd eedine. Bannzo! Eenna inin giyoadettsi ina giyaa” kina ki hamade. <sup>40</sup> Kidiar kina ee ki hamaysaka Bhawloos kerinsa utadhendar woyayse eeno lay konin hamoadettsi aanka kena ki dhahade. Eenin lay hamenka Ibra aponka eenna yin ki guyade:

## 22

<sup>1</sup> “Imbanaanato, ta inin yena palimada marimenam qansee” kena ki hamade.

<sup>2</sup> Ibra aponka kinin giyenam kenin qansenka, ini hamora kattsi lay ke hamade. Kidiar kena yin ki guyade: <sup>3</sup> “Inta Kilqia gidir dohon Therses katamante adhadhaa Ayiwd eedine; inin gebhoono ogo Yerusaalem katamantene. Wosa eykenasa yigginkaar payya hayayse ina dhettsaa Gamalialne; yedi wul ta yenin hayendettsi Barjo goynka woogintan ea i dahade. <sup>4</sup> Eena annginabee maanabeam yedate dhixin ooninte dhaxada Barjodar woylamin qajayna eenaam kenin diyenka yekka keam i oytade. <sup>5</sup> Ogoam gudullasa gebhaabee peensa donzana wulbe tarja ke tarje. Pir Demasqor dahaana imbaanaanana kenin thaapon warqatin kekalanka tiyayse Demasqo katamante dahaana Barjodar woylamin qajayna eenaam dhaxayse kenin dhabshadhoodettsi Yerusaalem keam bavana kedar i yivade.

<sup>6</sup> “Inin yivenkaar rooron cakkonka Demasqo yeskana inin hayenka, i qaabima cecira kattsi shaaka isa gasante ko shaakade. <sup>7</sup> Ogo wodanka intaar peendar i dhambade. ‘Sawl, Sawl! Harrnaa iam oytaye?’ ina hamea upsi i qansade. <sup>8</sup> Intaar maasayse ‘Imbo, ya hayne?’ i hamade. Kidiar ‘Inta hanin oytaya Naazret ea Yesusne’ ina ki hamade.

<sup>9</sup> “Imbesana kinka dahaana eenaar shaakanam ke haapade; ina giyeasa upsinam qansadehe. <sup>10</sup> Intaar ‘Imbo, hariy hayo?’ i hamade. Imba Yesusaar ‘Dhaabhayse

Demasqodar yivaa; hanin waadadhoodettsi zasken yerin wul ogote hana giidhasane' ina ki hamade.

<sup>11</sup>"Shaakara dhaabhonka isa aapinin haapimonna, imbesana kinka dahaana eena isa aaninam yedayse iam entsate Demasqo ke yeskisade. <sup>12</sup> Demasqo gidir dahaana Ayiwd eena wul kina kenin tarjea, Musesa yiggindettsi Barjoam miskintaka wocchimbhaa Hanania hambhea eedi kalaa ki dahade. <sup>13</sup> Kidi ikal nivayse isa gasante woyayse, 'Imbanaasa Sawl, aapino hanno pir ko shede' ina ki hamade; saanawa aapin isa shedaysaka kiam i haapade.

<sup>14</sup> "Kidiar ina yin ki giyade: 'Wosa eykena Barjo kinin qaabonam hanin dhesoaddettsibee, tipaa ea Yesusam hanin shedoadettsibee, kidi yinti hana kinin giyen upsinam hanin qansoadettsibe haam ki kamade. <sup>15</sup> Harrna hambhidianna, hanin haaponbee hanin qansonbe goynka een wulsa birante kisa tarja ha maatene. <sup>16</sup> Ta harrnaa kappe? Dhaabhaye shiidhimbhe shiidhimbhaa; Yesussa naabenam eelayse hasa seesoraar shiidhaa' ina ki hamade.

<sup>17</sup> "Yerusaalem inin maatonsa budonte, Barjosa gazan oonin mayante inin miskenka Barjoyn ina dhohon shedintonam i haapade. <sup>18</sup> Imba Yesusaar ina haapadhayse, 'Goyn innonsa hanin tarjenam eeno qansehe. Ogona dhaabhaa, saana Yerusaalemra utaa' ina ki hamade. <sup>19</sup> Intaar 'Imbo, ena inta Ayiwd eensa bukin raqin wulir yaayada hadar woylamin qajaana wulam inin dhaxenbee inin qanenbeam kedi yinti dhesa ke dhese. <sup>20</sup> Hasa tarja maataa Isthipaanoosin deesadhon wodanka, inta deesaynasa gasante woyayse kembesana kinka agayse kesa apalanam i toolade' i hamade. <sup>21</sup> Imba Yesusaar 'Ayiwdtay hamma eenakal pege inin haam yittsenna, dhaabhaye yivaa!' ina ki hamade" Bhawloos ki hamade.

### *Bhawloos Roome Eedi Yinin Dohonam Kinin Giyoono*

<sup>22</sup> Ogoam kinin giyenka yekka eena Bhawloossa dhalqinam ke qansade. Ogora upsi gebhika "Ogodettsin waadiman hayea eam peera ko kaysadhe! Sadaka daa kiam zaskehe!" hamayse giyan ke yedade. <sup>23</sup> Kedi ilataate apalanam yisa bulayse dhabada, pee dumate cecindar ke laalaka, <sup>24</sup> shii alaqa Bhawloosam poolisanayn dohon gurdante kiam kenin arsoadettsi ki giyade. "Yin eena harrna kidar kenin ilatenam dhesana qanada kiam marmaree" ki hamade.

<sup>25</sup> Masaka kiam dhaxadhaysaka Bhawloos theedi kalan woyaa mato alaqaana "Roome eedi maataam pirdadhima kinin qandhoodettsi yigginka giidhidu?" kina ki hamade. <sup>26</sup> Mato alaqa ogoam yinin qansenka, shii alaqakal yivayse, "Ya har hayoa daa? Ea kaa Roome eedine" kina ki hamade.

<sup>27</sup> Shii alaqaar Bhawlooskal nivayse, "Ya Roome eediw? Ina giyaa" kina ki hamade. Kidiar "Ee" kina ki hamade. <sup>28</sup> Kidiar "Inta thoothi birre kashayse Roome eedi i maatade" kina ki hamade. Bhawloosaar "Inta inin adhadhorra yedayse Roome eedine" kina ki hamade.

<sup>29</sup> Ogonante kiam qanada marmarana qaabaana eena saanawa kiam ke garade. Shii alaqaar Roome eedi kinin dohonam yinin dhesenka, sansalanka kiam kinin dhaskonna ki kurtumbhade.

### *Bhawloos Ayiwd Peensa Donzana Birante Kinin Woyoono*

<sup>30</sup> Kina hamon shii alaqa Ayiwd eena harrna Bhawloosam kinin bersonam kosa goninam dhesana zagayse kiam bulayse gudullasa hayonabee Yiwda peensa donzana wulbe kinin bukoadettsi ki giyade; Bhawloosam kesa birante bavayse ki woysade.

## 23

<sup>1</sup> Bhawloos Yiwda peensa donzanaam may shedayse, "Imbanaanato, inta kinaka yekka Barjo birante qaabo payyaka i dahade" kena ki hamade. <sup>2</sup> Gudullasa gebhaa Hanania Bhawloossa apon kenin qanoadettsi kisa gasante woyaana eenana ki giyade.

<sup>3</sup> Ogo wodanka Bhawloos Hananiana “Ya bhalbhaltonka galthadhaa kubaa, Barjo haam qanasane. Yigginka idar pirdota dooqayse yiggi qolma inin qandhoadettsi ha giyo?” kina ki hamade.

<sup>4</sup> Bhawloossa gasante woyaana eena “Barjoyn wodaa gudullasa gebhaam ha iiro?” kina ke hamade. <sup>5</sup> Bhawloosaar “Imbanaanato, gudullasa gebhaa kinin dohonam dhesaatine. Harrna hambhidianna, ‘Hasa eenamaam wottseadar siya giyaabhode’ hamayse thaapadhidine” kena ki hamade.

<sup>6</sup> Eenasa antina Saduqa eedi, antina Parisa eedi kenin dohonam Bhawloos dhesayse, “Imbanaanato, inta Parisa eenakalanka adhadhaa Parisa eedine; ta idar pirdana kote iam woysadhoono ‘Diyaana eenasa dhaabhinta daane’ hamayse Barjodar qaabe inin hayennane” hamayse Yiwda peen donzanasa birante upsi gebhika ki giyade.

<sup>7</sup> Bhawloos ogoam ki guyaysaka, Parisa eenabee Saduqa eenabesa shaarinte wacime ko dhaabhade; ogona Yiwda peensa donzana raq lamaadar ke kashimade. <sup>8</sup> Harrna hambhidianna, Saduqa eena “Dembhira dhaabhintabee, Barjosa gaanabee, manpasbe solehe” hamayse keda giye; Parisa eena “Igina wul daane” hamayse keda giye.

<sup>9</sup> Ogoka kattsi wacimeyn thoothernka, Parisa eensa shaarira waani waani Musesa yigginam dhettsayna eena dhaabhayse, “Ea agaadat yer kala hattear siya haapootone. Manpas way Barjosa gaana kina giydi ki hannah? Wodi dhesattone” hamayse kattsi ke palimade.

<sup>10</sup> Eena kattsi kenin wacimonna, Bhawloosam kenin ripayoamadettsi shii alaqi kurtumbhade; ogona poolisana kesa shaarira Bhawloosam kantaka sarayse yinin dohon raqinte kenin arsoadettsi ki giyade.

<sup>11</sup> Kina hamon sootin Imbaa wontea Yesus Bhawloossa gasante woyayse, “Hay, kurtumbhaabhode! Yerusaalem gidir innon goynsa hanin tarjondettsi, Roome gidirar hanin tarjoadettsi haam koda zaske” kina ki hamade.

### *Bhawloosam Deesota Ooshadhoono Ooshino*

<sup>12</sup> Peen sedhaysaka Ayiwd eena kinka bukayse ke ooshade. “Bhawloosam deesima galaar itsattone; noqoar wucattone” hamayse kinka dhalqayse ke mallade. <sup>13</sup> Ogo ooshinam kinka dhalqaana eena eedi lamaa kaysara sagi maatayna eenane. <sup>14</sup> Kediar gudullasa hayonabee donzanabekal nivayse, “‘Bhawloosam deesima yer kalaar itsattone’ hamayse kinka wodi mallidine. <sup>15</sup> Ogonante yedi Yiwda peensa donzanabesana kinka dhalqayse Bhawloosam payya marmarayse dhesana yenin zagaadettsi maatayse, Bhawloosam yekal kinin bovoadettsi shii alaqakal yittsee. Wodiar ogote ki yeskima kiam deesana ashkimbhidine” ke hamade.

<sup>16</sup> Ko dahaannaar Bhawloossa indanaansa naasa ogo kesa dhalqinam qansayse poolisana dohon raqinte ardayse Bhawloosna ki giyade. <sup>17</sup> Bhawloosaar mato alaqi kalaam eelayse, “Naasa kaam shii alaqakal yeskisaa; yer kina kinin giyea daane” kina ki hamade.

<sup>18</sup> Mato alaqaaar yinka kiam entsate nivayse shii alaqakal, “Dhaxadhaa Bhawloos yikal iam eelayse, naasa kaam hakal inin yeskisoadettsi iam ki miskade; naasa hana yer kinin giyea daane” kina ki hamade. <sup>19</sup> Shii alaqaaar naasasa aaninam yedate ososoa gasa bulayse, “Ina hanin giyayno yer hare?” hamayse kiam ki oysade. <sup>20</sup> Naasaar “Ayiwd eena payya hayayse kiam marmarayse dhesana kenin zagaay yer dahaadettsi maatayse, saka Yiwda peensa donzanakal Bhawloosam hanin yeskisoadettsi haam oysana kedi kinka dhalqidine. <sup>21</sup> Ko dahaannaar ya kena ee hamaabhode; harrna hambhidianna, kesa iira ‘Kiam deesima gala itsattone; noqoar wucattone’ hamayse eedi lamaa kaysara sagayna eena kinka dhalqayse ke mallade. Ki dhesima kiam deesana goynte toolada ke dahade. Kediar hasa malsin kaalite ke dahade” kina ki hamade.

<sup>22</sup> Shii alaqaaar “Yerin koam ina hanin giyondettsi eedi haynaar giyaabhode” hamayse naasaam ki yiitsade.

### *Bhawloosam Pilkiskal Yittsadhoono*

<sup>23</sup> Shii alaqa mato alaqana lamaanaam eelayse, “Sootin savaat makkam maataysaka Qesaariadar yivayna eedi tabhi kaysa roonka yivayna poolisanabee, eedi makkam kaysa apo tabhi pardandar dooqayna poolisanabee, eedi tabhi kaysa banqi bavayna poolisanabeam ashkee. <sup>24</sup> Bhawloosnaar parda ashkayse peen wottsea Pilkiskal payyamoka kinin yeskoadettsi hayee” kena ki hamade. <sup>25</sup> Yin giyea warqat wottseakal ki thaapade:

<sup>26</sup> “Gobshadhaa peen wottsea Pilkis, inta Qelawdoos Lusiyoo ‘Nagaya, payyaw?’ hana ida hame.

<sup>27</sup> “Ea agaam Ayiwd eena yedayse deesana kinin hayenka, Roome eedi kinin dohonam dhesayse inna poolisanabesana yeskayse kiam i dhacchade. <sup>28</sup> Yer harka kiam kinin bersenam dhesana Ayiwd peen donzanasa birante kiam entsate i nivade.

<sup>29</sup> Yisa yiggin dhalqin goynsa kinin kiam bersonam i dhesade; ogonoar dhaxibee dembhibena kiam yeskisaynotehe.

<sup>30</sup> “Ayiwd eena ki dhesima kiam deesana kinin ooshondettsi ina giidhonam qansayse saana hadar kiam i yittsade. Kiam bersayna hasa birante kiam kinin bersoadettsi kena inta giydine” hamayse kina ki thaapade.

<sup>31</sup> Poolisanaar yina giidhondettsi Bhawloosam tiyayse sootinka Antibhathiroos katamante kiam entsate ke yivade. <sup>32</sup> Sedhiman pardandar dooqayna poolisana Bhawloosbesana kinka kinin yivoadettsi keam garayse, waani poolisanayn dohon raqindar ke maatade. <sup>33</sup> Ogora pardandar dooqayna poolisana Qesaaria katamante ardayse warqatinam peen wottseana imayse Bhawloosam kisa birante ke woysade.

<sup>34</sup> Peen wottsea warqatinam yinin nabbabonsa budonte, hamo peera kinin nivonam Bhawloosam ki oysade. Kilqia peen ea kinin dohonam yinin dhesenka, <sup>35</sup> “Haam bersaana eena nivayse kinin giyenka, hasa dhalqinam ida qanse” hamayse ena Herodisin woyson kerminte kinin toldhoodettsi ki guyade.

## 24

### *Bhawloos Ayiwd Eenaka Kinin Bersadhoono*

<sup>1</sup> Roro dongsa budonte, gudullasa gebhaa Hanania waani waani donzanabee Therthelus hambhea kena palimea eabesana kinka Qesaaria kataman nivayse peen wottseasa birante Bhawloosam ke bersade. <sup>2</sup> Bhawloosam eldhaysaka Therthelus yin giyayse bersan ki yedade: “Gobshadhaa Pilkiso, hanka thoothi payyamo wodi haapidine; payyan hasa wottsintankaar zarsino wonno ookime haapidine. <sup>3</sup> Ogo payyan hasa waadiman goynka hamote ko hannaar, roro wulka kattsi haam woda shawke. <sup>4</sup> Keeda ha qajadhima orgo inin giyenam lemmakkoka hanin qansoadettsi haam ida miske.

<sup>5</sup> “Ea kaa wona hajimo maatayse peendar dohon Ayiwd een wul goore ke dhaase hayeabee Naazret eena hambhaynasa dhaddhisintaka dhettsaynasa entsabe maatayse ki daaka kiam wo haapade. <sup>6</sup> Barjosa gazan ooninamaar minngisana ki hayaka kiam wo yedade. [Wosa yigginkaar kidar pirdana wodi qaabitine. <sup>7</sup> Ko dahaannaar shii alaqa Lusiyoo nivayse gebhi kantaka wosa aanira kiam ki tiyade. <sup>8</sup> Kiam bersaynaar hakal kinin nivoadettsi ki guyade.] Ya hantika yer ogo wulka kiam marmarayse dhesana damaada dame” ki hamade.

<sup>9</sup> Ayiwd eenaa “Ogono yerro wul gonnie” hamayse kisa beerimenka ke agade.

### *Bhawloos Pilkis Birante Kinin Palimoono*

<sup>10</sup> Peen wottsear Bhawloos ki giye aanka ki dhahaysaka, Bhawloos yin ki guyade: “Thoothi levedara yedayse peen kosa pirdea hanin dohonam inin dhesenna, wozaka palimensa malsi hana ida maase. <sup>11</sup> Barjona goodimana Yerusaalem inin yivaara

yedayse kinaka yekka tabhi lamaa roorodara konin sagimonam ya hanti dhesana damaada dame. <sup>12</sup> Barjosa gazan ooninte ko hannaar, way Ayiwd eensa bukin raqinte, way katamante haybesanaar inin palimenka way eensa shaarinte goore inin dhaasenka iam kedi haapadehe. <sup>13</sup> Ta iam yinin bersonsa tarja hana bavate imana damehe.

<sup>14</sup> “Ko dahaannaar inin giyea yer gon hama kalaa daane; ogonoar ‘dhaddhisintaka dhettsayna’ kenin hamen goynka ena eykena wonnasa Barjona ida goodime. Musesa yiggintebbee Barjokala qansayse eenna giyaynasa mathaapintebe thaapadhoono wulam gonne hamayse tiyayda tiye. <sup>15</sup> Barjodar woylam kenin hayendettsi, intaar tipana eenabee tipa maataamma eenabe dembhira kenin dhaabhenam Barjodar qaabe ida haye. <sup>16</sup> Ogonante inta pir Barjobee eenbesa birante rooro wul siya yer yindar qolma inin doadettsi ida wocchimbhe.

<sup>17</sup> “Yerusaalemra i utaysaka thoothi levesa budonte, inta isa eena qambhinana kelsho maatea birrenam bavayse imanabee Barjona marshan machanabe i nivade. <sup>18</sup> Barjosa gazan ooninsa mayantear iam kenin haapoono ogoam inin hayenkane. Ogo wodanka gazimbhintasa waadimanam inta waadadhidine; imbesana kinka thoothi eediar solehe; goorear dhaabhadehe. <sup>19</sup> Ko dahaannaar Isiya peera nivaana waani waani Ayiwd eena ogote ke dahade; kedi iam kenin bersea kesa yer daa ko hanna, hakal nivayse iam bersa ini ko keam zaskade. <sup>20</sup> Ogonotay ko hamma, Ayiwd peen donzanasa birante nivayse inin woyen wodanka, yer idar seeso kenin haapaa daa ko hanna igin eena ke giye. <sup>21</sup> Gon kesa shaarinte woyayse upsi gebhika ‘Idar pirdana kina kote iam woysadhoono “Diyaana eenasa dhaabhinta daane” inin hamonnane’ i hamade. Ogora yer ab inin seesaa solehe” hamayse ki giyade.

<sup>22</sup> Pilkisaar Yesus goynam payya hayayse kinin dhesonna, “Shii alaqa Lusiyos nivanna, yesa dhalqinam ida macche” hamayse ki kappisade. <sup>23</sup> Mato alaqaar Bhawloosam dhaxima kinin tooloadettsibee kisa nashonasa eedi hayyear kiam oysana kinin nivenka keam kinin maroamadettsibe kina ki giyade.

### *Bhawloos Pilkisbee Dursillabesa Birante Kinin Woyoono*

<sup>24</sup> Likka rorosa budonte Pilkisbee kisa geshon Ayiwd eedi maaton Dursillabe nivayse Bhawloosam elsayse, Yesus Kiristoosdar woylamin qajintasa kinin giyenka ke qansade. <sup>25</sup> Bhawloos tipamonbee, meten hannonam wottsintanbee, nivayno Barjosa pirdinbe goynsa kinin giyenka, Pilkis kurtumbhayse, “Ta ya yivaa; ina agen wodanka eedi yiitsayse haam ida else” kina ki hamade. <sup>26</sup> Pilkis pir “Bhawloos inin kiam buloadettsi ina birre imasane” hamayse ki qaabade; ogonante thoothi woda yikal kiam elsayse ki dhalqade.

<sup>27</sup> Leve lamaa thoothonsa budonte, Pilkissa raqinte Bhorgiyoos Pisthoos peen wottsea ki maatade. Pilkisaar Ayiwd eenaam wozisana zagayse Bhawloosam dhaxin ooninte ki garade.

## 25

### *Bhawloos Roome Bitaadar Kiam Yittsadhoadettsi Kinin Oysoono*

<sup>1</sup> Pisthoosaar yinin wottsen raqinte ardayse rooro makkam yinin wodhonsa budonte, Qesaaria katamara dhaabhayse Yerusaalem ki yivade. <sup>2</sup> Gudullasa hayonabee Ayiwd eensaar shaarira entsaynabe Bhawloosam bersan ke yedade. <sup>3</sup> “Bhawloosam Yerusaalemdar baadhoadettsi payya yer wona waadadhaa” hamayse Pisthoosam kattsi ke miskade. Ogoam kinin giyoonoar Bhawloos dhesima goynte toolayse kiam deesana kinin ooshonnane. <sup>4</sup> Pisthoosaar “Bhawloos Qesaaria katamante dhaxadhayse toldhite ki dahade; intaar saana maatayse ogote ida yive. <sup>5</sup> Yesa hayonaar imbesana kinka

Qesaaria ke yive; Bhawloosin waadadhaa seeso daa ko hanna, ogote kiam ke berse” kena ki hamade.

<sup>6</sup> Pisthoos rooro lankay way tabhidara sagimin kembesana kinka yinin dooqonsa budonte, Qesaaria katamandar ki yivade; kina hamon pirdin raqindar yisa dooqayse Bhawloosam kinin baadhoadettsi ki giyade. <sup>7</sup> Bhawloos nivaysaka Yerusaalemra niavaana Ayiwd eena kisa gasante woyayse kidar tarja haapadhimin thoothi detha maataa dhalqka kiam bersan ke yedade. <sup>8</sup> Bhawloosaar “Ayiwd eenasa yiggi ko dahaakaar, Barjosa gazan oonin ko dahaakaar, Roome peen bita ki dahaakaar, inin seesaa yer kala hattear qolehe” hamayse ki palimade.

<sup>9</sup> Pisthoosaar Ayiwd eenam wozisana zagayse Bhawloosna “Yerusaalem yivayse ogo dhalqinsa hana inin pirdoadettsi ya ee hamaa hamo?” hamayse kiam ki oysade.

<sup>10</sup> Bhawloosaar “Inta pirdadhabna zasken Roome peen bitaasa pirdin raqinsa birante woydine. Pir ya payya hayayse hanin dhesendettsi Ayiwd eendar seeso waadadhaatine.

<sup>11</sup> Ta dembhina iam yeskisea seeso waadadhidi i hanna, dembhira dhaqana giyatine; ko dahaannaar iginna eena iam kenin bersayno gon ko dahaamma, kena iam saskate imea eedi qolehe. ‘Roome peen bitaadar iam yittsaa’ hana ida hame” ki hamade. <sup>12</sup> Ogo wodanka Pisthoos kiam kiiayna eenabesana kinka dhalqayse, “‘Roome peen bitaadar iam yittsaa’ hanin hamonna, daran yivaada yive” kina ki hamade.

### *Bhawloos Agirbhabee Barniqebesa Birante Kinin Woyoono*

<sup>13</sup> Likka roorosa budonte, Bitaa Agirbhabee Barniqebe Pisthoosam nagaysana Qesaaria katamandar ke nivade. <sup>14</sup> Ogotear thoothi rooro kenin dooqonna, Pisthoos Bhawloossa dhalqinam yin giyayse bitaana ki giyade: “Pilkisin dhaxayse garaa eedi kalaa kote daane. <sup>15</sup> Yerusaalemir inin dohonka gudullasa hayonabee Ayiwd eensa donzanabe kidar inin pirdoadettsi iam miskada kiam ke bersade. <sup>16</sup> Intaar ‘Bersadhaa bersaynasa birante woyayse kiam bersadhonsa ki palimima saskate kiam imano Roome eenin bulaa dambitehe’ hamayse kena i maasade.

<sup>17</sup> “Ogonante kiam bersayna eena bukayse kenin nivonsa, kappima kina hamon pirdi raqindar dooqayse eam baadhoadettsi i giyade. <sup>18</sup> Kiam bersanaar ke woyaysaka, ‘Kidi kattsi siya yer ki waadadhaysaka keda berse’ hamayse inin qaaborra yer kala hattear kiam pirdina yeskisea qolehe. <sup>19</sup> Ko dahaannaar kimbesana kinka kenin palimoono Ayiwd eena Barjodar woylamin kenin qajonsabee Bhawloosin ‘Sadaka daane’ kinin hamea diyaa Yesussabene.

<sup>20</sup> “Intaar yerin koam marmarayse dhesana inin gaalonna Bhawloosna ‘Yerusaalem yivayse ogote hasa dhalqinna pirdadhoadettsi ya ee hamaw?’ kina i hamade.

<sup>21</sup> Bhawloosaar ‘Isa dhalqinam Roome peen bitaanin shedenka yekka, dhaxin ooninte i dooqe’ kinin hamonna, bitaakal kiam inin yittsenka yekka, dhaxin ooninte kinin doadettsi i giyade” kina ki hamade.

<sup>22</sup> Agirbhaar Pisthoosna “Intaar ea agaanin giyenam inti qansana ida zage” ki hamade. Pisthoosaar “Saka kinin giyenam qansaada qanse” kina ki hamade.

<sup>23</sup> Ogona kina hamon Agirbhabee Barniqebe gebhi gobshika nivayse shii alaqanabee katamante dahaana gembha eenabesana kinka pirdi ooninte ke ardade. Pisthoosaar “Ki baadhe” hamayse ki giyaysaka, Bhawloosam ko baadhade.

<sup>24</sup> Pisthoosaar yi giyna: “Bitaa Agirbhabee yediar wombесана kinka dahaana eena wulbe, ‘Keeda kaara os sadaka daa kiam zaskehe’ hamayse ilatada Ayiwd eena wul Yerusaalembee kotebe kidar pirdadhoadettsi iam kenin miskaa ea kaane. <sup>25</sup> Intaar dembhina kiam yeskisea yer kinin hayaamonam i haapade. Kidiar ‘Roome peen bitaadar iam yittsaa’ kinin hamonna, kiam bitaadar yittsana qaabayse i woysade.

<sup>26</sup> Kinnon goynsa isa bitaakal inin thaapea gon hama yer qolehe. Ogonante kiam marmardhonsa budonte, yer inin thaapea ina haapadhasane hamayse, yesa birante, kattsika Bitaa Agirbha, hasa birante kiam entsate i nivade. <sup>27</sup> Harrna hambhidiana,

dhaxadhaa eam yittsadhenka kiam bersadhonsa warqat thaapayse kanka yittsadhaammo yer malgimmakko ina ko maatade” ki hamade.

## 26

### *Bhawloos Bitaa Agirbha Birante Kinin Palimoono*

<sup>1</sup> Agirbha Bhawloosna “Hanon metensa hanin giyoadettsi hana giidhidine” kina ki hamade. Bhawloosaar aaninam yisa pishkayse yin giyayse paliman ki yedade: <sup>2</sup> “Bitaa Agirbha, Ayiwd eenanin iam berson yerin wulna kina hasa birante palimensa malsin inin maasenka kattsi ida wozadhe. <sup>3</sup> Harrna hambhidianna, ya Ayiwd eenin bulon sharqanbee kesa dhalqinbe wulam payya hayayse hada dhese. Ogonante inin giyenam darshayse hanin qansoadettsi haam ida miske.

<sup>4</sup> “Inta eensa shaarintebee Yerusaalem gidirbe maatonam naasamora yedayse hamin inin dohonam Ayiwd eena wul dhesa ke dhese. <sup>5</sup> Tarjana ke nashidianna, Barjosa yigginam kattsi toolayna Parisa eedi maatayse inin dhaaadettsi enara yedayse iam kedi dhesidine.

<sup>6</sup> “Taar Barjo wosa eykenana ‘yena imayda ime’ kinin hamon upsin goynka kidar qaabe inin hayonna idar pirdota kote iam ko woysadhade. <sup>7</sup> Wosa muldhana tabhi lamaa sootibee roorobe wocchimbhayse Barjona kenin goodimenka, ogo Barjo ‘yena imayda ime’ kinin hamonam tiyana toolite ke dahade. Bitaa Agirbha, ogo bhocchin goynka Ayiwd eena iam bersite ke dahade. <sup>8</sup> Barjo diyaanaam dhaasea kinin dohonam ‘gontehe’ harrnee hame?

<sup>9</sup> “Ena inta ‘Naazret Yesussa naabenam jibbayse yer thoothi siya haya ko iam zaske’ hamayse i qaabade. <sup>10</sup> Yerusaalem gidir inin hayoono ogodettsine. Gudullasa hayonakalanka hayamo tiyayse, Barjodar woylamin qajayna eenasa thoothina eenam dhixin ooninte keam ida dhaxe; keam deesadhenkaar deesayna eenabesana kinka inta wormidine. <sup>11</sup> Ayiwd eenasa bukin ranqaar thoothi woda keam dhabshayse Barjodar woylamin yinin qajenamaar kenin garoadettsi ida haye. Kattsi kedar inin dhagadhonna, pee abir dohon katamante yivayse keam ida oytaye.

### *Bhawloos Barjodar Hamin Kinin Maatonam Kinin Giyoono*

#### *Yi Waa 9:1-19; 22:3-16*

<sup>12</sup> “Bitaa, ogo goynka gudullasa hayonakalanka hayamobee ergebe tiyayse Demasqo katamandar inin yivenka, <sup>13</sup> goynte i daaka rooron haynin kiaddha hamenka, hayra sagayno shaaka cecira imbee inka yivayna isa aanammabesa gasante konin shaakenam i haapade. <sup>14</sup> Wodi wul peendar wo dhambaysaka, ‘Sawl, Sawl! Harrnaa iam oytaye? Haam uxen annamonam qapan ha garaamma, hana kattsi siyane’ hamea upsi Ibra aponka i qansade. <sup>15</sup> Intaar ‘Imbo, ya hayne?’ i hamade. Imbaar ina yi giyna: ‘Inta hanin oytaya Yesusne. <sup>16</sup> Ko dahaannaar dhaabhayse roon hannonka woyaa. Harrna hambhidianna, ta iam hanin haaponbee os birante hana inin haapadhenbe goynka ina waadima eedibee isa tarjabe hanin doadettsi haam kamana hana i haapadhade. <sup>17</sup> Israveel eenabee kekal haam inin yittsayno Ayiwdtay hamma eenabesa aanira haam dhacchayda dhacche. <sup>18</sup> Thipara shaakandar keam hanin buloadettsibee Seethaanin wottsera Barjodar keam hanin maasoadettsibe kesa aapinam ha bule haam i kamade. Kediar idar woylamin yinin qajenka seesonsa garintonam haapa ke haape; yiam gazisadhaana waani eenabesana kinka Barjosa bitamonam keda tiye’ ina ki hamade.

### *Bhawloos Yisa Waadimansa Kinin Giyoono*

<sup>19</sup> “Bitaa Agirbha, ogonante cecira ina haapadhonsa ina giidhonam aavav hamaatine. <sup>20</sup> Ko dahaannaar birayse Demasqobee, Yerusaalembee, Yiwda peen wulir dohon eenbee, Ayiwdtay hamma eenbena seeson waadiman garayse Barjodar kenin maatoadettsibee Barjodar kenin maatenam eshkea waadima kenin waadadhoodettsibe

kena inta giydine. <sup>21</sup> Ogonante Ayiwd een Barjosa gazan ooninsa mayante iam ke yedade; deesanaar iam ke zagade. <sup>22-23</sup> Kinaka yekka Barjosa kelshonam i haapade; ogona likkanabee gembha eenabena tarjada inta woydine. Barjokala qansayse eenna giyaynabee Musebe ena birayse ‘Barjoyn qadhaa Kiristoos gaale haapa ki haape; diira dhaabhintakaar bira maatayse dhaqintasa shaaka kena shaakendettsi Israveel eenabee Ayiwdtay hamma eenabena Kiristoos kida giye’ kenin hamonam giyara yer ab giyaatine” Bhawloos ki hamade.

<sup>24</sup> Bhawloos palimen koam kinin giyenka Pisthoos upsi gebhika “Bhawloos, ya ta bardhidine! Thoothi hanin timmiroono haam barinte ko arsade” kina ki hamade.

<sup>25</sup> Bhawloosaar yin giyayse kina ki maasade: “Gobshadhaa Pisthoos, goninbee gaz hamonbeam ida giye; bardhaatine. <sup>26</sup> Bitaasa birante may inin giyayno kidi yerin koam kinin dhesennane. Yerin ogosa kala hattear kidi dhesadehe inta hamattine; harrna hambhidianna, ogono aachika waadadhadoono yertehe. <sup>27</sup> Bitaa Agirbha, ena Barjokala qansayse eenna giyaynasa dhalqinam gonne hamayse tiyaa tiyo? Hanin tiyenam dhesayda dhese” kina ki hamade.

<sup>28</sup> Agirbhaar Bhawloosna “Ya ta likka wodasa iinte Kiristoosdar woylamin qajea iam hayota zago?” kina ki hamade. <sup>29</sup> Bhawloosaar “Likka wodaar ko dee; thoothi wodaar ko dee; ya bish dayma, kina isa dhalqinam qansayna wul isa dhaxira ab yer wulka idettsi yenin maatoadettsi Barjoam ida miske” ki hamade.

<sup>30</sup> Ogora bitaabbee, peen wottseabee, Barniqebee, kembesana kinka dooqaana eenabe dhaabhayse, <sup>31</sup> ogora utayse kenin yivenka, “Ea kaa dembhibee dhaxibe kidar yeskisea seeso waadadhadehe” hamayse kinka ke dhalqade. <sup>32</sup> Agirbhaar Pisthoosna, “Ea kaa ‘Roome peen bitaadar iam yittsee’ ki hamaamma, kiam bulate sun yittsa dandima ko dandime” ki hamade.

## 27

### *Bhawloosam Roome Bitaadar Yittsadhoono*

<sup>1</sup> Thaalian peente bazindara sagadhen gonngalanka wonin yivoadettsi qaabadhon wodanka, Bhawloosbee waani dhaxin eenbeam Yuliyoos hambhea Roome bitaa banqin eenasa mato alaqaana keam ko imbhade. <sup>2</sup> Iсиya peensa gasante dahaana ranqadar yivanna hayayno Adramithiyon katamara nivon bazindara sagadhen gonngalante ar-dayse wo dhaabhade; Moqodoonia gidir dhaaa Teselonqe ea Aristhirokoosaar wombesana kinka ki dahade. <sup>3</sup> Kina hamon Sidoona katamante wonin yeskenka, Yuliyoos Bhawloosna payya kinin dohonna, kiam zaskenka kenin kelshoadettsi yisa mulhanakal ki yive ee ki hamade. <sup>4</sup> Raqin ogora bazindara sagadhen gonngalanka dhaabhayse wonin yivenka wuranin wosa birante jibarshonna, woam konin galshoamadettsi bazinsa shaarinte dohon Qobhiroos peensa demenka wo yivade. <sup>5</sup> Kilqia peenbee Bhinpilia peenbesa gasante dohon bazindara wonin sagonsa budonte, Loqia peente dohon Muura kataman wo yeskade. <sup>6</sup> Ogote mato alaqa Thaaliandar yiven Iskindira katamara nivon bazindara sagadhen gonngala haapayse gidir woam ki arsade.

<sup>7</sup> Roro thoothi leemayse wo yivade; thoothi gaaleka Qenidoos katamansa gasante wo yeskade. Wuranoar os birante wonin yivoamadettsi konin maronna, Selmoona katamansa gasante bazinsa shaarinte dohon Qerthes peensa demenka wo yivade.

<sup>8</sup> Gebhi gaalekaar gasan gasanka Laasia katamanna theeden “Payya Ukunse Raq” hambhente wo yeskade.

<sup>9</sup> Wonin yivenka thoothi roro yinin maqonna, Ayiwd eenayn itsima Barjoam miskea rooroa\* maqidi kinin dohonna, bazindara sagadhen gonngalanka ta yivana kattsi kurtunsayno ko maatade. Ogona Bhawloos eenam yin giyayse ki bhocchisade:

\* <sup>27:9</sup> Igina arpinaka wura kattsi konin thoothenna, bazindara sagadhen gonngalaka yaayana kattsi koda galshe.

10 “Marrato, keeda wosa birante yivana wonin dohon goynte gaaleyn dohoono ina ko haapadhe; gaalenoar bazindara sagadhen gonngalanbee kosa iinte wodadhon koymonbedar bish dayma wodarar yeskasane” hamayse keam ki kiilade. <sup>11</sup> Mato alaqa Bhawloossa kiilimera kattsi bazindara sagadhen gonngalansa hayoabee kosa imbaabe kenin giyem nam ki qansade. <sup>12</sup> Ogo bazinsa gasante dohon ranqinte gonngalanam woysayse barginam ogote saskana konin agimonna, thoothino eeno “Kora dhaabhayse wo damidianna, Pinqe yivayse barginam ogote wo saske” hamayse kinka ke dhalqade. Pinqe katamano bazinsa shaarinte dohon Qerthes peentene; ogo Pinqekal dohoono bazino hayn utensa mizaqimbarbee warkatambarbe ko dahade.

### *Bazindar Wuranin Dhaabhoono*

<sup>13</sup> Tokaa jibare hayn utensa mizaqimbar dhaabhayse jibarshen kenin haapen wodanka, “Wonin qaaboono ko maatade” hamayse ogora dhaabhayse Qertheskal theedi gasanka ke yivade. <sup>14</sup> Ko daahaannaar, kappima hayn utensa warkatambar “Awraaqis” hambhayno wurano gembho dhaabhayse bazinsa shaarinte dohon peera utayse bazindar ko nivade. <sup>15</sup> Bazindara sagadhen gonngalanam wuranin kupayse bashonna, gonngalanam qanan wo garaysaka lay hamayse wuranka kupadhaate wo yivade. <sup>16</sup> Qeeda hambhen bazinsa shaarinte dohon likkon peensa demenka yivayse, bazindara sagadhen likkon gonngalanam gaaleka dhacchana wo damade. <sup>17</sup> Gonngala likkaam tura bulayse bazindara sagadhen gebhon gonngalante ke arsade. Ogosa budonte gebhon gonngalanam zaanika dhaxayse Surtis hambhen shaamin dohon raqinte konin dhamboamadettsi kurtumbhayse gonngalandar dhaxadhon apalanam<sup>†</sup> hanchayse wuranin keam kudenka ke yivade.

<sup>18</sup> Wuranoar kantaka woam kattsi konin jugenka, kina hamon gonngalante dohon eensa koymora bazinte dhaban ke yedade. <sup>19</sup> Makkansoa rooroaka gonngalansa koymora tiyayse yisa aanka ke dhabade. <sup>20</sup> Thoothi rooro haynbee wanconbeam wonin haapaamonna, pir wuranin garaamonna, “Keeda wodi dhaqattone” hamayse woylam wo taxade.

<sup>21</sup> Eena yer itsima thoothi rooro kenin kapponsa budonte, Bhawloos kesa shaarinte woyayse yin ki giyade: “Marrato, inin giyem nam qansayse Qerthesdara ye dhaabhaamma, ko gaalenbee kayenbe wodar yeskehe. <sup>22</sup> Taar ‘Hay, kurtumbheebhode!’ hamayse yeam ida kiile. Kono bazindara sagadhyino gonngalanoda kaye; yesa iira eedi kalaar kayehe. <sup>23</sup> Harrna hambidianna, inta kinti maataabee pir kina inin goodimeabe Barjosa gaana sootin ogo ikal theedi woyayse, <sup>24</sup> ‘Bhawloos, kurtumbhaabhode! Roome peen bitaasa birante woya haam ko zaske. Shedaa! Barjo hambesana kinka yivayna wulam hana kida dhacche’ hamayse ina ki giyade. <sup>25</sup> Ogonante marrato, hay, kurtumbheebhode! Barjo ogo ina yinin giyonam kinin hayenna kidar woylamin qajayda qaje. <sup>26</sup> Ko daahaannaar wurano bazinsa shaarinte dohon peen kallonsa gasandar kunate yivayse woam kosa dhabano shidhehe” kena ki hamade.

<sup>27</sup> Tabhi oyton sootinka Meditiranian bazinte wuranka gaalada wonin kupadhenka, sootin kiaddha laman bazindara sagadhen gonngalante waadadhayna eenana peensa gasandar kenin yeskaa ko maatade. <sup>28</sup> Ogonante bazinsa theeramon shedana zaani kenin dhabenka, kosa theeramono eedi oydi kaysa dhundhuma mia ko daaka ke haapade. Likka yivayse zaaninam kenin dhabenka, eedi makkam kaysa dhundhuma mia konin dohonam ke dhesade. <sup>29</sup> Seenindar konin thuqumoamadettsi kurtumbhayse gonngalanam woysea anngamo oydi os budobar bazinte ke dhabade; ogoraar peenin sedhoodettsi Barjoam ke miskade. <sup>30</sup> Gonngalante waadadhaynaar iira han-chate dhaqana zagayse gonngalanam woysen anngamon birante yinin dhabeadeettsi maatayse, likka gonngalaam bazindar ke hanchade. <sup>31</sup> Ogo wodanka Bhawloos mato

<sup>†</sup> 27:17 “Apala” hambhoono gonngalano bazindar jibarenka konin yivoadeettsi hayaynone.

alaqaabee poolisanabena “Igina bazindara sagadhen gonngalante waadadhayna eena gonngalante ke qolmina, yedi dhaqana damattene” kena ki hamade. <sup>32</sup> Ogonante poolisana likka gonngalaam bazindar hanchayse kinin yivoadettsi kiam yedon zaan-inam ke taxade.

<sup>33</sup> Peen sedhamba hayenka Bhawloos gala kenin itsoadettsi een wulam ki miskade. “Yer kala hattear itsima kinaka yedin kappaana roorona tabhi oydine. <sup>34</sup> Ogonante gala yedin itsoadettsi yeam ida miske; ogono yedin payya doadettsi koda haye. Hamin ko dahaakaar gaale kala hattear yedar yeskehe” kena ki hamade. <sup>35</sup> Ogoam yinin giyonsa budonte, balashan tiyayse een wulsa birante Barjoam ki gobshade; ogora balashanam qunthayse itsan ki yedade. <sup>36</sup> Ogo wodanka wul wocchimbhayse gala ke itsade. <sup>37</sup> Bazindara sagadhen gonngalante dahaana wodi eedi tabhi makkam kaysa apo tabhi laxne. <sup>38</sup> Yina yeekenam kenin itsonsa budonte, yinin bovon gazgonam bazinte dhabada gonngalansa dethamonam ke sholbhicchade.

### *Bazindara Sagadhen Gonngalanin Ayoono*

<sup>39</sup> Peen sedhaysaka yinin yeskon peenam dhesadehe. Ko dahaannaar bazinsa gasante dohon bazinin ulon uxaa raqaasa shaaminam shedayse, yi damidianna, bazindara sagadhen gonngalanam os iir kupana ke qaabade. <sup>40</sup> Gonngalanam woysen anngamonamaar bulayse bazindar ke garade. Ogo wodanka kanka yinin qanensa zaaninam ke bulade; pir birante dohon apalanam jibarendar tura woysayse bazinsa gasandar utota ke yivade. <sup>41</sup> Ko dahaannaar gonngalano bazina lamaana kinka kidar kenin kaamon raqinsa shaaminte dhambayse kosa wotino yedadhayse shoymino ko maatade; kosa budombar wuranin kupenna ayan ko yedade.

<sup>42</sup> Poolisanaar dhaxadhaana eenasa eedi kala hattear waaraada dhaqayse kenin yivoamadettsi keam deesana kinka ke qaabade. <sup>43</sup> Mato alaqa Bhawloosam dhacchana yinin zagonna, kesa bhocchinam ki marade. Waaran dhesayna eena birayse bazinte bhulayse waaraada gasandar kenin sagoadettsi ki giyade. <sup>44</sup> Shidhaana eenasa antina gonngalansa haaqanbee antina gonngalansa qunthimonbeam yedayse kenin yivoadettsi ki giyade; ogodettsi eena wul payyamoka peendar ke yeskade.

## 28

### *Bhawloos Malta Gidir Kinin Dohoono*

<sup>1</sup> Payyamonka peen wonin yeskonsa budonte, wonin yeskoono ranqo bazinsa shaarinte Malta hambhayno pee konin dohonam wo dhesade. <sup>2</sup> Peen ogote dohoono eenoar tarshea payya yer wona ke waadadhade; doobinin qanenka peenin qajonna nuu guttsayse wo wulam ke tiyade. <sup>3</sup> Bhawloosaar haaga kamayse nuundar kinin wodenka, nuunsa oydhamora dhaabhonka haaqansa iira guni qarshi utayse kisa aaninam gavayse ko ziitimade. <sup>4</sup> Kedi peen eenaar kisa aanindar gunin ziitimon yinin haapenka, kinka kikal “Kaa ea gon eedi deesaa eedine; bazira payyamoka utayse ki dhaqaakaar, pirdin imea barjo sadaka kinin doadettsi hayehe” ke hamade. <sup>5</sup> Ko dahaannaar Bhawloos guntaam aanira jugayse nuunte ki dhabade; yer siya kala hattear kidar yeskadehe. <sup>6</sup> Eena “Taaki saana kisa bishino koda ettse way diyayse kida dhambe” hamayse ke kaalade. Ko dahaannaar thoothi kinin shedenka kidar yer siya kinin haapaamonna, “Kaa eedi dayma, barjone” hamayse qaabonam yisa ke ookade.

<sup>7</sup> Agaa raqakal theedi Malta peensa hayoa Pupiliyoos hambhea easa haami ko dahade; kidi woam chocchayse rooro makkamna payyamoka ki tiyade. <sup>8</sup> Pupiliyoossa imbaar bishi occheabee haarintebeka hajadhayse wodhayse ki dahade. Bhawloosaar kikal ardayse Barjoam ki miskade; aaninam yisa kidar wodayse kiam ki pacchade. <sup>9</sup> Ogo yin konin maatonsa budonte, shidhaana bazinsa shaarinte dohon peente hajadhaana eena wul Bhawlooskal nivaate keda paashe. <sup>10</sup> Thoothi goytika woam ke gobshade; yivana wo dhaabhaysakaar bazindara sagadhen gonngalante wona zasken yer ke wodade.

### *Bhawloos Maltara Roomedar Kinin Dhaabhoono*

<sup>11</sup> Arpi makkamsa budonte, barginka ogo Maltar kappon Iskindira katamara nivon bazindara sagadhen gonngalaka wo dhaabhade; gonngalandar Diyosqoroossa\* milkit daran ko dahade.

<sup>12</sup> Sirakus katamante wodi yeskayse rooro makkam gidir wo dooqade. <sup>13</sup> Ogoraar dhaabhaye Regiyum katamante wo yeskade. Ogotear rooro kalaa wonin haaqonsa budonte, hayn utensa mizaqimbar jibarenin jibarshenna lansoa rooroaka Putiyolos katamandar wo yivade. <sup>14</sup> Ogotear Barjodar woylamin qajayna eenaam wo haapade. Kediar rooro tobbhaa wonin kekal dooqoadettsi woam ke miskade. Ogora Roomedar wo yivade. <sup>15</sup> Barjodar woylamin qajayna wosa qansayse Roome katamara dhaabhaye Apiyoos Gabanbee “Wodhintan Onna Makkam” hambhen raqinbeka yekka woam tiyana ke nivade. Bhawloosaar keam yinin haapenka Barjoam ki gobshade; kidiar yisa woylaminka ki wocchimbhade.

### *Bhawloos Roome Gidir Kinin Dohoono*

<sup>16</sup> Roome kataman wo yeskaysaka, Bhawloosam toolea poolisabee kimbe bish kenin doadettsi ko giidhade.

<sup>17</sup> Rooro makkamsa budonte, Bhawloos Ayiwd eenasa gembha eenaam yikal ki eelade. Ke bukaysaka kena yin ki giyade: “Imbanaanato, inta wosa eenaam way wosa eykenasa dambinam jibbayse yer kala hattear i hayma Yerusaalemir inin dhaxad-hoadettsi Roome eenasa aaninte yettsayse iam ke imade. <sup>18</sup> Kedi Roome eena payya kenin marmarenka, dembhina yeskisea yer idar qolmonna, iam bulana ke zagade. <sup>19</sup> Ayiwd eena ‘Kiam buleebhode’ hamayse ke giyaysaka, inta ‘Roome peen bitaadar iam yittsee’ hamayse inin giyayno yer shidha shidhimino ko maatade; ko dahaannaar inta isa eenaam inin bersea yer qolehe. <sup>20</sup> Ogonante yeam shadanabee yembesana kinka dhalqanabe yeam i eelade. Inta ko sansalanka inin dhaxadhoono Barjo Israveel eenana ‘yena imayda ime’ kinin hamon upsin goynka kidar qaabe inin hayonnane” kena ki hamade. <sup>21</sup> Kediar “Wodi hasa Yiwda peera warqat tiyootone; wosa imbanaanasa kala hattear wokal nivayse hannon goynsa siya yer wona giyadehe. <sup>22</sup> Kono hanin bovon eenin yindar woylamin qajen goynam hamote ko hannaar, ‘siyane’ hamayse eenin giyenam wodi dhesidine; ogonante hasa bhocchinam qansana zagooda zage” kina ke hamade.

<sup>23</sup> Aan kina qunthayse thoothi maatayse kinin dohon raqinte kikal ke nivade; kidiar burira yedayse ibanenka yekka, Barjosa bitamon goynsa kena tarjada Yesussa kenin tipisoadettsi Musesa yiggirabee Barjokala qansayse eenna giyaynasa mathaapirabe kena ki dhettsade. <sup>24</sup> Waani waani eena kinin giyenam gonne ke hamade; waani eena gonne hamana nashadehe. <sup>25</sup> Kinka yinin agaamonna, Bhawloos yer kalaa kena kinin giyonsa budonte yivana ke dhaabhade. Ogono kinin giyoonoar yinne: “Manpas Gazano Barjokala qansayse eenna giyea Isiasbar ena birayse yesa eykenana konin giyoono gonne. <sup>26</sup> Ogonoar

‘Eena iginakal yivayse,  
“Qanseeda qanse, bhocchattene;  
shedeeda shede, haapattene” kena hamaa.

<sup>27</sup> Aapinka kenin shedoamadettsi,  
qaaminka kenin qansoamadettsi,  
woylaminka kedi qaabayse idar ke maataysaka  
intaar keam pacchoamadettsi,  
eena kinasa woylammo duuididine;  
qammoor kesa qansehe;  
aapinamaar kedi cumbhidine’

\* **28:11** “Diyosqoroos” hambhayno Girik aponka “mentina barjona” hamintane. **28:27** Isi 6:9-10.

hamayse ena ko guyade. <sup>28</sup> Keeda ogo Barjosa dhacchintan upsino Ayiwdtay hamma eenakal yittsadhonam dhesee; kediар qansa ke qanse” kena ki hamade. <sup>29</sup> [Koam ki guyaysaka Ayiwd eena kinka kinka kattsi palimada ke yivade.]

<sup>30</sup> Bhawloosaar koymo kashaate yinin dohon ooninte leve lamaa ki dooqade; kikal nivayna eena wulam wozaka yikal ki tiyade. <sup>31</sup> Eedi hayyear kiam marima Barjo bitamonsa guyada Imbaa wontea Yesus Kiristoossa may dhettsite ki dahade.

## Kiristoos Yisa Tarjamonnante Kinin Yittsaa Bhawloos Roome Eenana Kinin Thaapoono Warqanno

### *Ardinta*

Betelemir qolen gishaynana giidhoono een wulna maatayno kattsi wozisayno upsino zarsinam dhacchota nivaasa ko giidhade. Bhawloos Roome eenana kinin thaapon warqatinte ogono dhaqintano har konin dohonam giyaate wona may may kida dhettse. Ogoam kinin thaapoonoar 47-50 levensa iintene.

Bhawloos thoothi levera yedayse Roomer dahaana Barjodar woylamin qajaynaam shedana anngarma kisa dahade (15:23). Woylamin kesa qajidinka kenin wocchimb-hoadettsi Barjosa upsinam kena giyana ki zagaakaar Roomer yeskana damadehe (1:11-15). Barjosa dhacchintan upsinam workisota kinin yivon makkanso goyt Qorontoos katamara dhaabhota yinin hayenka, ogo warqatinam thaapayse Kinkiria misken oon-inte waadadhene Peeben aaninka kena yittsima garadehe (16:1-2).

Ogora rooro likkasa budobar Yerusaalem gidir kiam yedate ko dhaxadhade (Yi Waa 21:27). Ogora thoothi raqir kidar yeskon gaalenka dhaxi eed maatayse Roome katamanam ki yeskade (Yi Waa 28:14-16).

Mathaapinsa aapea dhalqa baza kashayse dhacchinta hameane (3:24). Kaa mathaa-paam raq lankaydar kashana dandima ko dandime:

1. Nagaymakkobee Barjoam miskintabe (1:1-17)
2. Seeson goynsa: Eenam dhacchota baza kasha zaskayno (1:18-3:20)
  - a) Ayiwdtay hamma eenasa seesono (1:18-2:16)
  - b) Ayiwd eenasa seesono (2:17-3:8)
  - c) Een wulsa seesono (3:9-20)
3. Barjosa birante tipa maatintan goynsa: Eenam dhacchota baza kashadhoono (3:21-5:21)
4. Gazamon goynsa: Eenam dhacchota kashadhon bazansa biraa aapea (6:1-8:39)
  - a) Kiristoosbesana kalaa maatinta (6:1-23)
  - b) Lamaana dantanasa palimeno (7:1-25)
  - c) Manpas Gazanka seesobee dembhibeam bashinta (8:1-39)
5. Ayiwd eenabee Ayiwdtay hamma eenabe goynsa: Keam dhacchota kashadhon bazansa gembhakon workamono (9:1-11:36)
  - a) Israveel eenasa gonin hammo eerino: Barjo seesondar kinin pirdoono (9:1-33)
  - b) Israveel eenasa taaki dantano: Barjo keam dhacchota kinin nashoono (10:1-21)
  - c) Israveel eenasa os birante dohoono dantano: Barjo keam maasate yinin dhac-chenna malla kinin ardoono (11:1-36)
6. Waadiman goynsa: Eenam dhacchota kashadhon bazansa macchino aapino (12:1-15:13)
7. Bhawloos Roome eenam shedota kinin zagoono (15:14-33)
8. Bhawloossa macchin dhalqino (16:1-27)

<sup>1</sup> Kiristoossa tarjamonnante yittsadhaa maatayse Barjosa dhacchintan upsinam giyana kamayse eldhaa, Yesus Kiristoossa waadima eedi maataa i Bhawlooskalanka nittsadhoono warqannone. <sup>2</sup> Ogono Barjosa dhacchintan upsino Barjokala qansayse eenna giyaynasa Mathaap Gazante birayse “yena imayda ime” hamayse kinin imoono qaabe wonin hayayno upsinone. <sup>3</sup> Ogono Barjosa dhacchintan upsino kisa Naasasa giyaynone. Kisa Naasaar waanka Dawtsa muldhara ki adhadhade; <sup>4</sup> Gazamon Man-pasinka dembhira dhaabhintaka gebhi kantaka Barjo Naasi maatayse ki haapadhade; agaa kidi wosa Imbaa Yesus Kiristoosne.

<sup>5</sup> Inta kisa tarjamonnante yittsadhaa maatana Barjosa sunin imintonam i tiyade; ogonoar kisa naabenna hamayse zarsin wulsa iira kidar woylamin qajayse Barjona ee kenin hamoadettsi keam ida\* haye. <sup>6</sup> Kesa shaarira yedi Yesus Kiristoossa yenin doadettsi Barjoyn elalaana eenane. <sup>7</sup> Ogonante Roome katamante dahaana Barjoyn nashaynabee gazamonna eldaana eena wulbena nittsadhoonone. Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Barjoam Gobshaate Miskinta*

<sup>8</sup> Barjodar woylamin yenin qajayno peen wulir dhesimaate konin dohonna, yer wulsa birayse Yesus Kiristooska ye wulna Barjoam ida gobshe. <sup>9</sup> Kisa Naasasa dhacchintan upsinam eenna giyaate isa woylam wulka Barjona ida waadadhe. Roro wul Barjoam inin miskenka inin yeam bhocchensa Barjo isa tarjane. <sup>10</sup> Ta keeda macchi yekal nivana Barjosa qaabo konin doadettsi Barjoam rooro wul ida miske. <sup>11</sup> Harrna hambidianna, Barjodar woylamin qajintaka yenin wocchimbhoadettsi yeam hayen manpasin imintora yena kashana inin zagenna yeam shedana ida anngardhe. <sup>12</sup> Yin inin giyoono inta Barjodar woylamin yenin qajen goynsa, yediar isa Barjodar woylamin qajintan goynka kinka kinka wonin wocchimbhoadettsine.

<sup>13</sup> Imbanaanato, waani Ayiwdtay hamon eensa shaarinte inin dhettsenka Barjodar woylamin qajaynaam inta haapidine; ogodettsi yeamaar dhettsayse yesa shaarinte Barjodar woylamin qajaanasa aapinam haapota ida zage. Ogona yekal nivana thoothi woda inin qaabenka, ta koka yekka yekal nivana wodanin isa qolmonam yenin dhesoadettsi ida zage. <sup>14</sup> Gilon payyan dhesaynabee dhesiminabe, pir timmiraanabee timmiraammabena Barjosa dhacchintan upsinam kena guyana baza idar daane. <sup>15</sup> Ogonante Roome gidir dahaana yenaar Barjosa dhacchintan upsinam guyana ida anngardhe.

### *Dhacchintan Upsino Barjosa Kantano Konin Dohoono*

<sup>16</sup> Inta Barjosa dhacchintan upsinka ooshimbhattine. Harrna hambidianna, birayse Ayiwdtay hamma eenana, Barjodar woylamin qajayna wulkenin dhaqoadettsi Barjosa kantanone. <sup>17</sup> Ogonoar Barjo yisa birante eediam tipa kinin maasayno birara yedayse macchinka yekka kidar woylamin qajintaka konin dohonam Barjosa dhacchintan upsino may koda giye. “Barjo birante tipa ea Barjodar woylamin qajintaka sadanam kida haape” hamayse thaapadhondettsine.

### *Eensa Seesonka Nivayno Barjosa Wacimeno*

<sup>18</sup> Yisa seeson waadimanka gonin dhesimoamadettsi marayna Barjobee eenbeam kenin genen wulka Barjosa wacime cecira kedar may ko nivade. <sup>19</sup> Harrna hambidianna, Barjo yinnon goynsa dhesana kenin damenam kena yinti may kinin dhohonnan. <sup>20</sup> Peen pijadhorra yedayse eenna haapadhimo Barjosa dantano, ogonoar lay dehen kisa kantanbee Barjo kinin dohonbe kinin pijaana yerra goynka may maatayse haapadhidine. Ogonante eena dhesayse seeso kenin waadadhonna, yer kenin giyea qolehe. <sup>21</sup> Harrna hambidianna, kedi Barjoam dhesayna dahayse zasken gobshinam kina imadehe; kisa waadimannaar kiam gobshadehe. Bhocchinka yisa pootmina ke maatade; kesa qaabimino woylammoar ko thipade. <sup>22</sup> “Wodi pakalla eenane” hamayse malgimma eena ke maatade. <sup>23</sup> Roro wul dehea Barjoam kenin gobshen garayse, diyayna pijadhina: eedibee, aptibee, rooysa oydi dahaanabee, peendar gochimayna pijadhaanabeam kamayse kenin ashkaana barjonana gobshin ke imade.

\* <sup>1:5</sup> Bhawloos Girik peen aponka kinin thaapenka, “ida” hamenam “woda” ki hamade. <sup>1:17</sup> Imbaqom 2:4.

<sup>24</sup> Ogonante kinka kiam kiam ooshinsea yer kenin waadadhadettsi Barjo kesa woylaminsa anngarmandettsi minngin yerinna keam ki garade. <sup>25</sup> Ogonoar Barjosa goninam buudanka ookayse pijaa Barjosa oolonte pijadhaanana kenin goodimonnabee kena kenin waadadhonnabene. Pijaa Barjo lay gobshadhaane, amiin. <sup>26</sup> Ogonante Barjo ooshinsen anngarmanna keam ki garade. Kesa maanaar pijadhinsa dambindettsi anngika wodhadhenam garayse pijadhinsa dambindettsi dayma dambi abka ke ookade. <sup>27</sup> Ogodettsi anngina taar pijadhinsa dambindettsi maaka wodhadhenam garayse kinka kinka wodhana kattsi ke anngardhade. Ogonante anngina annginaka kinka ooshinsenam ke waadadhade; siyon kesa waadimankaar kedar yesken dhabinam yisa waandar ke bavade.

<sup>28</sup> Eena Barjoam dhesana kenin zagaamonna, zaskimina yerraam kenin waadadhadettsi Barjo pootimon qaabenna keam ki garade. <sup>29</sup> Eedibee Barjobedar seeso waadiminta, “Yer wul ina ko dee” haminta, siyamo, wooginta, eediam deesinta, jibbinta, eediam taysinta, siya qaabi, iginawulka kedi thoothidine. Yin pir wupon giyayna, <sup>30</sup> eensa naabenam genayna, Barjoam jibbayna, eediam ooshinsayna, poorimbhayna, erimayna, siyon waadiman haalin bulayna, yisa imbanana ee hamimina, <sup>31</sup> bhocchimina, yidar woylamin qajadhimina, nashimmakkoysa qolmina, eenna burqadhimina eenane. <sup>32</sup> “Yerra iginam waadadhaynana dembhi keam koda zaske” hamayno Barjosa yigginam dhesa ke dhese; ko hannaar koam waadadhinta bish dayma, yin waadadhaynaam shawkintaka keda wocchinse.

## 2

### *Barjosa Pirdino*

<sup>1</sup> Ogonante ya eedi abdar pirdea ea, yer hanin giyea qolehe; ya kidar hanin pirdenka, hadar hada pirde. Harrna hambidianna hadar pirdea easa waadimandettsi hada waadadhe. <sup>2</sup> Ogodettsi seeso waadadhaynadar Barjoyn pirdayno pirdino gon konin maatonam dhesooda dhese. <sup>3</sup> Ya ea kaa, ogoam waadadhayna eenadar hanin pirdenka, kenin waadadhenam hanin waadadhenna, Barjosa pirdira hanin dhagea hana maata ko maato? <sup>4</sup> Ya Barjosa lemmakkonbee, damintanbee, darshintanbesa thoothamonam ha bago? Hasa seeson waadimanam garayse Barjodar hanin maatoadettsi Barjo yisa lemmakkonka haam kinin entsenam ya dhesattanu? <sup>5</sup> Yaar “Isa seesonam garayse Barjodar maatattine” hamayse hanin giyonbee ee hamima hanin dohonbena Barjosa wacimenbee kisa tipan pirdinbe haapadhen wodanka, Barjosa wacime hadar konin thoothoadettsi hada haye.

<sup>6</sup> Barjo een wulna ke kalaa kalaanana kesa waadimandettsi bazanam kida ime. <sup>7</sup> Payyan waadimanka wocchimbhintaka shawkadhintabee, gobshadhintabee, kaymon sadanbeam zagayna eenana Barjo lay dehen sadan kida ime. <sup>8</sup> Yinnon metenna bish bhocchaynabee gonin yerinam garayse siyon yerinam waadadhaynabedar Barjosa wacimebee ashimebe koda yeske. <sup>9</sup> Birayse Ayiwd eenadar, ogora Ayiwday hamma eenadar siyon yerinam waadadhayna wuldar gaalebee bucchea qaabebe kedar koda nive. <sup>10</sup> Ko dahaannaar birayse Ayiwd eenana, pir Ayiwday hamma eenana, payya waadadhayna wulna shawkadhabee, gobshadhabee, payyamonbeam kena koda imbhe. <sup>11</sup> Harrna hambidianna, Barjo eedisa wotiam shedayse pirdehe.

<sup>12</sup> Musesa yiggin kekal qolma seeson waadadhaana wul yiggin qolma kaya ke kaye. Musesa yiggin dhesayna seeson waadadhaana wul yigginka kedar koda pirdadhe. <sup>13</sup> Harrna hambidianna, Barjo birante tipana maatayna eena yigginam waadimadar hacchaynane; yigginam qansayse waadimadar hacchiminatehe. <sup>14</sup> Musesa yiggin qolmina Ayiwday hamma eena yisa pijadhinka yigginin giyayna yerram kenin waadadhenka, Musesa yiggin qolminaar yisa meteka yigginka waadadha zaskenam

kenin dhesenam keda eshke. <sup>15</sup> Ogonoar Musesa yigginin guyayno yerro wul kesa woylaminte thaapadhoono konin maatonam keda dhee; tapir kesa meskeno ogoam koda tarje. Harrna hambhidianna, kesa meskenin bhocchen yerin goynka waani waaniyatana kesa bhocchinam koda kaame, waani waaniyatana keam koda keedhe. <sup>16</sup> Ogonoar yin konin maatayno inin guyayno Barjosa dhacchintan upsindettsi Barjo Yesus Kiris-toosbar eeno yisa woyleminka konin aachon yerindar kinin pirdea rooroakane.

### *Ayiwd Eenabee Musesa Yigginbe*

<sup>17</sup> Ya “Inta Ayiwd eedine” hada hame; Musesa yigginkaar keedhimaada keedhime; Barjokaar erimaada erime. <sup>18</sup> Ya Barjosa bhocchinam dhesaada dhese; Musesa yigginam hanin dhesenna, payyan yerin haydhenam dhesaada dhese. <sup>19</sup> Ya “Aapin kayaana eenaam inta entseane, thipante dahaanasaar inta shaakane” hada hame. <sup>20</sup> “Timmiribee goninbe yisa iir thoothon yigginin isa dohonna, dhesiminaam ida dhettse; yisa bhocchinka naasidettsi maataanaamaar dhettssayda dhettse” hada hame. <sup>21</sup> Ta keeda ya waani eenaam dhettsea, haam dhettssattanu? “Dimmaabhode” hamayse ya guyada diibaa diibo? <sup>22</sup> “Sharmucimaabhode” hamayse ya guyada sharmucimaa sharmucimo? Aaninka ashkadhaana barjonaam miskadhenam ya bagea dahayse, aaninka ashkadhaana barjonasa onnaam buuraa buuro? <sup>23</sup> Ya Musesa yigginkar erimea, yigginam garintaka Barjoam ha irso? <sup>24</sup> Ogonoar “Yennon goynka Barjosa naabeno Ayiwdtay hamma eenasa shaarinte koda irdhe” hamayse thaapadhondettsine.

<sup>25</sup> Yigginam toolea hanna, qaaman hanin taxadhadyno koda poote; yigginam toolima hanna, qaamanam hanin taxadhoono qaama hanin taxadhaamadettsi koda paydadhe. <sup>26</sup> Ta keeda yisa qaaman taxadhaama ea yiggin giyenam toolea ki hanna, yisa qaamanam kinin taxadhaammo qaaman kinin taxadhaadettsi kina paydadhayu? <sup>27</sup> Ya thaapadhon yigginsa goynka hasa qaamanam taxadhaa dahayse yigginam toolima ha daana, yisa waanka qaamanam taxadhaama dahayse yigginam toolea hadar kida pirde. <sup>28</sup> Harrna hambhidianna, naabenna bish Ayiwd eedi maataa gon Ayiwd eedithe; yin pir aapinna haapadhadyno qaamanam taxadhinta gon qaama taxadhintatehe. <sup>29</sup> Gon Ayiwd ea yisa iinka Ayiwd eedine. Gonin qaamanam taxadhintano Barjosa Manpasinka woyleminka qaamanam taxadhintane; Musesa yigginte thaapadhoono qaama taxadhintatehe. Ogodettsi maataa ea gobshinam kinin tiyayno Barjokalankane, eedikalankatehe.

## 3

### *Barjosa Gonamono*

<sup>1</sup> Ta keeda Ayiwd eenwaani eenkala kenin sagayno harkane? Qaama taxadhintano har ko poote? <sup>2</sup> Ayiwd eedi maatano thoothi goytina koda age: Birayse Barjo yisa upsinnam Ayiwd eenana elqimayse ki imade. <sup>3</sup> Ta keeda Ayiwd eenasa shaarira waani eenagaon maatayse ke haapadhaamma, kenin gon maataamon goynka Barjosa gonamono shidhok? <sup>4</sup> Shidhehe!

“Hasa dhalqinka tipa eedi hada maate;  
haam jibbeamara pirdinka hada bashe”

hamayse thaapadhondettsi, eedi wul buuda eedi ko dahaakaar, Barjo gon hamaane.

<sup>5</sup> Ko dahaannaar wosa wobamon waadimano Barjosa tipamonam dhehea ko hanna, ta keeda hamino giyo? Wosa wobamon waadimanna wodar kinin wacimenka Barjo tipa pirdeatehe wosa hamintaw? (Inin yin guyayno eedisa qaabedettsine.) <sup>6</sup> Yintehe! Yin ko hanna, Barjo peen kodar dahaana eenadar hamin ki pirde? <sup>7</sup> Ko dahaannaar isa buudamono Barjosa gonamona eshkaate kisa gobshin thoothamonam dhehea ko hanna, ta seeso yindar dahaan eedidettsi maasayse idar harrna ko pirdadhaa? <sup>8</sup> Waani

eena "Bhawloos 'Payya yer haapadhoodettsi, yer siya wo haye' hamayse kida dhettse" hamayse isa naabenam keda gene. Ogonante kedar yeskayno pirdino tipane.

### *Eedi Wul Seeso Konin Waadadhoono*

<sup>9</sup> Ta keeda wodi Ayiwd eena Ayiwdtay hamma eenadara sagoo sago? Sagattone. Ayiwd eenabee Ayiwdtay hamma eena wulbe seesonsa hayamon demente kenin maatnam birayse inta giydine. <sup>10</sup> Yin giyayse thaapadhondettsine:

"Eedi tipa kala hattear solehe.

<sup>11</sup> Bhocchea solehe;

Barjoam zagea solehe.

<sup>12</sup> Wul Barjosa goyra utidine;

kinka maatayse kedi wul pootimina ke maatade;  
payya yer hayea eedi kala hattear solehe.

<sup>13</sup> Kesa apono bulimaa duuki oolodettsine;

atabhin yinnonkaar eediam keda tayse;  
kesa apora utayno dhalqinoar gunisa davinidettsine.

<sup>14</sup> Kesa apono ashimebee thaqima dhalqbeka thoothoonone.

<sup>15</sup> Kesa roono eediam deesana gibaynone.

<sup>16</sup> Kesa goyndar haapadhayno kayebbee gaalebene.

<sup>17</sup> Payyamona goynam dhesehe.

<sup>18</sup> Barjona hamin ko dahaakaar kurtumbhehe"

hamayse thaapadhidine.

<sup>19</sup> Yigginsa upsinin giyayno yigginsa demente dahaanana konin hamenam dhesooda dhese. Ogo goynka eeno yinin erimenam bashadhayse lay koda hame; peen kodar dahaana wul Barjo pirdinsa demente keda maate. <sup>20</sup> Ogonante eedi hayyear Barjo birante Musesa yigginam toolintaka tipa eedi maatehe. Harrna hambhidianna, seeso yigginka koda dhesadhe.

### *Barjodar Woylam Qajintaka Haapadhayno Tipamono*

<sup>21</sup> Taaki Barjo yaggi qolma eedi kisa birante tipa eedi kinin maasoono goyno ko haapadhadde; ogoam Musesa yigginbee Barjokala qansayse eenna giyaynabe tarjidine.

<sup>22</sup> Yesus Kiristoosdar woylamin qajayna eenaam Barjo kesa shaarinte edime hayma wulam tipana eena kida maase. <sup>23</sup> Harrna hambhidianna, eedi wul seeso waadadhidine; Barjosa gobshinamaar kedi joshkidine. <sup>24</sup> Ogonante eenna Yesus Kiristoos bazanam kashayse kosa seesora koam kinin dhacchon goynka, Barjo kisa sunin imintonka tipana eena kida maase. <sup>25</sup> Yesus Kiristoosdar woylamin qajayna wul kisa zombhinka seeson yinnonna garintonam kenin haapoadettsi, Barjo Yesus Kiristoosam seesosa marsha hayayse ki imade. Barjo ogoam kinin hayoono birayse dohon seesonam wacimima kinin garon goynsa, kidi yisa tipamonam dhaanane. <sup>26</sup> Barjo ogoam yin kinin hayoono, kidi tipa kinin dohonbee Yesusdar woylamin qajaynaam tipana eena kinin maasen-beam ta wodan koka dhaanane.

<sup>27</sup> Ta keeda kanka wonin erimayno yer hare? Yer kala hattear solehe. Wonin erimiminosin harrnane? Wonin tipana eena maatoono yigginam toolintakaw? Yin-tehe! Kiristoosdar woylamin qajintakane. <sup>28</sup> Ogonante Musesa yigginam toolintaka dayma, Kiristoosdar woylamin qajintaka tipa eedi maatadhenam woda dhettsise. <sup>29</sup> Ta keeda Barjo Ayiwd eenasa bish Barjow? Ayiwdtay hamma eenasa pir Barjotay? Gon Ayiwdtay hamma eenasa Barjone. <sup>30</sup> Barjo kalaa kinin dohonna, Ayiwd eena Yesus Kiristoosdar woylamin kenin qajenna, Ayiwdtay hamma eena kidar woylamin kenin qajen goynka, ke wulam kidi tipana eena kida maase.

<sup>31</sup> Ta keeda Kiristoosdar woylamin qajadhen goynna yigginam wo shiisho? Yintehe! Kalon yigginam woda wocchinse.

## 4

### *Abraam Barjodar Woylamin Qajintaka Tipa Eedi Kinin Maatoono*

<sup>1</sup> Ta keeda wosa eykea Abraam har ki haapaa kiam wo hamo? <sup>2</sup> Abraamin tipa maatoono waadimaka ko hanna, ini kinin erimea yer daane; ko dahaannaar kidi Barjo birante erimana damehe. <sup>3</sup> Harrna hambhidianna, “Abraam Barjodar woylamin ki qajade; ogonante Barjo kiam tipa ea hamayse ki paydade” hamayse Mathaap Gazante thaapadhidine. <sup>4</sup> Waadiman waadadheana imbhayno kinin waadadhonsa damoozne; imintodettsi koam paydadhehe. <sup>5</sup> Waadiman waadadhima ear, seeson eenaam tipa eedi maasea Barjodar woylamin qajea ki hanna, Barjodar woylamin kinin qajonna Barjo kiam tipa hayayse kida payde. <sup>6</sup> Dawtaar eedi kalaa payya waadima ki waadadhima Barjoyn kiam tipa hayayse paydea ea hamin gobshadhaa kinin dohonam giyana yin ki guyade:

<sup>7</sup> “Kenin genonam kena gardhaana,  
pir seesoya kaysadhaana eena gobshadhaanane.

<sup>8</sup> Barjoyn seesonam paydima ea gobshadhaane”  
ki hamade.

<sup>9</sup> Ta keeda ogono gobshino qaaman taxadhaanana bishimoo, taxadhaammanaw? “Abraam Barjodar woylamin kinin qajonna, Barjo kiam tipa ea hamayse ki paydade” wodi hamidine. <sup>10</sup> Ta keeda Barjo kiam tipa ea hamayse kinin paydoono haane? Qaaman kinin taxadhonsa biraysemoo, qaaman kinin taxadhonsa budontew? Qaaman kinin taxadhonsa biraysene, kinin taxadhonsa budontetehe. <sup>11</sup> Abraam akar qaaman yinin taxadhensa birayse Barjodar woylamin yinin qajenka kinin haapon tipamonam tipisea milkit konin doadettsi qaaman ki taxadhade. Ogonante Abraam qaaman taxadhima Barjodar woylamin qajayna eena tipane hamayse kinin paydadhoodettsi ke wulsa imba ki maatade. <sup>12</sup> Pir ogodettsi Abraam qaaman taxadhaanasa imbane; kesa imba kinin dohoono qaaman kinin taxadhonna bish dayma, kidi qaaman taxadhima birayse Barjodar woylamin qajintaka kinin dehendettsi, kedar ogodettsi Barjodar woylamin kinin qajonnane.

### *Barjodar Woylamin Qajadhensa Imbhoono Qaabe Haydhayno Upsino*

<sup>13</sup> Abraam yisa muldhahabesana peen wulam kinin tiyendettsi Barjo qaabe yindar haydhea upsi kina ki guyade. Ogoro upsino konin haapadhayno Abraam yigginam kinin toolonna dayma, Barjodar woylamin qajidinka kinin haapon tipamonkane. <sup>14</sup> Qaabe yindar haydhen upsinam tiyayna eena yigginam toolayna ke hanna, Barjodar woylamin qajintano pootiminone; Barjosaar qaabe yindar haydhayno upsino sun shidhidine. <sup>15</sup> Harrna hambhidianna, yiggin waadimano konin bavayno Barjosa wacimenamne. Yiggin qolmina, “Yigginam kottsidine” hambhea yer qolehe.

<sup>16</sup> Ogona Barjosa qaabe haydhayno upsino kidar woylamin qajadhendar ko woyade; ogono upsino Abraamsa muldhana wulna Barjosa sunin imintonka kena konin imbonam ogoka dhesadhidine. Ogonoar Abraamsa muldhana yigginam toolaynana bish dayma, Abraamdettsi Barjodar woylamin qajayna eena wulnane. Harrna hambhidianna, Abraam Barjodar woylamin qajadhen goynka wo wulsa kidi imbane. <sup>17</sup> Ogoro yin konin dohoono “Thoothin zarsinsa imba haam inta haydine” hamayse thaapadhondettsine. Ogonante diyaanana sadan imea, qolmonam konin doadettsi hayea Barjodar woylamin kinin qajonnane.

<sup>18</sup> Abraam “Naasi ida adhe” hamayse kinin qaabe hayaamon wodanka, Barjoyn kina giyonna Abraam “Naasi ida adhe” hamayse Barjodar woylamin ki qajade. Ogonante “Hasa muldhano yin koda thoothe” hamayse giidhondettsi, thoothin zarsinsa imba ki maatade. <sup>19</sup> Abraamsa lendho eedi dong kaysaaddha konin maatenka, waanka gecchayse naasi kinin adhiminbee geshono kisa Saara seeki konin maatonbeam yi dhesaakaar, Barjodar woylamin yinin qajenka ki wocchimbhade, qajadhadhehe. <sup>20</sup> Barjoyn “Hayayda haye” hamon upsindar woylamin qajattine hamayse hamin ko dahaakaar qothimadehe. Barjodar woylamin yinin qajenka wocchimbhaa maatayse Barjoam ki gobshade. <sup>21</sup> Harrna hambhidianna, Barjo kinin imon upsinam thoosana kinin damenam yinin dhesonnane. <sup>22</sup> Barjoyn kisa woylamin qajidinam tipane hamayse paydoono ogonantene. <sup>23</sup> Ko dahaannaar, “Kiam tipane hamayse ki paydade” hamen upsinam thaapadhoono Abraamna bish dayma, <sup>24</sup> pir wonaar thaapadhidine. Wosa Imbaa Yesusam dembhira dhaasaa Barjodar woylamin wonin qajenka, Barjo woamaar tipanane hamayse payda ki payde. <sup>25</sup> Imbaa wontea Yesusamaar wosa seesonna saskate dembhingga ko imbhade; pir Barjo woam tipana hayanna kiam ki dhaasade.

## 5

### *Barjodar Woylamin Qajintaka Haapaden Payyamonbee Qaashimenbe*

<sup>1</sup> Ta keeda wodi Barjodar woylamin qajintaka kisa birante tipana eena wonin maatonna, wosa Imbaa Yesus Kiristooska Barjobesana payyamoka wo dahade. <sup>2</sup> Kiristooska kidar woylamin qajintaka kanka Barjosa sunin imintondar ardadhenam wodi haapidine; taar kisa sunin imintonka wocchimbhayse woda woye. Barjosa gobshinamaar kashimayna maatana kidar qaabe hayada woda erime. <sup>3</sup> Ogo bish dayma, wosa gaalenkaar erimooda erime; harrna hambhidianna, gaalera darshinta, <sup>4</sup> darshintaraar wocchimbhinta, wocchimbhintaraar qaabe haydhenin haapadhenam dhesooda dhese. <sup>5</sup> Barjoyn wona imon Manpas Gazanka yisa nashimmakkonam wosa woylaminte kinin thoosonna, ogodar qaabe hayano woam ooshinsehe.

<sup>6</sup> Kantaysa qolmina eena maatayse wo daaka, Barjo kinin giyon wodanka, Kiristoos seeson eenana ki diyade. <sup>7</sup> Tipa easa oolonte diyea eediam haapano kattsi gaalene; ko dahaannaar payya hayea easa oolonte diyana zagea way haapadhasane. <sup>8</sup> Ko dahaakaar wodi akar seeso eedi wo daaka, Kiristoos wona ki diyade; ogonoar Barjo wona yisa dohon nashimmakkonam ki dhahade. <sup>9</sup> Ta keeda Yesus Kiristoossa zombhinka Barjo birante tipana eena wo maatidianna, taar sagi kanka Barjosa wacimera dhaqooda dhaqe. <sup>10</sup> Harrna hambhidianna, wodi Barjoam jibbayna wo daaka, Barjo Naasasa dembhinka kanka wo qaashimianna, taar sagi kisa Naasasa sadanka dhaqooda dhaqe. <sup>11</sup> Ogo bish dayma, qaashimenam woninka haapaa wosa Imbaa Yesus Kiristoos goynka Barjoka woda erime.

### *Dembhi Addaamka, Sada Kiristooska Konin Nivoono*

<sup>12</sup> Ogonante eedi kala goynka seeso peen kodar ko nivade; seesonkaar dembhi ko nivade. Ogona eedi wul seeso konin waadadhonna, dembhi een wuldar ko yeskade. <sup>13</sup> Harrna hambhidianna, Musesa yigginam imbhenka yekka seeso peendar ko dahade; ko dahaannaar yigginin qolmonna, seesono paydadhehe. <sup>14</sup> Addaamsa seesondettsi seeson waadadhaamma ke hannaar, Addaamra yedayse Museka yekka dahaana eena wuldar dembhi ko bitimade. Kaa Addaam os birante nivea Kiristoossa kamsine.

<sup>15</sup> Ko dahaannaar Barjosa sunin imintono eensa seesondettsitehe; ea kalaasa seesonka thoothino eeno ko diyaakaar, ea kalaa Yesus Kiristoossa imintonka haapadhoono Barjosa sunin imintono thoothin eenna sagi ko thoothade. <sup>16</sup> Barjosa sunin imintonka haapadhonbee eedi kalaasa seesonka haapadhonbe kiaddhatehe. Eedi kalaasa seesonka haapadhoono pirdino Barjosa wacimenam ko bavade; thoothin eensa seeson goynka imbhoono Barjosa sunin imintono eenna tipamonam ko bavade. <sup>17</sup> Eedi

kalaasa seesonka dembhi een wuldar bitimidi ki hanna, taar sagi Barjosa sunin imintonsa thoothamonbee kinin imen tipamonbeam tiyayna wul kalaa Yesus Kiristooska bashaana maatayse sadaka keda dee.

<sup>18</sup> Ta keeda seeso eedi kalaaka dembhisa pirdi een wuldar konin bovondettsi, kalaa Kiristoossa tipamon waadimano een wulna tipamonam koda beve; ogoka Barjo birante sadanka dayntanam keda haape. <sup>19</sup> Ea kalaa Addaam Barjona ee kinin hamaamon goynka thoothino eeno seeso eedi konin maatondettsi, yin pir kalaa Kiristoos Barjona ee kinin hamon goynka thoothino eeno tipa koda maate. <sup>20</sup> Seeso waadima konin thoothoadettsi Musesa yiggino ko nivade; ko dahaannaar seeson waadimanin thoothenka, Barjosa sunin imintono ogora sagi ko thoothade. <sup>21</sup> Ogonoar seeso dembhika konin bitimondettsi, yin wosa Imbaa Yesus Kiristoosbar lay dehen sadanam bavana, Barjosa sunin imintono tipamonam imintaka koda bitime.

## 6

### *Seesora Edimayse Kiristoosbesana Dayntano*

<sup>1</sup> Ta keeda hamino giyo? Barjosa sunin imintono konin thoothoadettsi seesonam waadadhada wo doo? <sup>2</sup> Yintehe! Wodi dembhika edimbhendettsi seesora edimaana dahayse, seesonam waadadhada hamino doo? <sup>3</sup> Yesus Kiristoosbesana kinka kalaa maatana shiidhimbhaana wodi wul kisa dembhinamaar kashimayna maatana wonin shiidhimbhonam yedi dhesattenu? <sup>4</sup> Ta Kiristoos Barjo Imbaasa gobshinka dembhira kinin dhaabhondettsi, ogodettsi wodiar haali sadaka daadhea dayntaka wonin doadettsi, kisa dembhinam kashimayna maatana shiidhimbhen wonin shiidhimbhenka kimbesana kinka wo duukadhade.

<sup>5</sup> Ogodettsi kisa dembhinka kimbesana kinka kalaa wo daana, kisa dhaabhintankaar tapir kimbesana kinka kalaa woda maate. <sup>6</sup> Keeda kaara os seesonam waadahayno waansa kantano konin shidhoadettsi, seesosa worsho wonin maaterra wonin utoadettsi, gecchono wosa bishino Kiristoosbesana konin ziitadhonam woda dhese. <sup>7</sup> Harrna hambhidiana, diyaa ea seeso waadimara utidine. <sup>8</sup> Ta keeda Kiristoosbesana wonin diyonna, kimbesana kinka sadanka wonin dehenam gonni hamayse woda tiye. <sup>9</sup> Kiristoos dembhira kinin dhaabhon goynka tapir kinin diymonam dhesooda dhese. Keeda kaara os dembhisa hayamo kidar qolehe. <sup>10</sup> Kinin diyon wodanka, seesosa hayamonam kaysana kalaa goyt diydine; ta sadanka kinin dehenka, Barjona kida dee. <sup>11</sup> Ogodettsi seesonna yenin diyondettsi, Yesus Kiristoosbar Barjona sadaka yenin dehenam bhocchee.

<sup>12</sup> Ta keeda waansa siyon anngarmanna yenin ee hamoamadettsi, yesa diyen waandar seeso bitimoadettsi hayeebhode. <sup>13</sup> Yin tapir yesa bishinsa waanam wobamosa koymo hayayse seesona imeebhode; dembhira dhaabhaye sadaka yenin dhaaadettsi hayayse yesa metenam Barjona imee; yesa bishinsa waanamaar tipamosa koymo hayayse Barjona imee. <sup>14</sup> Yigginsa demente yenin dhaamonna, Barjosa sunin imintonsa demente yenin dohonna, seeso yedar bitimana damehe.

### *Tipamonsa Worsho Maatinta*

<sup>15</sup> Ta keeda hamino giyo? Yigginsa demente wonin dhaamonna, Barjosa sunin imintonsa demente wonin dohonna, seeso hayoo hayo? Hayattone! <sup>16</sup> Eedi kalaasa worsho maatayse ee hamana yeam yenin imenna, ogo kina ee yenin hamaa easa worsho yenin maatenam dhesattenu? Way seesona ee yenin hamenka dembhiam yedar beven seesosa worshona yeda maate; way Barjona ee yenin hamenka tipamonsa worshona yeda maate. <sup>17</sup> Yedi birayse seesosa worshonane; keeda yena imbhon timmirinna yesa woylaminka yenin ee hamonna, Barjona gobshi ko dee. <sup>18</sup> Seeson waadimansa worshamon demera utayse tipamosa worshona ye maatade. <sup>19</sup> Inta eedinin dusaadettsi inin giyayno yesa bhocchinka dadi yenin maatonnane. Birayse

yesa bishinsa waanam yerin minnginbee siyon yerinbena worshamo yenin imonna, siyonam koda waadadhe; ta yesa bishinsa waanam gazan waadiman konin waadahoadettsi tipamonsa worshamonna imee.

<sup>20</sup> Seesosa worshona yenin dohon wodanka, tipamo yenin hayoадетти yeam kantisea yer qolehe. <sup>21</sup> Ta keeda yenin waadadhon seeson waadimara har pootea yer ye haapaa? Ta yeam koda ooshinse, yena pootea yer haapeetene; yerin ogosa macchino dembhine. <sup>22</sup> Keeda seeson waadimansa worshamon demera utayse Barjosa worshona yenin maatonna gazamonam yeda haape; ogono yena pooten yerinsa macchino rooro wul lay sadaka dayntane. <sup>23</sup> Harrna hambhidianna, seesosa bazano dembhine; Barjosa sunin imintono wosa Imbaa Yesus Kiristooska rooro wul lay sadaka dayntane.

## 7

### *Musesa Yiggira Utadhen Goyno*

<sup>1</sup> Imbanaanato, yigginam dhesaynana koam ida giye: Eedi sadanka kinin dohonka yekka yigginin daran bitimenam yedi dhesattenu? <sup>2</sup> Yena kamsi i giye: Kembhoono edono geshoa sadanka ki daaka kimbesana yigginka dhaxadhoonone; geshoa diydi ki hanna, geshoaka konin kembhon yiggira kodi bulimidine. <sup>3</sup> Ogonante geshoa sadanka ki daaka, anngi abka kembheko hanna, “Kodi sharmucimidine” koda hambhe. Geshoa diydi ki hanna, geshoaka konin kembhon yiggira konin bulimonna, anngi abka kembhidi ko hanna, “Kodi sharmucimidine” koam hambhehe.

<sup>4</sup> Imbanaanato, yediar Kiristoossa yenin dohonna kisa waanka yigginna yedi diydine. Ogonante Barjona aapi wonin ushoadettsi, ta aba dembhira dhaabhaa Kiristoossa yedi maatidine. <sup>5</sup> Harrna hambhidianna, waan bhocchinka wonin dohonka, yigginin dhaasayno siya anngarma dembhindar woam yeskisea aapi wonin ushoadettsi wosa bishinsa waante koda waadadhe. <sup>6</sup> Keeda ena woam dhaxon yiggira dembhika edimb-hendettsi wodi edimidine. Ogonante keeda kaara os Manpas Gazanin woam entsen haalin goynka Barjona woda waadadhe; birayse thaapadhon gecchon yiggin goynka wodi waadadhattone.

### *Yigginbee Seesonbe*

<sup>7</sup> Ta keeda hamino giyo? Yiggino seesow? Seesotehe! Yaggi qolmina, seeso har konin dohonam dhesattine. Harrna hambhidianna, yiggino “Anngardhaabhode” ko hamaamma, anngarma har ko hannaar inta dhesattine. <sup>8</sup> Seeso yigginsa dhalqinka raq haapintaka isa iinte anngarma wulam ko dhaasade. Yaggi qolmina seeso yer diyaadettsine. <sup>9</sup> Ena birayse yiggin qolmonka inta sadanka i dahade. Yiggin upsin nivon wodanka, seeso sada ko haapade; intaar i diyade. <sup>10</sup> Sadanna imbhoono yigginsa upsino idar dembhi ko bavade. <sup>11</sup> Harrna hambhidianna, seeso yigginsa upsinka raq haapayse iam taysayse kanka ko deesade.

<sup>12</sup> Ogonante yiggino gazane; yigginsa upsinoar gazabee, tipabee, payyabene. <sup>13</sup> Ta keeda payyano yerro idar dembhi ko bavade hamintaw? Hamintatehe! Dembhinam idar bovoono seesone. Seeso may konin dhesimoadettsi payyan yerinka dembhi idar ko bavade. Ogonante yigginsa upsin goynka seeso kattsi siya konin dohoono ko dhesadhade.

### *Eedisa Woylaminte Dohoono Palimeno*

<sup>14</sup> Yiggino manpasinngayn bhocchinka konin dohonam dhesooda dhese. Intaar seesona worsho maatana shanshadhaa waan bhocchinka dehea eedine. <sup>15</sup> Inin hayenam dhesattine; harrna hambhidianna, inin nashen yerinam waadadhan garayse inin jibbenam ida waadadhe. <sup>16</sup> Ta keeda inin nashiminam waadadhea i hanna, yiggino yer payya konin dohonam ida tarje. <sup>17</sup> Waadadhana inin nashimin yerinam isa iinte dohoono seesono koda waadadhe, ta keeda waadadhea intatehe. <sup>18</sup> Isa iinte way

isa waante payya yer qolmonam dhesayda dhese. Harrna hambidianna, yer payya waadadhana inta zagayda zage; ko dahaannaar ogo payyan yerinam hayana inta damattine. <sup>19</sup> Waadadhana inin zagen payyan yerinam waadadhettine; inin zagimon siyon yerinam ida waadadhe. <sup>20</sup> Waadadhana inin zagimon siyon yerinam waadadhea i hanna, ogoam hayayno isa iinte dohoono seesonone, ta keeda intatehe.

<sup>21</sup> Kono yiggino waadimadar konin dohonam inta dhesidine; ogona payya yeram hayana inin zagenka, siyamo imbesana ko dahade. <sup>22</sup> Isa iinka Barjo yigginka ida wozadhe. <sup>23</sup> Ko dahaannaar waani yiggin isa bishinsa waante dohonam ida haape. Ogoni yiggino isa meskente dohon yigginsesana kinka koda kanse; isa bishinsa waante dohon seesosa yigginka dhaxadhaa iam koda maase. <sup>24</sup> Inta hamin dhaaa gaalea eedine! Ko iam dembhindar yeskisen waara hayne iam dhacchea? <sup>25</sup> Wosa Imbaa Yesus Kiristooska iam dhacchea Barjona gobshi ko dee! Ta keeda isa meskenka inta Barjo yigginsa worshone; isa waan bhocchinka inta seeson yigginsa worshone.

## 8

### *Manpas Gazanka Haapadhadhayno Sadano*

<sup>1</sup> Ta ogonante Yesus Kiristooska dhaana eenadar dhabi qolehe. <sup>2</sup> Harrna hambidianna, Yesus Kiristooska sadanam imen Manpas Gazansa yiggino dembhinam beven seeson yiggira iam\* bulidine. <sup>3</sup> Eedisa waan qajera dhaabhonka yigginin hayana dandaamonam Barjo ki hayade. Barjo yisa Naasaam seeso waadadhea eedisa kamsika yittsayse, kiam seesosa marsha machadhea hayntaka, eensa waante dohon seesonsa hayamonam ki shiishade. <sup>4</sup> Ogoam kinin hayoonoar waan bhocchinka dayma, Manpasin bhocchinka yivayna wodi yigginsa upsin tipanam wonin thoosoadettsine. <sup>5</sup> Waan bhocchinka yivayna eena waan yerinam keda bhocche; Manpasin bhocchinka yivayna eena Manpasinngayn yerinam keda bhocche. <sup>6</sup> Waan yerin bhocchinta dembhinam koda beve; Manpasin yerin bhocchinta sadanka daadhenbee payyamonbeam koda beve. <sup>7</sup> Harrna hambidianna, waan yerin bhocchea eedi Barjoam jibbeane; Barjo yigginna ee hamehe; ee hamano kiam bashidine. <sup>8</sup> Waan bhocchinka yivayna eena Barjoam wozisana damehe.

<sup>9</sup> Gon Barjosa Manpasino yesa iinte daa ko hanna, Manpasinka yeda dee; waan bhocchinka dahattene. Eedi hayyear Kiristoossa Manpasin qolmina kidi Kiristoosatehe. <sup>10</sup> Kiristoos yesa iinte daa ki hanna, yesa bishino seeson goynka diydine; ko dahaannaar Barjo birante tipa yenin maatonna, yesa manpasino sadaka dahaynone. <sup>11</sup> Yesusam dembhira dhaasaa Barjosa Manpasino yesa iinte ko daana, Yesus Kiristoosam dembhira dhaasaa Barjo yesa iinte dohon yisa Manpasinka yesa diyen bishinna sadanka daadhenam kida ime.

<sup>12</sup> Ta keeda imbanaanato, baza wodar daane; ko dahaannaar, ogona bazano waan bhocchinka wonin doadettsitehe. <sup>13</sup> Waan bhocchindettsi ye daana, diyeeda diye; Manpasinka yesa waan waadimanam yenin deesenna, sadanka yeda dee. <sup>14</sup> Barjosa Manpasinka entsadhadyna wul igma Barjo naanane. <sup>15</sup> “Baaba, Imbo” hamayse yenin eelensa naasamon manpasin yedi tiydine; lansi yeam kurtunsea worshamo manpasin yedi tiyeetene. <sup>16</sup> Barjo naas wonin maatonam Barjosa Manpasino wonnon manpasinbesana maatayse koda tarje. <sup>17</sup> Ta keeda Barjo naana wo daana, wodi Barjosa toydinane; harrna hambidianna, Barjo yisa Naasana kinin ashkonam Kiristoosbesana kinka woda tiye. Ogona Kiristoosbesana gaalayna wo hanna, kimbesana kinka gobshooda gobshadhe.

### *Os Birante Nivayno Gobshino*

---

\* <sup>8:2</sup> “Iam” hamayno waani waani ena mathaapinte “woam” konin hamenka, waani waani mathaapintear “haam” koda hame.

<sup>18</sup> Ta wodan koka wonin gaalayno os birante wona imbbhen gobshinbesana keedhisate inin shedenka kattsi deegane hamayse ida payde. <sup>19</sup> Pijadhi wul Barjo naana may haapadhenam gebhi anngarmaka koda toole. <sup>20-21</sup> Pijadhi wul pootimino konin maatoadettsi kodar pirdadhidine; ogonoar yisa bhocchinka dayma, Barjo bhocchinkane. Harrna hambhidianna, Barjo “Pijadhi wul yinti kayendar yeskisen worshamora utayse, Barjo naanasa gobshinam kashimayna keda maate” hamayse yindar woylam kenin hayen upsi kinin imonnnane. <sup>22</sup> Pijadhi wul ta koka yekka adhima burqodettsi gaalinte yedimayse konin inthenam dhesooda dhese. <sup>23</sup> Ogo bish dayma, Barjosa biron imintonam tiyaana wodiar wosa iinka woda inthe. Ogono birono imintono Manpas Gazanone. Kiristoos wodar dohon bazanam kinin kashonna os birante wosa bishinam kinin dhacchenbee Barjo naana wonin maatenbeam qaabe hayayse toolada woda inthe. <sup>24</sup> Wonin dhaqoono ogodar qaabe hayntakane; ko daahaannaar qaabe hayayse wonin toolayno yerro haapadhea yer ko hanna, gon qaabe hayntatehe. Harrna hambhidianna, haapadhen yerinam “Akar niva ko nive” hamayse qaabe hayayse hayne toolea? <sup>25</sup> Haapadhimin yerindar qaabe wo haydianna, darshaate koam woda toole.

<sup>26</sup> Ogodettsi Manpas Gazano wosa qajenam koda kelshe; hamin Barjoam miska woam konin zaskenam wonin dhesiminna, Manpas Gazano yinti inthaate upsika may giidhiminka wona Barjoam koda miske. <sup>27</sup> Eedisa woylam marmarea Barjo Manpasinsa qaabono har konin dohonam kida dhese; harrna hambhidianna, Manpasino Barjosa bhocchindettsi gazana eenana koda miske. <sup>28</sup> Barjoam nashaynana, kisa qaabodettsiar eldhaanana yer wulam Barjo payyana kinin hayenam dhesooda dhese. <sup>29</sup> Ogonoar yin konin maatoono Barjo birayse kinin dhesaana kisa Naasaam kenin maatoadettsi, Naasaar thoothina imbaanaanasa shaarinte toydi kinin doadettsi, birayse ki qaabade. <sup>30</sup> Barjo birayse yinin qaabaana eenaam ki eelade; yinin eelaana eenaamaar kisa birante tipana eena ki hayade; tipana kinin hayaanaamaar ki gobshade.

### *Barjosa Nashimmakkono*

<sup>31</sup> Ta keeda yerra igma goynka hamino giyo? Barjo wombесана ki daana, hayne wodar dhaabhea? <sup>32</sup> Barjo yisa Naasaam burqadhma wo wulna hamayse saskate kiam imidi ki hanna, Naasabesana yer wulam sun wona kida ime. <sup>33</sup> Barjoyn kamaana eenaam hayne bersea? Keam tipa hayea Barjone. <sup>34</sup> Keam dhabsheasin hayne? Yesus Kiristoosu? Kidi wona diyaa, dembhira dhaabhaa, Barjosa mizaqinte dooqaa, pir wona miskeane. <sup>35</sup> Kiristoossa nashimmakkorra hare woam edayno? Gaalew? Galshea qaabew? Oytaydhaw? Daaqiw? Pundirmakkow? Eeddar yeskeea yer siyaw? Way dembhiw? <sup>36</sup> Ogonoar

“Eeno hana hamayse rooro wul woam koda deese;  
taxadhayna yaanadettsi wo paydadhadde”  
hamayse thaapadhondettsine.

<sup>37</sup> Ogo wulka woam nashaa Kiristooska wulam bashintaka bashaana wuldara sa-gooda sage. <sup>38</sup> Harrna hambhidianna, dembhi ko hannaar, sadaka daadhea ko hannaar, Barjosa gaanana ke hannaar, beerona ke hannaar, ta wodan koka dohoono ko hannaar, os birante nivayno ko hannaar, cecinte kantanka dahaana ke hannaar, <sup>39</sup> dhev hammo ko hannaar, yirk hammo ko hannaar, yer hamin hammo pijadhi ko hannaar, wosa Imbaa Yesus Kiristoosbar dohon Barjosa nashimmakkorra woam edana damea yer kala hattear qolmonam inta dhesidine.

<sup>1</sup> Kiristooska dahayse gon ida giye, buudimattine. Pir Manpas Gazanbee isa meskenbe ina tarja ke tarje. <sup>2-3</sup> Waanka isa muldha maataana imbanaanana gebhi qaabeka atabee kayma qaabebe isa woylaminte gon daane. Kena ashadhye Kiristooskalanka edimaa i daana ini ida nashe. <sup>4</sup> Kedi Israveel eenane; Barjoar keam yisa naana ki maasade; yisa gobshinamaar kena ki dhahade; yisa mallanamaar kembesana ki ardade; yisa yigginamaar kena ki imade; goninka goodimadhensa goynam kena ki dhettsisade; kena “Hayayda haye” hamayse kinin giyon upsinam kena ki imade. <sup>5</sup> Kediar ena wosa eykenakalanka ke nivade; Barjoyn qadhaa Kiristoosaar waanka kisa adhadhidino kesa iirane. Kidi wuldara sagi maataa, rooro wul lay gobshadhaa Barjone; amiin!

<sup>6</sup> Ko dahaannaar Barjosa upsino ookadhoonotehe; harrna hambhidianna, Israveel muldhana wul gon Israveel eeditehe. <sup>7</sup> Ogodettsi Abraamsa muldhana wul Abraam naanatehe. Barjo Abraamkal: “Hasa muldhanin haapadhayno Yisaaqbarne” ki hamade. <sup>8</sup> Ogonante waanka adhadhaana Barjo naanatehe; ko dahaannaar gon muldha maatayna Barjo “Hayayda haye” hamayse kinin giyon upsinka adhadhaana eenana bishne. <sup>9</sup> Ogonoar Barjosa upsino “Niven levensa kaa wodaaka nivayda nive; Saaraar naasi anngi koda adhe” hamaynone.

<sup>10</sup> Ogo bish dayma, wosa eykea Yisaaqkalanka Ribqa naana lamaana mentinam konin sirmon wodanka, <sup>11-12</sup> naana mentina ke adhadhima, siyabee payyabeam ke waadadhima birayse, Barjosa kamano waadimaka dayma kisa bhocchindettsi eelimeka konin dohonam dhaana, Barjo Ribqana “Toydia kanaasa waadima eedi kida maate” kona ki hamade. <sup>13</sup> Ogonoar “Inta Yayqoobam nashidine; Esawam jibbidine” hamayse thaapadhondettsine.

<sup>14</sup> Ta hamino giyo? “Barjo tipa pirdi pirdehe” wo hamo? Hamattone! <sup>15</sup> Harrna hambhidianna, Barjo Musekal: “Garana inin zageana garayda gare; burqadhana inin zageana burqadhyda burqadhe” ki hamade. <sup>16</sup> Ogonante Barjosa kamano eedisa bhocchibee eedisa waadimabeka dayma, Barjosa garintonkane. <sup>17</sup> Ogoka Gibth peen bitaana “Inin haam bitinsoono hanka isa kantanam dhaanabee isa naabeno peen wulir konin giidhoadettsibene” hamayse Mathaap Gazante thaapadhidine. <sup>18</sup> Ogonante Barjo yi zagi dianna gara ki gare; garana yi zagaamma woylaminam duttsa ki duttse.

### *Barjosa Wacimenbee Garintonbe*

<sup>19</sup> “Yin ko hanna, ta koka yekka harrna ki dhiidhime? Barjosa bhocchinam marana damea hayne?” ina hada hame. <sup>20</sup> Ya ea kaa, Barjobesana palimea ya hayne? Daano “Harrna yin hayayse iam ashkaa?” hamayse daan meesheana hama ko hamo? Hamehe.

<sup>21</sup> Daan meeshea ea dhoqala kalaasa peera antinam gobshadhea koymo, antinam bagadhea koymo hayayse ashkana kisa hayamo qolaaw?

<sup>22</sup> Barjo yisa wacimenam dhaanabee yisa kantanam may dhettsanabe zagayse, kayenna ashkimberaana wacimen koymonana thoothi kinin darshonam ya haraa dhese? <sup>23</sup> Ogoam kinin hayoonoar gobshinna birayse kinin ashkaana garinton koymonana yisa gobshinsa wodimmakkonam dhettsanane. <sup>24</sup> Igina garinton koymonaar wodine. Ayiwdayensa shaarira bish dayma, Ayiwdayensa shaariraar woam ki eelade. <sup>25</sup> Ogonoar Hosev mathaapinte Barjo

“Isa zarsi maataamon eenam ‘Isa zarsine’ hamayse,  
nashadhaamonam ‘Nashadhoonone’ hamayse ida eele;

<sup>26</sup> ‘Yedi isa zarsitehe’ kena hambhon raqinte  
‘Yedi dehea Barjo naanane’ hamayse keam koda eldhe”  
ki hamade.

<sup>27</sup> Isiasaar Israveel eenasa yin giyayse kida ilate:

“Israveel eenasa paydino bazinsa shaamidettsi ko thoothaakaar,  
kesa iira dhaqayna tokaane.

<sup>28</sup> Harrna hambidianna, Barjo saana peendar dohon eendar shiishima pirdinam kida  
beve.”

<sup>29</sup> Isias ena birayse giyondettsi,

“Kantan Wul Yisa Dahaa Barjo muldha wona ki shiishaamma,  
Sodoombree Gamoorabe katamanadettsi wodi ini kaydine”  
ki hamade.

<sup>30</sup> Ta hamino giyo? Barjo birante tipa maatana zagaamma Ayiwday hamma eena  
Kiristoosdar woylamin qajintaka Barjo birante tipamonam kedi haapidine. <sup>31</sup> Ko  
dahaannaar Barjo birante tipa maasen yigginam zagayna Israveel eena ogo tipa  
maasen yigginam haapadehe. <sup>32</sup> Harrnane? Barjo birante tipamonam kenin haapimino  
Kiristoosdar woylamin qajintaka dayma, kesa waadimanka tipamonam haapanam kenin  
zagonnane. Ogona goan sentaadar ke qanimade;

<sup>33</sup> “Marrato! Thiyoon gidir eedina goa maatea seeni ida wode;  
agaa seeniar eediam dhabea seeni laytane;  
kidar woylamin qaje ea ooshimbhehe”  
hamayse thaapadhondettsine.

## 10

### *Israveel Eena Barjosa Goynka Kenin Yivaammo*

<sup>1</sup> Imbananato, isa woylaminte dohon anngarmanka Barjoam inin miskayno Is-  
raveel eena kenin dhaqoadettsine. <sup>2</sup> Barjona kesa dohoono woogintano gon konin  
dohonam inta kena tarjayda tarje; ko dahaannaar kesa woogintano dhesintonka  
dhaabhoonotehe. <sup>3</sup> Barjo birante tipa maaten goynam dhesima, yiam tipa hayana kenin  
zagonna, Barjo birante tipa maaten goynna ee hamadehe. <sup>4</sup> Kiristoosdar woylamin  
qajayna wul Barjo birante tipa kenin maatoadettsi, Kiristoos Muse yigginsa maccheane.

### *Dhaqinta Een Wulna Konin Nivoono*

<sup>5</sup> Yigginam toolintaka Barjo birante haapadhen tipamonsa Museyn thaapenka, “Yig-  
ginam toolea sadaka kida dee” ki hamade. <sup>6</sup> Kiristoosdar woylamin qajintaka haapad-  
hen tipamonsa yin giyayse thaapadhidine:

“Hasa woylaminka ‘Tura cecinte hayne utea?’ hamaabhode.”

(Ogono Kiristoosam mia hanchota hamintane.)

<sup>7</sup> “Way hasa woylaminka ‘Diyaanayn dohon raqinte hayne mia hanchea?’ hamaab-  
hode.”

(Ogono Kiristoosam dembhira dhaasota hamintane.)

<sup>8</sup> Ko dahaannaar hamin ko giye?

“Barjosa upsino hakal theedine; ogono hasa apontebee hasa woylamintebene” koda  
hame.

Ogono wonin giyayno Kiristoosdar woylamin qajadhen upsinone. <sup>9</sup> Ogonoar “Yesus  
Imbaane” hamayse hasa aponka hanin tarjenna, Barjo kiam dembhira kinin dhaa-  
sonam gonne hamayse hasa woylaminka hanin tiyenna, dhaqaada dhaqe. <sup>10</sup> Harrna  
hambidianna, eedi yisa woylaminka Kiristoosdar woylam qajayse Barjo birante tipa  
kida maate; yisa aponkaar tarjayse kida dhaqe. <sup>11</sup> Ogonoar “Kidar woylamin qajea wul  
ooshimbhehe” hamayse Mathaap Gazante thaapadhonnane.

<sup>12</sup> Kalaa Imbaa wo wulsa Imbaa kinin dohonna, Ayiwday eenbee Ayiwday hamma  
eenbesa shaarinte edime qolehe; kiam eelayna wulna yisa wodimmakkorra thoothi

kida ime. <sup>13</sup> Harrna hambhidianna, “Imbasa naabenam eelea wul dhaqa ki dhaqe” hamayse thaapadhonnane.

<sup>14</sup> Keeda kidar woylamin qajaamma hamin kiam eelana ke dame? Kisa qansima hamin kidar woylam qajana ke dame? Kisa upsinam giyea qolma hamin hayayse qansana ke dame? <sup>15</sup> Keam yittsadhaamma hamin kisa upsinam guyana ke dame? Ogonoar “Payyan upsinam giyaate nivayna eena hamin ke wozise!” hamayse thaapadhondettsine.

<sup>16</sup> Ko dahaannaar Isias “Imbo, wonin giyon upsinam hayne tiyaa?” hamayse kinin giyondettsi, wul wozisen upsinam tiyadehe. <sup>17</sup> Ta keeda Kiristoosdar woylamin qajintanin haapadhayno qansintakane; qansintanin haapadhaynoar Kiristoossa upsinam giidhenkane.

<sup>18</sup> Ta keeda “Kedi Kiristoossa upsinam qansadayu?” hamayse ida oyse.  
 “Kesa upsino peen wulir ko qansimade;  
 kesa dhalqinoar peensa gasante ko yeskade”  
 hamayse thaapadhondettsi gon kedi qansidine. <sup>19</sup> Pir Israveel eena Kiristoossa upsinam dhesadehe hamintaw? Dhesidine! Muse birayse  
 “Barjo ‘Inta bagadhon zarsinka yeam ida wooginse;  
 bhocchimon zarsinkaar yeam ida wacinse’ ki hamade”  
 hamayse ki thaapade. <sup>20</sup> Isiasaar wocchimbhayse,  
 “Barjo ‘Iam zagaamma eenana i haapadhade;  
 iam oysamma eenakal may i haapadhade’ ki hamade”  
 hamayse ki guyade. <sup>21</sup> Pir Israveel eenana ko hanna,  
 “Barjo ‘Ee hamimina eena ikal kenin nivoadettsi  
 burira yedayse ibaaninka yekka isa aaninam kena i pishkade’ ki hamade”  
 hamayse ki guyade.

## 11

### *Barjo Israveel Eenaam Kinin Garaammo*

<sup>1</sup> Ta keeda “Barjo een yinnonam garidu?” hamayse ida oyse. Garadehe! Inta ina Israveel eedine; Abraam zarsira nivaa Biiniam muldhane. <sup>2</sup> Barjo birayse yinin kamon een yinnonam garadehe. Mathaap Gazano Eeliassa hamin konin giyenam yedi dhesattenu? Kidi Israveel eenaam Barjo birante kinin bersenka, <sup>3</sup> “Imbo, hakala qansayse eenna giyaynaam ke deesade; hana marshan machadhayna ranqaamaar ke kottсаде. Shidhaa inta bishne; iamaar deesana keda zage” ki hamade. <sup>4</sup> Ko dahaannaar Barjo hamin giyayse kina ki maasaa? “Bavaal hambhea barjoana kumpurdhayse goodimaamma shii tobbhaa eenaam ina inta shiishidine” kina ki hamade. <sup>5</sup> Ogodettsi ta wodan koka Barjo yisa sunin imintonka Israveel eenasa shaarira yina kamayse kinin shiishaa tokaa eedi daane. <sup>6</sup> Barjosa kamano kisa sunin imintonka ko hanna, eedisa waadimakatehe. Eedisa waadimaka ko hanna, Barjosa sunin imintono iminto maatehe hamintane.

<sup>7</sup> Ta kosa aapino hare? Israveel eena yinin zagonam haapadehe; Barjoyn kamaana kedi haapidine; shidhaana woylamiysa duudaana eena ke maatade. <sup>8</sup> Ogonante  
 “Kesa aapinoar konin shedoamadettsi,  
 kesa qaaminoar konin qansoamadettsi  
 Barjo kinaka yekka kesa woylaminam ki duttsade”  
 hamayse thaapadhondettsine.

<sup>9</sup> Dawtaar  
 “Kesa kumman ranqo keam yedea zaanidettsi ko maate;

ogote goabee dhabibe kedar ko yeske.

<sup>10</sup> Kesa aapinoar ko kaye;  
kesa zulonoar rooro wul ko wobe”  
ki hamade.

<sup>11</sup> Taar Israveel eena kenin thuqumoono yinin dhambenka yekkaw? Yinteh! Israveel eena woogimbhoadettsi, kesa seeson waadimanka Ayiwday hamma eena dhaqintanam kedi haapidine. <sup>12</sup> Israveel eenasa seesonka peen wuldar dohon eenna wodimmakkonam haapadhidi ko hanna, kesa dhambankaar Ayiwday hamma eenana wodimmakkonam haapadhidi ko hanna, ta keeda Israveel eenasa dhaqintanin thoothenka hamin dohon sagi wodimmakko ko bovo?

### *Ayiwdhay Hamma Eenasa Dhaqintano*

<sup>13</sup> Ta inin giyayno Ayiwday hamma eena yenane: Inta Ayiwday hamma eenana Kiristoos yisa tarjamonnante iam kinin yittsaa inin maatonna, isa waadimanam gobshayda gobshe. <sup>14</sup> Isa waadimanam inin gobshayno isa eeda maataana Israveel eenama woogisanane. Ogoka way kesa iira kalaa kalaanaam dhacchayda dhacche. <sup>15</sup> Harrna hambhidianna, Barjo Israveel eenama kinin garenka, peen wulir dohoono eeno Barjobesana qaashimea ko hanna, ta Barjo Israveel eenama kinin tiyenka har ko maate? Dembhira dhaabhaa sadadettsi koda maate.

<sup>16</sup> Taapan kallora bironam Barjona imbhidi ko hanna, shidhoono taapano wul gazane. Ogodettsi hattonsa caacino gaza ko hanna, kosa antinoar gazane. <sup>17</sup> Kamisi yena i giye: Israveel eena mayante kordhaa hattaa rimitaasa antinadettsine; yediar Ayiwday hamma eena darante dahaa hattaa rimitaasa antinadettsine. Kordhaa hattaasa antina kalaa kalaanaam taxadhanna, ya kesa raqinte ardayse kembesana kinka caacira gala tiyea hanna, <sup>18</sup> taxate dhabadhaana antinadar erimaabhode! Ha erimidianna, caacino haam ko baskade, ya caacinam hanin baskamonam qaabaa.

<sup>19</sup> Ko dahaannaar, “Antina taxate kenin dhabadhoono, kesa raqinte inin ardoadettsine” yeda hame. <sup>20</sup> Hamayse yenin giyoono gonne. Ko dahaannaar kenin taxate dhabadhoono Kiristoosdar woylamin kinin qajiminnane; ya hanin woyoono Kiristoosdar woylamin qajintakane. Ta keeda kurtumbhaa, erimaabhode. <sup>21</sup> Harrna hambhidianna, Barjo yinin pijaana haaqanasa antinana ki burqadhaamma, hanaar burqadhehe.

<sup>22</sup> Ta Barjosa lemmakkonbee wacimenbeam shedaa: Kisa wacimeno dhambaanadarne; kisa lemmakkonka wocchimbhayse ha woydianna, Barjosa lemmakkono hanane. Ogotay ko hamma, yaar taxadhaada taxadhe. <sup>23</sup> Israveel eenaar maatayse Barjodar woylamin qajidi ke hanna, ena raqin yinnondar maatate keda arde. Harrna hambhidianna, Barjo keam ena raqindar maasate arsana dama ki dame. <sup>24</sup> Ya Ayiwday hamma ea hasa pijadhinka darante dahaa rimitaasa antira taxate mayante dahaa rimitaadar ha arsadhsaysaka ha yedidianna, mayante dahaa rimitaasa antira taxayse dhabadhoono antino maasate raqaate arsadhianna hamin kalon sagi ko yedimine?

### *Barjosa Garintono Een Wulna Konin Dohoono*

<sup>25</sup> Imbanaanato, “Wodi eedi pakalane” hamayse yenin qaaboamadettsi ogo aachin dhalqinam yenin dhesoadettsi ida zage. Ogonoar Israveel eenasa antinasa wolaminin duudoono Ayiwday hamma eena paydadhana Barjosa bitamonte ardayse kenin thoothenka yekka maatonnane. <sup>26-27</sup> Ogona

“Dhacchea Thiyoon katamara kida ute;  
Yayqoobsa muldha maataanasa siyamonam kida kayse.  
Kesa seesonam inin kayson wodanka  
kembesana kinka inin ardayno isa mallano konone”

hamayse thaapadhondettsi, Israveel eena wul dhaqa ke dhaqe.

<sup>28</sup> Israveel eena Barjosa dhacchintan upsinam kenin tiyaamon goynka yedi Ayiwdtay hamma eena yenin dhaqoadettsi Barjoam jibbayna ke maatade; ko dahaannaar ena Barjoyn kamaana kesa eykena goynka kedi nashadhaanane. <sup>29</sup> Harrna hambidianna, Barjo yinin imon imintonabee kinin eelon eelimenbeam ookehe.

<sup>30</sup> Yedi Ayiwdtay hamma eena ena birayse Barjona ee hamiminane; keeda Israveel eena Barjona kenin ee hamaamon goynka yedi Barjokalanka garintonam haapidine.

<sup>31</sup> Ogodettsi yedi Barjokalanka garintonam yenin haapon goynka kedi Barjokalanka garintonam kenin haapoadettsi, kedi ta Barjona ee hamimina ke maatade. <sup>32</sup> Harrna hambidianna, Barjo een wulsa seesonam garana hamayse eeno wul ee konin hamaamonna seeson kennonka dhaxadhaana keam ki maasade.

### *Barjona Imbhoono Gobshino*

<sup>33</sup> Barjosa wodimmakkonbee, pakalmakkonbee, dhesintonbe hamin dohoono gebhine! Kisa pirdinoar marmardhiminone; kisa goynoar dhesadhiminone.

<sup>34</sup> “Barjosa qaabonam dhesaa hayne?

Kina kiilimen imaa hayne?

<sup>35</sup> Barjo kina maasate kinin imoadettsi kina imaa hayne?”

hamayse thaapadhondettsine. <sup>36</sup> Harrna hambidianna, yer wul Barjokalankabee, Barjokabee, Barjonabene. Roro wul lay gobshi kina ko dee; amiin.

## 12

### *Barjona Hamin Waadadha Zaskayno*

<sup>1</sup> Imbanaanato, yesa bishinam Barjoam wozisea, gaza, sadaka dahaa marsha hayayse yenin imoadettsi Barjosa lemmakkonka yeam ida miske. Ogonoar gonin hammo Barjona yenin goodimaate waadadhayno waadimanone. <sup>2</sup> Payyabee, woziseabee, gonin hamaabe Barjoasa bhocchinam may yenin dhesoadettsi, yesa meskenbee yesa woylaminbeka haalimbhayse ookimee; wodan ko eendettsi maateebhode.

<sup>3</sup> Barjo ina kinin imon kisa sunin imintonka een wulam meteka meteka yin giyayse ida kiile: Barjo eenna meteka meteka kinin imon woylamin qajintan goynka zaskendettsi bhocchee; bhocchana yeam zaskerra saskayse yena bhoccheebhode. <sup>4</sup> Wosa bishin kallondar waa thoothine dohoono; waanasaar waadimano wul waana waanane.

<sup>5</sup> Ogodettsi wodi thoothino eeno Kiristooska bishi kalaane; wodi waana waana dhaana eena kinka kinka kisa waa kalaa wo maatade.

<sup>6</sup> Ogonante Barjo wo waana waana maataana eenana meteka meteka yisa sunin imintonam wona kinin imondettsi, iminton ogoam waadimadar wo hacche: Wosa imintono Barjokala qansayse eenna giynta ko hanna, Barjodar woylamin wonin qajendettsi wo giye. <sup>7</sup> Wosa imintono waani eenna waadadhinta ko hanna, wocchimbhayse wo haye. Wosa imintono eenaam dhettsinta ko hanna, wo dhettse. <sup>8</sup> Wosa imintono eenaam kiilinta ko hanna, wo kiile. Wosa imintono eenna yer iminta ko hanna, wo ylam wulka wo ime. Wosa imintono eenaam entsinta ko hanna, wocchimbhayse wo entse. Wosa imintono eenna burqadhyayse payya yer kena haynta ko hannaar, wozaka wo haye.

<sup>9</sup> Yesa nashimmakkono maltamoka dayma gonin hammo ko dee. Yer siyaam jibbee; yer payyaam wocchimbhayse yedee. <sup>10</sup> Imbanaana kiam kiam kenin nashendettsi, kinka kiam kiam yesa woylaminka nashee; kinka kiam kiam saskayse gobshee.

<sup>11</sup> Waadima waadadhana boosimbheebhode. Manpaska wocchimbhee; Imbaa wontea Yesusna waadadhee. <sup>12</sup> Barjoka qaabe hayntaka wozadhee; yesa gaalenkaar darshee; roro wul Barjoam miskaate wocchimbhee. <sup>13</sup> Gazana eenaam zaskenka kelshee; wocchimbhayse shonnaam tiyee.

<sup>14</sup> Yeam oytaynanaar “Barjo yena ki gare” hamee; keam asheebhode. <sup>15</sup> Wozadhayna eenabesana kinka wozadhee; eepaynabesana kinka eepee. <sup>16</sup> Kinka kinka agayse dehee. Qambhina eenabesana kinka dehee; yesa metenam dheg hayeebhode. “Wodi pakallane” yeam hameebhode.

<sup>17</sup> Eeno yedar yer siya konin hayenka, yediar yer siya kedar hayeebhode. Een wulsa birante payya maatenam hayee. <sup>18</sup> Ye damidianna, eedi wulbesana payyamoka doota yennon goynka zasken wulam hayee. <sup>19</sup> Inin nashaanato, Barjosa wacimenna raq garee; yedi yenti maaseebhode. Harrna hambhidianna, “Barjo ‘Halon maasea intane; een wulna kesa waadimandettsi kashayda kashe’ kida hame” hamayse thaapadhidine.

<sup>20</sup> Ogonante

“Haam jibbea daaqardhidi ki hanna, kiam kunsaa;

dheebardhidi ki hanna, kiam wushaa.

Ogoam hanin hayenka kisa metendar nuusa qolshinaam hada kee”

hamayse konin thaapadhondettsine. <sup>21</sup> Ogonante siyonam yer payyaka bashaa; yer siyaka bashadhaabhode.

## 13

### *Peen Wottsaynana Ee Haminta Konin Zaskayno*

<sup>1</sup> Hayamoyn imbhayno Barjosa bhocchika konin dohonna, ta hayamoysa dahaanaam Barjoyn kamayse wodonna, eeno wul peen wottsaynana ee ko hame. <sup>2</sup> Ogonante peen wottsaynaam jibbea Barjoyn giyonam kida jibbe; ee hamimina wul yisa metendar pirdinam keda beve. <sup>3</sup> Harrna hambhidianna, peen wottsayna siyan waadadhaynaam keda kurtunse; payya waadadhaynaam kurtunsehe. Peen wottsaynana hanin kurtumbhoamadettsi ha zago? Yin ko hanna, payya waadadhaa; kediар haam shawka ke shawke. <sup>4</sup> Harrna hambhidianna, peen wottsea hana payya yer kinin hayoadettsi wodadhaa Barjosa waadima eedine. Kidi dembhi pirdi kinin pirdenna, siya ha waadadhidianna, kiam kurtumbhaa. Kidi siyon waadadhaanaam dhabshea Barjosa waadima eedine. <sup>5</sup> Ogonante peen wottsaynana ee haminta woam koda zaske. Wonin ee hamayno Barjosa wacimenam kurtumbhintaka bish dayma, wosa meskenin wona giyennane.

<sup>6</sup> Pir gibirin yenin kashayno ogonantene; harrna hambhidianna, peen wottsayna waadiman ogoam waadadhayna Barjosa waadima eedine. <sup>7</sup> Peen wottsayna wulna zaskenam imee: Gibirin zaskeana gibirinam kashee; gabantear qarathanam oysaynana kashee; kurtumbhinta yeam zaskeanaar kurtumbhee; gobshi yiam zaskeanaar gobshinam imee.

### *Kinka Kinka Kiam Nashinta*

<sup>8</sup> Kinka kinka kiam nashintara ab eedi haysaar baza yedar ko dahabhoode. Harrna hambhidianna, eediam nashea yiggin wulam toolidine. <sup>9</sup> “Sharmucimaabhode, deesaabhode, dimmaabhode, anngardhaabhode” hamayna upsinabee waani Barjoyn giyaana upsinabe “Eediam hadettsi hayayse nashaa” hamen upsinsa iir ke dahade. <sup>10</sup> Eediam nashea wul siya yer eedidar waadadhehe; ogonante eediam nashea yiggin wulam toolidine.

<sup>11</sup> Raatira yenin qaymayno wodano ta konin yeskonam dhesintaka kinka kinka kiam nashee. Harrna hambhidianna, Barjodar woylamin wonin qajon wodara wonin dhaqayno roorono taaki wokal theedidine. <sup>12</sup> Sootino sagite ko dahade, rooronoar theedidine. Ogonante thipansa waadimanam bulate wodara dhabayse, shaakansa banqi koymonam wo qaadhe. <sup>13</sup> Rooronsa shaakante yaayayna eena maatayse woam zaskendettsi wo yaaye. Warsabee, baribee, sharmucimakkobee, tagachbee, palimebee,

woogintobeka wo yaayabhoode. <sup>14</sup> Ogonante Imbaa wontea Yesus Kiristoosam qaadhee; waansa anngarmanam waadadhana qaabeebhode.

## 14

### *Kinka Kinka Kiam Tiya Zaskayno*

<sup>1</sup> Yesa shaarinte Barjodar woylamin qajadhenka dadi maataa eedi dahaa ki hanna, kiam tiyee; kisa qaabondar pirdeebhode. <sup>2</sup> Yena kamsi i giye: Barjodar woylamin qajaynasa eedi kalaa “Inta gala wulam itsana damayda dame” kida hame; waa pir Barjodar woylamin qajadhenka dadi maataa ea “Inta haaqansa aapinbee hacchanbe bish ida itse” kida hame. <sup>3</sup> Ogonante yer wulam itsea itsimaam ki bagabhoode; haaqansa aapinbee hacchanbe bish itsea yer wulam itseadar ki pirdabhoode. Harrna hambidianna, kiamaar Barjo tiydine. <sup>4</sup> Ogonante ya waa easa waadiman eadar pirdea hayne? Harrna hambidianna, ki woydiannaar ki dhambidiannaar kisa imbaasane, hantitehe. Ko dahaannaar Barjo kiam woysana kinin damenna, woya ki woye.

<sup>5</sup> Ogodettsi eedi kalaa “Roroa waa roroa waadara sagi gobshi kisa daane” hamayse kida bhocche; waani pir “Roorona wulsa gobshino kiaddhane” hamayse kida bhocche. Ogonante eedi wul yisa woylaminka qothimima ko bhocche. <sup>6</sup> Roroam gobshea Imbaa wontea Yesusna hamayse kida gobshe. Itsear Barjoam kinin gobshenna, Imbaa wontea Yesusna hamayse itsima kida gare. <sup>7</sup> Wosa iira kala hattear yimetenna dehea qolehe; pir yimetennaar diyea qolehe. <sup>8</sup> Sadaka dahaa wo daahaakaar Imbaa wontea Yesusna woda dee; wo diyaakaar Imbaa wontea Yesusna woda diye. Ta sadaka wo daahaakaar, wo diyaakaar wodi Imbaa wontea Yesussane. <sup>9</sup> Ogona Kiristoos diyayse dembhira kinin dhaabhoono, sadanka dahayna eenabee diyaana eenabesa Imba maatanane.

<sup>10</sup> Ta ogona ya hambanaasadar harrnaa pirde? Pir hambanaasaam harrnaa bage? Wodi wul Barjosa pirdin birante woyooda woye. <sup>11</sup> Harrna hambidianna, “Barjo ‘Inta lay dehea Barjo inin dohonna, gon ida giye: Eeno wul ina kumpurdha ko kumpurdhe; kedi wulaar Barjo inin dohonam tarja ke tarje’ ki hamade’ hamayse thaapadhidine. <sup>12</sup> Ogonante wodi kalaa kalaana wonnon metensa Barjona malsi woda maase.

### *Eedina Goa Maata Woam Zaskimoono*

<sup>13</sup> Ta keeda waa waadar wo pirdabhoode; yesa imbananana goa yenin maatoamadettsi yeam toolee. <sup>14</sup> Meten yinnonka gala qays konin daaamonam inta Imbaa wontea Yesus Kiristoos goynka dhesidine. Ko dahaannaar eedi kalaa “Kaa gala qaysine” hamayse qaabea ki hanna, ogono galano gon kina qaysine. <sup>15</sup> Galan goynka hambanaasaam genea hanna, ya nashimmakkoka deheathe. Ogonante Kiristoosin yina diyaa hambanaasaam hasa galanka kiam kaysaabhode. <sup>16</sup> Ta keeda yennon shaarinte payya maaton yerinam waani eenin “siyane” hamayse bagoadettsi hayeebhode. <sup>17</sup> Barjosa bitamono Manpas Gazanka haapadhayno tipamobee, payyamobee, wozabe gantine; itsamobee wucadhenbe gantitehe. <sup>18</sup> Ogo goynka Kiristoosna waadadhea ea Barjoam kida wozise; eedi birantear gobshadhaa kida maate.

<sup>19</sup> Ogonante payyamonam haapadhenbee kinka kinka kiam wonin wochinsenbeam wo zage. <sup>20</sup> Galana hamayse Barjosa waadimanam kaysaabhode. Gala wul qaysitehe; ko dahaannaar een waanina goa maaten galanam itsano siyane. <sup>21</sup> Ogonante waa itsintabee, wucadhenam wucintabee, yerin waaniam hanin hayenbe hambanaasana goa maatea ko hanna garinta payyane.

<sup>22</sup> Yerra iginaka gonne hanin hamayno hambee Barjobesa shaarinte ko dee. Harrna hambidianna, “Kono tipane” hamayse yinin giyen yerinam qothimima waadadhea

ea gobshadhaane. <sup>23</sup> Qothimada itsea eedi daa ki hanna, kisa waadimano gon konin dahaamonna, kidar pirdadhidine. Harrna hambhidianna, gonne hamayse kinin waadadhaammo yer wul kina seesone.

## 15

### *Eediam Wozisa Zaskoono*

<sup>1</sup> Wodi Barjodar woylamin qajadhenka wocchimbhaana dadi maataana eenasa qajenam baska woam koda zaske; wonnon metenam wozisa zaskehe. <sup>2</sup> Wodi kalaa kalaana waani een Barjodar woylamin qajadhenka kenin wocchimbhoadettsi kena agenbee keam wozisenbeam kena haya ko woam zaske. <sup>3</sup> Harrna hambhidianna, Kiristoos yiam wozisadehe. “Eenin haam iiroono iirimeno idar yeskidine” hamayse thaapadhoono kidar ko yeskade. <sup>4</sup> Mathaap Gazante wonin haapayno darshintanbee wocchimbhantbeka qaabe wonin hayoadettsi, ena birayse thaapadhoono wul woam dhettsana ko thaapadhade. <sup>5</sup> Darshintabee wocchimbhantbeam yena imea Barjo Yesus Kiristooska kinka kinka qaabo kalaaka maatayse yenin doadettsi yeam ki haye. <sup>6</sup> Yin kinin hayayno wosa Imbaa Yesus Kiristoossa Imbaa maataa Barjoam woylam kalaabee upsi kalaabeka kiam yenin gobshoadettsine.

### *Barjosa Dhacchintan Upsino Ayiwday Hamma Eenana Konin Giidhoono*

<sup>7</sup> Ogonante Kiristoos yeam kinin tiyondettsi, yediar Barjosa gobshinna hamayse kinka kiam kiam tiyee. <sup>8</sup> Ena wosa eykenana “Hayayda haye” hamayse kinin imoono upsino konin thoothoadettsi, Barjo gon hamaa kinin dohonam dhettsota Kiristoos Ayiwday eenana waadadhea eedi kinin maatonam yena ida giye. <sup>9</sup> Pir Kiristoos Ayiwday eenana waadadhea eedi kinin maatoonoo Ayiwday hamma eena Barjoyn kesa seesonam garonna kiam kinin gobshoadettsine. Yin giyayse thaapadhondettsi:  
 “Ogonante Ayiwday hamma eenasa shaarinte haam ida gobshe;  
 hasa naabenna gobshi maaten gaadinam ida dhaase” <sup>10</sup> pir,  
 “Yedi Ayiwday hamma eenato, Barjo eenabesana kinka wozadhee” <sup>11</sup> pir,  
 “Ayiwdhay hamma eenato, yedi wul Barjoam gobshee;  
 yedi zarsino wul kiam gobshee.”

<sup>12</sup> Ogodettsi Isias

“Iseysa muldhara adhadhea kida nive;  
 Ayiwday hamma zarsinaam wottsana kida dhaabhe.  
 Kediar kidar qaabe keda haye”

hamayse ki giyade. <sup>13</sup> Yesa qaabe haydino Manpas Gazansa kantaka gebhada konin yivoadettsi, qaabe yindar haydhea Barjoa kidar woylamin yenin qajenka wozanbee payyamonbeam yena ki thoose.

### *Bhawloos Kurtumbhima Kinin Thaapoongo*

<sup>14</sup> Imbanaanato, payyamoka yenin thoothonbee, yer wulam dhesintaka yenin thoothonbee, kinka kiam kiam kiilana yenin damonbeam inin dhesenna yennon goynsa inta qothimattine. <sup>15-16</sup> Warqatin ogote yena bhocchisana zagayse kala kala yerka kurtumbhima yena i thaapade. Kurtumbhima inin thaapoongoor Ayiwday hamma eenana waadadhana Barjo ina kinin imon sunin imintonkane. Ayiwday hamma eena Manpas Gazanka gazimbhaana, Barjona imbhen kiam wozisen marshandettsi maatayse ke theede, Barjosa dhacchintan upsinam kena giyada guduldettsi maatayse Imbaa wontea Yesus Kiristoosna ida waadadhe.

<sup>17</sup> Ogonante Yesus Kiristooska Barjona waadadhea inin maatonka kattsi ida erime. <sup>18</sup> Isa dhalqinbee waadimanbe goynka Ayiwday hamma eena Barjona ee kinin

hamoadettsi Kiristoos inka kinin waadadhon waadimara ab yer kala hattear giyana zagattine. <sup>19</sup> Ogono kinin waadadhoono Manpas Gazansa kantanka, milkitinbee tarshen waadimanbekane. Ogoka Yerusaalemra yedayse Ilwarqoon peenka yekka yaayada Kiristoossa dhacchintan upsinam giya iam zaskenam inta macchidine. <sup>20</sup> Isa anngarmanoar waani eenin waadadhota ashkaa raqaate woysa dayma, Kiristoossa naabenam qansadhaamon raqinte Barjosa dhacchintan upsinam giyanane. <sup>21</sup> Ogonoar “Ena birayse kisa giidhaamma eena kiam haapa ke haape; qansaamma eenaar bhoccha ke bhocche” hamayse ena thaapadhondettsine.

### *Bhawloos Roome Kataman Yivana Kinin Bhocchoono*

<sup>22</sup> Ogona thoothi wodana yekal inin nivoamadettsi iam ko mardhade. <sup>23</sup> Keeda igma peenar isa waadimanam inin macchonnabee thoothi levera yedayse yekal nivana kattsi isa anngarmanin dohonnabe, <sup>24</sup> Ispeen peendar inin yivenka yeam shedana qaabe ida haye. Likka rooro yembesana kinka wozadhaate inin dooqonsa budonte isa goynna maaten kelsho ina yenin hayenam qaabe ida haye.

<sup>25</sup> Taaki Yerusaalemir dahaana gazana eenaam kelshana ida yive. <sup>26</sup> Ogonoar Mo-qodooniabee Akayabe gidir dahaana Barjodar woylamin qajayna eena Yerusaalemir gazana eenasa shaarinte qambhinaam koymoka kelshana kedi nashidine. <sup>27</sup> Gon kelshana kedi nashidine; pir kedur bazanin dohonna, ima keam ko zaske. Harrna hambidianna, Ayiwdtay hamma eena Ayiwd eenabesana kinka manpasinngayn yerinam kashimayna ke hanna, Ayiwdtay hamma eenaar waanngayn yerinka Ayiwd eenaam kelsha ko zaske. <sup>28</sup> Ogo keam kelshana pucchadhon koymonam Yerusaalemdar tiyate yivayse kena inin imate macchonsa budonte, ogo yenin dohon goynka Ispeen peendar ida yive. <sup>29</sup> Yekal inin nivenka, Kiristoosin ina imon gobshinam thoothi yembesana kinka inin kashimenam dhesayda dhese.

<sup>30</sup> Imbanaanato, isa mashimenna Barjoam miskaate imbesana kinka yenin kashimoadettsi wosa Imbaa Yesus Kiristoossa naabenbee Manpas Gazansa nashimmakkonbeka yeam ida miske. <sup>31</sup> Ina yenin miskaynoar Yiwda peente dahaana Barjodar woylamin qajiminasa aanira inin dhaqoadettsibee Yerusaalem gidir dohonoisa waadimanoar gazana eenaam wozisayno konin maatoadettsibene. <sup>32</sup> Ogonoar Barjosa qaabondettsi wozaka yekal nivayse yembesana kinka inin ukunsoadettsine. <sup>33</sup> Payyamonam imea Barjo ye wulbesana ki dee, amiin.

## 16

### *Bhawloossa Macchin Nagaymakkono*

<sup>1</sup> Kinkiria misken ooninte waadadhayno wosa imbanaano Peeben woylamin yidar qajadhoono konin maatonam yenin dhesoadettsi ida nashe. <sup>2</sup> Gazana eena chocchi tiya keam konin zaskendettsi, Imbaa wontea Yesussa naabenka bannzo! Koam tiyee. Kodi imbee thoothina eenabeam kelshidine; ogonante koam zasken yerin wulka kelshimate.

<sup>3</sup> Yesus Kiristoosna imbesana kinka waadadhayna Bhirsqillabee Aqilabena “Nagaya” ina kena hamee. <sup>4</sup> Kedi ina hamayse diyana ashkimbhidine. Ogonante inta bish dayma, Ayiwdtay hamma eenasa shaarira Barjodar woylamin qajaanasa misken onna wulkeam gobsha ke gobshe. <sup>5</sup> Kesa ooninte Barjoam miskota bukyna eenana “Nagaya” ina kena hamee.

Isiya peente birayse Kiristoosdar woylamin qajaa, inin nashea Epenethoosna “Nagaya” ina kina hamee.

<sup>6</sup> Yena thoothi qajadhon Mayriyamna “Nagaya” ina kona hamee.

<sup>7</sup> Imbesana kinka dhaxadhaana, isa muldha maataana Androniqoosbee Yuniasbena\* “Nagaya” ina kena hamee; kedi Kiristoos yisa tarjamonnante kinin yittsaanasa shaarira dhesimaana, pir Barjodar woylamin qajintanka ina biraanane.

<sup>8</sup> Imbaa wontea Yesuska inin nashea Ambhilaatoosna “Nagaya” ina kina hamee.

<sup>9</sup> Kiristoosna wombесана kinka waadadhea Urbaanosbee inin nashea Istaakusbena “Nagaya” ina kena hamee.

<sup>10</sup> Kiristooska kinin dohonam taysate shedadhaa Abheliisna “Nagaya” ina kina hamee. Aristhobuloossa oonin eena maataanana “Nagaya” ina kena hamee.

<sup>11</sup> Isa muldha maataa Yerodiyonna “Nagaya” ina kina hamee. Narsisessa oonin eensa shaarira Imbaa wontea Yesusdar woylamin qajaanana “Nagaya” ina kena hamee.

<sup>12</sup> Imbaa wontea Yesusna qajadhaana Tirupaynabee Tirupoosabena “Nagaya” ina kena hamee. Inin nashayno, Imbaa wontea Yesusna kattsi qajadhon Persisna “Nagaya” ina kona hamee.

<sup>13</sup> Imbaa wontea Yesuska dhesadhaa Rupoosna “Nagaya” ina kina hamee; iam yisa naasidettsi hayayse nashen kisa indanna “Nagaya” ina kona hamee.

<sup>14</sup> Asinikirtoosbee, Pilegoonbee, Yermeesbee, Patrobaasbee, Yermaasbe, kembesana kinka dahaana imbaanaana wulnaar “Nagaya” ina kena hamee.

<sup>15</sup> Pilologosbee, Yuliabee, Neeriabee, kisa indanaanbee, Olumpoosbee, kembesana kinka dahaana gazana wulbena “Nagaya” ina kena hamee.

<sup>16</sup> Gonin hamon nashimmakkoka kinka kiam sunqintaka kinka “Nagaya” hamee. Kiristoossa misken onna wul yena “Nagaya” ke hamade.

### *Bhawloossa Macchin Kiilimeno*

<sup>17</sup> Imbanaanato, yenin dheson timmirinam jibbintaka yesa shaarinte edimenam bavaynabee Barjodar woylamin qajintaka yenin wocchimbhoamadettsi yena goa maatayna eenabekalanka yeam yenin tooloadettsi ida miske. Kekalanka pegimbhee.

<sup>18</sup> Iginadettsina eena yisa siyon anngarmanna waadadhayna eenane; wosa Imbaa Kiristoosna waadadhaynatehe. Daatha daathea upsibee eediam shawkea dhalqbeka siyamoysa qolmina eenasa woylaminam keda tayse.

<sup>19</sup> Barjona ee yenin hamayno een wulna qansimidine; ogona yennon goynka inta wozadhidine. Ko dahaannaar payyan yerinna pakalla eena, siyon yerinna leemina eena yenin doadettsi ida nashe. <sup>20</sup> Payyamonam imea Barjo Seethaanam saana yesa roon demente kiam kida tige.

Wosa Imbaa Yesussa sunin imintono yembesana ko dee.

<sup>21</sup> Imbesana kinka waadadhea Thimaatoos “Nagaya” yena ki hamade. Isa muldha maataana Luqyoosbee, Iyaasoonbee, Sosibhathiroosbe “Nagaya” yena ke hamade.

<sup>22</sup> Warqatin koam thaapaa inta Therthiyos Imbaa wontea Yesuska “Nagaya” ida yena hame.

<sup>23</sup> Ta yinnon ooninte imbee kote dahaana Barjoam miskota bukyna eenabeam chocchamon tiyea Gayoos “Nagaya” yena ki hamade. Pir katamansa koymonam yedea Erasthoosbee wosa imbanaasa Qorthoosbe “Nagaya” yena ke hamade.

<sup>24</sup> [Wosa Imbaa Yesus Kiristoossa sunin imintono ye wulbesana ko dee, amiin.]

### *Bhawloossa Macchin Gobshino*

<sup>25</sup> Inta Yesus Kiristoossa inin giyayno Barjosa dhacchintan upsin goynka yeam woysana damea Barjona gobshi ko dee. Ogoro upsino, ena wodara yedayse aachimayse dohoono, ta may haapadhidine. <sup>26</sup> Ogoro Barjokala qansayse eenna giyaynasa math-aapinte ta may haapadhidine. Zarsino wul Barjodar woylamin qajayse kina konin ee hamoadettsi rooro wul lay dehea Barjo kinin giyonna zarsino wul Kiristoossa konin dhesoadettsi ko haydhade. <sup>27</sup> Kidi bish pakala maataa Barjona, Yesus Kiristoosbar rooro wul lay gobshi ko dee, amiin.

\* 16:7 Kala kala mathaapina “Yunias” hamenam “Yulia” keda hame.

## **Kiristoos Yisa Tarjamonnante Kinin Yittsaa Bhawloos Qorontoos Eenana Kinin Thaapoono Birono Warqanno**

### *Ardinta*

Bhawloos Barjosa dhacchintan upsinam workisana kinin yaayon makkansonam Epsoon katamante dahayse ko warqatinam Qorontoosir Barjodar woylamin qajaanana ki thaapade. Kinin thaapoonoar 47-50 levensa iintene. Misken ooninte dhacchintansa aapino hamin daa konin zaskenbee wosa dhaqidinam waadimadar hamin dhaa konin zaskenbeam kidi thaapidine. Bhawloossa Barjosa dhacchintan upsinam tarjansa gembho bhocchino Barjodar woylam qajabee kina goninka daabe zaskenamne. "Kiristooska" hamea upsea Barjodar woylamin qajaa kiam dhacchaa Imbabesana kisa dohon haalin goynam dhaana maasayse maasayse ko haapadhe.

Bhawloos birayse Qorontoos katamante kinin yeskoono Barjosa dhacchintan upsinam workisayse giyota lanso kinin yivonkane (Yi Waa 18:1-17). Bhawloos Sillaasbee Thimaatoosbe Moqodoonia peera kenin nivenam toolaate dahayse Aqilabee Bhirsqillabesana ki dhesimade. Kedi Bhawloosdettsi apala ooni jaagayse yisa daytanna kinin haapenna, Bhawloosaar kembesana kinka dahaate Barjosa dhacchintan upsinam kida giye.

Sillaasbee Thimaatoosbe kenin nivon wodanka, Teselonqebee Beeriaber dohon yerinsa Bhawloosna ke giyade. Bhawloos kattsika Yesus Barjoyn qadhaa Kiristoos kinin dohonam giyte ki dahade. Qorontoosir dahaana Ayiwd eena ogo upsinam tiyma kinin garonna, Bhawloos Ayiwday hamma eenasa shaarinte yisa waadiman ki yedade (Yi Waa 18:6-7). Thoothino Barjodar woylamin ko qajade. Ayiwd eensa bukin raqinsa hayoa Qerishhoos pir Barjodar woylamin ki qajade. Bhawloos arpi tabhi lankay Barjodar woylamin qajaanaam dhettsaate ogote ki kappade.

Bhawloos makkanson Epsoon katamante kinin dehenka Qelove oonin eenara niavaana eena Qorontoos misken ooninte palimebee edimebe konin dohonam kina ke giyade. Pir Qorontoosir Barjodar woylamin qajaana warqatka oysime kala kala oysayse Bhawlooskalanka malsi ke zagade. Kina dhalqinam maasana Bhawloos Qorontoosir Barjodar woylamin qajaanana birayse kena warqat ki thaapade.

Kaa mathaapaam raq oydidar kashana dandima ko dandime:

1. Nagaymakkobee Barjona gobshibe (1:1-9)
2. Qelove oonin eenara Bhawloosin qansonsa malsino (1:10-6:20)
  - a) Barjo eensa shaarinte dohon edimen goynsa (1:10-17)
  - b) Pakalmakkon goynsa (1:18-2:16)
  - c) Barjona waadadhayna eena goynsa (3:1-23)
  - d) Kiristoossa tarjamonnante yittsadhaana eena goynsa (4:1-21)
  - e) Barjo eenasa shaarinte dohon sharmucimakkon goynsa (5:1-13)
  - f) Kinka kinka qaashimadhen goynsa (6:1-20)
3. Qorontoosir Barjodar woylamin qajaanara nittsadhon warqatinsa malsino (7:1-16:12)
  - a) Keemon goynsa (7:1-40)
  - b) Galabee nathamobe goynsa (8:1-11:1)
  - c) Kinka miskenna bukadhenka zaskayno dambino (11:2-12:31)
  - d) Gonin hammo nashimmakkono (13:1-13)
  - e) Manpas Gazansa iminton goynsa (14:1-40)
  - f) Dembhira dhaabhadhen goynsa (15:1-58)
  - g) Bhawloosin qaaboono (16:1-12)

#### 4. Macchin kiilimenbee nagaymakkonbe (16:13-24)

Mathaapinsa gembho bhocchino wosa dhaqidino wonin dehen waadimaka haapadha konin zaskenamne. Barjodar woylamin qajaana bhoccha zaskayno Kiristooska haali sada haapidi wo hanna, Manpas Gazano wosa iinte konin dohonna, haali daynta ko woam zaske (3:16-17; 6:11bee 19-20be). Ogo wodanka Qorontoos katanamo siyamobee sharmucimakkabe dhesimoono ko dahade. Barjodar woylamin qajidin naabenka aaninka ashkadhaa barjoasa gazan ooninte sharmucimakkon keda waadadhe. Bhawloos Barjodar woylamin qajaana Manpas Gazansa ooni kenin dohonna, tipa eedi kenin doadettsi ki bhocchisade.

<sup>1</sup> Barjo qaabenka Yesus Kiristoos yisa tarjamonnante eelayse kinin yittsa i Bhawloosbee wombanaasa Sostensbekalanka nittsadhoono warqannone. <sup>2</sup> Qorontoos gidir dohon Barjosa misken ooninte Yesus Kiristooska gaza ke maate eldhayse gazisadhaana eenana, pir kembee wombesa Imba maataa Imbaa wontea Yesus Kiristoossa naabenam hamote ko hannaar dahayse eelayna eena wulna nittsadhoonone. <sup>3</sup> Wosa Imbaa Barjobee Yesus Kiristoosbesa sunin imintonbee payyamonbe yena ko dee.

#### Bhawloos Barjoam Kinin Gobshoono

<sup>4</sup> Barjo Yesus Kiristoosbar yeam nashayse kinin imon sunin imintonna rooro wul yennon goynka kiam ida gobshe. <sup>5</sup> Yer wulka, dhalqin dhalqadhen wulbee dhesidin wulbe Kiristoos goynka yedi wodimbhidine. <sup>6</sup> Kiristoos goynsa yena wonin giyoono tarjamono woylamin yennonte wocchimbhidine. <sup>7</sup> Ogonante wosa Imbaa Yesus Kiristoossa may kisa nivintanam wozaka yenin toolenka, yekalanka Barjo imintonsa kala hattear joogehe. <sup>8</sup> Wosa Imbaa Yesus Kiristoos kinin nivea rooroaka, yer siya yindar haapadhimina maatayse yenin doadettsi, macchinka yekka kidi yeam wocchinsayse gisha ki gishe. <sup>9</sup> Naasa kintea, wosa Imbaa Yesus Kiristoosbesana kinka kalaa yenin maatoadettsi yeam eelaa Barjo kidi gon hamaane.

#### Barjodar Woylamin Qajayna Eenasa Shaarinte Edime Konin Zaskimoono

<sup>10</sup> Imbanaanato, “Edime yennon shaarinte konin doamadettsi yedi wulatte kinka kinka kina ee hamayse qaabi kalaabee woylam kalaabeka wocchimbhayse dehee” hamayse wosa Imbaa Yesus Kiristoossa naabenka ida yeam miske.

<sup>11</sup> Imbanaanato, yennon shaarinte paloyn dohonam inta Qelove zelen eenakalanka qansidine. <sup>12</sup> Ogono palonoar yedi yesa waa “Inta Bhawloossane”, waa “Inta Abhiloossane”, waa “Inta Bhethiroossane\*”, waa “Inta Kiristoossane” yeda hame. <sup>13</sup> Ta Kiristoos edimidu? Inta Bhawloos masqalindar konngadhayse yena ziitadhidu? Yenin shiidoono i Bhawloos naabenkaw? <sup>14-15</sup> Eedi hay ki hannaar, “Yedi Bhawloos naabenka ye shiiddhade” kinin hamoamadettsi inta yennon iira Qerisbhoosbee Gayoosbeam inin shivorra eedi hayyeamaar inin shivaamonna Barjoam ida gobshe. <sup>16</sup> Taar ina bhoqayno Isthipaanassa oonin eenam inin shivoonone. Iginaranka ab eedi inin shivaa ina bhoqehe. <sup>17</sup> Ogonoar Kiristoos iam kinin nittsoono kisa dhacchintan upsinam eenna inin giyoadettsine; inin shivoadettsi iam nittsadehe. Kiristoos masqalindar konngadhayse ziitadhintaka kisa diydino sun konin shidhoamadettsi, kisa dhacchintan upsinam inin giyayno eedikalanka haapadhon pakalmakko dhalqkatehe.

#### Barjosa Pakalmakkonbee Kantanbe Kiristooska Konin Haapadhoono

<sup>18</sup> “Kiristoos masqalindar konngadhintaka ziitadhayse ki diyade” hamayno Barjosa upsino kayen goyndar dohon eenna yer bari apone; wo dhaqayna eenana Barjosa kantane. <sup>19</sup> Ogonoar

“Pakalla eenasa pakalmakkonam kaysayda kayse;

\* <sup>1:12</sup> Bhawloos “Bhethiroossa” yinin thaapenka, kisa naabenam Sooria Peen aponka “Keepa” hamayse ki thaapade. Pir 3:22bee, 9:5bee, 15:5bedar agaadettsi ki thaapade.

dhesaana eenasa dhesidinam shiishayda shiishe” hamayse thaapadhidine. <sup>20</sup> Ta ea pakalaa hamote ki dahaa? Yigginam dhettsea hamote ki dahaa? Peen kogayn dhalqin dhesea ea hamote ki dahaa? Barjo peen kogayn pakalmakkonam yer pootima hayadaa?

<sup>21</sup> Peen kodar dohoono eeno peen ko pakalmakkonka Barjoam konin dhesoamadettsi Barjo pakalmakkon yinnonka keam ki marade. Ko daaanraar peen kodar daaanraa eenana giidhenka, kena yer bari apo maatoono kono Barjosa upsin qansayse Kiristoos-dar woylamin qajayna eenaam dhacchana Barjosa payya qaabi ko maatade. <sup>22</sup> Ayiwd eena yer tarshea haydhaka shedana keda zage; Girik eenaar pakalmakko dhesana keda zage. <sup>23</sup> Wodi masqalindar konngadhayse ziitadhaysaka diyaa Kiristoosam woda giye. Ogono wonin giyaynoar Ayiwd eenana goa, Ayiwdtay hamma eenanaar yer bari apo ko maate. <sup>24</sup> Eldhaana eenana ko hanna, Ayiwd eenana ko hannaar, Girik eenana ko hannaar, Kiristoos Barjosa kantabee pakalmakkobene. <sup>25</sup> Ogono Barjosa malgimmakko gantine hamayse qaabadhayno yerro een pakalmakkondara saginone. Barjosa kanta kaymakkone hamayse qaabadhayno yerroar een kantandara saginone.

<sup>26</sup> Imbanaanato, yenin eldhonam qaabee; yennon shaarinte eedi bhocchika eedi pakala daaabee, kantaka daaabee, eedi gebhi daaabe thoothitehe. <sup>27</sup> Barjo pakalla eenaam ooshinsota peen kodar malgimidettsi hayayse shedadhayna eenaam ki kamade. Kantaka daaanaa eenaamaar ooshinsana peen kodar kanta qolminadettsi hayayse shedadhayna eenaam ki kamade. <sup>28</sup> Barjoar peen kote daaanaa eenkal yer gebhi detha maatayse haapadhenam shiishana peen kodar yerin bagadhonbee, yer tokaa hayayse shedadhonbee, yerin pootimonbeam ki kamade. <sup>29</sup> Ogo yin kininna hayoono, eedi hambhea wul Barjo birante kinin erimoamadettsi hamaysene. <sup>30</sup> Yeam Yesus Kiristoosbesana kinka kalaa hayaar Barjone. Yesus Kiristoos Barjokalanka haapadhaa wosa pakalmakkoabee tipamobene. Woam gazisayse Barjo eedi ki maasade; pir yinnon sadanam seesosa baza kashadhea hayayse diyntaka woam ki dhacchade. <sup>31</sup> Ogona Mathaap Gazante thaapadhdontettsi, erimea Barjoka ki erime.

## 2

<sup>1</sup> Imbanaanato, inta yekal inin nivon wodanka, Barjosa aachin dhalqinam yena inin dhettsenka, eedi dhalq dheseadettsibee pakalmakkokabe yena giyatine. <sup>2</sup> Harrna hambhidianna, inta yekal inin dohon wodanka, Yesus Kiristoosam bish, kidiar masqalindar ziitadhayse kinin diyonam inin giyerra yer ab inta dhesattine hamayse qaabidi i dahade. <sup>3</sup> Yekal inin dohon wodanka, inta qajebee, kurtumbhebee, gibazbeka i dahade. <sup>4-5</sup> Yedi woylamin yenindar qajayno eedi pakalmakkodar daymaka Barjo kantandar konin doadettsi, inin yena giyenbee dhettsenbe Manpas Gazansa kantanam dhayntakane; eediam yidar maasota giidhea pakalmakko dhalq yena giyatine.

### *Barjo Yisa Manpasinka Kinin Imayno Pakalmakkono*

<sup>6</sup> Ko daaanraar Barjodar woylamin qajintaka wocchimbhaanana wonin giyenka, pakalmakkoka woda giye; pakalmakkono ogonoar peen ko gayno way peen kodar haymbhaana hayamoysa shidhayna eena gaynotehe. <sup>7</sup> Wonin giyaynoar Barjosa aachin dhalqin pakalmakkonone; ogonoar wodan kosa birayse Barjo ena woam gobshota kinin ashkoono aachimayse dohoonone. <sup>8</sup> Peen kosa hayamoynsa daaanraa eenasa eedi kala hattear pakalmakkon koam dhesadehe. Ini dhesidi hatte ke hanna, gobshin Imbaa Yesusam ziitayse deesehe. <sup>9</sup> Ko daaanraar,

“Aapiyn haapaamon,  
qaamiyn qansaamon,  
woylamiyn qaabaamon,  
Barjo kiam nashaynana ki ashkade”

hamayse Mathaap Gazante thaapadhdontetsi, woda koam giye.

<sup>10</sup> Manpas Gazano Barjosa qaabon aachi maatonam shiishima, yer wulam marmarayse dhesa ko dhese. Barjoar yisa aachin dhalqinam Manpas Gazan goynka wona may hayayse ki dhahade. <sup>11</sup> Ea yinti kidara kisa iinte dohonam eedi hayyear dhesehe; ogodettsi taar Barjo Manpasin goynka daymaka, goyti abka Barjo qaabenam eedi hay ki hannaar dhesea solehe. <sup>12</sup> Wodi Barjoyn wona sun imon wulam wonin dhesoadettsi, Barjokala imbhon Manpasinam wo tiyade; peen kogayn manpasinam tiyootone.

<sup>13</sup> Ogonante wodi manpasinngayn manpasinka dahaana eenana woda giye. Wonin giyaynoar Barjosa Manpasin woam dhettsen upsinkane; eedi pakalmakkoka woam dhettsadhon upsinka giyattone. <sup>14</sup> Barjosa Manpasin yidar qolma eana Manpasin gayno kina malgimmakko konin maatenna, kidi koam tiyana damehe; goynam kosa Manpasin eshkenna, may hayayse kidi dhesana damehe. <sup>15</sup> Barjosa Manpasin dahaa ea yer wulam marmarayse dhesa ki dhese; kiam eedi hayyear marmarayse dhesehe.

<sup>16</sup> “Barjosa qaabonam dhesana damea hayne?

Kiam kiileasin hayne?”

hamayse thaapadhdontetsine. Kiristoossa qaabono wosa iinte daane.

### 3

#### *Barjona Waadadhayna Eenasa Waadimano*

<sup>1</sup> Imbanaanato, yedi kattsika peen kogayn yerinam qaabaynabee Kiristoos goynka akar wocchimbhaamma naasidettsibe yenin dohonna, Barjosa Manpasindariy dahaana eenana inin giyendettsi yena giyana inta damaatine. <sup>2</sup> Akar galan wocchin itsan yenin yedaamonna, raathi bish ida yeam kunse; gala wocchi yeam kunsaatine. Taaki ko hannaar gala wocchi itsana yedi damettene. <sup>3</sup> Harrna hambhidianna, kattsika peen kogayn yerinam yedi qaabaynane. Woogintobee palimebe shaarin yennonte konin dohonna, Barjo eenadettsi dayma peen kogayn yerinam qaabayna eenadettsi yesa maatintatayu? <sup>4</sup> Waa “Inta Bhawloossane”, waar “Inta Abhiloossane” yenin hamenka, Barjo eenadettsi yedi maateetene.

<sup>5</sup> Ta keeda Abhiloos hare? Bhawloossin hare? Kedi Barjodar woylamin yenin qajoadettsi yeam hayaana Barjona waadadhayna eenane; kedi meteka meteka yisa kena Imbaa wontea imon waadimandettsi keda waadadhe. <sup>6</sup> Inta koraane; Abhiloos noqon wushaane; ko dahaannaar getsaa Barjone. <sup>7</sup> Ta keeda gettsea Barjo ki hanna, koraabee noqon wushaabeyn bhocchadhea kesa yer solehe. <sup>8</sup> Koraabee noqon wushaabe kiaddhane. Ko dahaannaar eeno yisa meteka meteka waadiman yinnondettsi bazanam koda tiye. <sup>9</sup> Wodi Barjobete kinka waadadhaynane; yediar Barjosa haamibee oonibene.

<sup>10</sup> Barjo yisa sunin iminton goynka ina kinin imondettsi, pakalmakkoka eedi ooni woyseadettsi, ooninsa raqinam i ashkade; ea waar ogo inin meeshate ashkon raqindar kida oonin woyse. Ko dahaannaar eeno wul yisa meteka meteka ooninam hamin konin woysenam mete yisaam ko gishe. <sup>11</sup> Harrna hambhidianna, Barjoyn ashkaa raqadaranka eedi hay ki hannaar, raq ab ashkana damehe. Barjoyn ashkaa raqadettsi maataa kidi Yesus Kiristoosne. <sup>12</sup> Eedi hay ki hannaar, ogo oonin woysea meeshate ashkadhon raqindar worqibee, anngamo birrebee, bazaysa detha maataa seenibeka, pir haaqabee, shudhibee, hasarabeka ooni woysea ki hanna, <sup>13</sup> kalaa kalaana eena yer harka ooninam yisa kenin woysonam macchin rooroaka may shedadhe. Ogo wodanka eena kalaa kalaanasa ooninam woysidino yer harka konin dohonam shedota nuunka koqate koda shedadhe. <sup>14</sup> Eedi hay ki hannaar, ogo meeshate ashkadhon raqindar oonin woysea easa waadimano nuunka atima shidhidi ko hanna, waadiman yinnonsa bazanam tiya ki tiye. <sup>15</sup> Eedi haysaar waadimano nuunka atidi ko hanna,

baza tiyma kida shidhe; ea kidi meten yinnonka dhaqa ki dhaqe. Ko dahaannaar kisa dhaqano nuunsa iira gobate dhaqaa eedidettsi maataysene.

<sup>16</sup> Yedi Barjosa ooni gaza yenin dohonbee Barjosa Manpasinin yennon iinte konin dohonbeam dheseetenu? <sup>17</sup> Eedi hay ki hannaar, Barjosa oonin gazan kayseam Barjoar kiam kaysa ki kayse. Barjosa onno gazane; onno gazano ogonoar yedine.

<sup>18</sup> Eedi hay ki hannaar, meten yinnonam ki taysabhoode; yennon shaarinte peen kogayn pakalmakkonka “Inta eedi pakalane” hamea dahaa ki hanna, gonin hamon pakalmakkonam haapota meten yinnonam eedi malgimidettsi ki maase. <sup>19</sup> Harrna hambhidianna, peen ko gayno pakalmakkono Barjo birante malgimmakko yer konin dohonnane. Ogonoar “Barjo pakalla eenasa gadimmakkon waadiman kennonka keam yeda ki yede” <sup>20</sup> pir, “Barjo pakalla eenasa qaabeno pootima konin dohonam dhesa ki dhese” hamayse thaapadhidine. <sup>21</sup> Ogonante yer wul yenti konin dohonna, eedi hay ki hannaar, eedika ki erimabhoode. <sup>22</sup> Bhawloos ki hannaar, Abhiloos ki hannaar, Bhethiroos ki hannaar, peen kodar dohoono ko hannaar, sadaka daadhea ko hannaar, dembhi ko hannaar, ta dohoono ko hannaar, os birante nivayno ko hannaar, yer wul yentine; <sup>23</sup> yediar Kiristoossane; Kiristoosaar Barjosane.

## 4

### *Kiristoossa Tarjamonnante Yittsadhaana Eena*

<sup>1</sup> Ta keeda eeno wul Kiristoossa waadiman waadadhadyna wonin dohonbee Barjosa aachin dhalqinam may hayayse giyntasa hayamo wona imbhonbeam kenin shedoadettsi ko keam zaske. <sup>2</sup> Hayamon yinnante imbhaanaar woylam yinindariy qajadhea eedi maatayse haapadhinta ko keam zaske. <sup>3</sup> Ta keeda yedi ye hannaar, eeno waani ko hannaar, idar ko pirdaakaar ina ogono yer hayehe. Intaar meten innondar pirdattine.

<sup>4</sup> Inta inin bhocchenka, isa iinte seeso kala hattear ina dahaa bhoqehe. Ko dahaannaar ogoam inin guyenka, tipa eedi iam maasehe; idar pirdea ea Imba Yesusne. <sup>5</sup> Ta keeda ogo wodanin yeskenka yekka eedi haydarar pirdeebhode; Imba Yesusin nivenka yekka toolee. Kidi thipansa iinte aachimayse dohon yerinam shaakandar bula ki bule; eenin yisa woylaminte aachon qaabenam may hayayse dhaa ki dhee. Ogo wodanka eeno wul meteka meteka kona maaten gobshinam Barjokalanka koda tiye.

<sup>6</sup> Imbanaanato, ogo yerinam yenin dhesoadettsi inta yena hamayse imbee Abhiloosbeam kamsi hayayse giydine. Koam inin yena giyayno “Barjosa upsinte thaapadhorra sagaabhode” hamen kiilimenam yedi wokalanka dhesayse, ea waaka erimayse ea waam yenin bagoamadettsi hamaysene. <sup>7</sup> Ya waani eendara yer harka sage? Yer wulam hanin tiyoono Barjokalankane; ta yer wulam hanin tiyoono Barjokalanka ko hanna, kikalanka tiyaamadettsi harrnaa erime?

<sup>8</sup> Keeda ogona “Wodi mishidine! Wodi wodimbhidine!” yeda hame; wokalanka edimayse bitimaa eedi ye maatade. Wodiar yembesana wonin bitimoadettsi, bitamono yенно gon ko hanna, payyane. <sup>9</sup> Harrna hambhidianna, Barjo woam Kiristoos yisa tarjamonnante kinin yittsaanaam dembhi kedar pirdadhaysaka entsate yiidhayna eensa macchinte woam kinin hayaa koda ina maate; ogo goynka Barjosa gaananasa birantebbe peen ko eensa birantebbe eenin yiigi yiigayna eedi wo maatade. <sup>10</sup> Wodi Kiristoosna hamayse eena malgmina wo maatade; yedi Kiristooska eena pakalla ye maatade. Wodi eena kantaysa qolmina wo maatade; yedi eena kantanka dahaana ye maatade. Wodi eena bagadhaana wo maatade; yedi eena gobshadhaana ye maatade.

<sup>11</sup> Ta koka yekka daaqardhitebee dheebardhitebe wo dahade; wonin qaadhea yer kaysisayse wo dahade; qandhite wo dahade; ooni qolmina eedi maatayse woda gaale.

<sup>12</sup> Aanin wonnonka waadadhite woda qaje; woam kenin ashenka, kena payya malsi woda maase; woam kenin oytayenka, kena darshooda darshe. <sup>13</sup> Naaben wosa kenin

genenka, wodi kena lemmakko upsika woda maase. Wodi ta wodan koka yekka yer wulsa dhabadhaana wuqurinabee peera sahate laldhayna hargenabe wo maatade.

<sup>14</sup> Inta koam yena inin thaapoono inin nashayna naana innadettsi hayayse yeam kilanane, yeam ooshinsanatehe. <sup>15</sup> Kiristoos goynka paydate macchadhima yeam gettsayna eena ke dahaakaar, imba yesa thoothi qolehe. Barjosa dhacchintan upsinam yena guyada Yesus Kiristoos goynka yeam adhaa intane. <sup>16</sup> Ogonante idettsi ye maate ida yeam miske.

<sup>17</sup> Ogonante Imba Yesuska isa naasi maataa, inin nashea yindar woylamin qajadhea Thimaatoosam yedar inta yittsidine. Inta raq wul gidir dohon misken ooninte inin dhettsendettsi, Kiristooska maaten isa dayntansa kidi yena bhocchisasane.

<sup>18</sup> Yennon shaarinte een waani waanina inin yeam shedana nivima konin maatenna, pormakkoka ko dahade. <sup>19</sup> Ko dahaannaar Imbaa wontea Yesussa bhocchi ko daana theedika yekal nivayda nive. Ogo wodanka igina poorimbhayna eenasa dhalqin bish dayma, kesa kantanamaar dhesana ida zage. <sup>20</sup> Harrna hambhidianna, Barjosa bitamono konin woyayno dhalqkatehe, Barjosa kantankane. <sup>21</sup> Yedi yer haree nashe? Yeam qanana micare bavate yedar inin nivoadettsi ye nashimoo? Nashimmakkobee lemmakkobeka yedar inin nivoadettsi ye nasho?

## 5

### *Barjo Eenasa Shaarinte Sharmucimakkoyn Dohoono*

<sup>1</sup> Yennon shaarinte sharmucimakko waadimayn dohonam koda giidhe. Ogodettsino sharmucimakkon waadimano Barjoam dhesimina eenasa shaarinte hattear yin haydhe; ogonoar yennon shaarinte imbaa geshonam keemaa eedi daane ko hambhade. <sup>2</sup> Ta ogodettsino waadimano yennon shaarinte ko daaka yedi harrnee poorimbhe? Ogono waadimano yennon shaarinte konin haydhonna, qaaboka atayse ogoam hayaan eam yennon shaarira bula yeam ko zaske.

<sup>3</sup> Hamin ko dahaannaar, inta yennon shaarinte i qolminaar, isa qaabenka yembesana i dahade. Yembesana kinka inin dohondettsi, yin ogodettsin siyon waadimanam hayaan eadar inta taaki pirdidine. <sup>4</sup> Imbaa wontea Yesussa naabenka yenin kinka kidar bukenka, intaar isa qaabenka yembesana ida dee. Ogo wodanka Imbaa wosa Yesussa kantano shaarin wonnonte konin dehenka, <sup>5</sup> agaa ea seeson ogoam hayaasa waanam Seethaanin galshoadettsi kiam saskate ima ko yeam zaske. Ogono yin yenin hayayno Imbaa wontea Yesusin pirdanna kinin niven rooronka ea agaasa sadano pirdira konin dhaqoadettsine.

<sup>6</sup> Ta yenin erimayno yesa yer payyatehe. Irsho likka taapan wulam konin occhenam yedi dhesattenu? <sup>7</sup> Ta keeda irsho qolma yenin dohondettsi, irshoyn qolma taapa haali taapadhaa maatota irshon gecchonam yekalanka bulimate. Harrna hambhidianna, wosa Paasikanna\* yaata Kiristoos wona marsha machadhidine. <sup>8</sup> Ogonante Paasikan rooronaam wonin gobshenka, irshonka baxadhon balasha maaten cubbonbee siyon waadimanbeka dayma, irshoysa qolmon balashadettsi dhari maatonbee gonin hamonbeka wo gobshe.

<sup>9</sup> Kosa birayse inin yena thaapon warqatinte "Sharmucimakkon hayayna eenabesana kinka wormeebhode" inta yena hamidine. <sup>10</sup> Yin yena isa giyntano peen kote dahaana eena sharmucimaynabee, eensa yerin anngardhaynabee, eensa koymon buuraynabee, aaninka ashkadhaana barjonana goodimayna eenabesana kinka wormeebhode isa yena hamintatehe. Ini yin ko daana, peen kora waana uta yeam ko zaske. <sup>11</sup> Inin yena thaapoono "Inta Barjodar woylamin qajeane" yiam hamaate sharmucimakkon hayeabee, eensa yerin anngardheabee, aaninka ashkadhaana barjonana goodimeabee,

\* 5:7 "Paasika" hamen upsinam Haalin Mallan mathaapinsa macchinte thaapadhaanar shedaa.

eenaam asheabee, barin bardheabee, eensa koymon buureabesana kinka wormeebhode isa hamintane. Ogodettsin waadiman hayea eabesana kinka galaar itseebhode.

<sup>12-13</sup> Barjodar woylamin qajimina eenadar inin pироадеттси iam zaskehe; Barjo kedar pirda ki pirde. Barjodar woylamin qajayna eenadar pirdano yeam zaska zaskayu? Ogona “Seeson waadadhaa eam yennon shaarira bulee” hamayse ko thaapadhade.

## 6

### *Kinka Kinka Qaashimadhen Goyno*

<sup>1</sup> Yennon shaarinte eedi kalaa Barjodar woylamin qajaa ea waabesana kinka wacimidi ki hanna, kinka kenin wacimonsa goynam Barjo eedi maataana eena kina kenin shedoadettsi giyan garayse, kiam bersanna Barjoam dhesimon eendar hamin ki yivana dame? <sup>2</sup> Barjo eeno os birante peen kodar dohon eendar konin pirdenam yedi dhesattenu? Peen kodar dohon eendar pirdayna ye hanna, ogo likka likkon dhalqindar yenin pirdayno yeam hamin ko bashe? <sup>3</sup> Ta peen kodar dohon dhalqindar wonin pirderra sagayse Barjosa gaananadarar pirdota wonin dohonam yedi dhesattenu?

<sup>4</sup> Ta peen ko gayno dhalqino yesa shaarinte daa ko hanna, misken ooninte dhalqiysa tiidhimina eenayn pироадеттси keam ye hayo? <sup>5</sup> Ogoam yena inin giyayno yenin ooshimbhoadettsi hamaysene. Yennon shaarinte qaabeka dahaa qaashinsana damea eedi kala hattear qolaaw? <sup>6</sup> Keeda Barjodar woylamin qajayna eena kinka kiam berso pirdin pirdadhen oonindar keda yive. Kenin yivaynoar Barjodar woylamin qajimina eenadarne.

<sup>7</sup> Ta kinka kiam kiam yenin bersayno ogono meten yennonka macchi yesa bashadhintane. Yin yenin hayerra yenin gendhenbee taysadhenbe yena payyatayu? <sup>8</sup> Ko dahaannaar Barjodar woylamin qajayna yedi kinka kiamaar geneeda gene, pir tayseeda tayse. <sup>9</sup> Siyan waadadhayna eena Barjosa bitamonam kenin tiymonam yedi dhesattenu? Ogodettsin yerinka taysadheebhode. Sharmucimakkon hayayna eenabee, aaninka ashkadhaana barjonana goodimayna eenabee, anngi dahayse anngika wodhaynabee, <sup>10</sup> diibinabee, eensa yerin anngardhayna eenabee, barin bardhayna eenabee, iirimayna eenabee, eensa koymon sarate itsayna eenabe, iginadettsina Barjosa bitamonam tiyehe. <sup>11</sup> Yesa waani waani eena iginadettsi ena ye dahade. Taaki yedi Imbaa wontea Yesus Kiristoossa naabenbee Barjo wonteasa Manpasinbeka yedi seesora ye shiindhade; ye gazisadhade; yeam tipana ko maasadhade.

### *Bishin Wonnonka Barjoam Gobshinta Woam Konin Zaskayno*

<sup>12</sup> “Yer wulam inin hayoadettsi ina giidhidine” ko hambhaakaar, yer wul ina pootehe. “Yer wulam inin hayoadettsi ina giidhidine” ko hambhaakaar, yer harrnaar worshamo qoldhattine. <sup>13</sup> “Gala iinane, iinoar galanane” ko hambhaakaar, Barjo galanbee iinbeam kaysa ki kayse. Bishino wonno Imbaa wontea Yesusnane; Imbaa wontea Yesusaar wosa bishinnane. Ogonante bishin wonnonka sharmucimakko haynta woam zaskehe. <sup>14</sup> Imbaa wontea Yesusam Barjo dembhira dhaasidine; ogodettsi yin woamaar yisa kantanka dembhira dhaasa ki dhaase.

<sup>15</sup> Bishino yenko Kiristoossa waa konin dohonam yedi dhesattenu? Ta keeda Kiristoossa waanam tiyayse sharmucimakkon hayen edon waanbesana kalaa i hayo? Yin hayattine! <sup>16</sup> Sharmucimakkon hayen edonbesana kinka sharmucimakkon hayea ea kombesana kinka waa kalaa kinin maatenam yedi dhesattenu? Harrna hambhidiana, “Kedi lamaana waa kalaa keda maate” hamayse thaapadhidine. <sup>17</sup> Imbaa wontea Yesusbesana kinka kalaa maatea ea kimbesana kinka manpas kala kida maate.

<sup>18</sup> Ogonante sharmucimakkon haydhenkalanka pegimbhee. Sharmucimakko dayma eediyn hayayno seesono wul waankalanka waanane; sharmucimakkon hayea ea waan

yinnondar kida seeson haye. <sup>19</sup> Bishino yenko Manpas Gazansa ooni gaza konin dohonam dhesattenu? Barjokalanka yenin tiyoono Manpas Gazano yennon iintene. Yediar yentitehe, Barjosane. <sup>20</sup> Harrna hambhidianna, Barjo yena baza kashayse ki yeam shanade. Ogonante yedi bishin yennonka Barjoam gobshee.

## 7

*Keemon Goynsa Oysadthon Oysimensa Malsino*

<sup>1</sup> Ina yenin thaapon yerinsa: Eedi maa ki keemaamma payyane. <sup>2</sup> Ko dahaannaar sharmucimakko konin haydhoamadettsi anngi kalaasa maa kallo ko dee; maa kallonsaar anngi kalaa ki dee. <sup>3</sup> Geshoa geshonna zaskonam kona ki haye; ogodettsi geshono geshoana zaskonam kina ko haye. <sup>4</sup> Harrna hambhidianna, geshonsa waan konnondar kosa hayamo qolehe, hayamono geshoasane. Tapir geshoasa kinnon waandar kisa hayamo qolehe, hayamono geshonsane. <sup>5</sup> Barjo miskota hamayse kinka dhalkayse woda likkana kinka kikala ye edimaamma, kinka kiam kiam mareebhode. Kikalanka yenin edimenka, meten yennon yenin gishen goyn yeam bashaysaka Seethaanin yeam taysate shedoamadettsi pir kinka dehee.

<sup>6</sup> Ta kono inin yena giyayno isa kiilimene, kantaka yin hayee hamintatehe. <sup>7</sup> Eeno wul maa keemima idettsi ko dee ida nashe. Ko dahaannaar Barjo eenna yisa meteka meteka qaabi waana waana ki imade. Kalaana maa keemayse kinin doadettsi, waanaar maa keemima kinin doadettsi qaabi ki imade.

<sup>8</sup> Kiam keemaamma eenabee annginaysa diyaana maanabena inta yin ida giye: Idettsi keemima ke daana kena payyane. <sup>9</sup> Ko dahaannaar meten kennonam kenin gishayno keam bashidi hatte ko daana, kinka kiam ke keeme. Harrna hambhidianna, anngarmanka kenin atenna, kiam kinin keemayno kena payyane.

<sup>10</sup> Kiam keemaana eenana inta yin ida giye: Ogono inin giyaynoar Imbaa wontea Yesusin giyoone, inin bish giyaatehe. Kembhoono edono geshoa yinteam ko garabhoode. <sup>11</sup> Garidi ko hannaar kembhima ko dee; way kosa geshoabete ko qaashime. Geshoar geshon yinnonam ki garabhoode.

<sup>12</sup> Een waanina, Imbaa wontea Yesus dayma, inta kena yin ida giye: Eedi kalaa Barjodar woylamin qajea dahayse Barjodar woylam qajima maa kisa daa ko hanna, kimbesana kinka doota nashea ko hanna, koam ki bulabhoode. <sup>13</sup> Barjodar woylamin qajon geshonsa Barjodar woylam qajima anngi kosa daa ko hanna, kombesana kinka doota nashea ki hanna, geshono kalanka ko utabhoode. <sup>14</sup> Harrna hambhidianna, Barjodar woylamin qajima geshoam Barjo geshon goynka kiam eedi yinti hayayse tiya ki tiye. Barjodar woylamin qajaamon geshonamaar Barjo geshoa goynka koam eedi yinti hayayse tiya ki tiye. Yin ko dahaamma, kesa naana minngi keda dee; taaki kedi gazane.

<sup>15</sup> Kesa iira Barjodar woylamin qajima eedi kalaa garana nashaa ki gare. Ogo wodanka Barjodar woylamin qajea geshoa ki hannaar, geshono ko hannaar, ogo keemon goynka dhaxadhaanatehe. Barjo woam kinin eeloono payyamoka wo deene. <sup>16</sup> Ya kono Barjodar woylamin qajayno mayno, geshoa hantea hannon goynka kinin dhaqensa haraa dhesaa? Ya kaa Barjodar woylamin qajea geshoa, geshono hanno hannon goynka konin dhaqensa haraa dhesaa?

*Barjoyn Eelenka Yenin Dahaadettsi Maatayse Daynta Yeam Zaskayno*

<sup>17</sup> Yedi wulatte Barjo yena kinin imon imintondettsi, yeam kinin eelon wodanka yenin dahaadettsi dehee. Misken oonin waani gidir dohon een wulnaar yin ida giye: <sup>18</sup> Eedi hay ki hannaar, yisa qaaman taxadhayse ki daaka eldhaa dahaa ki hanna, qaama taxadhaama eedidettsi maatana ki qaababhoode; qaaman taxadhima eldhaa dahaa ki hanna, qaaman yisa ki taxadhabhoode. <sup>19</sup> Qaaman taxadhenbee taxadhimonbeyn

eedina yer hayea qolehe, sunne. Zaskayno yerro Barjoyn giyonam ee hamintaka waadimintane.

<sup>20</sup> Ogonante eeno yisa meteka meteka wulatte Barjoyn koam eelon wodanka konin dhaaadettsi dahayse ko dee. <sup>21</sup> Barjoyn haam eelon wodanka ya worsho hatte ha daana, ogo yin hanin dohonna qaabisa iir ardaabhode. Worshamora utana goyti hana haapadhidi ko hanna, ogono payyamo hammo baalino hakalanka ko sagabhoode. <sup>22</sup> Harrna hambhidianna, worsho dahayse Imbaa Yesusin eelaa ea, Imbaa Yesus goynka baza qolma daadhen goynam ki haapade. Yin tapir worshotay dahayse eldhaa ea, Kiristoossa worshone. <sup>23</sup> Barjo yena baza kashayse yeam kinin shanonna eedina worsho maateebhode. <sup>24</sup> Ogonante imbanaanato, yedi wul yesa meteka meteka yenin eldhen wodanka yenin dhaaadettsi dahayse Barjosa birante daymate.

### *Kiam Keemaamma Eena Goynsa Giidhoono*

<sup>25</sup> Kiam keemaamma eena goynsa Imbaa wontea Yesuskalanka inin tiyaa upsi qolehe. Ko dhaaannaar, Barjosa payyamonka inta eedi gon hama inin dohonna, kaasa choobar guttsayse dohoono kiilime intine. <sup>26</sup> Ta wonin dohoono wodano kono gaale woda konin dohonna, yenin dhaaadettsi ye daydianna ina payya koda maate. <sup>27</sup> Yin ko dhaaakaar, maa keemidi hatte ha daana, bulana zagaabhode; maa keemaama hatte ha daana, keemana zagaabhode. <sup>28</sup> Ko dhaaannaar ya maa keemea hanna, hana seeso maatehe; yin tapir naano anzano kembhea hatte ko daana, kona seeso maatehe. Ko dhaaakaar peen kodar kenin dehen goynka kiam keemaanadar gaale koda yeske. Ogona inno qaabeno ogo gaalensa iira yenin dhaqoadettsine.

<sup>29</sup> Imbanaanato, inta yena yin ida giye: Macchin wodano orgadhidine. Keeda os maanka dhaaa maaysa qolmaadettsi maatayse ki dee; <sup>30</sup> eepayna eena eepiminadettsi, wozadhaynaar wozadhiminadettsi ke dee; koymon shanayna eenaar koymono kenti konin dhaamadettsi hayayse ke shede. <sup>31</sup> Peen kodar dhaanaa yerraka dahayna eena “Kenka woda gebhe” hamayse qaaben kennon wulam kedar ke maasabhoode. Harrna hambhidianna, peen kosa dantano saga ko sage.

<sup>32</sup> Keeda qaabonka gaalimaka yenin dehenam ida nashe. Maan keemaama ea Imbaa yintea Yesusam wozisana kinin nashenna, kattsika Imbaa yintea Yesussa waadi-manam kida qaabe. <sup>33</sup> Maan keemaa ear geshon yinnonam wozisana kinin nashenna, peen kodar dohon yerinam kida qaabe; <sup>34</sup> ogo goynka qaabono kisa raq lamaadar kashimidine. Anngiysa qolmin qambhinbee naan anzabe bishin yinnonbee sadan yinnonbeka Imbaa kontea Yesusna edimayse daana konin nashenna, qaabeno konno kattsika Imbaa kontea Yesussa waadi-manam koda qaabe. Kembhoono mayno geshoa yinteam wozisana kinin nashenna, peen kodar dohon yerinam koda qaabe. <sup>35</sup> Ogoam inta yennon metenna yena ida giye; yeam zaanidettsi yedana giyattine. Qaabeno inno yedi yeam konin zaskendettsi ye deebee qaaben yennonka lambhima woylem wulka Imbaa wontea Yesusna yenin waadadhoodettsine.

<sup>36</sup> Eedi kalaa “Maa keemattine” hamayse kinin dehenka, ena kinin seesoono naano gebhayse kembhea ko yeskaysaka, koam keemima kinin dahayno darshishan kiam ko bashaysaka, keemana zagidi hatte ki daana, ki keeme; seeso kina maatehe. <sup>37</sup> Ko dhaaannaar, “Maa keemima wocchimbhayse ida dee” kinin hamenka, kantaka “Maa keemaa” hamayse kiam anngarshayse kantisea yer qolmina, maa keemima kinin dahayno kina payyane. <sup>38</sup> Ogonante maan keemea ea yer payya kida haye; maan keemima ea sagi yer payya kida haye.

<sup>39</sup> Geshono geshoa konteayn sadanka dohon wodanka, keemon goynka kodi dhax-adhoonone. Geshoayn kosa diyonsa budobar, kembhana nashidi hatte ko daana, kembhana dama ko dame; koninkay kembhea ear Barjodar woylem qajaa eedi kinin doadettsi ko zaske. <sup>40</sup> Innon qaabenka kembhima dehea ko hanna, sagi wozadhaate koda doaye. Ogo inin giyenam Barjosa Manpasinin inka dahaa ina koda maate.

## 8

*Aaninka Ashkadhaana Barjonana Marshan Machadhon Waansa Goyno*

<sup>1</sup> Aaninka ashkadhaana barjonana marshan machadhon waan goynsa wonin yer dhesea daane. Ko dahaannaar yer dhesidi eediam pormakko ko poorinse; nashim-makko eediam wocchinsa ko wocchinse. <sup>2</sup> “Inta dhesidine” hamayse qaabea ea akar kiam zaskaadettsi dhesadehe. <sup>3</sup> Eedi hay ki hannaar Barjoam nashea dahaa ki hanna, ea agaa Barjosa birante eedi dhesimaane.

<sup>4</sup> Ogona aaninka ashkadhaana barjonana marshan machadhon waanam itsadhen goynsa aaninka ashkadhaana barjona wul peen kodar yer sun hama kenin dohonnee gon hama Barjo bisheakalanka barjo abiyn qolmonbeam wodi dhesooda dhese. <sup>5</sup> Hamin ko dahaannaar, “Thoothi barjodettsi hayayse yinnante goodimadhaynabee imbane hambhaynabe, cecinbee peenbe gidir daane” hambhaakaar, <sup>6</sup> wosa Barjo kalaa bish daane. Kidi yer wulam pijaa Imbaane; wodiar kina woda dee. Woam wottsea Imbaa kalaa bish Yesus Kiristoos daane; yer wul kinnon goynka ko pijadhade; wodiar kinnon goynka woda dee.

<sup>7</sup> Ko dahaannaar, ogoam dhesayno eena wultehe. Waani waani eena ta wodan koka yekka, aaninka ashkadhaana barjonana goodimadhenam kenin dusonna, “Kono aaninka ashkadhaa barjona marshan machadhoonone” hamayse keda waanam itse. Ogona kesa qaabono dadi konin dohonna, keda gemme. <sup>8</sup> Ko dahaannaar gala woam Barjodar yeskisehe. Wo itsaakaar yer wodar wonin arsea qolehe; wo itsammaar yer wosa joogea qolehe.

<sup>9</sup> Ko dahaannaar, “Wonin nashaadettsi wonin itsenam yer woam marea qolehe” yenin hamayno, yisa qaabonka dadi maataana eenana goa konin maatoamadettsi mete yesaam gishee. <sup>10</sup> “Inta dhesidine” hamayse aaninka ashkadhaa barjona goodimadhen ooninte qalte dooqayse waan hanin itsenam yisa qaabonka dadi maataa ea haam kinin haapenka, ogoka hasa kiam aaninka ashkadhaana barjonana marshan machadhon waan kinin itsoadettsi hada haye. <sup>11</sup> Ogonante “Inta dhesidine” hamayse hanin giyenka, akar yisa qaabonka dadi maataa, Kiristoos yinnante diyaa hambanaasaam hada kayse. <sup>12</sup> Ogo goynka Barjodar woylamin qajintaka yesa imbanana maataanaam genaate, akar wocchimbhaamon qaabon kennonam genintaka Kiristoosdar seeso yeda haye. <sup>13</sup> Ogonante gala imbanasana goa maatea ko hanna, kina goa konin maatoamadettsi, keeda kaara os inta waa kala hattear itsattine.

## 9

*Kiristooska Yittsadhaa Eana Imboono Waadimano*

<sup>1</sup> Inta inin nashaam hayana damea eeditayu? Inta Kiristoosin yisa tarjamonnante yittsaa eeditayu? Inta Imbaa wontea Yesusam aapika haapaati? Yedi Imbaa Yesuska waadiman innonsa aapinatayu? <sup>2</sup> Imbaa wontea Yesuska yittsadhaa ea inin maatonam gon hayayse dhettsisayna milkitina isa yedi yenin dohonna, waani eenna yittsadhaa ea i maataammaar, yenante inta gon yittsadhaa eane.

<sup>3</sup> “Haam Kiristoos yisa tarjamonnante nittsadoaye” hamayse iam oysayna eenana inin imayno malsino isa konone: <sup>4</sup> Wodi wonin waadadhen goynka galabee wonin wucea yerbe woam konin zaskima ko yena maato? <sup>5</sup> Eena waani Kiristoosin yisa tarjamonnante yittsaanabee, Imbaa wontea Yesussa kannabee, Bhethiroosbedettsi Barjodar woylam qajea maa keemayse wonka entsayse yaaya woam zaskima ko yena maato? <sup>6</sup> Way itsanna waadimaka qajadha yiam zaskayna imbee Barnabaasbe bishiw? <sup>7</sup> Koymo kina kashadhea qolmaka yinnon koymonka shanate itsayse banqin kansea banqin ea hayne? Woyneahattaam thoothi korayse aapin itsima ea hayne? Qollaam gishea kinin gishayna qollasa raanam kumayu?

<sup>8</sup> Kono inin giyayno eedi bhocchika bishiw? Musesa yiggino yin giyaaw? <sup>9</sup> Ogonoar “Isininam qurthora bulo hanin qapsea waxasa aponam dhaxaabhhode” hamayse Musesa yigginte thaapadhidine. Ta Barjo waakina bish qaabayse ki yin giyaaw? <sup>10</sup> Barjo yin kinin giyoono wonatayu? Haamin koysea ea aapin haapanqaabe hayntaka kinin koysoadettsi, isinin qanea ear “Inta ina yeskenam ida tiye” hamayse qaabe hayntaka kinin qanoadettsi konin zaskenna, kono gon wona ko thaapadhade.

<sup>11</sup> Wodi yena manpasinngayn yerinam yiithayse, yekalanka peen kogayn yerinam patayna wo hanna, ogono yer gebhiw? <sup>12</sup> Eeno waani ko yerinam yekalanka konin kashimoadettsi koam zaskea ko hanna, ta wodi kedara sagi hayayse kashiminta woam zaskayu? Wodi yekalanka kashimootone; ogonoar kashimadhenam wonin garroono Kiristoossa dhacchintan upsino workaate konin yiverra konin shidhoamadettsi qaabintaka, yer wulam damayse darshintakane. <sup>13</sup> Barjosa gazan ooninsa iinte waadadhayna galanam yisa oonin gazan iira kenin itsenbee, marshan machadhen raqinte waadadhayna marshansa iira kashate kenin itsenbeam yedi dhesattenu? <sup>14</sup> Yin taar, Kiristoossa dhacchintan upsinam giyayna eena galanam yisa ogo kenin waadadhonsa iira kenin haapoadettsi Imbaa wontea Yesus giydine.

<sup>15</sup> Inta igina yerra wulsa iira yer kala hattear tiyaatine. Koam inin thaapoonoar ina konin imbhoadettsi hamaysetehe. Eeno ko ininkay erimen yerinam isa inin garoadettsi konin hayenna, inin diyayno ina payyane. <sup>16</sup> Kiristoossa dhacchintan upsinam inin giyayno isa yer baza konin dohonna, ininkay erimea yertehe. Ogodettsiar Kiristoossa dhacchintan upsinam giyma i garea hanna, ina hay! <sup>17</sup> Koamaar inta nashayse giyea i hanna, ina maatea baza isa daane. Nashima giyea i hanna, ina hayamo konin imbhonna i koam thoosade; yer ab bashi inin waadadhaa waadima qolehe. <sup>18</sup> Ta keeda isa bazano hare? Inin qajadhonsa bazano Kiristoossa dhacchintan upsinam guuri i giyea hannane. Ogona ina zasken yerinam tiyma ida waadadhe.

<sup>19</sup> Inta eedi haysa worsho maataama eedi i dahaakaar, thoothino eeno Barjodar woylamin qajayse konin dhaqoadettsi hamayse een wulna worsho eedi i maatade. <sup>20</sup> Ayiwd eenabesana inin dehenka Ayiwd eenam dhacchanna hamayse Ayiwd eenadettsi i maatade. Hamin ko dahaannaar, inta Muse yigginsa demente dahaa i dahaammaar, yigginsa demente dahaana eenam dhacchanna hamayse, inta yiggin demente dahaana eenadettsi i maatade. <sup>21</sup> Hamin ko dahaannaar, inta Barjosa yigginam dheseabee, Kiristoossa yigginsa demente dahaa eedibe i dahaakaar, Barjosa yigginam dhesimina eenam dhacchanna hamayse, Barjosa yigginam dhesima eedidettsi i maatade. <sup>22</sup> Barjodar woylamin qajintanka dadina eenam wocchinsanna hamayse, inta ina dadaa eedi i maatade. Inin dandaaka yekka, een waani waaniam dhacchanna hamayse een wulbesana yer wulka kedettsi i maatade. <sup>23</sup> Ogo wulam yin inin hayoono Barjosa dhacchintan upsinam een wulbesana kashimota, Barjosa dhacchintan upsinna hamaysene.

<sup>24</sup> Galangacchon gobenam een wulin gobenbee, kesa shaarira eedi kala bish bashayse, kinin bashonsa kina imbhien gobshin bazanam kinin tiyenbeam yedi dhesattenu? Ogonante yediar bashayse yenin bashonsa yena imbhien gobshin bazanam tiyota gobimate. <sup>25</sup> Galangacchon gobenam gobayna wul qajadhaate yer wulam dhesana bishin kennonam keda duttse. Kedi yin kinin qajadhayno kaya kayen gobshin bazanam tiyannane. Wodi woninna qajadhayno kaya kaymonbee rooro wul dehenbe gobshin bazanam tiyotane. <sup>26</sup> Eedi goyt qolma gobeadettsi sun gobattine; inta eedi goyt qolma jibareka mashimeadettsi sun mashimea eeditehe. <sup>27</sup> Een waanina Barjosa upsinam inin giyonsa budonte, innon metenna eedi dhambaa inin doamadettsi, waan innonam gushkaate ina ee konin hamoadettsi ida koam haye.

## 10

### *Ena Birana Eykena Wonnadettsi Seeso Haya Woam Zaskimoono*

<sup>1</sup> Imbanaanato, Barjo ena eykena wonna wulam polonka shipshayse keam kinin entsonbee ke wulamaar bazindara kinin saskonbeam yenin dhesoadettsi ida zage. <sup>2</sup> Kedi Musebesana kinka eedi kalaa maatota ko polonbee ko bazinbesa iinte ke shiidhade. <sup>3</sup> Kedi wulaar Barjokalanka manpasinka imbhon galan kallon kinka ke itsade. <sup>4</sup> Kedi wulaar Barjokalanka manpasinka imbhon wucadhen kallorra kinka ke wucade. Kenin wucoonoar kesa paanan yivea manpasinka nivaa seenia laytarane; agaa seenia laytaar Kiristoosne. <sup>5</sup> Ko dahaannaar Barjo kesa een thoothinka wozadhadehe; ogonante darante diyate ke maqade.

<sup>6</sup> Igina ena eykena wonna yerin siyonam kinin annghardhondettsi, wodiar yin yerin siyonam wonin annghardhoamadettsi, ogono wul wona kamsi ko maatade. <sup>7</sup> “Eeno itsannabee wucannabe ko dooqade, kirbannaar ko dhaabhade” hamayse thaapadhondettsi, kesa iira waani waani eena aaninka ashkadhaana barjonana konin goodimondettsi, yediar yin aaninka ashkadhaana barjonana goodimeebhode. <sup>8</sup> Kesa iira waani waani eenay sharmucimakkon waadiman hayonna, kesa iira eedi kalaa kaysa apo makkamin shiin eneo rooro kala konin diyondettsi, wodiar sharmucimakkon waadiman wo hayabhoode. <sup>9</sup> Pir kesa iira waani waani eneo Barjo Imbaam konin taysate shedonna, Barjo koam wacimaysaka gunin koam gavate deesondettsi, wodiar Barjo Imbaam\* taysate wo shedabhoode. <sup>10</sup> Kesa iira waani waani eneo Barjodar kinin gundumonna, Barjo kedar wacimayse deesea yisa gaanaaka keam kinin kaysondettsi, yediar yin gundumeebhode.

<sup>11</sup> Ogo wul yerinin kedar yeskoono wona kamsi konin maatoadettsi, wodi kina wodansa macchinte dahaana eena kedettsi wonin hayoamadettsi ko thaapadhade.

<sup>12</sup> Ogonante “Inta woydine” hamea ea kinin dhamboamadettsi yisa mete ki gishe.

<sup>13</sup> Taysate shedenin een wuldar yeskenkalanka ab yer yedar yeskadehe. Barjo kidi gon hamaane; taysate shedenin yedar yesken wodanka yenin damerra sagi konin yeskoadettsi hayehe. Taysate shedenin yedar yesken wodanka, yeninkay darshen kantan yena imintaka yenin utea goyti yena ashka ki ashke.

<sup>14</sup> Ogonante inin nashaynato, aaninka ashkadhaana barjonaam miskadhenkalanka pegimbhimate! <sup>15</sup> Ogo yin inin giyayno yedi woylamka dahaana eena yenin dohonne. Inin ta yena giyen yedi yentika pirdimate. <sup>16</sup> Barjoam gobshayse kinka wonin wucayno gobshadhoono wucimano Kiristoossa zombhinam kinka kashimate wosa wucanotayu? Qunthate kinka wonin itsayno balashano Kiristoossa waanam kinka kashimate wosa itsanotayu? <sup>17</sup> Wonin itsayno balashano kalaa konin dohondettsi, wodi wul ogo balashan kallonam itsayna wonin dohonna, wodi eedi thoothi wo dahaannaar kinka kisa wodi waa kalaane.

<sup>18</sup> Yinda Israveel zarsinin hayonam shedimate. Barjona marsha machadhonam itsayna eena marshan machadhen raqinbesana kinka kesa kalaa maatintatayu? <sup>19</sup> Ta yin inin giyenka aaninka ashkadhaa barjoana marshan machadhoono waano yer poota pooteane isa hamintaw? Way aaninka ashkadhaa barjoa yer pooteane isa hamintaw? <sup>20</sup> Yintehe! Barjoam dhesimina eena yinnon marshanam kinin machayno Barjona daymaka meeshinane. Ogonante yembee meeshinabesa kinka kaaramo konin doadettsi inta zagattine. <sup>21</sup> Imbaa wontea Yesussa zombhin kamsin wucadhenam kinka wucaate pir meeshi wucimanam wucana damattene; Imbaa wontea Yesussa waan kamsin galanam yedi kinka itsaate pir meeshina marshan machadhon waanam itsana

---

<sup>10:7</sup> Ut 32:6.    <sup>10:8</sup> Payda 25:1-18.    \* <sup>10:9</sup> “Barjo Imbaam” hamayno waani waani mathaapinte “Kiristoosam” koda hame.    <sup>10:9</sup> Payda 21:5-6.    <sup>10:10</sup> Payda 16:41-49.

damattene. <sup>22</sup> Wodi ta yin hayntaka Imbaa wontea Yesusam wo wacinso? Wodi kidara bashi wocchimbhaynaw?

<sup>23</sup> Yer wulin haydhoodettsi giidhidine; ko dahaannaar, yerro wul pootehe. Yer wulin haydhoodettsi giidhidine; ko dahaannaar, yerro wul eenaam ashkeatehe. <sup>24</sup> Eeno wul een waanina payya maaten yerinam ko qaabe; meten yinnonna bish payya maatenam ko qaababhoode.

<sup>25</sup> Yennon woylaminsa iinte dohon gothimenam yekalanka peginsayse gabante shan-shadhen waanam shanate itsimate. <sup>26</sup> Harrna hambhidianna, “Peenbee kodar dohon yerin wulbe Barjosane” ko hambhade.

<sup>27</sup> Barjodar woylamin qajima eedi kalaa kummana yeam ki eelaysaka, yivana ye nashidianna, yena kinin imen galanam qothimeka oysima itsimate. <sup>28</sup> Ko dahaannaar eedi kalaa “Kono waano meeshina marsha machadhaane” yena hamidi ki hanna, ogoam yena giyaa ea goynbee kisa meskenna hamaysebe ogo waanam itseebhode. <sup>29</sup> Ogono inin giyayno ea hana giyaasa meskenna hamaysene; hannon meskennane isa hamintatehe. Ta ea aba qaaben goynsa hamayse, inin qaabenka gaalaamonna idar hamin ko pirdadhe? <sup>30</sup> Inta Barjoam gobshayse i itsina Barjoam inin gobshon goynka nammo isa harrna ko gendhe?

<sup>31</sup> Ta yentin itsenka ko hannaar, yentin wucenka ko hannaar, way yentin hayenka ko hannaar, yerin wulka Barjoyn gobshadhoodettsi haymate. <sup>32</sup> Ayiwd eenana ko hannaar, Girik eenana ko hannaar, Barjosa misken oonin eenana ko hannaar, eedi haynaar goa maateebhode. <sup>33</sup> Inta eeno thoothino konin dhaqoadettsi, ina daymaka een waaninaar konin agoadettsi ida qaabe. Een wulam yer wulka inin wozisendettsi, yediar yin haymate.

## 11

<sup>1</sup> Inta Kiristoosam inin maatendettsi, yediar idettsi maatee.

### *Kinka Miskenna Bukadhen Wodanka Zaskayno Dambino*

<sup>2</sup> Imbanaanato, yer wulka iam yentin qaabennabee yena inin imon timmirinam wocchimbhayse yentin yedonbena yeam inta shawkayda shawke. <sup>3</sup> Ko dahaannaar koam ye dhese ida nashe: Anngi wulam wottsea Kiristoosne. Pir maam wottsea anngine. Ogodettsi Kiristoosam wottsea Barjo Imbaane. <sup>4</sup> Meten yinnonam apalanka ochayse Barjoam miskea way Barjokala qansayse eenna giyea anngi wul yiam wottsea Kiristoosam kida ooshinse. <sup>5</sup> Yin tapir metenam yisa ochima Barjoam miskayno way Barjokala qansayse eenna giyayno maa hay ko hannaar, koam wottsea geshoam koda ooshinse. Harrna hambhidianna, meten yinnonam ochaamon maynsa sitino konin haadadhaadettsi hayayse koda paydadhe. <sup>6</sup> Meten yinnonam ochimino mayno metensa yisa sitinam ko taxadhe. Metensa yisa sitinam konin taxadhadyno way konin haadadhadyno koam ooshinsea ko hanna, metenam yisa ko ochadhe. <sup>7</sup> Anngi Barjosa dantanbee gobshinbeam dhehea kinin dohonna, meten yinnonam apalaka kinin ochoadettsi kiam zaskehe. Maa anngisa gobshin dhahaynone. <sup>8</sup> Harrna hambhidianna, maa anngikalanka ko pijadhade; anngi maakalanka pijadhadehe. <sup>9</sup> Yin tapir maa anngina ko pijadhade; anngi maana pijadhadehe. <sup>10</sup> Ogona, pir Barjosa gaananana hamayse mayno hayamonsa milkit\* konin doadettsi meten yinnonam ocha koam ko zaskehe.

<sup>11</sup> Ko dahaannaar Imbaa wontea Yesuska dohon dayntanka maa anngi qolma, anngear maa qolma daana damehe. <sup>12</sup> Harrna hambhidianna, maa anngikalanka konin pijadhondettsi, yin pir anngi maakalanka ki adhadhade. Ogona yin dahaysear yer wulin pijadhayno Barjokalankane.

\* **10:26 Maz 24:1.** \* **11:10** “Hayamonsa milkit” hamayno Girik mathaapinte “hayamo” koda hame. Kosa hamintano geshoasa hayamon demente konin dohonam dhettsisea way miskanabee Barjosa upsinam giyanabe hayamo kosa dohonam dhettsiseane hamintane.

<sup>13</sup> Maa meten yinnonam ochima Barjoam konin miskoadettsi koam zaska ko zasko? Yinda yedi yenti pirdee. <sup>14-15</sup> Anngiyn meten sitin yinnonam gettsayno kisa qays konin dohondettsi, maa pir meten sitin yinnonam konin gettsayno kosa gobshi konin maatendettsi, Barjoyn pijoono yinti yeam dhettsaaw? Harrna hambhidianna, maasa meten sitino metenam ko ishke kona ko imbhade. <sup>16</sup> Ogo goynka palimana zagea eedi dahaa ki hanna, wodi wo hannaar, Barjosa misken onno ko hannaar, ogora waana hama dambi wosa qolehe.

*Imbaa Wontea Yesussa Dembhinam Bhocchisayno Galano  
Maat 26:26-29; Marq 14:22-25; Luq 22:14-20*

<sup>17</sup> Kinka kidar yenin buken wodanka, yenin hayayno yer yena pootea dayma yeam genayno konin dohonna, ta inin yena giyen koka inta yeam shawkattine. <sup>18</sup> Yer wulsa birayse, kinka miskenna yenin buken wodanka yesa shaarinte edimeyn dohonam inta qansidine. Inin qansoono upsino goyti kalaaka gon konin dohonam inta dhesidine. <sup>19</sup> Ogonoar yennon shaarinte woylamin qajintanka gonin maataana eena haybe kenin dohonam dhesadhoodettsi yennon shaarinte edime konin dahayno kosa yer shidhimore.

<sup>20</sup> Kinka kidar yenin bukayno Imbaa wontea Yesussa dembhinam bhocchisen galanam itsanatehe. <sup>21</sup> Yenin itsenka ea waa ea waam kaalima birayse yimal kida itse; ogo goynka ea waayn daaqardhenka ea waa bardha ki bardhe. <sup>22</sup> Yenin itseabee yenin wuceabe ooni yesa qolaaw? Way Barjosa misken ooninte eenaam bagada, yer yisa qolmina eenaam ye ooshinso? Keeda inta yena yer hariy giyo? Ogo yerinna yesa inta yeam shawkay shawko? Ogo yerinna inta yeam shawkattine!

<sup>23</sup> Yena inin dhettsayno timmirino Imbaa wontea Yesuskalanka inin tiyoone. Ogonoar Imbaa wontea Yesusam saskayse imbhon ogo sootin balashanam tiyayse, <sup>24</sup> Barjoam ki gobshade. Balashanam qunthayse, “[Kay, itsee]; kono yena hamaye imbhayno isa waanone; iam yenin bhocchea hayee” ki hamade. <sup>25</sup> Tapir yin kenin itsansa budonte Yesus wucadhenamaar tiyayse, “Kono wucadhayno isa zombhinsa haali mallane. Yenin wucen wodan wulka iam yeninkay bhocchea yesa ko dee koam hayee” ki hamade. <sup>26</sup> Harrna hambhidianna, ko balashanam yenin itsen wodanbee ko wucadhenam yenin wucen wodan wulbeka, Imbaa wontea Yesusin nivenka yekka kisa dembhinam yeda giyoaye.

<sup>27</sup> Eedi hay ki hannaar kiam zaskaama goyteaka Imbaa wontea Yesussa dembhinam bhocchisen balashanam ki itsea hannabee wucadhenamaar ki wucea hannabe, Imbaa wontea Yesussa waanbee zombhinbeam kinin toskonna oysa ki oysadhe. <sup>28</sup> Ogona eedi hay ki hannaar, balashan koam kinin itsanbee wucadhen koam kinin wuconbesa birayse meten yinnon ki marmare. <sup>29</sup> Eedi hay ki hannaar, Imbaa wontea Yesussa waano yer har konin dohonam payya hayayse dhesima Imbaa wontea Yesussa dembhinam bhocchisen balashanam ki itsea hannabee wucadhenam ki wucea hannabe, meten yinnondar yintika pirdin kida yeskise. <sup>30</sup> Yennon shaarinte thoothin eenin qajadhonbee hajadhonbe, waani waani eenaar kenin diyoono ogo goynkane. <sup>31</sup> Meten wonnonam wodi marmaridi wo hanna, wodar pirdadhehe. <sup>32</sup> Ko dahaannaar Imbaa wontea Yesus ta wodar kinin pirden wodanka, Barjodar woylamin qajimina eenabesana ookimimon Barjosa pirdinin wodar yeskoamadettsi, woam kida wacime.

<sup>33</sup> Ogona imbanaanato, Imbaa wontea Yesussa dembhinam bhocchisen kummandar kinka yenin bukon wodanka, kinka kiam kiam kaalee. <sup>34</sup> Yenin bukon wodankaar meten yennondar yentika pirdi yenin yeskisoamadettsi, shaarin yennonte daaqardhaa eedi dahaa ki hanna, oonin yinnonte ki kumme. Shidhon yerin waaniam inin yekal niven wodanka, ida yenante giye.

## 12

### *Manpas Gazansa Imintono*

<sup>1</sup> Imbanaanato, Manpas Gazansa iminton goynsa gon hamonam yenin dhesoadettsi ida zage. <sup>2</sup> Barjoam dhesimina eena yenin dohon wodanka, dhalqana damimina aaninka ashkadhaana barjonadar entsate yeam yiidhonam dheseeda dhese. <sup>3</sup> Ogona Barjosa Manpasinka entsadhadayse “Yesus ashadhaane” hamayse giyea eedi qolehe. Yin tapir Manpas Gazan entsaamma “Yesus Imbaane” hamayse giyea eediyn qolmonam yena ida giye.

<sup>4</sup> Manpas Gazansa imintono waana waanane; ko dahaannaar Manpas Gazano kalaane. <sup>5</sup> Waadimanoar waana waanane; ko dahaannaar Yesus Imbaa kalaane.

<sup>6</sup> Goyti waana waana hama waadima daane; ko dahaannaar yerin wulam een wulka waadadhea Barjo kidi kalaane.

<sup>7</sup> Een wulna yisa meteka meteka Manpas Gazansa imintonam konin imbhayno kinka kikalanka yer payya kenin haapoadettsine. <sup>8</sup> Manpas Gazano ea kalaana pakalmakkoka dhalqadhen koda ime; ea waana pir dhesidinka dhalqadhen koda ime. <sup>9</sup> Ogono Manpasino kallo ea waana Barjodar woylem qajintaka waadadhadhen goynam koda ime; ea waana pacchintan imintonam koda ime. <sup>10</sup> Ea waana tarshea waadima haydheasa kanta koda ime; ea waana Barjokala qansayse eenna giidhensa imintonam koda ime; ea waana taar imintono Manpasin Gazankalanka konin dohonbee meeshikalanka konin dohonbeam edayse kinin dheseasa imintonam koda ime. Yin tapir ea waana apo waananka dhalqadhen koda ime; ea waana apon waananka giidhonam kinin bulana dameasa imintonam koda ime. <sup>11</sup> Yin ko dahaannaar, ogo wulam waadadhayno Manpasino ogono kallone; kodi yinin nashaadettsi eenna yisa meteka meteka waana waana hama imintonam kashate koda ime.

### *Wodi Kiristoos Bishinsa Waa Wonin Dohon Goyno*

<sup>12</sup> Eedi kalaadar waa ayni waana waana hammo thoothi ko dahaakaar, bishino kallone. Waano ayni waana waana hammo wul kidar bishi kalaa konin dohondettsi, Kiristoosaar yinne. <sup>13</sup> Harrna hambhidianna, wodi Ayiwed eedi wo dahaakaar, Girik eedi wo dahaakaar, eedisa worsho wo dahaakaar, eedina worsho wo maataammaar, wodi wul bishi kalaa doota Manpas kalaaka wo shiidhimbhade; wodi wul ogo Manpasin kallonsa iira wo wucade.

<sup>14</sup> Bishinsa ashkadhidino thoothi waa ayni waana waana hamaasa iirane; waa ayni kalaaka bishtehe. <sup>15</sup> Roo “Inta aan inin dahaamonna, bishisa waatehe” hamidi ki hanna, ogo yin kinin giyonka bishinsa waa kalaa kinin dohoono kisa shidha ko shidho?

<sup>16</sup> Qaamiar “Inta aapi inin dahaamonna, bishisa waatehe” hamidi ki hanna, ogo yin kinin giyonka bishinsa waa kalaa kinin dohoono kisa shidha ko shidho? <sup>17</sup> Bishino wul aapi bish ko daana, qasanam yer harka ko qansadhe? Bishino wul qaami bish ko daana, gasanam yer harka ko gansadhe?

<sup>18</sup> Ta ko dahaannaar Barjo yinin zagaadettsi, waa kalaa kalaa waana waana hamma kenin doadettsi, keam zaskayna ranqar ki wodade. <sup>19</sup> Bishin wulin pijadhoono waa kalaasa iira bish ko hanna, bishino hamote ko dee? <sup>20</sup> Bishinsa waano thoothi ko dahaakaar, bishino kodi kalaane. <sup>21</sup> Aapi aankal “Ina ya zaskattane!” hamana damehe; metear rookal “Ina ya zaskattane!” hamana damehe. <sup>22</sup> Ko dahaannaar pootima maatayse haapadhayna bishinsa waana kattsika eedina zaskaynane. <sup>23</sup> Bishinsa waana gobshin zaskimina maatayse wona haapadhaynaam, wodi kattsi woda keam gobshe; ooshinsa ooshinsayna maatayse wona haapadhayna bishinsa wosa waanaam, wodi kena gobshi gebhi imayse, keam woda kice. <sup>24</sup> Gobshinsa dahaana bishinsa waanina ko hanna, ab gobshi kena zaskehe. Gobshi joogayse wona haapadhayna bishinsa waanaam gobshi gebhika wonin keam gishoadettsi hayayse, Barjo keam ki pijade. <sup>25</sup> Ogo yin kinin hayoonoar bishin waanasa shaarinte edime qolmaka, kinka kina kenin

qaaboadettsi hamaysene. <sup>26</sup> Bishinsa waa kalaayn burqadhenka, bishinsa waana wul kimbesana burqadha ke burqadhe. Bishinsa waa kalaayn gobshadhenka, bishinsa waana wul kimbesana wozadha ke wozadhe. <sup>27</sup> Yedi Kiristoossa bishine; yedi wul kalaa kalaana kisa waane.

<sup>28</sup> Ogonante Barjo misken ooninte eenaam yin hayaye ki wodade: Birayse Kiristoos yisa tarjamonnante kinin yittsaynaam, lanson dar Barjokala qansayse eenna giyaynaam, makkansondar Barjosa upsinam dhettsaynaam, ogoraar tarshen waadiman hayaynaam, ogoraar pacchintan imintoysa dahaanaam, pir een kelshadhaba imintoysa dahaanaam, pir wottsana damadhen imintoysa dahaanaam, pir apo waana waanaka dhalqadhensa imintoysa dahaanaam kamayse ki wodade. <sup>29</sup> Ko dahaakaar, eeno wul Kiristoosin yisa tarjamonnante yittsaynotehe; eeno wul Barjokala qansayse eenna giyaynotehe; eeno wul Barjosa upsinam dhettsaynotehe; eeno wul tarshen waadimanam hayaynotehe; <sup>30</sup> eeno wul pacchintan imintoysa dohoonotehe; eeno wul apo waana waanaka dhalqaynotehe; eeno wul apo waana waanaka dhalqadhonam bulaynotehe. <sup>31</sup> Ko dahaannaar wuldara sagin imintonam haapota wocchimbhayse zagee. Pir yer wuldara sagen goynam yena ida eshke.

## 13

### *Gonin Hammo Nashimmakkono*

<sup>1</sup> Eenbee Barjosa gaananabesa apon wulka i dhalqaakaar, nashimmakko isa qolmina, inta sun oolea dhonngobee anngamobedettsine. <sup>2</sup> Barjokala qansayse eenna giyea iminto isa daa ko hanna, Barjosa aachin dhalqin wulbee dhesidinka dhalqadhen wulbeam i dhesea hanna, dhukanam raq abdar dhaasea Barjodar woylem inin qajeisa isa daa ko hanna, nashimmakko qolmina, inta pootimaane. <sup>3</sup> Isa dohon wulam qambhinana kashate i imea hannaar, eenna hamayse waano inno nuunte ko ate saskate i imaakaar, nashimmakko isa qolmina, ogono ina pootehe.

<sup>4</sup> Nashimmakko darshisha ko darshishe; nashimmakko eedina yer payya haysa ko hayse; nashimmakko wooginta hayehe; nashimmakko odinsehe, poorinsehe. <sup>5</sup> Nashimmakko yer goyti qolmaam hayehe; yina maatenam zagehe; nashimmakko dhagattsehe; yiam gendhaakaar guula yettsehe. <sup>6</sup> Nashimmakko gonin hamon yerinka kida wozadhe; siyon yerinka wozadhehe. <sup>7</sup> Nashimmakko yer wulam darsha ko darshe; yer wuldar woylem qaja ko qaje; yer wuldar qaabe haya ko haye; yer wulka wocchimbha ko wocchimbhe.

<sup>8</sup> Nashimmakko rooro wul koda dee, kayehe. Barjokala qansayse eenna giidhayno yerro ko hannaar, apon abinka dhalqadhadyno ko hannaar, dhesintono ko hannaar, ogono wul shidha ko shidhe. <sup>9</sup> Harrna hambidianna, wonin dhesayno yerro tokaane; Barjokala qansayse eenna wonin giyayno yerroar thoothitehe; <sup>10</sup> ko dahaannaar thoothin dohon yerinin niven wodanka, joogina yerra shidha ke shidhe.

<sup>11</sup> Naasi inin dohon wodanka naasidettsi ida dhalqe; naasidettsiar ida qaabe; naasidettsiar ida bhoccbe. Inin gebhonsa budonte, inta isa naasamon yerinam garidine. <sup>12</sup> Taaki yer mastootsa iir haapadheadettsi jibir jibir hama woda haape; ogo wodanka wotinte may may shedooda shede. Taaki inin dhesayno tokaane; ogo wodanka Barjoyn iam kinin dhesendettsi intaar yer thoothi dhesayda dhese.

<sup>13</sup> Keeda Barjodar woylem qajintabee, qaabe hayntabee, nashimmakkobe, igina makkamma wocchimbhayse keda doaye. Ko dahaannaar igina wulsa iira sagea nashimmakkone.

## 14

### *Manpas Gazansa Iminton Goyno*

<sup>1</sup> Keeda yedi nashimmakkonam zagee. Manpas Gazansa imintonam anngardhee; kesa iira kattsika Barjokala qansayse eenna giidhen imintonam zagee. <sup>2</sup> Apon abinka giyea Barjona kida giye, eedina giyehe. Harrna hambhidianna, Manpas Gazansa kantanka aachi dhalq kinin giyenna, kinin giyen upsinam dhesea eedi qolehe. <sup>3</sup> Barjokala qansayse eenna giyea eenaam gettsanabee, kiilanabee, wocchinsanabe kida eenna giye. <sup>4</sup> Apon abonka giyea meten yinnonam bish kida ashke; Barjokala qansayse eenna giyea Barjodar woylamin qajayna eenaam kida ashke. <sup>5</sup> Yedi wul apo abka dhalqea ye hanna, inta nashayda nashe; ko dahaannaar kattsii inin nashayno Barjokala qansayse eenna giyea ye hannane. Apon abonka giyea kinin guyonsa bulinam ki bulaamma, apon abonka giyea eadara Barjokala qansayse eenna giyea ea basha ki bashe. Harrna hambhidianna, Barjodar woylamin qajayna eena wulam kinin gettsennane.

<sup>6</sup> Ta keeda imbanaanato, yekal inin niven wodanka apo abka yena i giyea hanna, yena yer har ko poote? Yena ini payya konin dahayno, Barjoyn dhehen aachin yerinam giidhenbee, Barjo imintonka dhesadhenbee, Barjokala qansayse eenna giidhenbee, timmiribeam i giyea hannane. <sup>7</sup> Sadaysa qolmina malkabee goolabe, gaadininkay dhaasadhadyna anngamma kenin oolea kesa upsi may hama qolmina, kenin pugadhenbee qandhenbesa upsinam dhesana hamin ko dandime? <sup>8</sup> Banqin thurumban garayse thurumba ab pugadhdianna, banqin kансо dhaximbhea eedi hayne? <sup>9</sup> Ogodettsi yedi yenin giyenam eenna may konin arden aponka ye giyaamma, eeno hamin ko dhese? Sun jibarendar eedi yer giyeadettsi yeda maate. <sup>10</sup> Peendar paydinsa qolmino apo waana waana hammo daane; bulinsa qolmino apo qolehe. <sup>11</sup> Ta keeda inta ina giidhen aponsa bulinam dhesima i hanna, ea ina giyeana eedi chocchi ida maate; kidiar ina eedi chocchi kida maate. <sup>12</sup> Yediar Manpas Gazansa imintonam kattsika yenin zagenna, Barjodar woylamin qajayna eenaam gettsayno imintono yena konin thoothoadettsi kattsii zagee.

<sup>13</sup> Ogonante apon abonka giyea ea kinin guyonsa bulinam bulota Barjokalanka imintonam ki miske. <sup>14</sup> Harrna hambhidianna, apon abonka Barjoam i miskea hanna, isa manpasino koda miske; meskente isa pootea yer qolehe. <sup>15</sup> Ta yer har i haye ko iam zaske? Manpasin innonkaar miskayda miske; mesken innonkaar miskayda miske. Manpasin innonkaar Barjona zammarayda zammare; mesken innonkaar pir zammarayda zammare. <sup>16</sup> Yin ko dahaamma manpasinka hasa Barjoam hanin gobshenka, hanin miskenam dhesima eedi chocchi maataa hakal dahaa ki hanna, hanin misken goynsa yer har dhesayse ki “Amiin” hame? <sup>17</sup> Ya Barjoam gobshota hanin yedoono payyane; ko dahaakaar ogoka hasa eeno waani gebhehe.

<sup>18</sup> Inta ye wuldara sagi apon abonka inin giyenna Barjoam ida gobshe. <sup>19</sup> Ko dahaannaar Barjodar woylamin qajayse bukaana eenasa shaarinte, shii tabhi upsi apo abka inin giyerra, een waaniam dhettsana upsi dong eenin dhesen aponka meskeka giyana ida nashe.

<sup>20</sup> Imbanaanato, siyon yerinna naasi maatimate; qaabenka yesa naasi maateebhode; kalon qaaben yennonka eedi theedhaana daymate. <sup>21</sup> Ogo noar

“Barjo Imbaa ‘Apon abonka giyen eenbee

een peera nivon eensa aponbeka

eena kinana giyayda giye;

yin ko dahaakaar kedi inin giyenam qansehe’

kida hame”

hamayse yiggin mathapinte thaapadhidine. <sup>22</sup> Ogonante apon abonka giidhayno milkit konin dahayno Barjodar woylamin qajimon eennane; Barjodar woylamin qajen eennatehe. Barjokala qansayse eenna giidhayno ko hanna, Barjodar woylamin qajen eennane; Barjodar woylamin qajimon eennatehe.

<sup>23</sup> Barjodar woylamin qajayna eenayn kidar bukon wodanka, yedi wul apo abka ye dhalqina, yenin giyen dhalqinna chocchi maataana eena way Barjodar woylamin qajimina eena ke nivanna, "Kina eena bardhidine" yeam hamaaw? <sup>24</sup> Ko dahaannaar yedi wul Barjokala qansayse eenna ye giyna: Barjodar woylamin qajima eabee yenin giyen dhalqinna chocchi maataa eabe yennon shaarinte nividii ki hanna, kinin qansen upsin wulka seeson kinnonin kina dhesimenna, yenin giyayno upsino wul kidar pirda ko pirde. <sup>25</sup> Woyleminte kisa aachimonam may koda dhee; kidi yisa wotinka dhambayse, "Gon Barjo yennon shaarintene" hamayse Barjona kida goodime.

### *Miskenna Eennin Kidar Bukon Wodanka Zaskayno Dambino*

<sup>26</sup> Imbanaanato, ta keeda har ko woam zaske? Barjona goodimota yenin buken wodanka, eedi kalaa mazmur zammara ki zammare; waa eediam dhettsa ki dhettse; waa Barjokalanka haapadhen aachin yerinam giya ki giye; waa apon abonka giya ki giye; waa apon abonka giidhonam bula ki bule. Oongo wul Barjodar woylamin qajen eenaam ashkayno ko dee. <sup>27</sup> Apon abonka giyayna eena dahaa ke hanna, lamaa way makkamra sagima kinka waa giyanna ki waa giye; kinin giyensa bulinam ea kalaa ki bule. <sup>28</sup> Bulana damea eedi qolmina, apon abonka giyea ea bukin raqinte lay hamayse, meten yinonbee Barjobena ki giye.

<sup>29</sup> Barjokala qansayse eenna giyayna lamaa way makkam ke giye; waani eeno kinin giyenaam qansayse ko marmare. <sup>30</sup> Ogo bukin raqinte dohon eensa eedi kalaana Barjokalanka aachi yer haapadhidi hatte ko daana, ini biraat ea lay ki hame. <sup>31</sup> Eeno wul konin dhettadhadettsibee wocchimbhadettsibe, yedi wul kinka waa ea giyanna waa ea Barjokala qansayse eenna giyana dameeda dame. <sup>32</sup> Barjokala qansayse eenna giyayna eenasa manpasino Barjokala qansayse eenna giyayna eenana ee hama ko hame. <sup>33</sup> Harrna hambhidianna, Barjo payyamo Barjone, goore Barjotehe.

Barjodar woylamin qajayna eenasa misken oonin wul gidir haydhendettsi, <sup>34</sup> maana Barjona goodimota bukadhenka lay ke hame. Yigginiin giyendettsi ee ke hame; kinin giyoadettsi kena giidhadehe. <sup>35</sup> Yer dhesana zagidi ke hanna, onna yinnar anngina yinnaam ke oyse. Harrna hambhidianna, misken ooninte maa giyea ko hanna ooshin-saynone.

<sup>36</sup> Barjo upsinsa nividino yekalankaw? Way kosa yeskidino ye binnanaw? <sup>37</sup> Eedi hay ki hannaar, "Inta Barjokala qansayse eenna giyeane" way "Manpas Gazansa iminto isa daane" hamea eedi dahaa ki hanna, kono yena inin thaapoono Imbaa Yesusin giyoono konin dohonam ki dhese. <sup>38</sup> Eedi hay ki hannaar koam gonne hamayse tiyma, kiamaar ko tiidhabhoode.

<sup>39</sup> Ogonante imbanaanato, Barjokala qansayse eenna giidhenam kattsika zagee; apon abonka giidhenam mareebhode. <sup>40</sup> Ko dahaannaar yer wul goytiysa dahabee dambibeka ko dee.

## 15

### *Kiristoossa Dembhira Dhaabhidino*

<sup>1</sup> Imbanaanato, inin yena giyon Barjosa dhacchintan upsinam yena bhocchisana ida zage. Yerin ogoam yedi tiyayse kanka wocchimbhayse woyaanane. <sup>2</sup> Ogonoar inin yena giyon Barjosa dhacchintan upsinam wocchimbhayse ye yedea hanna, ogoka dhaqeeda dhaqe; ogotay ko hamma, Barjodar woylamin yenin qajen goyno yesa sunne.

<sup>3</sup> Kattsii zaskaane hamayse inin tiyonam inta yena giydine. Ogonoar: Mathaap Gazante thaapadhondettsi Kiristoos wosa seesonna ki diyade; <sup>4</sup> kiam duukadhidine; Mathaap Gazante thaapadhondettsi makkansoa rooroakaar kidi duukira dhaabhidine.

<sup>5</sup> Yinin dhaabhonsa budonte Bhethiroosna\* ki haapadhade; ogoraar tabhi lamaana yisa

\* <sup>15:5</sup> Bhawloos "Bhethiroos" yinin thaapenka, kisa naabenam Sooria peen aponka "Keepa" hamayse ki thaapade.

paanan yivayna eenana ki haapadhade; <sup>6</sup> ogoraar mato dongdara sagi maaton kisa paanan yiven eenna kalaa goyt ki haapadhade. Ogo eensa iira waani waani eeno ko diyaakaar, thoothino eeno kinaka yekka sadanka daane. <sup>7</sup> Ogosa budonte Yayqoobna ki haapadhade; ogora yisa tarjamonnante kinin yittsaana eena wulna ki haapadhade.

<sup>8</sup> Ogoraar igina wulsa macchindar, arpin yeskima gidika adhadhadettsea ina tapir ki haapadhade. <sup>9</sup> Inta Kiristoos yisa tarjamonnante kinin yittsaana eena wulsa choobar dahaabee Kiristoos yisa tarjamonnante kinin yittsaa ea hambhana zaskaamabene. Harrna hambhidianna, inta Barjosa misken onnara eenaam oytaa eedine. <sup>10</sup> Ko dahaannaar inta ta yin inin maatoono Barjosa sunin imintonkane. Kono ina imbhoono sunin imintono sun shidhadehe. Tapir een wuldara waadimaka sagi i qajadhade. Ko dahaannaar ogoam hayoono imbesana dohoono Barjosa sunin imintonone, intatehe. <sup>11</sup> Ta keeda inta i hannaar, waani eena ke hannaar, wonin giyayno ogonone; yediar gonne hamayse yenin tiyoono ogonone.

### *Eenin Dembhira Dhaabhen Goyno*

<sup>12</sup> Ta “Kiristoos dembhira dhaabhidine” hamayse giidhayno ko hanna, yesa iira waani waani “Dembhira dhaabhadhea yer qolehe” hamayse hamin ke giye? <sup>13</sup> Dembhira dhaabhadhea yer qolay ko hanna, Kiristoos dembhira dhaabhadehe hamintane. <sup>14</sup> Kiristoos dembhira ki dhaabhaamma, ta keeda wonin Barjosa upsin giyenbee kidar woylamin yenin qajenbe yer sunne hamintane.

<sup>15</sup> Tapir “Barjo Kiristoosam dembhira dhaasidine” hamayse wonin giyenkaar, buudamoka Barjona tarjayna wo maatade hamintane. Diyaana eena ke dhaabhima, Barjo Kiristoosamaar dembhira dhaasadehe hamintane. <sup>16</sup> Ogonoar diyaana dembhira ke dhaabhima, Kiristoosaar dembhira dhaabhadehe hamintane. <sup>17</sup> Kiristoosaar dembhira ki dhaabhaamma, kidar woylamin yenin qajayno pootehe; akar seeson iinte ye dahade hamintane. <sup>18</sup> Tapir Kiristoosdar woylamin qajayse diyaana eenaar kaydine hamintane. <sup>19</sup> Kiristooska woylam wonin hayayno peen kosa dayntanna bish ko hanna, een wuldara kattsi wona burqadhinta koda zaske hamintane.

<sup>20</sup> Ko dahaannaar Kiristoos gon dembhira dhaabhidine; kidi diyaana eenayn dembhira dhaabhensa biraane. <sup>21</sup> Dembhino ea kalaa goynka konin nivonna, dembhira dhaabhadhaynoar ea kalaa goynka ko nivade. <sup>22</sup> Ogonoar Addaam goynka een wulin diyendettsi, yin Kiristoos goynka eeno wul dembhira dhaabhaye sadanka koda dee. <sup>23</sup> Ogonoar yin konin maatayno kalaa kalaana yinnon kelinkane: Kiristoos dembhira dhaabhadhensa biraan ki maatade; budobar kinin niven wodanka, kinti maataana eena dembhira dhaabha ke dhaabhe. <sup>24</sup> Ogoraar Kiristoos wottsin wottsadhenbee, hayamonbee, kantan wulbeam kaysayse, bitamonam Barjo Imbaana kinin imen wodanka peensa macchino koda dee. <sup>25</sup> Harrna hambhidianna, banqin eena wul Kiristoossa hayamon demente Barjoyn keam hayenka yekka Kiristoosin bitimoadettsi ko kiam zaske. <sup>26</sup> Wulsa macchindar kaysadhea banqin ea dembhine. <sup>27</sup> Harrna hambhidianna, “Barjo yerin wulam kisa hayamon demente haydine” hamea thaapadhidine. Ko dahaannaar, “Yerro wul kisa hayamon demente haydhidine” hambhenka, yerro wul kinnon hayamon demente konin doadettsi hayaa Barjo Kiristoossa hayamon demente kinin dahaammo mayne. <sup>28</sup> Yerro wul Kiristoossa hayamon demente konin dehenka, Barjo Imbaa yer wuldar kinin bitimoadettsi, Barjo Naasa yer wulam kisa hayamon demente hayaa Barjo Imbaasa hayamon demente kida dee.

<sup>29</sup> Diyaana eena dembhira dhaabhay ke hanna, kena hamayse shiidhimbhayna eenana har ko poote? Hamin ko dahaakaar diyaana eena dembhira dhaabhay ke hanna, kena hamayse kennon raqinte harrna ko shiidhimbhadhe? <sup>30</sup> Wodisin rooro wul gaalensa iinte wonin dahayno yer harrnane? <sup>31</sup> Imbanaanato, rooro wul idar dembhi koda yeske; ogono yena inin giyayno Imbaa wosa Yesus Kiristoos goynka

yenka inin erimennane. <sup>32</sup> Epsoon katamante dabidettsi daahaana eenabesana inin mashimoono peen kodar dohon yerinna ko hanna, ina yer har ko poote? Diyaana eena dembhira dhaabhay ke hanna, “Saka wonin diyenna wo itse, wo wuce” hambhondettsi koda maate.

<sup>33</sup> Taysadheebhode; aananta siya qaabensa payya eam ki gene. <sup>34</sup> Ogonante tipamoka qaymee; seesonamaar hayeebhode. Yennon shaarinte Barjoam dhesimina eena daane; yin yena inin giyayno yenin ooshimbhoadettsi hamaysene.

### *Dembhira Dhaabhayno Bishino*

<sup>35</sup> Eedi kalaa “Diyaana eena dembhira hamin hamayse ke dhaabhe? Kenin dhaabhonsa budonte, bishino kesa yer hamin hammo ko dee?” hamayse ki oyse. <sup>36</sup> Ya kaa malgimea ea, hanin yiithayno bheetano diyayse ko capaamma baqalehe. <sup>37</sup> Ya hanin yiithenka gazgo bheeta ki hannaar, isin ab bheeta ki hannaar, bheetaam hada yiithe; bere kinin baqalenka yin utehe. <sup>38</sup> Barjoar bheetanna yinin nashaadettsi ayni kida ime; bheetanana meteka kesa waana waana hama ayni kida ime.

<sup>39</sup> Bishino wul ayni kalaatehe: Een bishino ayni kalaane; qolen bishino ayni waanane; aptin bishino ayni waanane; kaaran bishino ayni waanane. <sup>40</sup> Yin pir cecin gaynsaar bishi daane; peen gaynsaar bishi daane. Ko daahaannaar cecinngayn bishinsa gobshino waanane; peenngayn bishinsaar gobshino waanane. <sup>41</sup> Haynsa gobshino<sup>†</sup> kalaane; arpinsaar gobshino waanane; wanconsaar gobshino waanane; eezinta kalaa eezinna waanikalanka kisa gobshi waana hama daane.

<sup>42</sup> Dembhira dhaabhayna eenasaar dantano ogodettsi yinne. Capate kaya kayea bishi dahayse yiithadhoono capate kayma sadaka dehea bishi maatayse koda dhaabhe. <sup>43</sup> Ooshimbheka yiithadhoono gobshika koda dhaabhe; qajeka yiithadhoono kantaka koda dhaabhe. <sup>44</sup> Waasa bishi maatayse yiithadhoono manpassa bishi maatayse koda dhaabhe. Waasa bishi dehea ko hanna, manpassa bishiar daane. <sup>45</sup> Ogonante “Biraa Addaam sadaka dahaa ki maatade” hamayse thaapadhidine; budoa Addaam Kiristoos sada imea manpas ki maatade. <sup>46</sup> Ko daahaannaar biraa ea waasa bishine, manpassa bishitehe. Manpasin easa nividino waan easa budobarne. <sup>47</sup> Biraa easa pijadhidino peerrane; lansoa ea cecirane. <sup>48</sup> Peen ko gayna eena peen kora pijadhaa eadettsine; cecin gayna eena cecira nivaa eadettsine. <sup>49</sup> Wodi dantanka peen ko eam wonin maatondettsi, yin pir cecin ganta eam woda maate.

<sup>50</sup> Imbanaanato, inin yena giyayno waabee zombhibe Barjosa bitamon raqinam tiyehe; ogodettsi diyayno bishino lay dehen diymon bishinam tiyehe. <sup>51</sup> Marrato! Aachi yer yenante ida giye: Wodi wulatte diyattone; ko daahaannaar wulatte ooki-mooda ookime. <sup>52</sup> Wonin ookimaynoar saanawa dhesadhima, macchea thurumbayn pugadhen wodanka, aapinin libh pak hameadettsi kala goytine. Thurumbano puga ko pugadhe; diyoono eeno capima sadaka dehea maatayse koda dhaabhe; wodiar ookimooda ookime. <sup>53</sup> Harrna hambhidianna, ogono capayno capimonam, diyaynoar diymonam konin qaadhoodettsi koda zaske. <sup>54-55</sup> Ogono capayno capimonam konin qaadhadayno, diyaynoar diymonam konin qaadhen wodanka,

“Dembhi bashadhayse kaydine” pir,

“Dembhi, haninkay bashayno hasa hamotene?

Dembhi, eenaam hanin deesayno hasa kantano hamote ko dahaa?”

hamayse thaapadhoono ko thoothade. <sup>56</sup> Dembhisa eenaam kinin deesayno kantano seesone; seesonsa kantano Barjo yigginone. <sup>57</sup> Ko daahaannaar Imbaa wontea Yesus Kiristoos goynka woninkay bashen kantanam wona imea Barjona gobshi ko dee.

15:32 Isi 22:13.    † 15:41 Girik aporka yerra shaakan dhahayna wulsa shaakanam “gobshi” hamayse koda eldhe.  
15:45 Pija 2:7.    15:54-55 Isi 25:8.    15:54-55 Hosev 13:14.

<sup>58</sup> Ogonante inin nashayna imbanaanato, wocchimbhayse woyee, yer harkaar jugimeebhode. Imbaa wontea Yesussa waadimanna yenin qajayno yer suntay konin dohonam dhesayse, Imbaa wontea Yesussa waadimandariy rooro wul thoothayna dehee.

## 16

### *Barjo Eenaam Kelshota Koymon Buldhayno*

<sup>1</sup> Barjo eenaam kelshota koymon buldhen goynsa, Galatia peente dahanaa misken onnana inin giyondettsi yediar yin hayee. <sup>2</sup> Inin niven wodanka koymo buldheayn doamadettsi, yedi wul gabansa rooroa biraaka yenin haapon koymonsa iira bulayse waana wodee. <sup>3</sup> Inta yekal inin nivon wodanka, yenin kamayna eena yenin bulon koymonam yekalanka tiyate Yerusaalemdar kenin yivoadettsi, warqat thaapate kena imayse ida keam yittsoaye. <sup>4</sup> Inin yivoadettsi iam zaskea ko hanna, kedi imbesana kinka keda yivoaye.

### *Bhawloosin Qaaboono*

<sup>5</sup> Inta ta Moqodoonia peendar yivota inin qaabonna, ogodar inin yivonsa budonte yekal agaaka ida nive. <sup>6</sup> Yediar inin yiven goyn innonna iam zasken yerin wulka yenin kelshoadettsi, yekal ida kappoaye. Waadon barginam yekal ida doaye. <sup>7</sup> Ta inin yivenka yekal yeskayse saana sagana nashaatine; Imbaa wontea Yesussa qaabe ko daana, woda likkana yembesana kinka kappana ida bhoccche. <sup>8</sup> Ko dahaannaar Bhentheqosthe\* bavaalaka yekka Epsoon kataman kote ida dee. <sup>9</sup> Harrna hambhidianna, Barjosa waadima thoothi inin waadadhoodettsi goyti worki ina buldhidin; ogoam jibbayna eena thoothine.

<sup>10</sup> Thimaatoos yekal ki nivanna, gaqatsadhima yekal kinin doadettsi kiam kelshimate. Kidiar idettsi Barjo waadimanam waadadheane. <sup>11</sup> Ogonante eedi hay ki hannaar kiam ki bagabhoode. Kidi imbaanaanabesana kinka idar kinin nivoadettsi kiam inin kaalenna, goynna kina zasken yerinam kelshintaka payya hayayse kiam suudee.

<sup>12</sup> Wombanaasa Abhiloos goynsa imbanaana waanibesana yedar kinin yivoadettsi kiam kattsi i miskade; kidi ta yedar “Ikal yivimoaye” hamayse shidhidine. Kina ko aganna kidi yekal yivasane.

### *Macchin Kiilimenbee Nagaymakkonbe*

<sup>13</sup> Yedi qaymimate; Barjodar woylamin yenin qajon goynka wocchimbhayse woymate; anngi maatee, kantimbhee. <sup>14</sup> Yenin hayen wulam nashimmakkoka haymate.

<sup>15</sup> Imbaanaanato, Isthipaanassa zelen eena Akaya peente Barjodar woylamin qajadhen goynka kedi eena birana kenin dohonbee Barjo eennaar waadadhana meten yinnonam saskate imaana kenin dohonbeam yedi dheseeda dhese. <sup>16</sup> Iginadettsina eenabee Barjo waadimanna hamayse qajadhayna eena wulbena ee yenin hamoadettsi ida yeam miske.

<sup>17</sup> Isthipaanasbee, Perdonathisbee, Akayqoosbeyn idar nivonna, inta i wozadhade. Harrna hambhidianna, yenin ikal qolmon goynka kedi yentea raqaate dahayse isa joogon yerinam ina ke thoosade. <sup>18</sup> Kedi yembe imbesa woylaminam ke ukunsisade. Ogonante iginadettsina eenaam edayse yenin dhesoadettsi ko yeam zaske.

<sup>19</sup> Isiya peente dahanaa misken onna wulir dohoono eeno yena “Nagaya nagaya” koda hame. Aqilabee, Bhirsqillabee, oonin kennontear bukayna Barjodar woylamin qajayna eena wulbe, Imbaa wontea Yesussa naabenka yena “Nagaya nagaya” keda hame. <sup>20</sup> Kote dahanaa imbanaana wul yena “Nagaya nagaya” keda hame. Gonin hamon nashimmakkonka kinka kiam kiam sunqaate nagaysee.

\* <sup>16:8</sup> “Bhentheqosthe” hamen upsinam Haalin Mallan mathaapinsa macchinte thaapadhaanar shedaa.

<sup>21</sup> Nagaymakkon upsin koam inta Bhawloos innon aaninka i yena thaapade. <sup>22</sup> Imbaa wontea Yesusam nashima eedi dahaa ki hanna, agaa ashadhaa ki dee. Imbo Yesuso, nivima! <sup>23</sup> Imbaa wontea Yesussa sunin imintono yembete ko dee. <sup>24</sup> Nashimmakkono inno Yesus Kiristoos goynka ye wulbesana ko dee; amiin.

## Kiristoos Yisa Tarjamonnante Kinin Yittsaa Bhawloos Qorontoos Eenana Kinin Thaapoono Lansono Warqanno

### *Ardinta*

Bhawloos kaa warqataam Qorontoosir Barjodar woylamin qajaanana kinin thaapoono dhacchintan upsinam workisana makkanso goyt Moqodoonia peente yinin dohonkane. Kinin thaapoono 47-50 levensa iintene. Qorontoosir Barjodar woylamin qajaanana kinin thaapoono biron warqatinsa malsinam Epsoon katamante toolayse ki dahade. Ogora Thirovadda ki yivade. Thirovaddar Tiitoam kinin haapaamonna, Moqodooniadar yivana ki dhaabhade (2:12-13). Ogote Tiitoam haapayse Qorontoosir Barjodar woylamin qajaanasa payyan bhocchinam qansayse ki wocchimbhade (7:7). Ko dahaannaar Qorontoos misken ooninsa iinte Bhawloossa hayamonam jibbayna tokaana Ayiwed eena ke dahade (11:12). Waani Qorontoosir Barjodar woylamin qajaana eena biron Bhawloossa warqatinam tiyayse seeson waadimanam garayse Barjodar ke maataakaar (2:1-11), kina Ayiwed eena, “Barjodar kisa dohoono woylamin qajidinbee waadimanbe gontehe” hamayse Bhawloosam keda bage. Ogo goynka Bhawloos kisa iinte dohon bhocchinam may ki thaapade.

Bhawloos kashi 1-7dar kisa waadimandar dhaabhon palimensa kidi malsin kida ime. Kashi 10-13dar Kiristoosin yisa tarjamonnante yittsaa kinin dohonsa dhaabhon palimensa kidi malsin kida maase. Kashi 8-9dar Qorontoos gidir Barjodar woylamin qajaana eena Yiwda peente Barjodar woylamin qajaana eenaam kelshota kenin imen koymonam kenin imoadettsi ki bhocchisade.

Kaa mathaapaam raq dongdar kashana dandima ko dandime:

1. Nagaymakko (1:1-2)
2. Barjodar woylamin qajayse waadadhahayno waadimano (1:3-7:16)
3. Kiristoosdar woylamin qajayse imbhayno imintono (8:1-9:15)
4. Kiristoossa waadima eedi maatinta (10:1-13:10)
5. Macchin kiilimenbee nagaymakkonbe (13:11-14)

Kaa mathaapa Barjosa daytanbee waadimanbesa thoothi koda giye (1:3-4; 2:14; 4:5-6; 5:18-21; 6:14-18; 9:7-15). Ena Mallanbee Haalin Mallanbe konin edimensa (kashi 3), niven wodansa (5:1-10), qaashime waadimasa (5:14-21), koymodar hamin hayayse wonin waadadhensa (kashi 8-9) koda dhettse.

<sup>1</sup> Barjo bhocchinka Yesus Kiristoos yisa tarjamonnante kinin yittsaa i Bhawloosbee imbanasa Thimaatoosbekalanka, Qorontoos katamante dohon Barjosa misken ooninbee pir Akaya peente dahaana Barjodar woylamin qajayna wulbena nittsadhoono warqannone. <sup>2</sup> Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Bhawloos Barjoam Kinin Gobshoono*

<sup>3</sup> Wosa Imbaa Yesus Kiristoossa Imba maataa Barjo ki gobshadhe. Kidiar wona burqadhea wosa Imbaabee yer wulka woam wocchinsea Barjobene. <sup>4</sup> Wodi Barjokala wonin haapen wocchimbhinkanka gaalente dahaana wulam wonin wocchinsoadettsi, Barjo wonin gaalen wulir woam kida wocchinse. <sup>5</sup> Kiristoossa gaaleno wodar konin thoothondettsi, ogodettsi wocchimbheno Kiristoosbar wona ko thoothade. <sup>6</sup> Wodi gaale wo tiydianna, yedi wocchimbhinkabee dhaqintabeam yenin tiyoadettsine; wo wocchimbhidianna, yedi pir wonin tiyen gaalenam darshintaka tiyayse yenin wocchimbhoadettsine. <sup>7</sup> Wosa gaalenam wombesana kinka yenin kashimendettsi, wosa

wocchimbhenamaar wombesana kinka yenin kashimenam wonin dhesenna, yennon goynsa Barjodar kattsi woylem woda haye.

<sup>8</sup> Imbanaanato, Isiya peente wonin dohonka, wodar yeskon gaalenam ye dhese ida zage. Ogonoar wodar yeskon gaalen baskana wonin damerra kattsi sagi konin dohonna, sadaka wonin dahayno bhocchiar wosaolehe. <sup>9</sup> Gon dembhi pirdi wodar pirdadhaadettsi ko wona dhesimade. Ogoro wul wodar konin yeskoono wosa kantandar woylem qajima, diyaanaam dhaasea Barjodar woylemin wonin qajoadettsine. <sup>10</sup> Kidi ogonante dembhina yeskisen gaalera woam dhacchidine; woam dhacchasan; pir “Kidi woam dhaccha ki dhacche” hamayse qaabe wonin hayoono kidarne. <sup>11</sup> Yediar woam miskeka yenin kelshoadettsi ko yeam zaske. Harrna hambhidianna, thoothi miskeka wodi Barjosa kelshonam wonin haapenna, thoothino eeno wonnon goynka Barjoam koda gobshe.

### *Bhawloos Qorontoos Kataman Yivot Yinin Qaabonam Kinin Ookoono*

<sup>12</sup> Woninka erimen yerin gonnihamayse meskeno wosa konin tarjayno yinne: Waani eenbee kattsika yembesana kinka wosa dohon kalaa maatintano Barjokala wonin tiyoono gazamonbee gonamonbeka entsadhaysene. Ogonoar Barjosa sunin imintonkane, eedisa pakalmakkokatehe. <sup>13-14</sup> Nabbabayse bhocchana yenin Damen dayma, yer ab yena thaapattone. Ta wonnon goynsa likka yenin bhocchondettsi, bere wulam yeda bhocche hamayse yedar woylem ida haye. Ogo goynka Imbaa Yesusin maataate nivea rooroaka wodi yenka wonin erimendettsi, yediar wonka yeda erime.

<sup>15</sup> Wonka yenin erimenam gonnihamayse birayse yekal nivana inta bhocchidine.

<sup>16</sup> Ogonoar Moqodoonia peendar inin yivenkabee ogoraar inin maatenkabe, yekal nivana inta bhocchidine. Ogoka Yiwda peendar inin yivenkaar, iam yenin kelshoadettsi inta qaabidine.

<sup>17</sup> Ogoam inin bhocchen wodanka, osbee orabe inin maateadettsi yena ko maato? Wayeedi qaabika inin bhocchenka rooro kalaa “Ko dee, ko dahabhoode” hamea ko yena maato? <sup>18</sup> Barjo gon hamaa kinin dohonna, yena wonin giyaynoar “Ko dee, ko dahabhoode” hamaynotehe. <sup>19</sup> Harrna hambhidianna, imbee, Sillaasbee, Thimaatoosbe Barjo Naasa Yesus Kiristoos goynam yesa shaarinte wonin giyayno “Ko dee, ko dahabhoode” hamaynotehe; Yesus Kiristoosbar “Ko dee” hamayno bishne.

<sup>20</sup> Barjo wona kinin imoono woylemin haydhayno wul “Ko dee” konin hambhayno Kiristooskane. Ogonante Barjosa gobshinna Kiristooska “Amiin” woda hame.

<sup>21</sup> Wombee yembeam Kiristooska wocchinsaa Barjone; woam edayse yina qadhaa kidine. <sup>22</sup> Kinti wonin maatensa tarja maatayno milkit wodar wodaa, pir os birante wona kinin imensa tarja maaten Manpas Gazanam wosa woyleminte wona imaa kidine.

<sup>23</sup> Inta Qorontoos katamandar maataate inin nivaammo yeam buchattine hamayse; ogona Barjo isa tarjane. <sup>24</sup> Yedi Barjodar woylemin yenin qajenka wocchimbaana yenin dohonna, yenin wozadhaadettsi yembesana kinka woda waadadhe; Barjodar woylemin qajadhen goynna yeam bitattone.

## 2

<sup>1</sup> Ta keeda isa woyleminka “Yeams buchhana pir yedar nivattine” hamayse i bhochade. <sup>2</sup> Harrna hambhidianna, inta yeams buchchi i hanna, ta keeda inin buchchaana yekala ab, iam wozisea hayne? <sup>3</sup> Birayse yena inin thaapoonoar yekal inin nivenka, iam wozisa zaskayna eena iam kenin buchchoamadettsine. Harrna hambhidianna, isa wozano ye wulsaar woza koda maate inin hamonnane. <sup>4</sup> Gebhi gaalebee, woylemin qaabobee, thoothi ermitbeka yena inin thaapoono kattsi yeam inin nashenam yenin dhesoadettsi hamaysene; yeams buchhana hamaysetehe.

### *Seesaa Eana Ko Shidhe Haminta Zaskoono*

<sup>5</sup> Eedi hay ki hannaar, eediam buccidi ki hanna, kinin bucchaa ibisheamtehe; yerinam shawkana dayma, ye wulam likka buccidine. <sup>6</sup> Agaadettsea eana yesa thoothin eenin pirdoono dhabino kina yeeke ko yeeke. <sup>7</sup> Ogonante agaadettsea eana kattsi kinin burqadhoamadettsi “Ko shidhe” hamintabee kiam wocchisintabe yeam koda zaske. <sup>8</sup> “Ta keeda kiam yenin nashenam may kina dhehee” hamayse ida yeam miske.

<sup>9</sup> Kosa birayse inin yena thaapoono taysate yeam shedayse yer wulka ee hamayna yenin dohonam dhesanane. <sup>10</sup> Yedi eedi haynaar “Ko shidhe” ye hamidianna, intaar pir kina “Ko shidhe” ida hame. “Ko shidhe” inin hamea daa ko hanna, inta yena hamayse Kiristoos birante kina i garade. <sup>11</sup> Ogoam inin hayaynoar Seethaansa maltamonam wonin dhesenna, Seethaan woam taysaye kanta kinin haapoamadettsi isa hamintane.

### *Kiristooska Haapadhadyno Bashintano*

<sup>12</sup> Kiristoossa dhacchintan upsinam giyana Thirovadda katamante i yivaysaka, Imbaa wontea Yesus Barjosa waadimanna keri ina bulidine. <sup>13</sup> Ko dahaannaar isa imbanasa Tiitoam inin haapaamonna, isa woylammo ukunsadehe. Ogonante Thirovadda gidir dohoono Barjodar woylamin qajaynaam nagaysayse Moqodoonia peendar i yivade.

<sup>14</sup> Ko dahaannaar rooro wul Kiristoossa bashintanka woam gobshayse entseabee payya gaamen shittoysa dohoono Kiristoos goynsa timmirinam raq wulir wonin yeskisoadettsi woam hayea Barjona gobshi ko dee. <sup>15</sup> Harrna hambhidianna, dhaqayna eenabee kayayna eenabesa shaarinte wodi Kiristoos Barjona kinin imen gaamen qunyandettsine. <sup>16</sup> Kayayna eenana ko hanna, deesen dembhin shittondettsine; dhaqayna eenana ko hanna, sadaka daadhen imen gaamen shittondettsine. Ta waadiman ogoam hayota yeeke hayne? <sup>17</sup> Wodi Barjosa upsinam gabon koymen bhulsayna thoothina eenadettsitehe; Barjokalanka nittsadhaana Kiristooska maatayse Barjo birante gon woda giye.

## 3

### *Haalin Mallansa Waadadhayna Eena*

<sup>1</sup> Pir woam shawkan wo yedaaw? Way waani waani eenin hayendettsi yena thaapadhaa way yekalanka thaapadhaa tarjamo warqat yedayse yaaya ko woam zasko? <sup>2</sup> Een wulin dhesaynabee nabbabaynabe wosa tarjamo warqat maataana, wosa woylaminte thaapadhaana yedine. <sup>3</sup> Yedi wosa waadimanka nivaana Kiristoosin thaapoono tarjamo warqat yenin maatoono dhesimoonone. Ogo tarjamon warqatinam thaapadhoono pidalka dayma, sadaka dahaa Barjosa Manpaskane; pir seenidar dayma, eensa woylamindar ko thaapadhade.

<sup>4</sup> Ogoam wonin giyaynoar Kiristooska Barjodar yennon goynsa woylamin wonin qajennane. <sup>5</sup> Waadiman wonin waadadhoadettsi kantan wona imayse woam yeskisea Barjone; wodi womal yer kala hattear hayana yekattone. <sup>6</sup> Pidalka thaapadhon yigginka dayma, Manpas Gazanka dohoono haali mallanka Barjona wonin waadadhoadettsi woam yeskisaa Barjone. Harrna hambhidianna, yiggino deesa ko deese; Manpas Gazano sadanka daadhenam koda ime.

<sup>7</sup> Ena seenidar pidalka thaapadhon yigginam imbheng wodanka, Barjosa gobshino Musesa wotinte bhalqantdettsi koda haapadhe. Ogono shaakano kayaate ko han-naar, Israveel eena kisa wotinam payya hayayse shedana damadehe. Ta dembhinam bovon yiggin waadiman ogodettsi gobshinka ko haapadhanna, <sup>8</sup> Manpas Gazan goynka haapadhadyno waadimano hamin sagi gobshika ko haapadhimine? <sup>9</sup> Eendar pirdin beven yiggin waadimansa gobshi daa ko hanna, eenaam Barjo birante tipa maasen waadimano hamin sagi gobshi kosa daymine? <sup>10</sup> Ta gayno sagino gobshino, ena

yigginisa gobshinka yeekinsadhenka, ena gobshi qolmadettsi maatayse koda haapadhe. <sup>11</sup> Ogo yin shidhensa gobshi daa ko hanna, lay dehen yerinsa sagi gobshi hamin ko daymine?

<sup>12</sup> Ta keeda ogodettsindar qaabe wonin hayenna, kurtumbhe qolma wocchimbhayse woda giye. <sup>13</sup> Wodiar Musedettsi hayattone; kisa wotinte kayaate yiven shaakansa macchinam Israveel eena kenin haapoamadettsi wotinam ki ochade. <sup>14</sup> Igina eenasa woylammo duudidine; kinaka yekka Ena Mallan mathaapinam nabbabadhenka, kesa woylammo ogo ena Muse wotinam kinin ochenka ochadhaadettsi koda maate. Harrna hambidianna, ogono ochadhoono konin mardhayno Kiristooska bishne. <sup>15</sup> Kinaka yekka Musesa yiggin mathaapinam nabbabadhen wulka, kesa woylaminam ochadhidine. <sup>16</sup> Ko dahaannaar eedi Imbaa wontea Yesuskal kinin niven wodanka, kisa woylaminam ocha woylamra kida buldhe. <sup>17</sup> Imbaa wontea Yesus Manpasne; Imbaasa Manpasinin dohonte nathamo daane. <sup>18</sup> Mastootinin dhehendettsi, wodi wul wosa ochadhaamon wotinka Imbaa wontea Yesussa gobshinam dhahaate, Manpas maataa Imbaam maatana gobshira gobshindar woda ookime.

## 4

### *Bhawloos Yisa Waadimanka Gon Hama Eedi Kinin Maatoono*

<sup>1</sup> Ogonante Barjo yisa garintonka ko waadimanam kinin wona imonna, wodi agehe hamayse garattone. <sup>2</sup> Aachimonbee ooshinsenbe hamon waadimanam waadadhettone wodi hamidine; cubbokaar waadadhettone; Barjosa upsinam buudamoka worsattone. Goninam may hayayse dhayntaka, een wulsa meskenna hamayse Barjo birante woda dee.

<sup>3</sup> Wonin giyayno Barjosa dhacchintan upsino aachimoono ko hannaar, konin aachimoono kayayna eenanane. <sup>4</sup> Kedi Barjodar woylamin kinin qajimino peen kosa bit maataa Seethaan kesa woylaminam kinin shuponnane; Barjosa gon kamsi maataa Kiristoossa gobshin giyayno Barjosa dhacchintan upsinka kena nivayno shaakanam kinin haapoamadettsi maraa kidine.

<sup>5</sup> Wonin giyayno, Yesus Kiristoos Imba kinin dohonbee wodiar Yesusna hamayse yena waadimyna wonin maatonbene; wonnon metenna giyattone. <sup>6</sup> Harrna hambidianna, "Shaaka thipansa iir ko shaake" hamayse giyaa Barjo shaakan yinnonam wosa woylaminte shashkaa kidine; shaakano ogono Kiristoossa wotinte shaakayno Barjosa gobshinam wona dhettsaynone.

<sup>7</sup> Ko dahaannaar ko gobshin yerinam peera ashkadhaa daadettsi maatayse wotiyade. Harrna hambidianna, ogono gembho kantano Barjosa konin dohonam, wonti konin dahaamonam eenin dhesoadettsine. <sup>8</sup> Yer wulka gaale wodar ko yeskaakaar, bashadhattone; thoothi qaabe wodar ko nivaakaar, wosa woza kayehe. <sup>9</sup> Woam jibbayna ke oytayaakaar, Barjo woam garehe; woam qanate ke dhabaakaar, diyattone. <sup>10</sup> Yesussa sadano wosa bishinte konin haapadhoodettsi, rooro wul Yesussa dembhinam wosa bishindar baskayse woda yaaye. <sup>11</sup> Yesussa sadano diyen wosa bishinte konin haapadhoodettsi, ta wodi sadanka dahaana rooro wul Yesus goynka dembhina saskate woda imbhe. <sup>12</sup> Ogonante wodi dembhinte wonin haapadhenka, yedi dayntante yeda haapadhe.

<sup>13</sup> Ko dahaannaar, "Barjoyn giyonam gonne i hamade; ogonante i giyade" hamayse thaapadhdondettsi, wodiar ogodettsi Barjodar woylamin wonin qajenna, kinin giyonam gonne wo hamade; ogonante woda giye. <sup>14</sup> Imbaa wontea Yesusam dembhira dhaasaa Barjo woamaar Yesusbesana kinin dhaasendettsibee yembesana kinnon birante woam kinin woysenbeam dhesooda dhese. <sup>15</sup> Barjosa sunin imintonin thoothayse eenna

yeskonna, eeno Barjoam konin gobshenka Barjona gobshi thoothoadettsi, yer wul yena ko maatade.

### *Barjodar Woylamin Qajayse Daadhyano*

<sup>16</sup> Ogonante wodi agehe hamayse garattone; yer hamin hambhaakaar eenna haapadhyano wosa bishino kayaate ko yivaakaar, haapadhimino bishino rooro wul haalimbha ko haalimbhe. <sup>17</sup> Ogo likka wodana haapadhyano, deegano gaaleno wuldara kattsi sagi rooro wul lay dehen gebhon gobshinsa dethanam wona koda haye. <sup>18</sup> Wonin shedayno haapadhimin yerinamne, haapadhenamtehe. Harrna hambidianna, haapadhyano yerro likka wodanane, haapadhimino yerro woda wulnane.

## 5

<sup>1</sup> Ogo apala oonidettsi maaton peen kogayn waan wosa kottsimakaar, aaninka woysadhaammo Barjoyn woysoono oonidettsi maaton, rooro wul lay dehen cecinngayn bishi wosa dohonam woda dhese. <sup>2</sup> Ogo cecinngayn wosa bishinam qaadhana anngardhaate, peen kogayn waan wonin qaadhonna woda burqadhe. <sup>3</sup> Ogo cecinngayn bishinam wonin qaadhenka, pundiri maatayse haapadhattone. <sup>4</sup> Ogo apala oonidettsi maaton wosa waanka wonin dehenka, wona konin dethonna, woda burqadhe. Wonin burqadhyanoar dembhino sadanka daadhendar konin ookimoadettsi, cecinngayn bishinam qaadhana woda zage; pundirmakko zagattone. <sup>5</sup> Ogo ookimanna woam ashkaa Barjone; kinin wona imensa tarja maaten Manpas Gazanam wona ki imade.

<sup>6</sup> Ogonante peenngayn wosa waanka wonin dohonka yekka, Imbaa wontea Yesuskala edimayse wonin dehenam wonin dhesonna, rooro wul kurtumbhe qolma wocchimbhintaka woda dee. <sup>7</sup> Wonin dohoonoar Barjodar woylamin qajintakane, aapinka haapintakatehe. <sup>8</sup> Peenngayn wosa waara dembhika edimayse Imbaa wontea Yesusbesana kinka daadhenam kattsi woda nashe. Ogonante kurtumbhe qolma wocchimbhayse woda dee. <sup>9</sup> Ogonante peenngayn wosa waanka dahaana wo hannaar, waara edimaana wo hannaar, wosa bhocchino Yesusam wozisana bishne. <sup>10</sup> Harrna hambidianna, wodi kalaa kalaana waan wonnondar siyabee payyabe wonin waadadhaadettsi baza tiyana Kiristoossa pirdin raqinsa birante wodi wul theeda woam koda zaske.

### *Kiristooska Barjobesana Qaashime Haapadhoono*

<sup>11</sup> Ta keeda Imbaa wonteam kurtumbhantanam wonin dhesenna, eenam woda dhettsise. Wodi hamin wonin dohonam Barjo dhesa ki dhese; yedi yesa meskenka hamin wonin dohonam yenin dhesendettsi yedar qaabe ida haye. <sup>12</sup> Woylaminte dohon yerinka dayma, eedin haopen yerinka erimayna eenana malsi yenin maasoadettsi, wonkaar yenin erimoadettsi goyt i yena woda ime; pir yena woam shawkattone. <sup>13</sup> Qaabeka bardhaana wo hanna, Barjona hamaysene; qaabeka bardhaamma wo hanna, yena hamaysene.

<sup>14</sup> Harrna hambidianna, eedi kalaa een wulna kinin diyaadettsi, ogona eeno wul kanka konin diyonam gon wonin dhesenna, Kiristoossa nashimmakkon waadimanna woam koda dhaase. <sup>15</sup> Sadanka dhaana eena kena diyaabee kenaar dembhira dhaabhaabena kenin doadettsi, keeda kaara os yisa metenna hamayse kenin doamadettsi, Kiristoos een wulna ki diyade.

<sup>16</sup> Ogonante ta keeda kaara os wodi eedi hayyeamaar waan goynka bhocchattone. Kosa birayse Kiristoosam waan goynka bhocchidi wo hanna, ta keeda kiam wonin bhocchayno ogodettsitehe. <sup>17</sup> Ogonante eedi hay ki hannaar Kiristooska ki daana, haali pijadhaane. Ena hammo yerro shidhidine; marrato! Keeda yerro wul haali maatidine. <sup>18</sup> Ogono wul yin konin dohoono Barjokane; woam yimbesana Kiristoos goynka qaashisintan waadimanamaar wona imaa kidine. <sup>19</sup> Ogono Barjo Kiristoosbar maatayse peendar dohon eenam yimbesana kinka qaashisite ki dahade; kesa

seesonamaar paydehe. Keamaar yimbesana kinka kinin qaashinsonam dhettsisen upsinam wona ki imade.

<sup>20</sup> Ta keeda Barjo eenam wonka kinin eelenna, wodi Kiristoossa ergen eenane. Ogonante “Barjobesana qaashimee” hamayse Kiristoossa naabenka yeam woda miske.

<sup>21</sup> Wodi Kiristooska Barjosa birante tipa wonin maatoadettsi, seesoysa qolmaa Kiristoos wonnon seeson wulam kinin baskoadettsi Barjo kiam ki hayade.

## 6

<sup>1</sup> Wodi Barjobesana waadadhayna “Barjosa sunin imintonam sun shisheebhode” hamayse yeam woda miske. <sup>2</sup> Barjo

“Inin kamon wodanka, yenin giyenam i qansade;  
dhaqintan rooroakaar yeam i kelshade”

kinin hamenna, marrato! Kambhoono wodano taakine; dhaqintan rooroar kinane.

<sup>3</sup> Wonin waadadhayno siyane konin hambhoamadettsi, yer kalaaka hattear eedi haynaar goa maatattone. <sup>4-5</sup> Barjona waadimayna eena wonin dohonna, wodi yer wulka kattsi darshaate yena kamsi wo maatade. Ogonoar gaalebee, oytaydhabee, qaabebee, qandhabee, dhaxibee, goorebekane; pir waadimaka qajintabee, raat kaysabee, daaqibekane. <sup>6</sup> Ta pir gazamakkobee, dhesintabee, darshintabee, eedina payya hayntabee, Manpas Gazanbee, gonin nashimmakkonbee, <sup>7</sup> gonin upsinbee, Barjosa kantanbekane; mizaqimbee warkatambeka Barjona tipa haydhensa banqin anngamon yedintakane. <sup>8</sup> Ta pir gobshibee ooshimbhebena, bagadhabee shawkadhabena wodi ashkimbhaanane. “Eenaam keda dhaddhise” woam hambhenka, wodi gonin eenane; <sup>9</sup> “Dhesadhimina eenane” woam hambhenkaar, wodi dhesadhaanane; “Diyana keda haye” woam hambhenkaar, sadaka woda dee. Woam qandhenkaar diyootone; <sup>10</sup> “Sii eedine” woam hambhenkaar, rooro wul wodi wozadhaynane; “Qambhinane” woam hambhenkaar, thoothin eenaam woda wodinse; “Kesa yer qolehe” woam hambhenkaar, yer wul wosa daane.

<sup>11</sup> Yedi Qorontoos eenato, may yena wodi giydine; wosa nashimmakkonam yena wodi dhaydine. <sup>12</sup> Yedi yesa nashimmakkonam wona ye toskade; wodi wosa nashimmakkonam yena toskootone. <sup>13</sup> Isa naana yenin dohondettsi: “Wodi wosa nashimmakkonam may wonin yena dhoondettsi, yediar yesa nashimmakkonam may wona dhehee” hamayse yena ida giye.

### *Barjodar Woylamin Qajimina Eenabesana Kinka Kalaa Maata Zaskimino*

<sup>14</sup> Barjodar woylamin qajimina eenabesana kinka kalaa maateebhode. Tipamobee wobamobe hamin kinka kalaa ke maate? Shaakabee thipabe hamin kinka ke dee?

<sup>15</sup> Kiristoosbee Seethaanbe\* hamin kinka ke age? Barjodar woylamin qajeabee qajimaabe hamin kinka kalaa ke maate? <sup>16</sup> Barjosa gazan ooninbee aaninka ashkadhaana barjonabe kinka kenin agayno kesa dohoono hare? Ogonoar Barjo

“Isa dayntanam zarsinsa shaarinte ida haye;

kembesana kinka ida dee;

intaar kesa Barjo ida maate;

kediar isa zarsi keda maate”

hamayse kinin giyondettsi, wodi sadaka dahaa Barjosa gaza oonine. <sup>17</sup> Ogonante Barjo Imbaa yin ki giyade:

“Kesa shaarira utee, edimee;

qaysin yerinam kaameebhode;

intaar yeam tiyayda tiye” ki hamade.

<sup>18</sup> Pir,

<sup>6:2</sup> Isi 49:8. \* <sup>6:15</sup> “Seethaan” hambhayno Girik aponka, “Beliar” koda hambhe. <sup>6:16</sup> Lewi 26:12; Yiz 37:27.

<sup>6:17</sup> Isi 52:11.

“Wulam Wottsea Barjo ‘Inta yesa Imba ida maate;  
yediar naana isa annginabee maanabe yeda maate’  
hamayse ki guyade” ko hambhade.

## 7

<sup>1</sup> Keeda inin nashaynato, kono wul qaabe wonin hayayno konin dohonna, wosa waanbee woylaminbeam minngisayna yerra wulkala woam wo ashke; Barjoamaar kurtumbhinta gon gazana eena wo maate.

### *Bhawloosin Wozadhoono*

<sup>2</sup> Yesa nashimmakkonam may wona dhehee. Hayyeamaar genootone; hayyeamaar dhaddhisootone; haykalaar taysate yer tiyootone. <sup>3</sup> Ogoam inin giyaynoar yedar pirdanatehe. Harrna hambhidianna, yembesana kinka diyanabee daanabe wosa woylamine yenin dahaadettsi birayse inta yena giydine. <sup>4</sup> Yedar woylamin inin qajayno gebhine; yenka inin erimaynoar gebhine. Ogona ida wocchimbhe; wosa gaalen wulka inta kattsi wozadhaya wozadhe.

<sup>5</sup> Moqodoonia peente wo nivaysakaar raq wulbar wodar gaale ko yeskade, ukunse haapootone; mayambar wacime, iinbar kurtumbhe ko dahade. <sup>6</sup> Ko dahaannaar, qaabonka burqadhadynaam wocchinsea Barjo Tiitosa nivintanka woam ki wocchinsade. <sup>7</sup> Wonin wocchimbhonoar kisa nivintanka bish dayma, yediar kiam yenin wocchinsonam wonin qansenkane. Iam shedana yenin zagenbee, qaabonka yenin burqadhenbee, inka agana yenin anngardhenbeam wona kinin giyen wodanka, ini hamora sagi i wozadhade.

<sup>8</sup> Kosa birayse inin yena thaapon warqatinka yeam buccha i hannaar, inin thaaponka burqadhattine. Harrna hambhidianna, burqadhidi i hanna, inin thaapon warqatinka likka wodana yeam inin bucchonam i shedade; <sup>9</sup> ko dahaannaar ta iam kattsi wozisidine. Inin wozadhoonoar yeam inin bucchonna dayma, yenin burqadhon goynka seeson waadimanam garayse Barjodar yenin maatonnane. Yenin burqadhoono Barjosa bhocchindettsi konin dohonna, wodi yeam yer kalaaka hattear genootone hamintane.

<sup>10</sup> Barjosa bhocchindettsi maatoono burqadhintano seeson waadiman garayse, targadhe qolmon Barjodar maatintanbee dhaqintanbeam koda beve; peen ko gayno burqadhintano dembhinam koda beve. <sup>11</sup> Ogo Barjosa bhocchindettsi maatoono burqadhintano yesa shaarinte har konin waadadhonam shedee: Wocchimbhayse ye bhocchade; marimaate seeso yesa qolmonam ye dhahade; seeson eadar ye wacimade; ogo dhalqinna ye kurtumbhade; iam shedana ye zagade; inka agana ye anngardhade; seeson waadadhaam kiam zaskendettsi ye dhabshade. Dhalqin ogoka gazana eena yenin maatonam yer wulka yedi dhettsisidine.

<sup>12</sup> Ta inin yena thaapoono seeso waadadhaa eana way yiam seesadhaa eanatehe; ko dahaannaar wona yesa dohoono wocchimbheno Barjo birante yena may konin dhesimoadettsine. <sup>13</sup> Wonin wocchimbhono ogokane.

Wonin wocchimbherra sagi Tiitoyn wozadhonna, wodi kattsi wozadhidine. Harrna hambhidianna, kisa woylammoar ye wulka ukunse haapidine. <sup>14</sup> Yenka inin erimonam Tiitona inta giydine; yediar iam ooshinseetene. Yer wulam yena gon wonin giyondettsi, Tiitona wonin giyoono erimo gon maatidine. <sup>15</sup> Tiitoar kurtumbhebee gibazbeka hamin kiam yenin tiyonbee ye wulsa ee hamintanbeam bhocchada, yena kisa dohon nashimmakkonam ki thoosade. <sup>16</sup> Yer wulka yedar woylamin inin qajenna inta wozadhidine.

## 8

*Barjodar Woylamin Qajayna Eena Koymon Kenin Imoono*

<sup>1</sup> Imbanaanato, Moqodoonia peente dahaana Barjodar woylamin qajayna eenana imbhon Barjosa sunin imintonam yenin dhesoadettsi woda zage. <sup>2</sup> Thoothi gaaleka taysate ke shedadhade. Ko dahaannaar hamin qambhi ke maataakaar, kesa wozano kattsi gebhi konin dohonna, nashayse gebhi koymo ke imade. <sup>3</sup> Yinin dameaka yekka bish dayma, yinin damerra sagi nashayse kenin imonam inta kena ida tarje. <sup>4</sup> Kedi Yiwda peente Barjodar woylamin qajayna eenaam kelshana payyan waadiman wombesana waadadhana woam gebhi ke miskade. <sup>5</sup> Ogonoar wonin qaabondettsi dayma, birayse Imbaa wontea Yesusna yiam ke imade; ogoraar Barjosa bhocchindettsi yiam wona ke imade.

<sup>6</sup> Waadiman ogoam birayse yedaa Tiitoyn dohonna, taar payyan waadiman ogoam yembesana kinka kinin macchoadettsi kiam wodi miskidine. <sup>7</sup> Yedi yer wulka: Barjodar woylam qajintabee, Barjosa upsinam giyntabee, yer dhesintabee, yesa wocchimb-hintabee, wona yesa dohon nashimmakkonbeka\* yenin sagondettsi, pir ogo payyan waadimankaar sagee.

<sup>8</sup> Ta ogoam inin giyayno, haya ko yeam zaske hamintakatehe; ko dahaannaar waani eenin dhehen wocchimbhen goynka yesa nashimmakkonsa gonamonam shedana hamaysene. <sup>9</sup> Yedi wosa Imbaa Yesus Kiristoossa sunin imintonam dhesidine: Yesus eedi wodimo dahayse, kisa qambhamonka yedi wodimona yenin doadettsi hamayse, kidi yena qambhi ki maatade.

<sup>10-11</sup> Ogo koymon imbhen goynsa kiilime yena ida ime: Anngala levera yedayse imana bish dayma, "Imooda ime" hamayse bhocchaana birana eena yedi, ogo yenin yedon waadimanam ye macchidianna, yena koda age. Keeda ogoam hayana yesa payya bhocchin dohondettsi, yenin damaadettsi yesa dohonka pir waadimanam waadadhee. <sup>12</sup> Imana yesa payya bhocchi daa ko hanna, yesa imintonam Barjoyn tiyayno yesa dohonam yenin imenkane; yesa qolmonam yenin imenkatehe.

<sup>13</sup> Ogoam inin giyaynoar yedi wul kiaddha yenin maatoadettsine; yedi imanna yenin gaalenka, waani eena kenin ukunsoadettsitehe. <sup>14</sup> Yenin gaalen wodanka kesa koymono yesa gaalendar konin haaqoadettsi, ta yesa koymono kesa gaalendar ko haaqe; ogoka yedi wul kiaddha yeda maate. <sup>15</sup> Ogonoar "Thoothi pucchaa eana mirgadehe; likka pucchaa eanaar joogadehe" hamayse thaapadhdontetsine.

*Tiitobee Kimbesana Kinka Waadadhaynabe*

<sup>16</sup> Inta yena inin bhocchendettsi, Tiitoar yena wocchimbhayse kinin bhocchoadettsi hayaa Barjo ki gobshadhe. <sup>17</sup> Ogonoar Tiito yekal kinin nivoadettsi kiam wonin miskenka, wona ee hamidine; ogo bish dayma, yena kattsi wocchimbhayse yinin bhocchenna, kidi yinti nashayse yekal kida nive.

<sup>18</sup> Barjosa dhacchintan upsinam giyntaka misken oonin wulir gobshadhaa wom-banaasaam kimbesana kinka yekal kiam wo yittsade. <sup>19</sup> Ogoraar sagi, iminton imb-hensa waadimanna wombesana kinka kinin vivoadettsi misken onna wulir dohon eenin kamaa eane. Wodi ogo iminto imintasa waadimanam wonin waadadhoono Imbaa wontea Yesussa gobshinnabee wosa dohon payyan bhocchinam dhaanabene. <sup>20</sup> Ogo iminton imbhonam wonin bavate yivenka, siya dhalq wodar konin yesko-madettsi mete wosaam woda gishe. <sup>21</sup> Harrna hambhidianna, wosa bhocchino Imbaa wontea Yesus birante bish dayma, eedi birantear payya maatonam hayanane.

\* <sup>8:7</sup> "Wona yesa dohon nashimmakkonbeka" hamayno ena mathaapin waani waanisa iir "yena wosa dohon nashimmakkonbeka" koda hame. <sup>8:15</sup> Ut 16:18.

<sup>22</sup> Thoothi wodaka, thoothi goytika kiam taysate shedayse qaabiysa wocchi dahaa wonin haapaa wombanaasaam kembesana kinka wo yittsade. Kidi yennon goynsa kattsi woylamin kinin qajenna ta yeam kelshadhen goynsa sagi kida wocchimbhe.

<sup>23</sup> Tiito goynsa eedi oysea daa ki hanna, yeam kelshana imbete waadadhea isa aanantane. Wosa imbanana goynsa eedi oysea daa ki hanna, misken onna wulir dohon eenin kamayse yittaana Kiristoossa gobshinna woyaanane. <sup>24</sup> Ta keeda misken onna wulir dohon eensa birante yesa nashimmakkonbee yennon goynka wonin erimen erimenbe gon konin dohonam kena dhehee.

## 9

### *Barjodar Woylamin Qajayna Eenaam Kelshana Koymon Buldhen Goyno*

<sup>1</sup> Barjodar woylamin qajayna eenaam kelshana buldhen koymon goynka yena thaapa iam zaskehe. <sup>2</sup> Harrna hambhidianna, iminto imana yesa payyan bhocchinam dhesayda dhese. Ogonante “Akaya peen eena anngala levera yedayse imana kedi ashkidine” hamayse Moqodoonia peen eenna yennon goynka ida erime; waadadhana yenin anngardhayno thoothin eensa anngarma dhaasidine.

<sup>3</sup> Ko daahaannaar kena birayse inin giyondettsi, ashkaana yenin doadettsi, ogo yerinna yennon goynsa wosa dohoono erimeno sun konin shidhoamadettsi, imbananaam yekal ida yittse. <sup>4</sup> Moqodoonia eena imbesana kinka yekal kenin nivenna, ashkimbhaamma eena maatayse ye daaka yeam haapidi ke hanna, yeda ooshimbhe; pir yenza wonin erimoono woam koda ooshinse.

<sup>5</sup> Ogonante “Imooda ime” hamayse yenin giyonam birayse yenin ashkoadettsi, yeam bhocchisana igina imbanana iam birayse yekal kenin yivoadettsi keam miska iam ko zaske hamayse i qaabade. Ogona inin nivenka yesa imintono ashkimbhoono ko maate. Ogonoar yesa imano kantaka dayma, yemal nashayse yenin imea koda dee.

<sup>6</sup> Yena yin ida giye: Likka yiithealikka kida buure; thoothi yiithealikka pir thoothi kida buure. <sup>7</sup> Barjo wozanka imea eam kinin nashenna, eeno wul yisa meteka meteka woylaminka yinin bhocchonam ko ime; gundumada way imaa hambonna nashima ko imabhoode.

<sup>8</sup> Roro wul yer wulka yena yeekenam haapayse payyan waadiman wulka yenin thoothoadettsi, Barjo sunin imintonam thoothi yena imana dama ki dame. <sup>9</sup> Ogonoar “Kidi qambhinana thoosayse ki imade; kisa tipamon waadimanoar roro wul koda dee” hamayse thaapadhondettsine. <sup>10</sup> Bheetan yiitheana bheetanbee itseana galanbeam imea Barjo yedin yiithen bheetanam thoothi yena kida ime; yesa tipan waadimansa aapinam yena kida thoose.

<sup>11</sup> Wodi yesa imintonam wo bavaysaka, eeno wul Barjoam yesa imintonka konin gobshoadettsi, roro wul nashayse yenin imoadettsi Barjo yeam yer wulka wodimbhaana eena kida haye. <sup>12</sup> Ogono yedin imayno kelshintansa imintono Barjodar woylamin qajayna eenaam gaalera bulinta bish dayma, thoothino eeno Barjoam kattsi konin gobshoadettsi koda haye. <sup>13</sup> Ogono yesa kelshintasa imintono gon maataana eena yenin dohonam koda dhee. Ogona Kiristoossa dhacchintan upsinam gonne hamayse kona ee yenin hamonna, pir kembee waani een wulbena iminton nashayse yenin imonna, eeno Barjoam koda gobshe. <sup>14</sup> Kediar Barjo yena kinin imon gebhon sunin iminton goynka yeam shedana anngardhayse yena Barjoam miska ke miske. <sup>15</sup> Eedi upsika giidhimon kisa imintonna Barjo ki gobshadhe.

## 10

### *Bhawloos Yisa Waadiman Goynsa Kinin Palimoono*

<sup>1</sup> Inta Bhawloos, yekal inin dohonka leemea ea, yekalanka inin pegadhonsa budonte woylaminsa wocchia hambhenna, inta Kiristoossa lemmakkonbee payyamonbeka yeam ida miske. <sup>2</sup> Yeam inin miskaynoar yekal inin niven wodanka woylem wocchika inin giyoadettsi hayeebhode. Peen kodar dohon eenin yaayendettsi wonin yaayeaya hayayse bhocchayna waani waani eenasa birante woylem wocchika guyana ida bhocche.

<sup>3</sup> Peen kodar wo dahaannaar, banqin wonin uxayno peen kodar dohon eendettsitehe.

<sup>4</sup> Wonin banqin uxayno peen kodar dohon koymonkatehe; wosa banqin eenayn aadhimbhen ooapanam woninka kottsayno Barjosa banqin koymon kantankane.

<sup>5</sup> Barjoam dhesadhenam marana pormakkonka dhaasadhon yerin wulbee palimen-beam woda kayse; eensa qaabon wulamaar Kiristoosna ee konin hamoadettsi woda maase. <sup>6</sup> Kiristoosna ee yenin hamayno gon konin maatenka, ee hamiminaam dhab-shana wodi ashkimbhidine.

<sup>7</sup> Yenin shadayno mayan yerin bishne. Eedi hay ki hannaar, "Inta Kiristoossane" hamayse ki odimina, kidi Kiristoossa kinin dohondettsi, wodiar pir Kiristoossa wonin dohonam ki bhocche. <sup>8</sup> Imbaa wontea Yesusin ina imon hayamonka kattsi inin erimennaar ooshimbhadtine. Harrna hambhidianna, ogo hayamonin ina imbhoono yeam inin wocchinsoadettsine, yeam inin kaysoadettsitehe. <sup>9</sup> Inin thaapon warqatinka yeam inin kurtunsea maasayse qaabeebhode. <sup>10</sup> "Bhawloosin thaapoono warqatino kattsi wocchibee dethabene. Waanka kiam wonin shedenka kidi deegane; dhalqinoar kisa bagadhaane" keda hame. <sup>11</sup> Ogodettsi yin giyea eedi wodi pege dooqayse wosa warqatinte wonin thaapenbee yekal nivayse wonin waadadhenbesa shaarinte kala hattear edime qolmonam ki bhocche.

<sup>12</sup> Ogonoar yiam shawkayna waani waani eena kinka woam kamsanabee kead-dhisate shedenabe bhocchattone. Kediar yiam yinti kenin kamsenbee yiam yinti kenin yeekinsenbena bhocchimina eenane. <sup>13</sup> Wodiar Barjo wona imon maalenka wonin waadadhen waadimanka woda erime; ogora sagi erimattone. Yediar ogo maalente ye dahade. <sup>14</sup> Ogona Kiristoossa dhacchintan upsinam guyana yekal wonin nivon wodanka, Barjo wona imon maaler sagootone.

<sup>15</sup> Ogonante Barjo wona imon maaler sagayse waani eensa waadimanka erimattone; kalon Barjodar woylemin yenin qajayno konin gebhoadettsibee Barjo wona imon maalente wonno waadimano yesa shaarinte kattsi konin gebhoadettsibee qaabe woda haye.

<sup>16</sup> Keeda eedi waanasa maaler ardayse ena waadadhadhon waadimanka erimima, yekal saabar dhaanaa peenar Barjosa dhacchintan upsinam guyana damooda dame.

<sup>17</sup> Ko dahaannaar,  
"Erimea Barjo Imbaaka ki erime"  
hamayse thaapadhidine. <sup>18</sup> Harrna hambhidianna, gon eedi shawkadhaa maatano Barjo Imbaa kiam shawkenkane, yiam yinti kinin shawkenkatehe.

## 11

### Bhawloosbee Buudan Fenabe

<sup>1</sup> Isa likkon malgimmakkonam yenin darshoadettsi ida zage; gon ina darshee. <sup>2</sup> Barjo yena burqadhyayse yeam kinin nashendettsi, intaar yena burqadhyayse yeam ida nashe. Anngi kalaana yiam toolon anzan duudindettsi intaar Kiristoosna yeam i seesade. <sup>3</sup> Ko dahaannaar guni shoyamoka Hewanam kinin dhaddhisondettsi, yesa qaabono da-dayse Kiristoosna yesa dohon gonin nashimmakkono konin ookimoamadettsi hamayse ida kurtumbhe. <sup>4</sup> Harrna hambhidianna, eedi kalaa yekal nivayse wonin yena giyon dayma ab Yesusbar yena ki giyna, way yenin tiyon Manpas Gazanam dayma ab manpas

ye tiyna, way yenin tiyon Barjosa dhacchintan upsin dayma ab dhacchinta upsin ye tiyna, lay hamayse yeda shede.

<sup>5</sup> Ko dahaannaar igma “Kiristoos yisa tarjamonnante kinin yittsaana gembha eenane” yiam hambhaynadara hamin ko dahaakaar ida toke hamayse qaabattine. <sup>6</sup> Dhalq dhesimaa i dahaakaar, isa dhesintono tokehe. Ogoam thoothi goyt yer wulka yena wodi dhaydine.

<sup>7</sup> Inta Barjosa dhacchintan upsinam sun yena inin giyenka, yeam dhev hayota inta meten innonam inin toskenka, seeso inin waadadhaadettsi maato ko dew? <sup>8</sup> Yena waadadhotwaani misken onnadara koymo inin tiyenka keam inta buuridine. <sup>9</sup> Yekal inin dohonka iam zaskenna haydarar baske maataatine; harrna hambhidianna, Moqodooniara nivaana imbanana ina zasken wulam kedi imidine. Ta yer kalaaka hattear yedar baske inin maatoamadettsi mete isaam i gishade; keeda kaara os mete isaam ida gishe. <sup>10</sup> Kiristoossa gonno isa iinte konin dohondettsi, ogo inin erimenam Akaya peente marea qolehe. <sup>11</sup> Harrnane? Yeam inin nashiminnaw? Inin yeam nashenam Barjo dhesa ki dhese.

<sup>12</sup> IGINA “Kiristoos yisa tarjamonnante woam ki nittsade” hamayna waani eena “Wodiar Bhawloosbedettsi woda waadadhe” hamaynasa erimenam kaysota ta inin hayenam os birantear hayayda haye. <sup>13</sup> Harrna hambhidianna, igmaadettsina eena Kiristoos yisa tarjamonnante kinin yittsaan maatana yiam ookayse, buudamoka “Kiristoos yisa tarjamonnante woam ki nittsade” hamayse taysite waadadhayna eenane. <sup>14</sup> Ogoro tarshea yertehe; harrna hambhidianna, Seethaan yinti Barjosa shaakansa gaanadettsi maatana meten yinnonam kida ooke. <sup>15</sup> Ogonante Seethaanna waadimayna tipan waadadhaynaam maatana kenin ookayno woam tarshehe. Kedi macchindar yisa waadimandettsi haapa ke haape.

### *Bhawloosdar Yeskoono Gaaleno*

<sup>16</sup> Ta pir yin yena ida giye: Eedi hayyear malgimi inin dahaadettsi ki qaababhoode; malgimi eedi i maataakaar likka erimeysa dahaadettsi malgimi eedi hayayse iam tiyee.

<sup>17</sup> Yin erimayse inin giyenka, Imbaa wontea Yesusin giyondettsi dayma, malgimi daahaa eadettsi ida giye. <sup>18</sup> Thoothino eeno peen kodar dohon yerinka konin erimenna, intaar erimayda erime. <sup>19</sup> Yedi pakalla yenin dohonna, malgimma eenana wozaka yeda darshe. <sup>20</sup> Eedi hay ki hannaar yeam yisa worshodettsi kinin hayenkaar, yeam taysayse ki itsaakaar, yekalanka buurate ki tiyaakaar, yedar ki poorimbhaakaar, yesa aapinte ki cavaakaar, darsheeda darshe. <sup>21</sup> Iam ooshinsayno ko hannaar, kedettsi yedar wocchimbhayna eena wonin maataamonam yena ida giye.

Ko dahaannaar eedi hay ki hannaar, yer kalaaka erimota ki wocchimbhaakaar, intaar erimota wocchimbhayda wocchimbhe. Ogoro inin giyaynoor eedi malgimidetsine. <sup>22</sup> Kedi Ibra eenaw? Intaar Ibra eedine. Kedi Israveel zarsiw? Intaar Israveel zarsine. Kedi Abraamsa muldhaw? Intaar Abraamsa muldhane. <sup>23</sup> Kedi Kiristoosna waadimayna eenaw? Inta kedara sagiane. Ogonoar inin giyayno eedi bardhaadettsine. Kedara kattsi waadimaka inta qajidine; kedara kattsi inta dhaxadhidine; thoothi goyt inta qandhidine; thoothi wodana dembhidar iam yeskisayno gaale idar yeskidine. <sup>24</sup> Eedi kalaa kaysa apo tabhi sal, eedi kalaa kaysa apo tabhi sal alanngaka ii dong goyt Ayiwd eenaka inta qandhidine; <sup>25</sup> makkam goyt haljoka iam kedi qanidine; kalaa goyt seenika iam paxayse deesota kedi haydine; makkam goyt bazindara sagadhen gonngalanam wura qunthate aysaysaka gaale idar yeskidine; sooti kalaabee rooro kalaabe bazinte i dahade. <sup>26</sup> Thoothi woda goyt inta yividine. Baynabee, eedi koymo buurite itsaynabee, peen innon eenbee, waani eenbee, katamantebbe, darantebbe, bazindarbee, buudaka “Barjodar woylamin wodi qajayna eenane” hamaynabeka idar gaale yeskidine. <sup>27</sup> Thoothi waadimaka inta qajidine; thoothi rooro raat isa kaydine; daaqibee dheebabeka inta gaalidine; thoothi woda gala itsima inta qoomidine; qajibee

pundirmakkobe idar yeskidine. <sup>28</sup> Shidhon waani yerin i paydima rooroaka rooroaka idar baske maatoono misken onna wul goynsa qaabenone. <sup>29</sup> Eedi kalaa kinin qajadhenka intaar qajadhaati? Eedi kalaa seesonte taysadhayse kinin dhambenka inta dhagadhaati?

<sup>30</sup> Erime zaskayno ko hanna, isa qajen dhahayna yerraka ida erime. <sup>31</sup> Roro wul gobshadhaa Imbaa wontea Yesussa Imba dahaa Barjo inin buudaka giyminam kidi dhesa ki dhese. <sup>32</sup> Demasqo katamante inin dohon wodanka, Bitaa Aretaassa choobar maatayse eenaam wottsea iam yedana zagayse katamansa kerinam toolaynaka ki tolsade. <sup>33</sup> Ko dahaannaar, kermindar woysadhon ooninsa maskootinka sharankonte iam dottsayse kinin hanchonna, kisa aanira i dhaqade.

## 12

### *Bhawloos Barjokala Kinin Haapoono Shedintono*

<sup>1</sup> Erime pootehe; ko dahaannaar erime zaskeane. Ogonante Imbaa wontea Yesusin ina dhohon shedintonbee kikalanka haapadhen yerinbeka ida erime. <sup>2</sup> Tabhi oydi levesa birayse tura Barjoyn dohon makkanson cecindar tiidhaa Kiristooska dehea eedi kalaam ida dhese. Ogono gon waakamoo haamakaw dhesattine, Barjoda dhese. <sup>3-4</sup> Ea agaam Barjo yinin dohon ukunsen raqinte tura kinin tiidhondettsi, ogote eedi upsika giidhimon, giyanaar eedina imbhaoomon yer kinin qansonam ida dhese; ogono gon waakamoo haamakaw dhesattine, Barjoda dhese.

<sup>5</sup> Agaadettsea ea goynka ida erime; innon metensa ko hanna, inta isa qajera abka erimattine. <sup>6</sup> Erimana i zagidianna, malgimi eedi maatattine; harrna hambhidianna, goninam ida giye. Ko dahaannaar eedi hay ki hannaar iam kinin haapenbee inin giyenam kinin qansenbena kattsi hayayse iam kinin paydoamadettsi, inin erimenam inta garidine.

<sup>7</sup> Igina gembha ina haapadhaana yerra goynka pormakkoka inin poorimbhoa-madettsi, isa waanam uxea ukumbha, iam galshea Seethaansa erge ina ko imbhade; ogonoar inin poorimbhoa-madettsine. <sup>8</sup> Ogono yerro ikalanka konin shidhoadettsi Imbaa wontea Yesusam makkam goyt i miskade. <sup>9</sup> Kidiar ina yi giyna: “Isa kantanin kattsi haapadhayno eensa qajenka konin haapadhenna, isa sunin imintono hana yeeka ko yeeke” ina ki hamade. Ogonante Kiristoossa kantano idar konin doadettsi kattsi wozaka inta isa qajenka ida erime. <sup>10</sup> Ogonante Kiristoosna qajebbee, irdhabee, gaalebee, oytaydhabee, qaabebeka ida wozadhe. Harrna hambhidianna, inin qajadhen wodanka, inta kantakane.

### *Bhawloos Qorontoos Eenana Kinin Bhocchoono*

<sup>11</sup> Inin erimenka malgimi i maataade; ogo inin erimoadettsi iam hayaana yedine. Inta likka eedi i dahaannaar, iam gobsha yeam zaskidine. Harrna hambhidianna, “Kiristoos yisa tarjamonnante kinin yittsaana gembha eenane” yiam hambhaynadara hamin ko dahaakaar tokattine. <sup>12</sup> Gon Kiristoos yisa tarjamonnante kinin yittsaan ea inin maatonam dhahayna milkitina yesa shaarinte inin dohonka darshintaka inin waadadhaana waadimanane; iginaar milkitinabee, tarshayna yerrabee, halla waadi-manabene. <sup>13</sup> Yedar baske maatima inin shidhorra waani misken onnara harka yeam i toskaa? Ogo seesonam ina garee.

<sup>14</sup> Marrato! Yekal makkanso goyt nivana inta ashkimbhidine. Inta yedar baske maatattine; harrna hambhidianna, inin zagayno yeamne, yesa koymonamtehe. Ogonoar imbana naanana koymonam keda pucche; naana imbanana koymo pucchehe. <sup>15</sup> Inta yena isa koymonam bish dayma, iamaar wozaka ida ime. Ta yeam kattsi i nashina, yenin iam nashenam yedi toskee tosko?

<sup>16</sup> Ogo yerinka inta yedar baske maataatine; ko dahaannaar yesa shaarira waani waani eenayn hamendettsi, pakala ea inin maatonna yeam maltamoka inin yedaa yena koda maate. <sup>17</sup> Inin yekal yittsaana eenasa eedi kalaaka hattear inta yeam taysayse itsidu? <sup>18</sup> Tiito yekal kinin yivoadettsi kiim inta miskidine; kimbesana kinkaa im-banaasaam i yittsade. Tiito yeam taysayse itsidu? Wosa qaabonbee wosa waadimanbe kalaatayu?

<sup>19</sup> Ta koka yekka, yesa birante wonnon metenna wonin palimea yena ko maatade; ko dahaannaar Barjo birante Kiristooska maatayse yena woda giye. Ogonoar wonin nashaynato, yeam gettsota hamayse ko wulam yena woda giye. <sup>20</sup> Inin yekal nivenka inin nashendettsi ye dayma, intaar yenin nashendettsi i daymaka, kidar wo keero hamayse ida kurtumbhe. Yin pir yesa jibbintabee, woogintobee, wacimebee, eedidar palimebee, eedisa naabeam genintabee, wuupobee, pormakkobee, goorebe yesa ko doomoo hamayse ida kurtumbhe. <sup>21</sup> Yekal pir inin maatenka isa Barjoa yesa birante iam kida ooshinse hamayse ida kurtumbhe. Kosa birayse thoothino eeno seeson waadadhayse konin hayon minngamonbee, sharmucimakkonbee, waansa anngarman dhaasenbeam garayse Barjodar maataamon eenna qaabayse ida burqadhe hamayse ida kurtumbhe.

## 13

### *Bhawloossa Kiilimenbe Wacimenbe*

<sup>1</sup> Yekal inin nivenka kono isa makkansone. Dhalq wul eedi lamaabee makkambesa tarjamoka koda woye. <sup>2</sup> Lansi yekal nivayse inin dohon wodanka, yena inin giyondettsi, taar pir pegeka kosa birayse seeso waadadhaanabee waani een wulbena ida giye: Ta yekal pir maatayse inin nivenka haynaar burqadhattine. <sup>3</sup> Harrna hambhidianna, isa iinte dahayse giyea Kiristoos kinin dohonam dhesana yenin zagennane. Yesa shaarinte waadadhayno Kiristoossa kantanone; qajenotehe. <sup>4</sup> Harrna hambhidianna, Kiristoos qajeka ziitdhayse ki diyade; keeda Barjosa kantanka kidi sadaka daane. Wodi pir Kiristooska qajadhaana eenane; ko dahaannaar yena hamayse Barjosa kantanka kimbesana maatayse woda dee.

<sup>5</sup> Barjodar woylamin qajintaka dahayna ye hanna, yesa metenam oysayse marmaree. Yesus Kiristoos yesa iinte kinin dohonam dhesattenu? Ogotay ko hamma, yedi oysimenga dhambidine hamintane. <sup>6</sup> Wodi oysimenga wonin dhambaamonam dheseeda dhese hamayse yedar qaabe ida haye. <sup>7</sup> Yer hamin hambhaakaar siya yeram yenin hayoamadettsi yena Barjoam woda miske. Wodi oysimera sagaana maatayse wonin haapadhoodettsitehe; ko dahaannaar wodi oysimenga dhambaana wo maatidianna, yedi yer payya yenin hayoadettsine.

<sup>8</sup> Wodi goninna woda waadadhe; goninam kaysea yer kala hattear waadadhana damattone. <sup>9</sup> Wodi eedi qajadhaana wo daaka, yedi kantanka dahaana eena yenin dehenka woda wozadhe; yedi gon dahayna eena yenin doadettsi pir yena Barjoam woda miske.

<sup>10</sup> Yerra kinaam yekalanka pege dahayse inin thaapoono yekal inin niven wodanka, Imbaa wontea Yesus ina imon hayamonka yedar inin wocchimbhoamadettsi hamay-sene. Harrna hambhidianna, Imbaa wontea Yesus ina kinin imoono hayamono yeam inin woysoadettsine, yeam inin kottsoadettsitehe.

### *Macchin Kiilimenbee Nagaymakkonbe*

<sup>11</sup> Keeda macchinte, imbanaanato, payya dehee; gon dahayna eena maatee; inin kilenam qansee; kinka woylam kalaaka dehee; kinka nagaya dehee. Nashimmakkonbee payyamonbesa Barjoa kidi yembesana kida dee.

<sup>12</sup> Gonin hamon nashimmakkonka kinka kiam kiam sunqaate nagaysee. <sup>13</sup> Barjodar woylamin qajayna eena wul yena nagaya keda hame. <sup>14</sup> Imbaa wontea Yesus Kiristoossa sunin imintonbee, Barjosa nashimmakkonbee, Manpas Gazansa kalaa maatin-tanbe ye wulka ko dee.

## Kiristoos Yisa Tarjamonnante Kinin Yittsaa Bhawloos Galatia Eenana Kinin Thaaponno Warqanno

### *Ardinta*

Bhawloos ko warqatinam haa kinin thaaponam dhesana damimehe. Waani waani eneo Bhawloos dhacchintan upsinam birayse giyota yinin yivon raqira Anthokia kama mandar maataate nivaa hamayse 40-41 levensa iinte ki thaapade koda hame; waani eneo tapir 47-50 levensa iinte ki thaapade koda hame.

Galatia Likkon Isiya peente ko dahade. (Ta wodanka Likkono Isiya “Turk peeno” koda hambhe.)

Kaa mathaapaam raq dongdar kashana dandima ko dandime:

1. Nagaymakkobee wacimebe (1:1-10)
2. Bhawloos sadan kinnonna Barjoyn kina hayonam giyaate Barjosa dhacchintan upsinam gon konin dohonam kinin giyoono (1:11-2:21)
  - a) Kiristoos Bhawloosna haapadhatayse Barjosa dhacchintan upsinam kinin giyoono (1:11-24)
  - b) Waani Kiristoosin tarjamonnante yittsaana eena Bhawloosin giyen dhacchintan upsinam gonni hamayse kenin tarjoono (2:1-10)
  - c) Barjosa dhacchintan upsinam Bhawloossa sadante hamin konin waadadhoono (2:11-21)
3. Bhawloos Mathaap Gazara Barjosa dhacchintan upsinam gon konin dohonam kinin giyoono (3:1-4:31)
  - a) Galatia gidir dahaana Barjodar woylamin qajaana eenayn tiyoono dhacchintan upsinam (3:1-5)
  - b) Abraamsa eerino (3:6-14)
  - c) Barjodar qaabe haydhen upsinbee Musesa yigginbe (3:15-22)
  - d) Naasa toydia naasi ki daaka (3:23-4:7)
  - e) Gonin hamon dhacchintan upsinkala pegadhano siya konin dohoono (4:8-20)
  - f) Edon worshonsa naasabee worshotay hamon edonsa naasabesa kamsino (4:21-31)
4. Bhawloos eedisa meskena may maaten yerinka dhacchintan upsinam gon konin dohonam kinin giyoono (5:1-6:10)
5. Macchin kiilimenbee nagaymakkonbe (6:11-18)

Bhawloos kaa warqatasu iinte nagaymakkonam gudubhsima saanawa yisa bhocchianam giyada paliman ki yedade. Galatia gidir dahaana eena Barjodar woylamin kenin qajonbee Bhawloossa timmirinbeam saanawa garota kenin qaabenka Bhawloos ki targadhade. Barjosa dhacchintan upsinam ookota zagayna eenaam ki ashade. Kinin ashonsa goyti daane:

1. Bhawloos dhacchintan upsinam kinin tiyoono Kiristooskalankane, eedikalankatehe. Waani Kiristoosin yittsaana kiam keedhada kimbesana kinka ke wormade. Ogonante kinin giyayno dhacchintan upsinam gon hammone.
2. Barjosa dhacchintan upsinam Ena Mallante thaapadhidine (3:8). Musesa yiggin imbhima birayse Abraam Barjodar woylam qajintaka tipamonam ki haapade. Yiggi hayyeamaar tipa maasehe (3:9-14). Bhawloos ogoam kamsika kida dhettse (3:23-4:31).
3. Eedi Barjosa dhacchintan upsinam waadimandar kinin hacchenka, seesora utintanam kida haape; waansa anngarmanam kida bashe; payyan waadimanam waadadhana dama ki dame. Ogo wul yin konin maatayno Barjodar woylam qajaa easa iinte Manpas Gazanin waadadhennane (5:25).

Ogonante Bhawloos birayse kinin thaapon Galatia mathaapinte tipamonam hamin wonin haapenam may kida giye. Seeson ea Barjodar woylamin yinin qajenka, Barjosa birante tipamonam haapinta bish dayma, sadante kisa dahayno Manpas Gazano Barjosa waadimanam kinin waadadhoadettsi koda wocchinse.

<sup>1</sup> Eenkalkanka way eedika dayma Yesus Kiristoosbee dembhira kiam dhaasaa Barjo Imbaabe goynsa, Kiristoossa tarjamonnante nittsadhaa i Bhawloosbee <sup>2</sup> imbesana kinka dahaana imbanaana wulbekalanka, Galatia peente dahaana misken onnana nittsadhoono warqannone. <sup>3</sup> Wosa Imbaa Barjobee wo wulsa Imba maataa Yesus Kiristoosbesa sunin imintonbee payyamonbe yena ko dee.

<sup>4</sup> Ta ko siyon wodara woam dhacchanna wosa Imba maataa Barjosa bhocchinka Kiristoos wosa seesonna hamayse yiam dembhinna ki imade. <sup>5</sup> Ogonante Barjona rooro wul lay gobshi ko dee; amiiin.

### *Gonin Hammo Barjosa Dhacchintan Upsino Kalaa Bish Konin Dohoono*

<sup>6</sup> Kiristoossa sunin imintonka yeam eelaa Barjokalanka waani dhacchintan upsindar saanawa yenin maatayno kattsi iam ko tarshade. <sup>7</sup> Ko dahaannaar Barjosa dhacchintan upsira ab dhacchinta upsi qolehe. Ogonoar “waani dhacchintan upsino” hamayse inin giyoono yeam dhaddhisana Kiristoossa dhacchintan upsinam ookana zagayna waani waani eena kenin dohonnane. <sup>8</sup> Wodi wo hannaar, way cecinsa gaana ki hannaar, wonin yena giyon Barjosa dhacchintan upsindara ab dhacchintan upsi yena giyea ki hanna, ashadhaa ki dee. <sup>9</sup> Kosa birayse wonin giyondettsi, pir yena ida giye: Qansayse gonne hamayse yenin tiyon Barjosa dhacchintan upsindara ab dhacchintan upsinam hayyear yena giyea ki hanna, ashadhaa ki dee.

<sup>10</sup> Ta keeda inin zagayno eedi iam shawkoadettsimoo? Barjo iam kinin shawkoadettsiw? Way eenam wozisana inin waadadhea yena ko maato? Ta keeda eenam wozisana waadadhea i hanna, ini Kiristoossa waadima eedi maatattine.

### *Bhawloos Barjosa Dhacchintan Upsinna Kinin Eldhoono*

<sup>11</sup> Imbanaanato, inin yena giyon Barjosa dhacchintan upsino eedisa dhalq konin da-haamonam yena ida dhettse. <sup>12</sup> Harrna hambhidianna, ina dhahaa Yesus Kiristooskala koam i tiyade; eedi haykalaar inta tiyaatine, way eedikala koam dhesaatine.

<sup>13</sup> Ena Ayiwd eenin bulon dambinka hamin inin dohonam yedi qansidine. Ogonoar Barjodar woylamin qajaynaam kaysana kattsi keam oytayte i dahade. <sup>14</sup> Ayiwd eensa dambinam toolintaka isa aanamo maataana thoothina Ayiwd eenadara sagayda sage; wosa eykenasa dambin goynka kedara sagi ida wocchimbhe.

<sup>15-16</sup> Ko dahaannaar inin adhadhonsa birayse iam kamaa, yisa sunin imintonkaar iam eelaa Barjo Ayiwdtay hamma eenana kisa Naasasa dhacchintan upsinam inin giyoadettsi yisa Naasaam inka dhaana kinin nashon wodanka, inta haybesanaar dhalqaatine. <sup>17</sup> Isa birayse Kiristoos yisa tarjamonnante kinin yittsaanakal Yerusaalem yivaatine. Ko dahaannaar Areb peendar i yivade; pir Demasqo katamandar maatate i nivade.

<sup>18</sup> Ogora leve makkamsa budonte Bhethiroosbesana\* kinka dhalqana Yerusaalem katamandar yivayse kimbesana kinka tabhi dong rooro i dooqade. <sup>19</sup> Ko dahaannaar Imba wontea Yesussa indanaasa Yayqoob bishkalanka waani Kiristoos yisa tarjamonnante kinin yittsaana eenasa shaarira hayyeamaar haapaatine. <sup>20</sup> Ogonoar inin yena thaapayno yerro buuda konin dahaamonam Barjo birante yena ida giye.

<sup>21</sup> Ogosa budonte Sooria peenbee Kilqia peenbe i yivade. <sup>22</sup> Ogo Yiwda peente misken onnar dahaana Kiristoosdar woylamin qajayna iam haapayse dhesehe. <sup>23</sup> Ko dahaannaar kedi kenin qansayno “Birayse woam oytea ea agaa kaysana yinin zagen

\* <sup>1:18</sup> Bhawloos yinin thaapenka, Sooria aponka “Keepa” hamayse ki thaapade; “Keepa” hamintano “Bhethiroos” hamintane.

Barjodar woylamin qajadhen goynam eeno gonne hamayse konin tiyoadettsi kida giye” hamen upsinam ke qansade. <sup>24</sup> Innon goynka Barjoam ke gobshade.

## 2

### *Bhawloos Kiristoosin Yisa Tarjamonnante Yittsaanakal Kinin Dhesadhoono*

<sup>1</sup> Ogora leve tabhi oydisa budonte Barnabaasbesana Yerusaalem katamandar lansi maataate i yivade; Tiitoam imbesana kiam entsate i yivade. <sup>2</sup> Inin yivoonoar Barjo ina kinin dhothon goynkane. Ena birayse inin waadadhonbee ta inin waadadhenbe sun konin shidhoamadettsi hamintaka, Ayiwdtay hamon eenna inin giyoono Barjosa dhacchintan upsinam misken onnasa gembha entsaynana bish i dhettisade. <sup>3</sup> Ko dahaannaar imbesana kinka yivaa Tiito, Girik eedi ki dahaakaar, qaama kinin taxad-hoaddettsi kiam haydhadehe.

<sup>4</sup> Dhalqa agaanin dhaabhoono buudamoka “Wodi imbananaa yennane” hamayna waani waani eena wosa shaarinte dimmakkoka kenin ardonnane. Kedi Yesus Kiristooska baza qolma wonin haapon payyamora woam bulayse worshamondar woam maasana ke qaabade. <sup>5</sup> Wodiar gon maatoono Barjosa dhacchintan upsin yenza wocchimbhayse konin doadettsi likka wodana hattear kena ee hamootone.

<sup>6</sup> Igina misken onnasa gembha entsana maatayse haapadhayna ke hanna, Barjo eedisa woti shedayse kinin pirdiminna kesa gembhakono ina yer kalaar konin hayea qolehe. Igina gembha entsaynane yiam hambhayna inin giyondar yer kala hattear ar-sadehe. <sup>7</sup> Ko dahaannaar Barjo Bhethiroosam Ayiwd eenna yisa dhacchintan upsinam ki giye kinin hayondettsi, iamaar Barjosa dhacchintan upsinam Ayiwdtay hamon eenna inin giyoadettsi kinin hayonam ke haapade. <sup>8</sup> Bhethiroosam Ayiwd eenna Kiristoossa tarjamonnante kinin yivooadettsi hayaa Barjo iamaar Ayiwdtay hamon eenna inin yivooadettsi ki hayade. <sup>9</sup> Taar misken onnasa gebhi maataana entsana Yayqoobbee, Bhethiroosbee\*, Wannisbe Barjo waadiman koam ina kinin imonam yinin dheson wodanka, wombesana kinka kalaa yinin maatonam dhaana yisa anna mizanqaam imbee Barnabaasbena ke imade. Wodi Ayiwdtay hamma eenakal yivana, kediay Ayiwd eenakal yivana, kinka wo dhalqade. <sup>10</sup> Kesa shaarinte dahaana qambhinaam wonin kelshoadettsi bish wona ke elqimade; ogoamaar birara yedayse wozaka hayte inin dohoono waadimane.

### *Bhawloos Anthokia Gidir Bhethiroosam Kinin Wacimoono*

<sup>11</sup> Bhethiroos Anthokia katamante kinin nivon wodanka, kisa seesono may konin dohonna kidar wotika keerayse kiam i wacimade. <sup>12</sup> Harrna hambhidianna, Yayqoobin yittsaana waani waani eena Anthokia katamante kenin nivonsa birayse, Bhethiroos Ayiwdtay hamma eenabesana kinka gala kida itse. Kenin nivonsa budonte, “Ayiwdtay hamma eena yisa qaamanaam taxadha keam koda zaske” hamayna Ayiwd eenaam kurtumbhayse budoka yivayse Ayiwdtay hamma eenakalanka ki edimade. <sup>13</sup> Ogote dahaana waani Ayiwd eena wulaar Bhethiroosaa maltamonsa iinte kimbesana kinka ke ardade; Barnabaasaar kesa maltamonka ki tiidhade.

<sup>14</sup> Kesa waadimano Barjosa dhacchintan upsinbesana gon konin maatiminam i haapaysaka, Bhethiroosna “Ya Ayiwd eedi dahayse Ayiwd eensa dambinka dayma Ayiwdtay hamma eensa dambinka ha dahade. Ta keeda Ayiwdtay hamma eena Ayiwd eensa dambinka kenin doadettsi haminaa keam kantise?” hamayse een wulsa birante kiam i wacimade.

### *Eedi Wulin Dhaqayno Barjodar Woylamin Qajintaka Konin Dohoono*

<sup>15</sup> Wodi wosa adhadhinka Ayiwd eedine; Ayiwdtay hamma seeson eenatehe. <sup>16</sup> Ko dahaannaar eedi Barjo birante tipa eedi konin maatayno Musesa yigginam toolintaka

\* <sup>2:9</sup> Bhawloos “Bhethiroos” yinin thaapenka, kisa naabenam Sooria aponka “Keepa” hamayse ki thaapade. Pir paydi 11bee 14bedar agaadettsi ki thaapade.

dayma, Yesus Kiristoosdar woylamin qajintaka konin dohonam dhesooda dhese. Ogona wodi Musesa yigginam toolintaka dayma, Kiristoosdar woylamin qajintaka Barjo birante tipana eena wonin maatoadettsi Yesus Kiristoosdar woylamin wo qajade. Harrna hambhidianna, eedi hayyear yigginam toolintaka Barjo birante tipa eedi maatehe.

<sup>17</sup> Kiristooska Barjo birante tipana eena maatana wonin zagenka, wosa metenka seeso eedi maatayse wonin haapadhenna, ta keeda Kiristoos seesonam wonin waadadhoodettsi woam hayeane hamintaw? Yintehe! <sup>18</sup> Inin kottson yigginam maasate woysea i hanna, ta keeda inta yigginam toolima inin maatenam ida dhettse. <sup>19</sup> Harrna hambhidianna, inta Barjona daana yiggin goynka dembhika edimaadettsi yigginkalanka inta edimidine. <sup>20</sup> Inta Kiristoosbesana inin ziitadhaadettsi, keeda kaara os Kiristoos inka kida dee, inta isa metenka dahattine. Ta keeda waanka inin dahayno iam nashaa, ina hamayse dembhina yiam saskate imaa Barjo Naasadar woylamin qajintaka ida dee.

<sup>21</sup> Inta Barjosa sunin imintonam dhabattine. Eedi Barjo birante tipa konin maatayno yigginam toolintaka ko hanna, ini Kiristoos sun ki diyade hamintane.

### 3

#### *Eedi Yigginam Toolintaka Tipa Konin Maatimino*

<sup>1</sup> Yedi malgimina Galatia eenato, palpalan yena hayaa hayne? Yesus Kiristoos masqalindar konngate ziitadhaye yesa birante may haapadhite ki dahade. <sup>2</sup> Yer kalaa bish yekalanka dhesana ida zage: Yedi Manpas Gazanam yenin tiyoono yigginam toolintakamoo? Barjosa upsinam qansayse kidar woylamin qajintakaw? <sup>3</sup> Koka yekka yedi malgiminaw? Barjo Manpasinka yedayse ta keeda yesa waanka ye maccho? <sup>4</sup> Barjosa dhacchintan upsin goynka yenin tiyoono gaaleno sun ko shidho? Yin ye haydianna, gon sun shidhasane! <sup>5</sup> Ta keeda Barjo Manpasin yinnonam yena kinin imenbee, yesa shaarinte tarshen waadimanam kinin waadadhenbe yigginam yenin toolennamoo? Barjosa upsinam qansayse kidar woylamin yenin qajennaw?

<sup>6</sup> Yinda kamsina Abraamam shedee: “Kidi Barjodar woylamin ki qajade; ogonante Barjo kiam tipa ea hamayse ki paydade” hamayse Mathaap Gazante thaapadhidine. <sup>7</sup> Ta keeda Barjodar woylamin qajayna Abraam naana kinin maatonam dhesee. <sup>8</sup> Mathaap Gazante Barjo Ayiwdtay hamma eena kidar woylamin kinin qajenka tipana eena keam kinin hayenam shedayse, “Eeno wul hanka gobshadha ko gobshadhe” hamayse birayse Abraamna Barjosa dhacchintan upsinam ko giidhade. <sup>9</sup> Ogonante Barjodar woylamin qajayna eena Barjodar woylamin qaje Abraambesana kedi gobsha ke gobshadhe.

<sup>10</sup> “Yigginam toolintaka ida dhaqe” hamayna wul ashadhaanane. Harrna hambhidianna, “Musesa yiggin mathaapinte thaapadthon upsin wulam wocchimbhayse toolimina wul ashadhaanane” hamayse thaapadhidine. <sup>11</sup> “Tipa ea Barjodar woylamin qajintaka sadaka kida dee” hamayse Mathaap Gazante konin thaapadhonna, eedi hayyear yigginam toolintaka Barjo birante tipa ea kinin maatimino mayne. <sup>12</sup> Yiggino Barjodar woylamin qajintandar woyoonotehe; ogodettsi “Yigginam toolea ea sadaka kida dee” hamayse thaapadhidine.

<sup>13</sup> “Haaqandar ziitadhaye diyea wul ashadhaane” hamayse konin thaapadhonna, Kiristoos wona hamayse ashadhaa kinin maatenka yigginsa ashimera woam ki dhachade. <sup>14</sup> Ogonoar Barjo Abraamna imana kinin giyoono Yesus Kiristoos goynka Ayiwdtay hamma eenana konin yeskoadettsine. Kiristoosin diyoono Barjo “yena imayda ime” kinin hamon Manpas Gazanam kidar woylamin qajintaka wonin tiyoadettsine.

#### *Yiggino Barjodar Qaabe Haydhen Upsinam Konin Shiishimino*

<sup>15</sup> Imbanaanato, ta dhalqin koam eedin hayen yerinsa kamsi hayayse ida yena giye: Eedi kalaa malla kinin ardonsa budonte, eedi hayyear koam shiishea way daran arsea golehe. <sup>16</sup> Barjo Abraamna “Hambee hasa muldhaabena imayda ime” ki hamade. Ogono upsinoar thoothi eedi hayayse “hasa muldhanana” hamehe; ko daahaannaar eedi kala hayayse “hasa muldhaana” koda hame. Ogonoar “hasa muldhaana” hambhoono “Kiristoosna” hamintane.

<sup>17</sup> Ta keeda inin giyayno mato oydibee eedi kalaa kaysa apo tabhibe (430) levesa budonte imbhoono yiggino Barjo mallayse kinin woyson upsinam shiishintaka Barjodar qaabe haydhen upsinam kaysana damehe. <sup>18</sup> Barjo wona kinin imenam wonin tiyayno yigginka ko hanna, Barjodar qaabe haydhen upsinka ini haapadhehe. Ko daahaannaar Barjo Abraamna yidar qaabe haydhen upsinka ki imade.

### *Yigginsa Qaabono*

<sup>19</sup> Ta keeda yigginam harrna ko imbhaa? Yigginam imbhoono qaabe yindar haydhen upsinam yina imbhaa Abraam muldhaayn nivenka yekka seeso har konin dohonam dhettsanane. Yigginin imbhoono Barjosa gaananakane; Barjobee eenbesa shaarinte dahaa Muse goynka ko nivade. <sup>20</sup> Kesa shaarinte dahayse keam qaashinsea ea eena lamaanana kida waadadhe; kalaana bish waadadhehe. Barjo kidi kalaane.

<sup>21</sup> Ta keeda yiggino Barjodar qaabe haydhensa upsinam jibba ko jibbo? Jibbehe! Harrna hambhidianna, sada imana damea yiggi imbhidi ko hanna, gon Barjo birante tipamo yiggin goynka ini haapa ko haapadhe. <sup>22</sup> Ko daahaannaar Yesus Kiristoosdar woylamin qajintaka haapadhayno Barjosa upsino kidar woylamin qajaynana konin imbhoadettsi, Mathaap Gazano peendar dahaana eena wul seeson hayamonsa demente ke dahade koda hame.

### *Barjo Naana Wonin Maatayno*

<sup>23</sup> Kiristoosdar woylamin qajintanin nivonsa birayse yigginka dhaxadhaana maatayse wo dahade; Kiristoosdar woylamin qajintanin dhesimenka yekka yigginsa demente wo dahade. <sup>24</sup> Ogodettsi yin Kiristoosdar woylamin qajintaka Barjo birante tipana eena wonin doadettsi yiggino Kiristoosdar woam yeskisota gettsea eedidettsi ko maatade. <sup>25</sup> Ta keeda Kiristoosdar woylamin qajintanin nivonna, keeda kaara os kidar woam yeskisea waadiman easa hayamon demente wonin dahayno shidhidine.

<sup>26</sup> Yedi wul Yesus Kiristoosdar woylamin qajintaka Barjo naana ye maatade. <sup>27</sup> Harrna hambhidianna, Kiristoosbesana kinka kalaa maatana yenin shiidhenka, yedi wul Kiristoosam qaadhidine. <sup>28</sup> Yedi wul Yesus Kiristooska kalaa yenin dohonna, Ayiwd eenbee Girik eenbesa shaarinte, pir worshobee worsho maataamma eenabesa shaarinte, pir anngibee maabesa shaarinte edime golehe. <sup>29</sup> Ta keeda yedi Kiristoossa ye daana, yedi Abraamsa muldhanane; Barjoar Abraamna “imayda ime” kinin hamon upsinam yedi tiyaynane.

## 4

<sup>1</sup> Ta inin giyayno yinne: Toydia naasa likka yinin dohonka, koymo wulsa imba yi daahaakaar, eedina waadadheadara yer harkaar edimehe. <sup>2</sup> Kidiar imbayn kina giyon wodanin yeskenka yekka gettsaynabee wottsaynabesa demente ki dahade. <sup>3</sup> Ogodettsi wodi akar naasi wonin dohonka, peen ko gilonka wodhayna wo maatade. <sup>4</sup> Ko daahaannaar Barjo yinin bhocchon wodan yeskysaka, Naasa yintiam peendar ki nittsade. Kidiar maakalanka adhadhaa, yigginka wodhea ki dahade. <sup>5</sup> Ogoam yin kinin hayoono wodar dohon bazanam kashayse yigginka wodhayna woam dhacchanabee Barjo naana hayanabene. <sup>6</sup> Kisa naana yenin dohonna, yedi Barjoam “Baaba, Imbo” hamayse yinin eeloadettsi haysen yisa Naasasa Manpasinam yesa woylamindar ki nittsade.

<sup>7</sup> Ogonante yedi Barjo naanane, keeda kaara os worshonatehe. Barjo naana ye daana, Barjosa toydina naanane.

### *Bhawloos Galatia Eenana Kinin Gaaloono*

<sup>8</sup> Kosa birayse Barjoam yenin dhesimon wodanka, pijadhinsa barjo maatimina yerrana worsho maatayse ye waadadhade. <sup>9</sup> Taaki Barjoam yedi dhesidine; kalon Barjo yeam dhesidine. Ta keeda igin a kantaysa qolminabee pootiminabe peen ko yiggindar haminee maate? Tapir kena worsho maatana zagee zago? <sup>10</sup> Waana maataana rooronabee, arpinabee, wodanabee, levenabeam payya hayayse yeda gobshe. <sup>11</sup> Yena sun i qajadhaaw? Iam yenko goyno kurtunsa ko kurtunse.

<sup>12</sup> Imbanaanato, inta yedettsi inin maatonna, yediar idettsi maatee hamayse yeam ida miske. Yedi yer kalaaka hattear iam geneetene. <sup>13</sup> Birayse Barjosa dhacchintan upsinam yena giyana baali inin haapoono burqadhyse yekal inin dohon wodanka konin dohonam dheseeda dhese. <sup>14</sup> Hamin ko dahaakaar isa burqono yeam galshea ko maataakaar, yedi iam toozadhayse jibbeetene. Barjosa gaanadettsi, pir Yesus Kiristoosdettsi hayayse iam ye tiyade. <sup>15</sup> Ogo wodanka yesa dohoono wozano hamote ko dahaa? Ogo wodanka ye damidianna, yesa aapinam hattear bulayse ina yedin imenam inta yena tarjayda tarje. <sup>16</sup> Ta keeda goninam yena inin giyonna yeam jibbea maatayse i haapadhaaw?

<sup>17</sup> Waani eena yeam yidar maasana wocchimbhayse keda zage. Ko dahaannaar kenin zagayno payyanatehe; kedi yeam wokala edaye yidar bish maasana keda zage. <sup>18</sup> Ko dahaannaar yekal inin dohonka bish dayma, rooro wul yer payyana zagadhyyna ye hanna payyane. <sup>19</sup> Isa naanato, Kiristoos yesa iinte kinin haapadhenka yekka pir iam yena adhima burqodettsi yedidine. <sup>20</sup> Taaki yembesana kinka daanabee ta isa dohon bhocchinam ookanabe i zagade. Harrna hambhidianna, yennon goynsa har haya iam konin zaskenam inin dhesaamonna ida gaale.

### *Aggarbee Saarabesa Kamsino*

<sup>21</sup> Yedi yigginsa demente daana zagayna eenato, yinda ina giyee: Yigginin giyenam qansattenu? <sup>22</sup> Abraamsa naana lamaa kenin dohondettsi, kalaa edon worshonsa naasa, lansoa pir worshotay hamon edonsa naasa kinin dohonam Mathaap Gazante thaapadhidine. <sup>23</sup> Ko dahaannaar edon worshonsa naasa eedin adhadhendettsi waan bhocchika ki adhadhade; worshotay hamon edonsa naasa Barjo “imayda ime” kinin hamon qaabeyn hayhenka ki adhadhade.

<sup>24</sup> Ogoro dhalqino kamsine. IGINA maana lamaana mallana lamaanasa kamsine. Birayse Siina dhukandar imbhon mallansa kamsino Aggarne; kodi naanaam konin adhayno worshamonnane. <sup>25</sup> Aggar Areb peente dohon Siina dhukansa kamsine; kodi taaki dohon Yerusaalem dettsi koda maate. Harrna hambhidianna, Yerusaalem bee kosa naanabe worshamonte ke dahade. <sup>26</sup> Cecinte dohoono Yerusaalem worshotay hammone; kodi wosa indane. <sup>27</sup> Harrna hambhidianna, “Ya naasi adhayse dhesimino seekino edono, wozadhaa!

Ya adhiman burqon dhesimino, ililsayse ilataa!  
Geshoaysa dohon mayndara sagi  
geshoayn garon edonsa naana ke thoothade”  
hamayse ko thaapadhadde.

<sup>28</sup> Imbanaanato, yedi Yisaaqdettsi Barjo “imayda ime” kinin hamon qaabeyn hayhenka adhadhaana naanane. <sup>29</sup> Ko dahaannaar ogo wodanka waan bhocchinka adhadhaa manpasinka adhadhaam kinin oytondettsi, taar ogodettsi ko maatade. <sup>30</sup> Ko dahaannaar Mathaap Gazano hamin ko giye? “Edon worshonbee naasabeam bulate oytaa. Harrna hambhidianna, edon worshonsa naasa worshotay hamon edonsa

naasabesana kinka toydimehe” koda hame. <sup>31</sup> Ogonante imbanaanato, wodi worshotay hamon edonsa naanane, edon worshonsa naanatehe.

## 5

### *Kiristooska Haapadhayno Nathamono*

<sup>1</sup> Kiristoos worsho wonin dohorra woam kinin buloono natha wonin doadettsine. Ogonante wocchimbhayse woyee, tapir worsho maateebhode.

<sup>2</sup> Marrato! Inta Bhawloos yena ida giye: Yesa qaamanam taxadhoodettsi yenin ee hamenna, Kiristoos hamin ko dahaannaar yena pootehe. <sup>3</sup> Qaama taxadhana ee hamayna wulna tapir yena ida giye: Musesa yiggin wulam toola yeam koda zaske.

<sup>4</sup> Yedi yigginam toolintaka Barjo birante tipa maatana zagayna eena Kiristooskalanka edimayse Barjosa sunin imintora yedi pegadhidine. <sup>5</sup> Wodi Barjosa Manpasinka Barjodar woylamin qajintaka “Barjo yisa birante tipana eena woam kida maase” hamayse qaabe hayayse woda toole. <sup>6</sup> Harrna hambhidianna, Yesus Kiristooska wona pootayno Barjodar woylamin qajayse nashimmakkoka waadahintane; qaama taxadhintabee taxadhima garintabe wona pootehe.

<sup>7</sup> Ta koka yekka payyaka yivite ye dahade; ta keeda goninna yenin ee hamoamadettsi yeam maraa hayne? <sup>8</sup> Ogodettsino taysimeno yeam eelaa Barjokalankatehe. <sup>9</sup> “Likkono irshono taapan wulam koda ocche” hambhondettsine. <sup>10</sup> Yer waaniam hamin ko dahaakaar, yenin qaaboamadettsi inta Imbaa wontea Yesuska yedar woylamin inta qajidine. Yeam dhaddhisea hay ki hannaar, pirdinam yidar kida tiye.

<sup>11</sup> Imbanaanato, inta ta koka yekka “Dhaqana qaamanam taxadha koda zaske” hamayse i giyna, ta koka yekka harrna i oytadhaa? Yin ko hanna, Kiristoossa masqalindar ziitadhayse diydinsa inin giyoono goa konin maatayno shidhidine. <sup>12</sup> Ta keeda yeam dhaddhisayna eena qaamaam taxadha bish dayma, buu ke maate ida zage.

<sup>13</sup> Imbanaanato, nathamona ye eldhade. Nathamono yenno waan anngarmanam yenin thoosea hayeebhode; yin yenin hayerra kinka kinka nashimmakkoka kina waadadhee. <sup>14</sup> Harrna hambhidianna, “Een wulam hadettsi hayayse nashaa” hamea upsi kalaaka yiggino wul ko thoothade. <sup>15</sup> Ko dahaannaar kinka kiam kiam gavaynabee kiam itsaynabe ye hanna, kiam kiam yenin kaysoamadettsi mete yesaam gishee.

### *Manpasbee Waabe*

<sup>16</sup> Ta keeda inta yena ida giye: Manpasinka dehee; waansa anngarmanam hamin ko dahaakaar hayeebhode. <sup>17</sup> Harrna hambhidianna, waano Manpasindar, Manpasinoar waandar koda dhaabhe. Kinka kinka kiam kenin jibbenna, yenin zagenam hayana damattene. <sup>18</sup> Manpasin yeam entsendettsi ye yivina, yigginsa demente dahattene.

<sup>19</sup> Waan waadimanoar dhesadhoonone; ogonoar sharmucimakko, minngamo, tagach, <sup>20</sup> aaninka ashkadhaana barjonana goodime, palpala haynta, jibbinta, palime, wooginta, waciminta, yibishiam nashinta, edime, kikalanka kashimayse kidar dhaabhintta, <sup>21</sup> eedi yeram anngardhinta, bardhinta, warsa, iginadettsinane. Birayse yena inin giyondettsi pir yena ida giye: Ogodettsin hayayna Barjosa bitamonam tiyehe.

<sup>22</sup> Manpas Gazansa aapino nashimmakko, woza, payyamo, darshinta, lemmakko, eedina payya haynta, gonamo, <sup>23</sup> payya eedi maatinta, yisa metenam wottsintane. Iginadettsina yerraam marea yiggi solehe. <sup>24</sup> Yesus Kiristoossa maataana eena waanam kosa qaabonbee anngarmanbesana kedi masqalindar ziitayse deesidine. <sup>25</sup> Barjosa Manpasinka dahaana wo hanna, ogo Manpasinka wo yaaye. <sup>26</sup> Kinka kinka kidar dhaabhintaka way woogimbheka sun wo erimabhoode.

## 6

*Wodi Waa Waasa Baskenam Wonin Baskayno*

<sup>1</sup> Imbanaanato, eedi kalaa seesonsa iinte ki dahaysaka ye haapidianna, yedi manpasinka dahayna eena ogodettsin waadadhea eam lemmakkoka maasee. Yaar pir ogodettsinka harin taysadhoamadettsi mete hasaam gishaa. <sup>2</sup> Yesa iira waa waasa baskenam ki baske; yin hayada Kiristoossa yigginam yeda toole. <sup>3</sup> Eedi hayyear waani eendara kinin sagea yer qolma “Inta sagine” hamayse ki qaabina yiam kida tayse. <sup>4</sup> Ko dhaannaar eedi wul yisa waadimanam marmarayse ki shede. Ogosa budonte yiam waani eenbesana yeekinsate shedota dayma, yisa meteka yinin erimen yerinam kida haape. <sup>5</sup> Harrna hambhidianna, eedi wul yinnon baskenam koda baske.

<sup>6</sup> Barjosa upsinam timmirea ea payyan yerin wulam kiam dhettseabesana ki kashime.

<sup>7</sup> Yeam dhaddhiseebhode; Barjo bagadhehe. Eedi yinin yiithonam koda buure. <sup>8</sup> Waan yinnonam wozisota yiitheya waanka dembhinam kida buure; Manpas Gazanam wozisota yiitheya Manpascalanka rooro wul lay dehen sadanam kida buure. <sup>9</sup> Qaabe wonin hayenam garma wonin wocchimbhenna, kosa wodanka koam wonin buurennna, payya waadimanam hayana wo boosimabhoode. <sup>10</sup> Ta keeda waadadhana goyti haapidi wo hanna een wulna, kalon Barjodar woylamin qajaynasa oonin eenana payyan waadimanam wo haye.

*Macchin Kiilmeno*

<sup>11</sup> Ta hamin dhaanaa gembha pidallaka koam isa aanka yena inin thaaponam shedee. <sup>12</sup> Mayante payya maatayse haapadhana zagayna eena yesa qaamanaam yenin taxadhoodettsi yeam keda kantise; ogoam kenin hayayno Kiristoos masqalinsa oytay-dha kedar yeskoamadettsi hamaysene. <sup>13</sup> Kedi yesa waanka erimana hamayse yesa qaamanam yenin taxadhoodettsi keda zage; qaaman taxadhaanaar Musesa yigginam toolehe. <sup>14</sup> Intaar wosa Imbaa Yesus Kiristoos masqalinkalanka ab inin erimea yer ikalanka ko pegadhe. Ko masqalinka peeno kono ikalanka, intaar peen kokala dembhika edimadhendettsi edimidine. <sup>15</sup> Haali pijadhi maatintano koda poote; qaamanaam taxadhabee taxadha garabe pootehe. <sup>16</sup> Bhocchin ogoka entsadHayna wulbee Barjo eedi maataana Israveel eenabena payyamobee garintobe kena ko dee.

<sup>17</sup> Isa waandar dohoono madano Yesussa waadima eedi inin dohonam konin dhehenna, ta keeda kaara os eedi hayyear iam ko galshabhoode!

<sup>18</sup> Imbanaanato, wosa Imbaa Yesus Kiristoossa sunin imintono yembesana ko dee; amiin.

## Kiristoos Yisa Tarjamonnante Kinin Yittsaa Bhawloos Epsoon Eenana Kinin Thaapoono Warqanno

### *Ardinta*

Epsoon katamano Likkon Isiya peentene. Niggidibee, timmiribee, aaninka ashkad-haana barjonana goodimintakabe dhesadhoono eediyn thooothoono katama ko dahade. Katamansa iinte thoothino eeno Barjodettsi hayaye konin goodimayno barjono Arthemissa ooni dahade (Yi Waa 19:24).

Bhawloos kaa warqataam kinin thaapoono 52-54 levensa iintene. Bhawloos Epsoonir dohon misken ooninam woysayse leve lamaaddha ogote dahaate, Barjosa dhacchintan upsinam kinin dhettsenka, Likkon Isiya peente dohoono eeno wul Barjosa upsin ko qansade (Yi Waa 19:10). Budobar pir Thimaatoos buudan timmirin marana misken oonin wottsinam ashkanabee goninam dhettsanabe Epsoon katamante kida dee (1 Thima 1:3). Wannis Shedintono 2:4 Epsoon misken ooninte dahaana eena ena birayse Kiristoosbee eedibena kesa dohon nashimmakkonam kenin garonna Yesus ki dhiidhimade. Yisa seesora kenin maataamonna, woda likkasa budobar shaakanam misken oonira ki dhaasade. Ogona misken onno Epsoon katamara ko kayade.

Mathaapinsa aapea dhalqa misken onno Kiristoossa bishi konin dohonamne. Kaa mathaapaam raq saldar kashana dandima ko dandime:-

1. Nagaymakkono (1:1-2)
2. Misken onno Kiristooska konin haapoono (1:3-14)
3. Misken ooninbee Barjosa kantanbe (1:15-2:10)
4. Misken onno Barjosa ooni eedi kosa maatidino (2:11-22)
5. Misken onno Barjo eedina yiam kinin dhehea konin maatoonno (3:1-13)
6. Misken ooninbee Barjoka thooothintanbe (3:14-21)
7. Misken ooninbee Barjo yigginbesa bhocchino (4:1-6:9)
8. Misken ooninbee Barjosa banqin koymonbe (6:10-20)
9. Macchin nagaymakkono (6:21-24)

Epsoon mathaapino misken ooninsa dayntanam koda giye. Barjodar woylamin qajaana eena dayntanka Kiristoosbesana cecin raqinte ke dooqaakaar (1:3; 2:6), peendar yinin dohonka yekka Barjo Manpasino banqinna konin imon banqin koymonam tiyayse Barjosa bhocchinam haya konin zaskenam koda dhettsise.

<sup>1</sup> Barjo bhocchinka Yesus Kiristoos yisa tarjamonnante kinin yittsaa i Bhawlooskalanka, Yesus Kiristooska gon maataana Epsoon gidir dahaana Barjo eenana nittsadhoono warqannone. <sup>2</sup> Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Kiristoosbar Haapadhayno Yerro*

<sup>3</sup> Kiristooska cecinte dohon manpasin gobshin wulka woam gettsaa wosa Imbaa Yesus Kiristoossa Imba maataa Barjo ki gobshadhe. <sup>4</sup> Gazanabee siya yer yindar qolmina eenabe maatayse kisa birante wonin haapadhoodettsi, ena peen pijadhima birayse Kiristooska woam ki kamade.

<sup>5</sup> Barjo yisa payyan bhocchinka woam kinin nashonna, ena birayse qaabayse Yesus Kiristooska kisa naana wonin doadettsi ki hayade. <sup>6</sup> Yin kinin hayoonoar nashadhaa yisa Naasaka wona kinin imon yisa sunin iminton gebhonin gobshadhoodettsine.

<sup>7</sup> Barjosa sunin imintonsa thoothamora dhaabhoono kisa Naasasa zombhino wosa seesonsa baza kashadhea maatayse laymon goynka wosa seesonsa garintonam wodi

haapidine. <sup>8</sup> Yisa sunin imintonamaar pakalmakkonbee dhettsintonbeka thoosayse wona ki imade.

<sup>9</sup> Barjo yisa payyamonka Kiristoosbar ena birayse yinin qaabon bhocchinsa aachin dhalqinam wonin dhesoadettsi ki hayade. <sup>10</sup> Barjosa bhocchino cecinbee peenbedar dohon pijadhin wulam kinka kidar Kiristoossa hayamon demente maasanane. Ogoro yin kinin maasayno Barjoyn qaabon wodanin yeskenkane.

<sup>11</sup> Yer wulam yisa bhocchinka qaabayse waadadhea Barjo ena birayse yinin giyondettsi ta ki hayade; ogonoar Kiristoosbar kisa eeda wonin doadettsi woam ki kamade. <sup>12</sup> Ogoro yin konin maatoono birayse Kiristoosdar qaabe hayaana wodi Barjosa gobshinna wonin doadettsine.

<sup>13</sup> Yediar kanka yenin dhaqayno gon upsi maaton wozisen dhalqinam yenin qansen wodanka, Kiristoosdar woylamin ye qajade. Barjoar “yena imayda ime” yinin hamon Manpas Gazanam kinti yenin maatenam eshkea milkit hayayse yena ki imade. <sup>14</sup> Barjoam gobshadhoodettsi, yisa eenaam yinin tiyenka yekka “yena imayda ime” kinin hamon wulam wonin tiyensa tarja maaten Manpas Gazanam wona ki imade.

### *Bhawloos Epsoon Eenana Barjoam Kinin Miskoono*

<sup>15</sup> Ogonante Imbaa wontea Yesusdar woylamin yenin qajenbee Barjo eena wulna yesa dohon nashimmakkonbeam qansayse, <sup>16</sup> Barjoam inin miskenka yeam bhocchada yennon goynka garma Barjoam ida gobshe.

<sup>17</sup> Kattsi Barjoam yenin dhesoadettsi, wosa Imbaa Yesus Kiristoossa Barjo maataa gobshi yiam zaskea Imbaa pakalmakkobee may dhesintobesa Manpas yena kinin imoadettsi yena kiam ida miske. <sup>18</sup> Hamin dohon qaabe haydhenna yeam kinin eelabee Barjo yisa eenna “imayda ime” kinin hamon gobshinsa thoothamono hamaddha konin dohonbeam yenin dhesoadettsi, yesa woylaminin bulimoadettsi yena Barjoam ida miske. <sup>19-20</sup> Yin pir wodi Barjodar woylamin qajaynana kisa dohoono kantano hamaddha gebhi konin dohonam yenin dhesoadettsi yena Barjoam ida miske. Ogoro kantanoar Kiristoosam dembhira dhaasoone cecinte kiam yisa mizaqinte dottsoono Barjo kanka kinin waadadhoono gembho kisa kantanone. <sup>21</sup> Barjo Kiristoosam yisa mizaqimbar kinin dottsoono yer harsaar hayamonbee, kantanbee, imba dayntan wulbedara dhew hayayse, pir peen kodar bish dayma keeda kaara os niven wodanka imbhea naabe wuldara sagea gobshi naabe kina imintakane.

<sup>22</sup> Barjo yer wulamaar Kiristoossa hayamon demente ki hayade. Taar yer wulam wottsea kinin doadettsi misken oonima mete hayayse kiam ki imade. <sup>23</sup> Misken onno Kiristoossa bishine; kodi Kiristoos yer wulka thoothi kinin dohonam koda dhee. Kiristoos zasken wulka yer wulam thoothi kida haye.

## 2

### *Kiristooska Dembhira Sadaka Dayntandar Sagintano*

<sup>1</sup> Yedi ee haman yenin garonbee yesa seeson waadimanbeka ena diyaanane.

<sup>2</sup> Ogo wodanka peen kogayn siyon yerinka yivada, jibarendar dahayse hayamonka wottseana yedi ee hamite ye dahade. Kidi Barjona ee hamiminasa woylaminka taar waadadhea meeshine. <sup>3</sup> Iginasa shaarinte wodi wulaar wosa waanbee wosa qaabonbesa bhocchinam waadadhaate waansa anngarmanka ena birayse wo dahade; waani eendettsiar wosa pijadhinka Barjosa wacime wodar ko dahade.

<sup>4</sup> Ko dahaannaar Barjo yisa garintonsa wodimmakkonka woam kattsi kinin nashonna, <sup>5</sup> ee haman garayse diyaana wonin dohon wodanka, Kiristoosbesana kinka sadanka dahayna eena woam ki maasade. Ogoro yenin dhaqoonoar Barjosa sunin imintonkane. <sup>6</sup> Barjo Kiristoosbesana woam dembhira dhaasayse, cecinte kimbesana ki dottsade. Yesus Kiristooska dahaana eenana <sup>7</sup> ogoam kinin hayoonoar Yesus Kiristoosbar wona kinin eshkon payyamon goynsa keeda kaara os niven wodanka

yisa sunin imintonsa wodimmakkonam dhaanane. <sup>8</sup> Harrna hambidianna, yenin dhaqoono Barjodar woylamin qajadhen goynsa kisa sunin imintonkane. Ogonoar Barjosa imintone, yekalatehe. <sup>9</sup> Hayyear kinin erimoamadettsi ogo dhaqintansa haapadhidino eedisa waadimakatehe. <sup>10</sup> Harrna hambidianna, Barjo birayse wona kinin ashkon payyan waadimanam waadadhaate wonin doadettsi wodi Yesus Kiristoosbar pijadhaana Barjosa pijadhine.

### *Kiristoosbar Haapadhayno Kalaa Maatintano*

<sup>11</sup> Ogonante yedi ena yesa adhadhinka Ayiwdtay hamma ye dahade. Ayiwd een aeedina haapadhen qaamanam aanka taxadhaate erimada, "Yedi qaamanam taxadhaamma eenane" yeast keda hame. <sup>12</sup> Ogo wodanka Israveel eenasa mulhamora pegadhayse, Barjo "imayda ime" hamayse yinna eenabesana kinin ardon mallanna chocchidettsi maatayse, peen kodar qaabe yindar haydheaysa qolmina, Barjokalaar edimayse Kiristoos qolma yenin dohonam bhocchee.

<sup>13</sup> Keeda yedi ena birayse pegadhaana Yesus Kiristooska maatayse kisa zombhinka Barjokal yedi theedidine. <sup>14-15</sup> Payyamonam wona imaa Kiristoosne. Kidiar yiginka giidhon dhalqinam shiishintaka woam edon wacimensa kubanam yisa waanka kottsayse, raq lamaadar edimaana eenam kinka kidar kalaa ki maasade. Ogoro yin kinin hayoonoar lamaanaam yinka eedi haali kalaa hayayse payyamonam ki bavade. <sup>16</sup> Masqalindar diyayse kinka keam kenin jibbenam kaysayse, ke lamaanaamaar waa kalaa hayayse Barjobesana kinka keam ki qaashinsade. <sup>17</sup> Ogoroar nivayse ye pegadhayse dahaanabee theedin dahaanabena payyamonam beven Barjosa dhacchintan upsinam ki guyade. <sup>18</sup> Harrna hambidianna, kanka wodi wulaar Manpas kalaaka Barjo Imbakal ardana wo damade.

<sup>19</sup> Ogonante yedi Barjo eenabesana kinka pee kalaa eedibee Barjosa ooni eedibene; keeda kaara os chocchibee eedi peera nivaana eedibetehe. <sup>20</sup> Kiristoos yisa tarjamonnante kinin yittsaanabee Barjokala qansayse eenna giyaynabeyn meeshon raqindar yedi oonidettsi ye woysadhade. Ooninam kattsi wocchinsea seenia Yesus Kiristoosne. <sup>21</sup> Onno wul kanka yedimayse Imbaa wontea Yesusna edimoono gaza ooni maatayse koda gebhe. <sup>22</sup> Yediar Barjo yisa Manpasinka kinin wodhea ooni maatana Kiristooska kinka kinka woysadhite ye dahade.

## 3

### *Bhawloos Ayiwdtay Hamma Eenana Kinin Waadadhoono*

<sup>1</sup> Ogonante yena hamayse Yesus Kiristoosna dhaxin ooninte dahaa inta Bhawloos ye Ayiwdtay hamma eenana Barjoam ida miske. <sup>2</sup> Yena konin pootoadettsi Barjo yisa sunin imintonam yisa waadimanna ina kinin imonam yedi qansima gareetene. <sup>3</sup> Kosa birayse upsi tokaa inin yena thaapondettsi, Barjo yisa aachin dhalqinam may ina dhaydine. <sup>4</sup> Ogo inin thaaponam yenin nabbabenka, Kiristoossa aachin dhalqinam hamin bhocchayse inin dhesonam yedi dhesana dameeda dame. <sup>5</sup> Ogoro aachin dhalqino Kiristoos yisa tarjamonnante kinin yittsaana gazana eenabee Barjokala qansayse eenna giyaynabekal ta yin Barjosa Manpasinka haapadhdonttsi, ena birayse dahaana eenakal haapadhdadehe. <sup>6</sup> Ogoro aachin dhalqinoar Barjosa dhacchintan upsinka Ayiwdtay hamma eena Ayiwd eenabesana kinka toydi kinin maatenbee, waa kalaa kinin maatenbee, Barjo Yesus Kiristoosbar "imayda ime" hamayse kinin giyon qaabe yindar haydhenam kashimayna kinin maatenbeam giyaynone.

<sup>7</sup> Barjo yisa kantan waadimanka ina kinin imon kisa sunin imintonka kisa dhacchintan upsinam waadadhea i maatade. <sup>8</sup> Inta Barjodar woylamin qajen een wuldara i tokaakaar, macchinsa qolmin Kiristoossa gebhamonam Ayiwdtay hamma eenana inin giyoadettsi, ogo Barjosa sunin imintonam ina ko imbhade. <sup>9</sup> Konin imbhoonoar

ena sagon wodanka yerin wulam pijaa Barjoka aachadhon Barjosa aachin dhalqinam een wulna may inin giyoadeettsine. <sup>10</sup> Ogoro yin maatoono ta wodan koka Barjodar woyleamin qajayse kalaa maataanaka, cecinte dahaana wottsaynabee hayamoysa da-haanabe Barjosa pakalmakkon wulam kenin dhesoadeettsine. <sup>11</sup> Barjo ogoam ena, wodansa birara yedayse, waadadhana yinin qaabonamaar wosa Imbaa Yesus Kiristooska ki thoosade. <sup>12</sup> Kidar woyleamin wonin qajenka kurtumbhe qolmabee ooshimbhe qolmabe maatayse, Kiristooska Barjokal ardana wo damade. <sup>13</sup> Ogonante yena inin tiyayno gaaleno yena gobshi konin maatenna, isa gaalen goynka yedi qaabe hayanam gareebhode hamayse yeam ida miske.

### *Bhawloos Epsoon Fenana Barjoam Kinin Miskoono*

<sup>14</sup> Ta Barjo Imbasaa birante kumpurdhayse inin miskayno ogonane. <sup>15</sup> Cecinbee peenbedar dahaana zarsina wul gonin hamon naabenam kenin haapayno Barjo Imbakalankane. <sup>16</sup> Barjo yisa gobshinsa thoothamora yesa iinaam wocchinsen kantanam yisa Manpasinka yena kinin imoadettsi kiam ida miske. <sup>17</sup> Yin pir Barjodar woyleamin yenin qajenka Kiristoos yesa woyleamine kinin doadettsibee yesa caacino nashimmakkodar woyaa konin doadettsibe yena Barjoam ida miske. <sup>18</sup> Pir Kiristoossa nashimmakkonsa workamonbee, gudumbakkonbee, dhegamonbee, mia theer-amonbe hamaaka yekka konin dohonam Barjo eena wulbesana kinka may bhocchana yenin damoadettsibee <sup>19</sup> ogo eedin dhesensa bhaabar dohon Kiristoossa nashim-makkonam dhesayse Barjosa thoothamonkal yeskayse yenin thoothoadettsibe yena Barjoam ida miske.

<sup>20</sup> Ogonante wosa iinte waadadhen kisa kantanka wonin miskenbee wonin bhoc-chenbera kalon sagi hayana damea Barjona, <sup>21</sup> Barjodar woyleamin qajayse kalaa maataanabee Yesus Kiristoosbeka, adhadhira adhadhindar wodan wulka rooro wul lay gobshi kina ko dee, amiin.

## 4

### *Kalaa Maatinta Kiristooska Konin Dohoono*

<sup>1</sup> Imbaa wontea Yesusna dhaxin ooninte dahaa inta Bhawloos, yeam eldhon goynka zaskaadettsi ye dee inta yeam ida miske. <sup>2</sup> Nashimmakkoka kinka kina darshada, rooro wul kina garada meten yesaam toskaatebee lemmakkokabe dehee. <sup>3</sup> Payyamonka dhaximayse Manpas Gazansa kalaa maatintanam toolana wocchimbhee. <sup>4</sup> Yenin eldhon wodanka yer kalaadar qaabe hayana yenin elhondettsi, bishi kalaabee Man-pas kalaabene. <sup>5</sup> Yin pir wosa Imbaa kalaa, woyleamin wonin qajear kalaa, wonin shiidhoono shiidhimbhenoar kallone. <sup>6</sup> Pir wulam wottsea, wulka waadadhea, wulsa iinte dehea, wulsaar Imba dahaa Barjo kalaane.

<sup>7</sup> Ko dahaannaar Kiristoosin imana qaabon sunin imintonam wo kalaa kalaanana ko imbhade. <sup>8</sup> Ogonoar

“Tura yinin uton wodanka

bashayse thoothinam yinka tiyayse ki yivade;

eenna imintonam ki imade”

hamayse ena thaapadhondettsine. <sup>9</sup> Ta ogono “Tura ki utade” hambhoono dhalqino peensa choobar dohon raqindar ki hanchade hamara ab keeda har ko dhee? <sup>10</sup> Agaa mia hanchaa wulam thoosota cecin wulsa bhaabar utaa kidine. <sup>11</sup> Kidiar waani eena yisa tarjamonnante kinin yittsaana, waani eena Barjokala qansayse eenna guyayna, waani eena Barjosa dhacchintan upsinam tarjayna, waani eena Barjodar woyleamin qajaynaam toolaynabee eenna Barjosa upsinam dhettsaynabee kinin doadettsi hayayse ki imade. <sup>12</sup> Ogoam yin kinin hayoonoar Kiristoossa bishi maataana kinin woc-chimbhoadettsi Barjo eenam yisa waadimanna ashkanane. <sup>13</sup> Yin pir Barjo Naasaam

dhesintabee kidar woylamin qajintakabe haapadhadyno kinka kalaa dayntankal wodi wul yeskayse, Kiristoos goninbee yiam damaabe kinin dohondettsi wodiar goninbee woam damaana eenabe wonin maatoadettsine.

<sup>14</sup> Ogonoar bazindara sagadhen gonngalanam jibare osbee orabe kupeadettsi, keeda eedisa gadimmakkoka eediam taysayse dhaddhisana giidhen timmirinsa jibarenka kupimada naasi navva maata woam zaskehe. <sup>15</sup> Kalon goninam nashimmakkonka giyada mete maataa Kiristoosdar yer wulka wo gebhe. <sup>16</sup> Waana waana hamma bishinsa waana wul kinka kenin yedimayno Kiristooskane. Jinna wul bishinam wocchinsayse kenin yedenkabee meteka meteka bishinsa waana yina imbhon waadi-manam kenin toolenkabe, bishino wul koda gebhe, nashimmakkoka koda wochimbhe.

### *Kiristooska Haapadhadyno Haalin Dayntano*

<sup>17</sup> Ta keeda kaara os pootimin bhocchinka daaana Barjoam dhesiminadettsi deebhode hamayse Imbaa wontea Yesussa naabenka yena ida giye. <sup>18</sup> Kesa qaabono kaydine; kenin dhesamonnabee kesa woylamin duudonnabe Barjoyn imen sadankala kedi pegadhidine. <sup>19</sup> Kesa ooshimben qaabonin kayonna, “Ina yeekehe” hamada minngamon waadiman wulam waadadhana yisa metenam waana waana hamon siyon anngarmanna saskayse ke imade.

<sup>20</sup> Yediar Kiristoossa yenin timmiroono yintehe. <sup>21</sup> Gon yedi kisa qansidine; Yesuska dohon gonamonam yedi kikala timmiridine. <sup>22</sup> Ena yennon dayntan goynsa bhocchaate, taysayse seesondar entsen anngarmanka gemmon gecchon dayntanam yesa iira bulee. <sup>23</sup> Yesa meskenam manpasinka haali maasee; <sup>24</sup> gonin hamon tipamonbee gazamonbeka Barjo kamsindettsi pijadhon haalin dayntanam qaadhee.

<sup>25</sup> Ogonante yekala buudamonam kaysayse, kinka kina goninam giyee; harrna hambidianna, wodi wul bishi kalaasa waa wonin dohonnane.

<sup>26</sup> Wacimee, seeso hayebhode; yesa wacimenam kinka kina ye garma, hayno ko wavabhoode; <sup>27</sup> Seethaannaar raq imeebhode.

<sup>28</sup> Dimmea keeda kaara os ki dimmabhoode; ogona yisa qolmana kinin imea yer kisa doadettsi, yisa aaninka payya waadima waadadhaate ki qajadhe.

<sup>29</sup> Hamin ko daahaakaar yesa apora dhalq siya ko utabhoode; qansayna eena kanka kinin wocchimbhoadettsi keam ashkana zasken dhalqinam giyee. <sup>30</sup> Kiristoosin yeam dhacchea rooroaka kinti yenin dohonam eshkea milkidettsi hayayse yedar yettsadthon Barjosa Manpas Gazanam geneebhode. <sup>31</sup> Dhalq thaqimabee, dhagabee, wacimebee, ilatbee, iirimebee, yerra siyana wulbeam yekalanka pegisee. <sup>32</sup> Ogonante kinka kinka kina leeminabee kina burqadhadynabe maatee; Barjo Kiristooska yena kinin garondettsi, yediar kinka kina garee.

## 5

### *Shaakante Daadhen Goyno*

<sup>1</sup> Ta keeda nashadhaana naanadettsi yediar Barjosa kamsinka yivee. <sup>2</sup> Kiristoosin yeam nashondettsi, Barjoam wozisen payya gaamen shittonsa dohon imintobee marshabe hayayse yiam wona kinin imondettsi, yediar nashimmakkoka dehee.

<sup>3</sup> Sharmucimakkobee, waani minngina yerrabee, “Yer wul ina ko dee” hamenbe yesa shaarinte ko dahabhoode; iginadettsina yerrasa dhalq hattear ko dhaabhabhoode. Harrna hambidianna, iginadettsina yerra Barjodar woylamin qajayna eenana kinin zaskimonnane. <sup>4</sup> Kalon Barjoam gobshee; ooshinsenbee, pootimon dhalqinbee, jibbisen yerinbeam giya yeam zaskehe; ogodettsino yerro yesa shaarinte ko dahabhoode.

<sup>5</sup> Sharmucimakko hayea ki dahaannaar, minngi yeram hayea ki dahaannaar, “Yer wul ina ko dee” hamea ki hannaar, Kiristoosbee Barjobesa bitamon ranqin kinin tiyminam dhesee. “Yer wul ina ko dee” hamea kidi aaninka ashkadhaana barjona goodimeane.

<sup>6</sup> Yerra iginaka dhaabhoono ee hamiminadar Barjosa wacimenin nivenna, hayyear pootimin dhalqinka yeam ki taysabhoode. <sup>7</sup> Ogonante kembesana kinka kashimayna maateebhode.

<sup>8</sup> Harrna hambidianna, yedi ena thipante ye dahade; ta Imbaa wontea Yesuska shaakante ye dahade. Ta keeda shaakante daahaana eenadettsi yaayee. <sup>9</sup> Shaakansa aapino payyamobee, tipamobee, gon maataa yer wulbene. <sup>10</sup> Ta Imbaa wontea Yesusam wozisayno har ko hannaar marmarayse shedee. <sup>11</sup> Aapiysa qolmon thipan waadi-manbesana wormeebhode; kalon shaakandar bavayse koam dhehee. <sup>12</sup> Aachinka kenin hayen yerinam giyanoar ooshinsaynone. <sup>13</sup> Yer wuldar shaakanin shaakenka, gonne kosa may maatayse koda haapadhe. <sup>14</sup> Harrna hambidianna, yer wul may maatayse ko haapadhe hayayno shaakane. Ogonante  
“Ya gindhea, qaymaa;  
dembhiraar dhaabhaa!  
Kiristoos hana kida shashke”  
hambhidine.

<sup>15</sup> Ta keeda hamin daahaana ye hannaar payya hayayse bhocchee; pakalla eenadettsi dehee, malgimma eenadettsi deheebhode. <sup>16</sup> Kono woda siya konin dohonna, yenin damen payyan waadiman wulam waadadhee. <sup>17</sup> Ogonante Imbaa wontea Yesussa bhocchino har konin dohonam qaabee; malgimma eena maateebhode.

<sup>18</sup> Ogoro yeam siyondar konin arsenna, wucadhenka bardheebhode; ko daahaannaar Manpas Gazanka thoothee. <sup>19</sup> Mazmurbee Manpas Gazan yena imen upsinbeka zammaraate kinka kinka dhalqee; Imbaa wontea Yesusam yesa woylaminka walshaate zammaree. <sup>20</sup> Wosa Imbaa Yesus Kiristoossa naabenka yer wulna Barjo Imbaam rooro wul gobshee.

### *Geshoabee Geshonbena Imbhoono Kiilimeno*

<sup>21</sup> Kiristoossa gobshinna hamayse yedi kinka kina ee hamee. <sup>22</sup> Yedi maana, Imbaa wontea Yesusna yenin ee hamendettsi yesa annginana ee hamee. <sup>23</sup> Harrna hambidianna, Kiristoos misken ooninsa mete kinin dohondettsi, geshoa geshon yinnonsa metene. Pir Kiristoos yisa bishi maaton misken ooninam Dhaccheane. <sup>24</sup> Misken ooninte daahaana eena Kiristoosna ee kenin hamendettsi, ogodettsi yin maana yer wulka annginana ee ke hamee.

<sup>25</sup> Yedi annginato, Kiristoos misken ooninam kinin nashondettsibee yiamaar kona saskayse kinin imondettsibe yediar yesa maanaam nashee. <sup>26</sup> Kiristoos ogoam kinin hayoono misken ooninam noqoka shiidhaadettsi yisa upsinka koam gazisanane. <sup>27</sup> Pir dakayndar qolmon way aapin kerin yisaam thipsima, ogodettsi maataa siya yer kodar haapadhima, gazabee payyabe hayayse yisa birante gobshinka misken ooninam woysanane. <sup>28</sup> Ogodettsi anngina yiam yinin nashendettsi maana yinnaam nasha keam ko zaske. Geshon yinnonam nashea yiam kida nashe. <sup>29</sup> Harrna hambidianna, yinnon bishinam jibbea hayyear qolehe; koam kalon kunsa ki kunse, pir payya hayayse kida toole. Ogodettsi Kiristoos misken ooninna yin kida haye. <sup>30</sup> Harrna hambidianna, wodi kisa bishinsa waana wonin dohonnane. <sup>31</sup> “Ogonante eedi imbabee indabeam kida gare, geshon yinnonbesana kinka kida dee; lamaanaar waa kalaa keda maate” hamayse thaapadhidine. <sup>32</sup> Kono aachin dhalqino gembhone. Intaar koam inin giyayno Kiristoosbee misken ooninbesa ida giye. <sup>33</sup> Ko daahaannaar yedi kalaa kalaana wul yesa maanaam yennon metendettsi hayayse nashee; geshonoar yisa geshoam ko gobshee.

<sup>1</sup> Naanato, yeam adhaana imbanana Imbaa wontea Yesusna hamayse kena ee hamee; harrna hambhidianna, konin zaskennane. <sup>2-3</sup> “Payya hana konin maatoadettsibee peendar hasa levenin gudubhoadettsibe hambahbee handabeam gobshaa” koda hame. Kodiar Barjo hayota kinin qaabon woylam yindar haydhensa dohoono birono upsi-none.

<sup>4</sup> Yedi imbanato, yesa naanaam Imbaa wontea Yesussa kiilimenka wacimaate keam gettsee; keam dhagattseebhode.

### *Wottsaynabee Eedina Waadadhaynabe*

<sup>5</sup> Yedi eedina waadadhaynato, yeam wottsayna eenana kurtumbhaatebee gibazatebe kena ee hamee; woylam payyaka Kiristoosna yenin waadadhendettsi kena ee hamee. <sup>6</sup> Yenin ee hamaynoar Barjosa bhocchinam yesa woylaminka toolada Kiristoosna yenin waadadhendettsi ko maate; eediam wozisana eedina haapadhota waadadheebhode. <sup>7</sup> Eedina dayma Imbaa wontea Yesusna hamayse yenin waadadhendettsi payya bhocchika waadadhee. <sup>8</sup> Harrna hambhidianna, worsho ke hannaar, worshotay hamma ke hannaar, kedi kalaa kalaana yinin waadadhon yisa payyan waadimansa bazanam Imbaa wontea Yesuskalanka kenin tiyenam dheseeda dhese.

<sup>9</sup> Ogodettsi yedi wottsaynato, eedisa woti shedayse waadadhima yembee kembesa Imbaa cecinte kinin dohonam bhocchaate, yena waadadhaynaam kurtunsan garayse kena payya waadadhee.

### *Barjokalanka Imbhayno Banqin Koymono*

<sup>10</sup> Shidhoono Imbaa wontea Yesusbbee gebhon kisa kantanbeka wocchimbhaana maatee. <sup>11</sup> Seethaansa taysimen kolanam yekalanka marana yenin damoadettsi, Barjo yena kinin imen banqin koymon wulam dhaximbhee. <sup>12</sup> Harrna hambhidianna, wosa banqin kansano eedibesana dayma cecinte dahaana siyana meeshinasa banqin eenabesanane; iginaar wottsaynabee, hayamoynsa dahaanabee, ogo thipante waadadhayna peendar kantaysa dahaanabene.

<sup>13</sup> Ogonante siyon rooronka yesa baalagarasa banqinam marana yenin damoadettsibee wulam macchayse woyana yenin damoadettsibe Barjo yena kinin imen banqi koymon wulam tiyee. <sup>14-15</sup> Ta keeda goninam yesa karnante dhaximbhayse, tipamonam sadandar qaashidettsi qaadhayse, payyamonam imen Barjosa dhacchintan upsinam yesa roonte dunnguridettsi arsayse, ashkimbhayse woyee. <sup>16</sup> Pir nuudettsi yeden Seethaansa paldhen wulam kaysana yenin damoadettsi, igina yerrabesana Barjodar woylamin qajadhenam lonngadettsi tiyee. <sup>17</sup> Dhaqintanamaar qoobhedettsi yesa metendar wodee; Manpas Gazansa halpan maaton Barjosa upsinam yedee. <sup>18</sup> Yeam zasken wulam miskaate Manpas Gazanin yeam entsendettsi rooro wul Barjoam miskee; ogodettsi maaton qaabonka Barjo een wulna yesa miskenam garma qaymaysebee wocchimbhaysebe miskee.

<sup>19</sup> Barjosa dhacchintan upsinsa aachin dhalqinam kurtumbhe qolma may inin giyoadettsi, ina zasken dhalqinam Barjo kinin imoadettsi inaar Barjoam miskee. <sup>20</sup> Kisa dhacchintan upsinna ta dhaxadhayse i dahaakaar, iam zaskendettsi kurtumbhima ogoam inin giyoadettsi ina Barjoam miskee.

### *Macchino Nagaymakkono*

<sup>21</sup> Nashadhhaa imbanaasa, Imbaa wontea Yesus waadimansa gon eedi maataa Tik-iqoos, innon goynsa yenin dhesoadettsi yer wulam kidi yena giyasane. <sup>22</sup> Ogonante wodi hamin wonin dohonam yenin dhesoadettsibee tapir kinin yeam wocchinsoadettsibee hamayse yekal kiam i yittsade.

<sup>23</sup> Barjo Imbaabee Imbaa wontea Yesus Kiristoosbekalanka payyamonbee, nashim-makkonbee, Barjodar woylamin qajadhenbe imbanaanana ko dee. <sup>24</sup> Shidha shidhimin

nashimmakkonka Imbaa wontea Yesus Kiristoosam nashayna wulna Barjosa sunin  
imintono ko dee.

## Kiristoos Yisa Tarjamonnante Kinin Yittsaa Bhawloos Pilbhisoos Eenana Kinin Thaapoono Warqanno

### *Ardinta*

Pilbhisoos katamano Moqodoonia peente ko dahade. Kedi Roome eedi yinin dohonna, "Roome peen yiggino woam toolasane" hamayse keda odime. Pee waana waanara nivayna nagganna kataman ogoka keda sage.

Bhawloos Thirovaddar dahayse Barjokala shedintoka Moqodoonia eedi kalaa "Wokal nivayse woam kelshaa!" hamayse kinin giyena haapayse, ogona "Barjo ogodar wonin yivoadettsi eelidine" hamayse Pilbhisoos katamandar ki yivade (Yi Waa 16:9-10). Sillaasbee, Thimaatoosbee, Luqaasbesana Pilbhisoos yeskayse ukunsen rooroaka Ayiwdeenna miskana bayn gasante kenin buken raqinte waani waani maanana Barjosa dhacchintan upsinam ke tarjade.

Liidiabee kosa oonin eenabe Barjodar woylamin ke qajade. Pilbhisoos misken ooninsa woysadhidino kennon goynkane (Yi Waa 16:13-15). Budobar Bhawloos beeronam waadima eedi kallorra kinin bulenka, kosa imbanha Bhawloosbee Sillaas-beam yedayse kataman wottsaynasa birante bersayse dhaxin ooninte ke dhaskade (Yi Waa 16:19-24). Barjo peenin zigimoadettsi kinin haysonna, dhaxin ooninam toolea ea Barjosa kantanam haapayse kidar woylamin ki qajade (Yi Waa 16:25-34). Ogoraar Bhawloosbe dhaxira ke buldhade.

Thoothi levesa budonte Bhawloos Roome katamante dhaxadhayse kaa warqataam 52-54 levensa iinte ki thaapade. Ogotear buuda beerimeka ki dhaxadhaakaar, gebhi wozaka Pilbhisoosir dahaana Barjodar woylamin qajaanana Barjosa dhacchintan up-sinam thoothi giyada kena ki thaapade.

Kaa mathaapaam raq saldar kashana dandima ko dandime:

1. Nagaymakkono (1:1-2)
2. Barjodar woylamin qajaanasa Bhawloosin thettsoono gobshinbee miskenbe (1:3-11)
3. Bhawloosbee kisa dayntanbesa (1:12-26)
4. Barjodar woylamin qajaana hamin daa keam zaskayno (1:27-30)
5. Kiristoossa bhocchinbee kamsinbe (2:1-18)
6. Thimaatoosbee Ebhapirooditosbe Barjodar woylamin qajaanana kenin qaaboono (2:19-30)
7. Bhawloosbee kisa kamsinbe (3:1-21)
8. Bhawloossa gobshinbee kiilimenbe (4:1-20)
9. Macchin nagaymakkono (4:21-23)

<sup>1</sup> Yesus Kiristoossa waadima eedi maataana i Bhawloosbee Thimaatoosbekalanka Pilbhisoos katamante dahayna Yesus Kiristooska gaza maataana wulna, pir misken ooninsa donzanabee waani waadiman eenabena nittsadoono warqannone. <sup>2</sup> Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Bhawloos Barjoam Kinin Gobshoono*

<sup>3</sup> Yeam inin bhocchen wodan wulka isa Barjoam ida gobshe. <sup>4</sup> Ye wulna Barjoam inin misken wodan wulka, rooro wul wozaka ida miske. <sup>5</sup> Biraar rooroara yedayse kinaka yekka Barjosa dhacchintan upsinam inin giyena imbesana waadadhaana yenin maatonna Barjoam ida gobshe. <sup>6</sup> Yesus Kiristoosin nivea rooroaka yekka payyan waadimanam yesa iinte yedaa Barjoyn yeskisenam gon inta dhesidine. <sup>7</sup> Ye wulna

ogodettsi qaaba iam koda zaske. Ogonoar isa dhaxinka ko hanna, Barjosa dhacchintan upsinam gon konin dohonam keedhadhenbee ogoamaar wochinsadhenbeka ko hanna, Barjosa sunin imintonka yedi wulatte kashimayna yenin dohonna, yedi rooro wul isa woylaminte ye dahade. <sup>8</sup> Yesus Kiristoossa nashimmakkonka yedi wul hamaddha ikal yenin bhoqensa Barjo isa tarjane.

<sup>9</sup> Yesa nashimmakkono dhesintobee bhocchibeka thoothoono maatayse gebhaate konin yivoadettsi yena Barjoam ida miske. <sup>10</sup> Ogonoar kattsi payya maaten yerinam marmarayse yenin dhesoadettsibee Kiristoos maataate kinin nivea rooroaka gazanabee siyamo yindar qolminabe maatayse yenin haapadhoodettsine. <sup>11</sup> Ogodettsin dayntan yennonka Yesus Kiristooskala haapadhen tipa waadimaka thoothaana maatayse Barjona gobshi hapsayna yeda maate.

### *Bhawloossa Dhaxino Barjosa Waadimanam Konin Workisoono*

<sup>12</sup> Imbanaanato, ogono idar yeskoono yerro Barjosa dhacchintan upsinam kattsi konin workoadettsi konin hayenam yenin dhesoadettsi ida nashe. <sup>13</sup> Inin dhaxadhoono Kiristoos goynka konin dohonam hayonasa oonin toolaynabee waani een wulbe dhesidine. <sup>14</sup> Inin dhaxadhon goynka Barjodar woylamin qajayna thoothina Barjosa upsinam kurtumbhima giyana Imba wontea Yesuska kedi sagi kanta haapidine.

<sup>15</sup> Waani waani Kiristoossa tarjen upsinam kenin giyayno woogintabee palimebekane; waani pir payyamon qaabenka keda giye. <sup>16</sup> Igina Barjosa dhacchintan upsinna inin palimoadettsi inin kambhonam yinin dhesenna, nashimmakkoka ogoam keda haye. <sup>17</sup> Igina waani Yesus Kiristoossa tarjayna lemmakkoka dayma, meten yinnonam gettsota isa dhaxindar gaale ab idar bovota qaabaysene.

<sup>18</sup> Ogona dhari maataamaka ko dahaakaar, gonka ko dahaakaar, goytı wulka, Kiristoossa tarja ko tarjadhe. Ogakaar wozadhadayda wozadhe; os birantear wozadhadayda wozadhe. <sup>19</sup> Ogonoar yesa miskenbee Yesus Kiristoossa Manpasin kelshonbeka ko gaaleria inin dhaqenam inin dhesennane. <sup>20</sup> Rooro wul inin hayendettsi kinaar sadaka i dahaakaar way i diyaakaar, Kiristoos i kaa waan qaadhaaka gobshadhasane hamayse kurtumbhima may ida giye. Pir yer hamin dhaaa goytika ooshimbhayse inin haapadhoamadettsi gebhi anngarmaka qaabe hayte i dahade. <sup>21</sup> Harrna hambhidianna, ina sadaka daa haminta Kiristooska daynta hamintane; diynta haminta yer payya haapintane. <sup>22</sup> Ko dahaakaar ko waanka dehea i hanna, aapi imea waadima ida waadadhe. Dahayse dayntabee dembhibesa hamaam kama iam konin zaskenam dhesattine. <sup>23</sup> Igina lamaana qaabonaka inta gaalidine. Kiristoosbesana dayntano yer wuldara konin sagenna, diyayse kimbesana kinka daana ida anngardhe. <sup>24</sup> Ko dahaannaar sadaka isa daano yena kattsi zaskaynone. <sup>25</sup> Ogoam inin dhesonna dembhira dhaqayse yesa Barjodar woylamin qajidino konin gebhoodettsibee woza yenin haapoadettsibe ye wulbesana inin kappenan dhesayda dhese. <sup>26</sup> Inta pir yekal maataate inin nivenka, inka yesa dohoono pormakkono Yesus Kiristooska koda thoothe.

<sup>27</sup> Keeda yer wuldara sagi maatayno dayntano yesa Kiristoossa dhacchintan upsinam gobshayno ko dee. Ogonoar inta nivayse year inin shedenka, way yekalanka i pegadhaakaar bhocchi kalaaka wocchimbhayse yenin woyenbee kinka Barjosa dhacchintan upsinam yeskisana yenin mashimenbeam ida qanse. <sup>28</sup> Yembesana palimaynaam hamin hambhaakaar kurtumbheebhode; ogono yesa wocchimbheno kena kayesa milkit konin maatenka, yena dhaqintasa milkitne; yenin dhaqaynoar Barjosa kantankane. <sup>29</sup> Kiristoosna waadadhana baali yena imbhoono kidar woylamin ye qaje bish dayma, tapir kinnon goynka gaale ye tiyene. <sup>30</sup> Ogono gaalen mashimeno ena birayse idar ko yeskaysaka yedi haapidine; taar yeskaate konin dohonam yedi qansaate ye dahade. Ogonante taaki imbesana gaalite mashimayna ye maatade.

## 2

*Kiristoossa Payyan Qaabonsa Kamsino*

<sup>1</sup> Kiristooska yesa wocchimbhe daa ko hanna, kisa nashimmakkonkaar wocchimbhaana ye hanna, Manpas Gazankaar kinka kalaa maataana ye hanna, kinka kinka kinaar burqadhadhaynabee payya yer hayaynabe ye hanna, <sup>2</sup> nashimmakko kalaabee, woylam kalaabee, qaabo kalaabeka maatayse kinka kinka agintaka, isa wozanam thoosee. <sup>3</sup> Metenam toskayse waani eenam yedara kattsi sagi kenin dohonam bhocchee; meten yennonam gettsayse way “Idara sagea hayne?” hamayse pormakkoka yer kala hattear hayeebhode. <sup>4</sup> Yin yedi kalaa kalaana yena agen bish dayma, eedi abnaar agenam bhocchee.

<sup>5</sup> Yesus Kiristoosdar dohoono qaabono yedalar ko dee.

<sup>6</sup> Kidi Barjo dantanka dahayse

Barjobesana kiaddha maasenam yina yedana bhocchadehe.

<sup>7</sup> Ogona yisa dohon gobshinam garayse  
eedina waadima eedi dantanam tiyayse ki haapadhade;  
peen kodar eedidettsi maatayse ki dahade.

<sup>8</sup> Meten yennonam toskayse  
dembhi ko hannaar, diyota Barjona ee hamaa ki maatade;  
ogonoar masqlindar konngadhayse ziitadhidinkane.

<sup>9</sup> Ogonante Barjo kiam kattsi dhev ki hayade;  
naabe wulsa bhaabar hama naabe kina ki imade.

<sup>10</sup> Ogona Yesussa naabenam gobshintaka  
cecinbee, peenbee, peensa choobarbe dhaanaa wul  
buqon yinnonka kenin kumpurdhoodettsine;

<sup>11</sup> yisa aponkaar  
“Yesus Kiristoos Imbane” hamayse kenin tarjoadettsine.  
Yin hayntaka Barjo Imbaam keda gobshe.

*Peendar Dohon Eenna Shaaka Maatinta*

<sup>12</sup> Ogonante isa nashonato, inta yembesana inin dohon wodan wulka ina ee hamayna yenin dohondettsi, ta yekala pegadhayse inin dohon wodanka sagi ee hamayna yenin doadettsi ida bhocchise. Ogodettsi yedi kalaa kalaana yenin dhaqonam may hayana kurtumbhebee gibazabeka wocchimbhayse waadadhee. <sup>13</sup> Harrna hambhidiana, Barjo yisa payyan bhocchinam yenin zagoabee hayoabedettsi yesa iinte hayea Barjone.

<sup>14</sup> Waadima hamaamaar yenin waadadhenka gundumimabee palimimabe waadadhee. <sup>15</sup> Yin hayayna ye hanna, ko wodan een wobonbee siyonbesa shaarinte wuupobee siyamobeysa qolmina Barjosa gazana naana maatintaka, peen kodar wancodettsi shaakayna maatayse yeda haapadhe. <sup>16</sup> Ogo yin konin maatayno, sadan imen upsinam kena garma yenin giyenkane. Ogodettsi isa gobenbee isa waadimanbe sun pootima maatayse konin shidhiminna, Kiristoos nivea rooroaka kanka inin erimea isa yer daane hamintane.

<sup>17</sup> Yesa Barjodar woylamin qajidinbee waadimanbe Barjona marsha machadheadettsine; pir i deesadhidiannaar isa zombhino marshandar laldhea wucimadettsi konin maatenna, ida wozadhe; isa wozanamaar yembesana ida kashime. <sup>18</sup> Ogodettsi yedi wozadhee; yesa wozanamaar imbesana kashimee.

*Thimaatoosbee Ebhapirooditosbesa Waadimano*

<sup>19</sup> Intaar yennon goynsa qansayse inin wocchimbhoodettsi, Imbaa wontea Yesussa bhocchi maatidi ko hanna, Thimaatoosam saana yedar yittsana qaabe ida haye. <sup>20</sup> Yesa dayntan goynsa idettsi woylam wulka bhocchea eedi ab qolehe. <sup>21</sup> Waani eeni wul yina maaten yerinam keda zage; Yesus Kiristoosna maaten waadimanam qaabehe.

<sup>22</sup> Thimaatoos taysate shedadhenkaar gon hama eedi kinin dohon, pir naasibee imbabee kinka kenin waadadhendettsi, kidi imbesana kinka Barjosa dhacchintan upsinam giyaate kinin waadadhonam yedi dheseeda dhese. <sup>23</sup> Ta keeda inno yerro hardar konin yeskonam inin qansonsa budonte Thimaatoosam saana yedar yittsana bhocchi ida haye. <sup>24</sup> Taar inta imal yekal saana inin nivoadettsi Imbaa wontea Yesus haya ki haye ida hame.

<sup>25</sup> Ko dahaannaar iam kinin kelshoadettsi yenin yittsaa Ebhapirooditos, isa imbanas maataabee imbesana kinka Kiristoosna banqin kanseabeam yekal maasate yittsa ko iam zaske hamayse inta bhocchidine. <sup>26</sup> Yedar kiam yittsana inin zagoono yeam shedana kinin anngardhonnabee yedi pir kisa hajadhidinam yenin qanson goynka kidi kattsi kinin qaabonnabene. <sup>27</sup> Kidi gon hajadhayse diyana yeskidine. Ko dahaannaar Barjo kina burqadhadhayse kiam ki pacchade; kibisheana dayma, pir ogo galshen qaabondar qaabe ab idar yeskoamadettsi ki hayade. <sup>28</sup> Ogonante kiam pir yenin shedenka yenin wozadhoodettsibee isa qaabon tokoadettsibe yedar kiam yittsana kattsi i zagade. <sup>29</sup> Keeda gebhi wozadhaate Imbaa wontea Yesus goynna hamayse kiam tiyee; kidettsi dahaana eenamaar gobshee. <sup>30</sup> Harrna hambhidianna, yedi ikal nivayse iam kelshana yenin damaamonam kidi waadadhota sadan yinnonam anngardhima Kiristoossa waadimanna hamayse dembhina ki yeskisade.

### 3

#### *Gonin Hammo Tipamono*

<sup>1</sup> Macchindar, imbananato, Imbaa wontea Yesuska wozadhee. Kosa birayse yena inin thaaponam tapir yena thaapana iam tottsehe; pir yeam dhaddhiserra toolana damasane. <sup>2</sup> Qaskidettsi maataana, siyon hayyna, zaskaama goytika eensa bishinam taxayna eenakalanka mete yesaam gishee. <sup>3</sup> Wodi Barjosa Manpasinka goodimayna, wosa waandar keedhimayse dayma, Yesus Kiristooska erimayna wonin dohonna, gonin hamon qaamanam taxadhaana wodine. <sup>4</sup> Intaar waandar inin keedhimayno yer isa daane; waani eneo waan yinnondar konin keedhimea yer kona maataakaar inta kodara sagayda sage. <sup>5</sup> I adhadhaysaka lankaysoa rooroaka isa qaamanam ko taxadhade; inta Biiniam muldhara dahaa Israveel eedine; pir gon hama Ibra eedine.\* Muse yigginam toldhen goyn ko hannaar, inta Parisa eedine. <sup>6</sup> Barjo goynka woogimbhea i hanna, Yesusdar woylamin qajaynaam ida oyte; Muse yigginam toolintaka haapadhayno tipamon goynka ko daana, inta siyamoysa qolma eedine.

<sup>7</sup> Ko dahaannaar kosa birayse ina pootayna yerra wulam Kiristoosna hamayse pootimadettsi hayayse i paydade. <sup>8</sup> Ogora sagi isa Imbaa Yesus Kiristoosam dhesintano yer wuldara kattsi konin sagenna, waani yerin wulam pootima yerdettsi koam ida payde. Kina hamayse yer wulam i kaysade; Kiristoosam haapano yer wulam hargedettsi ida payde. <sup>9</sup> Ogoam inin hayaynoar Muse yigginam toolintaka inin haapen tipamonam dayma, Kiristoosdar woylamin qajintaka haapadhen tipamonam haapayse Kiristoosbesana kalaa maatanane. Tipamon ogoam Barjo kidar woylamin qajayna eenana kida ime. <sup>10</sup> Kiristoosbee kisa dembhira dhaabhidinsa kantanbeam dhesana, kisa gaalenkaar kimbesana kinka kashimanabee kisa dembhinkaar kidettsi maatanabe ida zage. <sup>11</sup> Ogona inta diyaanayn dembhira dhaabhdendar inin yeskoadettsine.

#### *Macchindar Yeskana Gobinta*

<sup>12</sup> “Ko wulam inta haapidine” way “Ogo wulka gonin ea i maatade” hamattine. Ko dahaannaar Yesus Kiristoos iam yinti eedi hayayse kinin bhocchonam yedana os birandar ida gobe. <sup>13-14</sup> Imbananato, inta akar ogodar yeskidine hamayse paydattine. Ko dahaannaar yer kalaa ida haye: Isa budonte dohonam walaate, isa birante dohon

\* <sup>3:5</sup> “Gon hama Ibra ea” haminta Israveel eensa gilon wulam tooleane hamintane.

bazanam tiyana wocchimbhayse ida gobe. Ogoro inin tiyayno bazano Barjo Yesus Kiristooska tura cecindar eelayse ina kinin imayno gonin hamon sadanone.

<sup>15</sup> Keeda Kiristooska gebhaana wodi wul koam wo bhoccche. Yer ab bhoccchayna ye hanna, Barjo ogoamaar yena may hayasane. <sup>16</sup> Yin ko dahaakaar ta wonin yeskon dayntanka kiaddha maatoono wosa dayntano ko dee.

<sup>17</sup> Imbanaanato, inin hayendettsi hayayna eena maatee; wosa kamsinka yivayna wulam payya hayayse shedee. <sup>18</sup> Harrna hambhidianna, kosa birayse thoothi woda yena inin giyaadettsibee ta ermitka eepite yena inin giyendettsibe, thoothino eeno yisa yivintanka Kiristoos masqalinsa banqi eed ko maatade. <sup>19</sup> Kesa macchino kayene; kesa barjoa iine; kesa gobshino ooshimbhekane; kesa qaabono peen yerindarne. <sup>20</sup> Wonno peeno ko hanna cecintene. Ogoro nivea woam Dhacchea Imbaa wontea Yesus Kiristoosam anngarmaka woda toole. <sup>21</sup> Kidi yer wulam yisa hayamon demente hayana damisen kantaka ooshimbhe yindar dohon wosa bishinam ookayse, yisa gobshinsa bishi konin maatoadettsi kida haye.

## 4

### *Macchino Kiilimeno*

<sup>1</sup> Keeda inin nashaynabee kattsi inin bhoccaynabe imbanaanato, pir ininka wozadhaynabee isa waadimansa aapi maataanabe, yedi Imbaa wontea Yesuska wocchimbhayse woyee.

<sup>2</sup> Ewodiabee Sinthikibe kinka kinka Imbaa wontea Yesuska agayse kenin doadettsi keam ida miske. <sup>3</sup> Yaar gonin ea, imbesana kinka waadadhea imbanaasa, iginmaanaam hanin kelshoadettsi ida miske. Kedi imbesana waadadhaana Qeleminthoosbee waani eenabesana kinka maatayse Barjosa dhacchintan upsinam eenna yeskisana kedi mashimidine. Ke wulsa naabenaam dayntan mathaapinte thaapadhidine.

<sup>4</sup> Roro wul Imbaa wontea Yesuska wozadhee. Pir yena ida giye: Wozadhee! <sup>5</sup> Yesa lemmakknam rooro wul eedi wulna dhehee. Imbaa wontea Yesussa maatate nivano saanidine. <sup>6</sup> Yer wulka Barjoam gobshika miskaate yesa oysimenam kina dhettsisee. Yer kalaaka hattear qaabite gaaleebhode. <sup>7</sup> Eedisa bhocchi wulra sagi maatoono Barjosa payyamono yesa woylaminbee yesa qaabonbeam Yesus Kiristooska koda toole.

<sup>8</sup> Macchinte, imbanaanato, gonbee, gobshibee, tipabee, gazabee, nashadheabbee, shawkadheabbeam bhoccbee; kattsi payya way gobshadhyayno ko hanna, igin wulam maasite maasite bhoccbee. <sup>9</sup> Ikala yenin timmirionbee yenin tiyonbe, ogonoar inin giyenka yenin qansonbee inin hayenka yenin haaponbeam hayee. Payyammon Barjaa yembesana kida dee.

### *Bhawloos Kina Nittsadhon Imintonna Kinin Gobshoono*

<sup>10</sup> Thoothi wodansa budonte tapir isa gaalen goynka yenin bhocchonna, Imbaa wontea Yesuska kattsi ida wozadhe. Ta koka yekka yenin qaabonam waadimaka dhaana goyt payya haapeetene; isa gaalenna qaabite ye dahade. <sup>11</sup> Pir ogoam inin giyayno isa dayntanna zaskayno qolmakatehe. Harrna hambhidianna, "Isa dayntano ina yekka ko yeeke" hambhenam inta timmiridine. <sup>12</sup> Bashadhintanam ko dahaannaar, thoothika haapintanam ko dahaannaar, dhesayda dhese. Raq hamote ko hannaar, hamaa wodakaar mishintabee, daaqardhintabee, haapintabee, kaysintabeam inta dhesidine. <sup>13</sup> Kantanam ina imea Kiristooska yer wulam damayda dame.

<sup>14</sup> Ko dahaannaar isa gaalenam imbesana kinka kashimayna yenin maatonna, payya ye hayade. <sup>15</sup> Ogonoar Barjosa dhacchintan upsinam yesa shaarinte giyan inin yedenka, Moqodoonia peera inin uten wodanka, ye Pilbhisoo gidir dahaana eena yesa misken oonira ab ina koymon imintakabeee tiyntakabeee iam kelshaa misken ooni qolmonam yedi dheseeda dhese. <sup>16</sup> Teselonqe katamante inin dohonka, ina zaskenam lamaa goyt yedi nittsidine. <sup>17</sup> Yesa imintonam anngardhayse dayma, yesa imintonsa

aapino kalon yena konin thoothoadettsi anngardhayse ida giye. <sup>18</sup> Iam zaskenbee iam zaskenbesa bhaabar hamon ina yenin yittson imintonam Ebhapirooditoskalanka inta tiydine. Ogono imintono Barjoyn tiyayse kanka wozadhen payya gaamen shittonka thoothon marshandettsine. <sup>19</sup> Isa Barjoa yisa gobshinka dohon thoothin wodimmakkorra Yesus Kiristooska yena zasken wulam kida ime. <sup>20</sup> Wosa Imbaa Barjona rooro wul lay gobshi kina ko dee; amiin.

*Macchin Nagaymakkono*

<sup>21</sup> Yesus Kiristooska dahaana gazana eena wulna “Nagaya” hamee. Imbesana kinka dahaana imbanaana yena “Nagaya” keda hame. <sup>22</sup> Gazana eena wulbee kattsika Roome peen bitaasa waadiman eenabe yena “Nagaya” keda hame.

<sup>23</sup> Imbaa wontea Yesus Kiristoossa sunin imintono yembesana ko dee.

## Kiristoos Yisa Tarjamonnante Kinin Yittsaa Bhawloos Qolasias Eenana Kinin Thaapoono Warqanno

### *Ardinta*

Bhawloos Roome peente dhaxadhayse ko warqatinam Qolasias eenana ki thaapade (1:24; 4:18). Kinin thaapoonoar 52-54 levensa iintene. Bhawloos yinti Qolasias misken ooninam woysadehe. Epsoon gidir woda gebhina dooqayse yinin waadadhenka kimbesana kinka waadadhayna eenasa kalaa Qolasiasdar yivayse Kiristoossa giyama garadehe. Ebhapira hambhea ea Qolasias peen eedi dahayse Bhawloosbesana kinka waadadhite ki dahade. Bhawloos Qolasias eena Ebhapirakalanka Barjosa dhacchintan upsinam kenin qansonbee Manpas Gazanka kinka kesa dohon nashimmakkon goynsa Ebhapirayn giyonbeam ki thaapade (1:7-8).

Qolasias Epsoon katamandettsi thoothi eedin dahaa, kattsi dhesadhaa katamatehe. Laykis baynsa aponte ko dahade. Lodoqiabee Yiraapolis katamanbe Qolasiaskal theedine.

Thoothino eeno naggadanba Qolasias katamanka hayayse koda sage. Ogote siya maata upsibee waana waana hama timmiribe koda giidhe. Ogonante Bhawloos Kiristoos hay kinin dohonsa thoothi kena thaapidine (1:14-20); Kiristoosin kena kashon bazanbee, Barjodar woylamin qajaa easa dayntanbesa, pir buudan timmirinkalanka mete yisaam kenin gishoadettsi ki guyade (2:6-3:4). Qolasias gidir dohoono buudan timmirino eeno Barjodar woylamin qajintaka dayma yigginka entsadhadayse konin vivoadettsi guyada Kiristoosbee kisa waadimanbeam koda toskise. Qolasias gidir yitsadhon warqatinsa aapino “Kiristoos yer wulka bira kinin doadettsine” hamaynone (1:18).

Kaa mathaapaam raq lankaydar kashana dandima ko dandime:

1. Nagaymakkono (1:1-2)
2. Barjoam gobshadroono (1:3-8)
3. Qolasias eenana miskadhoono (1:9-14)
4. Kiristoossa yer wuldara bhaabar daydino (1:15-23)
5. Bhawloos Barjo eenana kinin anngardhoono (1:24-2:5)
6. Bhawloos Barjo eenam kinin kiiloono (2:6-4:6)
7. Bhawloosin Qolasiasdar yittsaana eena goyno (4:7-9)
8. Macchin nagaymakkono (4:10-18)

Qolasias eenana thaapadhon warqatinbee Epsoon eenana thaapadhon warqatinbe kiam kamea ko hannaar, Epsoon eenana thaapadhoono warqatino misken ooninsa dayntanam konin giyenka, Qolasias eenana thaapadhoono warqatino Kiristoossa gebhamonam koda giye. Kiristoossa gebhamonam giyayna ranqa gembha 1:12-23bee 2:6-3:4bedarne. Bhawloos Kiristoos yer wulsa bhaabar kinin dohonam kida dhee:

1. Kiristoos Barjobesana dohon theedamon goynka yer wulsa bhaabarne;
2. Kiristoos pijadhinbesana dohon theedamon goynka yer wulsa bhaabarne;
3. Kiristoos misken ooninbesana dohon theedamon goynka yer wulsa bhaabarne;
4. Kiristoos zombhin laalidinka pijadhin wulam Barjobesana kinin qaashison goynka yer wulsa bhaabarne.

Ogora Bhawloos kesa buudan timmirinsa kinin giyayno Kiristoossa gembhakonam wo walidianna, wosa sadano konin gemmenam kida bhocchise.

Macchinte wosa haalin daytanna haali entsa konin zaskenam Bhawloos kida bhocchise (3:5-17). Kiristoossa upsinin thoothi yisa iinte dahaa ea kidi haali dayntanam kida dhee. Ogono haalin dayntano zelen eenbesana wosa dohon theedamonka koda

haapadhe (3:18–4:1). Ogona Kiristoosam wosa timmirinka bish dayma, wosa dayntan wulka bira maasa woam koda zaske.

<sup>1</sup> Barjo bhocchinka Jesus Kiristoos yisa tarjamonnante kinin yittsaa i Bhawloosbee wosa imbanasa Thimaatoosbekalanka <sup>2</sup> Qolias gidir daahaana Kiristooska gazabee gonin hamma wombanaanabena nittsadhoono warqannone. Wosa Imbaa Barjosa sunin imintonbee payyamonbe yena ko dee.

### *Bhawloos Qolias Eenana Barjoam Gobshayse Kinin Miskoono*

<sup>3</sup> Yena Barjoam wonin miskenka, wosa Imbaa Yesus Kiristoossa Imba daahaa Barjoam rooro wul woda gobshe. <sup>4</sup> Harrna hambidianna, Yesus Kiristoosdar woylamin yenin qajenbee Barjo eena wulna yesa dohon nashimmakkonbeam wodi qansidine. <sup>5</sup> Gonin hammo Barjosa dhacchintan upsino birayse yekal ko yeskaysaka Kiristooskal dohon qaabe haydhenam yedi qansidine. Ogoro woylem yindar haydhayno cecinte ashkadhaysaka yeamaar toolaynone. <sup>6</sup> Barjosa dhacchintan upsinam qansayse kisa sunin imintonsa goninam bhocchaate yenin dheson wodara yedayse, ogoro Barjosa dhacchintan upsino yennon shaarinte konin dahaadettsi yin pir peen wuldar aapi ushaate gebhaate ko dahade. <sup>7</sup> Ogo Barjosa dhacchintan upsinam wombesana kinka Barjosa waadima eedi maataa nashadhaa Ebhapirakalanka yedi qansidine; kidiar eedi gon hama Kiristoosna wonnon oolonte\* waadadhea eedine. <sup>8</sup> Pir Manpas Gazanka yesa dohon nashimmakkonam kidi wona giydine.

<sup>9</sup> Wodi ogoam wonin qansaa rooroara yedayse yedi Manpas Gazansa pakalmakkonabee qaabon wulbeka Barjosa bhocchinam thoothi yenin dhesoadettsi yena Barjoam miskintanam garootone. <sup>10</sup> Yin ko daahaakaar Imba Yesusna zaskaa goyteaka da-haate yer wulka Barjoam yeda wozise; payyan waadiman wulam waadadhintaka aapi ushaate Barjoam dhesintonka gebhada yenin vivoadettsi woda miske. <sup>11</sup> Barjo yisa gebhon kantanka wocchimben wulam yena ki ime. Darshintanka yer wulam damana ashkimbaana maatee. <sup>12</sup> Pir shaakan bitamon raqinte Barjo eenabesana kinka yenin kashimoedettsi yeam dandisea Barjo Imbaam wozaka gobshee. <sup>13</sup> Barjo woam thipan wottsira dhacchayse, nashadhaa yisa Naasasa bitamon raqinte woam ki arsade. <sup>14</sup> Barjo Naasa wosa seesonsa baza kashadhea kinin maatonna, wosa seesonsa garintonam wo haapade.

### *Kiristoos Yer Wuldara Sagi Kinin Maatoonno*

<sup>15</sup> Barjo Naasa haapadhma Barjosa gon hama kamsine; kidiar pijadhin wulsa bhaabar hama biraane. <sup>16</sup> Harrna hambidianna, peendar dohonbee cecindar dohonbe, haapadhenbee haapadhimonbe, cecinte kantaysa daaanabee wottsaynabe, binnabee hayonabe, yerra wulin pijadhoono kankane. Yer wulam Barjoyn pijoono kankabee kinabene. <sup>17</sup> Kidiar yer wulsa birayse ki dahade; yer wul yedimayse konin woyoono kankane.

<sup>18</sup> Kiristoos yisa bishi maaton misken ooninsa metene; koam woysaa kidine. Yer wulka bira kinin doadettsi dembhira dhaabhintakaar biraane. <sup>19</sup> Ogonoar yin konin dohoono Barjo yisa Naasaka kisa dayntano wul konin haapadhoodettsi Barjo Imbasqaabe konin maatonnane. <sup>20</sup> Barjo Kiristooska cecinbee peenbedar dohon yer wulam yikal ki qaashinsade; Kiristoos masqalindar kinin laalon zombhin goynka Barjo payyamonam ki hayade.

<sup>21</sup> Ena birayse Barjokalanka pegadhayse ye dahade; yesa qaabonbee yesa siyon waadimanbeka yedi Barjosa banqi eedine. <sup>22</sup> Keeda yisa Naasasa waan dembhinka Barjo yeam yimbesana kinka qaashinsidin; ogoam yin kinin hayoono gazanabee seeso yindar qolminabe maasayse yisa birante yeam woysanane. <sup>23</sup> Ogonoar yin konin

\* 1:7 “Wonnon oolonte” hamayno waani waani mathaapinasa iir “yennon oolonte” koda hame.

maatoono payya hayayse yenin woyenkabee Barjosa dhacchintan upsinam qansayse "Tiyooda tiye" hamayse woylamin yenin hayora jugimima Barjodar woylamin yenin qajenka wocchimbhayse yenin dehenkabene. Kono upsin cecinsa choobar dohon pijadhin wulna giidhoonone. Inta Bhawloosaar Barjosa dhacchintan upsinwaadima eedine.

### *Bhawloos Kiristoosin Yittsaa Maatayse Kinin Waadadhoono*

<sup>24</sup> Ta yena inin tiyen gaalenka ida wozadhe; kisa bishi maaton misken ooninna Kiristoosin tiyon gaalenam idar tiyayse ida thoose. <sup>25</sup> Barjo upsin wulam joshkima yena inin giyoadettsi Barjo ina kinin imon hayamonka misken ooninna waadadhea i maatade.

<sup>26</sup> Ogono Barjosa upsin ena wodara yedayse eedi naasina aachimayse dohoono, ta Barjo yisa eenana may kinin dhohoono aachin upsinone. <sup>27</sup> Ogo aachin upsinsa gobshinbee wodimmakkonbe peendar dohon zarsin wulsa shaarinte hamin gebhi konin dohonam Barjo yisa eenna dhettsana ki zagade. Ogo aachin upsinka Kiristoos yesa iinte kinin dohonna, "Barjosa gobshinam woda kashime" hamayse qaabe hayayse yeda toole. <sup>28</sup> Een wulam Kiristooska gebhaana maasayse Barjo birante keam woysota pakalmakko wulka eedi wulam kiiladabee dhettsadabe Kiristoossa woda giye. <sup>29</sup> Barjo yisa gebhon kantanka isa iinte kinin waadadhenna, ogo kisa kantanka dhalqin koam thoosana gebhi mashimaate ida qajadhe.

## 2

<sup>1</sup> Yembee, Lodoqia katamante daahaana eenabee, iam haapaamma eena wulbena hamaaka yekka mashimaate inin dohonam yenin dhesoadettsi ida nashe. <sup>2</sup> Inin mashimaynoar kesa woylammo wocchimbhayse, nashimmakkokaar kinka dhaximbhayse, gonin wulam bhocchaate wodimbhaana maatayse kenin doadettsine. Ogoka Barjosa aachi upsi maataa Kiristoosam kenin dhesoadettsine. <sup>3</sup> Pakalmakkonbee dhesintonbesa wodimmakkono wul aachimayse konin dohoono Kiristooskalne. <sup>4</sup> Hayyear taysen dhalqinka yeam kinin dhaddhisoamadettsi yena ida giye. <sup>5</sup> Yekala waanka i edimaakaar manpasinka yembesana kinka i dahade; payya goytika yesa dayntanbee Kiristoosdar woylamin yenin qajonka wocchimbhayse yenin woyonbeam inin shedenka kattsi wozadhite i dahade.

### *Kiristooska HaapadHayno Dayntano*

<sup>6</sup> Ta keeda Imbaa wontea Yesus Kiristoosam yenin tiyondettsi kanka dehee. <sup>7</sup> Caaci yittsayse kanka wocchimbhee; yeam dhettsadondettsi kidar woylamin yenin qajonka wocchimbhayse woyee; Barjona kattsi gebhi gobshi imaate dehee.

<sup>8</sup> Kiristoossa timmirindettsi dayma, eenin bulon gilondettsibee peen kodar dohon yiggindettsibe, sun shidhen dhalqinka hayyear yeam taysayse yidar kinin maasoamadettsi mete yesaam gishee. <sup>9</sup> Harrna hambhidiana, Kiristooska Barjosa dayntano wul joogima waanka koda haapadhe. <sup>10</sup> Yediar joogaamon sadanam yenin haapoono Kiristooskane; kidiar wottsinbee hayamon wulbesa meteane.

<sup>11</sup> Yedi Kiristooska qaamanam ye taxadhade. Ogono yenin qaaman taxadhoo no yesa waansa seeson dayntanam yedara marana Kiristooska haydhoonone; eedi aanka haydhoonotehe. <sup>12</sup> Yesa shiidhimenka kimbesana kinka ye duukadhade; pir dembhira Kiristoosam dhaasaa Barjosa kantan waadimanam gonne hamayse yenin tiyenka kimbesana kinka yedi dhaabhidine. <sup>13</sup> Yedi seeson waadadhaynabee Ayiwdtay hamma Muse yigginam tooliminabe yenin maaton goynka diyaana ye daaka, Barjo Kiristoosbesana dembhira dhaasayse yena sadanam ki imade; wosa seeson wulamaar wona ki garade. <sup>14</sup> Barjo woam bersen Muse yigginika wodar dohon bazansa thaapin warqatinam ki shiishade. Kidiar masqalindar konngayse ogoam ki marade. <sup>15</sup> Kiristoos

masqalindar diyntaka wottsaynabee hayamoynsa daaanabeam bashayse kenin dhaximbhon banqin koymonam yinin bulonsa budonte, uxate baadhaana maatayse may kenin haapadhadettsi keam ki hayade.

<sup>16</sup> Ta galanbee wucadhenbe way bavaalinbee, arpin gobshadhenbee, ukunsen rooroam gobshadhen goynbeka hayyear yedar ki pirdabhoode. <sup>17</sup> Igina os birante nivanna daaana yerrasa shipone; gonin haapadhayno Kiristooskane. <sup>18</sup> Buudamoka yisa metenam toskotabee Barjosa gaananana goodimota nasheabe eedi hayyear sun guuri yeam kinin shiishoamadettsi mete yesaam gishee. Ogodettsi hayea ea “Barjokalanka i haapade” hamayse yinin haapon shedintonka erimada waa bhocchika sun kida poorimbhe. <sup>19</sup> Ogodettsin hayea ea mete maataa Kiristooskalanka edimidine; mete bishin wulam jiinika kidar yettsada hayaye kunseane. Barjo bishin wulam kinin gettsayno ogokane.

### *Dhaddhisen Timmirinkalanka Mete Gishinta*

<sup>20-21</sup> Kiristoosbesana diyayse peen kodar dohon yigginkalanka edimaana ye daana, ta peen kodar dehen eendettsi maatayse “Yedaabhode; lavaabhode; kaamaabhode” hamayna upsinana harrnee ee hame? <sup>22</sup> Igina wul eedin bulaa sharqabee timmiribedar woyaa kinin dohonna, waadimadar yinin haaqonsa budonte kaysana ashkadhaanane. <sup>23</sup> Igina upsina Barjosa gaananana goodimintabee, buudamoka meten yisaam toskintabee, yisa waanam gancisintabeka pakalmakko yisa daaana keda maate; ko daaannaar waansa anngarmanam marana damehe, poota pootiminane.

## 3

### *Kiristooska Haapadhayno Hallo Sadano*

<sup>1</sup> Keeda Kiristoosbesana kinka dembhira ye dhaabhidianna, Kiristoos Barjo Imbaasa mizaqinte dooqayse kinin dohon bhaa cecinte dohonam kattsi anngardhee. <sup>2</sup> Bhaa cecinte dohonam qaabee; peendar dohonam qaabeebhode. <sup>3</sup> Harrna hambhidianna, yedi diydine; sadan yennonamaar Kiristoosbesana Barjokal ko wodadhade. <sup>4</sup> Yesa sada maataa Kiristoosin haapadhen wodanka, yediar kimbesana kinka gobshinka yeda haapadhe.

### *Gecchoa Eabee Haalia Eabesa Sadano*

<sup>5</sup> Ta yesa iinte dohon peen kosa anngarman wulam deesee; iginaar sharmucimakkobee, minngamobee, sharmucimakko waadima zagabee, siya yeram anngardhintabee, “Yer wul inti ko dee” hamintabene. “Yer wul inti ko dee” hamea kidi aaninka ashkadhaana barjonana goodimea eadettsine. <sup>6</sup> Yerra igina goynka Barjosa wacimeno ee hamimina eenadar niva ko nive. <sup>7</sup> Yediar ena birayse ee hamimina eenasa shaarinte yenin dehenka, yerra iginaam hayaate ye dahade.

<sup>8</sup> Keeda yedi wacimebee, dhagabee, gadimmakkobee, iirimebee, ooshinsea dhalqbe, igina wulam yekalanka kaysee. <sup>9</sup> Kinka kikal buudimeebhode; harrna hambhidianna, gecchoa eam kisa waadimanbesana yekalanka kiam yedi kaysidine. <sup>10</sup> Yedi haalia eam qaadhidine; kidi yiam pijaa Barjo kamsi kinin maatoadettsi dhesintonka haalimbhada yiveane.

<sup>11</sup> Ogoka Girik eedibee Ayiwd eedibe, qaamaysa taxadhaabee taxadhaamabe, gilon dhesaabee gilon dhesaamabe, worshobee worshotay hamabesa shaarinte edime qolehe. Kiristoos bishne yer wulka dahaa.

<sup>12</sup> Ta keeda Barjoyn kamaana gazana eenabee nashadhaanabe yenin maatonna, eedina burqadhintabee, lemmakkobee, mete toskintabee, payyamobee, payya eedi maatintabee, darshintabeam qaadhee. <sup>13</sup> Kinka kina kina darshee; yenin kinka gemmaa yer daaanna kinka kina garee. Imbaa wontea Yesus yena garaadettsi, yediar pir yin kinka kina garee. <sup>14</sup> Igina wulsa bhaabar macchi keam kidar kala

hayayse dhaxana damea nashimmakkoam qaadhee. <sup>15</sup> Kiristoossa payyamono yesa woylaminam ko shane; harrna hambhidianna, yeam eldhoono waa kalaa maatayse payyamoka yenin doadettsine. Barjoamaar gobshayna maatee. <sup>16</sup> Kiristoossa upsino yesa woylaminte thoothi ko dee; pakalmakkon wulka kinka kiam kiam dhettsaate kiilee; tapir mazmurbee, Manpas Gazan yena imen upsinbeka zammaraate Barjoam yesa woylamin wulka walshee. <sup>17</sup> Barjo Imbaam Yesuska gobshada, yesa dhalqinbee yesa waadiman wulbeam Imbaa wontea Yesussa naabenka hayee.

### *Barjodar Woylamin Qajayna Oonin Eenasa Dayntano*

<sup>18</sup> Yedi maanato, Imbaa wontea Yesuska yeam zaskendettsi yesa annginana ee hamee. <sup>19</sup> Yedi annginato, yesa maanaam nashee; kena burqadhimina maateebhode. <sup>20</sup> Yedi naanato, yer wulka yesa imbanabee indanabena ee hamee; ogono Imbaa wontea Yesuska Barjoam wozisaynone. <sup>21</sup> Yedi imbanato, kesa wozan kayoamadettsi yesa naanaam dhagattseebhode. <sup>22</sup> Yedi worshonato, eediam wozisana eedina haapadhota dayma, woylam wulka Imbaa wontea Yesusam kurtumbhada yeam wottsayna eenana yer wulka kena ee hamee. <sup>23</sup> Eedina dayma, Imbaa wontea Yesusna hamayse yenin hayen yer wulam yesa dohon woylamin wulka hayee. <sup>24</sup> Cecinte dohon “imayda ime” kinin hamon imintonam Imbaa wontea Yesuskalanka yenin tiyenam dheseeda dhese. Yenin waadadhadyno yesa Imbaa Kiristoosnane. <sup>25</sup> Siyon waadadhear siyon yinin waadadhonsa bazanam kida tiye; Barjo eedisa woti shedayse waadadhehe.

## 4

<sup>1</sup> Yedi wottsaynato, yedi pir cecinte yeam wottseayn dohonam dheseeda dhese; ogonante worshona yennaam tipamoka edima wottsee.

### *Bhawloossa Kiilimeno*

<sup>2</sup> Rooro wul wocchimbhayse Barjoam gobshaate garma miskee. <sup>3</sup> Inta inin dhax-adhoono Kiristoossa aachin dhalqinam inin giyonnanee. Ogona pir Kiristoossa aachin dhalqinam wonin giyoadettsi Barjo wona goyti ki bule miskee. <sup>4</sup> Intaar iam zaskaadettsi may i giye ina Barjoam miskee.

<sup>5</sup> Yenin damen payyan waadiman wulam waadadhada, Barjodar woylamin qajimina shaarinte pakalmakkoka dehee. <sup>6</sup> Eedi kalaa kalaanana hamin malsi maasa yeam zaskenam yenin dhesoadettsi, yesa dhalqino rooro wul eedina agea daatha ko dee.

<sup>7</sup> Nashadhaa imbanasabee, eedi gon hama waadima eedibee, imbesana kinka Imbaa wontea Yesussa waadima eedibe maataa Tikiqoos isa dayntan wulam yena giya ki giye.

<sup>8</sup> Kiamaar yekal inin yittsoono wonnon goynsa yena kinin giyoadettsibee yeam kinin wocchinsoadettsibene. <sup>9</sup> Kimbesana kinka peen yennon eedi maataa, eedi gon hamaa, nashadhaa imbanasa Anasmosam yekal inta yittsidine. Kedi raqin kote dohon yerin wulam yena giya ke giye.

### *Macchin Nagaymakkono*

<sup>10</sup> Imbesana kinka dhaxadhaa Aristhirokoos yena “Nagaya” kida hame. Barnabaassa aaraka naasa Marquoosaar yena “Nagaya” kida hame; yekal nividi ki hanna, kiam yenin tiyoadettsi yedar eedi abka apo wo yittsade. <sup>11</sup> Iyosthos hambhea Iyaaso yena “Nagaya” kida hame. Ayiwd eensa shaarira Barjo bitamonna imbesana kinka waadadhyna igina bishne; iamaar kedi wocchinsidine.

<sup>12</sup> Peen yennon eedi maataa Yesus Kiristoossa waadiman ea Ebhapira yena “Nagaya” kida hame. Barjosa bhocchin wulam hayada kidar woylamin yesa qajidinka wocchimbhaate yenin woyoadettsi kidi rooro wul yena Barjoam miskada kida qajadhe.

<sup>13</sup> Yennon goynka, pir Lodoqiabee Yiraapolis katamante dahaana eenabe goynka kattsi kinin qajadhenam inta kina ida tarje.

<sup>14</sup> Nashadhaa akkimea Luqaasbee Deemaasbe “Nagaya” yena keda hame.

<sup>15</sup> Lodoqia katamante dahaana imbanaanabee, Nimpabee,\* kosa ooninte bukayna Barjodar woylamin qajaynabena “Nagaya” wona kena hamee.

<sup>16</sup> Warqatin koam yena nabbabadhonsa budonte, Lodoqia katamante dohon misken ooninte pir nabbabadhoadettsi hayee; ogora yediar Lodoqia eenana inin thaaponam kekala tiyayse nabbabee.

<sup>17</sup> Arkibhaasnaar “Imbaa wontea Yesusbar hanin tiyon waadimanam hanin macchoadettsi mete hasaam gishaa!” kina hamee.

<sup>18</sup> Nagaymakkon koam isa aaninka thaapaa inta Bhawloosne. Inin dhaxadhonam bhocchee. Barjosa sunin imintono yembesana ko dee.

---

\* <sup>4:15</sup> “Nimpabee” hamenam waani waani mathaapinasa iir “Nimpisbee” koda hame.

## Kiristoos Yisa Tarjamonnante Kinin Yittsaa Bhawloos Teselonqe Eenana Kinin Thaapoono Birono Warqanno

### *Ardinta*

Bhawloos Barjosa upsinam raq waana waanar yeskisota kinin yiven lansonka, Teselonqe kataman ki yeskade. Teselonqe Moqodoonia peensa katamano gembhone. Bhawloosbesana Sillaasbee Thimaatoosbe ke dahade. Keam birayse eeno payyamoka ko tiyade. Budobar Ayiwd eensa waani waani eena woogintaka kedar ke dhaabhade. “ ‘Yesus hambhea ab bit daane’ haamaate Roome bitaasa upsinam keda jibbe” hamayse keam ke bersade. Ogo wodanka Bhawloosbeam Teselonqe katamara ke oytadhade.

Bhawloos Teselonqera ki yivaysaka, Teselonqer dahaana Barjodar woylamin qajaana eenadar oytaydha ko yeskade. Bhawloos Qorontoos kataman kinin yeskonsa budonte, kaa warqataam ki thaapade. Yivayse keam shedana yi anngardhaakaar, shedana damadehe (2:17-18). Thimaatoos keam shadayse Barjodar woylamin kesa qajidino wocchi konin dohonam Bhawloosna kinin giyenka, Bhawloos Barjoam ki gobshade (3:6-10).

Haalin Mallante haapadhayna warqatinasa Bhawloosin birayse thaapaa Bira Teselonqene. Ogono 42-43 levensa iinte konin thaapadhaa hayayse koda qaabadhe. Kaa warqatasra iinte Bhawloos macchin wodansa, kattsika Yesussa lansi maatate nivansa ki thaapade. Barjodar woylamin qajaana eena Kiristoossa nivintanam qaabe hayayse kinin toolenka kesa dayntanbee, bhocchinbee, waadimanbeka haapadha keam konin zaskenam thaapidine.

Kaa mathaapaam raq dongdar kashana dandima ko dandime:

1. Nagaymakkono (1:1)
2. Gobshino (1:2-10)
3. Bhawloossa waadimano (2:1-3:13)
4. Barjodar woylamin qajaana eenasa dayntano (4:1-5:24)
5. Macchin nagaymakkono (5:25-28)

<sup>1</sup> Barjo Imbaabee Imbaa wontea Yesus Kiristoosbesa eeda maataana Teselonqe misken ooninte dahaana eenana, i Bhawloosbee, Sillaasbee, Thimaatoosbekalanka nittsadhoono warqannone. Barjosa sunin imintonbee payyamonbe yena ko dee.

### *Teselonqe Eenasa Sadanbee Barjodar Woylamin Qajintanbe*

<sup>2</sup> Roro wul Barjoam wonin miskenka yeam bhocchada Barjoam woda gobshe.

<sup>3</sup> Barjodar woylamin yenin qajenka hamin yenin waadadhenbee, yesa nashim-makkonka hamin yenin qajadhenbee, Imbaa wontea Yesus Kiristooska yesa qaabe haydino kattsi wocchimbhoono konin doadettsibe, Imbaa wontea Barjosa birante garma woda bhocche.

<sup>4</sup> Barjoyn nashayna imbanaanato, Barjo yeam kinin kamonam dhesooda dhese.

<sup>5</sup> Harrna hambhidianna, yena wonin giyayno Barjosa dhacchintan upsino apoka bish dayma Barjosa kantanbee, Manpas Gazanbee, qothime qolma tipamobeka ko nivade. Yekal wonin dohon wodanka, yena hamayse hamin wonin dohonam dheseeda dhese.

<sup>6</sup> Yedi Barjosa upsinam thoothi gaaleka, Manpas Gazankala haapadhen wozanka yenin tiyonna, wombee Imbaa wontea Yesusbearm maatayna eena ye maatade. <sup>7</sup> Ogonante Moqodoonia peenbee Akaya peentebe dahaana Barjodar woylamin qajayna wulna payya kamsi ye maatade. <sup>8</sup> Imbaa wontea Yesus goynsa giyayno upsino yekalanka utayse konin qansimoono Moqodoonia peenbee Akaya peentebe bish dayma, Barjodar woylamin yenin qajoono raq wulir dhesimidine; ogona yerin ogosa yer kalaar giya

woam zaskehe. <sup>9</sup> Harrna hambhidianna, yekal wonin nivon wodanka hamin woam yenin tiyonam, pir aaninka ashkadhaana barjonana goodiman garayse sadanka dehea, gonin hama Barjodar hamin yenin maatonam kedi yinti yennon goynsa keda tarje. <sup>10</sup> Tapir Barjo dembhira kiam kinin dhaasaa, niven wacimera woam dhacchea, Naasa kintea Yesussa cecira nivintanam hamin yenin toolenam tarja ke tarje.

## 2

### *Bhawloos Teselonqe Gidir Kinin Waadadhoono Waadimano*

<sup>1</sup> Imbanaanato, wosa yekal nividino sun konin dhaamonam yedi yenti dheseeda dhese. <sup>2</sup> Yenin dhesendettsi Pilbhisoo katamante wonin dohonka gaalebee iirimebe wodar yeskidine. Ko dhaaannaar wonin giyoamadettsi woam mardhaakaar, Barjosa dhacchintan upsinam yena wonin giyoadettsi Barjo woam ki wocchinsade. <sup>3</sup> Harrna hambhidianna, yeam wonin kiiloono wobonbee minngimon qaabonbeka entsadhaye yeam taysanatehe. <sup>4</sup> Kalonar Barjo yisa dhacchintan upsinam wonin giyoadettsi wodar woylamin qajintaka kinin elqimaadettsi woda giye. Ogonoar wonin hayayno wosa woylaminam marmarea Barjoam wozisanane; eediam wozisanatehe. <sup>5</sup> Eediam walshintabee koymoam anngardhintabeka wonin giyaamonam yedi dheseeda dhese; Barjoar wosa tarjane. <sup>6</sup> Yekalankaar waani eenkalankaar gobshi zagootone. <sup>7</sup> Kiristoos yisa tarjamonnante kinin yittsaana wonin maatonna woam zaskenam yekalanka oysana damooda dame. Ko dhaaannaar inda yisa naasina konin burqadhendettsi, yena burqadhayna wo maatade. <sup>8</sup> Yin pir kattsi yeam wonin nashenna, Barjosa dhacchintan upsinam yena giynta bish dayma, wosa nashimmakkondara dhaabhonka wosa sadanam yena imana ashkimbhayse wo dahade.

<sup>9</sup> Imbanaanato, hamin wonin waadadhonbee wonin qajadhonbe yena bhoqa ko bhoqe. Barjosa dhacchintan upsinam yena wonin giyenka, yesa iira eedi kaladar hattear baske wonin maatoamadettsi sootinbee rooronbe waadadhaate wo dahade. <sup>10</sup> Ye Barjodar woylamin qajaynasa shaarinte wonin dehenka hamin dhaaa gazamobee, tipamobee, siya yer yindar haapadhiminabe maatayse wonin dohonsa yedi wosa tarjanane; Barjoar wosa tarjane. <sup>11</sup> Imba yisa naasina kinin hayendettsi wodiar ye wulna yesa meteka meteka wonin waadadhonam dheseeda dhese. <sup>12</sup> Yeam kiiladabee yeam wocchinsadabe, yisa bitamonbee yisa gobshinbedar yeam eelaa Barjoam wozisen goynka yenin doadettsi yena giyte wo dahade.

<sup>13</sup> Tapir yennon goynsa garma Barjoam woda gobshe. Harrna hambhidianna, wonin giyen Barjosa upsinam yenin tiyen wodanka, eedin giyendettsi dayma gon Barjosa upsindettsi hayayse ye tiyade; kodi gon Barjosa upsine. Ogo upsono Barjodar woylamin qajayna yesa iinte waadadhaynone.

<sup>14</sup> Imbanaanato, yediar Yiwda peente Yesus Kiristooska dhaana Barjosa misken on-nasa kamsinka ye yivade. Harrna hambhidianna, kedi Ayiwd eenkalanka gaale kenin tiyondettsi, yediar yesa peen eenkalanka gaale ye tiyade. <sup>15</sup> Igina Ayiwd eena Imbaa wontea Yesusbbee Barjokala qansayse eenna giyaynabeam ke deesade; woamaar ke oytayade. Kedi Barjoam wozinsiminabee een wulam jibbayna eenabene. <sup>16</sup> Ayiwdtay hamma eena ke dhaqe Barjosa upsinam kena wonin giyoamadettsi woam keda mare; ogoka seesodar seeso waadadhaate kedi yividine. Ogonante Barjosa wacimeno kedar macchi yeskidine.

### *Bhawloos Teselonqe Eenaam Pir Shedana Kinin Zagoono*

<sup>17</sup> Imbanaanato, bhocchika dayma, waaka likka wodana yekalanka wonin edimonna, yeam aapika shedana kattsi anngardhite wo dahade. <sup>18</sup> Yekal nivana wodi zagidine; inta Bhawloos yekal nivana thoothi woda i zagade; ko dhaaannaar Seethaan woam ki marade.

<sup>19</sup> Ta keeda Imbaa wontea Yesus Kiristoosin niven wodanka, kisa birante woninkay yindar qaabe hayaynabee, wozadhadhaynabee, yinka wonin erimaynabe yeditayu? <sup>20</sup> Gon yedi wosa gobshinabee wosa wozanabene.

### 3

<sup>1</sup> Ogonante keeda kaara os darshano woam konin bashonna, Atena katamante womal bish daano payya wona ko maatade. <sup>2</sup> Kiristoossa dhacchintan upsinam giyntaka wombесана kinka Barjona waadadhea imbanaasa Thimaatoosam yekal kiam wo yittsade. Kiam wonin yittsoonoar yeam kinin wocchinsoadettsibee Barjodar woylamin yenin qajenka yenin wocchimbhoadettsibene. <sup>3</sup> Pir ogo gaalenka hayyear kinin ooki-moamadettsine; Barjo ogo gaalenna woam kinin kamonam yedi yenti dheseeda dhese. <sup>4</sup> Harrna hambhidianna, yekal wonin dohonka, gaale wodar yeskenam birayse yena giyte wo dahade; yin pir gaale wodar yeskidine; ogoamaar yedi dheseeda dhese.

<sup>5</sup> Ogonante keeda kaara os darshana inin damaamonna, Barjodar woylamin yenin qajenam dhesana Thimaatoosam yedar i yittsade. Yedar kiam inin yittsoonoar “Taysayse shdedea yeam taysayse shdedi doo ki dew? Ogoka wosa waadimanoar sun konin shidhoamadettsi” hamayse inin bhocchonnane.

<sup>6</sup> Ko dahaannaar Thimaatoos taaki yekalanka wodar nivayse, Barjodar woylamin yenin qajenbee yesa nashimmakkonbesa wozisen upsinam wona ki giyade; ogodettsi yedi rooro wul wozaka woam yenin bhocchenbee wodi yeam shedana wonin anngard-hendettsi yediar woam shedana yenin anngardhenbeam wona ki giyade. <sup>7</sup> Ogona imbanaanato, gaalitebee qaabitebe wo dahaakaar, Barjodar woylamin yenin qajen goynsa yenka wo wocchimbhade. <sup>8</sup> Harrna hambhidianna, yedi Imbaa wontea Yesuska wocchimbhayse daa ye hanna, wonnon sadanna wozane. <sup>9</sup> Marrato! Yennon goynsa Barjo birante wosa dohon wozan wul goynka Barjoam hamindettsi wo gobsho? <sup>10</sup> Sootinbee rooronbe wocchimbhayse Barjoam wonin miskayno yeam shedanabee Barjodar woylamin yenin qajen goynsa joogonam thoosana wonin damoadettsibene.

<sup>11</sup> Wosa Imbaa Barjobee Imbaa wontea Yesusbe yekal wonin nivoadettsi yinti goyti wona ki ashke. <sup>12</sup> Wonin yeam nashendettsi, kinka kinkabee waani een wulbena yesa dohoono nashimmakkono konin thoothoadettsi Imbaa wontea Yesus ki haye. <sup>13</sup> Ogodettsi Imbaa wontea Yesus yisa gazana eena wulbesana kinin niven wodanka, wosa Imba maataa Barjosa birante siya yer yindar haapadhiminabee gazana eenabe maatayse yenin doadettsi yeam ki wocchinse.

### 4

#### *Barjoam Wozisayno Sadano*

<sup>1</sup> Ta keeda shidhon goynsa, imbanaanato, Barjoam wozisana hamin daa yeam konin zaskenam wokalanka yedi dhesidine; taar yenin dahayno ogodettsine. Imbaa wontea Yesussa naabenka yeam wonin miskenbee kiilenbe kalon keeda Barjoam wozisaate yenin doadettsine. <sup>2</sup> Imbaa wontea Yesussa naabenka hamin dahaa upsi yena wonin imonam yedi dheseeda dhese. <sup>3</sup> Barjosa bhocchino yenin gazimbhoadettsine; ogonoar sharmucimakkokalanka yenin pegadhoodettsine. <sup>4-5</sup> Barjoam dhesimina eena sharmucimakkonam kenin anngardhendettsi dayma, yedi wul meteka meteka yesa bishinam gazamobee gobshibeka toolayse yenin yedoadettsine. <sup>6</sup> Dhalqin ogoka eedi hayyear imbanasaam taysate ki genabhoode. Kosa birayse yena wocchinsayse wonin giyonbee tarjonbedettsi igin yerraam waadadhayna eenadar Barjo halon kida maase. <sup>7</sup> Harrna hambhidianna, Barjo woam kinin eeloono gazamoka wonin doadettsine; minngamoka wonin doadettsitehe. <sup>8</sup> Ogonante kiilimen koam jibbea ea kinin jibbayno yinnon Manpas Gazanam yena imea Barjoamne, eediamtehe.

<sup>9</sup> Kinka kiam nashintanam yedi yenti Barjokalanka yenin dhesonna, ogo goynsa hayyear yena thaapoadettsi zaskehe. <sup>10</sup> Harrna hambidianna, Moqodoonia peen wulir dahaana imbanaana wulam nasheeda nashe; ko dahaannaar imbanaanato, ta yeam wonin kiilayno kalon keam yenin nashoadettsine. <sup>11</sup> Payyamoka daanabee, yennon bhochchinam thoosanabee, kosa birayse yena wonin giyondettsi yennon aaninka waadadhanabe yenin wocchimbhoadettsi yeam woda kiile. <sup>12</sup> Yin ye hayanna, Barjodar woylamin qajiminakal shawkadhaana yeda maate; eedi haydar baske maatattene.

### *Yesusin Nivenka Sadanka Dahaanabee Diyaanabe Goyno*

<sup>13</sup> Imbanaanato, qaabe yindar haydheaysa qolmina waani eenadettsi qaabonka yenin atoamadettsi, diyaana goynsa ye dhese woda zage. <sup>14</sup> Yesusin diyonbee dembhira kinin dhaabhonbeam gonne hamayse wonin tiyenna, Yesusdar woylamin qajayse diyaanaam Yesusbesana kinka Barjoyn bevenam dhesooda dhese.

<sup>15</sup> Imbaa wontea Yesussa upsinka yena yin woda giye: Imbaa wontea Yesusin nivenka yekka wodi sadanka dahaana eena diyaanaam birattone. <sup>16</sup> Barjo yinti upsin kinin imenkabee, gaananasa hayoa upsin kinin imenkabee, Barjosa thurumban pugadhenkabe Imbaa wontea Yesus yinti cecira kida hanche; Kiristoosdar woylamin qajayse diyaana eenaar dembhira birayse keda dhaabhe. <sup>17</sup> Ogora wodi sadanka dahaana eena kembesana kinka Imbaa wontea Yesusbesana jibarendar keerana polonka woda tura tiidhe. Yin rooro wulna Imbaa wontea Yesusbesana woda dee. <sup>18</sup> Ogonante upsin ogoka kinka kiam wocchinsee.

## 5

### *Yesusin Nivenam Ashkimbhayse Toldhen Goyno*

<sup>1</sup> Imbanaanato, ogo yerin yin maaten wodanbee levenbesa yena thaapa zaskehe. <sup>2</sup> Harrna hambidianna, Barjosa rooronin\* nivayno diibi sootika nivendettsi konin nivenam yedi yemal payya hayayse dheseeda dhese. <sup>3</sup> Eeno wul “Payyane, gaale qolehe” konin hamen wodanka, adhima burqo mayn sirmanam konin yedendettsi kaye dhesadhima kedar koda nive; hamin ko dahaakaar kedi dhaqehe.

<sup>4</sup> Imbanaanato, yediar thipansa iinte yenin dahaamonna, ogono roorono diibidettsi yedar nivehe. <sup>5</sup> Harrna hambidianna, yedi wul shaakanbee rooronbesa iinte dahaana eenane; wodi sootinbee thipanbesa iinte dahaana eenatehe. <sup>6</sup> Ta keeda qaymayse wosa metenam wottsintaka wo dee; waani eendettsi wo raatabhoode. <sup>7</sup> Harrna hambidianna, raatayna sootinka keda raate; barin bardhaynaar sootinka keda bardhe. <sup>8</sup> Wodiar shaakansa iinte wonin dohonna, wosa metenam wottsintaka wo dee; Barjodar woylamin qajintanbee nashimmakkonbeam qaashidettsi wo qaadhe; dhaqintansa qaabe yindar haydhenam wonnon metendar qoobhedettsi wo wode. <sup>9</sup> Barjo woam kinin kamoono woam wacimana dayma, wosa Imba maataa Yesus Kiristooska dhaqinta wonin haapoadettsine. <sup>10</sup> Kiristoosin wona diyoono sadaka dahaa wo hannaar wo diydiannaar kimbesana kinka wonin doadettsine. <sup>11</sup> Ogonante yedi keeda ta yenin hayendettsi, kinka kiam kiam kiilaate wocchinsee.

### *Macchin Kiilimeno*

<sup>12</sup> Imbanaanato, yesa shaarinte Barjosa waadimanka qajadhaate Imbaa wontea Yesuska yeam wottsaynabee kiilayna eenabeam yenin gobshoadettsi yeam woda miske. <sup>13</sup> Kesa waadiman goynka kattsi nashimmakkoka keam gobshee. Kinka kinkaar payyamoka dehee.

<sup>14</sup> Imbanaanato, “Boosona eenaam wacimée; kurtumbhaynaam wocchinsee; eena kantaysa qolminaam kelshee; een wulna darshee” hamayse yeam woda kiile.

\* <sup>5:2</sup> “Barjosa roorono” hamen upsinam Haalin Mallan mathaapinsa macchinte thaapadhaanar shedaa.

<sup>15</sup> Hayyear eedina siya raqate siya kinin hayoamadettsi mete yesaam gishee; ogora sagi rooro wul kinka kinkabee een waani wulbena payya yer hayota wocchimbhee.

<sup>16</sup> Roro wul wozadhee; <sup>17</sup> garma Barjoam miskee; <sup>18</sup> yer wulka Barjoam gobshee. Harrna hambhidianna, Barjosa bhocchino Yesus Kiristooska ogoam yenin hayoadettsine.

<sup>19</sup> Manpas Gazansa waadimanam mareebhode; <sup>20</sup> Barjokala qansayse eenna giid-henam bageebhode. <sup>21</sup> Yer wulam taysayse shedee; payya maatonamaar yedee. <sup>22</sup> Siya yer wulkalanka pegadhee.

<sup>23</sup> Payyanam imea Barjoa yinti yer wulka yeam ki gazise; yesa manpasinbee, yesa sadanbee, yesa bishin wulbeam Imbaa wontea Yesus Kiristoosin niven wodanka siya yer yindar haapadhimina hayaye yeam ki toole. <sup>24</sup> Yeam eelaa gon hama kinin dohonna, ogoam kida haye.

### *Macchin Nagaymakkono*

<sup>25</sup> Imbanaanato, wona Barjoam miskee. <sup>26</sup> Imbanaana wulam gonin nashim-makkonka sunqintaka “Nagaya” kena hamee. <sup>27</sup> Warqatin koam imbanaana wulna nabbabadhoadettsi Imbaa wontea Yesussa naabenka yena ida giye.

<sup>28</sup> Imbaa wontea Yesus Kiristoossa sunin imintono yenka ko dee.

## Kiristoos Yisa Tarjamonnante Kinin Yittsaa Bhawloos Teselonqe Eenana Kinin Thaapoono Lansono Warqanno

### *Ardinta*

Bhawloos bira warqatam Teselonqe eenana kinin thaaponsa budonte, oysime ab dhaabhidine. Ogonoar “Imbasa roorono\* yeskidine” hamea upsi qansintaka waani waani qothimidine. Imbasa rooronsa Bhawloosin thaapaana makkamma bhocchina guttsaynane:

1. Barjosa wacimeno peendar nivima birayse thoothino eeno gonin hamon Barjodar woylamin qajadhenam gara ko gare (2:3); haynaar ee hamima eedi nivasane (2:3); pir ta wodan koka haynaar ee hamima easa kantanam mardha ko mardhe (2:6-7).
2. Barjodar woylamin qajaana qaymayse kesa gasante dohon yerinam dhesayse Barjodar kesa woylamin qajidinka yisa metenam wocchisinta keam koda zaske. Yin kinin hayenka ke dhesima kedar niven siyon yerinam marana ashkimbhaana keda maate.
3. Barjo wulam kinin shedenna, yisa bhocchinam thoosite ki dahade. Barjodar woylamin qajaana kisa aaninte toldhaanane.

Kaa mathaapaam raq dongdar kashana dandima ko dandime:

1. Nagaymakkono (1:1-2)
2. Imbasa rooronam bhocchika toolintasa (1:3-12)
3. Imbasa roorono hambhoono hamin giynta konin dohoono (2:1-17)
4. Imbasa rooronam bhocchada miskebee kina zaskaadettsi dayntabe konin zaskayno (3:1-15)
5. Macchin nagaymakkono (3:16-18)

Bira warqatadar thaapate kinin yittsaadettsi, Bhawloos macchindar dayntana zaskea kiilime kida ime. Waadima waadadhintaka yisa dayntanna koymo kenin haapoadettsi kida giye. Harrna hambhidianna, waani waani “Imba saana maatasane” hamayse bhocchintaka waadiman garayse waanina baske maatayse ke dahade. Bhawloos “Waadadhana nashima ki itsabhoode” ki hamade (3:10).

<sup>1</sup> Wosa Imba maataa Barjobee Imba wontea Yesus Kiristoosbeka Teselonqe kamatante dohon misken ooninna i Bhawloosbee, Sillaasbee, Thimaatoosbekalanka nittsadhoono warqannone. <sup>2</sup> Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Kiristoosin Niven Rooronka Yeskayno Pirdino*

<sup>3</sup> Imbanaanato, yennon goynka rooro wul Barjoam gobshano woam zaskaynone; ogonoar Barjodar woylamin yenin qajayno kattsi gebhadabee ye wulsa kinka kinka nashimmakkono thoothadabe konin yivennane. <sup>4</sup> Yedar yeskoono oytaydhanbee gaalen wulbeka yenin wocchimbhonnabee Barjodar woylamin qajayse yenin woyonnabe, Barjosa misken onnasa shaarinte yenka woda erime.

<sup>5</sup> Ogoner wul Barjosa pirdino tipa konin dohonam may koda dhee. Ogonante Barjo yisa bitamonte ardana damayna eena yeam kida haye; gaalenamaar yenin tiyayno kisa bitamon goynnane. <sup>6</sup> Barjo yeam galshaynadar gaalenam maasana kisa pirdino tipane.

<sup>7-8</sup> Pir taaki gaalen haapayna yembee wombeam ukunsisanane. Ogonoar yin konin maatayno Imbaa wontea Yesus kantanka dahaana yisa gaananabesana kinka nuunsa laabhinanka cecira kinin niven wodankane. Ogo wodanka Barjoam dhesiminabee

---

\* : “Barjosa roorono” hamen upsinam Haalin Mallan mathaapinsa macchinte thaapadhaanar shedaa.

Imbaa wontea Yesussa dhacchintan upsinna ee hamiminabedar kida pirde. <sup>9</sup> Kedi Imbaa wontea Yesus birantebbee kantan kisa gobshinbekalanka edimayse rooro wul lay kayensa pirdika keda dhabshadhe. <sup>10</sup> Keam dhabshadhaynoar Imbaa wontea Yesusin nivea rooroakane. Ogono kinin nivayno yisa gazana eena kiam kinin gobshoadettsibee kidar woylamin qajyna wul kanka kinin targadhoodettsibene. Wosa tarjamonam qansayse gonne hamayse yenin tiyonna, yediar kembesana yeda paydadhe.

<sup>11</sup> Ogoam bhocchintaka yena rooro wul Barjoam wonin miskayno, Barjo yeam kinin eelonna yekayna yeam kinin hayoadettsibee payya waadadhana yesa dohon qaabonbee kidar woylamin qajintaka yenin waadadhen wulbeam yisa kantanka yena kinin thoosoadettsibene. <sup>12</sup> Yin wonin miskayno Imbaa wontea Yesussa naabeno yenka konin gobshadhoodettsibee wosa Barjo maataa Imbaa wontea Yesus Kiristoossa sunin imintonka kanka yenin gobshadhoodettsibene.

## 2

### *Haynaar Ee Hamima Ea*

<sup>1</sup> Imbanaanato, Imbaa wontea Yesus Kiristoossa nivintanbee wodi kidar wonin buken goynbesa yin giyayse woda yeam miske: <sup>2</sup> “Inta Barjokala i qansade” hamayse giyntaka way wonin apoka giyate yittsaadettsi way wokalanka warqat thaapate yittsadhaadettsi hayayse een waanin giyenka, “Barjosa roorono\* yeskidine” hamayse yedi saanawa yesa bhocchinam ookeebhode, kurtumbheebhode. <sup>3</sup> Eedi hayyear yer harkaar yeam ki taysabhoode. Harrna hambidianna, birayse “Barjona ee hamattone” hamayna dhaabhimabee haynaar ee hamima, agaa kayendar yivea ea haapadhimabe ogono Barjosa roorono nivehe.

<sup>4</sup> Agaa haynaar ee hamima ea “barjone” hambhayna wulbee yina goodimbhayna wulbeam jibbada kedara yiam bhaarayayse Barjosa gazan ooninte dooqayse, “Inta Barjone” kida hame. <sup>5</sup> Ena yembesana kinka inin dohon wodanka, ogo inin yena giyonam yedi bhocchattenu? <sup>6</sup> Yinnon wodanka kinin haapadhoodettsi ta kinin nivoamadettsi kiam marayno har ko hannaar dheseeda dhese. <sup>7</sup> Harrna hambidianna, ta aachimaa ko hannaar, haynaar ee hamima easa kantano taar waadadhite ko dahade. Kisa kantanam marea daane; agaa maream goyra mardhenka yekka kisa kantano aachika koda waadadhe. <sup>8</sup> Agaa maream goyra mardhen wodanka, haynaar ee hamima ea may kida haapadhe. Imbaa wontea Yesus aponka uten upsinka kiam bashayse kida deese; pir tarshen nivintan yinnonka kiam kida kayse.

<sup>9</sup> Haynaar ee hamima ea kinin nivayno Seethaansa kantanka, eediam dhaddhisana tarshea yerbee, milkitbee, kattsi gebhi yerbeam waadimintakane. <sup>10</sup> Yin pir kayendar yivayna eenaam siyon yerin wulka taysite kida waadadhe. Eena igma kinin kayaynoar dhaqana keam yeskisen goninam nashayse kinin tiyaamonnane. <sup>11</sup> Ogona buudanam gonne hamayse kinin tiyoadettsi Barjo keam dhaddhisen yerinam kedar kida yittse. <sup>12</sup> Ogonoar goninam “tiyattone” hamayse siyonka wozadhadyna wuldar pirdadhoodettsine.

### *Kenin Dhaqoadettsi Kambaana Eena*

<sup>13</sup> Imbaa wontea Yesusin nashayna imbanaanato, wodiar yennon goynka Barjoam rooro wul gobsha woam koda zaske. Wonin gobshaynoar yedi Manpas Gazanka yenin gazimbbhenbee goninam yenin tiyen goynbeka yenin dhaqoadettsi Barjo yisa birana eena hayayse yeam kinin kamonnane. <sup>14</sup> Barjo yena wonin giyon dhacchintan upsinka ye dhaqe yeam kinin eloono Imbaa wontea Yesus Kiristoossa gobshinam yenin kashimoadettsine.

\* <sup>2:2</sup> “Barjosa roorono” hamen upsinam Haalin Mallan mathaapinsa macchinte thaapadhaanar shedaa.

<sup>15</sup> Ogonante imbanaanato, wocchimbhee; wonin giyoono ko dahaannaar, wonin thaapoono ko dahaannaar, yena wonin dhetson timmirin wulam payya hayayse yedee. <sup>16</sup> Kidi yinti wosa Imba maataa Yesus Kiristoosbee woam nashaa, yisa sunin imintonkaar rooro wul lay wocchisintanbee qaabe haydhenbeam wona imaa wosa Imbaa Barjobe <sup>17</sup> yesa woylaminam ke wocchinse; payya maaton wulam yenin hayoadettsibee yenin giyoadettsibe kantanam yena ke ime.

### 3

#### *Bhawloos “Wona Barjoam Miskee” Kinin Hamoono*

<sup>1</sup> Ta keeda shidhon goynsa, imbanaanato, ogo yekal konin maataadettsi Imbaa wontea Yesussa upsino saanawa konin workoadettsibee konin gobshadhoadettsibe wona Barjoam miskee. <sup>2</sup> Yin pir eeno wul Barjodar woylamin qajoono konin da-haamonna, qaaboysa siyanabee wobona eenakalankabe wonin dhaqoadettsi wona Barjoam miskee. <sup>3</sup> Imbaa wontea Yesus kidi eedi gon hamaane; kidi yeam kida wocchinse; Seethaankalankaar yeam kida toole.

<sup>4</sup> Yena wonin giyenam ta ko hannaar, os birante ko hannaar, yenin hayenam Imbaa wontea Yesuska yedar woylamin woda qaje. <sup>5</sup> Imbaa wontea Yesus Barjosa nashimmakkonbee Kiristoossa darshintanbeka yesa woylaminam wocchimbhintandar ki maase.

#### *Waadiman Waadadha Zaskayno*

<sup>6</sup> Imbanaanato, wokalanka yenin tiyon timmirinam garayse waadima qolma sun yaayayna yesa imbanaana wulkalanka yenin edimoadettsi wosa Imbaa Yesus Kiristoossa naabenka yena woda giye. <sup>7</sup> Woam maatinta hamin yeam konin zaskenam yemal dheseeda dhese. Wodi yekal wonin dehenka waadima qolma dohootone; <sup>8</sup> eedi hayaar galanam sun itsootone; yedar yer goyti kalaaka hattear wonin dethoamadettsi sootinbee rooronbe qajadhitebee gaalitebe waadadhaate wo dahade.

<sup>9</sup> Yin wonin waadadhoonoar wonnon kamsika yenin vivoadettsine; yekalanka tiyana wosa hayamo qolmina wonin dohonnatehe. <sup>10</sup> Harrna hambhidiana, yekal wonin dohon wodanka, “Waadadhana nashima ki itsabhoode” hamea upsi wodi yena imidine.

<sup>11</sup> Hamin ko dahaakaar waadima waadadhima, yiam zaskaamon dhalqinte ardayse goyti qolma yaayayna yesa shaarinte dahaana eenasa wodi qansidine. <sup>12</sup> Iginadettsina eena lay hamayse yisa waadimanam waadadhaate yinnon galanam kenin itsoadettsi Imbaa wontea Yesus Kiristoossa naabenka kena giyada keam woda kile.

<sup>13</sup> Imbanaanato, yediar payyan waadiman waadadhana boosimbheebhode. <sup>14</sup> Ko warqatinte wonin thaapon dhalqinam qansayse ee hamima eedi daa ki hanna, kiam payya hayayse shedee; kinin ooshimbhoadettsi kimbesana kinka wormeebhode. <sup>15</sup> Ko dahaannaar yesa imbanaasdettsi kiam kilee; yesa banqi eedidettsi kiam paydeebhode.

#### *Macchin Nagaymakkono*

<sup>16</sup> Payyamonsa Imbaa kidi yinti rooro wul yer wulka payyamonam yena ki ime. Imbaa wontea Yesus ye wulbesana ki dee.

<sup>17</sup> Ko nagaymakkonam innon aaninka thaapaa inta Bhawloosne. Innong warqatin wuldar haapadhea milkita kaane; inin thaapaynoar ogodettsine.

<sup>18</sup> Imbaa wontea Yesus Kiristoossa sunin imintono ye wulka ko dee.

## Kiristoos Yisa Tarjamonnante Kinin Yittsaa Bhawloos Thimaatoosna Kinin Thaapoono Birono Warqanno

### *Ardinta*

Bhawloos Barjosa dhacchintan upsinam giyota birayse kinin yivenka, Galatia peente dohon eenna kinin Barjosa upsinam giyenka, Thimaatoos naasi likka dahayse Barjodar woylamin ki qajade hamayse koda giidhe. Bhawloos lanson yinin yivenka, Galatia peensa Listhira katamante Thimaatoosam haapayse kimbesana kinka kinin yivoadettsi kiam ki hayade. Thimaatoossa indano Ayiwd eedi konin dohonna, kidi naasamora yedayse Ena Mallan Mathaapinsa iinte thaapadhon Barjo upsinam nabbabite yinin dohonna, Barjo upsinam dhesa ki dhese. Barjosa dhacchintan upsinam giyota Bhawloosbesana kinka kida yaaye. Budobar Epsoon katamante dohon misken ooninte timmirinbee wottsin wottsdhenbe goynsa gaale gidir dhaabhonna, Thimaatoos kesa entsa maatayse kida waadadhe.

Bhawloos Thimaatoosna bira warqataam 55-59 levensa iinte ki thaapade. Kinin thaapoonoar Thimaatoossa dayntanbee waadimanbesa kiam kiilanane. Tapir misken ooninna zasken timmirinbee wottsinbe goynsa thoothi kiilime kida ime.

Kaa mathaapaam raq tobbhaadar kashana dandima ko dandime:

1. Nagaymakkono (1:1-2)
2. Thimaatoosna imbhoono elqimeno (1:3-20)
3. Misken ooninsa dambin goynsa (2:1-15)
4. Misken ooninsa entsana goynsa (3:1-13)
5. Kiristoossa aachin dhalqin goynsa (3:14-16)
6. Thimaatoossa dayntanbee, waadimanbee, misken ooninsa wottsin goynbena imbhoono kiilimeno (4:1-6:21)
7. Macchin nagaymakkono (6:21)

<sup>1</sup> Woam Dhacchea Barjobee wonindar woylamin hayea Yesus Kiristoosbesa upsinka Yesus Kiristoossa tarjamonnante nittsadhaa i Bhawlooskalanka <sup>2</sup> Barjodar woylamin qajintaka gon isa naasi maataa Thimaatoosna nittsadhoono warqannone. Barjo Imbaabee Imbaa wontea Yesus Kiristoosbesa sunin imintonbee, garintonbee, payyamonbe hana ko dee.

### *Buudan Timmirin Dhettsaynakalanka Mete Gishinta*

<sup>3</sup> Moqodoonia peendar inin yiven wodanka inin hana elqimondettsi Epsoon katamante dooqaa; ogote dahaana waani waani eena buudan timmirinam eenna kenin dhettsaamadettsi, <sup>4</sup> eerin giidhenbee macchiysa qolmon eykenasa caacin paydada giidherrabe kenin maatoadettsi kena giyaa. Iginadettsina yerra palimenam keda beve; Barjodar woylamin qajayse waadadhadhen Barjosa waadimanna pootehe. <sup>5</sup> Ogoam kena hanin giyayno gazamo woylamkabee, payya qaabokabee, gon Barjodar woylamin qajintabeka haapadhen nashimmakkonka kenin doadettsine. <sup>6</sup> Waani waani eena igma yerrakalanka dhaddhismayse sun pootima waraqadhadhendar ke maatade. <sup>7</sup> Ogoam kenin hayaynoar Musesa yigginam dhettsayna eena maatana zagaysene. Ko dahaannaar yinin giyenam kedi dhesehe; “May wodi dhesidine” yinin hamenamaar bhocchehe.

<sup>8</sup> Ko dahaannaar eedi zaskaadettsi yiggika ki waadadhina, yiggino payya konin maatonam dhesooda dhese. <sup>9</sup> Yigginam imbhoono tipana eenana konin dahaamonam dhesooda dhese. Yigginam imbhoono yigginam tooliminabee, ee hamiminabee, Barjona

goodimiminabee, seesaynabee, gazamoysa qolminabee, Barjo waadimanam bagaynabee, imbanabee indanabeam deesaynabee, eediam deesaynabee,<sup>10</sup> sharmucimakkon hayaynabee, anngi dahayse anngika wodhaynabee, eediam shanshaynabee, buudan giyaynabee, buudamoka mallaynabee, tipa maaton timmirinam jibbayna yerin waani wulamaar waadadhaynabenane.<sup>11</sup> Ogono tipa maatoonno timmirino konin haapad-hayno gobshadhaa Barjosa gobshinam giyen dhacchintan upsirane. Ogono dhacchin-tan upsino ina elqimayse imbhoonone.

### *Bhawloos Barjoam Kinin Gobshoono*

<sup>12</sup> Iam “Eedi gon hamaane” hamayse waadiman yinnonna iam kinin kamonna, kantan yinnonam ina imaa Imbaa wontea Yesus Kiristoosam ida gobshe.<sup>13</sup> Ena birayse Kiristoosam iireabee, oytayeabee, eediam ooshinseabe i dhaakaar, kidi ina ki garade. Harrna hambidianna, ogo wulam ina kinin garoono kidar woylamin qajimabee kiam dhesimabe inin hayonnane.<sup>14</sup> Wosa Imbaasa sunin imintonam Yesus Kiristooska dohon Barjodar woylam qajintanbee nashimmakkonbeka thoosayse ina ko imbhade.<sup>15</sup> “Yesus Kiristoos seeson eenam dhacchana peen kodar ki nivade” hamayno upsino gonin hammobee eedi wulin tiyoadettsi zaskeabene. Seeson een wulra sagi seesoysa dahaa ea intane.<sup>16</sup> Ko dhaaannaar rooro wul lay dehen sadan haapania kidar woylamin qajayna eenana kamsi konin maatoadettsi Yesus Kiristoos i seeson waadimanka sagaam yisa darshintan wulam dhaana ina ki garade.<sup>17</sup> Kidi yimal Barjo maataa, diymabee haapadhimabe rooro wul bit maataa Barjona rooro wul lay gobshi kina ko dee; amiin.

<sup>18</sup> Isa naasa Thimaatoos, ena birayse Barjokala qansayse giyayna eena hasa kenin giyon upsinam banqi koymo hayayse kanka payyan banqinam kansaa hamayse hana ida elqime.<sup>19</sup> Barjodar woylam qajintabbee payya qaabobe hasa ko dee. Waani waani eena payyan qaabon yinnonam garayse bazindara sagadhen gonngalanam wuranin qunthate kaysendettsi Barjodar woylamin yinin qajenam ke kaysade.<sup>20</sup> Kesa iira Hemenoosbee Iskindirosbe ke dahade. Kedi Barjoyn iiradhiminam kenin dhesoadettsi Seethaanna saskate keam i imade.

## 2

### *Barjodar Woylamin Qajaynasa Miskeno*

<sup>1</sup> Ta keeda een wulna Barjoam gobshada yenin miskoadettsi yer wulsa birayse yeam ida kiile.<sup>2</sup> Barjodettsi dayntabee kinka kiam gobshintabeka gaale qolma payyamonka wonin doadettsi, binnabee hayamoysa dahaana wulbena miskee.<sup>3</sup> Ogono yer payyabee woam Dhacchea Barjosa birante woziseabene.<sup>4</sup> Harrna hambidianna, Barjoyn zagayno eedi wulin dhaqoadettsibee goninam kenin dhesoadettsibene.<sup>5</sup> Barjo kalaane; pir Barjobee eedibesa shaarinte dahayse qaashinsea kalaane; kidiar eedi maataa Yesus Kiristoosne.<sup>6</sup> Een wulsa seeson bazanam kashana yiam ki imade; ogonoar gonin hamon wodan yeskaysaka Barjosa dhacchintan waadimanam dhettsisayno tarjamonone.<sup>7</sup> Ogonante Barjo Ayiwday hamma eenana Kiristoossa tarjamonnante yittsana iam kamidine; iam kinin yittsoono yisa dhacchintan upsinam giyayse Barjodar woylamin qajintanbee goninbeka inin dhettsoadettsine. Ogoam inin giyenga goninam ida giye, buuda giyattine!

<sup>8</sup> Keeda raq wulir dahaana eena anngina wacimenbee palimenbeam yikalanka pegisayse, yisa gazisadhon aaninaam dhaasayse Barjoam kenin miskoadettsi ida zage.<sup>9</sup> Ogodettsi maana yisa sitinam ashkadhintakabee, worqibee inqu hambhea baza-ysa detha maataa yerraam qorcindar qaadhintabbee, bazaysa gebhi maaton apala qaadhintabeka bishin yinnonam gobshana dayma, kurtumbhebee meten yinnonam wottointabeka maana zasken apalan ke qaadhe ida zage.<sup>10</sup> “Barjona woda goodime” hamayna maana hayan keam zaskendettsi payyan waadimanka ke goobe.<sup>11</sup> Maana lay

hamayse ee hamintaka timmirinam ke tiye. <sup>12</sup> Maa anngiam konin dhettoadettsibee anngidar kosa hayamo doadettsibe guyattine; lay hama koam koda zaske. <sup>13</sup> Harrna hambhidianna, birayse Addaam ki pijadhade; Hewaan budobar ko pijadhade. <sup>14</sup> Tapir taysadhyse Barjosa yigginam kottsoono Hewaanne; taysadhaa Addaamtehe. <sup>15</sup> Ko dahaannaar maa Barjodar woylamin qajintabee, nashimmakkobee, gazamobee, mete yisaam shanintabeka ko daana, naasi adhintaka dhaqa ko dhaqe.\*

### 3

#### *Misken Ooninam Wottsayna Eena Goynsa*

<sup>1</sup> “Eedi hayyear misken ooninam wottsea maatana yi zaganna, payyan waadimanam kida anngardhe” hamayno dhalqino gonne. <sup>2</sup> Ogonante misken ooninam wottseam yin daa kiam ko zaske: Bagime yindar qolma, maa kallon geshoa, yiam zaskendettsi dehea, meten yinnonam wottsea, goytika waadadhea, chocchi tiyea, eenaam dhettsana damea, <sup>3</sup> bardhima, wacimima, leemi maataa, eedibesana kinka goorima, koymo nashima, <sup>4</sup> oonin eena yinnaam payyamoka wottseabee kisa naanaar yer wulka kiam gobshaate kina ee hamaynabe maataa ea ki dee. <sup>5</sup> Eedi oonin eena yinnaam wottsana yi damaamma, Barjosa misken ooninam hamin wottsana kida dame? <sup>6</sup> Pormakkonka purdhayse Seethaandar yeskoono pirdino kidar konin yeskoamadettsi Barjodar woylam qajaa eedi haali misken ooninam wottsea ki dahabhoode. <sup>7</sup> Eensa wuupontebbee Seethaansa zaanintebe kinin dhamboamadettsi Barjodar woylamin qajiminakalanka payya tarjaysa dahaa maata kiam koda zaske.

#### *Misken Ooninte Waadadhyyna Eena*

<sup>8</sup> Ogodettsi misken ooninte waadadhyyna eena yiam gobshadhaanabee, upsinka yisa wocchimbhaanabee, bardhiminabee, koymona gibiminabe maata keam koda zaske. <sup>9</sup> Pir Barjodar woylamin yinin qajensa aachin dhalqinam payyan qaabonka yedayna maata keam koda zaske. <sup>10</sup> Kedi birayse taysayse ke shedadhe; ogosa budonte siya yer yindar haapadhimina ke hanna, misken ooninte waadadhyyna eena ke maate. <sup>11</sup> Ogodettsi kesa maanaar\* yiam gobshadhaanabee, eediam wuupiminabee, yiam zaskendettsi dahaynabee, yer wulka gon hammabe maata keam koda zaske. <sup>12</sup> Misken ooninte waadadhea ea maa kallon geshoa, pir naana yinnabee oonin yinnonbeam payyamoka wottsea maata kiam koda zaske. <sup>13</sup> Misken ooninte waadadhyyna eena payyan waadimanka yinnon metenna gebhi gobshi keda haape; Yesus Kiristoosdar woylam qajintansa kantanamaar keda haape.

#### *Gembho Aachin Dhalqino*

<sup>14</sup> Warqatin koam hana inin thaapenka saana hakal nivana bhocchi i hayade. <sup>15</sup> Hakal nimbha i kappidiannaar, Barjo ooninte eedi hamin daa kiam konin zaskenam hanin dhesoadettsi hana ida thaape. Ogonoar Barjosa oonin eena goninsa turturbee baalabe maataana kedine; pir kedi lay dehea Barjosa misken onnone. <sup>16</sup> Barjodettsi maatintansa aachin dhalqino qothime qolma gebhine. Ogonoar Kiristoos “eedi maatayse haapadhaa,  
kisa gonamonsa Manpas Gazanin tarjaa,  
Barjo gaananana haapadhaa,  
zarsin wulna tarjadhaa,  
peendar dohon eenin yindar woylamin qajaa,  
gobshinkaar cecindar yivaane” hamaynone.

\* <sup>2:15</sup> Buudan timmirinam dhettsayna “Maa naasi adhidi yi hanna, dhaqana damehe” hamayse keda dhettse.

\* <sup>3:11</sup> Bhawloos Girik aponka kinin thaapoono “kesa maanaar” way “misken ooninte waadadhyyna maanaar” hamayse bulana dandima ko dandime.

## 4

### *Buudamoka Dhettsayna*

<sup>1</sup> Manpas Gazano “Macchin wodanka waani waani eena dhaddhisen manpasinka entsadhyse meeshisa timmirinam qansayse Barjodar woylamin yinin qajenam keda gare” hamayse may koda giye. <sup>2</sup> Ogodettsin timmirinin nivayno mesken yisa gemmaysaka maltamoka buudimayna eenakalanka koda nive. <sup>3</sup> Iginadettsina eena keemon kiam keemadhenam keda mare; Barjodar woylamin qajayse goninam dhesayna eena kiam gobshayse ke itse Barjoyn pijn waani waani galanam “itseebhode” hamayse keda mare. <sup>4</sup> Ko dahaannaar Barjoyn pijn yer wul payyane; Barjoam gobshayse ke tiydianna, kala hattear dhabadhea yer qolehe. <sup>5</sup> Harrna hambhidianna, ogono yerro Barjosa upsinbee Barjoam miskintanbeka gazisadhoono koda maate.

### *Kiristoossa Payya Waadima Eedi Maatintasa*

<sup>6</sup> Dhettsintan ogoam Barjodar woylamin qajaynaam ha bhocchisianna, Barjodar woylamin hanin qajon upsinbee hanin yiven payyan timmirinbeka dusada gebhaate Yesus Kiristoossa payya waadima eedi hada maate. <sup>7</sup> Maana gecchonasa eeri maaten peen kogayn dhalqinkalanka pegimbhaa; Barjodettsi maatintanka meten hasaam duttsaa. <sup>8</sup> Harrna hambhidianna, hasa bishinam ashkana hanin duttsayno yerro likkana koda age; Barjodettsi maatana hanin duttsayno ko hanna, ta dohon dayntanbee os birante niven dayntanbena woylem daran haydhayna yerra wulna koda age. <sup>9</sup> Ogoro dhalqino gon hama, pir eedi wul gonne hamayse tiya yiam zaskaynone. <sup>10</sup> Wodi ogoam haapota waadadhaate woda mashime; ogonoar een wulam, kalon Barjodar woylamin qajaynaam Dhacchea, lay dehea Barjodar woylem wonin hayennane.

<sup>11</sup> Yerra iginaam eenna guyada dhettsaa. <sup>12</sup> Hasa naasamonam eedi hayyear ki bagabhoode; hasa dhalqinbee, dayntanbee, nashimmakkonbee, Barjodar woylamin hanin qajenbee, hasa gazamonbeka Barjodar woylamin qajaynana payya kamsi maataa. <sup>13</sup> Inin nivenka yekka Mathaap Gazanam eenna nabbabaatebee, Barjosa dhacchintan upsinam giyaatebee, dhettsaatebe wocchimbhaa. <sup>14</sup> Barjokala qansayse hana giidhenka misken ooninsa donzanaar hadar aanin kenin woden wodanka, hana imbhon hakal dohon Manpas Gazansa imintonam walaabhode. <sup>15</sup> Hasa gebhintano een wulsa birante may konin haapadhoedettsi igina yerraka wocchimbhaa; igina yerraam waadimadar hacchota haam imaa. <sup>16</sup> Hannon metenbee hanin dhettsenbeka haam gisha; igina yerraka wocchimbhaa. Harrna hambhidianna, ogoam ha haydianna, hannon metenbee hanin dhettsenka qansaynabeam hada dhacche.

## 5

<sup>1</sup> Ea gebhadhaam hasa imbadettsi hayayse kiilaa, kiam wacimaabhode; barshina naanaam hasa indanaasdettsi hayayse, <sup>2</sup> maana gecchonaam hasa indadettsi hayayse, maana barshinaamaar hasa michadettsi hayayse gazamoka keam gobshada kiilaa.

### *Maana Qambhinasa Imbhoono Kiilimeno*

<sup>3</sup> Gon eedi kelsheaysa qolmina maana qambhinam kelshaa. <sup>4</sup> Hayyear anngiysa diyon maynsa naasi way kosa naasi naas daa ko hanna, igina naana birayse yisa oonin eenana Barjodettsi maatintanam may dhaanabee yiam adhaana imbanabee eykenabe kena kenin gaalonsa bazan maasadhenbeam ke dhese. Harrna hambhidianna, ogono waadimano Barjoam wozisaynone. <sup>5</sup> Anngiysa diyoono gon yimal bish dohoono mayno Barjodar yisa qaabe hayayse, sootinbee rooronbe Barjoam miskada wocchimbhayse koda dee. <sup>6</sup> Peen ko yerinka yisa metenam wozisana bish nashayno anngiysa diyoono mayno sadaka dahayse diyoone. <sup>7</sup> Bagime yindar qolmina maatayse kenin doadettsi yerra iginaam kena giya. <sup>8</sup> Ko dahaannaar yisa muldha maataana, kalon oonin

eena yinnaam bhochima ea Barjodar woylamin yinin qajenam garidine; Barjodar woylamin qajimaadaraar kalon sagi ki gemmade.

<sup>9</sup> Eedi makkam kaysa leve thoothamaa maam annginaysa diyaana maanayn thaapadhen warqatinte koam thaapaabhode. Thaapadhayno mayno anngi kalaysa dohoono maa maata koam koda zaske. <sup>10</sup> Pir payya waadimaka yina tarjadhaa maa maata koam koda zaske; ogonoar naana yinnaam gettsintabee, chocchi tiyntabee, Barjo eenasa roo shivintabee, gaalensa iinte dahaanaam kelshintabee, payyan waadiman wulam hayntabeka wocchimbhoono maata koam koda zaske.

<sup>11</sup> Annginaysa diyaana maanayn thaapadhen warqatinte maana barshinaam thaapabhode. Harrna hambidianna, kesa waan anngarman keam bashaka, kesa Kiristoosdar dohoono nashimmakkono tokaate konin yivenka kembhana kenin zagennane.

<sup>12</sup> Ogo ena birayse Kiristoosbesana kinka yinin ardon mallanam kenin garonna kedar koda pirdadhe. <sup>13</sup> Tapir waadimanam garayse eensa onnar yaayanam keda duse; waadimanam garinta bish dayma eediam wuupaynabee, eensa dhalqinte ardaynabee, giya yiam zaskiminam giyaynabe keda maate. <sup>14</sup> Ogonante annginaysa diyaana maana barshina kembhayse naasi kenin adhoodettsibee oonin yinnonam kenin wottsoadettsibe ida kile. Yin kenin hayenka woam jibbayna kenka wosa naabenam kenin genensa goyi keda bashadhe. <sup>15</sup> Harrna hambidianna, kosa birayse annginaysa diyaana waani waani maana Seethaansa paanan yivota Kiristoosam ke garade.

<sup>16</sup> Barjodar woylamin qajayno mayno annginaysa diyaana maana eedana kosa daa ke hanna, misken ooninna baske kenin maatoamadettsi ko keam kelshe. Ogona misken onno gon yiam kelshaynaysa qolmina eena annginaysa diyaana maanaam kelshana koda dame.

### *Miskin Oonin Goynsa*

<sup>17</sup> Miskin ooninam payya hayayse wottsayna donzanaam, kalon Barjosa dhacchin-tan upsinam giyaatebee eenaam dhettsaatebe qajadhyaynana sagi gobshi koda zaske.

<sup>18</sup> Harrna hambidianna, Mathaap Gazante “Isininam qurthora bulo hanin qapsea waxasa apon dhaxaabkhode” yin pir, “Waadiman waadadheana damooz kasha koda zaske” ko hambhade.

<sup>19</sup> Eedi lamaa way makkam tarjaamma misken ooninsa donzaam bersadhonam qansaabhode. <sup>20</sup> Waani eenin kurtumbhoadettsi kesa iira seeson waadadhyaynaam een wulsa birante wacimaa.

<sup>21</sup> Hanin hayen yerin wulka haysaar woti shedima way haydarar keedhimima kiilim-en ko wulam hanin tooloadettsi Barjobee, Yesus Kiristoosbee, Barjoyn kamaana kisa gaananabesa birante elqimen koam hana ida giye. <sup>22</sup> Aanin hannon kedar wodayse hayyeamaar haynsana gibaabhode; waani eensa seesonte wormaabkhode; hannon metenam gazamoka toolaa.

<sup>23</sup> Hasa iin burqono rooro wul haam konin galshenna, woynea hattasa aapin cuubad-honam likka wucaa; keeda kaara os noqo bish wucaabhode.

<sup>24</sup> Waani eensa seesono may konin dohonna, kedar pirdadhoodettsi dhesima ko dhesime; waani eensa seesono ko hanna, likka kappayse koda dhesime. <sup>25</sup> Ogodettsi payyan waadimanoar mayne; may dhesimimino ko hannaar aachimayse shidhehe.

## 6

### *Eedina Waadadhyaynana Imbhoono Kiilimeno*

<sup>1</sup> Barjosa naabenbee timmirinbe konin irdhoamadettsi, eedina waadadhyayna wul yiam wottsaynana gobshin wulam ima keam zaskendettsi hayayse ke bhocche. <sup>2</sup> Keam wottsaynayaar Barjodar woylamin qajayna ke hanna, waadadhyayna Yesuska kesa im-banaana kenin dohonna keam ke bagabhoode. Kalon waadimanka agenam haapayna

Barjodar woylamin qajaynabee nashadhaanabe kenin dohonna, ena birara sagi ke waadadhe. Yerra kinaam dhettsaate keam kiilaa.

### *Buudan Timmirinbee Gonin Hamon Koymonbe*

<sup>3</sup> Imbaa wontea Yesus Kiristoossa payyan upsinbee Barjodettsi maasen gonin hamon timmirinbesana agimon abin timmirinam hayyear dhettsea ki hanna, <sup>4</sup> pormakkonka purdhaa, yer kalaar dhesimaane; ko dahaannaar dhalqka palimanabee sun goore dhaasea upsi giyanabe siya anngarma kisa daane. Iginarankaar woogintobee, goore-bee, iirimebee, eedidar siya qaabintabee, <sup>5</sup> gara garma palimebe koda ute. Igina kinka palimayna yisa qaabon gemmaanabee gonin yikalanka kayaana eenabene; iginadettsina eenasa Barjoam gobshintano koymo kenin haapeasa goyti kena koda maate.

<sup>6</sup> “Isa dohoono ina yeeka ko yeeke” hamea eana gon Barjoam gobshintano koymo kenin haapeasa goytine. <sup>7</sup> Harrna hambidianna, peen kodar yer kala hattear bavate nivootone; peen kora yer kala hattear bavate yivana damattone. <sup>8</sup> Wonin itsenbee wonin qaadhenbeam wo haapidianna wona yeeka ko yeeke. <sup>9</sup> Wodimbota zagayna eena taysadhayse thoothi malgimmakkonbee keam genen anngarmanbesa zaaninte keda yedadhe; ogono kesa anngarmano keam genayse koda kayse. <sup>10</sup> Harrna hambidianna, koymo nashinta seeso wulsa caacine. Waani waani eena koymo anngardhintaka Barjodar woylamin yinin qajerra dhaddhismayse thoothi gaalesa iir ke ardade.

### *Bhawloos Thimaatoosna Kinin Imon Kiilimenbee Elqimenbe*

<sup>11</sup> Ya Barjo ea, igina yerrakalanka pegadhaa. Tipamobee, Barjodettsi dayntabee, Barjodar woylamin qajintabee, nashimmakkobee, darshayse wocchimbhantabee, lemmakkobeka gebhana zaga. <sup>12</sup> Barjodar woylamin qajadhen goynna banqinam bashana payya hayayse kansaa. Thoothi tarjaynasa birante payyan tarjamonam hanin tarjon wodanka hanin yedoadettsi haam eldhon rooro wul lay dehen sadanam yedaa.

<sup>13</sup> Yer wulna sadanam imea Barjobee Bhentheawa Bilathoossa birante payyan tarjamonam tarjaa Yesus Kiristoosbesa birante hana ida elqime: <sup>14</sup> Imbaa wontea Yesus Kiristoos maatayse kinin nivenka yekka upsin koam genimabee bagime yindar qolmabe maatayse toolaa.

<sup>15</sup> Kiristoossa nivintano Barjo yinti kinin giyon wodanka koda maate. Barjo gobshadaabee yimal bish wottsea maataabee, binnasaar Bitaabee imbanasaar Imbaabe kidine. <sup>16</sup> Kidi bish dembhi diymane; hayyear theedana damimon shaakante deheane. Hayyear kiam haapadehe, haapanaar damehe. Gobshibee rooro wul lay dehea kantabe kina ko dee; amiin.

<sup>17</sup> Ta wodan koka wodimo maataana eena kenin erimoamadettsi way kayen koymondar woylam kenin hayoamadettsi kena giyaa. Kenin qaabe hayayno woam ko wozise hamayse yer wulam thoosayse imea Barjodar konin doadettsi kena giyaa. <sup>18</sup> Pir payya yer eenna kenin hayoadettsi, payyan waadimanka wodimbhaana kenin maatoadettsi, kedi imanabee yisa dohonam eenbesana kinka kashimanabe ashkimbaana kenin doadettsi kena giyaa. <sup>19</sup> Yin hayada gonin dayntanam haapanana niven wodanna maatea kaya kaymin koymonam yinante keda pucche.

<sup>20</sup> Thimaatoos, hana elqimbonam toolaa. Kesa buudan dhesintonam “gon dhesintone” hambhen peen kona agen pootimon waraqinbee palimenbekala pegadhaa. <sup>21</sup> Waani waani eena “Ogodettsi wosa dhesinto daane” hamada Barjodar woylamin yinin qajenam kedi garidine.

Barjosa sunin imintono hambesana kinka ko dee.

## Kiristoos Yisa Tarjamonnante Kinin Yittsaa Bhawloos Thimaatoosna Kinin Thaapoono Lansono Warqanno

### *Ardinta*

Bhawloos Thimaatoosna kaa lansoa warqataam yinin thaapen wodanka Roome peente raq siyar dhaxadhayse dembhi pirdi kidar pirdadhaysaka yisa dembinam toolite ki dahade (4:6). Ogonante Haalin Mallan mathaapinte Bhawloosin thaapaana warqannasa kaa macchea warqataane. Kaa warqataswa iinte Bhawloos Thimaatoosna Kiristooska kisa dohon dayntan goynsa kina kiilime thoosayse ki thaapade.

Kaa mathaappaam raq tobbaadar kashana dandima ko dandime:

1. Nagaymakkono (1:1-2)
2. Thimaatoosna Bhawloos Barjoam kinin gobshoono (1:3-18)
3. Thimaatoosna kiilimenbee wocchimbhenbe imbhoono (2:1-26)
4. Thimaatoosna “Mete gishaa” hambhoono (3:1-17)
5. Thimaatoosna imbhoono elqimeno (4:1-8)
6. Bhawloos Thimaatoosna kisa dayntanna zasken goynna kinin elqimoono (4:9-18)
7. Macchin nagaymakkono (4:19-22)

Thoothi woda giidhayno Mathaap Gazansa gonamonbee payyamonbeam bhocchisea upsi gidir koda haapadhe (3:14-17). Kono thaapadhoono Barjoyn giyoono konin dohonna, gonamoka kisa upsinam koda giye; eediam dhaqintondar entsanabee waadi-mana kiam ashkanabe aga ko age. Bhawloos yinti Kiristooska bashaa maatayse Barjoyn imenam tiyota qothimima woylam wulka yinin toolenam kida giye (4:7-8). Wodi wulatte ogodettsi wo maate.

<sup>1</sup> Yesus Kiristooska haapaden lay dehen sadanam haapooda haape hamen qaabe yindar haydhenkabee Barjosa qaabon goynkabe Yesus Kiristoossa tarjamonnante nittsadhaa i Bhawlooskalanka <sup>2</sup> nashadhaa isa naasa Thimaatoosna nittsadhoono warqannone. Barjo Imbaabee Imbaa wontea Yesus Kiristoosbekalanka sunin imintonbee, garintonbee, payyamonbe hana ko dee.

### *Thimaatoosna Bhawloos Barjoam Kinin Gobshoono*

<sup>3</sup> Roro wul sootinbee rororonbe Barjoam inin miskenka walma haam inin qaabenka, eykena wonnayn hayaadettsi payya meskeka inin yina waadadhea Barjoam ida gobshe.

<sup>4</sup> Hasa ermitinam inin bhocchenka, kattsi inin wozadhoodettsi haam shedana ida anngardhe. <sup>5</sup> Ya gon Barjodar woylamin hanin qajenam ida bhocche. Ogonoar Barjodar woylamin qajintano ena birayse haaka Loydibee handa Ewniqebekal dohoonone; ta hakalar konin dohonam inta dhesidine. <sup>6</sup> Ogo goynka isa aaninam hadar inin woden wodanka nuudettsi hasa iinte yeden Barjosa imintonam hanin dhaasoadeettsi hana ida bhocchise. <sup>7</sup> Harrna hambidianna Barjo kantabee, nashimmakkobee, meten wonnonam wottsadhenbesa manpas wona ki imade; kurtumbhesa manpas wona imadehe.

<sup>8</sup> Ta keeda wosa Imbaa Kiristoosna tarjanabee kinnon goynka dhaxadhaa imbeno ooshimbaabhode; ko dahaannaar Barjo hana imen kantanka kisa dhacchintan upsinna imbesana kinka gaalen tiyaa. <sup>9</sup> Kidi wonin waadadhon payyan waadimanna dayma, yisa qaabonbee sunin imintonbeka woam dhacchayse gazana kisa eena maatayse wonin doadettsi woam ki eelade. Ogo Barjosa sunin imintonam ena woden kosa birayse Yesus Kiristooska wona ko imbhade; <sup>10</sup> taaki woam Dhacchea Yesus Kiristoossa nivintanka ko haapadhade. Kidi dembhinsa kantanam kaysayse Barjosa

dhacchintan upsin goynka dembhi qolma rooro wul lay dehen sadanam wona ki dhahade.

<sup>11</sup> Intaar ogo Barjosa dhacchintan upsinam eenna i giyebree i dhettsebe Kiristoos yisa tarjamonnante kinin yittsaa maatayse i kambhade. <sup>12</sup> Ko gaalenam ogonante tiyte i dahade. Ko dahaannaar ooshimbhattine; haydar woylamin inin qajonam dhesayda dhese; inin kina imon elqimenamaar macchin rooroaka yekka toolana kinin damenam inta dhesidine. <sup>13</sup> Yesus Kiristooska dohon Barjodar woylamin qajintanbee nashimmakkonbeka ikalanka hanin qanson tipa maaton upsinam kamsidettsi hayayse toolaa. <sup>14</sup> Hana imbhon payyan elqimenam wodar dohon Manpas Gazanka toolaa.

<sup>15</sup> Isiya peente dahaana wul iam kenin garonam dhesaada dhese; kesa shaarinte Pigelusbee Yermogenesbe ke dahade. <sup>16</sup> Imbaa wontea Yesus Onesipoorsa oonin eenana yisa payyan waadimanam kena ki waadadhe. Harrna hambidianna, kidi thoothi wodana iam ki wocchinsade; pir inin dhaxadhenkaar kidi ooshimbhadehe. <sup>17</sup> Tapir Roome gidir yinin nivon wodanka gebhi zagayse iam ki haapade. <sup>18</sup> Macchin rooroaka Imbaa wontea Yesus yisa payyan waadimanam kina ki waadadhe. Epsoon gidir hamaaka yekka ina kinin waadadhonam ya payya hayayse hada dhese.

## 2

### *Kiristoosna Gaalenam Tiya Zaskayno*

<sup>1</sup> Ta keeda isa naasa, ya Yesus Kiristooska haapadhen Barjosa sunin imintonka wocchimbhaa. <sup>2</sup> Thoothina tarjanasa birante ikalanka hanin qanson timmirinam waani eenamaar dhettsana damayna gon hamma eenana elqimayse imaa.

<sup>3</sup> Ya Yesus Kiristoosna payya banqi eedi maatayse gaalenam imbesana kinka tiyaa. <sup>4</sup> Banqi eedi banqin eensa entsaam wozisana kida zage; een waani waadadhen waadimanka yiam dhaxehe. <sup>5</sup> Yin pir galangacchon raqindar gobadhen dambindettsi yi gobaamma, bashintansa gobshin bazanam tiyehe. <sup>6</sup> Wocchimbhayse haamin koyea yinin waadadhorra haapadhen biron aapinam tiya kiam koda zaske. <sup>7</sup> Imbaa wontea Yesus yer wulka bhocchi hana kinin imenna, inin hana giyenam qaabaa.

<sup>8</sup> Dembhira dhaabhaa Dawtsa muldha maataa Yesus Kiristoosam bhocchaa. Inin giyayno Barjosa dhacchintan upsino konone. <sup>9</sup> Ogo Barjosa dhacchintan upsinam inin giyenna, siya waadadhaadettsi inin dhaxadhenka yekka gaale tiyte i dahade; ko dahaannaar Barjosa upsino dhaxadhehe. <sup>10</sup> Ogonante kediar Yesus Kiristooska haapadhen dhaqintanbee rooro wul lay dehen gobshinbeam kenin haapoadettsi Barjoyn kamaanana hamayse yer wulka darshite i dahade. <sup>11</sup> Yin giyayno upsino gon hammone: Kimbesana kinka wo diyanna,

kimbesana kinka sadaka woda dee.

<sup>12</sup> Darshayse wo wocchimbhidianna,  
kimbesana kinka woda bitime;  
kiam wo garanna, kidiar woam gara ki gare.

<sup>13</sup> Wodiar gon hamma wo maataamma,  
kidi yiam garana kinin damimonna,  
rooro wul gon hama maatayse kida dee.

### *Ooshimbhima Waadiman Ea*

<sup>14</sup> Kina yerram eenna bhocchisaa; dhalqinka kenin palimoamadettsi Barjo birante keam kiilaa. Harrna hambidianna, ogo dhalqinka palimano qansayna eenaam koda kayse; yer harrnaar pootehe. <sup>15</sup> Gonin hamon upsinam tipa giyada ooshimbhima waadima eedi maatayse Barjo birante taysate shedadhaa doota wocchimbhaa.

<sup>16</sup> Peen kogayn sun waraqqaate dhalqadhenkalanka pegimbhaa; harrna hambidianna, ogodettsin maatoono dhalqino eenaam Barjokalanka kalon kenin pegimbhoadettsi keam koda haye. <sup>17</sup> Kesa dhalqino paasha paashima hajimidettsi workaate koda

yive. Ogodettsin yerin hayayna eenasa shaarinte Hemenoosbee Pilithosbe daane. <sup>18</sup> Igina eena “Dyaana eenayn dhaabhayno ena sagidine” hante palimada gonirra kedi dhaddhismidine; waani waani eenasa Barjodar woylamin kenin qajenam ogo dhalqinka ookite ke dahade. <sup>19</sup> Ko dahaannaar, “Barjo Imbaa yinti maataanam dhesa ki dhese” tapir, “Barjo Imbaasa naabenam eelayna wul tipa maataamon waadimara ke pegadhe” hamayno milkit yindar dohoono shoa shoymino Barjoyn ashkayse woysongo turturro wocchimbhayse koda dee.

<sup>20</sup> Oonin gebhonte worqibee birrebera ashkadhoono koymo bish dayma, haaqabee dhoqalabera ashkadhoono koymo gidir daane. Iginasa antino gobshadhon waadimanna, antino waani gobshin qolmon waadimandar koda haaqe. <sup>21</sup> Igina siyana yerrakalanka edimayse yiam gazarneea ea gobshadhon waadimanna agea koymo kida maate; ogonoar payyan waadiman wulna ashkayse edadhaa Imbaa kinteana agea koymo kida maate.

<sup>22</sup> Barshamonsa siyon angarmankalanka pegadhaa; woylem gazaka Imbaa wontea Yesusam eelainabesana kinka tipamobee, Barjodar woylamin qajintabee, nashimmakkobee, payyamobeam yedayse yivaa. <sup>23</sup> Goytiysa qolma pootima palime uuri kinin bevenam dhesayse kikala pegadhaa. <sup>24</sup> Imbaa wontea Yesussa waadima eedi maataa een wulkal leemibee, dhettsana dameabee, darshayse wocchimbheabe kiam maata koda zaske; eedibesana kinka uuri kansea maata kiam zaskehe. <sup>25</sup> Kidi kinka urin kansaynaam yisa lemmakkonka kiilea kiam maata koda zaske. Yin haydi ki hanna, goninam kenin dhesoadettsi Barjo seeson waadimanam garayse kidar kenin maatea baali imima garehe hamaysene. <sup>26</sup> Ogo goynka malgimmakkon bhocchira maatayse Seethaan yisa bhocchinam kenin waadadhoodettsi kinin yedon zaanira utana dama ke dame.

### 3

#### *Macchin Rooronaka Maatayno Siyono Yerro*

<sup>1</sup> Macchin rooronaka galshea woda nivenam dhesaa. <sup>2</sup> Eeno meten yinnonam nashayno, koymo nashayno, erimayno, poorimbhayno, iirimayno, imbanana ee hamimino, edin kona hayonam bhocchimino, gazamoysa qolmino, <sup>3</sup> nashimmakkysa qolmino, qaashimana zagimino, eediam wuupayno, yiam wottsimino, eedina burqadhimino, payyan yerinam nashimino, <sup>4</sup> yidar woylamin qajadhimino, gibayno, por-makkoka purdhayno, Barjodara sagi peen kogayn wozanam nashayno koda maate. <sup>5</sup> Tapir Barjoam gobshayna maatayse keda haapadhe; ko dahaannaar Barjosa kantanam kedi garidine. Igina eenakalanka pegadhaa. <sup>6</sup> Harrna hambidianna, kedi eensa ooninte ardayse, thoothi seeso yidar baske maataana, waana waana angarmaka yivayna, yisa qaabenka raq kalaadar woymina maanaam taysate yedayna eenane. <sup>7</sup> Igina maana rooro wul timmiraate keda dee; ko dahaannaar goninam dhesana damehe. <sup>8</sup> Iyanbee Iyanberesbe Musesa bhocchinam kenin garaadettsi, eena igina meskeysa gemmaana, Barjodar woylamin qajadhen goynsa dhambintan yindar yeskaana kenin dohonna, goninam keda gare. <sup>9</sup> Iyanbee Iyanberesbesa malgimmakkono may konin haapadhondettsi, igina eenasaar malgimmakkono een wulsa birante may konin haapadhenna kena agehe.

#### *Macchino Kiilimeno*

<sup>10</sup> Ya keeda inin dhettsenbee, isa dayntanbee, isa qaabenbee, Barjodar woylamin inin qajenbee, inin darshenbee, isa nashimmakkonbee, inin yedon wocchimbhenbeka ha yivade. <sup>11</sup> Idar yeskon oytaydhanbee gaalenbeam, Anthokiabee, Iqoniyoonee, Listhirabe gidir hamin dohon oytaydhanam darshintaka inin tiyonam ya dhesaada dhese. Imbaa wontea Yesus yerra igina wulsa iira iam ki dhacchade. <sup>12</sup> Gon Yesus Kiristoska Barjodettsi maatota nashayna wul oytaydha ke oytaydhe. <sup>13</sup> Ko dahaannaar

siyanabee eediam taysaynabe eenaam dhaddhisadabee yinnon metenkaar dhaddhis-maatebe seesondar seeso thoosada keda yive.

<sup>14</sup> Yaar hanin dhesonbee gonne hamayse hanin tiyon yerinbeka wocchimbhayse dahaa; harrna hambidianna, haykalanka hanin dhesonam ya dhesaada dhese.

<sup>15</sup> Naasamora yedayse Yesus Kiristoosdar woyleamin qajintaka dhaqinta haapadhen pakalmakkonam hana imen Mathaap Gazanam ya dhesidine. <sup>16</sup> Mathaap Gazante thaapadhoono wul Barjo Manpasinka entsadhyayse ko thaapadhade; kodiar eenaam dhettsanabee, yerin yikal dhaqaanaam wacimanabee, wobon qaabora maasanabee, tipamoka waadadhaate kenin yivoadettsi keam kiilanabe koda age. <sup>17</sup> Ogoka Barjo eedi gon dhesaabee payyan waadimanna ashkimbhaabe kida maate.

## 4

<sup>1</sup> Barjo birante, pir sadanka daaanabee diyaanabedar pirdea Yesus Kiristoos birante, kisa nivintanbee bitamonbeam bhocchaate hana ida elqime. <sup>2</sup> Barjosa upsinam eenna giyaa; hana agidi ko hannaar, ko agammaar, rooro wul wocchimbhayse giyaa; eenaam kesa seeson goynsa bhocchisadabee, wacimadabee, kiiladabe darshintaka keam dhettsada wocchimbhaa. <sup>3</sup> Harrna hambidianna, eeno tipa maaton timmirinam qansana konin zagimino woda koda nive; ko daahaannaar giidhen dhalqinam qansana anngardhintaka yinin nashayna yerram kena giyada dhettsayna eenaam eelaate yinnon metenna keda pucche. <sup>4</sup> Goninam qansan garayse eerin dhalqinam qansota qaami keda wode.

<sup>5</sup> Yaar yerin wulam goyteaka waadadhaa; gaalenam tiyaa; Barjosa dhacchintan upsinam eenna giyaa; hana imbhon waadiman wulam thoosaa.

<sup>6</sup> Inta Barjona imbhea marshadettsi hayayse inin imbhayno wodano theedidine; peen kodara edimayse inin yivensa wodano yeskidine. <sup>7</sup> Banqinam payyamoka inta kansidine; isa gobenam inta macchidine; Barjodar woyleamin qajintanamaar inta toolidine. <sup>8</sup> Os birante tipamon waadimansa ina imbhien gobshin qoobheno ashkayse wodadhidine. Ogo inin tiyenam tipamonka pirdea Imbaa wontea Yesus ogo wodanka ina kida ime. Ogoamaar ina bish dayma, kisa nivintanam nashayna wulna kida ime.

### Bhawloos Yisa Kinin Bhocchisana Yerra

<sup>9</sup> Saanawa ikal nivaa. <sup>10</sup> Deemaas peen kogayn yerinam nashayse iam garayse Teselonqe katamandar yividine. Qerqis Galatia peendar ki yivade; Tiitoar Dilmathia peendar ki yivade. <sup>11</sup> Luqaas bishne ikal dahaa. Marquoos waadimanna ina kinin agenna hanka kiam entsate nivaa. <sup>12</sup> Tikiqoosam Epsoon katamandar inta yittsidine. <sup>13</sup> Hanin nivenka Thirovadda katamante Karpuskal inin garaa kotteabee mathaapinabe, kattsika mathaapinasa eebhera ashkadhaanaam ina bavate nivaa.

<sup>14</sup> Anngamon paxate ashkea Iskindiros kattsi siya yer idar ki hayade. Imbaa wontea Yesus kisa waadimandettsi kina kida ime. <sup>15</sup> Kidi wonin giyenam kattsi kinin garennal, yaar kikalanka mete hasaam gishaa.

<sup>16</sup> Iam kinin bersen yerinsa birayse malsinam inin maasenka, wul iam garayse ke yivade; imbesana kinka maatayse iam keedhaa hayyear qolehe. Ogoamaar Barjo kedar seesodettsi ki paydabhoode. <sup>17</sup> Ko daahaannaar Barjosa dhacchintan upsinam giyano inka konin thoothoadettsibee Ayiwdtay hamma eena wul kinin qansoadettsibe, Imbaa wontea Yesus imbesana kinka maatayse iam ki wocchinsade; zobonsaar apora iam ki dhacchade. <sup>18</sup> Imbaa wontea Yesus siyon yerin wulsa iira iam kida dhacche; cecinte dohon kisa bitamon raqinte iam kida yeskise. Ogona rooro wul lay gobshi kina ko dee; amiiin.

### Macchin Nagaymakkono

<sup>19</sup> Bhirsqillabee, Aqilabee, Onesipoorsa oonin eenabena “Nagaya” ina kena hamaa.  
<sup>20</sup> Erasthoos Qorontoos gidir ki shidhade; Thiropimoos kinin hajadhonna Milithi kata-mante kiam i garade.

<sup>21</sup> Bargin wodan yeskima ikal nivaa. Ewbulusbee, Bhudesbee, Linosbee, Qilawdia-bee, imbanaana wulbe “Nagaya” hana keda hame.

<sup>22</sup> Imbaa wontea Yesus Kiristoos hasa manpasinbesana ki dee. Barjosa sunin im-intono yembesana ko dee.

## Kiristoos Yisa Tarjamonnante Kinin Yittsaa Bhawloos Tiitona Kinin Thaapoono Warqanno

### *Ardinta*

Bhawloos kaa warqataam Tiitona kinin thaapoono 55-59 levensa iintene. Tiito Barjodar woylamin kinin qajoono Bhawloossa timmirinam qansayse dayma garehe (1:4). Yisa adhadhinka Girik eedi dahayse kisa nividino Sooria peen Anthokiara koda maate. Harrna hambidianna, Bhawloosbee Barnabaasbe Kiristoos yisa tarjamonnante kinin yittsaanabee donzanabesana kinka dhalqota Anthokiara Yerusaalem kenin yivenka, Tiito kembesana kinka ki yivade (Gala 2:1-3). Tiito Yesus Kiristoosdar woylamin yinin qajonsa budobar, qaaman kinin taxadhoodettsi kiam oysadhadehe. Musesa yigginam toolintaka dayma Kiristoosdar woylam qajintaka bish eedinin dhaqenam ogo goynka ko dhesadhade.

Lansoa Qorontoos mathaapaate wonin shedenka kalaa misken ooninte gaalebee yer joogaabe dehen wodanka, Tiito yivayse igma yerram kinin ashkoadettsi Bhawloos kiam ki yittsade (2 Qoro 7:6-10bee 13-16be; 8:6bee, 16-17bee, 23-24be). Bhawloos kaa warqataam kinin thaapen wodanka, Tiito Qerthes hambhen bazinsa shaarinte dohon peente dahaana misken onnaam wottsanabee eenam dhettsanabe Bhawlooskalanka hayamo tiyayse waadadhite ki dahade (1:5). Ogosa budonte Bhawloos Thimaatoosna lansoa warqataam yinin thaapenka, Tiito Roome peera dhaabhayse Dilmathia peendar Bhawloos kiam yittsima garehe.

Kaa mathaapaam raq makkamdar kashana dandima ko dandime:

1. Nagaymakkono (1:1-4)
2. Bhawloos Tiiroyn waadadhen waadimansa goyt kina kinin eshkoono (1:5-3:11)
  - a) Misken onna goynsa (1:5-16)
  - b) Waana waana hamma eena goynsa (2:1-15)
  - c) Barjodar woylamin qajaamon een goynsa (3:1-8)
  - d) Buudan timmirin goynsa (3:9-11)
3. Macchin kiilimenbee nagaymakkonbe (3:12-15)

Qerthes peente dahaana misken onnaam kattsi galshayno buudan timmirinone. Gebhika “Eedi kalaa dhaqana Musesa yigginam toola kiam koda zaske; Kiristoosdar woylamin qajano bish yeekehe” hamayna Ayiwde eena eenam keda galshe (1:10bee 13-14be; 3:9). Tapir Qerthes eenasa dambinte sharmucimakko waadima thoothi ko dahade (1:12-14).

Waani waani Qerthes misken ooninte dahaana eena ogodettsin yerinkalanka yisa metenam gishima ke shidhade (2:2-3bee 10be; 3:2). Ogonante Bhawloos Barjo upsinka dohoono timmirino kena konin zaskenam kattsi ki bhocchisade (1:3; 2:4-5bee 10be). Ko timmirinam tiyaana eena yisa waadimanka Barjoam keda gobshe. Bhawloos Barjo dayntansa, pir Barjo Imbaabee (1:1-4; 2:10; 3:4), Naasabee (1:4; 2:13; 3:6), Manpas Gazanbesa (3:5), ogora dhaqintansa (2:11-14; 3:4-7) payya hayayse ki thaapade.

<sup>1</sup> Barjosa waadima eedibee Jesus Kiristoos yisa tarjamonnante kinin yittsaabe, Barjoyn kamaanaam kidar woylamin qajintaka wocchinsanabee Barjoam kenin maatoadettsi hayen goninam keam dhettsanabe wodadhaa i Bhawlooskalanka nittsadhoono warqannone. <sup>2</sup> Ogonoar Barjodar woylamin qajadhen goyno rooro wul lay dehen sadandar qaabe hayntadar ko woyade. Buudimima Barjo rooro wul lay dehen sadanam imana ena wodansa birayse malla wona ki ardade. <sup>3</sup> Ogo wodan yeskaysaka, woam Dhacchea Barjo ogo rooro wul lay dehen sadansa inin giyoadettsi ina kinin elqimon

goynsa Barjo yisa upsinam ki dhahade. <sup>4</sup> Wosa kinka dohon Barjodar woylamin wonin qajen goynka gon isa naasi maataa Tiitona nittsadhoonone. Wosa Imbaa Barjobee woam dhacchaa Yesus Kiristoosbesa sunin imintonbee payyamonbe hana ko dee.

### *Tiito Qerthes Gidir Kinin Waadadhayno Waadimano*

<sup>5</sup> Qerthes peente haam inin garoono ogote joogonam hanin ashkoadettsibee inin hana giyondettsi misken onnasa donzanaamaar kataman wulir hanin wodoadettsibene. <sup>6</sup> Misken ooninsa donza wodadhea ea siya yer yindar haapadhima, maa kallon geshoa, naana yisa Barjodar woylamin qajayna, pir “Naana kisa sun yaayaynabee ee hamiminabene” hambhima ea ki dee. <sup>7</sup> Misken ooninsa wottsea hayayse wodadhea Barjokalanka erge yinin tiyonna, yer siya yindar haapadhima, poorimbhima, wacimima, bardhima, eedibesana goorima, koymona gibima, <sup>8</sup> chocchi tiyea, yer payya maatonam nashea, siya maaton yerira meten yinnonam gishea, tipa maataa, gazaa, meten yinnonam wottsea ki dee. <sup>9</sup> Tipa maaton timmirinam eenna dhettsaate kiilanabee ogoam garayse palimaynana malsi maasanabe kinin damoadettsi yinin dhettsadhon gonin hamon upsinka wocchimbhayse ki woye.

<sup>10</sup> Harrna hambhidianna, thoothino eeno, kalonar Ayiwd eensa shaarira “Qaama taxadha koda zaske” hamayna ee hamimina, sun pootima waraqaynabee eenaam taysaynabe daane. <sup>11</sup> Igina eenaam lay haya haam koda zaske; harrna hambhidianna, kedi ooshinsen goynka koymo haapota zaskimon yer eenaam dhettsada oonin eena wul Barjodar woylamin kenin qajerra keam keda dhaddhise. <sup>12</sup> Qerthes eenasa shaarira mooro kalaa “Qerthes eena rooro wul buuda giyayna, dabi siyatdettsi maataana, gala nashayna, waadima hayminane” ki hamade. <sup>13-14</sup> Ogono tarjamono gonne. Ogona Ayiwd eenasa eerinbee goninkalanka pegimbhayna eenasa upsinbeam kenin qan-soamadettsi Barjodar woylamin qajintaka payya kenin doadettsi wocchinsayse keam wacimaa. <sup>15</sup> Gazana eenana yer wul gazane; minngimaana Barjodar woylamin qajiminana ko hanna, gaza maataa yer kala hattear qolehe; yin pir kesa qaabonbee kesa meskenbe minngimidine. <sup>16</sup> Kedi “Barjoam dhesooda dheso” keda hame; ko dahaannaar jibbishaynabee, ee hamiminabbee, payyan waadiman wulam waadadhana damiminabe yinin dohonna, waadiman yinnonka “Barjoam dhesattone” keda hame.

## 2

### *Tipa Maaton Timmirinsa*

<sup>1</sup> Ya keeda tipa maaton timmirinam dhettsaa. <sup>2</sup> Eena gebhadhaana anngina yiam zaskendettsi dahayna, yisa gobshinam toolayna, yisa metenam gishayna maatayse, Barjodar woylamin qajintabee, nashimmakkobee, darshintabeka payya kenin doadettsi keam kiilaa.

<sup>3</sup> Yin pir gebhadhaana maana yisa dayntanka gazana kenin doadettsi, eediam wuupimina, wucamo anngarmaka yedadhaamma, payyan timmirinam dhettsayna kenin doadettsi keam kiilaa. <sup>4-5</sup> Tapir maana gebhadhaana Barjosa upsino konin irdhoamadettsi maana barshina geshoa yinteabee naana yinnabeam nashayna, yisa metenam gishayna, gaza maataana, ooninte waadadhayna, payya maataana, geshoa yinteana ee hamayna kenin doadettsi keam ke dhettse.

<sup>6</sup> Tapir barshina naana yisa metenam kenin gishoadettsi keam kiilaa. <sup>7</sup> Ya payyan waadimanam hayntaka yer wulka kamsi kena maataa; eenaam hanin dhettsenka goninbee, zaskenbee, <sup>8</sup> siyamoysa qolmon payyan dhalqinbeam giyaa. Yin hanin hayenka woam jibbayna siya wodar kenin giyea yer yinin kaysenka, ooshimbha ke ooshimbhe.

<sup>9</sup> Waadadhayna yiam waadisaynana ee kenin hamoadettsibee, yer wulka keam kenin wozisoadettsibee, siya upsi kena kenin maasoamadettsibee, <sup>10</sup> kekalanka koymo kenin diiboamadettsibe keam kiilaa. Kalon woam dhacchaa Barjosa timmirino yer wulka

konin gobshadhoadettsi rooro wul yindar woylamin qajadhaana yinin maatenam ke dhee.

<sup>11</sup> Een wulam dhacchana damayno Barjosa sunin imintono haapadhidine. <sup>12</sup> Ogono sunin imintono seeson waadimanbee peen kogayn anngarmanbeam garayse, ta wodan koka wosa metenam gishaynabee, tipa maataynabee, Barjodettsi maataynabe wonin doadettsi woam koda dhettse. <sup>13</sup> Gebhaa wosa Barjo, woam Dhacchea Yesus Kiristoos gobshinka kinin niven wodanka, gobshadhon qaabe yindar haydhenam toolite wo dahade. <sup>14</sup> Kiristoos seeson wulra woam dhacchanabee payyan waadiman waadadhana wocchimbhayna, kina edimaana zarsi wonin doadettsi woam gazinsanabe wona hamayse yiam seesosa baza kashadhea hayayse ki imade. <sup>15</sup> Hayamon wulka yerra iginam guyada, wacimada, keam kiilaa; hayyear haam ki bagabhoode.

### 3

#### *Barjodar Woylamin Qajaanayn Waadadhadyno*

<sup>1</sup> Barjodar woylamin qajayna eena yiam wottsaynabee yisa hayamo daaanabena yiam toskayse ee kenin hamoadettsi, payyan waadiman wulam waadadhana ashkimbhaana kenin doadettsi, <sup>2</sup> eedi haydarar siya yer kenin giyoamadettsi keam bhocchisaa. Kalonar eedibesana uuri kansiminabee, leeminabee, een wulkal yer wulka meten yinnonam toskayse dhahaynabe ke dee.

<sup>3</sup> Wodi kosa birayse malgimma eena wo dahade; ee hamimina, dhaddhismayna, anngarmanbee waana waana hamon waan wozanbena worsho maataana, siyamobee woogintobeka daahaana, jibbadhaanabee kinka kiam kiam jibbaynabe wo dahade. <sup>4</sup> Ko daahaannaar woam dhacchaa Barjosa payyamonbee eenam kisa nashintanbe may konin dhesimon wodanka, <sup>5</sup> kisa garintonka haali adhadhi maaton shiidhintanbee Manpas Gazanka haalisintanbeka woam ki dhacchade; wonin tipa waadadhon waadimankatehe. <sup>6</sup> Barjo woam dhacchaa Yesus Kiristooska Manpas Gazanam thoosayse wodar ki laalade. <sup>7</sup> Ogoam kinin hayoonoar kisa sunin imintonka woam tipana eena maasayse, qaabe hayayse wonin toolayno rooro wul lay dehen sadanam wonin tiyoadettsine. <sup>8</sup> Ogono gon hama upsine. Barjodar woylamin qajayna eena payya waadimanam waadadhana kenin wocchimbhoadettsi, iginam hana inin giyaana dhalqinam wocchimbhayse hanin giyoadettsi ida zage. Ogono dhalqino payyabeee eedina ageabene.

<sup>9</sup> Ko daahaannaar malgimma eenasa palimenbee, eykenasa caacin paydadhenbee, goorenbee, Muse yiggira dhaabhen wacimenbera pegimbhaa. Ogono pootimabee bazaysa qolmabene. <sup>10</sup> Eensa shaarinte edimen bevea eam kalaa way lamaa goyt kiam hanin wacimonsa budonte kikalanka pegimbhaa. <sup>11</sup> Ogodettsin waadiman hayea ea wobobee, seeso eedibee, yisa metendar kinin pirdonbeam dhesaa.

#### *Macchin Kiilimenbee Nagaymakkonbe*

<sup>12</sup> Arthemaasam way Tikiqoosam hakal inin yittsenka, ya Niqbhiliyon katamandar ikal saana nivaa. Inta barginam ogote kappana i qaabade. <sup>13</sup> Yigginam dhesea Zeenaasbee Abhiloosbeam yer kala hattear kekalanka joogoamadettsi kesa goynna zasken wulka keam kelshaa. <sup>14</sup> Wonna muldhana aapi ushimina maatayse kenin shidhoamadettsi, dayntanna zaskenam thoosana kenin damoadettsi payyan waadiman waadadhanam ke dhese.

<sup>15</sup> Imbesana kinka daahaana wul “Nagaya” hana keda hame. Barjodar woylamin qajayna wosa nashonana “Nagaya” kena hamaa. Barjosa sunin imintono ye wulka ko dee.

## Kiristoos Yisa Tarjamonnante Kinin Yittsaa Bhawloos Pilmonana Kinin Thaapoono Warqanno

### *Ardinta*

Kono warqanno yittsadhaa Bhawloos eedi kalaana kinin thaapaa warqatine. Bhawloos Pilmonabesana kinka kalaa kisa maatintansa, pir kedi lamaana Kiristoosbesana kesa dohon kalaa maatintansa, Pilmona yer kala kinin hayoadettsi miskana Bhawloos kaa warqataam ki thaapade. Kinin thaapoonoar 52-54 levensa iintene. Lemmakkobee nashimmakkobe dhahaate Bhawloos detha maaton yerinam ashkana kurtumbhima kinin thaapaa warqatine.

Warqataasa aapea dhalqa Pilmona yisa waadiman ea Anasmosbesana kinin qaashimoadettsine. Kiristoos wonnon oolonte Barjosa wacimenbee pirdinbeam kinin tiyonna, Barjo “Yena ko shidhe” hamayse woam kinin tiyaadettsi, Pilmona yisa waadiman ea Anasmosna “Hana ko shidhe” hamayse kiam kinin tiyoadettsi Bhawloosda oyse. Waadima eedira sagi imbanaaSdettsi hayayse kinin tiyoadettsi kida oyse. Bhawloos “Anasmosdar baza dahaa ko hanna, agaa bazaam idar paydaa; inta kashasane” kida hame. Ogodettsi eedi kalaasa tipamonam eedi abna paydadhen kamsinsa timmirinam koda dhettse.

Kaa mathaapaam raq dongdar kashana dandima ko dandime:

1. Nagaymakkono (1:1-3)
2. Bhawloos Pilmonana Barjoam kinin miskoono miskeno (1:4-7)
3. Pilmona Anasmosna “Hana ko shidhe” hamayse kiam kinin tiyoadettsi Bhawloosin oysoono (1:8-21)
4. Bhawlooossa Pilmonaam yivayse shedana dohoono bhocchino (1:22)
5. Macchin nagaymakkono (1:23-25)

Qolasias misken oonin eena Pilmona ooninte kinin bukenna, Bhawloos kaa warqatabee Qolasias eenana kinin thaapaa warqatabeam kala goyt ki yittsade.

<sup>1</sup> Yesus Kiristoosna dhaxadhaa i Bhawloosbee imbanaaS Thimaatoosbekalanka, kattsi wonin nashea, wombесана kinka waadadhea Pilmonanabee, <sup>2</sup> wosa imbanaan Apibianabee, wombесана kinka Kiristoosna banqin kansea Arkibhaasnabee, pir hasa ooninte Barjoam miskota bukyna eenabena nittsadhoono warqannone. <sup>3</sup> Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### *Pilmona Nashimmakkonbee Barjodar Woylamin Qajidinbe*

<sup>4</sup> Barjoam inin misken wodanka haam bhocchada rooro wul isa Barjoam ida gobshe. <sup>5</sup> Harrna hambidianna, Imbaa wontea Yesusdar woylamin hanin qajenbee Barjo eena wulam hanin nashenbeam inta qansidine. <sup>6</sup> Kiristoossa wonin maatonna, wokal dohoono payyan yerro wul may konin dhesadhadettsi, Barjodar woylamin hanin qajenam een waanina wocchimbhayse hanin dhettoadettsi hana Barjoam ida miske. <sup>7</sup> ImbanaaS, hannon goynka Barjodar woylamin qajaynasa woylammo konin ukunsonna, hasa nashimmakkonka thoothi wozabee wocchimbhebe inta haapidine.

### *Bhawloos Anasmosna Pilmonaam Kinin Miskoono*

<sup>8</sup> Ogonante haya haam zaskenam hanin hayoadettsi hana Kiristooska kurtumbhima giyana i damaakaar, <sup>9</sup> inta geccho maataa, taaki Yesus Kiristoosna dhaxadhaa Bhawloos nashimmakkoka haam ida miske. <sup>10</sup> Dhixin ooninte dahayse inin adhaa isa naasa Anasmosna haam ida miske. <sup>11</sup> Kidi ena hana pootima, taaki imbee hambena pooteane. <sup>12</sup> Woylem wulka inin nashea Anasmosam inta hadar maasate yittsidine. <sup>13</sup> Inta Barjosa

dhacchintan upsin goynka dhaxin ooninte daa i hanna, hannon oolonte ina kinin waadadhoodettsi ikal ki dee ida zage. <sup>14</sup> Ko dahaannaar hasa payyan waadimano kantaka dayma hanin nashendettsi ko dee hamayse, haam oysima yer kala hattear hayana zagattine. <sup>15</sup> Anasmos likka wodana hakalanka kinin edimoono way rooro wulna hambesana kinka ki dee hamaysene. <sup>16</sup> Keeda kaara os hambesana kinka kinin dahayno waadima eedidettsi dayma, waadima eedira sagi nashadhaa hasa imbanaas-dettsi kida maate. Harrna hambhidiana, isa kattsi nashadhaa imbanaasa ki hanna, waanka hana kinin waadadhenbee Imba Kiristooska hambanaasa kinin dohonbeka hana hamin kalon nashadhaa kida maate.

<sup>17</sup> Ta keeda aanamodettsi iam ha paydidianna, idettsi hayayse kiam tiyaa. <sup>18</sup> Haam kinin genaa yer dahaa ko hanna, way hasa baza kidar dahaa ko hanna, bazanam idar paydaa. <sup>19</sup> “Inta Bhawloos bazanam kashayda kashe” hamayse aanin innonka imal hana i thaapade. Hasa sadansa ko hanna, ya hanti isa baza eedi hanin dohonam hana bhocchisana zagattine. <sup>20</sup> Imbanaasa, Imbaa wontea Yesusna hamayse iam hanin kelshoadettsi haam ida oyse; iam galshen bhocchira Kiristooska ukunsisaa.

<sup>21</sup> Ina ee hada hame hamayse dhesintaka, hana inin giyerra sagi hanin waadad-henam inin dhesenna, hana i thaapade. <sup>22</sup> Pir nivayse inin ukunsea raq ina ashkaa; harrna hambhidiana, Barjo yesa miskenam qansayse inin yekal nivoadettsi kida haye hamayse bhocchi ida haye.

### *Macchin Nagaymakkono*

<sup>23</sup> Yesus Kiristoosna imbesana kinka dhaxadhaa Ebhapira “Nagaya” hana kida hame.

<sup>24</sup> Pir imbesana kinka waadadhayna Marquoosbee, Aristhirokoosbee, Deemaasbee, Luqaasbe “Nagaya” hana keda hame. <sup>25</sup> Imbaa wontea Yesus Kiristoossa sunin im-intono yembesana ko dee.

## Ibra Eenana Thaapadhoono Warqanno

### *Ardinta*

Kaa warqataam thaapaa hay kinin dohonam dhesadhadehe. Waani waani eeno Kiristoosin yisa tarjamonnante yittsa Bhawloosne thaapaa konin hamenka, waani tapir Barnabaas way Luqaas way Abhiloosne koda hame. Thaapaa hay kinin dohonam ko dhesadhaammaar warqanno Kiristoos seesora woam Dhacchea ookimima wosa gudullasa gebhaa kinin dohonam dhayntaka Kiristoossa gobshinam tarshen goynka koda dhettse. Warqataasa aapia dhalqa 1) Kiristoos wuldara sagi kinin dohonbee 2) kidar woylamin qajayse daano yer wuldara sagi konin dohonbene. Kattsi kinin bhochisea dhalqa wodi Kiristoosdar woylamin qajayse wonin yiven goynam garma macchinka yekka wo yive hameane (6:1-2).

Kaa mathaapaam raq makkamdar kashana dandima ko dandime:

1. Yesus wuldara sagi kinin dohoono (1:1-10:18)
  - a) Yesus Barjokala qansayse eenna giyayna wuldara sagi kinin dohoono (1:1-3)
  - b) Yesus Barjosa gaanana wuldara sagi kinin dohoono (1:4-14; 2:5-18)
 

Biraa wacimea: Barjo upsindar toozadheebhode! (2:1-4)
  - c) Yesus Musedara sagi kinin dohoono (3:1-6)
 

Lansoa wacimea: Barjo upsinam tiyattonne hameebhode! (3:7-19)
  - d) Yesus Iyaasodara sagi kinin dohoono (4:2-10)
 

Makkansoa wacimea: Barjo upsinam gonnie hamattone hameebhode! (4:1bee 11-13be)
  - e) Yesus Aarondara sagi kinin dohoono (4:14-5:10)
 

Oytsoa wacimea: Barjo upsinka naasi maateebhode! (5:11-6:20)
  - f) Yesus Lewi eedi maataana gudullara sagi kinin dohoono (7:1-28)
  - g) Yesus ena mallara sagi kinin dohoono (8:1-13)
  - h) Yesus dambinbee imbheng marshan wulbera sagi kinin dohoono (9:1-10:18)
2. Yesusdar woylamin qajayse daano yer wuldara sagi konin dohoono (10:19-13:21)
  - a) Barjokal wonin yeskayno Barjodar woylam qajintaka konin dohoono (10:19-25)
 

Dongsoa wacimea: Dhesayse seeso waadadheebhode! (10:26-31)
  - b) Peen kodar wonin dahayno Barjodar woylam qajintaka konin dohoono (10:32-11:40)
  - c) Barjo naas wonin dohonna kidar wocchimbhayse wonin gebhayno woylam kidar qajintaka konin dohoono (12:1-11)
 

Laskoa wacimea: Kidar woylamin yenin qajenam garintaka Barjosa imintora edimeebhode! (12:12-17)
  - d) Barjo wona imen koymon wulam wonin tiyayno kidar woylam qajintaka konin dohoono (12:18-24)
 

Tobhsoa wacimea: Barjona “Ee hamattone” hameebhode! (12:25-29)
  - e) Eensa shaarinte zaskenam wonin waadadhayno kidar woylam qajintaka konin dohoono (13:1-21)
3. Macchin kiilimenbee nagaymakkonbe (13:22-25)

Warqanno birayse Mathaap Gazansa bhochin wulam koda giye: Ena Mallan mathaapinte Barjo yikala qansayse eenna giyaynaka giydine; Haalin Mallan mathaapinte Barjo kalaa yisa Naasaka giydine. Barjo Naasa toydiane, pijane, Barjoane, keedheane, dhaccheane. Taaki wosa gudullasa gebhaa maatayse kantanka dahaa Barjosa mizaqinte ki dooqade.

Ogo goynka Kiristoos gaananadara sagine; keam pijaa kidine (1:4-2:18). Yesus Musebee Iyaasobedara sagine; waadadhaynasa Imbane (3:1-4:13). Yesus Aaronbee

Aaronsa eedanabedara sage; gudullasa gebhaane (4:14–7:28). Kinin woysoono hallo mallano ena mallandara sage (8:1-13). Musesa yiggin goynsa marshan machadhaana qollabedara kinin wona hayoono marshano sage (9:1-10:18).

Warqataasa lansoa aapia dhalqa (10:19–13:25) kidar woylamin qajayse daano yer wuldara sage. Kashi 11 Ena Mallan wodanka Barjodar woylamin qajayse dahaana eenasa sadano hamin taysate shedadhonam koda dhee. Kashi 12 wosa kidar woylamin qajidino harrna konin taysate shedadhenam koda dhee. Woylamin qajintaka dhesadhaana eena Barjobesana yivintabee Barjo “Yena hayayda haye” kinin hamon upsinka daabee diyabe hamin konin dohonam kedi dhaydine. Kiristoos Barjodar woylamin wonin qajensa birabee maccheabe maatintaka kidi wona wuldara sagi maataa kamsine. Gaalenin wodar niven wodanka, Kiristoosam shedintabee bhocchintabeka, Barjo woam yisa naasi hayayse kanka wonin gebhoadettsi ogo gaalenam wodar kinin bevenam dhesinta woam koda zaske. Warqataasa iinte dahaana wacimena budoka maatima os birandar woylam qajintaka yivaate wonin gebhoadettsi keda bhocchise.

### *Barjo Yisa Naasaka Kinin Giyoono*

<sup>1</sup> Barjo ena wodanka waana waana goytika Barjokala qansayse eenna giyaynaka wosa eykenana thoothi wodana giydine. <sup>2</sup> Taaki macchin wodan koka yer wulsa toydi maataa yisa Naasaka wona giydine. Barjoar yer wulam kinin pijoono Naasa yintea goynkane. <sup>3</sup> Kidi yinti Barjo gobshinsa shaakane; kidi yisa dantanka Barjo Imbaabesana kalaane. Yisa kantan upsinka pijadhin wulam keedhayse ki yedade. Eenaamaar kesa seesora yinin gazinsonsa budonte cecinte wuldara gobshinka sagi maataa Barjosa mizaqimbar ki dooqade.

### *Yesus Barjosa Gaananadara Kinin Sagayno*

<sup>4</sup> Barjo Naasana imbhoono naabeno Barjo gaananasa naabendara kattsi sage; ogodettsi kidi kedara sage. <sup>5</sup> Harrna hambhidianna, Barjo yisa gaananasa kalaana “Ya isa Naasine;  
inta haam kina adhidine”  
pir,

“Inta kisa Imba ida maate;  
kidiar isa Naasi kida maate”  
hamayse kinin giyaa hayne? <sup>6</sup> Pir Barjo bira Naasa yinteam peendar yinin nittsenka,  
“Barjosa gaanana wul kumpurdhayse kina ke goodime”  
ki hamade.

<sup>7</sup> Barjo yisa gaananaka  
“Isa gaananaam wuradettsi ida haye;  
ina waadimaynaamaar nuusa laabhinadettsi ida haye”  
ki hamade. <sup>8</sup> Yisa Naasaka ko hanna,  
“Barjo, hasa bitamon borkotono rooro wul lay koda dee;  
hasa eenaam tipamoka hada wottse.”

<sup>9</sup> Tipamon waadimanam nashayse siyon waadimanam ha jibbade.  
Ogo goynka hasa Barjoa haam kamayse hasa aanammadara kattsi sagi hayayse haam wozisen zaytinka ki qadhade”  
ki hamade. <sup>10</sup> Yin pir,

“Imbo, ya ena birayse peenam ha pijade;  
cecinoar hasa aanin waadimanone.”  
<sup>11</sup> Igina kaya ke kaye;

ya rooro wul daada dee.  
Kedi wul apaladettsi keda gecche;

<sup>12</sup> apaladettsiar keam hada umbhuse;  
apaladettsiar ookaadaooke.

Yaar rooro wul lay ookimattane;  
hasa levensa macchi qolehe”

ki hamade.

<sup>13</sup> Barjo gaananasa kalaana

“Haam jibbaynaam hasa hayamon demente inin hayenka yekka isa mizaqinte dooqaa”  
hamayse kinin giyaa hayne? <sup>14</sup> Ta keeda gaanana wul Barjoyn dhacchaynaam kenin  
kelshoadettsi nittsadhayna Barjona waadadhayna manpasinatayu?

## 2

### *Gembho Dhaqintano*

<sup>1</sup> Ogonante wonin qanson yerira shurt hamayse wonin dhamboamadettsi, koam kattsi wocchinsayse yeda woam koda zaske. <sup>2</sup> Barjosa gaananaka giidhoono upsino wocchi konin dohonna, ogo upsira sageabee kona ee hamimabe yiam zasken dhabinam ke tiyade. <sup>3</sup> Ta keeda wodi ogo gebhon dhaqintanam boosimbhayse lay woda hamina haminooda dhaqe? Ogo dhaqintansa upsinam birayse giyaa Imbaa wontea Yesus yintine; kinin giyenam qansaanaar wona ke giyaysaka gonne hamayse wonin tiyoadettsi woam haydine. <sup>4</sup> Barjo yimal milkitbee, tarshen yerinbee, waana waana hamon yisa kantanam dhahayna yerrabeam hayntaka, pir Manpas Gazansa imintonam yinin qaababettsi imintaka kesa tarjamonam wocchinsidine.

### *Eedi Naasin Dhaqensa Entsa Maataa Yesus Kinin Dohoono*

<sup>5</sup> Barjo ko wonin giyen os birante niven peenam gaananasa hayamon demente haysadehe. <sup>6</sup> Tapir mathaapin gazante yin giyayse raq kalaate thaapadhidine:

“Barjo, ya eedina qaabana eedi yer hare?

Kiam shedana eedi yer hare?

<sup>7</sup> Gaananakala kiam likkaa toskade;  
dheg hama gobshi kisa metendar qoobhedettsi ha wodade.

[Hasa aanin waadiman wuldar kiama haynsade.]

<sup>8</sup> Yer wulam kisa hayamon demente hayade”

hamayse thaapadhidine. Yer wulam kisa hayamon demente kinin hayenka, kisa hayamon demente haydhaama yer kala hattear qolehe. Ko dahaannaar ta yer wul kisa hayamon demente konin dohonam akar haapootone.

<sup>9</sup> Ko dahaannaar kidi Barjosa sunin imintonka wo wulna kinin diyoadettsi, Barjosa gaananakala likka tokaa maataa, dembhinsa gaalen yinin tiyon goynka dheg hama gobshi kisa metendar qoobhedettsi wodadhaa Yesusam woda haape. <sup>10</sup> Yer wul Barjonabee Barjokabe ko pijadhade. Barjoar thoothi naasi yisa maataynaam gobshindar bavana, dhaqintansa entsa maataa Yesusam gaalenka gonin hama kiam haya ko zaskade.

<sup>11</sup> Eenaam gaza hayeabee kanka gaza haydhaynabe Imba kala naasine; ogo goynka Yesus “Imbanaanane” hamayse keam eelana ooshimbhehe. <sup>12</sup> Ogonante

“Hasa naabenam imbanaanana ida giye;

hana goodimota bukaynasa shaarinte mazmurka haam ida gobshe”

ki hamade. <sup>13</sup> Taar,

“Inta kidar woylamin qajayda qaje”

ki hamade; pir,

“Imbee Barjo ina kinin imaana isa naanabe kishaa!”

ki hamade.

<sup>14</sup> Ogonante “isa naana” hamayse kinin eelaanasa waabee zombhibe kesa dohon-dettsi, Yesusaar kedettsi eedi ki maatade. Ogoam kinin hayoonoar yisa dembhinka ee-diam deesana kantaysa dahaa Seethaanam kaysanane. <sup>15</sup> Yin pir dembhingga yinin kur-tumbhenna yisa dohon leven wulka worshodettsi maatayse dahaanaam worshamora bulanane. <sup>16</sup> Harrna hambidianna, Yesussa qaabono Barjosa gaananaam kelshana dayma Abraamsa muldhanaam kelshanane. <sup>17</sup> Ogona yer wulka imbanaanadettsi maataa kiam ko zaskade. Ogo goynka eensa seesonam shiishana machadhea marsha imota hamayse Barjona waadadhea eenna burqadheabee yindar woylam qajadheabe gudullasa gebhaa ki maatade. <sup>18</sup> Kidi yinti taysate shedadhayse gaalenam yinin tiyonna, taysate shedadhaynaam kelshana dama ki dame.

### 3

#### *Yesus Musedara Sagi Kinin Dohoono*

<sup>1</sup> Ogonante cecinngayn Barjosa eelimenam kashimayna, gaza maataana imbanaanato, Barjodar woylamin wosa qajidin goynsa Barjoyn yittsaa gudullasa gebhaa Yesusam bhocchee. <sup>2</sup> Muse Barjo oonin wulir woylam yindar qajadhea kinin dohondettsi, Yesusaar yiam kamayse wodaa Barjokal woylam yindar qajadhea ki maatade. <sup>3</sup> Ooninam woysea oonindara sagi kisa gobshi dohondettsi, ogodettsi Yesus Musedara sagi gobshi yiam zaskea maatayse ki haapadhade. <sup>4</sup> Ooni wul koam woysaa eedi daane; yerin wulam ashkaa Barjone.

<sup>5</sup> Os birante giidhen yerinna tarja maatota Muse Barjo oonin wulsa waadima eedi dahayse woylam yindar qajadhea ki maatade. <sup>6</sup> Kiristoos Barjosa Naasi dahayse Barjo oonin wottsadhenka woylam yindar qajadhea ki maatade. Wodiar Barjosa oonine; kisa ooni wonin maatayno wonin woylam qajenbee qaabe daran hayayse woninka erimayna yerrabeam wocchinsayse wonin yedenkane.

#### *Barjo Eenana Imbhoono Upsino Wocchino*

<sup>7</sup> Ogonante Manpas Gazanin giyendettsi,  
“Kina kisa upsinam ye qansidianna,  
<sup>8</sup> darante yesa eykena iam taysaye kenin shedenka

iam kinin dhagattsondettsi  
yesa woylaminam wocchinseebhode.

<sup>9</sup> Ogote eykena yenna iam taysate ke shedade;  
eedi lamaa kaysa levena inin waadadhonam ke haapade.

<sup>10</sup> Ogonante ogo wodanka dahaana eenaam i wacimade.  
‘Kesa woylammo rooro wul koda dhaddhise;  
isa goynamaar kedi dhesadehe’ i hamade.

<sup>11</sup> Pir ‘Inin imen ukunse raqinte  
hamin ko dahaakaar kedi ardehe’  
hamayse isa wacimenka inta mallidine”

hamayse ko giyade.

<sup>12</sup> Imbanaanato, yesa iira hayyear lay dehea Barjokala pegisea siyabee kidar woylamin qajima woylambe konin doamadettsi mete yesaam gishee. <sup>13</sup> Kalon yesa iira hayyear seesoka taysadhayse yisa woylaminam kinin wocchisoamadettsi, “kina” hamayse kinin eldhaa rooroayn dohonka yekka rooroaka kinka kiam kiam kilee. <sup>14</sup> Harrna hambidianna, birayse wosa dohon Barjodar woylamin wonin qajenam macchinka yekka wocchinsayse wo yedanna, Kiristoosbesana kashimayna wo maatade. <sup>15</sup> Ogonoar

“Kina kisa upsinam ye qansidianna,  
yesa eykena iam kinin dhagattsondettsi

yesa woylaminam wocchinseebhode” ko hambhade.

<sup>16</sup> Igina kisa upsinam qansayse kiam dhagattsanaa haybene? Igina Muse keam entsaysaka Gibth peera utaana wultayu? <sup>17</sup> Barjoar eedi lamaa kaysa levena yindar wacimaana igina haybene? Igina seeson hayaana, yisa leesinin darante dhambayse shidhaanatayu? <sup>18</sup> “Inin kena imen ukunsen raqinte ardehe” hamayse kedar kinin mallaana haybene? Igina kina ee hamimina eenatayu? <sup>19</sup> Ogonante Barjo kena imen ukunsen raqinte ardana kinin damaammo Barjodar woylamin kinin qajea kesa qolmon goynka konin dohonam woda haape.

## 4

### *Barjoyn Imen Ukunsen Raqinte Ardinta*

<sup>1</sup> Ta keeda wona kinin imen ukunsen raqinte “ardeeda arde” hamayno qaabe wonin hayayno akar konin dohonna, yesa iira hayyear ogo ukunsen raqinte kinin ardensa baali konin shidhoamadettsi, wodi wulatte mete wosaam wo gishe. <sup>2</sup> Harrna hambhidianna, “ardeeda arde” hamayse kena giidhon wozisen upsinam wonaar giidhidine. Ko daahaannaar kedi yinin qanson upsinam Barjodar woylam qajayse kinin tiyaamon goynka kena pootima ko shidhade. <sup>3</sup> Barjo

“‘Inin imen ukunsen raqinte

hamin ko dahaakaar kedi ardehe’

hamayse isa wacimenka inta mallidine”

kinin hamondettsi, wodi Barjodar woylamin qajaana ogo Barjo wona kinin imen ukunsen raqinte ardooda arde. Barjo waadimano ko hanna peen pijadhorra yedayse thoothidine. <sup>4</sup> Harrna hambhidianna, raq kalaadar tobhsoa rooroasa

“Barjo yisa waadiman wulra tobhsoa rooroaka ki ukunsade”

hamayse thaapadhidine. <sup>5</sup> Taar ogo “Inin imen ukunsen raqinte kedi ardehe” ki hamade.

<sup>6</sup> Ogo wozisen upsinam ena birayse yina giidhaana eena ee hamanam kinin garonna, Barjoyn kena imen ukunsen raqinte ardadehe. Ta keeda akar ogo ukunsen raqinte ardayna daane. <sup>7</sup> Ogoamaar ini birayse giidhondettsi,

“Kina kisa upsinam ye qansidianna,

yesa woylaminam wocchinseebhode”

hamayse Barjo thoothi levesa budonte Dawtka maatayse kinin giyon upsinka “kina” hamayse pir rooroam giyntaka ki dhahade. <sup>8</sup> Iyaaso eenaam Barjosa ukunsen raqinte arsidi ki hanna, ini Barjo “kina” hamayse rooro absa giyehe.

<sup>9</sup> Ta keeda ukunsen rooroa Barjo eenana akar shidhidine. <sup>10</sup> Harrna hambhidianna, Barjo yisa waadimara kinin ukunsondettsi, Barjoyn imen ukunsen raqinte ardea yisa waadimara kida ukunse. <sup>11</sup> Ogonante eedi hayyear igina eenayn ee haman garondettsi ee haman garayse kinin dhamboamadettsi, Barjosa ukunsen raqinte ardana wo wo-chimbhe.

<sup>12</sup> Barjo upsino lay deheabee waadadheabene; wulbar taxen halpan carindara kattsi sagi carine; sadanbee manpasinbe, jiininbee lepinbeam yinin edenka yekka taxaynone; woylaminsa iinte aadhimayse dohon bhocchinbee anngarmanbeam marmaraynone.

<sup>13</sup> Barjo birante aachimaa yer qolehe; kisa birante yer wul maybee pundiribe maatayse koda haapadhe. Wodiar malsin maasana woam zaskayno kisa birantene.

### *Yesus Gudullasa Gebhaa Kinin Dohoono*

<sup>14</sup> Ta keeda cecindar Barjokal yivaa gudullasa gebhaa Barjo Naasa Yesusin wosa dohonna, ogono gonne hamayse kidar woylamin wonin qajenam wocchinsayse wo yede. <sup>15</sup> Harrna hambhidianna, kidi gudullasa gebhaa wosa qajenkaar burqadhabna dameane. Kidi yer wulka wodettsi taysate ki shedadhade, ko daahaannaar seeso

hayadehe. <sup>16</sup> Ta keeda seesonsa garintonam tiyanabee kelsho woam zasken wodanka Barjosa sunin imintonam wonin haapoadettsibe Barjosa sunin imintonin haapadhen kisa bitamon borkotonkal kurtumbhima kidar woylamin qajintaka wo theede.

## 5

<sup>1</sup> Gudullasa gebhaa eensa shaarira kamayse Barjona maaten yerin wuldar eensa oolonte Barjona imbhenee seesonna machadhen marshanbeam kinin imoadettsi kida wodadhe. <sup>2</sup> Kidi eedi kantaysa qolma yinin dohonna, timmirinsa qolmina eenabee yerin yikal dhaqayna eenabena burqadhana kida dame. <sup>3</sup> Ogona eedisa seesonna yinin machendettsi yisa seesonnaar tapir Barjona marsha macha kiam koda zaske.

<sup>4</sup> Aarondettsi Barjoka eldhaa yi dahaamma ogo gobshinam tiyana damea qolehe. <sup>5</sup> Ogodettsi Kiristoos gudullasa gebhaa yinin maaten gobshinam yisa hayamonka tiyadehe. Kidi gudullasa gebhaa kinin dohoono

“Ya isa Naasine; inta haam kina adhidine”

kina hamaa Barjokalankane. <sup>6</sup> Raq abir taar Barjo

“Melkethedeq gudulmakkondettsi rooro wul lay ya gudulne”

kina ki hamade.

<sup>7</sup> Yesus eedi maatayse peen kodar yinin dehenka, dembhira kiam dhacchana damea Barjodar upsi gebhibee ermitbeka yinin misken oysimenam ki thetsade. Lemmakkoka yisa metenam yirk kinin hayonna Barjo kisa miskenam ki qansade. <sup>8</sup> Barjo Naas yi daahaakaar, yinin tiyen gaalenka ee hamintanam dhesidine. <sup>9</sup> Barjona ee hamintaka gon maatayse yinin haapadhonsa budonte yina ee hamayna wulna rooro wul lay dhaqintanam imea ki maatade. <sup>10</sup> Barjoar Melkethedeq gudulmakkondettsi gudullasa gebhaa hayaye kiam ki wodade.

### *Eeno Barjodar Woylamin Yinin Qajenam Konin Garoamadettsi Imbhoono Upsino Wochino*

<sup>11</sup> Yerin ogosa wonin giyayno thoothi yer daane; ko dahaannaar saana yekal konin dhesimiminna may yena giyana woam koda galshe. <sup>12</sup> Yedi ta koka yekka eenam dhettsayna maata yeam konin zaskenka, Barjosa upsira biron timmirinam eedi ab pir yeam dhettoadettsi koda zaske. Ogona yeam zaskaynoar raathine, gala wocchitehe. <sup>13</sup> Harrna hambhidianna, raathi bish kumea wul naasi yinin dohonna tipanbee wobonbeam edadhen timmirinam dusadehe. <sup>14</sup> Galan wochin yiam zaskayno payyanbee siyonbeam yisa waadimanka edanam dusaana, eena gembhanane.

## 6

<sup>1-2</sup> Ta keeda Kiristoossa wona imbon biron timmirinam garayse dhesintondar wo yive. Birayse wonin dheson timmirindar woya woam koda zaske, lansi kodar maata woam zaskehe. Ogoro birono timmirino diyon waadimanam garayse Barjodar maatintabee, Barjodar woylamin qajintabee, shiidhime shiidhimintabee, eedidar aan wodintabee, dembhira dhaabhintabee, rooro wul lay dehen pirdinbesa giyayno timmirinone. <sup>3</sup> Barjo giyanna ogora sagayse ab sagi dhesintondar yivooda yive.

<sup>4</sup> Barjodar woylamin qajintanam garaanaam Barjodar hamin hayaye maasana ko dandime? Igina eenana birayse kala goyt shaakano kena shaakidine; cecinngayn imintonamaar lavayse kedi shedidine; waani eenbesana Manpas Gazanam kedi tiydine.

<sup>5</sup> Barjosa payyan upsinbee niven wodansa kantanbeam lavayse kedi haapidine. <sup>6</sup> Ogosa budonte Barjodar woylamin yinin qajenam ke garaysaka, kesa seeson waadimara Barjodar keam maasana dandimehe. Harrna hambhidianna, kedi yinti Barjo Naasaam pir masqalindar konngate ziitayse deesa ke deese; eensa birantear kiam baga ke bage.

<sup>7</sup> Thoothi wodana doobinin qanenka wucayse kodar koraana eenana maaten aap-inam ushayno peeno Barjokala gembhakonam koda haape. <sup>8</sup> Ukumbhanbee mugurin-beam baqalsayno ko hanna, pootimino koda maate; kodar ashimeda yeske; macchinoar kosa nuuka koqadhane.

<sup>9</sup> Yedi isa nashonato, yin wo giyaakaar, yesa dhaqintanbesana agea yer gebhi yesa dohonam dhesooda dhese. <sup>10</sup> Barjo tipamoka pirdeane; ogona yesa waadimanbee gazana eenaam kelshintaka kisa naabenna hamayse enaar taar yenin dhehen nashim-makkonbeam walehe. <sup>11</sup> Yedi wul “Tiyooda tiye” hamayse qaabe hayayse yenin toolen yerinam yenin yedenka yekka ogo yesa wocchimbhenam macchinka yekka yenin dhoodettsi woda anngardhe. <sup>12</sup> Wonin anngardhaynoar boosona eena dayma Barjodar woylamin qajintabee darshintabeka wocchimbhayse “Tiyeeda tiye” hamayse yena imbhon yerinam yedyna eena yenin maatoadettsine.

### *Barjo “Yena Hayayda Haye” Hamayse Kinin Giyoono*

<sup>13-14</sup> Barjo Abraamna “Hayayda haye” yinin hamen wodanka, kininka mallea kidara sagi ab qolmonna,  
“Gon haam gettsayda gettse;  
hasa muldhanaam gon thoosayda thoose”  
hamayse yidar ki mallade. <sup>15</sup> Ogodettsi Abraam darshayse Barjodar qaabe hayntaka yina imbhon yerinam ki haapade.

<sup>16</sup> Eeno yinin mallenka yidara sagea naabeaka koda malle; yisa dhalqinam mallaka wocchinsintaka palimen wulam koda shiishe. <sup>17</sup> Ogodettsi Barjo yisa qaabono konin ookimiminam dhettsana zagayse “Hayayda haye” kinin hamon upsinam mallaka ki wocchinsade. <sup>18</sup> Ogoka Barjo kinin ookimina buudaar kinin giymina yerra lamaana, iginaar kisa upsinbee mallanbeam wona ki imade. Yerra lamaana igin goynka wosa birante dohon qaabe wonin hayenam wocchinsayse yedana wonin damoadettsi, dhacchintan haapania kikal nivaana wodi gebhon kantanam haapooda haape. <sup>19</sup> Ogono qaabe wonin hayayno wosa sadanna bazindara sagadhen gonngalanam yinka woysadhea detha maataa gon hama anngamodettsine. Kodiar Barjosa gazan ooninte apalanka ishkadhon gazisadhon raqinsa iinte koda arde. <sup>20</sup> Ogo gazisadhon raqinte Yesus Melkethedeq gudulmakkondettsi rooro wul lay gudullasa gebhaa maatayse wona birayse ki ardade.

## 7

### *Gudula Melkethedeq*

<sup>1</sup> Melkethedeq Saalem peensa bitbee Wuldara Sagea Barjona waadadhea gudulbe ki dahade. Agaa Melkethedeq Abraam binnaam banqin uxate bashayse kinin maatenka, goynte kidar keerayse kina pathin ki imade. <sup>2</sup> Abraamaar yinin tiyaana yerra tambha wulsa iira kalaam tiyate kina ki imade. Melkethedeq naabensa bulino “tipamon waadadhea bitaa”, lansoa “Saalem peensa bitaa” way “payyamon bitaa” hamintane. <sup>3</sup> Melkethedeqsa imbabee indabe dhesimehe, way kisa adhadhidinsa muldha haapad-hadehe; kisa levensa birabee macchibe qolehe. Agaa Melkethedeq rooro wulna gudul maatayse sadanka yinin dehenka Barjo Naasaam kida maate.

<sup>4</sup> Ea agaa hamin gebhi kinin dohonam shedee! Wosa eykenasa imba maataa Abraam ki dahaakaar, banqira uxate kinin bavaana yerra tambhasa iira kalaam bulayse kina ki imade. <sup>5</sup> Lewi muldhara gudulmakkon waadadhayna waani eenakalanka tambhasa iira kalaam kenin tiyoadettsi Muse yigginka kena giidhidine. Ta keeda igin eena Abraamsa muldhanabee kesa imbanaanabene. <sup>6</sup> Hamin ko dahaakaar Melkethedeq Lewi eensa muldhara yi dahaammaar, Abraamin kina tambhasa iira kalaam kinin

imenam ki tiyade; Barjo “imayda ime” kinin hamondar qaabe hayaa Abraamnaar pathin ki imade. <sup>7</sup> Pathin tiyeadara pathin imea kinin sagayno mayne. <sup>8</sup> Ta goyti kalaaka tambhasa iira kalaam tiyayna dembhin diyayna Lewi eenane; goyti abka ko hanna, tambhasa iira kalaam tiyea sadanka kinin dohonam kinnon goynsa tarjadhaa Melkethedeqne.

<sup>9</sup> Ta keeda tambhasa iira kalaam tiyea Lewi yintiar Abraamka maatayse tambhasa iira kalaam imidine hamintane. <sup>10</sup> Harrna hambhidianna, Melkethedeq Abraambesana yinin keeron wodanka Abraamsa muldhara Lewi akar adhadhadehe.

<sup>11</sup> Ta keeda eenna yigginam imbhoono Lewi eenasa gudulmakkon goynkane. Kesa gudulmakkonka Barjosa qaabonin thoothayno ko dahaannaar, ini Aaronsa muldhara dayma Melkethedeqdettsi gudul ab harrna ko zaske? <sup>12</sup> Harrna hambhidianna, gudul-lasa muldhanam ookadhenka, yigginamaar ooka ko zaske. <sup>13</sup> Agaa yin giidhaa gudula aba muldharane; muldhan ogora Barjona marshan machadhen raqindar woyayse gudulmakkon waadimanam waadadhaa eedi qolehe. <sup>14</sup> Wosa Imbaa Yesus Yiwdasa muldhara kinin dohoono may dhesimoonone; Muse gudullasa yinin giyenka, Yiwda enaam dhahayse kinin giyaa yer kala hattear qolehe.

### *Yesus Melkethedeqdettsi Gudul Kinin Dohoono*

<sup>15</sup> Yerro ogono kalon may maatayse konin haapadhayno Melkethedeqdettsi waana gudul maatayse kinin dhaabhennane. <sup>16</sup> Kidi gudul kinin dohoono muldhamon goynsa buldhon yigginka dayma kayma sadasa kantakane. <sup>17</sup> Harrna hambhidianna, “Ya Melkethedeq gudulmakkondettsi rooro wul lay gudulne” hamayse kina giidhidine.

<sup>18</sup> Ena giidhoono upsino kantaysa qolmabee pootimabe konin dohonna koam shishadhidine. <sup>19</sup> Harrna hambhidianna, Muse yigginka yer kala hattear thoothana damadehe. Keeda Barjokal wonin theeedea kalon qaabe yindar wonin hayea yer wona imbhidine.

<sup>20</sup> Ogonoar Yesus gudul kinin dohoono malla qolma maatadehe; waani eena kosa birayse gudul kenin dohoono malla qolmakane. <sup>21</sup> Kidiar gudul kinin dohoono mal-lakane. Harrna hambhidianna, “Barjo ‘Ya rooro wul lay gudulne’ hamayse mallidine; kidi qaabon yinnonam ookehe”

hamayse kina giidhidine. <sup>22</sup> Ogo mallanka Yesus kalon agen mallansa waasi ki maatade.

<sup>23</sup> Kedi rooro wul lay kenin doamadettsi dembhinin keam maronna gudullasa pay-dino thoothi ko dahade. <sup>24</sup> Yesus rooro wulna dehea kinin maatonna, kisa gudul-makkono ookimimonone. <sup>25</sup> Ogonante kena Barjoam miskota rooro wulna sadaka dehea maatayse kinin dohonna, kanka Barjodar nivaynaam gon keam dhacchana dama ki dame.

<sup>26</sup> Ta keeda wona zaskea gudullasa gebhaa Yesusne. Kidi gaza maataa, gothime yindar qolmaa, seesoysa qolmaa, seeson eenakalankaar edimayse cecinsa bhaabar dhev hamaane. <sup>27</sup> Kidi igina waani gudullasa gembhadettsi birayse yisa seesonna, budontear eensa seesonna, rooroaka rooroaka Barjona marsha ima kiam zaskehe. Harrna hambhidianna, yiam kala goyt seesosa marsha hayayse kinin imen wodanka, ogo yerinam yinin lansimin goynka ki macchade. <sup>28</sup> Muse yigginin gudullasa gembha hayayse keam konin wodayno kantaysa qolmina enaamne; yigginsa budonte nivoono mallano ko hanna, Barjosa qaabonam rooro wulna thoosaa Barjo Naasaam ko wodade.

### *Yesus Haalin Mallansa Gudullasa Gebhaa Kinin Maatoono*

<sup>1</sup> Ta keeda wonin giyen dhalqinsa kattsii aapea dhalqa yin giyeane: Cecinte wuldara gobshinka sagi maataa Barjosa bitamon borkotonsa mizaqinte dooqaa ogodettsin

gudullasa gebhaa wosa daane. <sup>2</sup> Kinin waadadhaynoar gon apala ooni maaton Barjosa gazan oonintene; ogu apalan ooninin konngadhoono eedisa aanka dayma Barjokane.

<sup>3</sup> Gudullasa gebhaa kalaanin wodadhayno Barjona imbhenee marshanbeam kinin imoadettsine. Ogonante agaa gudullasa gebhaa kinin imea yer daa koda zaske. <sup>4</sup> Kidi peendar daa ki hanna, ini gudul maatehe. Harrna hambhidianna, Muse yigginka Barjona imintonam imayna gudulla ke dahade. <sup>5</sup> Kenin waadadhayno cecinngayn waadimansa kamsibee shipobe maatonamne. Ogonoor Muse apalan ooninam ashkota kinin hayenka, Barjo “Dhukandar hana haapadhon kamsindettsi yer wulam mete hasaam gishayse ashkaa!” hamayse kina ki giyade.

<sup>6</sup> Keeda Yesus ena mallandara sagi agen “imayda ime” kinin hamondar waadadhen sagi mallansa motala kinin dohondettsi, kina imbhoozo waadimano kesa waadimara saginone. <sup>7</sup> Birono mallano bagime yindar qolmino ko hanna, ini lansono mallano zaskehe. <sup>8</sup> Harrna hambhidianna, Barjo eendar bagime dohonam shedayse yin ki giyade:

“Imba Barjo yi giyna:

‘Marrato! Israveel eenabee Yiwda eenabekal  
haali malla inin ardayno woda koda nive.

<sup>9</sup> Ogon mallano Gibth peera keam bulana  
kesa aaninam inin yeden wodanka,  
kesa eykenabesana inin ardon mallandettsitehe.

Kedi isa mallanam kinin garonna  
intaar keam i garade’ ki hamade.

<sup>10</sup> Pir Imbaa Barjo yi giyna:

‘Marrato! Ogo wodansa budonte  
Israveel eenabesana inin ardayno mallano yin giyaynone:

Isa yigginam kesa meskente ida wode;  
kesa woylemdarar ida thaape.

Kesa Barjoar ida maate;  
kediar isa eedi keda maate.

<sup>11</sup> Yisa peen eenam ko hannaar  
imbanaasaam ko hannaar “Barjoam dhesaa!”  
hamayse dhettsea eedi qolehe.

Harrna hambhidianna, naana shaqanara yedayse  
gembhaka yekka ebeno wul iam dhesa ko dhese.

<sup>12</sup> Ee kinin hamaamonam kena ida gare;  
kesa seesonam keeda kaara os bhocchattine’ ki hamade.”

<sup>13</sup> Ta keeda “haali malla” kinin hamenka, birono mallano gecchidine hamintane.  
Ogonante geccho maatoonno yerro wul konin kayensa wodano yeskidine.

## 9

### *Peente Dohon Barjosa Gazan Ooninsa Waadimano*

<sup>1</sup> Biron mallansa manpasinngayn Barjona goodimadhensa yigginbee peenngayn gazan ooninbe kosa ko dahade. <sup>2</sup> Lamaadar kashadhoono apalan onno ashkadhdine. Shaakanam daran wodadhenbee, Barjo birante wodadhen balashanbee, yindar wodadhen tharbhezanbe iinte dohoono birono ranqo “Gazano Onno” hamayse koam koda giidhe. <sup>3</sup> Lanson apalansa budobar dohoono ranqo “Gazisadha Raq” hamayse koam koda giidhe. <sup>4</sup> Ogo gazisadhon raqinte worqinka ashkadhoono Barjona qunyan daran cubshate imbhene raqinbee pir worqin yindar yettsayse ashkadhoono mallansa

taabootinbe kosa iir ko dahade. Taabootinsa iinte manna hambhen galayn iir wodadhon worqinka ashkadhon koymonbee hacchan bulon Aaronsa koolinbee, mallanam yindar thaapadhaana sennabe ke dahade.<sup>5</sup> Taabootindar dohon seesonam shiishota zombhin yindar yiithadhen raqinam kaapina ishkayna gobshiysa daahaana kerubeel hambhaynasa kamsi ke dahade. Ko dahaannaar igma yerra wulsa ta paydayse giyana damattone.

<sup>6</sup> Yer wulam ogodettsi ashkadkhonsa budonte gudulla Barjona goodimota biron apalan ooninte rooro wulna keda arde.<sup>7</sup> Lanson ooninsa iinte ardea gudullasa gebhaa bishne. Kinin ardaynoar levensa iinte rooro kalaa bishne; ogonoar yinnon seesonbee eenin dhesima waadadhon seesonbena yinin yiithen zombhin tiyma ardehe.<sup>8</sup> Biron apalan oonin dohonka yekka gazan ooninsa Gazisadha Raqate ardana yivayno goyno akar haapadhaamonam Manpas Gazano ogo goynka koda eshke.<sup>9</sup> Ogonoar ta wodanna kamsine; ogona Barjona machadhayna marshanabee waani imintonabe Barjona goodimayse imeasa meskenam gon gazisana konin damimonam koda eshke.<sup>10</sup> Haalin sharqanin buldhenka yekka igma yerra waadimadar haaqayna yigginane. Kediar galabee, wucadheabee, waana waana shiidhimenbe goynka meskenam dayma waanam bish ookayna dambinane.

### Gon Hamon Barjosa Gazan Ooninsa Waadimano

<sup>11</sup> Ko dahaannaar Kiristoos ta niven payyana yerra goynka gudullasa gebhaa maatayse ki nivade; kinin ardoono apalan onno peen kodar dohorra kalon gebhibee gon hamabene. Ogono onno eedinin aanka woysammo, kote dohon pijadhira waana maatoonone.<sup>12</sup> Kidi Gazisadhon Raqinte kalaa goyt yisa zombhinam bavate ki ardade; qolebee ootobesa zombhi bavate ardadehe. Ogona sadan yinnonam seesonsa baza kashadhea hayayse yisa zombhinam imintaka rooro wul lay dhaqintanam wona ki hapsade.

<sup>13</sup> Qollabee wanngabesa zombhinbee marsha hayayse Barjona koqadhea ooto qatabhsa dibininbeam minngimaana eenadar yiithadhenka kesa waanam gazinsayno ko hanna,<sup>14</sup> Kiristoossa zombhino sadanka dahaa Barjona wonin waadadhadettsi, mesken wonnonam diyon waadimara hamin ko woam gazinsimine? Kiristoos rooro wul lay dehen Manpasinka meten yinnonam siya yer yindar qolma marsha hayayse Barjona ki imade.<sup>15</sup> Eldhaana eena Barjo “yena imayda ime” hamayse kinin giyon lay wonin tiyen raqinam kenin yedoadeettsi Kiristoos haalin mallansa motala ki maatade. Ogono yin maatoonoo eena biron mallansa demente dooqayse kenin waadadhon seesora keam dhacchana kidi sadan yinnonam seesonsa baza kashadhea hayayse kinin diyonnan.

<sup>16</sup> Elqime daa ko hanna elqimaa easa dembhinam shed a zaske.<sup>17</sup> Harrna hambidianna, elqimadhoono yerro konin woyayno elqimaa ea ki diyannane; sadaka daa ki hanna, kisa elqimeno waadadhehe.<sup>18</sup> Ogonante birono mallano ko hannaar zombhi laymima woysadhadehe.<sup>19</sup> Birayse Muse yigginsa upsin wulam een wulna ki giyade. Ogosa budonte ootobee qolebesa zombhi noqoka worsayse yisoobh hambhea hattasa koolibee yaati zoosa sitibeam tiyayse, yiggin mathaapinbee een wulbedar zombhinam ki yiithade.<sup>20</sup> Kinin yiithoonoar “Barjo ye toole kinin giyon mallansa zombhino ogonone” hamaysene.<sup>21</sup> Yin pir gazan apalan ooninbee ogote yindar waadadhadhen koymon wulbedar zombhinam ki yiithade.<sup>22</sup> Muse yiggindettsi yer likka shidhaysaka yer wul zombhika koda gazinsadhe hamana woda dame; zombhi laymima seesonsa garinto haapadhehe.

<sup>23</sup> Ta keeda igma cecinte daahaana yerrasa kamsi maataana ogo waadimanka gazimbha keam koda zaske; cecinte daahaana yerra ke hanna ogora kattsi sagi Barjona imbhien marshanka gazimbha keam koda zaske.<sup>24</sup> Harrna hambidianna, Kiristoos

gon gazan ooninsa kamsi maaton eedin woyson gazan ooninte ardadehe; kidi ta wona Barjo birante haapadhana cecinte ki ardade. <sup>25</sup> Ayiwd eenasa gudullasa gebhaa qolesa zombhi bavate leven levenka gazan ooninsa Gazisadha Raqate kida arde. Kiristoos thoothi wodana yiam Barjona imbhea marsha hayayse ima kiam zaskadehe. <sup>26</sup> Ini zaskidi ko hanna, peen pijadhorra yedayse thoothi wodana gaale tiya kiam ko zaskade. Keeda wodansa macchin rooronka seesonam shiishana yiam Barjona marsha hayayse kalaa goyt ki haapadhade.

<sup>27</sup> Eedi kalaa goyt diyayse ogosa budontear pirdin kinin tiyayno kikalanka shidhiminone. <sup>28</sup> Ogodettsi Kiristoos thoothin eensa seesonam shiishana kalaa goyt yiam marsha hayayse ki diyade; tapir seesonam baskana dayma wozanka toolayna eenaam dhacchana lanso kida nive.

## 10

### *Kiristoossa Dembhino Seesonam Shiishea Marsha Konin Maatoono*

<sup>1</sup> Muse yiggino os birante niven payyan yerinsa shipone; gon hamaatehe. Ogonante leven levenka rooro wul Barjona imbhenn marshanam tiyayse Barjodar nivayna eenaam hamin hambhaakaar Muse yiggino gon eedi keam maasehe. <sup>2</sup> Muse yiggino gon hamma eena keam maasea ko hanna, kedi marshan ogoam imbhennam ini gara ke gare. Harrna hambhidianna, Barjona goodimota nivayna eena kalaa goyt seeson yinnora gazimbhayse seesoysa qolmina kenin maatenam kesa meskente kena koda dhesime. <sup>3</sup> Igina marshana leven levenka seesonam kenin bhocchayna yerrane. <sup>4</sup> Harrna hambhidianna, wanngabee qollabesa zombhino eensa seesonam shiishana damehe.

<sup>5</sup> Ogonante Kiristoos peen kodar nivanna yinin hayenka yin ki guyade:  
“Marshanbee waani imintonbeam zagaatane;  
    ko dahaannaar ina bishi ha pijade.

<sup>6</sup> Koqadhen waan wul marshanbee  
    seesonam shiishana imbhenn marshanbeka wozadhaatane.

<sup>7</sup> Ogo wodanka, ‘Barjo,  
    Mathaatipinte innon goynsa konin thaapadhondettsi  
        hanin giyonam waadadhana i nivade’ i hamade.”

<sup>8</sup> Birayse yiggin goynka imbhenn “Marshanbee waani imintonbe, koqadhen waan wul marshanbee seesonam shiishana imbhenn marshanbeam zagaatane; kankaar wozadhaatane” ki hamade. <sup>9</sup> Ogoraar “Hanin giyonam waadadhana i nivade” ki hamade. Ogo goynka Kiristoos lansonam woysana bironam ki shiishade. <sup>10</sup> Ogo Barjoyn guyondettsi Yesus Kiristoos bishin yinnonam kalaa goyt Barjona imbhenn marsha hayayse kisa diydinka wo gazimbhade.

<sup>11</sup> Gudulla wul rooroaka rooroaka Barjona marshan machadhen raqinte woyayse seesonam shiishana damimin marshanam maatite maatite keda mache. <sup>12</sup> Kiristoos seesonam shiishota Barjona imbhenn rooro wul lay waadadhene marshanam kalaa goyt yinin imonsa budonte Barjosa mizaqinte ki dooqade. <sup>13</sup> Ogora kiam jibbaynaam kisa hayamon demente keam haydhenka yekka kaalite ki dahade. <sup>14</sup> Harrna hambhidianna, Barjona imbhenn marsha kalaaka gazisadhaanaam rooro wulna gon maataana eena keam kinin hayonnane.

<sup>15</sup> Manpas Gazanoar dhalqin ogosa wona koda tarje. Birayse  
<sup>16</sup> “Igina rooronasa budonte kembesana inin ardayno mallano yinne:  
Isa yigginam kesa woylaminte ida wode;  
    kesa meskendaraar ida thaape”  
ko hamade. <sup>17</sup> Guttsayse  
“Kesa seesonbee siyon waadimanbeam keeda kaara os bhocchattine”

ko hamade. <sup>18</sup> IGINA seesona wulam shiishadhonsa budonte keeda kaara os seesonam shiishota imbhea marsha qolehe.

### *Barjokal Theeda Woam Konin Zaskoono*

<sup>19</sup> Ta keeda imbanaanato, Yesussa zombhinka gazan ooninsa Gazisadha Raqate wonin ardoadettsi hayamo wona imbhidine. <sup>20</sup> Wonin ardaynoar ishkadhon apalan goynka, hamintano yisa dembhinka wona kinin bulon haalin lay dehen goynkane.

<sup>21</sup> Barjosa ooninte hayamoysa dahaa gebhi maataa gudul wosa daane. <sup>22</sup> Ogonante siyon meskera gazimbhana wosa woylamindar noqo yiithadhayse, wosa bishina-maar gazan noqonka shiidhayse, gonne hamayse wonin tiyon woylamin qajadhenka qothime qolmaka Barjokal wo theede. <sup>23</sup> “Yena imayda ime” wona hamaa gon hama kinin dohonna, ta wonin tarjensa qaabe haydhenam wocchinsayse wo yede. <sup>24</sup> Nashimmakkobee payya waadimabeka wonin doadettsi bhocchayse kinka kiam kiam wo qaymise. <sup>25</sup> Rooro wul kinka bukada kinka kiam kiam wonin wocchinsoadettsi, waani waani kenin dusondettsi wosa bukanam wo garabhoode. Kalonar Imbaa wontea Yesussa nivintan roorono konin yeskonam bhocchaate ogoam hayee.

<sup>26</sup> Goninam wonin dhesonsa budonte nashayse seeso wo waadadhidianna, ta keeda kaara os seesonam shiishana Barjona imbhea marsha kala hattear qolehe. <sup>27</sup> Ta keeda shidhoono kurtunsen pirdinbee Barjosa banqin eenaam kojen kurtunsen nuunsa pirdinbeam kaalano bishne. <sup>28</sup> Muse yigginam garaanadar eedi lamaa way makkam kidar ke tarjanna, kina burqadhima kiam koda deesadhe. <sup>29</sup> Ta keeda Barjo Naasaam bagaa, kanka yiam gazisadhon mallansa zombhinam pootima yerdettsi paydaa, Barjo wona sun kinin imon Manpas Gazanam iiraa hamin dohon pirdi tiya kiam ko zaske! <sup>30</sup> Harrna hambhidianna, “Halon maasea intane; inta zasken bazanam kashayda kashe” hamaam dhesooda dhese. Ogodettsi “Barjo Imbaa yisa eendar kida pirde” ki hamade. <sup>31</sup> Ogonante sadanka dahaa Barjosa aaninte dhambano kattsi kurtunsaynone.

<sup>32</sup> Shaakan yena shaakonsa budonte thoothi gaale haapayse yenin darshaana igina birana rooronaam bhoccnee. <sup>33</sup> Rooro kala kala yedi eensa birante irdhaate, osbee orabe haydhada yeam qacchadhidene. Rooro kala kala ogodettsi gaale yindar yeskaana eenabesana kinka kalaa dayntaka yedi gaale haapidine. <sup>34</sup> Dhaxadhaanana ye burqadhade. Yedi kalon agen, rooro wulna yesa kayma koymonin cecinte dohonam yenin dhesonna, yesa koymonam yekalanka sardhenka wozaka ye darshade.

<sup>35</sup> Ta keeda gebhon bazanam kanka yenin haapenna kurtumbhima wocchimbhenam gareebhode. <sup>36</sup> Barjoyn giyonam hayayse, “yena imayda ime” kinin hamonam tiyana darshintaka wocchimbha yeam koda zaske. <sup>37</sup> Harrna hambhidianna, “Nivota dahaa likka roorosa budonte kida nive, kappehe.

<sup>38</sup> Isa birante tipa maataa ea

idar woylamin qajintaka sadanam kida haape;  
os budoka ki yivina inta kanka wozadhattine”

hamayse thaapadhidine. <sup>39</sup> Wodiar dhaqana Barjodar woylamin qajayna eenakalankane; os budoka yivayse kayayna eenakalankatehe.

## 11

### *Barjodar Woylam Qajinta*

<sup>1</sup> Barjodar woylam qajinta hamintano qaabe hayayse wonin kaalayna yerraam gon wonin haapaadettsi hayayse tiytabee wonin haapimina yerraam wonin haapaadettsi hayayse paydabene. <sup>2</sup> Eena birana Barjokal kenin shawkadroon Barjodar woylamin kinin qajonnane.

<sup>3</sup> Yer wul Barjo upsika konin pijadhonam wonin dhesayno Barjodar woylamin qajidinkane; ogonante haapadhayno yerro haapadhimina yerraka ashkadhonam dhesooda dhese.

<sup>4</sup> Aabeel Qaaveelsa marshandara sagi maaton marsha Barjona kinin imoono Barjodar woylamin qajidinkane. Barjo Aabeelsa marshanam wozaka kinin tiyenka Aabeel tipa kinin maatonam kina ko tarjadhad; Aabeel ki diyaakaar Barjodar woylamin kisa qajintano ta koka yekka giidhite ko dahade.

<sup>5</sup> Henookdar dembhi yeskoamadettsi tura cecindar kiam tiidhoono Barjodar woylamin kisa qajidinkane; Barjo kiam kinin tiyonna haapadhadehe. Harrna hambhidiana, kiam tiidhonsa birayse Barjoam kinin wozisoono kina giidhidine. <sup>6</sup> Barjodar woylamin qajima Barjoam wozisana dandimehe. Harrna hambhidiana, Barjokal theedea ea Barjo kinin dohonbee kiam zagayna eenana baza imea kinin dohonbeam gonne hamayse tiya kiam koda zaske.

<sup>7</sup> Nohe akar haapadhaamon yerrana Barjoyn kina guyonna, Barjona kurtumbaate oonin eena yinnaam dhacchana noqondar yiven gonngalanam kinin ashkoono Barjodar woylamin qajidinkane. Ogonante peendarahaanadar pirdinam ki yeskisade; Barjodar woylamin qajidinka haapadhen tipamonam Barjo kina ki imade.

<sup>8</sup> Abraam yivayse kinin tiyen peenam kinin tiyoadettsi Barjoyn kiam eelen wodanka, hamodar yinin yivenam yi dhesaammaar yivana ee kinin hamoono Barjodar woylamin qajidinkane. <sup>9</sup> Abraam Barjo “imayda ime” hamayse kinin guyonam yimbesana tiyayna Yisaaqbee Yayqoobbete eedi eedi peera nivaa maatayse apalan ooninte dahada Barjo imota kinin guyon peente kinin dohoono Barjodar woylamin qajidinkane. <sup>10</sup> Harrna hambhidiana, Barjo qaabayse kinin woysen rooro wul dehen katamanam kinin kaalonnane.

<sup>11</sup> Saaraar “imayda ime” hamaa Barjo gon hama kinin dohonam yinin dhesonna, yisa levenka gecchoono maatayse adhima adhimino yi dahaakaar, konin sirmoono Barjodar woylamin qajidinkane. <sup>12</sup> Ogonante diyaa eeediettsi paydadhea agaa kalaa Abraamkalanka cecinsa wancodettsi thoothaanabee bazinsa gasante dohon shaamidettsi paydadhimina kisa muldha maataanabe ke adhadhade.

<sup>13</sup> Igina wul Barjodar woylamin qajayse ke diyade. Barjo kena “imayda ime” kinin hamonam kedi haapadehe; ko dahaannaar pegeka shadayse yinin tiyaadettsi ke wozadhad. Peendarar chocchibee eedi peera nivaanabe yinin maatenam ke guyade. <sup>14</sup> Yin guyayna eena yina maaten peenam zagayna yinin maatenam keda dhee. <sup>15</sup> Ogo yinin utoon peenam qaabidi yi hanna, gidir maataate yivana dama ke dame. <sup>16</sup> Keeda ogora sagi cecingayn peenam keda anngardhe. Ogonante Barjo katama kena kinin ashkonna, “Wosa Barjoane” hamayse kiam kedin eelenka kidi ooshimbhehe.

<sup>17</sup> Abraam taysate kinin shedadhon wodanka Yisaaqam Barjona imbhea marsha hayayse kinin imoono Barjodar woylamin qajidinkane. Barjo “imayda ime” kinin hamon upsinam tiyaa Abraam naasa yisa kalaam Barjona imbhea marsha hayayse imanane. <sup>18</sup> Ta keeda Barjo “Yisaaqra hasa muldhano koda ute” kina hamidine. <sup>19</sup> Abraam “Barjo Yisaaqam dembhira dhaasana dama ki dame” hamayse ki bhocchade. Ogora dembhira dhaabhadhensa kamsidettsi Yisaaqam pir ki haapade.

<sup>20</sup> Yisaaq os birante maaten yerin goynsa Yayqoobbbee Esawbena pathin kinin imoono Barjodar woylamin qajidinkane.

<sup>21</sup> Yayqoob diyana yinin yeskenka Yoseep naana lamaanana pathin kinin imonbee koolindar keedhimayse Barjona kinin goodimonbe Barjodar woylamin qajidinkane.

**11:3** Pija 1:1-27; Maz 33:6bee 9be.    **11:4** Pija 4:3-10.    **11:5** Pija 5:21-24.    **11:7** Pija 6:13-22.    **11:8** Pija 12:1-5.

**11:11** Pija 18:10-14; 21:2.    **11:12** Pija 15:5; 22:17; 32:12.    **11:13** Pija 23:4; 1 Haydhon 29:15; Maz 39:12.    **11:17** Pija 22:1-14.    **11:18** Pija 21:12.    **11:20** Pija 27:27-29bee 39-40be.    **11:21** Pija 47:31-48:20.

<sup>22</sup> Yoseep yisa dembhin rooroa yeskaysaka, Israveel eena Gibth peera kenin uten goynbee yisa lepin goynsa har haya keam zaskenbe kinin giyoono Barjodar woylamin qajidinkane.

<sup>23</sup> Museam adhaana imbanan kidi naasi payya kinin dohonam shedayse bitaasa dhalqinam kurtumbhima arpi makkamna kiam kinin aachoono Barjodar woylamin qajidinkane.

<sup>24</sup> Muse yinin gebhonsa budonte Gibth peen bita Paaron naansa naasi yinin hambhenam kinin ee hamaammo Barjodar woylamin qajidinkane. <sup>25</sup> Ogonante Muse likka wodana seesonka haapadhen wozandara sagi Barjo eenbesana kinka gaalen haapintanam ki kamade. <sup>26</sup> Os birante yinin tiyen bazanam yinin haaponna Gibth peente dohon koymondara Barjoyn qadhaa Kiristoosna hamayse bagadhintano kattsi wodimmakko konin dohonam ki bhocchade.

<sup>27</sup> Muse bitaasa wacimenam kurtumbhima Gibth peera kinin utoono Barjodar woylamin qajidinkane. Haapadhma Barjoam yinin haapaadettsi bhocchayse ki wocchimbhade. <sup>28</sup> Birana naanaam deesea Barjosa gaana Israveel eenasa birana naanaam kinin kaamoamadettsi hamayse, Paasikan bavaalinsa sharqanbee zombhin kerindar yiithadhen sharqanbeam kinin waadadhoono Barjodar woylamin qajidinkane.

<sup>29</sup> Israveel eena pee wocchidar yinin yivendettsi Ertera bazindara kinin sagoono Barjodar woylamin qajidinkane; Gibth eena sagota kinin hayenga noqono ke wulam ko itsade.

<sup>30</sup> Israveel eena Iyarko kerminsa gasanka rooro tobbhaa kinin shironsa budonte kerminin yiipoono Barjodar woylamin kesa qajidinkane.

<sup>31</sup> Sharmucimakkon waadadhayno Revaab peen doyaynaam payyamoka yisa ooninte keam konin tiyonna, Barjona ee hamiminabesana yinin diyerra konin dhaqoono Barjodar woylamin kosa qajidinkane.

<sup>32</sup> Ta keeda hariy giyo? Gedoonbee, Baraaqbee, Somsombee, Yoptaahebee, Dawtbee, Saameelbee, Barjokala qansayse eenna giyaynabe goynsa inin giyoamadettsi woda ina ko tokade. <sup>33</sup> Kedi Barjodar woylamin yinin qajonna binnaam ke bashade; tipamoka eenam ke wottshade; kena imbhon qaabe yindar hayhenam ke haapade; zobonsa aponam ke diithade; <sup>34</sup> nuunsa kantanam ke diskade; halpankalankaar ke dhaqade; yisa qajera ke wocchimbhade; banqin yinin kansenka kantaka dahaana eena ke maatade; een peera banqin kango nivaanaam ke oytade. <sup>35</sup> Maana yisa diyaana eedanaam dembhira kinin dhaabhenka ke haapade. Waani eenoar sagi dayntanam haapanan dembhira dhaabhadhenam bhocchayse yinin diyenga yekka gaale ko tiyade; dhaxira koam buldhenam nashadehe. <sup>36</sup> Waani eenoar eensa yiigi yer maatayse ko qandhade; waani eenam sansalaka dhaxayse dhaxin ooninte keam ko dhabadhadhe; <sup>37</sup> seenika paxate keam ko deesadhade; magazka lamaadar keam ko taxadhade; halpaka keam ko deesadhade; yaatibee qolebesa eebhe qaadhayse yaayte ke dahade; qambhibee oytate yiam yittsadhaana maatayse gaalite ke dahade. <sup>38</sup> Darantabee, dhukandarbee, seenin qoopan dementebee, oolon iintebi yaayte ke dahade. Ogo goynka peeno kinin dehea payya raq kena maatayse haapadhadehe.

<sup>39</sup> Igina wul Barjodar woylamin kinin qajonna Barjoka shawkadhaana ke maataakaar, Barjo “imayda ime” kinin hamonam akar kedi haapadehe. <sup>40</sup> Barjo wona kalon agen yerinam kinin qaabonna ogonante kedi wombesana kinka gon eedi keda maate; yimal bishtehe.

## 12

### *Barjo Wosa Imba Kinin Dohoono*

<sup>1</sup> Ta keeda polodettsi wosa gasante woam karaana igina wul wosa tarjana kenin dohonna, wodiar baske wodar maataana yerra wulbee woam zaanidettsi yeden seeson-beam wodara marayse wosa birante dohon gobenam darshintaka wocchimbhayse wo gobe. <sup>2</sup> Wonin gobaynoar Barjodar woylamin wonin qajensa birabee maccheabe maataa Yesusam shedintakane. Kidi os birante haapadhen wozan goynka ooshinsen gaalenam hamin ko dahaakaar paydima masqalindar dembhinam darshayse Barjosa bitamon borkotonsa mizaqimbar ki dooqade.

<sup>3</sup> Ta keeda yenin boosimbhoamadettsibee kanka wozadhanamaar yenin garoamadettsibe seeson eena wulsa jibbintanam darshaa Yesusam bhocchee. <sup>4</sup> Yedi seesonbesana kinka mashimada zombhi yenin laalenka yekka siyane hameetene.

<sup>5</sup> Barjo yisa naasidettsi hayayse yeam kinin kiilonam yedi walidine:

“Inaane, Barjoyn haam qanenka toskaabhode;  
haam kinin wacimenka kanka wozadhanam garaabhode.

<sup>6</sup> Harrna hambhidianna, Barjo yinin nasheam kida qane;  
naasidettsi yisa hayayse yinin shedeam kida dhabshe”

hamayse ko thaapadhade.

<sup>7</sup> Barjo yisa naasidettsi yeam hayayse kinin paydenna kinin qanenka darshee. Imbaanin qanima naasi daaw? <sup>8</sup> Kisa naasi maataana wulin tiyen wacimenam ye tiymina imba yisa qolmina naana yeda maate, kisa naasi maatattene. <sup>9</sup> Tapir wo wulam wacimayna woam adhaana wosa imbana daane; keam gobshooda gobshe. Ta keeda sadaka daana manpasin goynka wosa Imba maataana kalon ee hamano hamin ko woam zaskimine? <sup>10</sup> Kedi payya maatayse kena haapadhondettsi, likka wodana woam ke wacimade; kidiar kisa gazamonam kashimayna wonin doadettsi wona agen yerinna woam kida wace.

<sup>11</sup> Wacime wul eediam bucchea koda maate, wozisea maatehe; budobar koam dusaana eenana payyamoysa iir thoothoono tipamoka waadadhaden gonin waadimanam kena koda hapse.

### *Kilimebee Wacimebe*

<sup>12</sup> Ogonante qajadhaana yesa annabee buqonabeam wocchinsee. <sup>13</sup> Wobo maataana kenin paashoadettsi, kalon kenin woboamadettsi yesa roonna agea goytı ashkee.

<sup>14</sup> Eedi wulbesana payyamoka doota zagee; gazamoka daana wocchimbhee. Harrna hambhidianna, gazamo qolma hayyear Imbaa Barjoam haapehe. <sup>15</sup> Yekalanka hayyear Barjosa sunin imintonkalanka kinin shidhoamadettsi, pir thaqima caaci yesa shaarinte baqalayse yeam galshada thoothin eenam konin mingisoamadettsi mete yesaam gishee. <sup>16</sup> Sharmucimakkon hayea eedi way taaki yinin itsen galanna hamayse yisa toydamonam shanshaa Esawdettsi Barjoam gobshima eedi haapadhoamadettsi mete yesaam gishee. <sup>17</sup> Ogosa budonte Esaw pathinam tiyana kinin zagen wodanka ogo pathinam kinin mardhonam yedi dheseeda dhese. Eepada wocchimbhayse ki zagaakaar biron wobon qaabon yinnonam goytı hamaakaar ashkana damadehe.

<sup>18</sup> Yedi aanka kaamana dandimen nuunka aten Siina dhukankal yeskeetene; liilonbee, thiapanbee, saylenbekal, <sup>19</sup> thurumbansa upsinkal way Barjoyn giyen upsinkal yedi yeskeetene. Upsin ogoam qansaana eena “Keeda kaara os upsi ab wona ko giidhabhoode” hamada miskan ke yedade. <sup>20</sup> Harrna hambhidianna, “Qole hattear dhukanam kaamidi ko hanna seenika paxate ko deesadhe” hamen dhalqinin kedar dethonna kedi baskana damadehe. <sup>21</sup> Musear “Kattsi kurtumbhayse gibazaybhe” kinin hamenka yekka haapadhayno yerro kattsi kurtunsea ko maatade.

<sup>22</sup> Yenin yeskoono Thiyoon dhukankalbee lay dehea Barjosa katama maaton cecin Yerusaalemkalbene. Wozadhaate bukaana thoothi shiika paydadhayna Barjosa gaananakal yedi theedidine. <sup>23</sup> Naabensa cecinte thaapadhaana Barjodar woylamin qajayse Barjosa naasi bira maatayse bukaanabee, een wuldar pirdea Barjobee, gonin dayntanam haapaana tipana eenabekal yedi theedidine. <sup>24</sup> Haalin mallansa motala Yesuskalbee, Aabeelsa zombhindara sagi agenam giyen gazinsana yiithadhon zomb-hinbekal yedi theedidine.

<sup>25</sup> Yena giyeana “wodi qansattone” yenin hamoamadettsi mete yesaam gishee. Harrna hambhidianna, igina peendar kena kinin giyenka ee hamaamma ke dhaqaamma, ta keeda cecira wona giyeakalanka wo pegadhanna haminooda dhaqe! <sup>26</sup> Ogo wodanka kisa upsino peenam ko jugade; taaki “Peenam bish dayma kala goyt maasayse cecinamaar ida juge” hamayse ki guyade. <sup>27</sup> Ogon “kala goyt maasayse” kinin giyayno upsino konin dhahayno, jugimimina yerra wocchimbhayse kenin doadettsi, jugimayna yerra hamintano pijadhaana yerra kenin kaysadhensane. <sup>28</sup> Ogonante wodi jugimimon Barjosa bitamonam wonin yedenna Barjoam wo gobshe; Barjoam wozisen goynka gobshaatebee kurtumbhaatebe kina wo waadadhe. <sup>29</sup> Harrna hambhidianna, Imbaa wontea Barjo koqate kaysea nuudettsine.

## 13

### *Barjoam Wozisayno Waadimano*

<sup>1</sup> Rooro wul imbanaasdettsi yenin kiam nashea nashimmakko yesa ko dee. <sup>2</sup> Shonnaam tiyayse shocchisadhenam waleebhode. Harrna hambhidianna, ogodettsi shonnaam tiyada waani waani eeno dhesima Barjosa gaananaam ko tiyade.

<sup>3</sup> Kembesana kinka yenin dhaxadhaadettsi hayayse dhaxadhaana eenam bhocchee; yediar kedettsi gaalenam yenin tiyendettsi gaalen tiyaynaam bhocchee.

<sup>4</sup> Keemono een wulkal gobshadhoono ko dee. Geshoabee geshon yinnonbe kidar woylamin qajadhaana yinin maatenam joshkintaka yisa keemonam ke minngisabhoode. Harrna hambhidianna, sharmucimakkon hayayna eenadar Barjo kida pirde.

<sup>5</sup> Koymo nashimmakkorra pegimbhee; yesa dohonam ina yeeka ko yeeke hamee. Harrna hambhidianna, Barjo yinti  
“Inta haam dhabattine; haam garattine”  
ki hamade. <sup>6</sup> Ogonante qothime qolma  
“Imba Barjo iam kida kelshe; kurtumbhattine.  
Eedi iam hamin ki haye?”  
woda hamee.

<sup>7</sup> Barjosa upsinam yena giyaana yesa entsanaam bhocchee; kesa waadimansa aap-inam bhocchaate Barjodar woylamin yenin qajenka keam maatee. <sup>8</sup> Yesus Kiristoos naa, kinaar, rooro wul lay ookimehe.

<sup>9</sup> Kosa birayse yenin qansaamon waana waana hamon timmirinka bavate yeam ko yiidhabhoode; wosa woylammo galansa yigginam toolintaka dayma Barjosa sunin imintonka wocchimbidi ko hanna payyane. Harrna hambhidianna, galansa yigginka yivayna eenana hamin ko dahaakaar kena pootadehe. <sup>10</sup> Barjona marshan daran imbhayno wosa raq daane; ko dahaannaar marshan raqin ogodar Barjona marshan imbhennam gazan apalan ooninte dooqayse waadadhayna gudulla tiyayse itsa keam zaskehe.

<sup>11</sup> Gudullasa gebhaa seeson gardhoadettsi Barjosa gazan ooninte qollasa zombhi tiyayse kida arde; qollasa waanam kerminsa iira bulayse mayante koda koqadhe.

<sup>12</sup> Ogonante Yesus ogodettsi eenam yisa zombhinka gazinsana katamansa gasante

gaale haapayse ki diyade. <sup>13</sup> Ta keeda kidar yeskon ooshimbhenam wodar tiyayse gurdara utayse mayante Yesuskal wo yive. <sup>14</sup> Harrna hambidianna, wodi akar niven katamanam anngarmaka woda toole; lay dehea katama wosa peen kodar qolehe.

<sup>15</sup> Ta keeda Jesus Kiristooska gobshinsa imintonam rooro wul Barjona wo ime; ogonoar kisa naabenna tarjayno apono konin imayno Barjoam gobshintansa imintone.

<sup>16</sup> Payyan yerinam hayntanbee yesa dohon yerinam waani eenbesana kinka kashim-intanbeam waleebhode. Harrna hambidianna, ogodettsino imintono Barjoam wozisa ko wozise.

<sup>17</sup> Yeam entsaynana ee hamee, kesa wottsin demente dehee. Harrna hambidianna, keam oysadhea oysime konin dohonna yesa sadanam toolana keda wocchimbhe. Yedi kena yenin ee hamenka kedi yisa waadimanam wozaka keda waadadhe. Ogotay ko hamma woylaminka yisa atada keda waadadhe; ogono yena pootehe.

### *Macchino Kiilimeno*

<sup>18</sup> Wona Barjoam miskee. Payya meske wosa konin dohonam wodi dhesidine; wodi yer wulka payyamo dayntaka doota woda anngardhe. <sup>19</sup> Kalon wocchimbhayse Barjoam yenin miskoadettsi yeam inin miskayno saana yekal inin nivoadettsine.

<sup>20</sup> Gebhaa yaanaam gishiman gishea wosa Imbaa Yesusam rooro wul lay dehen mallansa zombhinka dembhira dhaasaa payyamon imea Barjoa <sup>21</sup> kisa bhocchinam yenin hayoadettsi payyan yerin wulka yeam ki dhaxinse; yiam wozisen yerinamaar Jesus Kiristooska wosa iinte ki haye. Jesus Kiristoosna rooro wul lay gobshi kina ko dee; amiin.

<sup>22</sup> Imbanaanato, kono yena inin thaapoono warqanno tokaa konin dohonna isa kiilimenam darshayse yenin tiyoadettsi yeam ida miske. <sup>23</sup> Imbanaasa Thimaatoosam dhaxin oonira kiam buldhonam yenin dhesoadettsi ida zage; saanawa ikal ki nivanna kimbesana kinka nivayse yeam shedayda shede. <sup>24</sup> Yeam entsaynabee gazana eena wulbena “Nagaya” ina kena hamee. Thaalian peen eena “Nagaya” yena keda hame.

<sup>25</sup> Barjosa sunin imintono ye wulbesana ko dee.

## Yayqoobin Thaapoono Warqanno

### *Ardinta*

Yayqoob warqatinam kinin thaapoono 37-42 levensa iintene hamayse koda bhocchadhe. Haalin Mallante haapadhayna mathaapina wulsa birayse thaapadhaa mathaapane. Ogona misken oonin woysadhorra yedayse waana waana taysate shedeaya Barjodar woylamin qajaynadar konin yeskoono dhesima ko dhesime. Warqatinin thaapadhoono peen wuldar Ayiwd eedi dahayse wanthingaana Barjodar woylamin qajaanana konin dehenka, waana waana goa maatea yer kedara ko keeraakaar keam wocchinsayno kesa Barjodar woylamin qajidinone. Yayqoob yisa warqatinka Barjodar kesa woylamin qajidino gon konin dohonam dhettsana hamin kenin taysate shedadhonam dhaana bish dayma, ogo woylamin qajidinam kesa dayntanka hamin waadimadar haccha keam zaskenam dhettsanane.

Thaapea Bhawloos “Imbaa wontea Yesussa indanaasa Yayqoob” hamayse kinin eebleane (Gala 1:19). Yesussa indanaana oydi dahayse (Maat 13:55) kinin waadadhenka kidar woylam qajehe (Wannis 7:5). Ko dhaaannaar Kiristoos cecindar kinin yivonsa budonte kidar woylam qajidine (Yi Waa 1:14; 1 Qoro 15:7). Bhethiroos Yerusaalemra kinin yivonsa budonte, Yayqoob Yerusaalem misken ooninsa entsa ki maatade (Yi Waa 12:17). Yayqoob misken onnasa gebhi maataa entsa kinin dohonam dhesana damooda dame (Yi Waa 15:13-29; Gala 2:9). Haalin Mallante macchi kinin haapadhoono Yittsadhaanasa Waadimano 21:18ne. Misken oonin eerinka 54 levensa Ayiwd eena Barjodar woylamin qajadhen goynka ke deesade koda hambhe.

Woylam qajinta haminta hamin giyntane? Kaa oysimeana malsi maasana Yayqoob yisa warqatinte gebhi qaabe thaapidine. Kaa oysimeesa malsino wonin dehen dayntan wulam koda kaame.

Kaa mathaapaam raq dongdar kashana dandima ko dandime:

1. Nagaymakkono (1:1)
2. Barjodar woylamin qajadhensa taysate shedadha (1:2-27)
3. Barjodar woylamin qajadhensa dantano (2:1-3:12)
4. Barjodar woylamin qajadhensa waadimano (3:13-4:12)
5. Barjodar woylamin qajintanam waadimadar hacchadhensa (4:13-5:20)

Yayqoob yisa warqatinka nagaymakkora guttsayse taysate shedadhidinbee gaalenbesa thoothi kinin giyenka “woza” hamayse kinin giyonam (1:2-3) wo bhocche. Bhawloos pir waana waana gaaleno wozabee gobshibe konin thoothoadettsi kida bhocchise (Roome 5:2-5). 1 Bhethi 1:6-7 pir shedeey.

Taysate shedadhensa kattsi aapea bhocchia darshintaka gebhintonam wonin haapoadettsine (1:2-4). Kaa raqate taysate shedadha haminta mayara nivea goa way gaale hamintane. Igina taysate shadayna Barjo bhocchinka Barjodar woylamin wonin qajenam taysana nivaynane; wonin bashenka kanka gobshinam wonin haapaynane (1:12). Wosa iira utayno taysate woam shadayno daane (1:13-15); ogono taysate woam shadayno wosa siyon bhocchirane, Barjokala nivaynotehe.

Igina taysate shadaynaam yinin thaapponsa budonte Yayqoob gonin hammo Barjodar woylamin qajadhensa kida dhettse. Gonin hammo Barjodar woylamin qajadhadyno aapi qolma maatehe. Payya waadima koda dhettse. Gonin hammo Barjodar woylamin qajadhensa dahaa ea yisa atabhinam kida toole; yisa dohon bhocchin wulam Barjona yirk kinin hayenka Barjo kisa miskenam kida qanse. Ogona gonin hammo Barjodar woylamin qajadhadyno wosa dayntanka may haapadhenbee thoothi aapi maatenbene.

<sup>1</sup> Barjobee Imbaa wontea Yesus Kiristoosbesa waadiman eedi maataa inta Yayqoob, peen wulir wanthalimayse dahaana tabhi lamaana muldhanana inin thaapoono warqan-none. Payyamo yena ko dee.

### *Barjodar Woylam Qajintabee Pakalmakkobe*

<sup>2-3</sup> Imbanaanato, Barjodar woylamin yenin qajen goynka yedar yesken taysate shedenam darshintaka wocchimbhintanam konin hapsenam dhesayse, waana waana gaale yedar yeskenam kattsi wozaka tiyee. <sup>4</sup> Yer kala hattear yekalanka joogima, gonin woynntanka thoothaana yenin doadettsi darshintano yisa waadimanam ko thoose.

<sup>5</sup> Yesa iira hayyear pakalmakko joogidianna, een wulna bagima sun thoothi imea Barjoam ki miske; kinaar imbha ko imbbe. <sup>6</sup> Ko dahaannaar yer kalaaka hattear qothimima Barjodar woylamin qajayse ki miske. Harrna hambhidianna, qothimea eedi jibarenin yiam kupenka shohen bazindettsine. <sup>7</sup> Agaa ea Imbaa Barjokalanka yer kala hattear kinin haapea kina ko maatabhoode. <sup>8</sup> Kidi qaaboysa lamaa maataa goyna wuldar os ora hameane.

### *Qambhia Eabee Wodinta Eabesa Wozano*

<sup>9</sup> Dayntanka tokaa imbanaasa Barjo kiam dheg kinin hayenna ki wozadhe. <sup>10</sup> Wodinta imbanaasa Barjo kiam yirk kinin hayenna ki wozadhe. Harrna hambhidianna, eensa wodimmakkono shudhisa aamadettsi sun diina ko diine. <sup>11</sup> Haynin utayse oydhenka shundho waqaqa ko waqaqe; aamanoar diina ko diine; kosa dantanoar kaya ko kaye. Ogodettsi eedi wodimo yinin waadadhen waadimanka jeekada kida shidhe.

### *Eedidar Yeskayno Taysate Shedadhano*

<sup>12</sup> Taysate sheden yidar yeskenka darshintaka wocchimbhayse dehea ea gobshadhaane. Harrna hambhidianna, taysate yinin shedadhonam yinin bashonsa budonte Barjo “Iam nashaynana imayda ime” kinin hamon sadanam gobshi qoobhedettsi kida tiye.

<sup>13</sup> Eedi kiam taysate sheden kidar yeskenka, “Barjo iam taysayse kida shede” ki hamabhoode. Harrna hambhidianna, Barjo siyaka taysate shedadhehe; pir Barjo siya yerka eediam taysate shedehe. <sup>14</sup> Ko dahaannaar eeno wul yisa meten yinnon anngarmano kiam gochenbee taysenbeka kida shedadhe. <sup>15</sup> Ogosa budonte anngarmano sirmayse seesonam koda adhe; seesoyn gebhonsa budonte dembhiam koda adhe.

<sup>16</sup> Inin nashayna imbanaanato, dhaddhismeebhode. <sup>17</sup> Payyanbee gonin iminton wulbe bhaa cecirane; ogono nivayno shipodettsi yaayimabee ookimeysa qolmabe, shaakanasa Imbakala koda hanche. <sup>18</sup> Barjo yisa bhocchinka pijadhin wulsa bira wonin doadettsi gonin upsinka woam ki adhade.

### *Wonin Qansonam Waadimadar Hacchinta*

<sup>19</sup> Inin nashayna imbanaanato, keeda koam waleebhode: Eedi wul qansana gibaynabee, giyana gibiminabee, wacimana leeminabe ke maate. <sup>20</sup> Harrna hambhidianna, eensa wacimeno Barjosa tipamonam hapsehe. <sup>21</sup> Ogonante minngin yerinbee seeson yerinbesa thoothamonam yekalanka pegisayse, Barjo yesa woylaminte kinin koron yesa sadanam dhacchana damen upsinam lemmakkoka tiyee.

<sup>22</sup> Barjosa upsinam waadimadar hacchyna eena maatee; yennon metenam taysaate qansayna bish maateebhode. <sup>23</sup> Barjosa upsinam qansayse waadimadar hacchima yisa aapin kerinam mastoot gidir sheda eadettsi kida maate. <sup>24</sup> Yiam kinin shedonsa budonte kida yive; ogora hamin kinin dohonam saanawa wala ki wale. <sup>25</sup> Ko dahaannaar baza yindar qolma hayen gonin yigginam payya shadayse kanka wocchimheabbee upsin kinin qansonam walma bhocchayse waadimadar haccheabe, kidi yisa waadimanka gobshadhaa kida maate.

<sup>26</sup> Yisa atabhinam toolima “Inta Barjodar woylamin qajintaka wocchimbhidine” hamea ea yiam kida tayse; Barjodar woylamin kisa qajidinoar pootiminone. <sup>27</sup> Barjo Imbaasa birante minngamonbee qaysiysa qolmonbe kidar woylamin qajintano naana qambhinabee maana qambhinabesa gaalen goynka keam kelshinta, pir hasa metena-maar peen kosa minngamorra toolinta hamintane.

## 2

### *Qambhia Eam Baga Zaskimino*

<sup>1</sup> Imbanaanato, gobshadhaa Imbaa wontea Yesus Kiristoosdar woylamin qajayna ye hanna, eensa shaarinte eedisa woti shedayse hayeebhode. <sup>2</sup> Kamsina eedi lamaa bukin raqindar nivaanasa kalaa aaninte yisa worqi arsayse apala goobe qaadhaane; waa ea apala geccho qaadhaa qambhine. <sup>3</sup> Apalan gooben qaadhaa eam gobshintaka “Ogo gobshadhon raqinte dooqaa” kina ye hamidianna, pir qambhia eana “Ya saa ogote woyaa” way “Isa roonkal dooqaa” kina ye hamidianna, <sup>4</sup> keeda ogoka yesa shaarinte edimenam yenin bevenbee siyon qaabonka yenin pirdenbe yena haapadhyu?

<sup>5</sup> Inin nashayna imbananato, qansee: Barjo yidar woylamin qajintaka wodimb-haana kenin doadettsibee yiam nashaynana “imayda ime” kinin hamon kisa bita-monam kenin tiyoadettsibe peen kodar qambhinaam kamadaa? <sup>6</sup> Yediar qambhinaam yeda bage. Yeam galshaynabee pirdaynasa birante yeam gochate yivaynabe wodim-matayu? <sup>7</sup> Kanka yenin eldhen gobshadhon naabenam iirayna keditayu?

<sup>8</sup> “Eediam hadettsi hayayse nashaa” hamayse Mathaap Gazante thaapadhoono Bar-josa bitamonsa yigginam ye toolina, payya yeda haye. <sup>9</sup> Eedisa woti shedayse ye haydianna, seeso yeda haye; yigginam yenin garonna yedar koda dhiidhimbhadhe. <sup>10</sup> Eedi hayyear Barjo yigginte giidhorra kalaam garayse shidhaana wulam haydi ki hanna, wulam kinin garaadettsi koda paydadhe. <sup>11</sup> Harrna hambidianna, “Shar-mucimaabhode” hamaa Barjo pir “Eediam deesaabhode” hamidine. Ogonante ha sharmucimaammaar eediam ha deesidianna, Barjo yigginam ya garidine.

<sup>12</sup> Baza yindar qolmina yeam hayen yigginsa birante theedayse pirdadhayna eenadettsi giyee; ogodettsi waadadhee. <sup>13</sup> Harrna hambidianna, eedisa seesonam hana ko shidhe hamimana Barjoar hana ko shidhe hamima kidar kida pirde. Ko dahaannaar garintano pirdinam koda bashe.

### *Barjodar Woylamin Qajintabee Waadimabe*

<sup>14</sup> Imbanaanato, “Barjodar woylamin inta qajidine” hamea ea payya waadima ki dhahaamma, kina har ko poote? Kinin Barjodar woylamin qajoono kiam dhacchana dama ko damo? <sup>15</sup> Kamsina kenin itsenbee kenin qaadhenbe yisa qolmina imbananana annginabee anzabanabe daa ke hanna, <sup>16</sup> yesa iira kalaa kesa daytanna keam zaskea yer kena imima, “Nagaya yivee! Yena ko oydhe! Mishee!” kena ki hamidianna, kena har ko poote? <sup>17</sup> Ogodettsi Barjodar woylam qajinta waadimaya qolmino ko hanna kodi yina diyoонone.

<sup>18</sup> Ko dahaannaar, “Ea waa Barjodar woylam qaja ki qaje; ea waasaar payya waadima daane” hambidianna, inta “Barjodar woylamin hanin qajenam hasa waadimara edayse ina dhahaa; intaar Barjodar woylamin inin qajenam isa waadimanka hana ida dhee” ida hame. <sup>19</sup> Ya “Barjo kalaa bish dahade” hamayse hada tiye. Ogonoar payyane; ko dahaannaar beeronaar ogoam gonne hamayse tiya ke tiye, kurtumbhada gibaza ke gibaze.

<sup>20</sup> Ya malgimea ea, Barjodar woylamin qajano waadimara edimayse aapiysa qolmino konin maatenam dhesana zaga zago? <sup>21</sup> Imbaa wontea Abraam naasa yisa Yisaaqam marshan machadhen raqinte Barjona marshan machota naasaam kinin bovon

wodanka, Barjo birante tipaa ea kinin maatoono waadimakatayu? <sup>22</sup> Ogonante Barjodar woylamin kisa qajidino waadimanbesana konin waadadhenee Barjodar woylamin kisa qajidinoar waadimaka gon konin dohonbeam haapaa haapo? <sup>23</sup> Mathaap Gazante “Abraam Barjodar woylamin ki qajade; ogonante Barjo kiam tipaa ea hamayse ki paydade” hamayse thaapadhoono ko thoothade. Ogona Abraam Barjosa nashoa ki hambhade. <sup>24</sup> Keeda eedi Barjo birante tipa eedi konin maatayno waadimakane; Barjodar woylamin qajintaka bish konin dahaamonam yeda haape.

<sup>25</sup> Ogodettsi sharmucimakkon waadadhayno Revaab Israveelsa nittsadhaana eenam ooninte yisa keam tiyayse goyi abka keam konin yittson wodanka, waadimanka yisa Barjo birante tipa maatadaa?

<sup>26</sup> Sadara edimoono waano diyoonone; ogodettsi waadimara edimoono Barjodar woylamin qajintanoar diyoonone.

### 3

#### *Atabham Toola Zaskayno*

<sup>1</sup> Imbanaanato, yennon iira thoothina eenam dhettsayna ke dahabhood. Harrna hambhidianna, wodi dhettsayna sagi pirdi wonin tiyenam dheseeda dhese. <sup>2</sup> Wodi wul thoothi yerka woda dhaddhisme; dhalkinka dhaddhismima bishin wulam toolana damea gon eedine. <sup>3</sup> Pardano wona ee konin hamoadettsi kosa aponam woda dhaxe; wonin nashon goynkaar koam yedayse woda yive. <sup>4</sup> Pir bazindara sagadhen gonngalan gebhonam jibaren koam kuppenka, qanea eahatta likkaka koam qanayse yinin nashon goynka kida yittse.

<sup>5</sup> Ogodettsi atambho wosa tokaa dahayse gebhi yerka koda erime. Marrato! Nuta likka qawn gebhonam kida koqe. <sup>6</sup> Atabh nuudettsine. Atabh wosa bishinsa waa kala dahayse siyamoka thoothon peen kodettsine; wosa bishin wulam koda minngise. Kodi lay dikimon nuundettsi wosa dayntanam koda koqe.

<sup>7</sup> Peendar dohon dabinbee aptinbe, pir iinka peendar gochimaynabee bazinte dohon pijadhin wulbe eedina ee kenin hamoadettsi haysana dama ke dame; taar ee kedi hamidine. <sup>8</sup> Ko dahaannaar atabhin yinnonam kina ee konin hamoadettsi hayana damea eedi hayyear qolehe. Eediam deesea davini yikal thoothoono ukunsimino siya yerne. <sup>9</sup> Atabhin ogoka wosa Imbaa Barjoam woda gobshe; atabhin ogoka Barjosa kamsinka pijadhaana eenam woda ashe. <sup>10</sup> Apon kallonka ashimebee gobshibe koda ute. Imbanaanato, yin maata zaskehe! <sup>11</sup> Noqon elen kallorra daathabee thaqimabe utana dama ko damo? <sup>12</sup> Imbanaanato, shaap haaqa rimitsa aapi ushana dama ko damo? Woyneara hattshaapsa aapi usha ki usho? Ogodettsi daathimon noqora daathea noqo haapadhehe.

#### *Cecinbee Peenbesa Pakalmakkono*

<sup>13</sup> Yennon iira pakalabee bhoccheabe eedi hayne? Payya dayntanka yisa waadimanam pakalmakkobee lemmakkobeka ki dhee. <sup>14</sup> Ko dahaannaar thaqima woogintobee yesa metenam nashintabe yesa woylaminte daa ko hanna, erimada gonindar buuda giyebhode. <sup>15</sup> Ogo pakalmakkono peen korabee, waankalabee, Seethaankalabene; Barjokalatehe. <sup>16</sup> Harrna hambhidianna, woogintobee mete nashintabe dohon raqinte goorebee siya waadima wulbe daane. <sup>17</sup> Barjokala haapadhayno pakalmakkono birayse kodi gazane; pir payyamonam nashayno, leemi, ee hamayno, eedina ko shidhe hamayno, payya aapiysa thoothoono, eedisa woti shedayse waadahimino, maltamoysa qolminone. <sup>18</sup> Payyamonam nashayna eena payyamonam yiithayse tipamonsa aapinam keda taxe.

## 4

### *Peen Ko Gaynam Nasha Zaskimino*

<sup>1</sup> Yesa shaarinte banqibee uuribe hamora ko nivaa? Yesa waante dahayse uximayna igma yesa anngarmanatayu? <sup>2</sup> Yeda anngardhe, yena maatehe; ogonante eenam yeda deese. Yeda woogimbhe, haapana damattene; ogonante uuri yeda kanse. Yin ko dhaakaar Barjoam yenin miskimonna yena maatehe. <sup>3</sup> Yenin miskayno yesa waanam wozisendar hacchota siya bhocchika yenin miskenna kosa malsinam haapattene.

<sup>4</sup> Yedi Barjoam garaynato! Peen ko gaynam nashintano Barjoam jibbinta konin dohonam dhesattenu? Ta peen ko gaynam nashota zagea wul Barjoam jibbea ki maatade. <sup>5</sup> Pir Mathaap Gazante “Barjo wosa woylaminte konin doadettsi wona kinin imoono Manpasino Barjona bish wonin doadettsi kattsi koda anngardhe” hamayse thaapadhoono sun yena ko maato?

<sup>6</sup> Barjo yisa sunin imintonam saskayse wona kida ime. Ogona Mathaapinte “Barjo poorimbhaynaam jibba ki jibbe; yisa metenam toskaynana sunin imintonam ima ki ime” kinin hamoono ogonane.

<sup>7</sup> Ogonante Barjona ee hamee. Seethaanam jibbee; kidiar yekalanka pegadha ki pegashe. <sup>8</sup> Barjokal theedee, kidiar yekal theeda ki theede. Yedi seeson eenato, yesa aaninam gazarinsee; yedi qaabo lamaaka dhaaanato, yesa woylaminam gazarinsee. <sup>9</sup> Gaalee, burqadhee, eepee; yesa hancino siidar, yesa wozano gaaledar ko ookime. <sup>10</sup> Imba Barjo birante yesa metenam toskee; kidi yeam dhieg dheg kida haye.

### *Eedidar Pirda Zaskimino*

<sup>11</sup> Imbanaanato, kinka kidar wuupo giyebhode. Imbanaasasa wuupo giyea way imbanaassadar pirdea yigginsa wuupo kida giye, yiggindar kida pirde. Yiggindar ha pirdidianna, ya pirdeane; yigginam tooleatehe. <sup>12</sup> Yigginam imeabee pirdeabe kalaane; kidi dhacchanabee kaysanabe dameane. Ta eedidar pirdea ya hayne?

### *Erimen Goynka Imbhoono Wacimeno*

<sup>13</sup> Yedi “Kina way saka ogo kataman yivayse leve kalaa ogote woda dee; gabante naggadaate birre woda thoose” hamaynato, mete yesaam gishee! <sup>14</sup> Saka maatenam dhesattene. Yesa sadano hardettsine? Tokaa wodana haapadhyayse kayen liilodettsine. <sup>15</sup> Ogosa oolonte “Imba Barjo giydi ki hanna, sadaka dhaaa wo hanna, koam way ogoam woda haye” hama yeam koda zaske. <sup>16</sup> Keeda yesa pormakkonka yeda erime; ogodettsino erimeno wul siyane.

<sup>17</sup> Ogonante payyan waadimanam dhesayse waadadhimaana seeso koda maate.

## 5

### *Wodimmana Imbhoono Wacimeno*

<sup>1</sup> Ta keeda yedi wodimbhaanato, yedar yesken gaalenna ilataate eepee! <sup>2</sup> Yesa wodimmakkono kaydine; yesa apalanamaar ulavulo itsidine. <sup>3</sup> Yesa worqinbee birenbe boydhidin; boynoar yedar tarja koda maate; yesa waanam nuudettsi koda koqe. Macchina rooronaka thoothi koymo yena ye pucchade. <sup>4</sup> Yesa haaminte isinin patada haaqaana eenana bazanam yenin kashaamonna keda ilate; isininam buuraana eenasa ilatinam Kantan Wul Yisa Daha Barjo qansidine. <sup>5</sup> Peendar yenin dehenka yena ko agaysaka yesa waanam wozisada, taxana yiam durpisadhaana qolladettsi yesa waanam yedi durpisidine. <sup>6</sup> Tipa eadar buudamoka pirdayse yedi deesidine; kidiar yeam jibbehe.

### *Yesusin Lansi Maataate Nivenam Darshayse Toola Zaskayno*

<sup>7</sup> Ta keeda imbananato, Imbaa wontea Yesusin nivenka yekka darshayse toolee. Marrato! Haamin koyea ea doobin bironbee budonbe qanenka yekka darshayse

payyan peensa aapinam kida toole. <sup>8</sup> Yediar ogodettsi darshayse toolee; yesa woylaminam wocchinsee. Harrna hambhidianna, Imbaa wontea Yesussa nivintano theedidine. <sup>9</sup> Imbanaanato, yedar pirdadhoamadettsi kinka kinka kidar gundumeebhode. Marrato! Pirdea kerinte woydine.

<sup>10</sup> Imbanaanato, Barjokala qansayse kisa naabenka eenna giyaynadar yeskon gaale-nam darshayse kenin tiyoono yena kamsi konin maatonam shedee. <sup>11</sup> Marrato! Darshayse wocchimbhaana eena “gobshadhaanane” keam woda hame. Iyoob hamin darshayse kinin wocchimbonbee Imbaa Barjo kina hayonbeam yedi qansidine. Ogoka Imbaa Barjo eedina kattsi burqadheabee kesa seesonam ko shidhe hamea kinin dohон-beam yedi haapidine.

<sup>12</sup> Imbanaanato, yer wulsa birayse peenka ko hannaar, cecinka ko hannaar, way yer abka ko hannaar, malleebhode. Yesa dhalqinam “Yin ko dee” hamidi ye hanna “Yin ko dee” hamee; “Yintehe” hamidi ye hanna “Yintehe” hamee. Yin ko dahaamma yedar koda pirdadhe.

### *Barjodar Woylem Qajayse Miskinta*

<sup>13</sup> Yesa iira gaale yindar yeskaa daa ki hanna Barjoam ki miske. Wozadhea daa ki hanna Barjoam gobshaate ki zammare. <sup>14</sup> Yesa iira hajadhaa daa ki hanna, misken ooninsa donzanaam yikal ki eele; kedar Imbaa wontea Yesussa naabenka kidar waqatinam\* qadhayse kina Barjoam ke miske. <sup>15</sup> Barjodar woylemin qajintaka kiam miskadhdhidianna, hajadhaam Barjo kida pacche; kisa burqora kiam kida dhaase. Seeso haydi ki hannaar kina kida gare. <sup>16</sup> Ogonante yenin paashoadettsi kinka kina yesa seesonam buuthaate kinka kina Barjoam miskee. Tipaa easa miskeno thoothi yer waadadhana kanta kosa daane. <sup>17</sup> Eelias wodettsi eedi ki dahade; doobinin qanoamadettsi wocchimbhayse Barjoam ki miskade; ogona peendar doobi qanima leve makkambee arpi laxbe ko kappade. <sup>18</sup> Ta pir Barjoam kinin miskenka, cecira doobino ko qanade; peenoar yer wulsa aapinam ko baqalsade.

<sup>19</sup> Imbanaanato, yesa iira kalaa gonin goyra dhaddhismidianna, waa ea kiam gonin goyndar maasidi ki hanna, <sup>20</sup> seeson eam kinin dhaddhismon goyra maasea ea kisa sadanam dembhira kinin dhacchenbee thoothin kisa seesonsa garintanam kina kinin hapsenbeam ki dhese.

---

\* <sup>5:14</sup> “Waqati” hamenam Girik aponka thaapadhoono mathaapino “zayt” koda hame. Haalin Mallan wodanka eeno zaytinam bishi tuqaadar koda qadhe. Banen eeno bishi tuqaadar waqati konin qadhenna “zayt” hamenam “waqati” ko hambhade.

## Kiristoos Yisa Tarjamonnante Kinin Yittsaa Bhethiroosin Thaapoono Birono Warqanno

### *Ardinta*

Kaa warqataswa thaapadhidino oytadhan goynka wanthismayse dahaana, Barjodar woylamin qajaanana konin dehenka, Bhethiroos gaalesa thoothi kida dhettse. Oytay-dhabee gaalebe konin thoothenka Barjodar woylamin qajaa eedi har ki haye? Har ki bhocche? Bhethiroos kaa oysimeana malsin kinin maasenka yer qaabe haydheasa thoothi kida giye. Barjo kodettsin gaalen wodar ko yeske kinin hayenka payyamonbee goninbeysa dohon bhocchi konin dohonam kida giye.

Bhethiroos Galila peente Beetesaydar dehea kaaran qazaate yisa ooninam wottsea eedine. Kisa kana Indirias Yesusbete kiam ki dhettsisade. Jesus tabhi lamaana kisa paanan yivaynaam yinin kamenka, iginia iinte Bhethiroos kidi kalaa dahayse leve makkamna Yesussa kattsi nasho maatayse ki dahade. “Waani wul haam ke garaakaar inta haam garattine” hamayse yinin odimonsa budonte makkam goyt “Inta kiam dhesattine” hamayse Yesusam ki marimade. Ko dahaannaar Yesus dembhira kinin dhaabhonsa budonte Bhethiroosam yidar maasayse kisa tarjabee entsabe ki hayade. Yerusaalemir woysadhon misken ooninsa entsa gebha ki maatade.

Bhethiroos warqatinam kinin thaapoono 52-56 levensa iintene hamayse koda bhochchadhe. Warqatam thaapadhon wodanka Bhethiroos thoothi leve Imbaa Yesusna waadadhayse ki gecchade. Imbaa Jesus Bhethiroos sadante gon hama gishiman gishea maatidine. Kidar woylamin qajyna waanina gon hama gishiman gishea kinin dohonam Bhethiroos kida giye. Ogonante waana waana taysate shedadhente gaalayna eenana kinin thaapenka, keam galshen bhocchin wulam Imbaa Yesusdar kenin dhaboedettsi kida bhocchise. Pir gon hamma maatayse waani Barjodar woylamin qajaana eenaa kenin gishoadettsi kida giye.

Kaa mathaapaam raq tobbhaadar kashana dandima ko dandime:

1. Nagaymakkono (1:1-2)
2. Gaalen iinte wosa dohon qaabe hayhenam yedinta (1:3-2:10)
3. Gaalen iinte Barjosa bhocchinam haynta (2:11-4:6)
4. Gaalen iinte Barjona waadadhinta (4:7-11)
5. Gaalen iinte tarjinta (4:12-19)
6. Gaalen iinte wonin dhahayno wosa wotino (5:1-11)
7. Macchin nagaymakkono (5:12-14)

Barjodar woylamin qajaana wonin dohonna gaalena wodi eldhidine. Harrna hamb-hidianna, Kiristoos wona hamayse gaalayse kisa paanan yivintaka wonin gaaloedettsi kamsi kidi maatidine (2:21). Gaalen wodar nivenka Barjo dhesa ki dhese; wona payya ki qaabade. Gaalensa iinte yer payya haya ko woam zaske. Wonin gaalonsa budonte Barjo gonin eena woam kida haye; wocchinsa ki wocchinse. Harrna hambidianna, kisa gobshinam wo kashime kidi woam eelidine (5:10).

Gaalena eelime wodar konin yeskenka lay dehen qaabe hayana Barjoka wonin adhadhonam woda dhese (1:3). Woylam wonin hayayno Barjobee kisa sunin iminton-bekane (1:13bee 21be; 3:5). Barjo Kiristoosam dembhira kinin dhaasaadettsi woamaar dembhira dhaasa ki dhaase; rooro wul lay dehen kaymon raqinam cecinte wona kida ime (1:4). Wonin qaabe hayonam kidar woylam qajayse wonin yedenka, wosa gasante dohoono eeno haapayse targadhaate wosa qaabe haydinsa koda oyse (3:15). Ogodettsi wonin tiyayno gaaleno Kiristoossa wonin tarjoedettsi baali koda hapse. Ogona Barjona

wosa daano elqimayse wona imbhon waadimankane. Barjona ee hamaate kina wosa dohon nashimmakkonam woda dhee.

<sup>1</sup> Yesus Kiristoos yisa tarjamonnante kinin yittsa i Bhethirooskala, eedi pee eedi maataana Bhanthoosbee, Galatiabee, Qebhedoqiabee, Isiyabee, Bitaaniabe gidir wan-thimayse dahaana Barjona kambhaanana nittsadhoono warqannone. <sup>2</sup> Barjo Imbaa ena birayse qaabayse yeam ki kamade; Manpas Gazanoar yeam ko gazisade. Ogoka Yesus Kiristoosna ee ye hame kisa zombhinka ye yiithadhade. Barjosa sunin iminton-bee payyamonbe yena ko thoothe.

### *Lay Dahayno Qaabe Wonin Hayayno*

<sup>3</sup> Imbaa wontea Yesus Kiristoossa Imbaa Barjo ki gobshadhe. Kidi kattsi eedina garea yinin dohonna, Yesus Kiristoosin dembhira dhaabhon goynka lay dehen qaabe haydhenna woam haali adhayse, <sup>4</sup> cecinte kaymabee, gemmimabee, gecchima raqbena woam ki ashkade. <sup>5</sup> Yediar macchin rooroaka haapadhen dhaqintanna Barjodar woylamin yenin qajen goynka Barjosa kantanka toldhite ye dahade. <sup>6</sup> Woda likkana taaki waana waana taysayse shedaynaka yeam gaale zaskidi ko hannaar, ogono yeam kattsi koda wozise. <sup>7</sup> Ogono yesa taysate shedadhidino Barjodar woylamin yesa qajidinsa gonamonam shedanane. Worqi kayayno ko dahaakaar nuunte dhabayse koda shedadhe. Worqira sagi maatoono Barjodar woylamin yesa qajidinsa gonamono Yesus Kiristoosin haapadhen wodanka gobshinbee shawkadhanbeam koda hapse. <sup>8</sup> Yesus Kiristoosam ye haapaammaar kiam nasheeda nashe; taaki kiam haapimina ye hannaar kidar woylamin qajeeda qaje; apoka guyana damadhimin gobshadhon wozanka yeda wozadhe. <sup>9</sup> Harrna hambhidianna, kidar woylamin qajayse yenin toolen yesa sadansa dhaqintanam yenin haapennane.

<sup>10</sup> Yena imbhenn Barjosa sunin imintonsa kikala qansayse giyaana eena ko dhaqintan goynsa kattsi payya hayayse ke marmarade. <sup>11</sup> Kesa iinte dohoono Kiristoossa Manpasinoar kidar yesken gaalenbee ogosa budonte kinin haapen gobshinbeam ena birayse giydine. Kediar kono wul hamaa wodakabee hamin dhaaa goytikabe konin maatenam may dhesana ke marmarade. <sup>12</sup> Ogo yerinsa kenin giyenka kenin waadadhayno yenane, yimetensa kenin waadadhiminam Barjo kena may haydine. Taar cecira nittsadhon Manpas Gazansa kantanka Barjosa dhacchintan upsinam yena giyaanakalanka yedi qansidine; igina yerram Barjosa gaananaar shedana anngardhite ke dahade.

### *Gazamoka Daynta Zaskayno*

<sup>13</sup> Ogonante yesa woylaminka qaymayse waadadhana ashkimbhee; yeam zaskaadettsi dehee; Yesus Kiristoosin haapadhen wodanka yenin tiyen Barjosa sunin imintondar qothimima qaabe hayee. <sup>14</sup> Barjona ee hamayna maatayse, ena birayse dhesima yenin dohon siyon anngarmanka yiveebhode. <sup>15</sup> Ko dhaaannaar yeam eelaa Barjo gaza kinin dohondettsi, yediar dayntan yennon wulka gaza maataana eena dehee. <sup>16</sup> Harrna hambhidianna, “Inta gaza inin dohonna yediar gazana eena maatee” hamayse thaapadhidine.

<sup>17</sup> Edisa woti shedima een wulna yisa meteka meteka kesa waadimandettsi pirdeam “Imbo” hamayse eelayna ye hanna, ko yesa chocchamon wodanka kurtumbheka dehee. <sup>18</sup> Harrna hambhidianna, yedi ena yesa eykenakalanka yenin tiyon ko pootimon dayntara yenin shandhoono kayen birre way worqika konin dahaamonam yedi dheseeda dhese. <sup>19</sup> Yenin shandhoono yer siyabee wobobe yindar qolmaa yaatidettsi maataa Yesus Kiristoossa gobshadhon zombhinkane. <sup>20</sup> Kinin dhesimoono peen pi-jadhima birayse ko hattaka, taaki wodansa macchinte yena hamayse ki haapadhade.

**21** Kiristooska dembhira kiam dhaasaa, gobshin kina imaa Barjodar woylamin yeda qaje; ogonante yesa woylamin qajidinbee qaabe haydinbe Barjodarne.

**22** Maltamoka dayma imbanaasdettsi kinka kiam kiam yenin nashoadettsi goninna ee hamada yesa woylaminam yedi gazinsidine. Ogonante kinka kiam kiam yesa woylaminka payya hayayse nashee. **23** Lansi yenin adhadhoono rooro wul lay dehen Barjo upsin goynka kaya kayma bheetakalankane; kayea bheetakalankatehe.

**24** “Eedi wul shudhidettsine;  
kesa gobshinoar shudhisa aamadettsine.

Shundhoar waqaqa ko waqaqe, aamanoar diina ko diine.

**25** Barjosa upsono ko hanna, rooro wul lay daa ko dee”  
hamayse thaapadhondettsine. Barjosa dhacchintan upsinsa yena giidhoono ogonone.

## 2

### *Sadanka Daha Seenieber Gazan Zarsinbe*

**1** Ta keeda siyan wulbee, taysimen wulbee, maltamonbee, woogintonbee, eedi wu-upintan wulbeam yedara marayse, **2-3** Imbaa wontea Yesusin payya dohonam lavayse yenin haaponna, dhaqana kanka yenin gebhoadettsi taaki adhadhaana naana raathi kenin anngardhendettsi siyamoysa qolmon Barjosa upsinam anngardhee.

**4** Eenoar konin bagaa, Barjoyn kamaa, gobshadhaa sadanka dahaa sentakal thedate,  
**5** yedi pir sadanka dahaana sennadettsi maatayse Yesus Kiristooska Barjoam wozisen manpasinngayn marshan imayna gazana gudulla yenin maatoadettsi, manpaska gaza oonidettsi woysadhite ye dahade. **6** Harrna hambidianna, Mathaap Gazante “Marrato! Kambhaabee gobshadhaabe maataa  
ooninam wocchinsea seeniam Thiyooinir ida wode;  
kidar woylamin qajea ooshimbhehe”  
hamayse thaapadhidine.

**7** Ta keeda kidar woylamin qajayna yena kidi gobshadhaane. Kidar woylamin qajiminana ko hanna,

“Seeninka oonin woysayna eena kenin bagaa seenia  
senna wulra ooninna kattsi zaskea ki maatade”

**8** pir,

“Eedina goa maatea seenibee  
eediam dhabea seeni laytabene”

hamayse thaapadhondettsine. Kisa upsinam tiyma kenin garonna kanka keda dhambe;  
kediar birayse ogona ashkadhaanane.

**9** Yediar thipara tarshen yisa shaakante yeam eelaa Barjosa gebhon waadimanam yenin giyoadettsi, yedi kambhaana muldhana, bitaasa gudulla, Barjo yina kinin hayaana gazana zarsinane. **10** Yedi ena Barjosa muldhatehe; ta yedi Barjosa muldha ye maatade. Yedi ena seesonsa garintonam haapeetene; ta yedi seesonsa garintonam ye haapade.

### *Barjona Waadadhayna*

**11** Isa nashonato, peen kodar chocchibee eedi peera nivaanabe yenin dohonna, yesa sadanbesana banqin kansen yesa waansa anngarmakalanka yenin pegimbhoadettsi yeam ida miske. **12** Yer hamin hambhaakaar Barjoam dhesimina “Siya keda waadadhe” hamayse yeam ke wuupaakaar, payyan yesa waadimanam kenin shedenka Barjo shedana kinin nivea rooroaka Barjoam kenin gobshoadettsi, kesa shaarinte yesa dayntano payya ko dee.

**13** Imbaa wontea Yesusna hamayse hayamoysa dahaana eena wulna ee hamee; gebhi hayamo kisa dohonna bitaana ee hamee; **14** peen wottsaynanaar ee hamee. Harrna

hambhidianna, kedi siyan waadadhaynaam dhabshana, payyan waadadhaynaam gobshana bitaakalanka nittsadhaana eenane.

<sup>15</sup> Barjosa bhocchino payyanam waadadhaate yer dhesimina malgimma eenasa dhalqinam lay yenin hayoadettsine. <sup>16</sup> Barjona waadadhayna maatayse baza qolma dehee; baza qolma yenin dahayno siyamonam aachayno ko dahabhoode. <sup>17</sup> Eedi wulam gobshee; Barjodar woylamin qajayna imbananaam nashee; Barjoam kurtumbhee; bitaam gobshee.

### *Kiristoos Gaalensa Kamsino*

<sup>18</sup> Yedi eedina waadadhaynato, bhocchiysa payyanabee leeminabe bish dayma, bhocchiysa siya maataana yeam wottsaynanaar kurtumbheka ee hamee. <sup>19</sup> Harrna hambhidianna, yiam zaskaamon dhabinam tiyea eedi Barjoam bhocchada gaalenam ki darshanna, gobshi kida haape. <sup>20</sup> Seeso ye waadadhaysaka yeam qandhenka ye darshidianna, har gobshine yesa dohoono? Ko dahaannaar payya yenin waadadhonna yedar yesken gaalenam ye darshanna, ogoka Barjo birante shawkadhaana yeda maate.

<sup>21</sup> Yeam eldhoono ogonane. Kiristoos kisa paanan yenin yivoadettsi kamsi yena maatana yena hamayse gaalenam ki tiyade. <sup>22</sup> Kidi seeso waadadhadehe; yisa aponkaar dhalq siya giyadehe. <sup>23</sup> Kiam kenin iirenkaar maasayse keam iiradehe; gaalenam yinin tiyenkaar keam kurtunsana upsi wocchi giyadehe. Ko dahaannaar tipamonka pirdea Barjona yiam saskate ki imade. <sup>24</sup> Wodi seesonna diyayse tipamonna wonin doadettsi, kidi yinti yisa waanka wosa seesonam masqalindar ki baskade; kisa hajiminka ye paashade. <sup>25</sup> Harrna hambhidianna, yedi yaatidettsi thar thar hamayse yaayayna ye dahade; keeda yesa sadanam gisheabee tooleabedar ye maatade.

## 3

### *Geshoabee Geshonbesa*

<sup>1</sup> Ogodettsi yedi maanato, yesa annginana ee hamee. Waani Barjosa upsinna ee hamimina ke dahaannaar, upsi kala hattear ye giyma yesa dayntanka Barjodar maatasane. <sup>2</sup> Barjodar kenin maatayno yesa gazan dayntanbee eediam gobshayna yenin maatonbeam yinin haapenkane. <sup>3</sup> Yesa dantano mete ashkadhintabee, worqi arsintabee, gooben apalanam qaadhintabeka eenna haapadhen gommakkonka ko dahabhoode. <sup>4</sup> Ko dahaannaar yesa dantano woylaminte aachimayse dohoono iin bishino ko dee. Ogoro lemmakkobee lay haminta manpasbeysa dohoono kayma gommakkone; kosa bazano Barjo birante kattsi dethane. <sup>5</sup> Ena wodanka Barjodar qaabe hayaana gazana maana pir yisa annginana ee hamaate ogodettsi yiam ke gobshade. <sup>6</sup> Yin pir Saara Abraamam imbo hamayse eelada kina ee ko hamade. Yediar kala hattear kurtumbhima payya ye haydianna kosa naanane.

<sup>7</sup> Ogodettsi yedi annginato, kantaysa qolmina kenin dohonna yesa maanabesana bhocchika dehee. Yesa miskenam konin maroamadettsi, yembesana sadansa sunin imintonam tiyayna kenin dohonna keam gobshee.

### *Payya Waadadhintaka Gaalenam Tiynta*

<sup>8</sup> Ta keeda yedi wul kinka bhocchi kalaaka kinka dehee; kinka kinka kina qaabee; kinka kiam indanaasdetttsi nashee; eedina burqadhadhaynabee leemi maataana eenabe dehee. <sup>9</sup> Siyon oolonte siyaka, iirimen oolonte iirimeka maaseebhode; ogosa oolonte kena Barjoam eelee. Harrna hambhidianna, yenin eldhoono ogoam hayntaka Barjokala imintonam yenin tiyoadettsine. <sup>10</sup> Mathaap Gazanin giyendettsi:

“Sadanam nasheabee

payyan rooronam shedana zageabe

atabhinka yer siya kinin giyoamadettsi,

aponoar kisa dhalq siya konin giyoamadettsi  
mete yisaam ki gishe.

<sup>11</sup> Siyon yerinkalanka pegadhaye  
payyan yerinam ki haye;  
payyamonam ki zage; kanka ki yive.  
<sup>12</sup> Harrna hambhidianna, Barjosa aapino  
tipan waadadhaynadar koda shede;  
kisa qaaminoar kesa miskenam qansana bulimine.

Barjosa wacimen wotino siyon waadadhaynadarne"  
hamayse ko thaapadhade.

<sup>13</sup> Payya waadadhana ye wocchimbhidianna yedar siya yeskisea hayne? <sup>14</sup> Tipamon waadimanna hamayse gaalenam ye tiydiannaar yedi gobshadhaanane. Eenin yeam kurtunsenka kurtumbheebhode; gaaleebhode. <sup>15</sup> Imbaa Kiristoosam yesa Imba hayayse woylaminka gobshee. Qaabe yenin hayen goynsa yeam oysaynnana malsin maasana rooro wul ashkimbhaana dehee. <sup>16</sup> Ko dahaannaar malsin yenin maasayno lemmakkobee gobshibeka ko dee. Kiristooska yesa dohon payyan dayntanam iirayna eena siya yenin hayaadettsi kenin wuupayna yerradar kenin ooshimbhoadettsi payya meske yesa ko dee.

<sup>17</sup> Barjosa bhoccino yin ko hanna, siya hayayse gaale yenin tiyenna payya hayayse gaalenam ye tiydianna yena payyane. <sup>18</sup> Kiristoos pir woam Barjodar bavana, kidi tipa dahayse tipa maataamma wona hamayse, wosa seesonna kalaa goyt ki diyade. Waanka ki diyade; manpasinka lay dehea ki maatade. <sup>19</sup> Ogo manpasinka dahayse dhaxin ooninte dahaana sadanana yivayse kena Barjosa upsinam ki giyade. <sup>20</sup> Kediar Nohe gonngalanam kinin ashken wodanka Barjo darshada kinin kaalenka kina ee hamaamma eenane. Ogo gonngalansa iinte ardayse noqora dhaqaana eenasa paydino lankay bishne. <sup>21</sup> Ogono noqono taaki yeam dhacchen shiidhimbensa kamsine. Ogono shiidhimbheno yesa bishinsa dakan marayno dayma, payya meske haapana Barjokal theeeda miskene; yeam konin dhacchayno Yesus Kiristoossa dembhira dhaabhidinkane. <sup>22</sup> Kidiar cecindar yivayse Barjosa mizaqinte ki dahade; Barjosa gaanabee, hayamoysa dahaanabee, kantaysa dahaanabe kina ee hamite ke dahade.

## 4

### Gazamoka Dayntano

<sup>1</sup> Kiristoos yisa waanka gaale haapaa kinin dohonna, yediar banqin koymonam dhaximbha eadettsi ogo bhoccinka wocchimbhayse dehee. Harrna hambhidianna, yisa waanka gaale haapaa ea seeson waadimanam garidine. <sup>2</sup> Keeda kaara os peen kogayn dayntanka yinin dehenka, eedisa anngarmaka dayma Barjosa bhoccinam thoosada kida dee. <sup>3</sup> Barjoam dhesimina eenayn bhocchayno ogonoar sharmucimakkobee, siya anngardhintabee, baribee, warsabee, kattsi wucayse kirbintabee, aaninka ashkadhaana barjonana ooshinsen waadadhaate goodimintabe iginia wulam ena yenin hayoono wodano yena yeeke ko yeeke. <sup>4</sup> Kedi iginia yerrasa anngarman thoothamonka kembesana kinka kalaa yenin maataamonna keda targadhe; yeam keda iire. <sup>5</sup> Ko dahaannaar sadanka dahaanabee diyaanabedar pirdana ashkimbhaasa birante yisa waadimansa malsinam keda maase. <sup>6</sup> Diyaanaar shidhima Barjosa dhacchintan upsinam kena giidhoono ogonane; eedidettsi kesa waandar pirdadhaakaar yisa manpasinka Barjoyn dehendettsi ke deene.

### Barjosa Imintonaaam Payyamoka Wottsinta Zaskayno

<sup>7</sup> Keeda yer wulsa macchino theedidine. Ogonante Barjoam miskana yenin damoadettsi qaymaa meske yesa ko dee; yeam zaskendettsi dehee. <sup>8</sup> Nashimmakko seeson thoothinam konin kicenna, yer wulsa birayse kinka kiam kiam kattsi nashee. <sup>9</sup> Gundume qolma kinka kiam kiam chocchamo tiyee.

<sup>10</sup> Waana waana Barjosa sunin imintonaam payya hayayse wottsintaka yennon iira eedi wul yisa meteka meteka yina imbhon sunin imintonka kinka kinka kina waadadhee. <sup>11</sup> Eedi hayyear giyea yi hanna, Barjosa upsinam ki giye; waadadhea yi hannaar, Barjo kina imen kantanka ki waadadhe. Ogona Barjo yer wulka Yesus Kiristooska kida gobshadhe. Kina gobshibee hayamobe rooro wul lay ko dee; amiin.

### *Gaalen Rooroaka Wocchimbha Zaskayno*

<sup>12</sup> Isa nashonato, nuudettsi maaton taysate sheden gaalensa iiinte yenin dehenka dhesadhaama yer yedar nivaadettsi hayayse targadheebhode. <sup>13</sup> Kalon Kiristoossa gobshinin may haapadhen wodanka kattsi yenin wozadhoodettsi, ta Kiristoossa gaale-nam kashimayna yenin maatenka wozadhee. <sup>14</sup> Kiristoossa naabenna hamayse ye irdhidianna, gobshadhaa Barjosa Manpasin yedar ukunsenna wozadhee.

<sup>15</sup> Yennon iira hayyear eediam deesintakabee, dimmakkokabee, siya hayntakabee, eedisa dhalqir ardintabeka gaale ki tiyabhoode. <sup>16</sup> Ko dahaannaar Kiristoosdar woy-lamin qajea kinin dohonna gaale kidar yeskanna, ogo Kiristoossa naabenka Barjoam ki gobshe, ki ooshimbhabhode. <sup>17</sup> Pirdino Barjo eendar konin yedayno wodano yeskidine; birayse wodar yeskidi ko hanna, Barjosa dhacchintan upsinna ee hamiminasa kesa macchino hamin ko doo?

<sup>18</sup> Tipaa ea gaaleka dhaqeaa ki hanna,  
Barjoam kurtumbhimaabee seeson eabe hamin ki hame?

<sup>19</sup> Ogonante Barjosa bhocchidettsi gaalenam haapayna eena payyanam waadadhaate gon hama pijaa Barjona yisa sadanam ke ime.

## 5

### *Barjo Eenaam Wottsadhen Goyno*

<sup>1</sup> Ta keeda inta kembesana kinka misken ooninsa donza maataa, Kiristoos gaalen-saar tarjea, os birante haapadhen kisa gobshinam kashimea dahayse, yesa shaarinte dahaana misken ooninsa donzanaam yin giyayse ida kiile: <sup>2</sup> Yena elqimayse imbhaana Barjosa qollaam gishee. Ogonoar eedi yeam kantisonna dayma, Barjosa qaabondettsi nashayse keam toolee. Koymona gibazintaka dayma waadadhana yesa dohon payyan anngarmanka ko dee. <sup>3</sup> Yenin wottsayna qollana kamsi maatee; kantanka keam wottseebhode. <sup>4</sup> Yin ye hayanna, gishiman gishaynasa Hayoa Gebhaa kinin niven wodanka gemmimon gobshinsa qoobhenam yeda tiye.

<sup>5</sup> Yin pir yedi barshinato, donzanana ee hamee. Yedi wul mete toskintanam apaladettsi qaadhayse kinka kina waadadhee. Harrna hambhidianna, Barjo poorimbhaynaam jibba ki jibbe; metenam yisa toskaynana sunin imintonam ima ki ime. <sup>6</sup> Ta keeda Barjo yinin guyon wodanka yeam dhev kinin hayoadettsi, kisa kantan aanin demente yesa metenam toskee. <sup>7</sup> Kidi yena kinin bhocchenna yeam galshen wulam kidar dhabee.

<sup>8</sup> Ogonante yeam zaskendettsi qaymayse dehee. Harrna hambhidianna, yeam jibbea Seethaan yinin manngenam zagayse zobodettsi yesa gasante gudhite kida yaaye. <sup>9</sup> Peen kodar dahaana yesa imbanaana ogodettsi gaale kenin tiyenam dhesayse, Barjodar woy-lamin yenin qajenka wocchimbhayse Seethaanam jibbee. <sup>10</sup> Likka wodana gaalenam yenin tiyonsa budonte, Yesus Kiristooska rooro wul lay dehen kisa gobshinna yeam

eela sunin iminton wulsa Barjo kidi yinti yeam maasayse wocchinsa ki wocchinse; yeam woysa ki woyse. <sup>11</sup> Roro wul lay bitamonbee kantanbe kina ko dee; amiin.

*Macchin Nagaymakkono*

<sup>12</sup> Eedi gon hama imbanaasine hamayse inin bhocchea Sillaasbar ko warqatinam likkaka yena i thaapade. Inin thaapoonoar yeam kiilanabee ogono gon Barjosa sun iminto konin dohonam yena tarjanabene. Ogonante Barjosa sunin imintonka wochimbhayse woyee.

<sup>13</sup> Yembesana kinka kambhoono Baabiloon gidir dohon misken onno “Nagaya” yena koda hame; isa naasa Marqoosaar “Nagaya” yena kida hame. <sup>14</sup> Nashimmakkoka kinka kiam sunqaate “Nagaya” kina hamee. Kiristooska maataana ye wulna payyamo ko dee.

## Kiristoos Yisa Tarjamonnante Kinin Yittsaa Bhethiroosin Thaapoono Lansono Warqanno

### *Ardinta*

Kaa lansoa Bhethiroosin thaapaa warqata 57-60 levensa iinte thaapadhaadettsi hayayse koda bhocchadhe. Warqata Imba Yesusbbee kisa upsin hayamonbeam bagayse buudamon timmirinam dhettsayna eenakalanka yisa metenam kenin gishoadettsi Barjodar woylam qajaynaam kida kiile. Warqatinsa kattsi bhocchino buudan timmirin bashana goninam dhesa ko zaske hamaynone. Dhesa bish dayma, bhocchaar zaska ko zaske (1:12-13; 3:1). Gonin hamonam walano kattsi siya yerdar koda yeskise (1:9; 3:8). Ogona warqatinsa bhocchino Barjo upsinsa timmiri gonbee Barjobesana wosa dohon sadanna entsabe konin maatonam koda bhocchise.

Kaa mathaapaam raq laxdar kashana dandima ko dandime:

1. Nagaymakkono (1:1-2)
2. Dhesintobee Barjodar woylam qajayse daadhea dayntabe (1:3-15)
3. Dhesintobee Barjosa upsinbe (1:16-21)
4. Dhesintobee buudan timmirinbe (2:1-22)
5. Dhesintobee Kiristoossa lansi maatate nivintanbe (3:1-13)
6. Macchin kiilimeno (3:14-18)

Barjo wosa sadanna wona zasken wulam imidine. Ogona kinin imonam tiyayse manpasinngayn aapin usha woam koda zaske.

- 1) Manpas Gazansa entson goynka thaapadhon Barjosa upsinam payya hayayse bhocchintaka waadimadar hacchinta woam koda zaske (1:19-21).
- 2) Keam eelaa Imbaa Yesusam garayse buudan timmirinam dhettsayna eena pirdinam yidar keda beve (2:1bee 20be).
- 3) Kiristoos lansi maatate kinin nivenka Barjosa bhocchino koda thoothe; kisa naabeno koda gobshadhe; kiam bagaanadar pirda ko pirdadhe. Kiam bagayna eena koka yekka kenin kappoono Barjo eedi hayyear konin kayoamadettsi zagayse Kiristooska kenin qaashimea woda ki imade (3:9). Ogo wulam wonin dhesenna wupo qolma dahaate Imbaa wontea Yesussa sunin imintonka kiam wonin dhesonka gebha woam koda zaske (3:14-18).

<sup>1</sup> Yesus Kiristoossa waadima eedibee kisa tarjamonnante yittsadhaabe i Simoon Bhethirooskalanka, wosa Barjobee woam dhacchaabe Yesus Kiristoossa tipamonka wonin haapon woylamin wonin qajendettsi gobshadhaa Barjodar woylamin qajintanam haapaana eenana nittsadoono warqannone. <sup>2</sup> Barjobee Imbaa wontea Yesus-beam yenin dheson goynka sunin imintonbee payyamonbe yena ko thoothe.

### *Barjosa Eelidinbee Kamidinbe*

<sup>3</sup> Kidi yisa gobshinbee payyamonbeka woam eelaam wonin dhesen goynka sadanbee kidettsi maatintanbeam wo haape zasken yer wulam Barjo yisa kantanka wona ki imade. <sup>4</sup> Igina yerraka siyon anngarman goynka peen kodar dohon gemmon dayntara dhaqayse Barjosa dayntanam kashimayna yenin maatoadettsi, gobshadhonbee kattsi woylam yindar haydhen upsinbeam wona imidine.

<sup>5</sup> Ogonante Barjodar woylamin qajintandar payyamonam wocchimbhayse arsee; payyamondar dhesintonam, <sup>6</sup> dhesintondar meten wottsintanam, meten wottsintandar darshintaka wocchimbhintanam, darshintaka wocchimbhintandar Barjodettsi maatintanam, <sup>7</sup> Barjodettsi maatintandar indanaasdetttsi kinka kiam nashintanam, kinka kiam nashintandar nashimmakkonam arsee. <sup>8</sup> Igina yerra thoothi yesa dahaa

ke hanna, Imbaa wontea Yesus Kiristoosam yenin dhesen goynka pootimina aapiysa qolmina yenin maatoamadettsi yeam keda haye. <sup>9</sup> Igina yerra yinsa qolma ea aapi kayaa eedine; theedi yikal dohon bish kida haape. Ena yinin waadadhon seesora yinin gazimbhonam kidi walidine.

<sup>10</sup> Ogonante imbanaanato, yenin eldhonbee yenin kambhonbeam yenin wocchinsoadettsi ena hamora wocchimbhee. Ogoam ye hayna, hamin ko dahaakaar dhambatene. <sup>11</sup> Ogodettsi wosa Imbaabee woam dhacchaabe Yesus Kiristoossa rooro wul lay dehen bitamon raqinte ardansa hayamonam thoosayse yena koda imbhe.

<sup>12</sup> Yerra iginaam ye dhesaakaar, yenin yedon goninka wocchimbhayse ye woyaakaar, yerra igina goynsa rooro wul yeam bhocchisanam garattine. <sup>13</sup> Taaki sadanka inin dohonka yeam bhocchisayse qaymisano iam zaskaa ko maatade. <sup>14</sup> Wosa Imbaa Yesus Kiristoos ina kinin dhoondettsi, ta inin dohon sadara saana dembhika inin edimenam dhesayda dhese. <sup>15</sup> Ta inin wocchimbhayse waadadhayno dembhika yekalanka inin edimonsa budonte yerra iginaam rooro wul yenin bhocchoadettsi hamaysene.

### *Kiristoos Gobshinsa Tarja Maataana*

<sup>16</sup> Wosa Imbaa Yesus Kiristoossa kantanbee nivintanbeam yena wonin giyen wodanka, wodi womal kisa gobshinam wosa aapinka haapayse yena wo giyade; eensa pakalmakkonka giidhon eerinam yena giyotone. <sup>17</sup> “Ininka wozadhea inin nashea isa Naasa kaane” hamea upsea gebhon gobshira kinin nivon wodanka, Barjo Imbaakalanka gobshinbee gebhamonbeam kidi tiydine. <sup>18</sup> Wodi kimbesana kinka gazan dhukandar wo daaka, upsea agaa cecira kinin nivenka wodi wonti qansidine.

<sup>19</sup> Barjokala qansayse eenna giyaynayn giyon upsinam ogora sagi gonne hamayse wo tiyade. Upsin koam peenin sedhenka, pir shaakea eeziniayn yesa wo ylaminte shaakenka yekka, thipante shaaken shaakandettsi hayayse ye shedina yena kattsi payya koda maate. <sup>20</sup> Birayse koam dhesee: Mathaap Gazante thaapadhoono Barjokala qansayse eenna giyaynasa upsinam eedi kala hattear yisa bhocchika bula kiam zaskehe. <sup>21</sup> Harrna hambidianna, Barjokala qansayse eenna giidhenam eedisa bhocchika dayma, Barjosa Manpas Gazanin yiam entsayna eena Barjokala qansayse ke giyade.

## 2

### *Buudamoka Dhettsayna*

<sup>1</sup> Ena wodanka Barjo eensa shaarinte buudamoka “Wodi Barjokala qansayse eenna giyaynane” hamaynayn dhaadettsi, yesaar shaarinte buudamoka dhettsayna daasane. Kedi eenaam kayendar yeskisen buudan timmirinam aachika yesa shaarinte keda arse; keam shanaa Imbaam garayse yinnon metendar saanawa kayenam keda beve. <sup>2</sup> Thoothino eeno kesa sharmucimakkon goynka koda yive; kosa waadimara dhaabhoono gonin goyno koda irdhe. <sup>3</sup> Igina buudan dhettsayna koymonna kenin gibazerra dhaabhoono, yinti ashkayse yinin giyen eerinam yena giyada yeam keda sare. Ena birora yedayse pirdino kena ashkadhidine; keam kaysayno qaymayse koda toole.

<sup>4</sup> Gaanana seeso kenin waadadhonna Barjo kena burqadhima, thipan oolonte keam dhaxayse pirdin rooronin nivenka yekka dikimon nuunte keam ki dhabade. <sup>5</sup> Ena biron peenna burqadhadehe; Barjoam kurtumbhimina eenayn dohon peendar kayen noqonam kinin bevenka, tipamonam giyea Nohebee waani eena tobbhaanabeam ki dhacchade. <sup>6</sup> Pir Barjoam kurtumbhimina wuldar pirdadhensa kamsi kenin maatoadettsi Sodoombee Gamoorabe katamana dibini kenin maatenka yekka atada kenin kayoadettsi kedar ki pirdade. <sup>7</sup> Barjona ee hamiminasa sharmucimakkon waadimanka gaalite dahaa, agaa tipa Lootheam ki dhacchade. <sup>8</sup> Harrna hambidianna, agaa tipa ea kesa shaarinte kinin dehenka, rooro rooroaka kinin haapenbee kinin qansenbe kesa

siyon waadiman goynka kattsi gaalite ki dahade. <sup>9</sup> Ogona Barjodettsi maataanaam hamin keam gaalera kinin dhacchenbee tipa maataamma eenam dhabshada pirdin rooroana hamin keam kinin toolenbeam Barjoda dhese hamintane. <sup>10</sup> Kalon igina minngamon anngarmanka yivaynabee Barjosa hayamonam bagaynabedar pirdana keam toolayse ki dahade.

Igina eena ooshimbhiminabee poorimbhaynabe maatayse, cecinte hayamoysa da-haanaam iirana kurtumbhehe. <sup>11</sup> Barjosa gaanana kedara kantanbee hayamonbeka sagayna ke dahaakaar, Barjo birante iirimesa pirdi kedar bevehe. <sup>12</sup> Igina buudamonka dhettsayna ke hanna, kedi pijadhinka yedadhanabee deesadhanabe adhadhaana, qaaboysa qolmina dammadettsine. Yinin dhesimina yerraam keda iire; damma kayay-nadettsi kediар kaya ke kaye.

<sup>13</sup> Kesa wobamon waadimansa bazanam keda tiye. Rooronka yisa anngarmanam yinin waadadhenka wozadettsi hayayse keda payde; eenam taysana kenin wozad-henna, yembesana kinka kummandar haapadhintaka yer qaysbee ooshinseabe ke maatade. <sup>14</sup> Sharmucimakko hayana maanam kenin shdeda aapi kesa daane; seeson waadimanam garmina eenane; Barjodar woylamin yinin qajenka akar wocchimb-haamma eenam taysate keda dhaddhise; “Yer wul ina ko dee” hamintanam dusaana eenane. Kedi ashadhaana eenane. <sup>15</sup> Tipamon goynam garayse ke dhaddhismade. Bevoor naasa Balaamsa paanan ke yivade; kidi tipa maataamon waadimansa bazanam ki nashade. <sup>16</sup> Ko dahaannaar Balaamsa seeson goynsa kiam ko wacimbhade; giya dhesimino ukuli eedi upsika kina giyntaka Barjokala qansayse eenna giyeasa barinam ko marade.

<sup>17</sup> Igina eena noqoysa qolma tuuladettsine; jibaren yiam bavate yaayayna polonadett-sine. Kattsi thipa maatoono rango keam koda toole. <sup>18</sup> Harrna hambhidianna, wobon qaabonte dahaana eenasa shaarira dhaqayse nivaana eenana pootima pormakko upsi giyntaka waan anngarman siyonna keam keda tayse. <sup>19</sup> Kedi yinti kaysen seesonsa worsho dahayse “Worshamora yeda ute” hamada woylem yindar haydhen upsinam keda ime. Harrna hambhidianna, eedi yiam bashaa yerana worsho kida maate.

<sup>20</sup> Wosa Imbaabee woam dhacchaabe Yesus Kiristoosam dhesintaka peen kote min-ningin yerira kenin dhaqonsa budonte pir ogosa iir maatate yedadhaana ke hanna, kedi bashadhidine; ena biron dayntara kesa budon dayntano sagi gemma ko gemme. <sup>21</sup> Harrna hambhidianna, tipamonsa goynam yinin dhesonsa budonte yina imbhon gazan upsira budoka maatintara ogo tipamon goynam dhesima shidhintano kena payyane. <sup>22</sup> “Qaski yisa thayntendar kida maate” pir, “Wurkupa yinin shiidhimbhonsa budonte maatayse coqonte koda wunkure” hambhoono kamsino gon kedar yeskidine.

### 3

#### *Imbaa Wontea Yesus Maatayse Kinin Nivayno*

<sup>1</sup> Isa nashonato, taaki inin yena thaapayno warqanno kono isa lansonone; igina lamaana warqannaka goninam yena bhocchisintaka yesa qaabono payya konin doadettsi, yeam qaymisana i thaapade. <sup>2</sup> Ena Barjokala qansayse eenna giyayna gaza maataana eena kenin giyaana upsinabee Kiristoos yisa tarjamonnante kinin yittsaanakalanka yenin tiyon woam dhaccha wosa Imbaasa upsinbeam yenin bhoc-choadettsi ida nashe.

<sup>3</sup> Birayse koam dhesee: Macchin rooroaka yisa anngarmandettsi yaayada bagimayna eena keda nive. <sup>4</sup> Kedi “Yesus ‘niva ki nive’ hambhoono hamotene? Wosa eykena diyorra yedayse yer wul ena pijadhorra yedayse konin dahaadettsi koda dee” keda hame. <sup>5</sup> Igina eena cecinbee peenbe ena Barjosa upsinka kenin pijadhonam kedi dhesayse bhocchehe; peenoar noqorabee noqokabe ko pijadhade. <sup>6</sup> Ogo wodanka

dohoono peeno noqoka itsadhyayse ko kayade. <sup>7</sup> Barjoam kurtumbhimina eenaaam pirdayse kaysadhea rooroaka yekka ta dohon cecinbee peenbeam ogo Barjosa upsinka nuunna keda toldhe.

<sup>8</sup> Isa nashonato, yer kalaa waleebhode: Ogonoar Barjona rooro kala shii levedettsi, shiin lendhoar rooro kaladettsine. <sup>9</sup> Waani waani eena kennon qaabendettsi Barjo kinin giyon qaabe yindar haydhen upsinam thoosana kappehe. Ko dahaannaar eeno wul seeson waadimanam yisa garayse kidar konin maatoadettsi kida yena darshe; eedi hayyear kayoadettsi zagehe.

<sup>10</sup> Imbasa roorono diibidettsi koda nive. Ogo wodanka cecino upsi gebhika saga ko sage; cecinte dohoono pijadhino wul nuuka kaya ko kaye; peenbee kodar dohon wulbe ata ko ate. <sup>11</sup> Ta keeda yer wul ogodettsi kayayno ko hanna, yedi hamin daa yeam ko zaske? Gazamokabee Barjodettsi maatintabeka daa yeam koda zaske. <sup>12</sup> Ta keeda Barjosa pirdin rooroa nivenam wozaka toolaynabee saana konin nivoadettsi waadahaynabe maatee. Ogo wodanka cecino nuuka atayse koda kaye; cecinte dohoono pijadhino wul nuunsa oydhamorra dhaabhonka koda yelge. <sup>13</sup> Ko dahaannaar qaabe yindar haydhen Barjosa upsindettsi tipamoyn dohon pee haalibee ceci haalibeam woda toole.

### *Macchin Kiilimeno*

<sup>14</sup> Ogonante isa nashonato, ogo wulin maatenam toolada, ooshinseabee siya yerbe yindar qolmina maatayse kisa birante payyamonka haapadhana wocchimbhee.

<sup>15</sup> Nashadhaa imbanasa Bhawloos yina imbhon pakalmakkonka yena kinin thaapondettsi, wosa Imbaa Yesus darshintanka woam kinin dhacchonam bhocchee.

<sup>16</sup> Bhawloos kinin thaapon warqatin wulir yerra kinasa ki thaapade; kinin thaapaana warqatinasa iir waani waani bhocchana galshayna yerra daane. Timmiraamma eenabee qaabonka osbee orabe hamayna eenabe Mathaap Gazante thaapadhon waaniam kenin wobsendettsi igina yerramaar pir keda wobse; yin hayntaka yinnon metendar kayenam keda beve.

<sup>17</sup> Ta keeda isa nashonato, birayse koam yenin dhesenna, ee hamiminasa wobon qaabonka dhaddhismayse, yenin wocchimbhayse woyorra yenin dhamboamadettsi mete yesaam gishee. <sup>18</sup> Ko dahaannaar wosa Imbaabee woam dhacchaabe Yesus Kiristoossa sunin imintonbee kiam dhesintanbeka gebhee. Kinaar, rooro wul lay gobshi kina ko dee; amiin.

## Kiristoos Yisa Tarjamonnante Kinin Yittsaa Wannisin Thaapoono Birono Warqanno

### *Ardinta*

Kiristoos yisa tarjamonnante kinin yittsaa Wannis makkamma warqatinam kinin thaapoono buudan timmirinam maranane. Buudan timmirinam dhettsayna eenasa waani waani “Dhesinton waanidara sagi aachi maataa dhesinto wosa daane” keda hame. “Ogo dhesintonam ye haapidianna, yedi dhaqeeda dhaqe” hamayse eenaam dhettsite ke dahade. Kesa qaabono “Eedisa manpas payyane; waa siyane. Ogonante Barjo eedi maatana damehe. Imbaa wontea Yesus Kiristoos eedidettsi ki maatade; Barjo kinin dohonna, gon eeditehe” hamaate Barjodar woylamin qajaana eenaam keda dhaddhise. Waani eenaar “Yesus Kiristoos gon eedine, gon Barjotehe” hamaate keda dhaddhise.

Kaa warqata Wannisin thaapaa Yesus Kiristoossa dhacchintan upsinbesana qaabono kalaane. Lamaana mathaapina Imbaa wontea Yesus Kiristoosbee kidar woylamin qajayna eenayn haapen rooro wul lay dehen sadanbesa keda eenaam dhettse. (Wannis 20:30-31; Biraa Wannis 5:13). Wannisin Thaapoono Dhacchintan Upsino hamin hayayse dhaqana wonin damensa koda dhettsise; Biraa Wannis wodi Barjodar woylamin qajaana eena gon wonin dhaqonam koda giye. Lamaana mathaapina Kiristoossa giyntaka “Barjosa Upsinone” hamayse koda dhettse. Ogono yin giidhoono Kiristoos Barjo dayntansa yisa waadimanka kida dhee hamintane.

Kiristoos yisa tarjamonnante kinin yittsaa Wannis kinin thaapaana mathaapina wul 78-88 lendhasa iinte ko thaapadhade hamayse koda qaabadhe. Ogono yin giidhoono Wannis geccho dahayse Imbaa wontea Yesus Kiristoosbesana kisa dohon dayntanbee misken onnadhar yeskon gaalenbeam bhocchayse yinin kapponsa budobar iginwa warqannaam ki thaapade.

Buudan timmirinam bagaate kaa warqatasu iinte Wannis Yesus Kiristoos hay kinin dohonam kida dhettsise: Yesus gon eedine (1:1-3; 4:1-3); gon kidi Barjone; pir Barjoyn kamayse qadhaa Kiristoos Barjo Naasine (1:3bee 7be; 2:22-23; 3:23; 4:15; 5:1bee 20be).

Wannis warqataam kinin thaaponsa goyno kashi 5:13dar kidi yinti giydine: “Roro wul lay dehea sada yesa dohonam yenin dhesoadettsi Barjo Naasadur woylamin qajayna yena inta koam thaapidine” koda hame. Warqanno “Barjo naanana” way “Barjoka adhadhaanana” thaapadhidine. Ogonante Barjosa oonin eenana thaapadhoo warqannone. Barjo yisa naanabesana kisa dohon dayntansa giidhenka kinka kesa kalaa maatintansa hamayse kida giye (1:3bee 6-7be).

Kaa mathaapaam raq tabhidar kashana dandima ko dandime:

1. Sadan imen upsinbee gonin hamon kinka kalaa maatintanbe (1:1-4)
2. Kinka kalaa maatintana kattsi zaskayno yerro (1:5-10)
3. Kinka kalaa maatintanin bavayno yerro (2:1-17)
4. Kinka kalaa maatintanam marayna yerra (2:18-29)
5. Kinka kalaa maatintanam hamin hayayse wonin haapoono (3:1-10)
6. Kinka kalaa maatintansa milkitino (3:11-24)
7. Kinka kalaa maatintanam marmarayse dhesinta (4:1-6)
8. Kinka kalaa maatintanam waadimadar hacchinta (4:7-21)
9. Kinka kalaa maatintansa caacino (5:1-12)
10. Kinka kalaa maatintansa aapino (5:13-21)

Haalin Mallan mathaapinsa iinte “Kiristoosam jibbea ea” hamea upsea Wannisin thaapon mathaapinsa iinte bish koda haapadhe (2:18bee 22be; 4:3; 2 Wannis 1:7). Ogo

Girik upsinsa lanso buli kosa daane: “Kiristoos raqaate yiam wodaa ea” hamintane. Agaa Kiristoosam jibbea ea Barjo Imbaabee Naasabena zasken raqinam yina tiyota zاغayse yinnon metenam yer wuldara sagi hayayse Barjo maatota kida zage. Kiristoosam jibbea easa manpasino pir “Kiristoos eedi maatayse nivadehe” hamaate Kiristoos woam kinin dhacchaamadettsi hayota koda zage.

### *Sadan Imayno Upsino*

<sup>1</sup> Birara yedayse dohon sadan imen Upsinsa yena woda thaape; ogono sadan imayno Upsino wonin qansonbee, wosa aapinkaar wonin haaponbee, wosa aaninkaar wonin kaamorbene. <sup>2</sup> Ogoro sadano may ko haapadhade. Wodiar koam haapidine; kona tarjooda tarje. Barjo Imbaabesana dohoono, wonaar haapadhoono, rooro wul lay dehen sadansa yena woda giye. <sup>3</sup> Yedi pir wombесана kinka kalaa yenin doadettsi wonin haaponbee wonin qansonbeam yena woda giye. Kalaa wonin maatayno Barjo Imbaabee Naasa kintea Yesus Kiristoosbesanane. <sup>4</sup> Wosa wozanin\* thoothoadettsi yena woda thaape.

### *Barjo Shaaka Kinin Dohoono*

<sup>5</sup> Kinin giyem wonin qansonbee yenaar wonin giyen ergenbe “Barjo shaakane; hamin ko hannaar thipa kikal qolehe” hamaynone. <sup>6</sup> “Barjobesana kinka kalaa maatinta wosa daane” hamaate thipante yaayayna wo hanna, buuda woda giye; goninam hayattone. <sup>7</sup> Ko dahaannaar kidi shaakante kinin dahaadettsi wodiar shaakante yaayayna wo hanna, kinka kalaa maatinta wosa daane; pir Naasa kintea Yesus Kiristoossa zombhino seeson wulra woam koda gazinse.

<sup>8</sup> “Seeso wosa qolehe” wo hamidianna, woam woda tayse; gonnor wosa iinte qolehe. <sup>9</sup> Wosa seesonam wo buuthina, wosa seesonam wona garanabee seeso wulra woam gazinsanabe Barjo gon hamabee tipabene. <sup>10</sup> “Seeso waadahootone” wo hamidianna, Barjoam buuda giyea woda haye; kisa upsinoar wosa iinte qolehe.

## 2

### *Kiristoosin Wona Palimayno*

<sup>1</sup> Isa naanato, seeso yenin hayoamadettsi ogoam yena ida thaape. Hayyear seeso haydi ki hanna, Barjo Imbakal wona palimea daane; kidiar tipa maataa Yesus Kiristoosne. <sup>2</sup> Kidiar wosa seesonam shiishana marsha machadhaane. Kissa machadhidino peen kodar dohon een wulsa seesonna, wonnon seesonna bishtehe.

<sup>3</sup> Barjosa upsinam wo toolidianna, kiam wonin dhesonam ogoka woda dhese. <sup>4</sup> “Inta kiam dhesidine” hamea Barjosa upsinamaar toolima kidi buuda eedine; gonnor kisa iinte qolehe. <sup>5</sup> Kissa upsinam toolea wul gon Barjosa nashimmakkono kanka thoothidine. Barjoka wonin dohonam ogoka woda dhese. <sup>6</sup> “Barjoka i dahade” hamea eedi Kiristoosin dahaadettsi daa kiam koda zaske.

### *Upsino Hallo*

<sup>7</sup> Isa nashonato, inin yena thaapayno ena birara yedayse yekal dohoono gecchono upsinone, haali upsitehe. Ogoro gecchono upsinoar yenin qansoona upsinone. <sup>8</sup> Tapir Kiristoosbee yembesa iinte gon maaton upsi haali yena ida thaape. Harrna hambidanna, thipano sagite ko dahade; gonin hammo shaakano taaki shaakite ko dahade.

<sup>9</sup> “Shaakante i dahade” hamada imbanasaam jibbea ea ta koka yekka thipante ki dahade. <sup>10</sup> Imbanasaam nashea shaakante kida dee; kikal eedina goa maatea yer qolehe. <sup>11</sup> Imbanasaam jibbea ea thipante ki dahade; thipante kida yaaye; thipanin kisa aapin kaysonna yinin yivenamaar dhesehe.

\* <sup>1:4</sup> “Wosa wozanin” hamayno waani waani mathaapinsa iinte “yesa wozanin” koda hame.

<sup>12</sup> Naanato, yesa seesonam kisa naabenna hamayse ko shidhe hambonna yena ida thaape. <sup>13</sup> Imbanato, birara yedayse Dahaam yenin dhesonna yena ida thaape. Barshinato, Seethaanam yenin bashonna yena ida thaape. <sup>14</sup> Naanato, Barjo Imbaam yenin dhesonna yena inta thaapidine. Imbanato, birara yedayse Dahaam yenin dhesonna yena inta thaapidine. Barshinato, kantanka yenin dohonnabee, Barjosa upsinoar yenza konin dohonnabee, Seethaanam yenin bashonnabe yena inta thaapidine.

<sup>15-16</sup> Peen koam way peen kogayn yerinam nasheebhode. Peen kodar dohoono wul: Ogonoar waansa anngarmanbee, aapina agenbee, wodimmakkoka erimintanbe peen kodar konin dohonna, Barjo Imbakalanka konin maataamonna hayyear peen koam ki nashina Barjo Imbas a nashimmakkono kidar qolehe. <sup>17</sup> Peenbee kosa anngarmanbe sagite ko dahade; Barjosa bhocchinam waadadhea ea rooro wul lay kida dee.

### *Kiristoosam Jibbeakalanka Mete Gishinta*

<sup>18</sup> Naanato, macchin savaatino konone. “Kiristoosam jibbea eedi niva ki nive” hambhenam yenin qansondettsi taar thoothina Kiristoosam jibbayna eena dhaabhidine. Ogo goynka macchin savaatino konin maatonam woda dhese. <sup>19</sup> Kediar wosa shaarira ke utade; ko dahaannaar kedi wosa mulhanatehe. Wosa muldha yi dahaana, ini wombesana kinka wocchimbhayse keda dee; ko dahaannaar kedi wul wosa muldhana kenin maataamono konin dhesimoadettsi wosa shaarira ke utade.

<sup>20</sup> Gazaa Kiristoos yeam yisa Manpasinka ki qadhade; ogonante yedi wul goninam dheseeda dhese. <sup>21</sup> Yena inin thaapayno goninam yenin dhesaamonnatehe, yenin dhesennane. Pir goninsa iinte buudan qolmonam dheseeda dhese. <sup>22</sup> “Yesus Barjoyn qadhaa Kiristoostehe” hamayse marimeakalanka buudan ea hayne? Barjo Imbabee Naasabeam marimea Kiristoosam jibbea agaa eane. <sup>23</sup> Barjo Naasaam marimea wul Barjo Imbaar kikal qolehe; Barjo Naasaam gonne hamayse tiyea Barjo Imbaar kikal daane.

<sup>24</sup> Yedi birara yedayse yenin qansoono yenza wocchimbhayse ko dee. Birara yedayse yenin qansoono yenza wocchimbhayse dahaa ko hanna, yediar Barjo Imbabee Barjo Naasabeka yeda dee. <sup>25</sup> Ogonoar Kiristoos yinti wona kinin imoono woylam yindar haydhayno rooro wul lay dehea sadane.

<sup>26</sup> Yeam taysota zagayna eenasa yena i thaapade. <sup>27</sup> Yedi Kiristooskalanka yenin tiyoono Manpasino yekal konin dohonna, eedi hayyear yeam dhettsa zaskehe. Ko dahaannaar kisa Manpasino yer wul goynsa yeam konin dhettsendettsi, gon konin dohonna buuda konin dahaamonna, yeamaar konin dhettsondettsi Kiristooska dehee.

<sup>28</sup> Taar naanato, Kiristoosin may haapadhen wodanka kurtumbhima kisa birante wonin woyoadettsi kisa nivintankaar kisa birante wonin ooshimbhoamadettsi kanka dehee. <sup>29</sup> Kidi tipa kinin dohonam ye dhesidianna, tipamonam hayea wul kikalanka kinin adhadhonam dhesee.

## 3

### *Barjo Naana*

<sup>1</sup> “Barjo naana” hamayse wonin eldhoadettsi Barjo Imbaa hamin dohon nashimmakkonam wona kinin imonam shedee! Wodi gon Barjo naanane. Ogo goynka peen kodar dohoono eeno Barjoam konin dhesaamonna woamaar dhesehe. <sup>2</sup> Isa nashonato, keeda wodi Barjo naanane; os birante har wonin maatenam akar dhesadhadehe. Ko dahaannaar Kiristoosin niven wodanka, kisa dantanam wonin haapenna kidettsi wonin maatenam dhesooda dhese. <sup>3</sup> Kiristoosdar qaabe hayea wul kidi gaza kinin dhaaadettsi yiam kida gazinse.

<sup>4</sup> Seeson waadadhea wul Barjo yigginam kida kottse. Seeso waadiminta Barjo yigginam kottsinta hamintane. <sup>5</sup> Kiristoos eensa seesonam shiishana kinin nivonam

dheseeda dhese. Seeso kisa golehe. <sup>6</sup> Kiristooska dehea eedi wul seeso waadadhehe; seeson waadadhea eedi wul Kiristoosam haapadehe, pir dhesadehe.

<sup>7</sup> Naanato, hayyear yeam ko taysabhoode; Kiristoos tipa kinin dohondettsi, tipamonam waadadhea eedi tipane. <sup>8</sup> Harrna hambhidianna, seeso waadadhea Seethaankalankane. Seethaan birara yedayse seeso kida waadadhe. Ogonante Barjo Naasayn nivoono Seethaansa waadimanam kaysanane.

<sup>9</sup> Barjokala adhadhaa wul seeso waadadhehe. Harrna hambhidianna, Barjosa dantano kisa iinte konin dohonnane; pir Barjokala kinin adhadhonna seeso waadad-  
hana damehe. <sup>10</sup> Tipamonam waadadhimbabee imbanaasam nashima wulbe Bar-  
jokalankatehe. Barjo naanabee Seethaan naanabe ogoka keda dhesime.

### *Kinka Kiam Kiam Nashadhen Goyno*

<sup>11</sup> Birara yedayse yenin qansoono ergeno yinne: "Kinka kiam kiam wo nashe" hamaynone. <sup>12</sup> Seethaansa muldha maataa, indanaasaam deesaa Qaaveeldettsi maata zaskehe. Harrna kiam ki deesaa? Kisa waadimano siya konin dohonnabee indanaasasa waadimano tipa konin dohonnabene.

<sup>13</sup> Imbanaanato, peen kodar dohoono eeno yeam konin jibbenka targadheebhode. <sup>14</sup> Wodi imbanaanaam wonin nashonna, dembhira sadandar wonin sagonam dhesooda dhese. Nashimmakkoysa qolmaa dembhinte ki dahade. <sup>15</sup> Imbanaasam jibbea wul eediam deesaane. Eediam deesaar rooro wul lay dehea sada kisa qolmonam dheseeda dhese.

<sup>16</sup> Kiristoos wona hamayse sadan yinnonam saskayse kinin imonna, nashimmakko har konin dohonam wodi dhesidine. Wodiar imbanaanana hamayse sadan wonnonam saskayse ima woam ko zaske. <sup>17</sup> Ko dahaannaar peen kodar koymo yisa daaha eedi gaalea imbanaasam shedayse kina ki burqadhaamma, Barjosa nashimmakkono kisa iinte hamin ko dee? <sup>18</sup> Naanato, wosa nashimmakkono gonbee waadimabeka ko dee; apoka bish ko dahabhoode.

<sup>19-20</sup> Wosa woylammoor wodar konin pirden wodanka, goninkalanka wonin dohonam ogo wosa nashimmakkonka woda dhese; kisa birantear wosa woylaminam woda ukunsise. Barjoar wosa woylamindara sagine; yer wulam dhesa ki dhese.

<sup>21</sup> Isa nashonato, wosa woylammo wodar ko pirdaamma Barjo birante ooshimbhe qolma woda dee. <sup>22</sup> Barjosa upsinam toolaynabee kiam wozisenam waadadhaynabe wonin dohonna, wonin misken wulam kikalanka haapooda haape.

<sup>23</sup> Barjosa upsin Naasa kintea Yesus Kiristoosdar woylamin wonin qajoadettsibee kinin giyondettsi kinka kiam kiam wonin nashoadettsibene. <sup>24</sup> Barjosa upsinam toolea kanka kida dee; Barjoar kanka kida dee. Barjo wonka kinin dohonam wonin dhesayno wona kinin imon Manpasinkane.

## 4

### *Gonin Manpasinbee Buudan Manpasinbe*

<sup>1</sup> Isa nashonato, manpas wulam gonne hamayse tiyebhode; ko dahaannaar manpasina Barjokala kinin dohonam way dahaamonam marmarayse shedee. Harrna hambhidianna, thoothina buudamoka "Wodi Barjokala qansayse eenna giyaynane" hamayna eena peen kodar dhaabhidine. <sup>2</sup> Barjosa Manpasinam ogoka yeda dhese: "Yesus Kiristoos gon eedi maatayse ki nivade" hamayse tarjea manpas wul Barjokalankane. <sup>3</sup> "Yesus Kiristoos gon eedi maatayse ki nivade" hamayse tarjima manpas wul Barjokalankatehe. Ogono manpasino Kiristoosam jibbea easa manpasne. Konin nivenam yedi qansidine; taar peen kodar daane.

<sup>4</sup> Naanato, yedi Barjokalankane; keamaar yedi bashidine. Harrna hambhidianna, yekal dohoono Manpasino peen kodar dohon manpasindara koda sage. <sup>5</sup> Kedi peen korane; ogonante peen ko gaynam keda giye; peen kodar dohoono eeno kenin giyenam

qansa ko qanse. <sup>6</sup> Wodi Barjokalankane; Barjoam dhesea eedi wonin giyenaam qansa ki qanse. Barjokalanka maataama wonin giyenaam qansehe. Ogoka gonin Manpasinbee dhaddhisen manpasinbeam edayse woda dhese.

### *Barjo Nashimmakko Kinin Dohoono*

<sup>7</sup> Isa nashonato, nashimmakko Barjokala konin dohonna, pir nashea wul Barjokala kinin adhadhonnabee Barjoam kinin dhesennabe kinka kiam kiam wo nashe. <sup>8</sup> Barjo nashimmakko kinin dohonna, eediam nashimina wul Barjoam dhesehe. <sup>9</sup> Kanka sadaka wonin doadettsi Barjo Naasa yisa kalaam peen kodar ki nittsade; ogoka Barjosa nashimmakkono may wona ko haapadhade. <sup>10</sup> Nashimmakko yinne: Barjo yinti woam kinin nashondettsi, wosa seesonamaar shiishea marsha machadhea kinin maatoadettsi yisa Naasaam ki nittsade; wodi Barjoam wonin nashondettsitehe.

<sup>11</sup> Isa nashonato, Barjo ogodettsi woam nashidi ki hanna, wodi pir kinka kiam kiam nasha woam ko zaske. <sup>12</sup> Barjoam haapaa eedi kala hattear qolehe. Kinka kiam kiam wo nashina Barjo wonka kida dee; kisa nashimmakkonoar wonka gon thoothidine.

<sup>13</sup> Barjo yisa Manpasinam wona kinin imonna, kanka wonin dohonbee kidiar wonka kinin dohonbeam ogoka woda dhese. <sup>14</sup> Wodiar Barjo Imbaa yisa Naasaam peen kodar dohon eenam Dhacchea ki maate kiam kinin yittsonam wodi haapidine; ogoam woda tarje. <sup>15</sup> “Yesus Barjo Naasine” hamayse tarjea wul Barjo kanka kida dee, kidiar Barjoka kida dee. <sup>16</sup> Wodiar wona dohon Barjosa nashimmakkonom dhesidine; ogoamaar gonne hamayse wodi tiydine. Barjo nashimmakkone. Nashimmakkokaar dehea eedi Barjoka kida dee, Barjoar kanka kida dee. <sup>17</sup> Peen kodar wonin dahayno Kiristoosin dahaadettsi konin dohonna, pirdin rooroaka kurtumbhimina eena wo maate Barjosa nashimmakkono wonka thoothi koda dee. <sup>18</sup> Nashimmakkosa iir kurtumbhe qolehe; harrna hambhidianna, gonin nashimmakkono kurtumbhenam bulate koda dhabe. Kurtumbhesa dhabi dohonna, kurtumbhea easa nashimmakkono gontehe.

<sup>19</sup> Barjo birayse woam kinin nashonna, wodiar kiam nashooda nashe. <sup>20</sup> Hayyear “Barjoam nashayda nashe” hamada yimbanaasam jibbea ki hanna, kidi buuda eedine. Harrna hambhidianna, yinin haapea yimbanaasam nashima yinin haapima Barjoam hamin kida nashe? <sup>21</sup> Barjoyn wona giyoono upsino yinne: “Barjoam nashea yimbanaasamaar ki nashe” hamaynone.

## 5

### *Peen Koam Bashadhen Goyno*

<sup>1</sup> “Yesus Barjoyn qadhaa Kiristoosne” hamayse tiyea wul Barjokala ki adhadhade. Adhaam nashea wul kikalanka adhadhaa naasaam pir kida nashe. <sup>2</sup> Barjoam wonin nashenkabee kisa upsinam wonin toolenkabe Barjo naanaam wonin nashenam ogoka woda dhese.

<sup>3</sup> Barjoam nashinta kisa upsinam toolinta hamintane. Kisa upsinoar dethatehe. <sup>4</sup> Harrna hambhidianna, Barjokala adhadhaa wul peen koam kida bashe; peen koam wonin bashaynoar Kiristoosdar woylamin qajintakane. <sup>5</sup> “Yesus Barjo Naasine” hamayse tiyeara ab peen koam bashea hayne?

### *Kiristoos Goysa Tarjadhoono*

<sup>6</sup> Kisa shiidhimenam eshkayno noqonbee kisa dembhinam eshkayno zombhinbeka\* nivaa agaa Yesus Kiristoosne. Noqonbee zombhinbeka ki nivade, noqonka bish nivadehe. Manpasinoar gon konin dohonna, ogoam tarjayno Manpasinone. <sup>7</sup> Ogosa tarjayna makkam daane. <sup>8</sup> Kedi makkammaar Manpasbee, noqobee, zombhibene; iginia makkammasa tarjamono kalaane.

\* 5:6 “Kisa shiidhimenam eshkayno noqonbee kisa dembhinam eshkayno zombhinbeka” hamayno upsino Girik aponka “Noqonbe zombhinbeka” bish koda hame.

<sup>9</sup> Eenin imen tarjamonam tiyooda tie; ko dahaannaar Barjosa tarjamono eensa tarjamondara saga ko sage. Barjo yisa Naasasa kinin imoono tarjamono konone. <sup>10</sup> Barjo Naasadar woylamin qajea kisa woylaminte tarjamono ogono daane. Barjodar woylamin qajaama ea Barjo yisa Naasasa kinin tarjonam gonne hamayse kinin tiyaamonna, Barjoam buuda eedi haydine. <sup>11</sup> Barjoyn tarjoono yinne: Barjo rooro wul lay dehen sadanam wona imidine; sadano ogonoar konin haapadhayno kisa Naasakane. <sup>12</sup> Barjo Naasa yisa daha sada kisa daane; Barjo Naasa yisa qolma sada kisa qolehe.

### *Rooro Wul Lay Dehen Sadano*

<sup>13</sup> Rooro wul lay dehea sada yesa dohonam yenin dhesoadettsi Barjo Naasadar woylamin qajayna yena inta koam thaapidine. <sup>14</sup> Yer wulam kinnon bhocchindettsi wo miskidianna, kinin qansenam dhesooda dhese; ogona kurtumbhe qolma kiam miskooda miske. <sup>15</sup> Wonin misken wulam kinin qansenam wo dhesidianna, kikalanka wonin miskon wulam wonin tiyaadettsi woda payde.

<sup>16</sup> Eedi hayyear yimbanaasa dembhina yeskisimon seeso kinin hayenka haapidi ki hanna, kina Barjoam ki miske. Barjo kina sada kida ime. Ogono dembhina yeskisima seeso hayaan eanane. Dembhina yeskisayno seeso daane; ogodettsin seesonna ki miske hamattine. <sup>17</sup> Siya waadima wul seesone. Ko dahaannaar dembhina yeskisima seeso daane.

<sup>18</sup> Barjokala adhadhaa wul seeso kinin waadadhiminam dhesooda dhese; Barjokala adhadhaa Yesus kiam kinin toolenna, Seethaan kiam kaamehe.

<sup>19</sup> Wodi Barjokalanka wonin dohonbee peendar dohoono eeno wul Seethaansa aaninte konin dohonbeam dhesooda dhese. <sup>20</sup> Barjo Naasa kinin nivonbee gon maataa Barjoam wonin dhesoadettsi bhocchi wona kinin imonbeam dhesooda dhese. Wodiar gon maataa, Naasa kintea Yesus Kiristooska wo dahade. Kidi gon hama Barjobee rooro wul lay dehea sadabene.

<sup>21</sup> Naanato, aaninka ashkadhaana barjonana goodimadhenkalanka mete yesaam gishee.

## Kiristoos Yisa Tarjamonnante Kinin Yittsaa Wannisin Thaapoono Lansono Warqanno

### *Ardinta*

Wannis lansoa warqatam eedi kallonna way miske ooni kallonna ki thaapade. Warqataasa aapea upsea “gon” hamea upseane. Peendar thoothina dhaddhisayna eena kinin dhaabbona, goninka yiva kattsi zaskea konin dohonam kida bhocchise (paydi 4bee 7be). Kiristoossa gonin hamon timmirinam dayma ab timmiri yedayse nivea eam nagaysa zaskehe. Wo nagaysidianna, kisa siyon waadimanka kimbesana kinka woda worme hamintane (paydi 10-11).

Kaa mathaapaam raq makkamdar kashana dandima ko dandime:

1. Nagaymakkono (1:1-3)
2. Gonika yiva (1:4-11)
  - a) Barjo Imbaasa upsino (1:4-6)
  - b) Dhaddhisayna buudan eenasa timmirino (1:7-11)
3. Macchin nagaymakkono (1:12-13)

<sup>1</sup> Kambhon oonin imbanbee kosa naanabena\* i donzakalanka nittsadhoono warqannone. Inta yeam gon nashayda nashe; ibish dayma goninam dhesayna wul yeam nasha ke nashe. <sup>2</sup> Wonin nashayno ogono gonoar wosa shaarinte konin dohonnane; os birante rooro wul lay wombесана kinka koda dee. <sup>3</sup> Barjo Imbaabee kisa Naasa Yesus Kiristoosbesa sunin imintonbee, garintonbee, payyamonbe wombесана kinka goninbee nashimmakkonbeka koda dee.

### *Goninbee Nashimmakkonbesa Giidhoono*

<sup>4</sup> Hasa naanasa waani Barjo Imbay wona giyondettsi goninka wocchimbhayse kinin yivenam inin haapenka kattsi inta wozadhidine. <sup>5</sup> Keeda oonin imban, ena birara yedayse wosa dohon upsinam hana ida thaape; haali upsi inin hana thaapea ko maatab-hoode. Ogoroar “Kinka kiam kiam wo nashe” hamayse ida miske. <sup>6</sup> Nashimmakko haminta Barjo upsinna ee hamayse kanka yivinta hamintane. Ogoro upsin birara yedayse yenin qansaadettsi “Nashimmakkoka dehee” hamaynone.

<sup>7</sup> Thoothina dhaddhisayna eena peen kodar dhaabhidine; kediар Yesus Kiristoos gon eedi maatayse kinin nivonam gonne hamayse tiymina eenane. Agaadettsi maataa ea dhaddhiseabee Kiristoosam jibbeabene. <sup>8</sup> Yediar baza thoothi yenin haapoadettsi, yenin waadadhoonoar yekalanka konin kayoamadettsi mete yesaam gishee. <sup>9</sup> Kiristoossa timmirinka wocchimbhima kokalanka edimayse yivea wulsa Barjo golehe. Kiristoossa timmirinka wocchimbhayse yivea ki hanna, Barjo Imbaabee Naasabe kimbesana daane. <sup>10</sup> Eedi hayyear Kiristoossa timmirinam yinka bavima yekal nividii ki hanna, yesa ooninte kiam arseebhode; kiamaar nagayseebhode. <sup>11</sup> Harrna hambhidianna, kiam nagaysea ea kisa siyon waadimanka kimbesana kinka kida worme.

### *Macchin Nagaymakkono*

<sup>12</sup> Yena thaapania inin zagayno thoothi yer isa daane; ko dahaannaar wulam warqatdar thaapayse giyana zagattine. Kalon wosa wozanin thoothoadettsi yekal nivayse wotika dhalqana inta bhocchi hayte i dahade.

---

\* <sup>1:1</sup> Thoothino eeno “oonin imbanbee kosa naanabe” hamen upsinsa kamsinam misken ooninbee kosa iinte dahaana eenabene hamayse koda bhocche.

<sup>13</sup> Kambhon handanaansa naana<sup>†</sup> hana “Nagaya” keda hame.

---

<sup>†</sup> 1:13 “Handa naansa naana” hamayno Wannisin dohon misken ooninte daahaana eenane hamayse koda bhocchadhe.

## Kiristoos Yisa Tarjamonnante Kinin Yittsaa Wannisin Thaapoono Makkansono Warqanno

### *Ardinta*

Wannis makkansoa warqataam eedi kalaana ki thaapade. Gayoos hambhayna eena Haalin Mallan mathaapinte kaa mathaapara ab makkam daane:

Qorontoos gidir dahaa Gayoos (Roome 16:23);  
Moqodoonia gidir dahaa Gayoos (Yi Waa 19:29);  
Derbe gidir dahaa Gayoos (Yi Waa 20:4).

Wannisin yinna thaapaa Gayoos Wannisin waadadhen Isiya peente dhesadhaa eedine. Gayoos Kiristoosna waadadhayna eena chocchi ke hannaar, tiyayse gebhi payyamo kinin dhehenna Wannis kida gobshe. Ogo payyamonka kinin vivoadettsi kida kiile. Siyon hayea Diyotirepesbee payyan hayea Dimethiroosbesa giyntaka payyan hayea Dimethiroosam kinin maatoadettsi Gayoosam kida kiile.

Kaa mathaapaam raq laxdar kashana dandima ko dandime:

1. Nagaymakkono (1:1)
2. Gayoossa payyamonna thetsadhoono miskeno (1:2-4)
3. Gayoos shonnana payyamonam kinin dhohonna kiam gobshadhoono (1:5-8)
4. Diyotirepessa wobamonam kanchadhoono (1:9-11)
5. Dimethiroossa payyan waadimanna gobshadhoono (1:12)
6. Macchin nagaymakkono (1:13-15)

<sup>1</sup> Gon inin nashea nashadhaa Gayoosnante i donzakalanka nittsadhoono warqanone.

<sup>2</sup> Isa nashoa, hasa sadano payya konin dahaadettsi, yin pir yer wul hana konin agoadettsibee hasa waanin payya doadettsibe hana Barjoam ida miske. <sup>3</sup> Imbanaana nivayse goninka hanin yivenbee gon eedi hanin dohonbeam kenin tarjenam inin qansenka, kattsi inta wozadhidine. <sup>4</sup> Naana inna goninka kenin yivenam inin qansendara ab sagi isa woza qolehe.

<sup>5</sup> Isa nashoa, kedi hana chocchi ke dahaannaar, imbanaanana hanin waadadhen wulka gon eedi maatayse hada waadadhe. <sup>6</sup> Kediar misken ooninte bukon eensa birante hasa nashimmakkonam tarjidine. Barjoyn nashendettsi hayayse kesa goynna keam hanin kelshayno payyane. <sup>7</sup> Kedi Kiristoosam dhesimina eenakalanka yer kala hattear tiyma, Kiristoossa naabenna hamayse ke utade. <sup>8</sup> Keeda goninna kembesana kinka waadimayna wonin doadettsi, iginadettsinaam kelsha woam koda zaske.

### *Diyotirepesin Kanchadhonbee Dimethiroosin Shawkadhonbe*

<sup>9</sup> Misken ooninna inta thaapidine; ko dahaannaar misken ooninsa hayo doo nashea Diyotirepes inin giyenam tiyehe. <sup>10</sup> Ogonante yekal inin nivenka, siya upsika wosa naaben genota kinin hayen wulam ogo wodanka ida bhocchise. Ogono kina ko yeekima, imbanaanaam chocchamo tiyehe; tiyana nashayna eenaamaar marayse misken oonira keam bula ki bule.

<sup>11</sup> Isa nashoa, payyan hayea eam maataa; siyon hayea eam maataabhode. Payya hayea eedi Barjokalankane; siyon hayea eedi Barjoam haapadehe. <sup>12</sup> Dimethiroosna eeno wul tarja ko tarje; gonno yintiar kina tarja ko tarje; wodiar pir kina tarjooda tarje. Wosa tarjamonoar gon konin dohonam dhesaada dhese.

### *Macchin Nagaymakkono*

<sup>13</sup> Hana thaapota inin zagayno thoothi yer dahade; ko daahaannaar warqatdar thaapate bish hana yittsana nashattine. <sup>14</sup> Theedika haam shedayda shede hamayse inta qaabe ida haye. Ogo wodanka kinka wotika kiam shadayse dhalqooda dhalqe.

<sup>15</sup> Payyamo hana ko dee. Hanin nashayna hana “Nagaya” keda hame; yaar wosa nashonasa namma eelayse “Nagaya” kena hamaa.

## Yiwdayn Thaapoono Warqanno

### *Ardinta*

Ko warqatinam thaapaa Yiwda Imbaa wontea Yesussa indanaas dahayse, “Yesus Kiristoossa waadiman eabee Yayqoobsa indanaasbe maataa Yiwdakalanka” hamayse yiam kida giye (1:1). Agaa Yayqoob warqat thaapidine; kidi Yerusaalem misken ooninsa entsane (Yi Waa 12:17). Kiristoossa indanaana anngina oydi dahayse (Maat 13:55), kinin waadadhen wodanka kedi kidar woylam qajehe (Wannis 7:5). Yin ko daahaakaar Kiristoos cecindar kinin yivonsa budonte kidar kedi woylamin qajidine (Yi Waa 1:14). Yiwda warqatinam kinin thaapoono 57-72 levensa iintene hamayse koda bhocchadhe.

Buudan timmirino misken ooninte konin ardonna, Yiwda ko warqatinam ki thaapade. Barjodar woylamin qajayna eenana maasate imbhimin kalaa goyt imbhon kidar woylamin qajadhen timmirinsa gebhi kenin mashimoadettsi keam ki qansade. Kono kidar woylamin qajadhen timmirinsa gembhone hamintane. Yiwdayn wacimayno buudan timmirino Barjodar woylamin qajaa easa sadante Kiristoosin bitimoamadettsi way hayamo kisa doamadettsi konin marenna kida wacime.

Kaa warqatabee lansoa Bhethiroosin thaapaasa kashi lamaabe kidettsine.

Kaa mathaapaam raq dongdar kashana dandima ko dandime:

1. Nagaymakkono (1:1-2)
2. Kiilime: Barjodar woylamin qajadhensa kattsika mashiminta (1:3-4)
3. Kamsina: Barjodar woylamin qajadhenam garaana (1:5-16)
4. Elqime: Barjodar woylam qajintaka hasa metenam woysa konin zaskayno (1:17-23)
5. Macchin gobshino (1:24-25)

Yiwda Ena Mallan mathaapinte Barjoam kurtumbhaamma eenasa giydine; Barjo kedar kinin pirdon pirdinam kamsi hayayse, kedettsi maataana Barjoam kurtumbhimina eena wuldar pirdinin yeskenam kida giye. Ogonante Barjodar woylamin qajayna eena pirdinin kedar yeskoamadettsi Kiristoos yisa tarjamonnante kinin yittsaanasa timmirinam bhocchintabee meten yinnonam Barjosa nashimmakkonka toolintabe keam koda zaske (1:17bee 21be).

<sup>1</sup> Yesus Kiristoossa waadiman eabee Yayqoobsa indanaas maataa i Yiwdakalanka Barjokaar eldhaana, Barjo Imbakaar nashadhaana, Yesus Kiristooska toldhaana wulna nittsadhoono warqannone. <sup>2</sup> Barjosa garintonbee, payyamonbee, nashimmakkonbe yena ko thoothe.

### *Barjoam Kurtumbhimina Eena*

<sup>3</sup> Isa nashonato, kinka wonin kashimayno dhaqintan goynsa yena thaapanan kattsi wocchimbhayse i daaka, Barjodar woylamin qajayna eenana maasate imbhimin kalaa goyt imbhon kidar woylamin qajadhen timmirinsa gebhi yenin mashimoadettsi kiilana inin yena thaapoadettsi iam zaskayno ko maatade. <sup>4</sup> Harrna hambhidianna, kala kala Barjoam kurtumbhimina eena aadhimeka yesa shaarinte ardidine. Kedi Barjosa sunin imintonam kattsi sharmucimakko waadimaka keda ooke. Kidi bish woam wottsea, pir wosa Imbaa maataa Yesus Kiristoosam keda gare. Ena birayse kedar pirdadhen pirdinam thaapadhidine.

<sup>5</sup> Ogo wulam kalaa goyt dhesaana ye dahaannaar yena bhocchisana ida nashe: Barjo yisa eenam Gibth peera yinin bulonsa budonte, kidar woylamin qajiminaam ki kaysade. <sup>6</sup> Ogodettsi yina imbhon hayamonam toolima, yisa raqinam garaana Barjosa gaananaam bhocchee; Barjo keam gebhon pirdin rooronka yekka kattsi thiipan raqinte

rooro wulna dhaxayse keam toolite ki dahade. <sup>7</sup>Yin pir igin a gaananadettsi Sodoombbee, Gamoorabee, kesa gasante dahaana katamanabe sharmucimakko ke hayade; kosa birayse dhesadhimin sharmucimakkoam ke waadadhade. Ogona keam rooro wul lay dikimon nuunte dhabshadhite kenin dohoono kam si wona maatidine.

<sup>8</sup> Ogodettsi igin a eena haamaka entsadhada yisa waanam keda minngise; hayamoynsa dahaanaam keda bage; cecinte gobshinka dahaanaam keda iire. <sup>9</sup> Barjo gaananassa hayoa Mikaveel yi dahaannaar Musesa leesin goynsa Seethaanbesana kinin palimen wodanka, “Barjo haam ki pegise!” ki hamade; iira kiam iiradehe. <sup>10</sup> Igin a eena ke hanna, yinin dhesimina wulam keda iire; qaaboysa qolmina dabidettsi yisa pijadhinka kenin dhesen goynka yivada keda kaye. <sup>11</sup> Qaaveelsa goynka kenin yivonna, koymona hamayse Balaamsa wobon qaabonte kenin dhambonna, Qoorah Barjodar dhaabhaye kinin kayondettsi, kedar kenin kayonna, kena hay!

<sup>12</sup> Igin a eena kurtumbhima yembesana kinka kenin kummenka yena qaysine. Kedi yisa metenam bish keda toole; jibarenka yaayayna noqoysa iir qolmina polonadettsine. Pir kedi lamaa goyt diyaana haaganadettsine; aapin kaa yiam zasken wodanka aapin kayminabee yisa caacira buucadhaanabene. <sup>13</sup> Kesa ooshinsen waadimano dubonam dubsada kattsi shohen bazindettsine; kattsi thipa dohon raqin lay rooro wulna yiam toolayna sun osbee orabe hamada yaayayna eezinnadettsine.

<sup>14</sup> Addaamdara yedayse tobhsoa adhadhi maataa Henook Barjokala qansayse igin a eenana yin ki guyade: “Marrato! Barjo thoothina shii yisa gazana gaananabesana kinka kida nive. <sup>15</sup> Kinin nivaynoar een wuldar pirdanane; Barjoam kurtumbhimina seeson eena wul ee hamattone hamintaka kenin waadadhon wulbee Barjodar kenin giyon siyon wulbena kedar pirdanane” ki hamade.

<sup>16</sup> Igin a eena rooro wul gundumaynabee yer harkaar wozadhimina eenabene; yisa siyon anngarmaka keda yive; kesa dhalqinoar pormakkoka thoothoonone; yina agenam zagayse eenaam yidar keda maase.

### *Wacimebee Kilimebe*

<sup>17</sup> Yedi isa nashonato, Imbaa wontea Yesus Kiristoos yisa tarjamonnante kinin yittsaana eena ena birayse kenin giyonam bhocchee. <sup>18</sup> Kedi “Macchin wodanka yisa siyan anngarmaka yivayna, bagayna eena niva ke nive” hamayse ke guyade. <sup>19</sup> Igin a eenaam kinka kidara edayna, waan bhocchika yivayna, Manpas Gazanin yikal qolmina eenane.

<sup>20</sup> Yedi isa nashonato, wuldara sagi gaza maaton Barjodar woylamin yisa qajidinka wocchimbhayse gebhada, Manpas Gazanin yena imen kantanka Barjoam miskada, <sup>21</sup> Imbaa wontea Yesus Kiristoos yisa garintonka rooro wul lay dehen sadanam yena kinin imenam yenin toolenka, Barjosa nashimmakkonte mete yesaam gishee. <sup>22</sup> Qothimenka dahaana waani waani eenana burqadhee. <sup>23</sup> Waani eenaamaar nuura sarate bulayse dhacchee; waani eensa seesonka minngimon apalanamaar jibbaate kurtumbhada kena burqadhee.

### *Macchin Gobshino*

<sup>24</sup> Yenin dhamboamadettsi yeam hayanabee siya yer yindar qolmina, wozadhayna yeam hayayse yisa gobshinsa birante yeam bavanabe damea, <sup>25</sup> Imbaa wontea Yesus Kiristooska woam Dhacchea Barjo bishna ena levensa birara yedayse, taar, lay rooro wulnaar gobshibee, gebhamobee, kantabee, hayamobe kina ko dee; amiin.

## Wannissa Shedintono

### *Ardinta*

“Shedintono” hamea upsea kosa birayse aachima way kicima yer taaki konin haapad-henam koda dhettse. Yesus yisa tarjamonnante kinin yittsa Wannis kaa mathaapasa 1:1dar Yesus Kiristoosin yisa ergenam goyti waana waanaka kina kinin dhohonam kida giye. Barjo Imbaa ko ergenam yisa waadadhaynana kinin dhoodettsi Yesus Kiristoosna ki imade. Yin ko hanna kalaa kalaana Barjodar woylamin qajaana mathaapinam leemayse qaabaate nabbabano zaskaynone.

Wannis ko warqatinam kinin thaapoono 82-87 levensa iintene hamayse koda qaabadhe. Ogo wodanka raq waana waana gidir Barjodar woylamin qajaanadar oytaydhabee gaalebe yeskite ko dahade. Ogo wodankaar taakiar wobamobee siyamobesa thiipano ko thoothaakaar, kaa mathaapasa bhocchino macchin wodanka Barjo Seethaanam bashayse yisa bitamonam woysayse siyamonbee thiapanbeam kinin kaysenam koda giye. Ogonante Barjodar woylamin wonin qajon goynka nivayno ban-qino ko thoothaakaar, Imbaa wontea Yesus Kiristoosbesana bashayse wonin woyenam dhesintaka gara garma mashima woam koda zaske.

Yesus Wannisna kinin dhahaana shedintono oydine. Ogona kaa mathaapaam raq laxdar kashana dandima ko dandime:

1. Ardinta (1:1-8)
2. Birono shedintono: Kiristoosbee misken onna tobbhaanabe (1:9-3:22)
3. Lansono shedintono: Kiristoosbee macchin pirdinbe (4:1-16:21)
  - a) Cecinte dohon Barjo bitamon borkotonbee Barjosa Yaatabe (4:1-5:14)
  - b) Maytamma tobbhaanaam Yaatanin buloono (6:1-8:5)
  - c) Thurumbana tobbhaana yinin pugadhoono (8:6-11:19)
  - d) Dammabee kesa banqinbe (12:1-14:20)
  - e) Koymona tobbhaanayn laymenka (15:1-16:21)
4. Makkansono shedintono: Kiristoos yer wulam bashayse payyamonam kinin bovoono (17:1-21:8)
  - a) Gembho Baabiloonin dhamboono (17:1-18:24)
  - b) Cecinte dohoono wozano (19:1-10)
  - c) Kiristoossa haapadhintano (19:11-16)
  - d) Kiristoosin dabtaam bashoono (19:17-21)
  - e) Seethaanin dhaxadhoono (20:1-3)
  - f) Kiristoosbee dabtana goodimaamma eenabe shii levensa kenin bitimoono (20:4-6)
  - g) Macchin qansan garanbee macchin pirdinbe (20:7-15)
  - h) Haali cecibee haali peebe (21:1-8)
5. Oytsono shedintono: Kiristoosbee uutanbe (21:9-22:5)
6. Mathaapasa macchino (22:6-21)
  - a) Yesussa maatate nivintano (22:6-17)
  - b) Macchino kiilimeno (22:18-21)

Mathaapasa macchinte Barjobee kisa zarsinbe edimima kinka keda dee. Dembhibee, gaalebee, siya yer wulbe shidhidine. Eden haaqan kordhon raqinte dohoono sadan imayno hattono pir haapadha ko haapadhe. Seesoyn minngisaana yerra wul gazimb-hayse haali keda maate. Ogona Barjosa yer joogaa kalaar qolehe. Wonin dhaqonsa giidhayno ogodar koda woye.

<sup>1</sup> Mathaapa kaa likka roorosa budonte maatayna yerraam kina waadadhaynana kinin dhoodettsi Barjo Yesus Kiristoosna kinin imoono yerrone. Yesus Kiristoos yisa gaanaam yittsayse yisa waadiman ea Wannisna yerin ogoam ki dhahade. <sup>2</sup> Wannisar

kinin haapon wulam, ogonoar Barjoyn giyon upsinbee Yesus Kiristoosin dhettsonebeam giyayse ki tarjade. <sup>3</sup> Ogo wulin maatanna hayen wodan yeskota hayonna, Barjokala qansayse eenna giyeayn thaapaa kaa warqataam nabbabea gobshadhaane; ogoam nabbabadenka qansayse mathaapinte thaapadhonam hayyna gobshadhaana eenane.

### *Tobbhaana Miskon Onnana Yittsadoon Warqanno*

<sup>4-5</sup> Wannis Isiya peente dahaana tobbhaana miskon onnana kinin yittsoono warqan-none. Enaar dahaa, taar dahaa, os birantear dehea Barjobee, kisa bitamon borkotonsa birante dahaana tobbhaana manpasinabee, Yesus Kiristooskalankabe, sunin iminton-bee payyamonbe yena ko dee. Yesus Kiristoos gon hama tarja maataa, dembhira dhaabhintaka bira maataa, peensa binnaam wottseane.

Woam nashaa, yisa zombhinka wosa seesora woam dhacchaa, <sup>6</sup> kisa bitimon raqinte kinindar bitimayna kisa Imbaa Barjona waadadhayna gudulla wonin doadettsi woam hayaa Yesusna rooro wul lay gobshinbee hayamonbe ko dee; amiin.

<sup>7</sup> Marrato! Yesus polonka kida nive.

Kiam banqinka uxaanaar shidhima eena wul kiam haapa ke haape;  
peendar dohoono eeno wul “Wuu wuu” hamada eepa ko eepe.

Yehee, ogono yerro gonne.

<sup>8</sup> Enaar dahaa, taar dahaa, os birantear dehea, Wulam Wottsea Imbaa Barjo “Biraabee maccheabe intane” kida hame.

### *Kiristoos Wannisna Kinin Haapadhoono*

<sup>9</sup> Inta Yesus Kiristooska gaalenbee, kisa bitamonbee, darshintanbeam yembesana kinka kashimea yesa imbanasa Wannis, Barjosa upsinbee Yesus tarjonam inin giyon goynbeka Pithimo hambhen bazinsa shaarinte dohon peente dhaxadhayse i dahade. <sup>10</sup> Gabansa iinte Imbaa wontea Yesusam gobshadhea rooroaka Manpas Gazanka i dahade. Thurumbasa upsi maatea upsi gebhi isa budonte yin giyayse pugadhaka i qansade: <sup>11</sup> “Hanin shedaynaam mathaapinte thaapayse tobbhaana miskon onna, Epsoonbee, Semernesbee, Bhergymoonbee, Tiathironbee, Serdesbee, Piladelpiabee, Lodoqiabedar yittsaa” ina ki hamade.

<sup>12</sup> Hay ina giyenar shedana inta budoka wal i hamade. Wal inin hamenka, shaakan daran wodadhayna worqinka ashkadhaana koymona tobbhaanaam i haapade. <sup>13</sup> Shaakan daran wodadhayna koymonasa shaarinte eedi naas maatea i haapade; kidiar yisa roon yeskea apala gudubh, pir yisa sadandar worqika ashkadhaa yer ki qaadhade. <sup>14</sup> Kisa meten sitino yaati cawlisa sitidettsi, way chechidettsi cawli ko dahade; kisa aapinoar nuusa laabhinadettsi maatea ko dahade. <sup>15</sup> Kisa roonoar nuur arsadhaysaka oydhaa gaw anngamodettsine; kisa upsinoar gebhi noqo upsidettsine. <sup>16</sup> Yisa mizaqa antaka eezini tobbhaa ki yedade; kisa apora wulbar taxea halpa cari koda ute; kisa aapin kerroar haydettsi kattsi koda shaake.

<sup>17</sup> Intaar kiam inin haapon wodanka diyaa eedidettsi maatayse kisa roonkal i dham-bade. Kidiar yisa mizaqa antaam idar wodayse ina yin ki giyade: “Kurtumbhaabhode. Biraabee budoabe intane; <sup>18</sup> sadanka dahaa intane. Inta diydine; ko dahaannaar shedaa! Rooro wul lay dehea intane; dembhinbee diyaana eenayn dehen raqinbedar isa hayamo daane.

<sup>19</sup> “Ta keeda hanin haaponam, ta dohonbee keeda kaara os nivenbeam thaapaa. <sup>20</sup> Mizaqa isa antaadar hanin haapaana tobbhaana eezinnabee shaakan daran wodadhayna worqinka ashkadhaana koymona tobbhaanabesa aachin dhalqinsa bulino yinne: Eezinna tobbhaana miskon onna tobbhaanasa ergen eenane; shaakan daran wodadhayna koymona tobbhaanaar tobbhaana miskon onnane.

## 2

*Epsoon Misken Ooninna*

<sup>1</sup> “Epsoon misken ooninsa ergen eana yin giyayse thaapaa: Tobbhaana eezinnaam yisa mizaqa antaaka yedaabee shaakan daran wodadhyna worqinka ashkadhaana koymona tobbaanasa shaarinte yaayeabe yin kida giye: <sup>2</sup> Hasa waadimanbee, qajen-bee, darshintanbeam dhesayda dhese. Siyana eenana darshana hanin damaamonbee isa tarjamonnante yittsadhaana dayma, ‘Wodi Kiristoos yisa tarjamonnante kinin yittsaanane’ hamaynaam taysate shedayse buudan giyayna eena kenin dohonam hanin haaponbeam dhesayda dhese. <sup>3</sup> Darshayse hanin wocchimbhenbee isa naabenna hamayse boosimbhima gaale hanin tiyenbeam dhesayda dhese.

<sup>4</sup> “Ko daahaannaar yer kalaa hadar inin haapaa daane; ogonoar ena biron hasa nashimmakkonam ha garade. <sup>5</sup> Ta keeda hamora hanin dhambonam bhoccchaa; seeson waadimanam garayse Barjodar maataa; biron hasa waadimanamaar waadadhaa. Ogotay ko hamma, hakal nivayse shaakan daran wodadhen koymon hannonam raqira tiyayda tiye.

<sup>6</sup> “Ko daahaannaar haam inin shawkea yer kalaa daane; ogo inin jibben Niqola eenasa waadimanam yaar jibbidine.

<sup>7</sup> “Qansen qaamiysa dahaa Manpas Gazanin misken onnana giyenam ki qanse. Bashayse woya Barjoyn ashkon ukunsen raqinte dohon sadan imen hattonsa aapin kinin itsoadettsi ida haye.

*Semernes Misken Ooninna*

<sup>8</sup> “Semernes misken ooninsa ergen eana yin giyayse thaapaa: Biraabee budoabe maataa, diyaabee pir sadanka dahaabe yin kida giye: <sup>9</sup> Hasa gaalenbee hasa qamb-hamonbeam dhesayda dhese; ko daahaannaar ya eedi wodimone. Ayiwd dayma ‘Wodi Ayiwd eedine’ hamayna, Seethaanbesana agayse kalaa maataana, hasa naaben kinin genenam dhesayda dhese. <sup>10</sup> Hadar niven gaalenna kurtumbaabhode. Marrato! Taysayse yenin shedadhoodettsi yesa iira waani waani eenaam Seethaan dhaxin oon-inte kida dhaske; rooro tabhina gaalenam tiyeeda tiye. Hanin diyenka yekka woylamin yindar qajadhea dahaa; sadanam gobshi qoobhedettsi hana imayda ime.

<sup>11</sup> “Qansen qaamiysa dahaa Manpas Gazanin misken onnana giyenam ki qanse. Bashayse woyaam lansono dembhino kaamehe.

*Bhergamoon Misken Ooninna*

<sup>12</sup> “Bhergamoon misken ooninsa ergen eana yin giyayse thaapaa: Wulbar taxea halpa cari yisa dahaa yin kida giye: <sup>13</sup> Ya Seethaansa bitamon borkoton dohon raqinte hanin dohonam dhesayda dhese; ko daahaakaar isa naabenam wocchimbhayse ya yedidine; idar woylamin hanin qajenamaar garaatane. Woylamin yindar qajadhaa, isa tarja maataa Antibhaas Seethaanin dohon yesa katamante kiam deesadhon wodanka idar woylamin hanin qajenam garaatane.

<sup>14</sup> “Ko daahaannaar tokaa hadar inin haapaa yer daane; ogono Balaamsa timmirinam yedaana yesa shaarinte ke dahade. Agaa Balaam Israveel eena aaninka ashkadhon barjonana machadhon waanam itsintabee sharmucimakko hayntabeka Barjoam kinin garoadettsi Balaaqam kiilaane. <sup>15</sup> Yin pir Niqola eenasa timmirinam yedaana eena yesa shaarinte ke dahade. <sup>16</sup> Ta keeda seeson waadimanam garayse Barjodar maataa! Ogotay ko hamma saanawa hakal nivayse isa apora uten halpanka keam uxayda uxe.

<sup>17</sup> “Qansen qaamiysa dahaa Manpas Gazanin misken onnana giyenam ki qanse. Bashayse woyaana aachimon manna hambhen galanam kina imayda ime; haali naabe

yindar thaapadhon seeni cawli kina imayda ime; naaben ogoam tiyarea eedi ab hayyear dhesehe.

### *Tiathiron Misken Ooninna*

<sup>18</sup> “Tiathiron misken ooninsa ergen eana yin giyayse thaapaa: Nuusa laabhinadettsi maaten aapiysa dahaa, nuur arsadlaysaka oydhaa gaw anngamodettsi rooysa dahaa Barjo Naasa yin kida giye: <sup>19</sup> Hasa waadimanbee, hasa nashimmakkonbee, Barjodar woylamin hanin qajenbee, Barjona hanin waadadhenbee, hasa darshayse wocchimb-hintanbeam, pir budono hasa waadimano birora sagi konin dohonam dhesayda dhese.

<sup>20</sup> “Ko dahaannaar yer kalaa hadar inin haapaa daane; ogonoar ‘Inta Barjokala qansayse eenna giyaynone’ hamen edon Elzaabeelam marima lay hamayse ha garade. Kodi isa waadadhayna kenin sharmucimoadettsibee aaninka ashkadhaana barjonana machadhon waanam kenin itsoadettsibe dhettsintaka keam koda dhaddhise. <sup>21</sup> Kodi yisa seeson waadimanam garayse idar konin maatoadettsi woda kona i imade; kodiar sharmucimakkon waadimara maatana nashadehe. <sup>22</sup> Marrato! Burqadhada algandar konin wodhoadettsi ida haye; kombesana kinka sharmucimakkon hayaana eena sharmucimakkonam garayse idar ke maataamma, gaale gebhi kedar ida beve. <sup>23</sup> Kosa paanan yivaynaam dembhika ida kayse. Misken onna wul eensa woylaminte dohon qaabonbee anngarmanbeam marmarea inin dohonam dhesa ke dhese; ye wulsa waadimandettsi bazanam yena imayda ime.

<sup>24</sup> “Tapir ogo buudan timmirinam tiyaamma wul, ‘Seethaansa aachin dhalqinone’ hamaynasa paanan yivaamma, Tiathiron shaarinte dahaana waani eenana baske ab baskisattine. <sup>25</sup> Ko dahaannaar inin nivenka yekka yesa dohonam wocchimbhayse yedee. <sup>26-27</sup> Bashayse woyaa, isa waadimanam macchinka yekka wocchimbhayse toolaana inta imbakalanka hayamonam inin tiyaadettsi, peen kodar dohon zarsin wuldar hayamo kina ida ime.

Kidi anngamon koolinkaar keam kida wottse; peera meeshate ashkadhaa koymoyn diyeadettsi paxate keam kida deese; <sup>28</sup> pir sedhiman eeziniam kina imayda ime.

<sup>29</sup> “Qansen qaamiysa dahaa Manpas Gazanin misken onnana giyenam ki qanse.

### 3

#### *Serdes Misken Ooninna*

<sup>1</sup> “Serdes misken ooninsa ergen eana yin giyayse thaapaa: Tobbhaana Barjosa manpasinabee tobbaana eezinnabe yisa dahaa yin kida giye: Hasa waadimanam dhesayda dhese; naabene hasa dohoono, ya diydine. <sup>2</sup> Ogonante qaymaa! Diyota yeskaana shidhaana hasa yerraam wocchinsaa. Harrna hambhidianna, hasa waadimanu isa Barjoasa birante gontay konin dohonam inin haaponnane. <sup>3</sup> Ta keeda hamin dahaa timmiri hanin tiyonbee hanin qansonbeam bhocchaa; ogoam toolaa; seeson waadimanam garayse Barjodar maataa. Ha qaymaamma diibidettsi hakal ida nive; hamaa wodaaka hakal inin nivenam ya dhesattane.

<sup>4</sup> “Ko dahaannaar apalan yinnonam genaamma eena Serdes iiinte tokaa eedi hambe-sana ke dahade; keam konin zaskenna apala cawli qaadhayse imbesana kinka yiva ke yive. <sup>5</sup> Bashayse woyaa kedettsi apala cawli kida qaadhe; kisa naabenamaar dayntan mathaapira kaysattine; kisa naabenam Imbabee kisa gaananabesa birante tarjayda tarje.

<sup>6</sup> “Qansen qaamiysa dahaa Manpas Gazanin misken onnana giyenam ki qanse.

#### *Piladelphia Misken Ooninna*

<sup>7</sup> “Piladelpia misken ooninsa ergen eana yin giyayse thaapaa: Bitaa Dawtsa qulpin yedaayn bulonam hayyear diithehe; kinin diithonam hayyear bulehe. Kidi gazaabee gon hamaabe yin kida giye: <sup>8</sup> Hasa waadimanam dhesayda dhese. Shadaa! Hayyear diithana damimin bulimon kerinam inta hana imidine. Hasa kantano tokaa ko hannaar isa upsinam ya toolidine; isa naabenam garaatane. <sup>9</sup> Ta keeda Ayiwdayma ‘Wodi Ayiwdaye’ hamayse buudan giyayna iginna Seethaanbesana agayse kalaa maataana, nivayse hasa roon demente kenin kumpurdhoadeettsi keam ida haye; ogoka inin haam nashenam keda dhese. <sup>10</sup> ‘Darshintaka wocchimbhaa’ inin hamon upsinam hanin toolonna, inta peendar dahaana eenam taysate sheden peen wuldar niven gaalen wodanka haam toolayda toole.

<sup>11</sup> “Shadaa! Inta saanawa ida nive; hayyear gobshin bazanam hakalanka tiyoamadettsi hasa dohonam wocchimbhayse yedaa. <sup>12</sup> Bashayse woyaa isa Barjoasa gazan ooninsa turtur kiam ida haye; ogora hamin ko dahaakaar utehe. Isa Barjoasa naabenbee isa Barjoasa kataman naabenbeam kidar ida thaape; ogono katamanoar isa Barjoakala cecira hanchayno hallo Yerusaalemne. Isa naaben haalinam kidar ida thaape.

<sup>13</sup> “Qansen qaamiysa dahaa Manpas Gazanin misken onnana giyenam ki qanse.

### *Lodoqia Miskin Ooninna*

<sup>14</sup> “Lodoqia misken ooninsa ergen eana yin giyayse thaapaa: Amiin hambhaa, tarja dayntanka eedi gon hamaabee gon tarjeabe, Barjo pijadhina wulin yinka haapadhaa yin kida giye: <sup>15</sup> Hasa waadimanam inta dhesayda dhese; ogonoar ya qaji way oydhitehe. Qaji way oydh ha daana payya ina koda maate. <sup>16</sup> Qaji way oydh dayma suy hama hanin dohonna isa apora haam bulayse maamana ida haye. <sup>17</sup> ‘Inta eedi wodimone; isa thoothi koymo daane; ikalanka joogea yer kala hattear qolehe’ hada hame. Ko dahaannaar gaale eedibee, bashadhaabee, qambhibee, aapi kayabee, pundiribe hanin dohonam dhesaatane. <sup>18</sup> Eedi wodimo maatana nuuka gazisadhoono worqinbee, pundirmakkonam hasa kicana apala cawlibee, shedana hanin damoadettsi aapin dheeshanbeam ikalanka ha shane haam ida kiile.

<sup>19</sup> “Inta inin nashayna wulam wacimayse dhabshayda dhabbshe. Ogonante wocchimbhaa; seeson waadimanam garayse Barjodar maataa. <sup>20</sup> Marrato! Inta mayante woyayse kerinam kokkayda kokke; hayyear isa upsinam qansayse kerinam ina ki bulanna kikal ardayse galan kimbesana kinka ida kumme, kidiar imbesana kinka kida kumme. <sup>21</sup> Inta bashayse Imbabesana kinka kisa bitamon borkotondar inin dooqondettsi, bashayse woyaana imbesana kinka isa bitamon borkotondar kinin dooqoadettsi ida ime.

<sup>22</sup> “Qansen qaamiysa dahaa Manpas Gazanin misken onnana giyenam ki qanse” ki hamade.

## 4

### *Cecinte Dohon Barjosa Bitamon Borkotonbee Kina Goodimaynabe*

<sup>1</sup> Ogosa budonte, marrato! Cecinte keri buldhaa i haapade. Thurumbasa upsidettsi giyea inin qansoono birono upsin “Kote tura utaa; os birante maatayna yerraam hana ida dhee” ina ko hamade.

<sup>2</sup> Saanawa Manpas Gazanka i dahade. Marrato! Cecinte bitamon borkotonbee daran dooqaabeam i haapade. <sup>3</sup> Bitamon borkotondar dooqaasa dantano bazaysa detha maataana senna bhalqantayna iyasbhidbee serdiyonbedettsine; bitamon borkotonsa gasante mergid hambhen bazaysa detha seenidettsi maataa zili dahade.

<sup>4</sup> Ogo bitamon borkotonsa gasantear eedi kalaa kaysa apo oydi bitamon borkotona ke dahade; bitamon borkotondarar apala cawli qaadhayse yisa metendar worqika

ashkadhaa gobshi qoobhe wodaana eedi kalaa kaysa apo oydi donzana dooqayse ke dahade. <sup>5</sup> Kesa shaarinte dohon bitamon borkotorraar bhalqantibee guganat upsibe utite ko dahade. Bitamon borkotonsa birante kuusha tobbhaa ke shaakade; kedar tobbhaana Barjosa manpasinane.

<sup>6</sup> Bitamon borkotonsa birante mastootdettsibee chechidettsibe bhalqantea baz ko dahade. Bitamon borkotonsa gasante gibi oydi birantebbe budontebe thoothi aapiysa dahaana ke dahade. <sup>7</sup> Biraa dabta zobodettsine; lansoa dabta waaki anngidettsine; makkansoa dabtasa aapin kerro eedi aapidettsine; oytsoa dabta pillea shodaradettsine. <sup>8</sup> Damma oynna kalaa kalaanasa kaapi lax ko dahade; kesa bishin wuldar thoothi aapi ko dahade. Kedar sootinbee rooronbe

“Gazaa, gazaa, gazaa!

Enaar dahaa, taar dahaa, os birantear dehea

Wulam Wottsea Imbaa Barjone”

hamanam garadehe.

<sup>9</sup> Dammaar bitamon borkotondar dooqaana rooro wul lay dehea Barjona shawkad-habee dhieg hama gobshibe kenin imen wodanka, <sup>10</sup> eedi kalaa kaysa apo oydi donzana bitamon borkotondar dooqaasa birante kumpurdhayse rooro wul lay dehea Barjona keda goodime. Yisa gobshin qoobhenam bitamon borkotonsa birante wodayse,

<sup>11</sup> “Imbo, wosa Barjoa, ya yer wulam hanin pijonna,

konin pijadhonbee konin dehenbe hasa bhocchinka konin dohonna,

dheg hama gobshibee kantabe tiya haam koda zaske”

keda hame.

## 5

### *Mathaapinbee Yaatabe*

<sup>1</sup> Bitamon borkotondar dooqaasa mizaqa antaadar iinbarbee zulonbarbe thaapad-hon mathaap i haapade. Pir ogono mathaapino yettsayse tobbhaa goyt maytam daran qandhoonone. <sup>2</sup> Kantaysa daha gaana upsi gebhika “Yettsayse maytamin daran qand-hon mathaapinam hattsate bulana damea hayne?” hamayse kinin giyenka i qansade. <sup>3</sup> Peente ko hannaar, cecinte ko hannaar, peensa choobar ko hannaar, mathaapinam bulanabee kosa iir shedanabe damea hayyear solehe. <sup>4</sup> Mathaapinam bulanabee kosa iir shedanabe damea haapadhaamonna kattsi i eepade.

<sup>5</sup> Ogo wodanka donzanasa kalaa “Eepaabhode! Shedad! Yiwdasa muldhara maataa Zoboa, kidi Bitaa Dawtsa muldhara maataa bashidine. Kidi yinti mathaapinbee daran yettsadhaana maytamina tobbhaanabeam bulana dama ki dame” ina ki hamade.

<sup>6</sup> Ogosa budonte bitamon borkotonbee oynna dammabesa shaarinte, pir donzanasaar shaarinte, taxadhadttsia Yaataam woyayse ki daaka i haapade. Yaata agaasa qoshimbha tobbhaabee aapi tobbhaabe daane. Kedar peen wuldar yittsadhaana tobbhaana Barjosa manpasinane.

<sup>7</sup> Yaata nivayse bitamon borkotondar dooqaasa mizaqa antaara mathaapinam ki tiyade. <sup>8</sup> Mathaapinam kinin tiyon wodanka, oynna dammabees eedi kalaa kaysa apo oynna donzanabe Yaatasa birante wotinka yisa ke dhambade. Kedi wul yisa meteka meteka goola yedayse ke dahade; yin pir gazana eenasa miske maaton qunyan iir yisa thoothon worqinka ashkadhon koymo yedayse ke dahade. <sup>9</sup> Mazmur haali yin giyayse ke zammarade:

“Mathaapinam tiyanabee kodar yettsadhaana maytammaam

hattitate bulanabe ya dameane.

Harrna hambhidianna, ya taxadhidine;

muldhan wulbee, apon wulbee, peen wulbee, zarsin wulbera  
hasa zombhinka eenaam Barjona ya shanidine.

<sup>10</sup> Kisa bitimon raqinte kinindar bitimayna  
wosa Barjoana waadadhayna gudulla kenin doadettsi keam ya haydine.

Kediar peendar bitima ke bitime”

ke hamade.

<sup>11</sup> Inin shedenka bitamon borkotonbee, dammabee, donzanabesa gasante thoothina gaananasa upsi i qansade. Kesa paydinoar thoothi shiibee miiloonbeka paydadhea ko dahade. <sup>12</sup> Upsi gebhikaar

“Taxadhaa Yaatana hayamobee, wodimmakkobee,  
pakalmakkobee, kantabee, dhieg hama gobshibee,  
shawkadhabee kina koda zaske”

ke hamade.

<sup>13</sup> Cecintebbee, peentebee, peensa choobarbee, bazinsa iinte dhaana pijadhina wulbe  
“Bitamon borkotondar dooqaa Barjobee Yaatabena  
shawkadhabee, dhieg hama gobshibee, hayamobe  
rooro wul lay kina ko dee!”

kenin hamenam i qansade. <sup>14</sup> Damma oynnaar “Amiin!” ke hamade; donzanaar kina kumpurdhayse ke goodimade.

## 6

### *Tobbhaana Maytammayn Buldhoo*

<sup>1</sup> Yaata tobbaana maytammasa biraam kinin bulenka i haapade; damma oynnasa kalaa guganat upsidettsika “Nivaal!” kinin hamenka i qansade. <sup>2</sup> Marrato! Parda cawli i haapade. Pardandar dooqaa paldhe yedayse ki dahade. Gobshi qoobhe kina ko imbhade; bashea maatayse bashana ki utade.

<sup>3</sup> Yaata lansoa maytamam kinin bulon wodanka, lansoa dabta “Nivaal!” kinin hamenka i qansade. <sup>4</sup> Pir parda zoo ab ko utade. Pardandar dooqaa eeno kinka kiam kiam konin deesoadettsi payyamonam peen wuldara kaysana hayamo kina ko imbhade; halpa gebhi kina ko imbhade.

<sup>5</sup> Yaata makkansoa maytamam kinin bulen wodanka, makkansoa dabta “Nivaal!” kinin hamenka i qansade. Marrato! Parda thiya i haapade. Pardandar dooqaa yisa aaninka dethamonam gochate kinin sheda koymo ki bavade. <sup>6</sup> Oynna dammasa shaarinte yin giyea upsi i qansade: “Gazgo mursa kalaa rooro kalaa baza ko dee; mattsi mursa makkam rooro kalaa baza ko dee; zaytbee woynea hattasa aapin cuubadhonbe ko hanna koam kaysaabhode” ki hamade.

<sup>7</sup> Yaata oytsoa maytamam kinin bulon wodanka, oytsoa dabta “Nivaal!” kinin hamenka i qansade. <sup>8</sup> Marrato! Parda galap i haapade. Pardandar dooqaasa naabeno dembhine; diyaana eenayn dohoono ranqoar kisa paanan yivite ko dahade. Kedi peendar dhaana anna oynnasa kalaam bangibee, daaqibee, burqobee, peendar dhaana dammabeka kenin deesoadettsi hayamo kena ko imbhade.

<sup>9</sup> Yaata dongsoa maytamam kinin bulon wodanka, Barjosa upsin giyada kina kenin tarjonna keam deesadhaana eenasa sadanaam marshan machadhen raqinsa demente i haapade. <sup>10</sup> Kediar upsi gebhika “Gazaa, gon hama Imbo, peente dohon eendar hanin pirdiminbee wosa zombhinnhaar halon hanin maasiminbe hamaaka yekkane?” hamada ke ilatade. <sup>11</sup> Ke wulna yisa meteka meteka apala cawli ko imbhade; kedettsi deesadhayna kesa waadiman aanammabee imbanaanabesa paydinin thoothenka yekka likka roorona ukunsaate kenin dooqoadettsi kena ko giidhade.

<sup>12</sup> Yaata laskoa maytamam kinin bulon wodanka kiam i haapade. Marrato! Gebhi peensa ziga ko maatade; haynoar pee sootidettsi ko thipade; arpinoar zombhidettsi ko zoade. <sup>13</sup> Jibaren gebhonin jibarshenka hatton shaapinsa aapinin diinendettsi cecira wancono peendar ko wavade. <sup>14</sup> Cecinoar salidettsi qurimayse ko kayade; dhukanbee bazinsa shaarinte dahaana peena wulbe kesa raqira ke tiidhade.

<sup>15</sup> Peensa binnabee, peensa eena gembhabee, banqin kansaynasa hayonabee, wodimma eenabee, kantanka dahaana eenabee, worshona eena wulbee, worsho maataamma eena wulbe ooapanabee dhukansa seenin dementebe ke aadhimbhade. <sup>16</sup> Dhukanabee sennabena “Wodar yiipe! Bitamon borkotondar dooqaasa birarabee Yaatasa wacimerabe woam aachee! <sup>17</sup> Harrna hambidianna, gembho kesa wacimen roorono\* nividine; hayne woyana damea?” ke hamade.

## 7

### *Wotindar Maytamin Yettsadhaana Israveel Eena*

<sup>1</sup> Ogosa budonte Barjosa gaanana oynna peensa karra oynnadar woyayse ke daaka keam i haapade. Peendar ko hannaar, bazindar ko hannaar, haaqandar ko hannaar, jibare jibarshoamadettsi oynna goynaka peendar nivayna jibarshayna jibarenam kedi yedidine.

<sup>2</sup> Lay dehea Barjosa maytaminam yedaa ab Barjosa gaana haynsa utambara ki nivaka i haapade. Peenbee bazinebeam kenin kaysoadettsi hayamo kena imbhaana oynna Barjosa gaananana yisa upsin dheg hayayse, <sup>3</sup> “Wosa Barjoana waadimayna eenasa wotindar maytamin wonin qanenka yekka peenam ko hannaar, bazinam ko hannaar, haaqanam ko hannaar kayseebhode!” kena ki hamade. <sup>4</sup> Maytamin daran qandhaana eenasaar paydinam i qansade; Israveel eenasa muldhan wulsa maytamin daran qandhaana shii eedi tobbhaa kaysa apo oydi (144,000) ke dahade.

<sup>5</sup> Yiwda muldhara shii tabhi lamaa (12,000),  
 Roobeel muldhara shii tabhi lamaa (12,000),  
 Gaad muldhara shii tabhi lamaa (12,000),  
<sup>6</sup> Aseer muldhara shii tabhi lamaa (12,000),  
 Niptaaleem muldhara shii tabhi lamaa (12,000),  
 Minase muldhara shii tabhi lamaa (12,000),  
<sup>7</sup> Simoon muldhara shii tabhi lamaa (12,000),  
 Lewi muldhara shii tabhi lamaa (12,000),  
 Yisaakoor muldhara shii tabhi lamaa (12,000),  
<sup>8</sup> Zaabloon muldhara shii tabhi lamaa (12,000),  
 Yoseep muldhara shii tabhi lamaa (12,000),  
 Biiniam muldhara shii tabhi lamaa (12,000),  
 maytamin yindar qandhaana ke dahade.

### *Apala Cawli Qaadhoono Thoothino Eeno*

<sup>9</sup> Ogosa budonte, marrato! Hayyear paydana damima kattsi thoothi eedi i haapade. Kediar zarsin wulbee, muldhan wulbee, peen wulbee, apon wulbera utaanane; apala cawli qaadhayse meetha haccha yisa aanindar yedayse bitamon borkotonbee Yaatabesa birante woyayse ke dahade. <sup>10</sup> Upsi gebhikaar  
 “Dhacchea bitamon borkotondar dooqaa  
 wosa Barjoabee Yaatabene!”  
 hamayse keda ilate.

\* <sup>6:14</sup> Isi 34:4; Wa Shedi 16:20.    \* <sup>6:17</sup> “Gembho kesa wacimen roorono” hambhoono “Barjosa roorono” hamintane. “Barjosa roorono” hamen upsinam Haalin Mallan mathaapinsa macchinte thaapadhaanar shedaa.

<sup>7:3</sup> Yiz 9:4-6.

<sup>11</sup> Barjosa gaanana wul bitamon borkotonbee, donzanabee, damma oynnabesa gasante woyayse ke dahade. Bitamon borkotonsa birante kumpurdhayse Barjona goodimada yin ke giyade:

<sup>12</sup> “Amiin! Shawkadhabee, gobshibee, pakalmakkobee,  
dheg hama gobshibee, hayamobee, kantabe  
rooro wul lay wosa Barjoana ko dee; amiin!”

ke hamade.

<sup>13</sup> Donzanasaar kalaa ina yi giyna: “Igina apalan cawlin qaadhaana haybene? Hamora ke nivaa?” ki hamade. <sup>14</sup> Intaar “Imbo! Ya dhesaada dhese” kina i hamade. Kidiar ina yin ki giyade: “Igina gebhon gaalera utaana eenane; yisa apalanamaar Yaatasa zombhinka shivayse ke calshade. <sup>15</sup> Ogonante

Barjosa bitamon borkotonsa birante dahayse  
sootinbee rooronbe Barjosa gazan ooninte

kina waadadha ke waadadhe.

Bitamon borkotondar dooqaar kesa shipo kida maate.

<sup>16</sup> Keeda kaara os kedi daaqardhehe, dheebardhehe;  
haynsa oydhamonbee usumenbe keam kaamehe.

<sup>17</sup> Harrna hambhidianna, bitamon borkotonsa shaarinte dahaa Yaata keam gishea kida  
dee;

sadan imen noqon aapin elendar keam kida entse.

Barjoar ermitin wulam kesa aapira kida qode”  
ina ki hamade.

## 8

### *Tobhsoa Maytamam Buldhoo*

<sup>1</sup> Yaata tobhsoa maytamam kinin bulon wodanka, savaat kalaasa zalana cecino lay ko hamade. <sup>2</sup> Barjo birante woyayna tobbhaana gaananaam i haapade; kenaar thurumba tobbhaa ko imbhade.

<sup>3</sup> Worqinka ashkadhon qunyan iir cubshadhen koymonam yedaa ab Barjosa gaanaa nivayse qunyan daran cubshate imbhens raqinsa gasante ki woyade. Bitamon borkotonsa birante dohon worqinka ashkadhon Barjona qunyan daran cubshate imbhens raqinte gazana eena wulsa miskenbesana kinin imea thoothi qunya kina ko imbhade.

<sup>4</sup> Qunyansa cubanoar gazana eenasa miskenbesana Barjo gaanaasa aanira Barjo birante ko utade. <sup>5</sup> Ogosa budonte Barjosa gaanaa qunyan iir cubshadhen koymonam bavate qunyan daran cubshate imbhens raqira nuu qoorate thoosayse peendar ki dhabade. Guganat upsibee, bhalqantbee, peendar zigabe ko maatade.

### *Thurumbana Pugadhidino*

<sup>6</sup> Tobbhaana thurumbanaam yedaana tobbhaana Barjosa gaanana pugana ke ashkimbhade. <sup>7</sup> Bira gaanaa thurumbanam ki pugade. Zombhika worsimaa chechibee nuube peendar ko dhabadhade; peensa nuunka aton antinte haqanbee shudhin wulbe ko atade.

<sup>8</sup> Lansoa gaanaar thurumbanam ki pugade. Dhuka gaari maatea yer nuuka yedada bazinte ko wavade; ogora bazinsa antino zombhi ko maatade. <sup>9</sup> Bazinte sadanka dohon pijadhinsa antino ko diyade; bazindara sagadhayna gonngallasa antino ko kayade.

<sup>10</sup> Makkansoa gaanaar thurumbanam ki pugade. Kuusha nuudettsi yedea eezini gaari cecira ko wavade; konin wovoonoar baynsa antinbee noqona aapinabedarde.

<sup>11</sup> Eeziniasa naabeno Thaqima koda hambhe; noqonsaar antino thaqima ko maatade; thaqima konin dohonna thoothino eeno noqonam wucayse ko diyade.

<sup>12</sup> Oytsoa gaanaar thurumbanam ki pugade. Haynsa antinbee, arpinsa antinbee, wanconsaar antinbe ko qandhade; ogonante kesa antino soot ko maatade. Ogodettsi rooronsa antinbee sootinsa antinbe shaaka qolma ko maatade.

<sup>13</sup> Ogosa budonte shodara kalaa cecindar kinin pillenka i haapade. Kidi upsi gebhika yin ki giyade: "Shidhaana makkamma gaanana keeda thurumbanam kinin pugenka niven gaalen goynka peendar dahaana eenana hay! Hay! Hay!" kinin hamenka i qansade.

## 9

<sup>1</sup> Dongsoa Barjosa gaanaar thurumbanam ki pugade. Cecira peendar wavaa eezini kalaa i haapade. Kattsi theeri maaton oolonsa kerinam kinin bulea qulpi kina ko imbhade. <sup>2</sup> Kidiar theerin oolonsa kerinam ki bulade; nuu gebhira cuba utendettsi cubano theerin oolora ko utade. Oolora utoon cubanka haynbee peenbe ko thipade. <sup>3</sup> Cubansa iinka ayki peendar ko utade; peendar dahaana qolponasa kantadettsi maatea kanta kena ko imbhade. <sup>4</sup> Peendar dohoono caagino, shundho ko hannaar haaqano ko hannaar kenin kaysoamadettsi kena ko giidhade; kaysa keam zaskayno kesa wotindar Barjosa maytam yettsadhaamma eenam bishne. <sup>5</sup> Arpi dong keam kinin galshoadettsine, keam kinin deesoadettsi kena giidhadehe; keam kinin galshayno gaaleno qolpo eediam gavayse buccheadettsine. <sup>6</sup> Igina arpinaka eeno dembhinam koda zage, ko dahaannaar haapehe; diyana anngardha ko anngardhe, dembhi kekalanka koda gobe.

<sup>7</sup> Aykinaar banqinna ashkimberaana pardanadettsine; kesa metendarar worqinka ashkadhoono gobshi qoobhededettsi ko dahade; kesa aapin kerro eedi aapi keridettsine. <sup>8</sup> Maasa sitidettsi maatea siti kesa ko dahade; kesa atsinoar zobosa atsidettsine. <sup>9</sup> Kesa sadandar anngamoka ashkadhaa banqi koymo maatea ko dahade. Kesa kaapinsa upsino banqin raqindar gobayna thoothina pardanabee kinin gochen sargallanabesa\* upsidettsine. <sup>10</sup> Qolposa dubanadettsi maatea dubana kesa ko dahade; kesa dubananteer arpi dongna eediam bucchea davini ko dahade. <sup>11</sup> Kesa bitiar daane; kidiar kattsi theeri maaton oolonsa gaanaane; kisa naabenoar Ibra aponka Abaadon, Girik aponka Abholiyon koda hambhe.<sup>†</sup>

<sup>12</sup> Birono gaaleno sagidine; marrato! Ogosa budonte ab gaale lamaa koda nive.

<sup>13</sup> Laskoa gaanaar thurumbanam ki pugade. Barjo birante dohon worqinka ashkadhon Barjona qunyan daran cubshate imbhene raqinsa goyna oynnaka dahaana qoshimbhanaka upsi utaka i qansade. <sup>14</sup> Thurumbanam yedaa laskoa gaanaana "Gebhon bayn Epiraathissa gasante dhaxadhaana oynna gaananaam bulaa!" kina ko hamade. <sup>15</sup> Ogo savaatinbee, ogo rooronbee, agaa arpeabee, agaa leveabena ashkayse wodadhaana oynna gaananaam eedi naasisa antinam kinin deesoadettsi keam ko buldhade. <sup>16</sup> Pardandar dooqaana banqin eenasa paydinoar mato lamaa miiloon konin dohonam i qansade. <sup>17</sup> Pardanabee kedar dooqaana eenabeam Barjokala shedintonka keam inin haapoono yin ko dahade: Nuudettsibee, cecidettsibee, pulantidettsibe maatea banqi koymo yisa sadandar ke qaadhade. Pardanasa metenoar zobosa metedettsi ko dahade; kesa aporaar nuubee, cubabee, qolshinadettsibe koda ute. <sup>18</sup> Igina Barjosa wacimen dhahayna kesa apora uten nuunbee, cubanbee, qolshinandettsibeka eedi naasisa antino ko deesadhade. <sup>19</sup> Pardanassa kantano kesa apontebee kesa dubanantebe ko dahade. Kesa dubanno gunidettsine; pir mete kosa daane; eenam ogoka keda geve.

<sup>20</sup> Igina wacimenaka dembhira dhaqaana eedi naas yisa aanin waadimara maatayse Barjodar maatadehe. Beeronabee shedana way qansana way yaayana damimina

---

<sup>8:12</sup> Isi 13:10; Yuveel 2:31; 3:15.    <sup>9:2</sup> Pija 19:28.    <sup>9:4</sup> Wa Shedi 7:2-3.    \* <sup>9:9</sup> "Sargalla" hamen upsinam Haalin Mallan mathaapinsa macchinte thaapadhaanar shedaa.    <sup>9:9</sup> Yuveel 2:5.    † <sup>9:11</sup> "Abaadon" hamintano "kaye raq" hamintane; pir "Abholiyon" hamintano "kayseane" hamintane.    <sup>9:13</sup> Ut 30:1-3.

worqibee, birrebee, gawbee, seenibee, haaqabera aaninka ashkadhaana barjonabena goodiman garadehe. <sup>21</sup> Yin pir eediam deesintabee, palpala hayntabee, sharmuci-makko hayntabee, dimmakkobeam garayse Barjodar maatadehe.

## 10

### *Kantaysa Dahaa Gaanaabee Mathaapinbe*

<sup>1</sup> Ogosa budonte waa kantaysa dahaa Barjosa gaanaa polonam qaadhayse cecira kinin hanchenka i kiam haapade. Kisa meten gasante zili ko dahade; kisa aapin kerroar haydettsi koda shaake; kisa roonoar nuusa laabhinadettsine. <sup>2</sup> Bulimon mathaapinam yisa aanindar ki yedade. Mizaqa rootam bazindar, warkata rootam peendar ki hayade. <sup>3</sup> Zobo upsidettsi maaten upsinka ki ilatade. Kinin ilatenka tobbhaana guganatina yisa upsinka ke giyade. <sup>4</sup> Tobbhaana guganatina yisa upsinam kenin qansison wodanka inta thaapania i ashkimbhade. Yin ko dahaakaar, “Tobbhaana guganatina kenin giyonam aachika yedaa; thaapaabhode” hamea upsi cecinte i qansade.

<sup>5</sup> Ogosa budonte bazinbee peenbedar woyayse ki daaka inin haapaa gaanaa yisa mizaqa antaam cecindar dhaasayse, <sup>6</sup> rooro wul lay dehea, cecinbee kosa iinte dahaanabe, peenbee kosa iinte dahaanabe, bazinbee kosa iinte dahaanabeam pijaa Barjosa naabenka mallayse yin ki giyade: “Keeda kaara os Barjo kappehe! <sup>7</sup> Ko dahaannaar tobhsoa gaanaa thurumbanam kinin pugen wodanka, kina waadadhayna Barjokala qansayse eenna giyaynana kinin giyondettsi Barjosa aachin dhalqino koda thoothe” ki hamade.

<sup>8</sup> Cecira inin qansoono upsino “Bazinbee peenbedar woyaa gaanaasa aanindar buldhon mathaapinam yivayse tiyaa” hamayse pir ina ki giyade. <sup>9</sup> Gaanaakal yivayse “Mathaapinam ina imaa” kina i hamade. Kidiar “Tiyayse itsaa. Hasa aponte kuridettsi koda daathee; hasa iinaam buccha ko bucche” ina ki hamade.

<sup>10</sup> Intaar mathaapinam gaanaasa aanira tiyayse i itsade. Isa aponte kuridettsi ko daathade; inin itsonsa budonte isa iinaam ko buchade. <sup>11</sup> Ogosa budonte, “Thoothin peen eenbee, zarsinbee, apo waana waanaka giyenbee, binnabesa pir Barjokala qansayse giidhenam giya haam koda zaske” ina ko hambhade.

## 11

### *Lamaana Tarjana*

<sup>1</sup> Ogosa budonte koolidettsi maataa yinka kindadhea piiqa ina ko imbhade. Ina yin ko giidhade: “Dhaabhayse Barjosa gazan ooninbee marshan machadhen raqinbeam kindaa; ogote Barjona goodimayna eenaamaar paydaa. <sup>2</sup> Gazan ooninsa mayante dohon raqinam yekinsaabhode; ogo raqinam peen wulir dohon zarsinna konin imbhonna yekinsaabhode. Peen wulir dohon zarsinna gazan katamanam eedi lamaa kaysa apo lamaa arpi\* koam yisa kantanka keda wottse.

<sup>3</sup> “Lamaana isa tarjanana hayamo ida ime; kedar eepin apalan qaadhayse shii kalaabee, mato lamaabee, eedi makkam kaysa roorobena<sup>†</sup> Barjokala qansayse eenna keda giye” ina ki hamade. <sup>4</sup> Kedar peensa Imba maataa Barjo birante woyayna lamaana haaqana rimitinabee lamaana shaakan daran wodadhayna koymonabene.

<sup>5</sup> Hayyear kedar yer siya bovota yi zaganna, nuuno kesa apora utayse kesa banqin eenaam koda koqe. Kedar yer siya bovota zagayna wul kenin diyayno ogodettsinkane.

<sup>6</sup> Igina eena Barjokala qansayse eenna kenin giyen wodanka doobi qanoamadettsi cecinam diithana kesa hayamo daane; yin pir noqonaamaar zombhi hayayse ookana

<sup>9:20</sup> Maz 115:4-7; 135:15-17    <sup>10:7</sup> Daan 12:7; Amo 3:7.    <sup>11:1</sup> Yiz 40:3; Zakka 2:1-2.    \* <sup>11:2</sup> “Eedi lamaa kaysa apo lamaa arpi” hamintano “leve makkambee zalabe” hamintane.    <sup>11:2</sup> Luq 21:24.    † <sup>11:3</sup> “Shii kalaabee, mato lamaabee, eedi makkam kaysa roorobe” hamintano “leve makkambee zalabe” hamintane.    <sup>11:4</sup> Zakka 4:3bee 11-14be.

kesa hayamo daane; pir kenin zagen wodan wulka Barjosa wacimenka peenam ashana kesa hayamo daane.

<sup>7</sup> Yisa tarjamona kenin macchonsa budonte kattsi theeri maaton oolora utea dabta kembesana kinka banqi uxayse keam kida bashe; keam kida deese. <sup>8</sup> Kesa leesinaar kamsika eldhenga Sodoom way Gibth hambhen gebhon katamansa bhookante keda wodadhe; ogono katamano kesa Imbaam masqalindar konngayse ziitadhhoonone. <sup>9</sup> Peen wulrabee, multhan wulrabee, apon wulrabee, zarsin wulrabe maataana rooro makkambee zalabena kesa leesinaam keda shede; kesa leesinaamaar duukadhoa-madettsi keda mare. <sup>10</sup> Igina lamaana Barjokala qansayse eenna giyayna peendar da-haanaam kenin galshonna peendar dhaana kesa dembhinka keda wozadhe; bavaala rooroaka yiigadhendettsi hayaye keda yiige; kinka kinaar iminto keda ime.

<sup>11</sup> Roro makkambee zalabe sagonsa budonte Barjokala sadaka daadhenam imayno upsino kesa iir ko ardade; kediар roonka ke woyade. Keam shedayno eenoor kattsi ko kurtumbhade. <sup>12</sup> Ogosa budonte lamaana Barjokala qansayse eenna giyayna “Kote utee” hamea upsi gebhi cecira ke qansade. Keam jibbayna keam kenin haapenka polonka cecindar ke yivade.

<sup>13</sup> Ogo wodanka gebhi peendar ziga ko maatade; katamansa aan tabhi kalaa ko kottsimade; peenin zigimenka eedi shii tobbhaa ko diyade. Dembhira dhaqaanaar kattsi ke kurtumbhade; cecinte dahaa Barjoamaar ke gobshade.

<sup>14</sup> Lansono gaaleno sagidine; marrato! Makkansono gaalenoar saanawa koda nive.

### *Tobhsoa Thurumbaasa Pugadhidino*

<sup>15</sup> Tobhsoa gaanaar thurumba ki pugade. Cecintear  
“Peenam wottsano Imbaa wontea Barjobee

kinin qadhaa Kiristoosbesa ko maatade;  
kidi rooro wul lay bitima ki bitime!”

hamayna upsina gembha ke qansimade. <sup>16</sup> Barjo birante bitamon borkoton yinnondar dooqaana eedi kalaa kaysa apo oydi donzana yisa wotinka yirk hamayse Barjona ke goodimade. <sup>17</sup> Yin ke giyade:

“Enaar dahaa, taar dahaa, Wulam Wottsea Imbaa Barjo,  
gebhon hasa kantanam yedayse  
hanin bitimonna haam woda gobshe.

<sup>18</sup> Peen wulir dohoono zarsino ko wacimade;  
hasa wacimenoar ko nivade.

Diyaanadar hanin pirdayno pirdin wodanoar nividine.

Hana waadadhayna hasa ergenam hakala qansayse eenna giyaynabee, gazana een-  
abee, hasa naabenam gobshaynabena,  
likkanabee gebhi maataana eenabena  
kesa bazanam hanin imayno wodano,  
peen kaysaynaam hanin kaysayno wodano yeskidine”

ke hamade.

<sup>19</sup> Cecinte dohoono Barjosa gazano onnoar ko bulimade; kisa mallan upsinsa taa-bootinoar gazan ooninte ko haapadhade. Bhalqantbee, guganat upsibee, peensa zigabee, gebhi chechibe ko maatade.

## 12

### *Edonbee Qaariabe*

<sup>1</sup> Ogosa budonte gebhi maatea milkit cecindar ko haapadhade: Hay qaadhoono, arpinam yisa roon demente hayoono, tabhi lamaa wanconaaam yisa metendar gobshi

qoobhedettsi wodoono maa kallo ko haapadhade. <sup>2</sup> Kodiar sirma dahayse adhima burqo koam yedaysaka gaalite koda ilate.

<sup>3</sup> Ogora milkit ab cecinte ko haapadhade: Tobbhaa metebee tabhi qoshimbhabe yisa dahaa gebhi qaari zoo ki haapadhade; kisa metendarar tobbhaa bitsa gobshi qoobhe ko dahade. <sup>4</sup> Yisa dubanankaar wanconsa aan makkamra aan kalaam cecira gochate peendar ki dhabade. Adhanna hayen edonin adhen wodanka kosa naasaam manngana qaabayse qaaria kosa birante ki woyade.

<sup>5</sup> Edonoar zarsin wulam anngamo koolika wottsea naasi anngi ko adhade; kosa naasaamaar Barjobee daran kinin dooqon bitamon borkotonbekal ko tiidhade.

<sup>6</sup> Edonoar darandar gobate ko yivade. Shii kalaabee, mato lamaabee, eedi makkam kaysa roorobe\* ogote koam payya hayayse toolada koam kenin kunsoadettsi Barjo kona raq ki ashkade.

<sup>7</sup> Cecintear banqi ko dhaabhade. Mikaveelbee kisa gaananabe qaariabee kisa gaananabe kidar dhaabhaye banqi ke kansade. <sup>8</sup> Ko dahaannaar qaariabee gaananabe ke bashadhade; keeda kaara os cecinte kena raq haapadhadehe. <sup>9</sup> Peendar dohon een wulam dhaddhisea, daabilos way Seethaan hambhea gebhaa qaaria, ena biraaguniam peendar ko dhabadhade; kisa gaananaamaar kimbesana kinka peendar ko dhabadhade.

<sup>10</sup> Ogosa budonte gebhi upsi cecinte i qansade; ogonoar “Keeda wosa Barjoasa dhacchintanbee, kantanbee, bitamonbe pir, kinin qadhaa Kiristoossa hayamono nividine.

Harrna hambhidiana, sootinbee rooronbe wosa Barjoa birante imbananaam bersea cecira dhabadhidine.

<sup>11</sup> Kedi Yaatasa zombhinbee kesa tarjamonbeka kiam ke bashade; sadanna yisa burqadhima dembhingga yiam saskayse ke imade.

<sup>12</sup> Ogonante cecinbee kosa iinte dahaana wulbe, wozadhee! Peenbee bazinbena hay! Harrna hambhidiana,

Seethaan likka rooronin shidhonam dhesayse gebhi dhagadhaye yedar hanchidine” ko hamade.

<sup>13</sup> Qaaria yiam peendar dhabadhonam yinin haapenka naasa anngiam adhon edonam oytayan ki yedade. <sup>14</sup> Edono qaariasa birara pillate darante kona ashkadhon raqindar konin yivoadettsi gebhi shodara kaapi lamaa kona ko imbhade. Ogotear leve makkambee zalabe koam toolayse gidir ko kunsadhade. <sup>15</sup> Qaaria edonam noqonin itsoadettsi baynte mirsen noqoaddha maatea noqo yisa apora kosa budobar ki laalade.

<sup>16</sup> Peenoar bhaqayse edonam kelshota qaaria apora laymon noqonam ko wucade.

<sup>17</sup> Qaariar edondar kattsi wacimayse shidhaana kosa muldhanabesana kinka banqi kansota ki yivade. Kediar Barjoyn giyonam toolaynabee Yesusna gon eedi maatayse tarjaynabene. <sup>18</sup> Qaariar bazinsa gasante shaamindar ki woyade.

## 13

### Damma Lamaana

<sup>1</sup> Ogosa budontejabi kalaa bazira kinin utenam i haapade. Kisa qoshimbha tabhibee mete tobbhaabe dahade; kisa qoshimbhandarar tabhi bitsa gobshi qoobhe, kisa metendarar iirime\* naabe ko dahade. <sup>2</sup> Inin haapaa dabtaar shawdettsi ki dahade; kisa roonoar dib roodettsine; kisa aponoar zobo apodeettsine. Qaariar yisa kantanbee, yisa

<sup>12:3</sup> Daan 7:7. <sup>12:4</sup> Daan 8:10. <sup>12:5</sup> Maz 2:9; Wa Shedi 2:26; 19:15. \* <sup>12:6</sup> “Shii kalaabee, mato lamaabee, eedi makkam kaysa roorobe” hamintano “leve makkambee zalabe” hamintane. <sup>12:7</sup> Daan 10:13bee 21be; 12:1; Yiwda 1:9. <sup>12:9</sup> Pija 3:1; Luq 10:18. <sup>12:10</sup> Iyoob 1:9-11; Zakka 3:1. <sup>12:14</sup> Daan 7:25; 12:7. <sup>13:1</sup> Wa Shedi 17:3bee 7-12be. \* <sup>13:1</sup> “Iirime naabe” hambhoono Barjoam bagana qaabayse Barjosa naabenaam yisa metendar thaapayse kinin wodonam koda giye.

bitamon borkotonbee, gebhi hayamobeam kina ki imade. <sup>3</sup> Dabtaasa metea kalaadarar dembhidar yeskisea hajimi konin dohonam i haapade; dembhindar yeskisayno hajiminoar paashidine. Peendar dohoono eeno wul targadhada dabtaasa paanan yivan ko yedade. <sup>4</sup> Dabtaana hayamonam kinin imonna qaariana ko goodimade. “Dabtaam maatea hayne? Kimbesana kinka banqi kansana damea hayne?” hamada kumpurd-hayse dabtaana ke goodimade.

<sup>5</sup> Dabtaana pormakkobee iirime apobeka kinin giyoadettsi kina ko imbhade; eedi lamaa kaysa apo lamaa arpi<sup>†</sup> kinin wottsoadettsi hayamo kina ko imbhade. <sup>6</sup> Barjobee, Barjosa naabenbee, kinin dohon raqinbee, cecinte dahaanabeam iiran ki yedade. <sup>7</sup> Gazana eenam banqi kinin uxoadettsibee keam kinin bashoadettsibe hayamo kina ko imbhade. Muldhun wulbee, peen wul eenbee, apon wulbee, zarsin wulbedar hayamo kina ko imbhade. <sup>8</sup> Ena peen pijadhorra yedayse taxadhaa Yaatasa dayntan mathaapintenaabensa thaapadhaamma eena peendar dahaana wul dabtaana keda goodime. <sup>9</sup> Qaami yisa dahaa ea ki qanse.

<sup>10</sup> Uxate tiidhota dahaa uxate kida tiidhe;  
halpaka deesadhota dahaa halpaka kida deesadhe.

Ta keeda gazana eenasa darshintanka wocchimbhintanbee Barjodar woylamin qajintanbeyn haapadhayno ogo wodankane.

<sup>11</sup> Dabi ab peera kinin utenka i haapade. Yaatisa qoshimbha maatayna lamaa kisa qoshimbha ke dahade; kisa dhalqinoar qaaridettsine. <sup>12</sup> Kidi biraa dabtaasa birante yer wulam kisa hayamoka kida waadadhe. Dembhindar yeskisayno kisa hajimino paashaa biraa dabtaana peenbee peendar dahaana eenabe kina kenin goodimoadettsi ki haysade. <sup>13</sup> Eensa birante nuunam cecira peendar yinin nittsenka yekka kattsi tarshen yerinam kida waadadhe. <sup>14</sup> Biraa dabtaasa birante kinin waadadhoodettsi kina imbhaana milkitinadara dhaabhoono peendar dahaana eenam kida dhaddhise. Halpanka uxadhaysaka hajimbhayse paashaa sadanka maatayse dhaabhaa dabtaasa kamsinam peendar dahaana eenana kenin ashkoadettsi ki guyade. <sup>15</sup> Lansoa dabta biraa dabtaasa kamsinna upsi kinin imoadettsi hayamo kina ko imbhade. Ogo goynka kisa kamsi giyanabee kina goodimima wulbeyn deesadhoodettsi haysea kanta ki haapade. <sup>16</sup> Lansoa dabtaar likkanabee, gebhi maataanabee, wodimbhaanabee, qambhinabee, worshonabee, worsho maataammabe, eena wul mizaqa antaasa way yisa wotindar milkit kenin haydhoodettsi keam ki haysisade. <sup>17</sup> Dabtaasar naabe way kisa naabensa paydin dohon milkitin yisa qolma eedi hayyear shananabee shanshanabe kinin damimonam ki guyade.

<sup>18</sup> Pakalmakko konin zaskayno ogodarne; meskeysa dahaa eedi dabtaasa paydinam ki bhocche: Kisa paydinin dhahayno eediamne; kisa paydinoar mato laxbee eedi makkam kaysa apo laxbene (666).

## 14

### Yaatabee 144,000 Eenbe

<sup>1</sup> Ogosa budonte, marrato! Yaata Thiyoon dhukandar woyayse ki daaka i kiam haapade. Kimbesana kinkaar kisa naabenbee kisa Imbaasa naabenbe kesa wotindar thaapadhaana shii eedi tobbhaa kaysa apo oydi (144,000) eena ke dahade. <sup>2</sup> Gebhi noqo upsidettsibee gebhi guganatsa upsidettsibe maatea upsi cecira i qansade; inin qansoono upsinoar goolan qanayna kenin qanenka oolen upsin ko maatade.

<sup>3</sup> Bitamon borkotonbee, oynna dammabee, donzanabesa birante haali mazmur ke zammarade. Peen wulra shandhoono shii eedi tobbhaa kaysa apo oydin (144,000)

<sup>13:2</sup> Daan 7:3-7. <sup>† 13:5</sup> “Eedi lamaa kaysa apo lamaa arpi” hamintano “leve makkambee zalabe” hamintane.

<sup>13:6</sup> Daan 7:8bee 25be; 11:36; 2 Tese 2:3-4. <sup>13:7</sup> Daan 7:21. <sup>13:8</sup> Maz 69:28. <sup>13:10</sup> Erme 15:2; 43:11.

<sup>14:1</sup> Yiz 9:4-6; Wa Shedi 7:3.

eerra eedi ab ogo mazmuringam dhesana damea qolehe. <sup>4</sup> Ogono eeno maabesana sharmucimakko hayntaka yiam minngisaammo eeno duudinone. Yaatanin yiven raqin wulir kisa paananka yivayna kedine; Barjobee Yaatabena imbhama birana kenin doadettsi eensa shaarira shandhaana kedi iginane. <sup>5</sup> Yisa aponka buuda giyayse dhesehe; siya yer kedar qolehe.

### *Barjosa Pirdinam Dhettsisayna Makkamma Gaanana*

<sup>6</sup> Ogora budonte peendar dohon zarsin wulbee, multhan wulbee, apon wulbee, peen wulbena kinin giyoadeettsi rooro wul lay dohon Barjosa dhacchintan upsinam yedaa Barjosa gaana ab cecinte kinin pillenka i haapade. <sup>7</sup> Upsin gebhikaar “Barjoam kurtumbhee! Gobshiar kina imee! Harrna hambhidiana, kisa pirdin wodano nividine. Cecinbee, peenbee, bazinbee, noqon aapinbeam pijaa Barjona goodimee!” ki hamade.

<sup>8</sup> Pir lansoa gaanaa “Barjosa wacimenam beven minngisen sharmucimakkon waadadhensa woynin cuubadhonam zarsin wulam wushoono gembho Baabiloon katamano ko dhambade! Ko dhambade!” hamada bira gaanaasa paanan ki yivade.

<sup>9</sup> Pir makkansoa gaanaa upsi gebhika yin giyada kesa paanan yivite ki dahade: “Dabtaabee kisa kamsinbena goodimea, wotindar yisa way antaasa kisa milkitinam tiyea hay ki hannaar; <sup>10</sup> Barjo wacimensa wucadhenam kida wuce; ogono wucadhayno yer ab iir worsadhaammo Barjo wacimensa wucamon koymonka qolbadhoonone. Gaza maataana Barjosa gaananabee Yaatabesa birante nuuntebee qolshinantebe kida gaale. <sup>11</sup> Keam galshen nuura utayno cubanoar rooro wul lay koda ute; dabtaabee kisa kamsinbena goodimayna kisa naabensaar milkitinam tiyayna wul sootinbee rooronbe kesa ukunse qolehe” ki hamade. <sup>12</sup> Barjo yinin giyonam toolayna, Yesusdar woylamin qajintaka wocchimbhayna gazana eenasa darshintanin haapadhayno ogo wodankane.

<sup>13</sup> Ceciraar “‘Keeda kaara os Imbaa wontea Yesuska diyayna gobshadhaana eenane!’ hamayse thaapaa” hamea upsi i qansade. Manpas Gazanoar “Gonne; yisa waadimara ke ukunse kesa waadimano kesa paanan koda yive” koda hame.

### *Barjosa Wacimeno Peendar Konin Nivoono*

<sup>14</sup> Ogora budonte, marrato! Polo cawli i haapade; ogo polondar eedi naasiom maatea dooqayse ki dahade. Kisa metendarar worqinka ashkadhon gobshin qoobhenam ki hayade; yisa aaninkaar paten halpa cari yedidine. <sup>15</sup> Ab Barjosa gaana cecinte dohon Barjosa gazan oonira utayse, agaa polondar dooqaana “Peendar dohon isininsa patan wodano saanidine; ogona hasa paten halpanam yittsayse pataa!” hamayse upsi gebhika ki giyade. <sup>16</sup> Polondar dooqaar patan halpanam peendar ki yittsade; peendar dohon isininam ki buurade.

<sup>17</sup> Ab Barjosa gaanaa cecinte dohon Barjosa gazan oonira ki utade; kidi cari maaton patan halpan ki yedade. <sup>18</sup> Nuudarar hayamoysa dahaa ab Barjosa gaanaa Barjona marshan machadhen raqira utayse carin halpan yedaana “Woynin hattonsa aapino ushidine; ogona patan halpan hannonam yittsayse peendar dohon woynin hattonsa aapinam patayse pucchaa!” hamayse upsi gebhika kina ki giyade. <sup>19</sup> Barjosa gaanaar patan halpanam peendar ki yittsade; peendar dohon woynin hattonsa aapinam patayse ki pucchade; gebhon Barjosa wacimenam cuubadhsa iir ki dhabade. <sup>20</sup> Katamansa mayante dohon woynin hattonsa aapin cuubadhsa ogoam ko cuubadhsa; ogo raqira utoono zombhino eedi tabhi dong kaysa kilometir maatea pardansa aponka yekka ko mirsade.

## 15

### *Macchin Barjosa Wacimenam Yedaana Gaanana*

<sup>1</sup> Ab gebhi tarshea yer tura cecindar i haapade; ogonoar tobbhaana gembha burqon-aam yedaana tobbhaana Barjosa gaananaam i haapade. Igina tobbhaana burqona Barjosa wacimenin kanka thoothenna macchina burqonane.

<sup>2</sup> Pir nuu yindar yedea mastoot maatea baz i haapade; dabtaabee, kisa kamsinbee, kisa naabensa paydinbeam bashaanaam i haapade. Barjo kena imon goolanam ye-dayse, mastoot maaten bazinsa aponte kedi woydine. <sup>3</sup> Barjosa waadiman ea Musesa mazmurinbee Yaatasa mazmurinbeam yin giyada ke zammarade:

“Wulam Wottsea Imbaa Barjo,  
hasa waadimano gebhibee tarsheabene.

Eena binna wulsa bitaa,  
hasa goynoar tipabee gonbene.

<sup>4</sup> Imbo, haam kurtumbhimaabee  
hasa naabenam gobshimaabe hayne?

Harrna hambhidianna, gazaa ya bisheane.

Tipamon waadimano hasa konin haapadhonna  
zarsino wul hasa birante nivayse hana koda goodime.”

<sup>5</sup> Ogosa budobar i haapade; marrato! Cecinte dohoono tarja maaten apalan ooninsa iinte dohoono Gazisadhoono Ranqo ko bulimade. <sup>6</sup> Tobbhaana burqonaam yedaana tobbhaana gaanana ogo oonira ke utade. Bhalqantea apala cawli kedi qaadhidine; sadandar worqika ashkadha yer kedi dhaxidine. <sup>7</sup> Oynna dammasa kalaa rooro wul lay dehea Barjosa wacimen iir thoothaana tobbhaana worqinka ashkadhaana koymona igina tobbhaana Barjosa gaananana ki imade.

<sup>8</sup> Barjosa gobshinbee kantanbeka dhaabhoono cubano ogo Gazisadhon Raqinte ko thoothade; tobbhaana Barjosa gaanana kenin yedaana igina tobbhaana Barjosa wacimenam eshkayna gembha burqonayn thoothenka yekka eedi hayyear ogo Gazisadhon Raqinte ardana damea solehe.

## 16

### *Barjosa Wacimenam Yedaana Koymona*

<sup>1</sup> Ogosa budonte igina tobbhaana Barjosa gaananana: “Yivayse Barjosa wacimenam yedaana tobbhaana koymonaam peendar laalee!” hamea upsi gebhi ogo Gazisadhon Raqinte i qansade.

<sup>2</sup> Biraa gaanaa yivayse Barjosa wacimenam iir yedon koymon yinnonam peendar ki laalade. Dabtaasa milkitin yisa dahaanadar, kisa kamsinna goodimayna eenadar siya galshea hajimi ko utade.

<sup>3</sup> Lansoa gaanaar Barjosa wacimenam iir yedon koymon yinnonam bazinte ki laalade. Bazinoar eedi diyaasa zombhidettsi ko maatade. Bazinte sadanka dohoono wul ko diyade.

<sup>4</sup> Makkansoa gaanaar Barjosa wacimenam iir yedon koymon yinnonam baynabee noqona aapina elaynabedar ki laalade. Kediar zombhi ke maatade. <sup>5</sup> Noqondar hayamoynsa dahaa Barjosa gaanaa yin ki giyaka i qansade:

“Enaar dahaa, taar dahaa, gazaa Imbo,  
yin giyayse hanin pirdenka ya tipane.

<sup>6</sup> Harrna hambhidianna, gazana eenabee hakala qansaye  
eenna giyaynabesa zombhinam kenin laalonna,  
keam zombhi ha wushade; ogono keam zaskaynone”

ki hamade. <sup>7</sup> Marshan machadhayno ranqo

“Gonne, Wulam Wottsea Imbaa Barjo,

hasa pirdino gon hamabee tipabene”  
konin hamenka i qansade.

<sup>8</sup> Oytsoa gaanaar Barjosa wacimenam iir yedon koymon yinnonam hayndar ki laalade. Haynoar nuudettsi kattsi eenam konin koqoadettsi kanta kona ko imbhade.

<sup>9</sup> Eeno kattsi koqimen haynka ko atade. Igina wacimenadar kantaysa dahaa Barjosa naabenam ko iirade; gobshi kina imana seeso waadiman yinnonam garayse Barjodar maatadehe.

<sup>10</sup> Dongsoa gaanaa Barjosa wacimenam iir yedon koymon yinnonam dabtaasa bitamon borkotondar ki laalade. Dabtaasa bitamon ranqo thipa ko maatade. Eeno gebhon gaalera dhaabhonka atabhin yinnonam ko gavade. <sup>11</sup> Kosa gaalenbee hajiminbera dhaabhonka cecinte dahaa Barjoam ko iirade; seeson waadiman yinnonam garayse Barjodar maatadehe.

<sup>12</sup> Laskoa gaanaar Barjosa wacimenam iir yedon koymon yinnonam gebhon bayn Epiraathisir ki laalade. Haynsa utambar nivayna binnana goyi ashkota bayno ko dikade. <sup>13</sup> Qaariasa aporabee, dabtaasa aporabee, buudaka “Barjokala qansayse eenna inta giyeane” hameasa aporabe panqadettsina makkamma beerona kenin utenka i haapade. <sup>14</sup> Kedi tarshen yerinam hayyna beeronane; igina makkamma beerona Wulam Wottsea Barjosa kattsi gebhon rooroin\* yeskenka banqin uxota eenaam pucchana peendar dahaana binna wulkal niva ke nive.

<sup>15</sup> “Marrato! Inta diibidettsi ye dhesima ida nive. Pundiri yinin doamadettsibee pundirmakkonam eedinin haapoamadettsibe qaymayse apalan yinnonam qaadhayse toolea gobshadhaane” ki hamade.

<sup>16</sup> Igina beerona peensa binnaam Ibra aponka Armagedon† hambhen ranqinte banqina keam ke pucchade.

<sup>17</sup> Tobhsoa gaanaa Barjosa wacimenam iir yedon koymon yinnonam jibarendar ki laalade. Barjosa Gazisadthon Raqinte “Ta keeda thoothidine” hamayno upsi gebhi Barjosa bitamon borkotora ko utade. <sup>18</sup> Bhalqantibee, guganat upsibee, gebhi peendar zigabe ko maatade; peensa zigmamo kattsi gebhi konin dohonna eedin peendar pijadhorra yedayse ogodettsi peendar ziga zigmaye dhesehe. <sup>19</sup> Gembho katamano raq makkandar ko kashimade; peen wulir dahaana katamanaar ke dhambade. Barjo gebhon Baabiloon katamanam ki bhocchade; kattsi kisa wacimenin thoothon wucadhenam konin wucoadettsi koam ki hayade. <sup>20</sup> Bazinsa shaarinte dahaana peena wul gobayse ke yivade; dhukanaar yinin dohon raqinte haapadhadhehe. <sup>21</sup> Chechin eendar doobidettsi ko qanade; ogo chechin kalaa kalaanasa kilono eedi lamaa kaysa apo dongne. Ogono Barjosa wacimenam dhahayno chechin kattsi galshayno konin dohonna, eeno ogo chechin wacimen goynka Barjoam ko iirade.

## 17

### Gembho Sharmucimakkon Hayayno Edono

<sup>1</sup> Tobbhaana Barjosa wacimenam yedaana tobbaana Barjo gaananasa kalaa ikal nivayse, “Kote nivaa, thoothin noqondar dooqon sharmucimakkon hayen gebhon edondar yesken pirdinam hana ida dhee. <sup>2</sup> Peendar bitimaanaar kombesana kinka kedi sharmucimidine; peendar dahaana kombesana kinka sharmucimakko hayntaka wucamonka kedi bardhidine” ina ki hamade.

\* <sup>16:14</sup> “Wulam Wottsea Barjosa kattsi gebhon roorono” hambhoono “Barjosa roorono” hamintane. “Barjosa roorono” hamen upsinam Haalin Mallan mathaapinsa macchinte thaapadhaanar shedaa. <sup>16:15</sup> Maat 24:43-44; Luq 12:39-40; 1 Tese 5:2bee 4be; Wa Shedi 3:3. † <sup>16:16</sup> “Armagedon” Ibra aponka “Megedo dhuka” hamintane. 2 Binna 23:29bee Zakka 12:11be shedaa. <sup>16:18</sup> Wa Shedi 6:12; 8:5; 11:13bee 19be. <sup>16:20</sup> Wa Shedi 6:14. <sup>16:21</sup> Ut 9:23-24; Wa Shedi 11:19. <sup>17:1</sup> Erme 51:12-13. <sup>17:2</sup> Erme 51:7.

<sup>3</sup> Barjosa gaanaa Manpasinka darandar iam ki tiyade. Iirime naabe\* yikal thoothaa tobbhaa metebee tabhi qoshimbhabeysa dahaa zoa dabtadar dooqon mayn i haapade. <sup>4</sup> Edonoar apala zoo qaadhayse worqibee, kattsi bazaysa detha maataa seenibee, bazira kambhen inqubeka ko goobade. Kosa aanintear siyon yerinbee sharmucimakko waadi-maka minngimon yerinbeka thoothon worqinka ashkadhon wucadhen koymonam yedidine. <sup>5</sup> Wotindarar aachi dhalq dahaa naabe  
 “Gembho Baabiloon, sharmucimakkon hayaynabee  
 peendar dahaana minngina yerrabesa indanone”  
 hamayse ko thaapadhade.

<sup>6</sup> Edonoar gazana eenasa zombhinbee Yesussa tarja maataanasa zombhinbeka bari konin bardhonam i haapade; inin haapenka kattsi haali yer ina konin dohonna i targadhade. <sup>7</sup> Barjosa gaanaar ina yin ki guyade: “Harrnaa targadhaa? Edon goynsa aachin dhalqinam pir, koam baskea tobbhaana metenabee tabhi qoshimbhanabeysa dahaa dabtaasa aachin dhalqinam hana ida giye.

<sup>8</sup> “Hanin haapaa dabta ena daa, taaki solehe; budobar kattsi theeri maaton oolora kida ute, kayendar kida yive. Naaben yinnonamaar ena peen pijadhorra yedayse naaben yisa dayntan mathaapinte thaapadhaamma peendar dahaana eena dabta ena dahaa, taaki qolma, budobar nivaa kinin dohonam kenin shedenka targadha ke targadhe.

<sup>9</sup> “Pakalmakkoysa dahaa meskenin zaskayno kaatene: Tobbhaana edonin yindar dooqaana metena tobbhaana dhukanane. <sup>10</sup> Pir tobbhaana binnane; igin binna tobbhaanasa dongna kesa dhambidine, kalaa kesa daane; waa akar nivadehe. Kinin nivenka likka wodana kappa kiam koda zaske. <sup>11</sup> Ena birayse dahaa, taaki qolma dabta lankaysoa bitaane. Kidi tobbhaanasa kalaane; kayendar kida yive.

<sup>12</sup> “Hanin shedaana tambha qoshimbhana akar bitimaamma tambha binnane; ko dahaannaar dabtaabesana savaat kalaana kinka bitamonsa hayamonam keda tiye.

<sup>13</sup> igin tambha binnasa qaabono kesa kalaane; kedi yisa kantanbee hayamonbeam dabtaana keda ime. <sup>14</sup> Kedi Yaatabesana banqi keda kanse. Yaata imbanasaar Imbaabee binnasaar Bitaabe yinin dohonna keam kida bashe; kimbesana kinka dahaana, eelayse kambhaana, yidar woylamin qajadhaana eenane” ki hamade.

<sup>15</sup> Barjosa gaanaa ina yin ki guyade: “Sharmucimakkon hayayno edono daran ko dooqaka hanin haapaana noqona pee waana waana eedibee, thoothin eenbee, zarsi waana waanabee, apo waana waanaka dhalqayna eenabene. <sup>16</sup> Hanin shedaana tambha qoshimbhanabee dabtaabe sharmucimakkon hayen edonam jibba ke jibbe; kaye kodar keda beve; pundiri koam keda shiishe; waanam kosa itsa ke itse; nuukaar koam koqa ke koqe. <sup>17</sup> Kisa qaabonam kenin thoozoadetti qaabonam kesa woylaminte wodaa Barjone. Ogonante Barjosa upsinin thoothenka yekka kinka qaabo kalaaka maatayse yisa bitamonsa hayamonamaar dabtaana keda ime.

<sup>18</sup> “Hanin shedoono edono peendar dahaana binnadar bitimayno gembho kata-manone” ina ki hamade.

## 18

### Baabiloon Katamanin Dhamboono

<sup>1</sup> Ogosa budonte gebhi hayamoysa dahaa ab Barjosa gaanaa cecira kinin hanchenka i haapade. Kisa gobshin shaakanka dhaabhoono peen wul ko shaakade. <sup>2</sup> Upsi gebhika yin giyayse ki ilatade:

“Gembho Baabiloon katamano ko dhambade! Ko dhambade!  
 Beeronasaar wodhinta raq ko maatade;

\* <sup>17:3</sup> “Iirime naabe” hambhoono Barjoam bagana qaabayse Barjosa naabenaam yisa metendar thaapayse kinin wodonam koda giye. <sup>17:3</sup> Wa Shedi 13:1. <sup>17:8</sup> Maz 69:23. <sup>17:12</sup> Daan 7:24.

rumina wulsa wodhinta raq ko maatade;

siyanabee nashadhimina aptina wulbesa wodhinta raq ko maatade.

- <sup>3</sup> Harrna hambhidianna, peen wulir daahaana eena Barjosa wacimenam beven mingisen sharmucimakkon konin waadadhensa woyninam kedi wucidine; peensa binnaar kombesana kinka kedi sharmucimidine; peendar gaban gabimaynaar peen kogayn yerinam thoosota konin nashenna kedi wodimbhidine”

ki hamade.

<sup>4</sup> Cecira ab pir yin giyen upsi i qansade:

“Inna eenato, kosa seesonka yenin wormoamadettsi,  
kodar yesken Barjosa wacimenam dhehen burqonam yenin tiyoamadettsi kosa iira  
utee!

- <sup>5</sup> Harrna hambhidianna, seesono kosa cecin yeskidine;  
Barjoar ee konin hamaamon goynka wacimana bhocchidine.

- <sup>6</sup> Konin imaadettsi maasate konaar imee;  
konin hayon waadimara saskayse koam dhabshee;  
konin worson wuciman koymonte wucadhenamaar saskayse kona worsee.

- <sup>7</sup> Yiam gobshintabee peen kogayn yerinam yinante thoosintabeka konin dahaadettsi,  
ogodettsi gaalebee eepibeam thoosayse kona imee.

Harrna hambhidianna, kodi woylaminka yisa  
'Bitimaye inta dooqidine; inta qambhitehe;  
eepi hammin ko daahaakaar idar yeskehe' hamada erima ko erime.

- <sup>8</sup> Ogonante Barjosa wacimeno, ogonoar dembhibee, eepibee, daaqardhabe rooro  
kalaaka kodar koda yeske;  
nuukaar koam koda koqadhe.

Harrna hambhidianna, kodar pirdea Imbaa Barjo gebhi kantaane”  
ko hamade.

<sup>9</sup> Kombesana kinka sharmucimakkon hayaynabee peen kogayn yerinam thoosintaka  
dahaanabe peendar daahaana binna koam koqadhenka uten cubanam kenin haapenka  
kona ilataate keda eepe. <sup>10</sup> Kosa gaalenam kurtumbhada pegeka woyayse,

“Ya kantanka dohoono gembho katamano Baabiloono,  
hadar pirdino savaat kalaate konin nivonna hay! Hay!”

keda hame.

<sup>11</sup> Bazindara sagadhen gonngalante candhon yerinam kenante shanea eedinin qolmonna, peendar daahaana gaban gabimayna kona eepada keda ate. <sup>12</sup> Candhoono koymonoar worqibee, birrebee, kattsi gobshadhaana sennabee, inqubee, kattsi agen apalanbee, apala zoobee, gommakkonna qaadhadhen apalanbee, shittoysa dohon haaqan wulbee, dongarsa atsinka ashkadhaana koymona wulbe; pir kattsi agayna haaqanarabee, gawrabee, anngamorabee, cawli chechidettsi maataana sennarabe ashkadhaana koymona wul; <sup>13</sup> pir gaamen shittonna maaten haaqansa opiribee, woothi dheeshabee, gaamea haaqabee, kerbe hambhen gaamea shittobee, qunyabee, woynin cuubadhonbee, zaytbee, dhiilibee, gazgabee, yaatibee, waakibee, pardabee, sargallabee\*, worshonabee, banqira uxate baadhaanabene.

<sup>14</sup> Igina gaban gabimaynaar “Hanin annardhayno payyano yerro wul hakalanka pegadhadhayse yividine; hasa wodimmakkonbee gommakkonbe wul hakalanka yividine; ta keeda kaara os igina wulam hammin ko daahaakaar haapattane” hamayse kona keda giye. <sup>15</sup> Igina yerra wulam kona shanshayse wodimbhaana gaban gabimayna gebhi kosa gaalenam kurtumbhate pegeka keda woye. Eepadabee burqadhadabe,

<sup>18:2</sup> Isi 13:19-21; 21:9; Erme 50:39; 51:8-9; Wa Shedi 14:8.    <sup>18:3</sup> Erme 51:7.    <sup>18:4</sup> Isi 48:20; Erme 50:8; 51:6bee 45be.    <sup>18:5</sup> Erme 51:9.    <sup>18:6</sup> Maz 137:8; Erme 50:29.    \* <sup>18:13</sup> “Sargalla” hamen upsinam Haalin Mallan mathaapinsa macchinte thaapadhaanar shedaa.

<sup>16</sup> “Kattsi agen apalanbee apalan zoonbe qaadhayno,  
worqibee, bazaysa detha maataa seenibee, inqubeka ashkadhoono,  
gommakkonka gebhoono katamano, hay! Hay!”

<sup>17</sup> Harrna hambhidianna, ogoaddha hasa dohoono koymono savaat kalaate ko kayade”  
hamayse kona keda giye.

Bazindara sagadhen gonngalanasa hayonabee, kanka yivayna eena wulbee, kosa iir waadadhayna wulbee, bazindar gaban gabimayna wulbe pege ke woyade. <sup>18</sup> Konin atenka kosa iira uten cubanam yinin haapenka, “Ogo gebhon katamandettsi maatea katama ab dook?” hante ke ilatade. <sup>19</sup> Metendar yisa silalinam ke kahade; eepadabee burqadhadabe,

“Bazindara sagadhayna gonngalla yisa daahaana wul  
kosa koymonka ke wodimbhade;  
ogono gembho katamano savaat kalaate konin kayonna hay! Hay!”  
hante ke ilatade.

<sup>20</sup> Cecino, gazana eenabee, Kiristoos yisa tarjamonnante kinin yittsaynabee, Barjokala qansayse eenna giyaynabe,  
konin dhambonna wozadhee!

Yedar konin waadadhon goynka Barjo kodar pirdidine.

<sup>21</sup> Ogosa budonte kantaka daaa Barjosa gaana kalaa deesime seeniaddha hama seeni tiyayse yin giyayse bazinte ki dhabade:

“Gembho Baabiloon katamano  
yin kattsi kantaka kupadhaysaka koda dhambe;  
keeda kaara os hamin ko daahaakaar haapadhehe.

<sup>22</sup> Goolan yiigaynabee, gaadin anngammam qanaynabee,  
malkan pugaynabee, thurumban pugaynabesa upsino  
keeda kaara os hasa iinte qansimehe.

Yer ashkintaka pakalmakkon dhesaynasa  
pakala eedi kala hattear keeda kaara os haapadhehe;  
deesime deesadhensa upsiar keeda kaara os hamin ko daahaakaar qansimehe.

<sup>23</sup> Shaakayno shaakanoar keeda kaara os hasa iinte shaakehe;  
gaydon upsino keeda kaara os hamin ko daahaakaar hasa iinte qansimehe.

Hasa iir gaban gabimaynaar peen wulir gebhi maataana eena ke dahade;  
palpalan hannonka zarsin wulam ya dhaddhisidine.

<sup>24</sup> Kataman ogote Barjokala qansayse eenna giyaynabee, gazana eenabee, peendar deesadhaana eena wulbesa zombhino gidir ko haapadhade”  
ki hamade.

## 19

### Cecinte Barjona Gobshi

<sup>1</sup> Ogosa budonte eedi thoothisa upsidettsi maatea upsi gebhi cecinte i qansade:  
“Hale luya! Dhacchintabee, gobshibee, kantabe wontea Barjoana koda zaske.

<sup>2</sup> Harrna hambhidianna, kisa pirdino gon hamaabee tipabene.

Ogona peenam sharmucimakkon waadimanka yisa minngison gebhon edondar pirdidine;

koam dhabshintaka yina waadimaynasa zombhin bazanam kidi maasidine”  
ke hamade. <sup>3</sup> Pir,

“Hale luya! Iira utayno cubanoar rooro wul lay uta ko ute!”  
hamayse ke guyade.

<sup>4</sup> Eedi kalaa kaysa apo oydi donzanabee damma oynnabe bitamon borkotondar dooqaa Barjona wotinka yisa dhambayse “Amiin, hale luya!” hamada kina ke goodimade.

### *Yaatasa Gaydono*

<sup>5</sup> Ogosa budonte,

“Yedi kiam kurtumbhayna, kina waadadhayna wul,  
tokaa maataana eenabee gebhi maataana eenabee  
wosa Barjoam gobshee!”

hamea upsi bitamon borkotora ko utade.

<sup>6</sup> Thoothin eensa upsidettsibee, noqo gebhisa upsidettsibee, guganatsa upsi gehidettsibe maatea upsi yin giyaka i qansade:

“Hale luya! Wulam Wottsea wosa Imbaa Barjo bitimidine.

<sup>7</sup> Yaatasa gaydonin yeskonnabee uutano yiam konin ashkonnabe kattsi wo wozadhe;  
gobshiar Barjona wo ime.

<sup>8</sup> Kattsi agen apala cawli konin qaadhoadettsi kona ko imbhade”

ke hamade. Ogono kattsi agayno apallo gazana eenasa tipamon waadimanone.

<sup>9</sup> Ogosa budonte gaanaa “Yaatasa gaydon raqinte yiam eldhaana gobshadhaana eenane’ hamayse thaapaa” ina ki hamade. Ogoraar “Kono gon Barjo upsine” ina ki hamade.

<sup>10</sup> Inta kina goodimota kisa roon demente i dhambade. Kidiar “Garaa, yin hayaab-hode! Inta hambee Yesusin tarjonam yedaana hambanaanabesana kinka Barjona waadadhea eedine; Barjona goodimaa! Yesusin tarjoono Barjokala qansayse eenna giyaynasa tarjamondettsine” ina ki hamade.

### *Pardan Cawlindar Dooqaa Ea*

<sup>11</sup> Ogosa budonte cecin bulimaysaka i haapade; marrato! Parda cawli i haapade. Pardandar dooqaa eedi Gon Hamaabee Gonnye yiam hambhaabene. Kidi tipamoka kida pirde; tipamokaar banqi kida kanse. <sup>12</sup> Kisa aapinoar nuunsa laabhinadettsi koda maate; kisa metendarar bitsa gobshi ooqhe thoothi daane. Kikalanka eedi abinin dhesaammo naabe kidar thaapadhoono daane. <sup>13</sup> Kidi zombhika tittsadhaa apala ki qaadhade. Kisa naabenoar “Barjosa Upsi” koda hambhe.

<sup>14</sup> Pardana calladar dooqayse cecinte banqin kansayna kattsi agea daka yindar qolma apala cawli qaadhayse, kisa paanan ke yivade. <sup>15</sup> Zarsin wulam yinka kinin taxayno halpa cari kisa apora koda ute; kidiar anngamo koolika keam kida wottse. Kidi Wulam Wottsea Barjosa gebhon wacimenam eshkayno woynin aapinam iir cuubadhen raqinte aapinam iir kida tige. <sup>16</sup> Kisa apalanbee kisa gubeezinbedar “Binnasaar Bitaa, Imbanasaar Imbaa” hamea naabe thaapadhidine.

<sup>17</sup> Ogosa budonte hayndar woyaa gaanaam i haapade. Kidi cecinte pillayna aptina wulna upsi gebhika yin ki giyade: “Barjoyn ashkon gebhon galan raqindar nivayse bukee; <sup>18</sup> binnabee, banqin kansaynasa hayonabee, kantanka banqin kansaynabee, pardanabee, pardandar dooqayse banqin kansaynabee, worshonabee, worshomaataammabee, tokaanabee, gembha eenabee, een wulbesa waanam nivayse itsee” ki hamade.

<sup>19</sup> Dabtaabee, peen wuldar dahaana binnabee, kesa banqin kansaynabe pardandar dooqaaabee kisa banqin kansaynabeam banqi kansana bukayse ke daaka keam i haapade. <sup>20</sup> Ogora dabtaa ki yedadhade; kisa naabenka tarshea yer hayada dabtaasa milkitinam tiyaana kisa kamsinnaar goodimaynaam dhaddhisea, buudamoka “Barjokala qansayse eenna inta giyeane” hameam kimbesana kinka ki yedadhade. Ke

lamaanaamaar sadaka ke daaka nuusa baz maaten qolshinante keam ko dhabadhade. <sup>21</sup> Shidhaanaamaar pardandar dooqaasa apora uto halpanka keam ko deesadhade; aptina wul kesa waanam itsayse ke mishade.

## 20

### *Kiristoos Shii Levena Kinin Bitimayno*

<sup>1</sup> Kattsi theeri maaton oolonam bulen qulpinbee gebhi sansalabe yisa aaninka yedaa Barjosa gaanaa cecira kinin hanchenam i haapade. <sup>2</sup> Qaarium yedayse shii levena ki dhaxade; agaa qaaria daabilos way Seethaan hambhea ena bira guniane. <sup>3</sup> Kiam dhaxayse kattsi theeri maaton oolonte ki dhabade; keeda kaara os shii levenin magenka yekka zarsinam kinin dhaddhisoomadettsi oolonsa aponam kidar diithayse maytam daran ki qanade. Ogosa budonte likka wodana kiam bula koda zaske.

<sup>4</sup> Pir bitamon borkotonabee kedar dooqaanabeam i haapade; pirdi kenin pirdoadettsi hayamo kena ko imbhade. Yesusna kenin tarjonnabee Barjosa upsinam kenin giyonnabe yisa qorcin taxadhaanasa sadanaam i haapade. Igina eena dabtaabee kisa kam-sinbena goodimadehe; kisa milkitinamaar wotinbee aaninbedar yisa hayaammanc. Dembhira dhaabhayse Kiristoosbesana shii leve ke bitimade. <sup>5</sup> Ogoro birono dembhira dhaabhintanone. (Shidhaana diyaana eena shii levenin thoothenka yekka dembhira dhaabhadehe.) <sup>6</sup> Biron dembhira dhaabhintanam haapayna wul gobshadhaanabee gazaanabene; lanson dembhinsa kedar hayamo solehe. Kedi Barjobee Kiristoosbesa gudulla keda maate; Kiristoosbesana shii leve keda bitime.

### *Seethaanin Bashadhoono*

<sup>7</sup> Shii leven maqanna Seethaan dhaxira kida buldhe. <sup>8</sup> Peen wulir dohon zarsinam, Googbee Maagoogbe hambhen zarsinam, dhaddhisanabee banqi kenin kansoadettsi keam pucchanabe kida ute; kesa paydinoar bazinsa gasante dohon shaamindettsi koda dee. <sup>9</sup> Kedi peen wulir utayse gazana eena iir dohon nashadhon katamanam ke karade. Ko dahaannaar cecira nuu hanchayse keam koqate ko kaysade. <sup>10</sup> Keam dhaddhisaa Seethaan dabtaabee buudaka “Barjokala qansayse eenna inta giyeane” hameabeyn dohon nuusa baz maaten qolshinante kiam ko dhabadhade; rooro wul lay sootinbee rooronbe iir keda gaale.

### *Macchino Pirdino*

<sup>11</sup> Ogosa budonte gebhon cawlin bitamon borkotonbee kodar dooqaabeam i haapade. Cecinbee peenbe kisa birara ke gobade; raqaar kena haapadhadehe. <sup>12</sup> Diyaana tokaanabee gembhabe bitamon borkotona birante woyayse ke daaka keam i haapade. Mathaapinoar ko buldhade; mathaap ab ko buldhade, ogonoar dayntan mathaapinone. Diyaana eenaar mathaapinte thaapadhon kesa waadimandettsi pirdinam ke tiyade. <sup>13</sup> Bazinoar iinte yisa dahaana diyaanaam ko imade; dembhibee diyaana eenayn dohon raqinbe iinte yisa dahaana diyaanaam ke imade. Eedi kalaa kalaana kisa waadimandettsi pirdinam kina ko pirdadhade. <sup>14</sup> Dembhibee diyaana eenayn dohon raqinbeam nuun bazinte ko dhabadhade. Ogono nuun bazino lanson dembhinone. <sup>15</sup> Dayntan mathaapinte naaben yisa thaapadhaamma wul nuun bazinte ke dhabadhade.

## 21

### *Haalin Cecinbee Haalin Peenbe*

<sup>1</sup> Ogosa budobar haali cecibee haali peebe i haapade. Harrna hambidianna, ena biron cecinbee peenbe sagidine; baz keeda kaara os solehe. <sup>2</sup> Gazano katamano

hallo Yerusaalem geshoaka yisa kembhota yiam ashkon uutandettsi maatayse cecira Barjokalanka ko hanchaka i haapade.

<sup>3</sup> Gebhi upsi bitamon borkotora “Marrato! Barjosa onno eensa shaarintene; kidi kembesana kida dee. Kediar kisa eedi keda maate; Barjo kidi yinti kembesana kinka maatayse kesa Barjo kida maate. <sup>4</sup> Kesa ermitin wulam aapira kida qode. Dembhi keeda kaara os qolehe; siibee, eepibee, burqadhintabe keeda kaara os qolehe. Harrna hambidianna, ena hammo yerro sagidine” hamayse kinin giyenka i qansade.

<sup>5</sup> Bitamon borkotondar dooqaa “Marrato! Yer wulam haali ida haye” ki hamade. Inaar “Igina dhalqina shidhiminabee gon maataanabe kenin dohonna keam thaapaa” ki hamade. <sup>6</sup> Ogosa budonte ina yin ki giyade: “Keeda thoothidine! Biraabee maccheabe, yedinbee macchinbe intane. Dheebardhaana sadan imen elen noqora sun inta kina imayda ime. <sup>7</sup> Bashayse woyaa ogo wulam kida tiye; kisa Barjoa ida maate, kidi isa naasi kida maate. <sup>8</sup> Ko dahaannaar kurtumbhaynabee, Barjodar woylamin qajiminabee, gemmaanabee, eediam deesaynabee, sharmucimakkon hayaynabee, palpalan hayaynabee, aaninka ashkadhaana barjonana goodimaynabee, buuda giyayna wulbe, ke wulsa ranqo nuusa baz maaten qolshinantene; ogono lanson dembhinone” ina ki hamade.

### *Hallo Yerusaalem*

<sup>9</sup> Tobbhaana macchin burqonaam yisa koymonka thoosayse yedaana tobbhaana Barjo gaananasa kalaa nivayse, “Kote nivaa; Yaatasa maa maaton uutanam hana dhaayda dhee” ina ki hamade. <sup>10</sup> Gaanaa kattsi gudubh maaton dhukandar Mampasinka iam bavate yivayse, gazano katamano Yerusaalem cecira Barjokalanka han-chite ko daaka ina ki dhahade. <sup>11</sup> Katamano Barjosa gobshinka shaakite ko dahade; konin shaakayno shaakano mastootdettsi bhalqantea bazaysa detha maataa iyashbid seenidettsi ko dahade. <sup>12</sup> Keriya tabhi lamaa dohoono kattsi gudubh kermi kosa ko dahade. Tabhi lamaa kerradar tabhi lamaa Barjosa gaanana woyayse ke dahade. Kerra iginadarar tabhi lamaa Israveel eena muldhanasa naabe thaapadhidine. <sup>13</sup> Haynsa utambar keri makkam, haynsa wavambar keri makkam, peensa warkatambar keri makkam, peensa mizaqimbar keri makkam kosa ko dahade. <sup>14</sup> Kataman kerminsa ashkadhidino tabhi lamaana sennadarne; senna iginadar Yaata yisa tarjamonnante kinin yittsaana tabhi lamaana eenasa naabenam thaapadhidine.

<sup>15</sup> Ina giyea Barjosa gaanaa katamanbee, kosa kerminbee, kosa kerinbeamaar yinka kinin kindayno worqika ashkadhaa piiqa kisa aaninte ko dahade. <sup>16</sup> Katamansa gudumbakkonbee workamonbe kiaddha maataa raq oydi kosa ko dahade. Barjosa gaanaa kinden piiqanka kinin kindenka, kosa gudumbakkono shii lamaabee mato oydibe (2400) kilometir ko maatade; kosa workamonbee kosa woynthanbe ogodettsi ko maatade. <sup>17</sup> Barjosa gaanaar eedi kindendettsi kerminam ki kindade; kinin kindate shedenka kermino eedi tobbhaa kaysa apo oydi dhundhuma ko maatade. <sup>18</sup> Kerminsa ashkadhidino iyashbid hambhen seeninkane; katamano mastootdettsi bhalqanten payya maaton worqinka ko ashkadhadde.

<sup>19</sup> Kataman kerminsa woysadhidino seeni waana waanaka gobshayse ko ashkadhadde. Birono senno iyashbid, lanson senno senper, makkansono senno kelqedon, oytsono senno mergid, <sup>20</sup> dongsono senno serdoniks, laskono senno serdiyon, tobhsono senno kirstilobe, lankaysono senno birile, salsono senno wurawure, tabhsono senno kirsbirasis, tabhi kalsono senno yakinit, tabhi lanson senno ametesthinos koda hambhe. <sup>21</sup> Kerra tabhi lamaana tabhi lamaana bazira kambhaana inqunane; kerra kalaa

kalaana inqu kalaara ke ashkadhadde. Katamansa goynoar agen mastootdettsi maaten payyan worqinka ko ashkadhadde.

<sup>22</sup> Wulam Wottsea Imbaa Barjobee Yaatabe gaza kosa ooni kenin dohonna, ab gaza ooni iir haapaatine. <sup>23</sup> Katamannaar Barjosa gobshinin shaakennabee kona shaaka maataa yaata kinin dohonnabe, haynbee arpinbe kona konin shaakoadettsi zaskehe. <sup>24</sup> Peen wuldar dohoono zarsino kosa shaakante koda yaaye; peensa binnaar yisa gobshinam kona keda beve. <sup>25</sup> Kosa iinte sootinin qolmonna kosa kerro roro wul diithadhehe. <sup>26</sup> Peendar daahaana binnasa gebhamonbee gobshinbeam kodar keda beve. <sup>27</sup> Yaatasa dayntan mathaapinte naabeysa thaapadhaanakalanka siya maataana yerra wulbee, minngin yerinaam waadadhaynabee, buudan giyaynabe kosa iinte ardehe.

## 22

<sup>1</sup> Ogosa budonte Barjosa gaanaa Barjobee Yaatabesa bitamon borkotora uten payya maaton mastootdettsi bhalqanten, sadan imen baynsa noqonam ina ki dhahade. <sup>2</sup> Ogo baynsa noqono katamante dohon goynsa shaarinka taxate koda yive. Baynsa saabar-bee kobarbe arpinka arpinka ushada, levensa iinte tabhi lamaa goyt aapi ushayno sadan imayno hattono ko dahade. Kosa hacchano zarsinam pacchayno ko dahade. <sup>3</sup> Keeda kaara os ashime dehehe. Barjobee Yaatabesa bitamon borkotono kataman ogosa iir koda dee; kina waadadhaynaar kina keda goodime. <sup>4</sup> Kisa wotinamaar keda shede; kisa naabenoar kesa wotindar koda dee.

<sup>5</sup> Keeda kaara os sooti dehehe; Imbaa Barjoar kedar kida shaake; ogonante shaakabee haynsa shaakanbe keam zaskehe. Roro wul lay keda bitime.

### *Yesussa Maataate Nivintano*

<sup>6</sup> Ogosa budonte Barjosa gaanaa ina yin ki giyade: “Igina dhalqina shidhiminabee gon maataanabene. Manpasin yinnonam yikala qansayse eenna giyaynana imea Imbaa Barjo likka roorosa budonte maatayna yerraam yisa waadimaynana dhoota iam ki nittsade” ina ki hamade.

<sup>7</sup> Yesusaar “Marrato! Inta saanawa ida nive. Mathaapin kote thaapadhon Barjosa ergen upsinam toolea gobshadhaane” ki hamade.

<sup>8</sup> Ogo yerinam haapaabee qansaabe inta Wannisne. Igina yerraam inin qansonbee inin haapon wodankabe, igina yerraam ina dhahaa Barjosa gaanaana goodimana kisa roonkal i dhambade. <sup>9</sup> Kidiar “Garaa, yin hayaabhode! Inta hambee, Barjokala qansayse eenna giyayna hambanaanabee, mathaapin kosa upsinam toolaynabesana kinka Barjona waadadhea eedine; Barjona goodimaa!” ina ki hamade.

<sup>10</sup> Ogoraar ina yin ki giyade: “Rooronin yeskonna mathaapin ogote thaapadhon Barjosa ergen upsinam eedinin nabbaboamadettsi daran maytamka qanayse diithaabhode. <sup>11</sup> Keeda kaara os seeso waadadhea seesonam ki haye; minngamon waadadhear minngamonam ki haye. Tipamon waadadhea tipamon waadimanka ki wocchimbhe; gazaar gazamoka mete yisaam ki gishe” ina ki hamade.

<sup>12</sup> Yesusaar “Marrato! Inta saanawa ida nive. Een wulna yisa meteka meteka kesa waadimandettsi kena inin kashayno bazano ikal daane. <sup>13</sup> Biraabee maccheabe, biraabee budoabe, yedinbee macchinbe intane. <sup>14</sup> Sadan imen hattorra kamate itsanabee kosa kerinka katamadar ardanabe hayamo kesa doadettsi apalan yinnonam shivayna gobshadhaana eenane. <sup>15</sup> Qaskidettsi gobayaynabee, palpalan hayaynabee, sharmucimakkon hayaynabee, eediam deesaynabee, aaninka ashkadhaana barjonana

goodimaynabee, buudaam nashaynabee, ogoam giyaynabe wul katamansa oo mayante keda shidhe.

<sup>16</sup> “Inta Yesus ogo tarjamonam misken ooninte daahaana yena kinin giyoadettsi isa gaanaam i yittsade. Dawtsa muldhara daaha, shaakea eezinia intane” kida hame.

<sup>17</sup> Manpas Gazanbee uutanbe “Nivaa!” keda hame. Ogoam qansear “Nivaa!” ki hame. Dheebardhaar ki nive; nashaa sadan imen noqonam baza qolma ki wuce.

### *Macchino Kiilimeno*

<sup>18</sup> Mathaapin kote thaapadhon Barjosa ergen upsinam qansayna wulna inta tarjayda tarje: Hayyear upsin kodar kala hattear arsidi ki hanna, Barjo mathaapin kote thaapadhaana wacimenam kidar kida beve. <sup>19</sup> Hayyear mathaapin kote thaapadhon Barjosa ergen upsinasa kala hattear shiishea ea, mathaapin kote thaapadhon sadan imen hattorabee gazan katamarabe kina yeskenam Barjo kikalanka kida shiishe.

<sup>20</sup> Igina yerrana tarjea “Gon, saanawa ida nive” kida hame. Amiin, Imbaa wontea Yesuso, nivaa!

<sup>21</sup> Imbaa wontea Yesussa sunin imintono wo wulbesana\* ko dee; amiin.

---

<sup>22:16</sup> Isi 11:1bee 10be; 2 Bhethi 1:19.    <sup>22:17</sup> Isi 55:1.    <sup>22:19</sup> Yiggi 4:2; 12:32.    \* <sup>22:21</sup> “Wo wulbesana” hamenam ena mathaapin waani waanir “wulbesana” konin hamenka, waani “gazana eenabesana” keda hame; “gazana eena wulbesana” hamaynaar daane.